

Holy Bible

Aionian Edition®

**Ruáingga Injil Córif
Rohingya Kitabul Mukaddos**

AionianBible.org
The world's first Holy Bible untranslation
100% free to copy and print
also known as “ The Purple Bible ”

Holy Bible Aionian Edition ®
Ruáingga Injil Córif
Rohingya Kitabul Mukaddos
Language: Rohingya
Myanmar (Rakhine), Bangladesh (Chittagong)

Creative Commons Attribution ShareAlike 4.0 International, 2018-2026

Source text: eBible.org

Source version: 8/8/2026

Source copyright: Creative Commons Attribution ShareAlike 4.0

The Word for the World International, 2024

Formatted by Speedata Publisher 5.9.2 (Pro) on 8/31/2026

100% Free to Copy and Print

TOR Anonymously and <https://AionianBible.org>

Published by Nainoia Inc, <https://Nainoia-Inc.signedon.net>

All profits are given to <https://CoolCup.org>

We pray for a modern Creative Commons translation in every language
Translator resources at <https://AionianBible.org/Third-Party-Publisher-Resources>
Volunteer help and comments are welcome and appreciated!

Celebrate Jesus Christ's victory of grace!

Preface

Ruáingga at AionianBible.org/Preface

The *Holy Bible Aionian Edition* ® is the world's first Bible *un-translation*! What is an *un-translation*? Bibles are translated into each of our languages from the original Hebrew, Aramaic, and Koine Greek. Occasionally, the best word translation cannot be found and these words are transliterated letter by letter. Four well known transliterations are *Christ*, *baptism*, *angel*, and *apostle*. The meaning is then preserved more accurately through context and a dictionary. The Aionian Bible un-translates and instead transliterates eleven additional Aionian Glossary words to help us better understand God's love for individuals and all mankind, and the nature of afterlife destinies.

The first three words are *aiōn*, *aiōnios*, and *aiōdios*, typically translated as *eternal* and also *world* or *eon*. The Aionian Bible is named after an alternative spelling of *aiōnios*. Consider that researchers question if *aiōn* and *aiōnios* actually mean *eternal*. Translating *aiōn* as *eternal* in Matthew 28:20 makes no sense, as all agree. The Greek word for *eternal* is *aiōdios*, used in Romans 1:20 about God and in Jude 6 about demon imprisonment. Yet what about *aiōnios* in John 3:16? Certainly we do not question whether salvation is eternal! However, *aiōnios* means something much more wonderful than infinite time! Ancient Greeks used *aiōn* to mean *eon* or *age*. They also used the adjective *aiōnios* to mean *entirety*, such as *complete* or even *consummate*, but never infinite time. Read Dr. Heleen Keizer and Ramelli and Konstan for proofs. So *aiōnios* is the perfect description of God's Word which has *everything* we need for life and godliness! And the *aiōnios* life promised in John 3:16 is not simply a ticket to eternal life in the future, but the invitation through faith to the *consummate* life beginning now!

The next seven words are *Sheol*, *Hadēs*, *Geenna*, *Tartaroō*, *Abyssos*, and *Limnē Pyr*. These words are often translated as *Hell*, the place of eternal punishment. However, *Hell* is ill-defined when compared with the Hebrew and Greek. For example, *Sheol* is the abode of deceased believers and unbelievers and should never be translated as *Hell*. *Hadēs* is a temporary place of punishment, Revelation 20:13-14. *Geenna* is the Valley of Hinnom, Jerusalem's refuse dump, a temporal judgment for sin. *Tartaroō* is a prison for demons, mentioned once in 2 Peter 2:4. *Abyssos* is a temporary prison for the Beast and Satan. Translators are also inconsistent because *Hell* is used by the King James Version 54 times, the New International Version 14 times, and the World English Bible zero times. Finally, *Limnē Pyr* is the Lake of Fire, yet Matthew 25:41 explains that these fires are prepared for the Devil and his angels. So there is reason to review our conclusions about the destinies of redeemed mankind and fallen angels.

The eleventh word, *eleēsē*, reveals the grand conclusion of grace in Romans 11:32. Please understand these eleven words. The original translation is unaltered and a highlighted note is added to 64 Old Testament and 200 New Testament verses. To help parallel study and Strong's Concordance use, apocryphal text is removed and most variant verse numbering is mapped to the English standard. We thank our sources at eBible.org, Crosswire.org, unbound.Biola.edu, Bible4u.net, and NHEB.net. The Aionian Bible is copyrighted with creativecommons.org/licenses/by/4.0, allowing 100% freedom to copy and print, if respecting source copyrights. Check the Reader's Guide and read at AionianBible.org, with Android, and with TOR network. Why purple? King Jesus' Word is royal and purple is the color of royalty! All profits are given to CoolCup.org.

History

Ruáingga at AionianBible.org/History

06/21/75 - Two boys, P. and J., wonder if Jesus saves all and pray.
04/15/85 - Aionian Bible conceived as B. and J. pray.
12/18/13 - Aionian Bible announced as J. and J. pray.
06/21/15 - Aionian Bible birthed as G. and J. pray.
01/11/16 - AionianBible.org domain registered.
06/21/16 - 30 translations available in 12 languages.
12/07/16 - Nainoia Inc established as non-profit corporation.
01/01/17 - Creative Commons Attribution No Derivatives 4.0 license added.
01/16/17 - Aionian Bible Google Play Store App published.
07/01/17 - 'The Purple Bible' nickname begins.
07/30/17 - 42 translations now available in 22 languages.
02/01/18 - Holy Bible Aionian Edition® trademark registered.
03/06/18 - Aionian Bibles available in print at Amazon.com.
09/15/18 - Aionian Bible dedicated as J. and J. pray again.
10/20/18 - 70 translations now available in 33 languages.
11/17/18 - 104 translations now available in 57 languages.
03/24/19 - 135 translations now available in 67 languages.
10/28/19 - Aionian Bible nursed as another J. and J. pray.
10/31/19 - 174 translations now available in 74 languages.
02/22/20 - Aionian Bibles available in print at Lulu.com.
05/25/20 - Illustrations by Gustave Doré, La Grande Bible de Tours, Felix Just.
08/29/20 - Aionian Bibles now available in ePub format.
12/01/20 - Right to left and Hindic languages now available in PDF format.
03/31/21 - 214 translations now available in 99 languages.
11/17/21 - Aionian Bible Branded Leather Bible Covers now available.
12/20/21 - Social media presence on Facebook, Twitter, LinkedIn, YouTube, etc.
01/01/22 - 216 translations now available in 99 languages.
01/09/22 - StudyPack resources for Bible translation study.
01/23/22 - Volunteers celebrate with pie and prayer.
02/14/22 - Strong's Concordance from Open Scriptures and STEP Bible.
02/14/23 - Aionian Bible published on the TOR Network.
12/04/23 - Eleēsē added to the Aionian Glossary.
02/04/24 - 352 translations now available in 142 languages.
05/01/24 - 370 translations now available in 164 languages.
08/05/24 - 378 translations now available in 165 languages.
08/18/24 - Creative Commons Attribution 4.0 International, if source allows.
10/20/24 - Gospel Primer handout format.
11/24/24 - Progressive Web Application off-line format.
01/28/25 - All profits are given to CoolCup.org.
03/12/25 - 382 translations now available in 166 languages.
06/21/25 - 468 translations now available in 230 languages.
09/01/25 - 538 translations now available in 291 languages.
08/31/26 - 539 translations in 291 languages with 9,609,899 verses.

Table of Contents

NEW TESTAMENT

Moti	11
Markus	39
Lukás	57
Yohánna	87
Hamól	110
Romiól	140
1 Kórintiól	153
2 Kórintiól	166
Galatiól	174
Íficiól	179
Filíppaiól	184
Kolóciól	187
1 Tisólioniól	190
2 Tisólioniól	193
1 Timóti	195
2 Timóti	199
Titus	202
Filimon	204
Hibraniól	205
Yakub	214
1 Fitor	218
2 Fitor	222
1 Yohánna	224
2 Yohánna	228
3 Yohánna	229
Yohúdah	230
Zahéri	231

APPENDIX

Reader's Guide

Glossary

Maps

Destiny

Illustrations, Doré

NEW TESTAMENT



Isá ye hoór de, “Ó Baf, itará re maf goró; kiyólla-hoilé itará kii gorér de híyan itará no zane.”

Baade itara loṭári mari itarar bútoṛe Íbar hoorsuor ore bák goijjé.

Luke 23:34

Moti

1 Isá Mosih óilde Dawud or nosól or, aar Dawud óilde Ibrahim or nosól or. Isá Mosihr fissán or foriso endilla: **2** Ibrahim or fua Isahák; Isahák or fua Yakub; Yakub or fua Yohúdah edde yóggwar báiyain. **3** Yohúdahr fua Fares edde Zera, aar ítarar maa accíl Tamar; Fares or fua Hisron; Hisron or fua Ram. **4** Ram or fua Amminadab; Amminadab or fua Nacon; Nacon or fua Sálmon. **5** Sálmon or fua Boaz, yóggwar maa accíl Rahába; Boaz or fua Obed, yóggwar maa accíl Ruút; Obed or fua Jesi. **6** Jesir fua baáñcca Dawud. Dawud or fua Sóloman, yóggwar maa óilde Borciba, zibá age Uriyar bou accíl. **7** Sóloman or fua Rehobom; Rehobom or fua Abiya; Abiyar fua Asa. **8** Asar fua Jehócafát; Jehócafát or fua Joram; Joram or fua Uziya. **9** Uziyar fua Jotam; Jotam or fua Aház; Aház or fua Hézekiya. **10** Hézekiyar fua Manasé; Manasér fua Amon; Amon or fua Josíya. **11** Josíyar fua Jekoniya edde yóggwar báiyain. Ítarar zormo oñtté óoil zeñtté Isráil koum ore bondi banai Babilon dec ot loizar. **12** Íln óilde ítara re bondi banai Babilon ot loizai baade: Jekoniyar fua Cáltiyel, Cáltiyel or fua Zerubabel. **13** Zerubabel or fua Abihúd; Abihúd or fua Eliyakím; Eliyakím or fua Azor. **14** Azor or fua Sádok; Sádok or fua Akim; Akim or fua Elihúd. **15** Elihúd or fua Eliyazar; Eliyazar or fua Matan; Matan or fua Yakub. **16** Aar Yakub or fua óilde Moriyam or hócom Yusúf. Hé Moriyam ottu Isá zormo óoil, zibá re Mosih bóuli hoó. **17** Héndilla góri Ibrahim ottu lóti Dawud foijjonto soiddó fissán. Dawud ottu lóti Babilon ot bondit loiza foijjonto soiddó fissán; aar bondi banai Babilon ot loiza ttu lóti Mosih foijjonto soiddó fissán. **18** Isá Mosihr zormo endilla gori óiye: Íbar maa Moriyam or zuragatá Yusúf lói óoil, montor ítara milmilab goríbar age, Pak-Ruhr kudurute híba hámil óiye de faa giyé. **19** Híbar hócom Yusúf forhésar manúc accíl. Yóggwa ttu zettót Moriyam ore maincór muúntu córom díto mone no hoór, híba ttu zuitégori alok óizaytoi niyot goijjíl. **20** Yóggwa ye híyan báfer de októ, Mabud or ek fírista ye yóggwa re cóppon ot dahá dí hoór de, “Ó Dawud or nosól Yusúf, Moriyam ore biyá goitté no ñooraiyó, kiyólla-hoilé híbar ferot ze Fua óiye Íba Pak-Ruhr kudurute óiye deh. **21** Híba ttu éggwa Morotfua óibo, tuñí íbar nam Isá rakíba, kiyólla-hoilé Íba ye Nizor manúc ókkol ore ítarar guná ttu basaíb.” **22** Híin beggún etollá óiye, zeéne Mabude nobir duara

hoóil de yían fura ó, **23** “Soó, ek kuwári mayafua hámil óibo, aar híba ttu éggwa Morotfua óibo, ítara Íbar nam rakíbo de Immanuel,” ziyán or torjuma óilde, ‘Alla añárar fúañti.’ **24** Baade Yusúfe gúm ottu urí undilla goijjé zendilla gori bolla Mabud or fírista ye yóggwa re hókum díyl, yóggwa ye Moriyam ore biyá gorífelaiye, **25** montor híba ttu Fua wa zormo nó óiyo foijjonto híba llói milmilab nó goré. Baade yóggwa ye Fua war nam Isá raikkíl.

2 Yohúdiya elakar baáñcca Hérud or hale, Betélhem cóor ot Isá zormo ói baade, fuk mikká ttu hoozzon fonðit Jerúsalem ot aiccé, **2** aái hoór de, “Yohúdi ókkol or Baáñcca zibá zormo óiye Íba horé? Añára fuk mikká Íbar tara deki Íba re sóida goittó aiccí deh.” **3** Híyan fúni baáñcca Hérud ferecan óigilgoi, héndilla Jerúsalem or manúc beggún óu. **4** Yóggwa ye ñoóñr imam ókkol edde alem ókkol beggún ore ekkán ot dolagorí, ítara ttu Mosih horé zormo óibar asé híyan zasai goijjíl. **5** Ítara yóggwa re hoór de, “Yohúdiya elakar Betélhem ot, kiyólla-hoilé nobi ye endilla leikké: **6** ‘Ó Yohúdiya elakar Betélhem, Yohúdiyar hókumot-goróya ókkol or bútoe tui honó mikká ttu cóñro no; kiyólla-hoilé tor bútotu eén ézzon Hókumot-goróya aibó, zibá ye Añr bonda Isráili re soraibó.’” **7** Hétunot Hérude fonðit tún ore aiddone matai zaniloiyé de, tara wa borabor hotúnot dahá gíyl. **8** Baade yóggwa ye ítara re eén hoói Betélhem ot diferáiyé, “Tuáñra zai hé gura Fua wa re cúndorgori tuwogói. Íba re loot faile añré hóbor díyo, zeéne añí yó aái Íba re sóida gori fari.” **9** Ítara baáñccar hotá fúni bacá lóiyé, aar ítara fuk mikká ze tara deikkíl, yíba Fua wa ziyóñt asé ínyot zai nó tíya foijjonto ítarar age-age zaat accíl. **10** Tara wa deki ítara ódorbaára kúci óiye. **11** Ítara gór gán ot foóñsi yore, Fua wa re Íbar maa Moriyam or fúañti deikké; baade ítara merít fori Íba re sóida goijjé. Tarfore ítara nizor baccú gún kúli cúna, luban edde mur añtor ókkol Íba re hádiya diiyé. **12** Aar Hérud or hére waafes no zaito cóppon ot Allar torfóttu úñciyari fai, ítara arek boli nizor mulluk ot fíri giyégoi. **13** Fonðit tún zaigói baade, Mabud or ek fírista ye Yusúf ore cóppon ot dahá dí hoór de, “Uró, Fua edde Íbar maa re looi Íjíp ot dáizogoi. Añí zetóðin nó hoói hétodin foijjonto hére tákiyo, kiyólla-hoilé Hérude Fua wa re marifélai bolla tuwaibó.” **14** Hétunot Yusúf urí rait tákite Fua edde Íbar maa re looi, Íjíp olla bacá lóiyé, **15** aar Hérud nó more foijjonto hére táikkil. Híyan etollá

óíye, zeéne Mabude nobir duara hoóil de yían fura ó, “Añí Añr Fua re Ijíp ottu ðahai ainní.” 16 Hérude zeñtté Fonðit túne yóggwa re bóoñt díye de zainné, yóggwa ttu bicí guccá uitté; aar hé fonðit tún ottu ze októ hotá zanilóil hé októ ísaf mozin, Betélhem ot edde híyan or atehañosór zaga ókkol ot dui bosór edde yár nisor zedún morotfuain asé, ítarar hañse manúc diferái itara beggún ore marifélaíye. 17 Híyane nobi Yarmíyahr duara hoóil de yían fura óíye, 18 “Ramá cóor ot eggwá abas fúna gíyeh, hañdanir edde bicí ferecanir. Rahéla ye nizar fuain dor lla hañder, aar tosóllo kobul no gorér, kiyólla-hoilé itara ar náí.” 19 Zeñtté Hérud morigiyói, Mabud or ek fírista ye Yusúf ore Ijíp ot cóppon ot dahádiye, 20 aar hoór de, “Uró, Fua edde Íbar maa re looi Isráil mulluk ot waafes zoogói, kiyólla-hoilé zetará niki Fua wa re zane marifélaito tuwaáil itara morigiyói.” 21 Tói Yusúf urí, Fua edde Íbar maa re looi Isráil mulluk ot waafes aaigiyoi. 22 Montor yóggwa ye zettót endilla fúinne, Arkeláyose Yohúdiyat tar baf Hérud or zagat hókumot gorér, tói yóggwa hére zaite ðooraiyé. Baade cóppon ot Allar torfóttu úñciyari fai, Galil elakat giyyégoi, 23 aar zai Nasárat nam or ekkán cóor ot bocót gorát doiije. Héndilla etollá óíye, zeéne nobi ókkol or duara hoóil de yían fura ó, “Íba re Nasári howá zaybo.”

3 Ek din báp̄tismadoya Yaháya aái, Yohúdiyar moidan zagat endilla hoói tobolik gorát doiije, 2 “Touwá goró, kiyólla-hoilé asmani raijjo ðáke aaigiyoi.” 3 Yóggwa óilde ubá zibár baabute nobi Yesáyah ye hoóil de, “Moidan zagat ezzone guzori-guzori eén hoór, ‘Mabud or foñt toiyar goró; Íbar rasta uzu goró.’” 4 Yaháya ye uñt or keñc loi banaiya hoor fiñdíto, aar yóggwar keeñil ot samarar duali baindá tákito. Yóggwar hána accíl de fíring edde zooñl or modú. 5 Hé októ Jerúsalem ottu, tamám Yohúdiya ttu, edde Jordán hál or sairókul ttu manúc ókkol yóggwar hañse giyyé, 6 aar nizar-nizar guná ókkol ckar gorí, itara Jordán hál ot yóggwa ttu báp̄tisma loiyé. 7 Yóggwa ye zeñtté Féroci ókkol edde Sadukái ókkol boóut zone báp̄tisma loito yóggwar hañse aiyér de deikké, yóggwa ye itara re hoór de, “Ó háf or fuain ókkol! Aibár gozzob ottu dáizayboi lla tuáñra re hone úñciyari díye? 8 Touwá lói mil há de héndilla gulagala ókkol dóro, 9 aar nizar dil ot endilla kíyal nu ainnó de ki, ‘Añára ttu toh baf ísafe Ibrahim asé.’ Añí tuáñra re hoóir, Alla ye sailé e cíl lun ottu yó Ibrahim olla fuain foida

gorí fare. 10 Aar ehón toh gas or gurat kuróil raká gíyeh. Hétolla, ze gas ot gom gula no dóre, yíba re hañi ooin ot félaidiya zaybo. 11 Añí de tuáñra touwá goijjó de hétolla éna tuáñra re fanít báp̄tisma díh; montor añí baade zibá aiyér, Íbar tokka añr túaro doóñr. Añí Íbar cenjár boi bolla úddwa laayek no. Íba ye tuáñra re Pak-Ruh edde ooin loi báp̄tisma díbo. 12 Íbar kula Íbar át ot asé; Íba ye Nizar hoñla re cúndorgori sáf goríbo, aar Íbar giyuñ re gudam ot zoma goríbo, montor suwa gún ore Íba ye honódin no nifé de ooin ot furat difélaibo.” 13 Hé din ókkol ot, Isá báp̄tisma loito Galil ottu Jordán hál or hañsat Yaháyar hére aiccé. 14 Montor Yaháya ye Íba re endilla hoói maná goittó kucíc goijjíl, “Añr ttu éna Tuáñr hañsóttu báp̄tisma loibar zorur, aar Tuñí añr hañse aiccó dé?” 15 Montor Isá ye zuwabe yóggwa re hoór de, “Ebar yían óito dóh, kiyólla-hoilé endilla gori añára ttu, Alla ye saár de híyan fura gorár zorur.” Tói yóggwa razi óíye. 16 Isá báp̄tisma loi mottor, faní ttu kul ot uittégai. Hétunot asman kúligiyoi, aar Íba ye deké de, Allar Ruh hoitor or dóilla ói lami aái Íbar uore boiyér. 17 Aar héñtte asman ottu éggwa abas aiccé, eén hoór de, “Íbá Añr adorja Fua, Íbá re lói Añí bicí kúci.”

4 Yárbaade Pak-Ruh ye Isá re moidan zagat loigiyé, zeéne Íba re Ibilíce entán goré. 2 Salic din salic rait ruza rakí baade Íba ttu búk laiggé. 3 Hé októ entán-goróya aái Íba re hoór de, “Zodi Tuñí Allar Fua de óile, e fattór gún ore ruñi óizaytoi hókum dóh.” 4 Montor Íba ye zuwabe hoór de, “Pak-kalam ot endilla asé, ‘Manúc siríf ruñi loi base de no, bólke Allar muk ottu neele de hárr hotá lói beh base.’” 5 Tói hé Ibilíce Íba re pak cóor gán ot loizai, baitul-mukaddos or tullit tíyagaraiye, 6 baade Íba re hoór de, “Zodi Tuñí Allar Fua de óile, nise záp maro; kiyólla-hoilé pak-kalam ot toh endilla asé, ‘Íba ye Tuáñr baabute Nizar fírista ókkol ore hókum díbo; tói itara nizar áte Tuáñre dórifelaibo, zeéne Tuáñr ténge honó fattór ot duk no faa.’” 7 Isá ye ítare hoór de, “Pak-kalam ot toh yían óu asé, ‘Tuñí tuáñr Mabud Alla re entán no goríba.’” 8 Tarfore Ibilíce Íba re eggwá uñsol faár ot loizai, duniyair tamám raijjo ókkol edde híin or fura cáandari daháíye. 9 Tói íte hoór de, “Zodi Tuñí merít fori añré sóida goró, añí iín beggún Tuáñre diifélaíyum.” 10 Isá ye ítare hoór de, “Cóitan, dur ó! Pak-kalam ot endilla asé, ‘Tuñí tuáñr Mabud Alla re beh sóida goríba, aar siríf Íbar beh ebaadot goríba.’” 11 Hétunot Ibilíce Íba re eri giyyégoi, aar fírista ókkol

aái ĩba re hédmot gorát doijje. **12** Zeñtté Isá ye Yaháya re ziyól ot díye de fúinne, ĩba Galil ot giyyói; **13** aar Nasárat cóor félai, Zebulun edde Naftalir zagat đír hańsa loi asé de Kaparnahúm cóor ot zai táikkegoi. **14** Híyan etollá óiye, zeéne nobi Yesáyahr duara hoóil de yían fura ó, **15** “Zebulun or elakat edde Naftalir elakat, doijjar rastat, Jordán hál or okule, Beyohúdi ókkol or Galil ot, **16** ze manúc ókkol andár ot accíl, ítara ekkán đoóńr foór deikké, zetará moot or andárja mulluk ot accíl, ítara hańse foór óiye.” **17** Hé októt lóti Isá ye eén hoói tobolik gorát doijje, “Touwá goró, kiyólla-hoilé asmani raijjo dáke aáigiyoí.” **18** Isá Galil Đír hańsa báy áńři zaar de októt, ĩba ye duwá bá deikké, yáni Sáimon, zibá re Fitor đaikké edde ĩbar bá Enderiyas ore. Héñtte ítara đíft zal marer, kiyólla-hoilé ítara zailla accíl. **19** ĩba ye ítara re hoór de, “Ańr fisáli doro, Ańi tuáńra re manúc dóre de zailla banaiyúm.” **20** Ítara éhon or bútoe ítara zal lun eri, ĩbar fisáli doijje. **21** Híyan ttu aró hoddúr giyyé rár, ĩba ye aró dui bá deikké, yáni Zebedair fua Yakub ore edde yóggwar bá Yohánna re. Héñtte ítara noowr uore ítara baf Zebedair fúańti zal řuner. ĩba ye ítara re mataiyé, **22** hétunot ítara éhon or bútoe noow gán edde baf ore eri, ĩbar fisáli doijje. **23** Isá ye Galil or agagura zai-zai Yohúdir mujílíc-hána ókkol ot taalim dito edde raijor kúchóbor tobolik goittó, aar maincór fottí kisím or biyaram edde fottí kisím or ocúk ókkol gom goittó. **24** ĩbar hóbor Sińriyar agagura fóliligloi; aar maincé biyaraimma zetará ttu đoilla-bođoilla biyaram asé edde duk faar, zetará búte-faiya, zetará ttu súańfira asé, zetará ańtur, ítara beggún ore ĩbar hańse ainné, aar ĩba ye ítara re gom goijje. **25** Galil ottu, Dekapólis ottu, Jerúsalem ottu, Yohúdiya ttu, edde Jordán hál or farkul ottu dol-dol manúc ĩbar fisá doijil.

5 Manúc or dol deki Isá eggwá faár or uore uittégoi, aar ĩba boiccé rár, ĩbar cárít tun ĩbar hére aiccé. **2** Hétunot ĩba ye Nizor muu kúli ítara re endilla taalim diyat doijje: **3** “Mubarek uitará, zetará ruńhanir gorif, kiyólla-hoilé asmani raijjo toh ítara. **4** Mubarek uitará, zetará ferecanit asé, kiyólla-hoilé ítara tosólli faibo. **5** Mubarek uitará, zetará cída, kiyólla-hoilé ítara toh duniyai miras faibo. **6** Mubarek uitará, zetará Allar moncá mozin goittó búkki edde tiráci, kiyólla-hoilé ítara hé moncá furafuri fura óibo. **7** Mubarek uitará, zetará rahám dil ola, kiyólla-hoilé ítara re

rahám gorá zaybo. **8** Mubarek uitará, zetarár dil sáf, kiyólla-hoilé ítara Alla re deki. **9** Mubarek uitará, zetará sólluk goríde, kiyólla-hoilé ítara re Allar fuain howá zaybo. **10** Mubarek uitará, zetará Allar moncá mozin goróne zulúm faa, kiyólla-hoilé asmani raijjo toh ítara.” **11** “Mubarek tuáńra, zeñtté maincé Ańr ĩla bóuli tuáńra re beizzoti goré, zulúm goré, edde na hókkot tuáńrar baabute hárr đoilla bura-ára ókkol hoó. **12** Héñtte tuáńra kúci goijjo edde kúci óiyo, kiyólla-hoilé tuáńra ĩla asman ot đoóńr boccé asé. Tuáńrar age ze nobi ókkol accíl ítara re yó maincé héndilla zulúm goittó. **13** “Tuáńra óilade duniyair nun; montor zodi nun or dok zaagói, híin ore keéngori abar nuncá gorí fara zaybo? Híin toh ar honó ham ot nu aiyé. Híin ore baáre félaidiya zah, aar maincór úńran ot fore. **14** “Tuáńra óilade duniyair nur. Faár or uore bańdá gíyeh de cóor toh lukai rakí fara no zah. **15** Honó maincé serak dórai báńir or tole raké de nái, bólke boiřónir uore beh raké, tói híyane gór ot asé de beggún ore foór déh. **16** Héndilla góri, tuáńrar foór maincór muuntu zolouk, zeéne ítara tuáńrar gom ham ókkol deki tuáńrar asmani Baf or mohíma goré. **17** “Tuáńra endilla no řaijjo de ki, Ańi Muúsar Córiyot yáh nobi ókkol or cíkka baatel goittó aiccí. Ańi híin baatel goittó aiccí de no, bólke fura goittó aiccí deh. **18** Ańi tuáńra re sóiyi hoóir, zetódin asman zobin řiki tákibo, Córiyot óu řiki tákibo, héntu honó noktá yáh zer zobor no búzibo zetódin híin beggún fura nó óiyo. **19** Hétolla, zee niki hé hókum ókkol ottu ebbe cóńřo ekkán hókum ore baatel goré aar oinno zon ore yó héndilla goittó cíka, ítare asmani raijot ebbe cóńřo howá zaybo; montor zee niki híin amól goré edde cíka, ítare asmani raijot đoóńr howá zaybo. **20** “Kiyólla-hoilé Ańi tuáńra re hoóir, zodi tuáńrar forhégari alem ókkol or edde Férocí ókkol or forhégarir túaro bicí no, tuáńra asmani raijot bilkúl góli no faribá. **21** “Tuáńra fúinnila de ki, agor zobanar maincóre endilla howá gíyl, ‘Kún no goríba, zee niki kún goré, ítara ttu adalot ot zuwab diya foribó.’ **22** Montor Ańi tuáńra re hoóir, zee niki nizor báior uore guccá goré, ítara ttu adalot ot zuwab diya foribó. Aar zee niki nizor báí ore, ‘Tui behazor,’ hoó, ítara ttu bor adalot ot zuwab diya foribó. Aar zee niki nizor báí ore, ‘Tui bekuf’ hoó, íte zuzuk or ooin or sáńzar laayek óibo. (Geenna g1067) **23** “Hétolla tuńi kurbani-gáńr uore kurbani peec goríbarcot, zodi tuáńr ttu monot uré de ki, tuáńr báí ottu tuáńr ulđa kessú hoibár asé,

24 hétunot tuáñr kurbani hé kurbani-gáñr muuntu eri zaiyogói. Zai yore age tuáñr báí lói bonizogói, baade aái yore tuáñr kurbani diyogái. 25 “Tuáñr lla bisar goittó zaar de manúc lói foñt ot tákite toratori maamela hól gorífelaiyo, arnóile íte tuáñre joc or át ot gosáidibo, aar joce tuáñre fulic or át ot gosáidibo, baade tuáñre ziyól ot difélaibo. 26 Añí tuáñre sóiyi hoóir, tuñí ahéri foicá nó doo foijjonto héntu hálas ói no faribá. 27 “Tuáñra endilla howá gýl de fúinnila, ‘Zená no goríba.’ 28 Montor Añí tuáñra re hoóir, zodi honókiye honó mayafua re bura kíyale saá, íte nizor dile-dile híba llói zená gorífelaiye. 29 Zodi tuáñr den dák or suké tuáñre gunár uzu țane, tooile yíba neelai félaido. Kiyólla-hoilé tuáñr guñra gaa zuzuk ot zaar túaro, tuáñr gaar ekkán híssa no tákon tuáñr lla beétor. (Geenna g1067) 30 Zodi tuáñr den áte tuáñre gunár uzu țane, tooile híyan harí félaido. Kiyólla-hoilé tuáñr guñra gaa zuzuk ot zaar túaro, tuáñr gaar ekkán híssa no tákon tuáñr lla beétor. (Geenna g1067) 31 “Endilla yó howá gýl, ‘Zee niki nizor bou ore sárfefe, íte híba re sárhabs douk.’ 32 Lekin Añí tuáñra re hoóir, zee niki nizor bou ore zenár hosúr lói bade oinno honó hosúri lói sárfefe, íte híba re zená gorába; aar zee niki sárfelaiya mayafua re biyá goré, íte yó zená goré. 33 “Tuáñra aró fúinnila de ki, agor zobanar maincóre endilla howá gýl, ‘Misá hosóm na háiyó, bólke tuñí ziyán olla hosóm háiyó, híyan Mabud or hañse fura goríba.’ 34 Lekin Añí tuáñra re hoóir, tuáñra bilkúl hosóm na háiyó, asman or name yó na háiyó, kiyólla-hoilé híyan toh Allar toktó. 35 Zobin or name yó na háiyó, kiyólla-hoilé híyan toh íbar foo rakíbar banggú. Jerúsalem or name yó na háiyó, kiyólla-hoilé híyan óilde bor Baáñccar cóor. 36 Nizor matá dóri yó hosóm na háiyó, kiyólla-hoilé tuñí toh ekkán sul úddwa dóla yáh hala gorí no faro. 37 Montor tuáñra baná eddúr hoiyó, óile ‘ói’ aar no óile ‘no,’ yár baáre zín aiyé híin óilde íbilíc or torfóttu. 38 “Tuáñra endilla howá gýl de fúinnila, ‘Suk or bodol suk, aar dat or bodol dat.’ 39 Montor Añí tuáñra re hoóir, honó hóraf manúc lói mukabela no goijjó. Bólke zee niki tuáñre den dák or galsaba saí suwar mare, ítare oh dák óu fíraidiyo. 40 Aar zodi honókiye tuáñr kuruta loifélaito tuáñr lla mooddima goittó saá, ítare tuáñr saddor óu diifélaiyo. 41 Zodi honókiye tuáñre ek mail zaito bolazuri goillé, ítar fúañti dui mail zaiyo. 42 Zee niki tuáñr ttu mage, ítare diiyo; aar zee niki tuáñr ttu udár saá, ítare no fíraiyo. 43 “Tuáñra endilla howá

gýl de fúinnila, ‘Nizor atehañsór maincóre muhábbot goríba, aar duccon ore nafórot goríba.’ 44 Montor Añí tuáñra re hoóir, tuáñrar duccon ókkol ore muhábbot goijjó; aar zetará tuáñrar uore zulúm goré, ítara lla dua goijjó, 45 zeéne tuáñra tuáñrar asmani Baf or fuain țóoro; kiyólla-hoilé íba ye toh gom hóraf duní gún or uore íbar beil or foór deh, aar forhésgar or uore edde kuham-goróyar uore zór diferá. 46 Zodi tuáñra cúdu tuáñra re muhábbot goré de ítara re muhábbot goró, tooile súwab kiyólla faiba? Házana-tulóya ókkole úddwa kí héndilla no goré né? 47 Aar zodi tuáñra cúdu tuáñrar báiyain dore sólám dóh, tooile tuáñra oinno manúc ókkol or túaro bicí kii gorór? Beyohúdi ókkole úddwa kí héndilla no goré né? 48 Hétolla tuáñrar asmani Baf zendilla furafuri sóiyi, héndilla tuáñra yó furafuri sóiyi ó.”

6 “Hóboroddar, tuáñrar forhésgari ham maincór muuntu ítara re dahái bolla no goijjó; arnóile tuáñra tuáñrar asmani Baf ottu honó boccíc no faiba. 2 “Hétolla zeñtté tuñí sótká goró, héñtte cíañ matai elan no goijjó, zendilla munafék ókkole maincór ttu taarif fai bolla mujilíc-hána ókkol ot edde rasta-rasta goré. Añí tuáñra re sóiyi hoóir, ítara ítarar boccíc furafuri faifélaiye. 3 Montor zeñtté tuñí sótká goró, héñtte tuáñr den áte kii gorér de híyan tuáñr ban át ore zainto no diyó, 4 zeéne tuáñr sótká gorá aiddone ó. Tói tuáñr Baf, zibá ye aiddon ot deké, íba ye tuáñre boccíc diibo. 5 “Zeñtté tuáñra dua goró, munafék ókkol or dóilla no óiyó; kiyólla-hoilé ítara maincóre dahái bolla beh mujilíc-hána ókkol ot edde rastar kuna-kuna tíyai yore dua gorá fosón goré. Añí tuáñra re sóiyi hoóir, ítara ítarar boccíc furafuri faifélaiye. 6 Montor zeñtté tuñí dua goró, tuáñr kamárar bútoze góli, duwar bañdífelai tuáñr Baf or hañse dua goríyo, zibá aiddone asé. Tói tuáñr Baf, zibá ye aiddon ot deké, íba ye tuáñre boccíc diibo. 7 Zeñtté tuáñra dua goró, Beyohúdi ókkol or dóilla behazor hotá ókkol no duaráiyó, kiyólla-hoilé ítara țáare de, ítarar bicí hotár zoriya ítarar dua kobul óibo. 8 Hétolla hoóir, tuáñra ítarar dóilla no óiyó; kiyólla-hoilé tuáñrar Bafe toh íba ttu magibár age lóti tuáñrar zorurot zane. 9 Hétolla tuáñra endilla dua goijjó: ‘Ó añárar asmani Baf, Tuáñr nam pak mana zouk. 10 Tuáñr raijjo aiyóuk. Tuáñr moncá zendilla asman ot fura ó, héndilla duniyait óu fura óuk. 11 Aijjar hána añára re aijja doo. 12 Añárar hosúri maf goró, zendilla zetará

añára llói hosúri goijjé, ítara re añára yó maf goijji. **13** Añára re entán ot foyito no diyó, bókke íbilíc ottu basai rakó. Kiyólla-hoilé raijjo, taakot aar mohíma toh hámica Tuáñr.’ **14** Kiyólla-hoilé zodi tuáñra oinno zon or hosúri maf goró, tooile tuáñrar asmani Bafe yó tuáñra re maf gorídiibo. **15** Montor zodi tuáñra oinno zon or hosúri maf no goró, tooile tuáñrar Bafe yó tuáñrar hosúri maf no goríbo. **16** “Tuáñra ruza rakó de októť nakmuk hala no goijjó, zendilla munafék ókkole goré, kiyólla-hoilé ítara siyára bodole de toh ruza raikké de híyan maincóre dahái bolla. Añi tuáñra re sóiyi hoóir, ítara ítatar boccíc furafuri faifélaiye. **17** Montor tuñi zeñtté ruza rakó, matát tel diyo, aar muk dúiyó, **18** zeéne tuñi ruza raikkó de híyan maincé no, bókke tuáñr Bafe zane, zibá aiddon ot asé. Tói tuáñr Baf, zibá ye aiddon ot deké, íba ye tuáñre boccíc diibo. **19** “Nizor lla dón-cómbotti duniyait zoma no goijjó, zeřé fuke edde zooñre borbád diféle, aar zeřé sur ókkole berá harí sur gorífele. **20** Bólke nizor lla dón-cómbotti asman ot zoma goró, zeřé no fuke aar no zooñre nac goré, aar zeřé sur ókkole berá harí sur no goré. **21** Kiyólla-hoilé tuáñrar dón-cómbotti zeřé, tuáñrar dil tákibo de yó hére. **22** “Gaar serak óilde suk; hétolla tuáñr suk gom asé de óile, tuáñr guñra gaa foóre furaiya óibo. **23** Montor tuáñr suk hóraf de óile, tuáñr guñra gaa andáre furaiya óibo. Hétolla, tuáñr bútoze ze foór asé híyan zodi andár de óile, tooile hé andár hotó gutguiťta óibo fáñllar! **24** “Honókiye dui girós or hédmot gorí no fare; kiyólla-hoilé íte ezzon ore nafórot goríbo aar ar ezzon ore muhábbot goríbo; yáto ezzon loi řík tákibo aar ar ezzon ore hékarot goríbo. Tuáñra ekkú fúañti Allar edde dón-doulot or hédmot gorí no faribá. **25** “Hétolla Añi tuáñra re hoóir, kii háiyum yáh kii fiřiyum hoi zindigi lla sinta no goijjó; aar kii fiñđiyum hoi gaa lla sinta no goijjó. Zindigi ki hánar túaro kimoti no né, aar gaa ki hoorsuor or túaro kimoti no né? **26** Asman or faik ókkol or baabute báfiso; híine toh no cñře, no daa, aar no gúdam ot zoma goré, toóu tuáñrar asmani Bafe híin ore háaba. Tuáñra kí híin or túaro kimoti no né? **27** Tuáñra hone sinta gorí nizor hóiyat ore ek gónđa barái faribá de asó? **28** “Hoorsuor olla kiyá sinta goró? Báfiso, moidan or fúl ókkol keéngori barí uré; híine toh no meénnot goré aar no fúñta hare. **29** Montor Añi tuáñra re hoóir, baáñcca Sólomane úddwa yóggwar tamám dón-doulot lói híin ekgwár dóilla nizoré háñzai fajjé de náí. **30** Hétolla, zodi Alla ye

moidan or kér ore héndilla góri háñza, zíin aijja asé aar hailla ooin ot félaidiya zah; tooile ó hom biccác ola ókkol, íba ye tuáñra re aró bicí no háñzaibo né? **31** Hétolla hoóir, ‘Añára kii háiyum? Kii fiřiyum?’ yáh ‘Kii fiñđiyum?’ hoói sinta no goijjó. **32** Kiyólla-hoilé Beyohúdi ókkole éna híin beggún or fisé lagi táke. Tuáñrar asmani Bafe toh zane, tuáñra ttu híin beggún lager deh. **33** Age Allar raijjoz edde íbar moncá mozin solibár talac ot táko, tói tuáñra re híin beggún óu diiya zaybo. **34** “Hétolla, hailla lla sinta no goijjó; kiyólla-hoilé haillar dine hailla lla sinta goríbo. Din or duk din olla kafi.

7 “Hosúri no doijjo, tói tuáñrar hosúri yó dóra no zaybo. **2** Kiyólla-hoilé zendilla gori tuáñra hosúri dóro, héndilla góri tuáñrar hosúri yó dóra zaybo; aar tuáñra ze mafe diiba, tuáñra re yó hé mafe diiya zaybo. **3** “Tuñi tuáñr báí or suk ot asé de hál lan kiyá dekor, montor tuáñr nizor suk ot asé de hodda gán óť no gorór? **4** Nizor suk ot hodda táki baade tuñi keéngori tuáñr báí ore hoór, ‘Aiyó, añi tuáñr suk ottu hál lan neelaifélaí?’ **5** Ó munafék! Age tuáñr nizor suk ottu hodda gán neelaifélo, baade tuáñr báí or suk ottu hál lan neelai bolla sáf góri deklba. **6** “Kuñir ore honó pak jiníc no diyo, aar cúwor ókkol or muúntu tuáñrar mukta no félaiyo, arnoíle híine híin ore řenge únřan maribó, aar řiri aái yore tuáñra re hán-hán gorífelaibo. **7** “Mago, tuáñra re diiya zaybo; tuwo, tuáñra faiba; duwar baijjo, tuáñra lla duwar kúla záybo. **8** Kiyólla-hoilé zee niki mage, íte faa; zee niki tuwa, íte tuwai faa; aar zee niki duwar baijja, ítar lla kúla zaybo. **9** “Tuáñrar bútoze endilla manúc hon asé, nizor fua ye ruři magilé fattór diibo dé? **10** Yáto mas magilé háf diibo dé? **11** Hé ísafe, zodi tuáñra hóraf ói baade úddwa tuáñrar fuain dore gom-gom jiníc ókkol dii zano, tooile tuáñrar asmani Bafe zetará íba ttu mage ítara re aró hotó gom jiníc ókkol diibo fáñllar! **12** “Hétolla, hárr kessút oinno zon ore uúin goró zíin tuáñra soó de ítara tuáñra re goróuk, kiyólla-hoilé híyan óilde beh Tourat or edde nobi ókkol or cíkka. **13** “Siyon doroza báy gólo, kiyólla-hoilé borbádír uzu loiza de rasta fárot aar híyan or doroza cořa; híyan báy góloya bicí asé. **14** Montor zindigir uzu loiza de rasta kutahaiťta aar híyan or doroza siyon, híyan ore fooya hom. **15** “Misá nobi ókkol ottu únřiyar táikko, zetará tuáñrar hañse bérasóol or sóinna dóri aiyé, montor bútoze ítara búka rangkuñir or dóilla. **16**

Tuáñra ítara re ítara gulagalaye siníba. Maincé kí keñrabon ottu anggur aar keñrar zádđwa ttu ñuñir gula fare? **17** Borabor héndilla, gom gas ot gom gula dóre, aar hóraf gas ot hóraf gula dóre. **18** Gom gas ot toh hóraf gula dóri no fare, aar hóraf gas ot gom gula dóri no fare. **19** Ze gas ot gom gula no dóre, yíba re toh hañi ooin ot félaidiya zah. **20** Hétolla hoóir, tuáñra ítara re ítara gulagalaye siní faribá. **21** “Zetará Añré, ‘Malik, Malik,’ ðake, ítara hárr ekzon asmani raijjet góli faribó de héen no, montor siríf uite faribó zee niki Añr asmani Baf or moncá mozin goré. **22** Hé din Añré boóut kiyé hoibó de, ‘Malik, ó Malik, añára Tuáñr name Allar kalam boiyan goijjílám de no né? Tuáñr name bútt ókkol dáfailam de no né? Aar Tuáñr name boóut keramot ókkol óu goijjílám de no né?” **23** Héñtte Añí ítara re sáf-sáf góri hoiyúm de, ‘Añí tuáñra re honó októtt no sinítam; kuham-goróya ókkol, Añr héntu dur ó.’ **24** “Hétolla, zee niki Añr boiyan iín fúni amól goré, íte endilla ezzon buddíman manúc or ðóilla óibo, zee niki nizor gór fattór or uore banaiyé. **25** Baade zór aiccé, faníban óiye, aar boiyar baái hé gór gán ot dósadiye; toóu híyan fori nó zagói, kiyólla-hoilé híyan or buniyadi tohfattór ot dála gíyeh. **26** Montor zee niki Añr boiyan iín fúni amól no goré, íte eén ézzon bekuf manúc or ðóilla óibo, zee niki nizor gór balur uore banaiyé. **27** Baade zór aiccé, faníban óiye, aar boiyar baái hé gór gán ot dósadiye; hétunot híyan fori ebbe nac óigiyoi.” **28** Zeñtté Isá ttu hotá híin hoiyá óiye, íbar hé taalim fúni manúc ókkol ammúk óigiyoi, **29** kiyólla-hoilé íba ye ítara re ítara alem ókkol or ðóilla góri no bólke ezzon adíkar olar ðóilla góri taalim dito.

8 Zeñtté Isá faár or uottú laimmégai, becábicí manúc ókkol íbar fisá doijje. **2** Hé októtt ezzon kurus biyaraimma ye aái íba re sóida gorí hoór de, “Ó Malik, Tuñí sailé añré pak-sáf gorí faribá.” **3** Isá ye Nizor át barái yóggwa re dóri hoór de, “Añí saái; pak-sáf óizogoi.” Tói éhon or búttore yóggwa kurus biyaram ottu pak-sáf óigiyoi. **4** Baade Isá ye yóggwa re hoór de, “Saiyó, yíán honókiyo re no hoiyó; bólke zoo, nizoré imam or hañse dahógoi, aar maincór hañse gobá ó fan, Muúsa ye hókum díye de hé kurbani dogói.” **5** Zeñtté Isá Kaparnahúm cóor ot góille, hétunot ezzon cáap, zibá ek cótt fóous or sóddar, aái íba re fóriyat gorér de, **6** “Malik, añr gulam añtur ói gór ot fori táikke; íte kúb duk faar.” **7** Isá ye yóggwa re hoór

de, “Añí aái ítare gom goijjúm.” **8** Montor cáap pwá ye hoór de, “Ó Malik, Tuñí añr gór or sal or nise aibár añí laayek no. Siríf muké hoó, tói añr gulam gom óizayboi. **9** Kiyólla-hoilé añí nize yó ar ezzon or hókumot or tole así, aar fóous ókkol añr nise asé. Añí ezzon ore ‘zaa,’ hoilé, íte zaa, ar ezzon ore ‘ai,’ hoilé, íte aiyé, aar añr gulam ore ‘yíán gor,’ hoilé, íte híyan goré.” **10** Híyan fúni Isá taajup óigiyoi, aar zetará íbar fisá dori accíl ítara re hoór de, “Añí tuáñra re sóiyi hoóir, Añí ettór ðoóñr iman Isráili ókkol or búttore úddwa honókiyo ttu loot nó fai. **11** Añí tuáñra re hoóir, fuk edde fosím ottu boóut zon aibó, aar ítara Ibrahim, Isahák, edde Yakub or fúañti asmani raijjet háito boibó. **12** Montor zetará raijjet tákon accíl, ítara re baáre andár ot félaidiya zaybo; hére hañdahari edde date dat kirkirani óibo.” **13** Baade Isá ye cáap pwá re hoór de, “Zoogói; tuñí zeén óibo bóuli biccác goijjó, héen tuáñr íla óuk.” Borabor hétunot yóggwar gulam mwa gom óigiyoi. **14** Yárbaade zeñtté Isá Fitor or gór ot aiccé, íba ye deké de, Fitor or hóuri gaatzore bisánat fori táikke. **15** Íba ye yóggwar át dóijje rár yóggwa ttu gaatzor giyégoi; baade yóggwa urí íba re meémadari gorát doijje. **16** Háñz óiye rár, maincé íbar hañse búte-faiya boóut zon ore ainñíl. Íba ye jin ókkol ore muk zobane dáfaiye, aar zetará biyaraimma accíl ítara beggún ore gom goijjé. **17** Híyan etollá óiye, zeéne nobi Yesáyahr duara hoóil de yíán fura ó, “Íba ye añárar komzuri ókkol loifélaiye, aar añárar biyaram ókkol dur gorífelaiye.” **18** Zeñtté Isá ye íbar sairókul ttu ek dol manúc deikké, íba ye ummot ókkol ore ðíir oh hañsat zai bolla hókum díye. **19** Hétunot ezzon alem aái íba re hoór de, “Ustat, Tuñí zeñé zaiba añí yó hére Tuáñr fisáli zaiyum.” **20** Isá ye yóggwa re hoór de “Cíyal ókkol ottu gañt asé aar faik ókkol ottu bahá asé, montor Manúc or Fua ttu Nizor matá rakí bolla úddwa honó mikká zaga náí.” **21** Ar ezzon ummote íba re hoór de, “Malik, age añí zai añr baf ore dohón gorí aiyí.” **22** Montor Isá ye yóggwa re hoór de, “Añr fisáli aiyó, muruda ókkole ítara nizor muruda re dohón goróukgoi.” **23** Baade zeñtté Isá ekkán noow ot uiñtté, íbar ummot ókkol óu íbar fisá doijje. **24** Atíkka ðíit eggwá eén ðoóñr tuwán cúru óiye, zeén níki noow gán goir or búttore gólizargoi. Montor Isá gúm ot accíl. **25** Ummot tune íbar hañse aái íba re tulídi hoór de, “Ó Malik, añára re baso! Añára morizayrgói!” **26** Íba ye ítara re hoór de, “Ó hom biccác ola ókkol, tuáñra ðoorór

kiyá?” Tói Íba urí boiyar edde goir ore dóoñk díye rár, furafuri támaigiyo. **27** Manúc ítara taajup ói hoór de, “Íbá hondilla manúc? Boiyare edde faní ye úddwa de Íbár hotá manel!” **28** Baade zeñtté Isá ñíir okule Gadariniól or mulluk ot foónicce, dui zon búte-faiya manúc hobor ottu neelaiéte Íba llói dola óiye. Ítara eén hótara accíl, zeén níki honó manúc hé foñt báy zai no faitto. **29** Atíkka ítara guzori-guzori hoór de, “Ó Allar Fua, Tuáñr ttu añára llói kii ham asé? Októ nó óite Tuñí hóno eṙé añára re toziya dito aiccó de né?” **30** Héṙe ítara héntu hoddúr duré ñoóñr ek zák cúwor sorer de accíl. **31** Bút tune Íba re fóriyat gorér de, “Zodi Tuñí añára re neelaifélo, tóoile oh cúwor or zák kwar bútoṙe duñraido.” **32** Íba ye híin ore hoór de, “Zoogói.” Hétunot híin neeli aái cúwor gún or bútoṙe góillegoi; tói guñṙa zák kwa faár or haindá báy zure ñíft duñri giyyé aar fanít ñuffi morigiyo. **33** Soroya gún duñrdiyé, aar cóor ot zai beggún hóbor díye, fúañti-fúañti búte-faiya manúc cún or uore kii óiye de híyan óu hoiyé. **34** Tói tamám cóor or manúc ókkol Isá llói milto neeillé. Ítara Íba re deikké rár, ítara elaka ttu zaitogói Íba re fóriyat goijjé.

9 Isá noow ot urí, ñíi farái Nizor cóor ot aiccé. **2** Hétunot hodún maincé bisánat neitṙa ek añtur manúc ore Íbar hañse ainné. Ítarar iman deki Isá ye añtur manúc cwa re hoór de, “Ó fut, hímmot gor; tor guná maf gorídiya gíyeh.” **3** Híyan fúni hoozon aleme dile-dile hoór de, “E Manúc cwa ye toh kuféri gorér!” **4** Isá ye ítara báfani re zani hoór de, “Tuáñra dile-dile hóraf kiyá báfor? **5** Hoité hon nán aasan, ki ‘Tor guná maf gorídiya gíyeh,’ aar náki ‘Urí añṙ?’ **6** Lekin Añr ttu tuáñra re yíán zanaidito monehoór, e duniyait guná maf goríbar kémota Manúc or Fua ttu asé.” Tói Íba ye añtur manúc cwa re hoór de, “Uṙ, tor bisána tulí looi gór ot zagói.” **7** Hétunot yóggwa urí gór ot giyyégoi. **8** Híyan deki manúc ókkol ñooraigiyo, aar Allar taarif gorát doiije, zibá ye insán ore héndilla kémota diiyé. **9** Isá híyan ttu zaité-zaité dekéṙ de, Moti nam or ezzon manúc házana tulé de gór ot boói táikke. Íba ye yóggwa re hoór de, “Añr fisáli doro.” Hétunot yóggwa urí Íbar fisáli doiije. **10** Yárbaade eén óiye, Isá zeñtté Motir gór ot hána háar, boóut zon házana-tulóya edde gunágar ókkol óu aái Isá edde Íbar ummot ókkol or fúañti háito boiccé. **11** Féroci ókkole híyan deki Íbar ummot ókkol ottu fusár gorér de, “Tuáñrar Ustate házana-tulóya ókkol

or edde gunágar ókkol or fúañti kiyá hána háa?” **12** Híyan fúni Isá ye hoór de, “Araimma ókkol ottu toh ñakṙor no lage, montor biyaraimma ókkol ottu beh lage. **13** Tuáñra zai e hotár maáni kii cíkogoi, ‘Añí kurbani saái de no, bólke rahám saái deh.’ Kiyólla-hoilé Añí dawot dito aiccé de forhésṙar ókkol ore no, bólke gunágar ókkol ore.” **14** Hétunot Yaháyar ummot ókkol Isár hañse aái Íba ttu fusár gorér de, “Añára edde Féroci ókkole toh nitti ruza rakí, montor Tuáñr ummot ókkole kiyá ruza no raké?” **15** Isá ye ítara re hoór de, “Dulá fúañti tákite kí boiraitta ókkol ferecan ói fare? Montor eén din aibó, zeñtté dulá re ítara hañsóttu loiféla zaybo, héñtte ítara ruza rakíbo. **16** “Honókiye toh furan fucák ot noya hoor tali dede náí; kiyólla-hoilé hé fucák ottu tali gán zórizayboi, aar fáṙa híyan aró ñoóñr óizayboi. **17** Héndilla, honókiye noya anggur or roc ore furan samarar hóillat raké de náí; zodi rakíle toh hóilla gún fáṙi roc cún golizayboi, aar hóilla gún óu borbad zayboi. Hétolla, noya anggur or roc ore noya samarar hóillat raké deh, tói duní gún héfazot táke.” **18** Isá ye ítara re híin hoór de októṙ, mujilíc-hánar ézzon sóddar aái Íba re sóida gorí hoór de, “Añr zérfua wa ehón-ehón morigiyo. Montor Tuñí aái híbar uore át doogái, tói híba zinda óizayboi.” **19** Hétunot Isá urí yóggwar fúañti zaat doiije, fúañti Íbar ummot ókkol óu giyyé. **20** Zaité-zaité eggwá baró bosór foijjonto kúnzari zár de mayafua Isár fisór ttu aái Íbar hoor or hañra súiye. **21** Kiyólla-hoilé híba ye báippil de, “Zodi añí siríf Íbar hoor súi, añí gom óizaiyumboi.” **22** Isá ye fíri híba re deki hoór de, “Ó zii, hímmot gor! Tor imane toré gom goijjé.” Tói ehon or bútoṙe mayafua wa gom óigiyo. **23** Isá zeñtté sóddar gwar gór ot aái bací-bazoya ókkol ore edde maincór holholani deikké, **24** Íba ye hoór de, “Tuáñra neelogói. Zérfua morigiyo de no, bólke gúm zar deh.” Hétunot ítara Íba re lói áñcat doiije. **25** Montor manúc cún ore baáre neelai difélai baade, Íba bútoṙe góli zérfua war át dóiije, tói híba urígiyo. **26** Hé hóbor híyan hé elakar agagurat fóligiyo. **27** Isá híyan ttu zaargói de októṙ, dui zon añdá manúc Íbar fisá doiije. Ítara ñak mari-mari hoór de, “Ó Dawud or Fua, añárar uore rahám goró!” **28** Zeñtté Isá gór ot góille, añdá manúc cún Íbar héṙe aiccé. Íba ye ítara ttu fusár gorér de, “Añí yíán gorí faijjum de tuáñra biccác goró ne?” Ítara Íba re zuwab der de, “Jii Malik, gorí.” **29** Tói Íba ye ítara suk dóri hoór de, “Tuáñrar iman mozin híyan tuáñra lla óuk.” **30** Hétunot ítara suk kúligiyo. Isá ye

ítara re eén hoói dorógori maná goijjíl, “Saiyó, yíán or baabute honókiye no zane fán.” **31** Montor ítara zai hé elakar agagurat íbar baabute hóbor fólaidiye. **32** Ítara baäre zaargói de októ, kessú maincé Isár hañse ezzon búte-faiya buk manúc ainné. **33** Isá ye bít twa dáfaiye rár, hé buk manúc cwa mati faijjé. Híyane manúc ókkol taajup ógiyoi, aar hoór de, “Endilla toh Isráil or bútoe honódin dahá gíyeh de náí.” **34** Montor Féroci ókkole hoór de, “Íbá ye bít ókkol dáfa de bít ókkol or sóddar or taakote.” **35** Isá fottí cóore-cóore edde fara-fara zai Yohúdir mujilíc-hána ókkol ot taalim diyat, asmani raijor kúchóbor tobolik gorát, edde fottí kisím or biyaram edde fottí kisím or ocúk ókkol gom gorát accíl. **36** Manúc or dol de k’íba ttu fetfuijil, kiyólla-hoilé ítara soroya sára bérasóol or d’óilla ocántit edde modot sára accíl. **37** Hétunot íba ye Nizor ummot ókkol ore hoór de, “Fósol de bicí asé, montor dooiya bicí hom. **38** Hétolla fósol or Malik ore fóriyat goró, íbar fósol daito dooiya ókkol diferái bolla.”

10 Isá ye íbar baró zon cárit ore matai, ítara re hóraf jin ókkol dáfaibar edde fottí kisím or biyaram edde fottí kisím or ocúk gom goríbar kémota diiyé. **2** Hé baró zon sáhabir nam óilde iín: foóila wa, Sáimon, zibá re Fitor ðake, aar yóggwar báí Enderiyas; Zebedair fua Yakub edde yóggwar báí Yohánna; **3** Filíp, Bartólomiyo, Tómas, házana-tulóya Moti, Alfáiyas or fua Yakub, Táadiyas, **4** Sáimon zibá óilde Zélot, edde Yohúdah Iskáriyet, zee niki Isá re dóridil. **5** Isá ye hé baró zon nún ore endilla nosíyot gorí diferáiyé: “Beyohúdi ókkol or híkka no zaiyo, aar Samári ókkol or honó cóor ot no góillo. **6** Bólke Isráil koum ánzigiyo de bérasóol lun or hañse zaiyo. **7** Zaité-zaité endilla tobolik goríyo, ‘Asmani raijjo ðake aáigiyo.’ **8** Biyaraimma re gom goríyo, muruda re zinda goríyo, kurus biyaraimma re pak-sáf goríyo, aar bít ókkol dáfaiyo. Tuáñra maana faiyó, maana diiyo. **9** “Keeñil or zalit gori cúna, rufa, yáh tamar foicá no loizaiyó, **10** sofór olla honó hóilla, battí hoor, centár edde larí no loizaiyó; kiyólla-hoilé zee niki ham goré íte toh hána faibar laayek. **11** Tuáñra ze cóor ot yáh farat góliba, hére zaga diibar laayek hon asé talac goríyo, aar cóor híyan ottu nó neelo foijjonto yóggwar góor ot tákiyo. **12** Góor ot gólibarcot sólam díyo. **13** Zodi góor híyan laayek de óile, tuáñrar cánti híyan ot tákouk. Montor laayek no de óile, tuáñrar

cánti tuáñrar hañse fíri aiyoúk. **14** Zodi honókiye tuáñra re kobul no goré yáto tuáñrar hotá no fúne, tooile hé góor ottu yáh cóor ottu zaibarcót tuáñrar téng or tollar dúil zárifelaiyo. **15** Añí tuáñra re sóiyi hoór, kiyamot or din hé cóor híyan ottu Sódóm edde Gomórah r túaro bicí bordac gorá foribó. **16** “Fúno, Añí tuáñra re bérasóol or d’óilla góri rangkuñir ókkol or mazé diferáir deh. Hétolla háf or d’óilla salák ó aar hoitor or d’óilla maasum bono. **17** Maincóor ttu uñciyar táikko; kiyólla-hoilé ítara tuáñra re adalot ot tulídibo, aar tuáñra re ítarar mujilíc-hána ókkol ot bet maribó. **18** Añr lla bóuli tuáñra re hákim ókkol or edde baáñcca ókkol or muuntu úddwa aná zaybo, zeéne ítarar edde Beyohúdi ókkol or hañse Añr gobá dí faro. **19** Lekin zeñtté ítara tuáñra re dóridibo, héñtte kii hoibá yáh keéngori hoibá sinta no goijjó, kiyólla-hoilé tuáñra ttu zín howá foribó, híin tuáñra re hétunot diiya zaybo. **20** Kiyólla-hoilé hoóiya toh tuáñra no, bólke tuáñrar Baf or Ruh éna, zibá ye tuáñrar duara hotá hoó. **21** “Bái ye báí ore aar bafe fua re marifélai bolla dóridibo. Fuain de nizor bafmaar hélaf ýiai ítara re mariféla báibo. **22** Añr nam olla bóuli tuáñra re beggúne nafórot goribo; montor zee niki ahéri foijjonto bordac goribo, yóggwa ye beh nejat faibo. **23** Zeñtté ítara tuáñra re ekkán cóor ot zulúm goré, arekkán ot dáí zaiyogói. Kiyólla-hoilé Añí tuáñra re sóiyi hoór, tuáñra Isráil or fottí cóor ot zaiya nó óite Manúc or Fua aáizayboi. **24** “Cárit nizor ustat or túaro ðoóñr no, aar goóur nizor girós or túaro ðoóñr no. **25** Cárit nizor ustat or d’óilla óile aar goóur nizor girós or d’óilla óile kaffí. Ítara zodi góor or girós ore Belzebulhoiyé de óile, hé góor or maincóre aró hotó ðoilla hoibó fáñllar! **26** “Hétolla ítara re no ðooraiyó, kiyólla-hoilé zahér no óibo de héndilla honó jiníc guíjja náí, aar zana no zaybo de héndilla honó jiníc lukaiya náí. **27** Añí tuáñra re zín andár ot hoór, híin foór ot hoiyó; aar zín tuáñrar han ot fúfcucai howá gíyeh, híin góor or sád or uottú elan goijjó. **28** Uitará re no ðooraiyó zetará haiya re kotól goré montor ruh re kotól gorí no fare; bólke Ubá re ðooro zibá ye ruh edde jisím duníyan ore zuzuk ot dónco gorifélai fare. (Geenna g1067) **29** Duwá fiañjja ki bicí hom ðiañ loi no bese né? Toóu tuáñrar Baf or ezin sára héntu eggwá yó meřit fore de náí. **30** Becók, tuáñrar matár sul úddwa beggún íba ttu gona asé. **31** Hétolla, no ðooraiyó, tuáñrar kimot boóut fiañjja ókkol or túaro bicí. **32** “Zee kiyé Añré maincóor muuntu cíkar goré, Añí yó yóggwa re Añr asmani Baf

or muúntu cíkar goríyumu. **33** Montor zee niki Añré maincór muúntu inkar goré, Añí yó yóggwa re Añr asmani Baf or muúntu inkar goríyumu. **34** “Añí duniyait cánti diito aiccí bóuli no táariyo. Añí cánti diito aiccí de no, bólke toluwar solaitó aiccí deh. **35** Kiyólla-hoilé Añí aiccí de, fua re baf or ulđa gorídi bolla, zérfua re maar ulđa gorídi bolla, aar bou wóre hóurir ulđa gorídi bolla. **36** Manúc or duccon óibo de nizor gór or manúc. **37** “Zee niki Añré goré de yár túaro nizor baf ore yáh maa re muhábbot goré, yóggwa Añr laayek no; aar zee niki Añré goré de yár túaro nizor fua re yáh zérfua re muhábbot goré, yóggwa Añr laayek no. **38** Zee niki nizor kúruc no boói Añr fisáli dore, yóggwa Añr laayek no. **39** Zee niki nizor zan basaitó saá, yóggwa ye híyan háraifelaibo; montor zee niki Añr wasté nizor zan háraifele, yóggwa ye híyan faibo. **40** “Zee niki tuáñra re kobul goré, yóggwa ye Añré kobul goré deh; aar zee niki Añré kobul goré, yóggwa ye Añré diferáiyé de íba re kobul goré deh. **41** Zee niki honó nobi re nobir name kobul goré, yóggwa ye nobir boccíc faibo; aar zee niki honó forhésgar ore forhésgar or name kobul goré, yóggwa ye forhésgar or boccíc faibo. **42** Honókiye itarár bútotu ebbe niróc ézzon ore Añr ummot de hétolla ek fiyala tánda faní diilé úddwa, Añí tuáñra re sóiyi hoóir, yóggwa ye hámaha nizor boccíc fai zaybo.”

11 Zeñtté Isá ttu íbar baró zon cárit tun ore nosíyot goijjá óiye, íba itarar cóor ókkol ot taalim dito edde tobolik goittó héntu bacá lóiyé. **2** Zeñtté Yaháya ye ziyól ot tái Mosihr ham ókkol or baabute fúinne, yóggwa ye nizor ummot ókkol ore Isár hañse diferáiyé, **3** yían fusár goittó, “Tuñí aibár hotá asé de íba né, aar náki añára ar ezzon olla entezar goittám?” **4** Isá ye itara re zuwabe hoór de, “Zoó, tuáñra zín fúnor edde dekór híin Yaháya re zanogói, **5** ki hoilé, añdá ye dekér, lenge añrer, kurus biyaraimma pak-sáf ór, náfange fúner, muruda zinda ór, edde gorif ókkol or hañse kúchóbor tobolik gorá zar. **6** Mubarek ubá, zee niki Añr baabute andacá no goré.” **7** Zeñtté Yaháyar ummot tun zaargói, Isá ye manúc ókkol ore Yaháyar baabute howát doijje de, “Tuáñra moidan zagat kii saitó giíla dé? Boiyare lore de hóir né? **8** Arnóile tuáñra kii saitó giíla dé? Barík hoor findá manúc né? Zetará barík hoor fiñdé itara toh razmohól ot éna. **9** Tóoile tuáñra kii saitó giíla dé? Honó nobi né? Ói, Añí tuáñra re hoóir, nobir túaro ðoóñr ézzon ore. **10**

Yóggwa óilde ubá, zibár baabute pak-kalam ot endilla asé, ‘Soó, Añí Añr hóborgwa re Tuáñr age diferáir, zibá ye Tuáñr age Tuáñr foñt toiyar goríbo.’ **11** “Añí tuáñra re sóiyi hoóir, mayafuain dor ttu zormo óiye de ítarar búture bápťismadoya Yaháyar túaro ðoóñr honókiye ná; montor toóu úddwa asmani raiijot zee niki ebbe cóñro, íte yóggwar túaro ðoóñr. **12** Bápťismadoya Yaháyar din ókkol ottu lóti yala foijjonto asmani raiijjo ye zulúm faat asé, aar zulúmkur ókkole híyan ore bolazuri kobza goittó kucíc gorér. **13** Kiyólla-hoilé tamám nobi ókkol or kitabe edde Tourate Yaháya foijjonto agun hotá hoiyé. **14** Tuáñra ttu yían kobul goittó monehoilé goró, ze Eliyas aibár hotá accíl Yaháya óilde íba. **15** Zar ttu fúnibar han asé, yóggwa ye fúno. **16** “Añí e zobanar maincóre kii loi fúwan goittám? Ítara undilla fuain dor dóilla, zetará bazar ot boói oinno fuain dore matai hoó de, **17** ‘Tuáñra lla añára bací bazaiyí, montor tuáñra nó naso; tuáñra lla añára bilak or zari gaiyí, montor tuáñra nó hañdo.’ **18** Yaháya aái zettót háafiya nó goré, maincé hoó de, ‘Íba re búte faiyé.’ **19** Aar Manúc or Fua aái zettót háafiya gorér, maincé hoó de, ‘Soó, ezzon fitác edde córabkur, házana-tulóya edde gunágar ókkol or dustó.’ Montor giyan sóiyi de híyan, híyan or hame sábut ó.” **20** Isá ye ze cóor gún ot beecbák keramoti ham goijjíl, híine touwá nó goré de hétolla íba ye híin ore jéjjerai hoór de, **21** “Ó Korazin, tor uore afsús! Ó Betsáida, tor uore afsús! Kiyólla-hoilé ze keramoti ham ókkol tuáñrar búture gorá gíyl híin zodi Tayár edde Sídon ot gorá zayto, itara sálarcoñ fiñdí edde sái or uore boói boóut age lóti touwá gorífelaito. **22** Montor Añí tuáñra re hoóir, kiyamot or din, hé Tayár edde Sídon or maincór ttu tuáñrar túaro hom bordac gorá foribó. **23** Aar tui, ó Kaparnahúm, toré kí asman ot bazé fán uore tulá zaybo? Toré nise fatalfur ot éna félaidiya zaybo; kiyólla-hoilé ze keramoti ham ókkol tor búture gorá gíyl híin zodi Sódóm ot gorá zayto, híyan aij foijjonto ñiki tákito. (Hadēs g86) **24** Montor Añí tuáñra re hoóir, kiyamot or din, Sódóm cóor or maincór ttu tor maincór túaro hom bordac gorá foribó.” **25** Hétunot Isá ye hoór de, “Ó Baf, asman zobin or Malik, Añí Tuáñre cúkuriya gorír, kiyólla-hoilé Tuñí iín ore giyani edde buddíman ókkol ottu lukai rakí gura fuain dor dóilla maincór hañse zahér goijjó. **26** Ói, ó Baf, kiyólla-hoilé Tuáñr ttu híyan bicí fosón laiggé. **27** “Añr Bafe Añré hárr kessú diifélaíye. Fua re Bafe bade ar honókiye no zane, aar Baf ore yó Fua edde Fua ye

zare zahér goittó saá, yóggwa ye bade ar honókiye no zane. **28** “Tuáñra zetará óran óiyo edde bór fuñzá lói asó, beggún Añr hañse aiyó, Añí tuáñra re aram diyum. **29** Añr zuañl tuáñrar uore loo aar Añr ttu cíko, kiyólla-hoilé Añí norom edde cída dil ola, tói tuáñrar forane aram faibo. **30** Kiyólla-hoilé Añr zuañl boité aasan, aar Añr fuñzá fatol.”

12 Hé októt ebaadot-or-din Isá giyuñr kuñrá báy zaar; aar íbar ummot ókkol ottu búk laiggé rár, ítara giyuñr túr ókkol tulí-tulí háat doijje. **2** Féroci ókkole híyan deki íba re hoór de, “Soó, ebaadot-or-din ziyán goríbar maná, híyan Tuáñr ummot ókkole gorér.” **3** Montor íba ye ítara re hoór de, “Tuáñra kí yíán nó foró, zeñtté Dawud edde íbar sáañti ókkol ottu búk laiggíl, héñtte íba ye kii goijjíl dé? **4** Íba ye toh Allar gór ot góillegoi, aar íba ye edde íbar sáañti ókkole, Allar hañse peec goijjá ruṭi háail, zín háibar ezazot no íba ttu accíl aar no íbar sáañti ókkol ottu accíl, bólke siríf imam ókkol ottu beh accíl. **5** Yáto tuáñra kí Tourat ot yíán nó foró, ebaadot-or-din baitul-mukaddos ot imam ókkole ebaadot-or-din or niyom bāñgile yo ítara behosúr dé? **6** Añí tuáñra re hoór, baitul-mukaddos or túaro ḍoóñr Ekzon inṭyót asé. **7** Lekin zodi tuáñra e hotár maáni gán zainta, ‘Añí kurbani saái de no, bólke rahám saái deh,’tóoile behosúr ore hosúr no dita. **8** Kiyólla-hoilé Manúc or Fua óilde ebaadot-or-din or Malik.” **9** Isá héntu zaigói ítarar mujilíc-hánat giyyé. **10** Hére ezzon endilla manúc accíl, zar át fúaigiyoi. Ítara Isár uore elzam lagai fare fán íba re súwal gorér de, “Ebaadot-or-din biyaram gom goríbar zayes asé né?” **11** Íba ye ítara re hoór de, “Tuáñrar bútoe endilla hon asé, zar ttu eggwá bérasóol asé, aar yíba ebaadot-or-din gañrát forilé yíba re dóri tulí no loibo dé? **12** Insán or kimot toh bérasóol or túaro boút bicí! Hétolla, ebaadot-or-din gom ham goríbar zayes asé.” **13** Baade íba ye manúc cwa re hoór de, “Tuáñr át tan baró.” Tói yóggwa ye híyan baráye, hétunot híyan gom ói oinno gán or ḍóilla óigiyoi. **14** Yárbaade Féroci ítara baáre zai sólla goijjé de, ítara íba re kii bote marifélai faribó. **15** Montor Isá ye híyan zani fari héntu giyyégoi. Boút manúc ókkol íbar fisá doijjil, aar zetará biyaraimma accíl ítara beggún ore íba ye gom goijjíl. **16** Íba ye ítara re nicót goijjé de, íbar baabute honókiyo re no hoitó. **17** Híyan etollá óiye, zeéne nobi Yesáyahr duara howá gíyl de yíán fura ó: **18** “Soó! Añr Háadem ore,

zibá re Añí basíloiyi, Añr Adorja, zibá re lói Añr Ruh kúci. Añí Añr Ruh Ibár uore ḍálidium, aar Ibá ye Beyohúdi ókkol or hañse insáf elan goríbo. **19** Ibá ye no hoijja dibo, no sillaibó, aar no rasta ókkol ot Ibár abas honókiye fúnibo. **20** Ibá ye insáf ore fóta nó goré foijjonto, élaiya hoír ore no bāñgibo, aar dúañr de batti no nifáibo. **21** Ibár name beyohúdi ókkole acá rakíbo.” **22** Yárbaade ezzon búte-faiya manúc ore Isár hañse aná gíyeh, yóggwa ańdá edde buk accíl. Isá ye yóggwa re gom goijjé rár, hé ańdá edde buk manúc cwa ye mati yó faijjé edde deki yó faijjé. **23** Manúc beggúne taajup ói hoór de, “Íbá Dawud or Fua ói né?” **24** Híyan fúni Féroci ókkole hoór de, “Íbá ye búť ókkol dáfa de siríf búť ókkol or sóddar Belzebul or taakote.” **25** Montor Isá ye ítarar báfani re zani ítara re hoór de, “Ze raijjoť faáťa-faáťi foida ó, híyan toh fána óizagoi; aar ze cóor ot yáh gór ot faáťa-faáťi foida ó, híyan óu toh ṭiki no tákibo. **26** Héndilla, zodi Cóítane Cóítan dáfa, tóoile toh íte nizor ulḍa nize bák óigiyoi; héen óile ítar raijjo keéngori ṭiki tákibo? **27** Aar zodi Añí búť dáfai de Belzebul or taakote de óile, tóoile tuáñrar fuain de har taakote dáfa dé? Hétolla tuáñrar bisarhar óibo de ítara. **28** Montor zodi Añí búť dáfai de Allar Ruhr taakote de óile, tóoile toh Allar raijjo tuáñrar hére aáigiyoi. **29** “Honókiye boluwar manúc or gór ot góli yóggwar cómbotti luṭ gorí keéngori faribó, zodi age boluwar manúc yóggwa re bańdí no ere? Bańdí erilé éna yóggwar gór luṭ gorí faribó. **30** “Zee niki Añr híkka no, yóggwa Añr ulḍa; aar zee niki Añr fúańti dola no goré, yóggwa ye cínřacińṭṭá goré. **31** “Hétolla Añí tuáñra re hoór, insán or hárr guná edde kuféri maf gorídiya zaybo, montor Pak-Ruhr ulḍa kuféri maf gorídiya no zaybo. **32** Honókiye Manúc or Fuar hélaf honó hotá hoilé, yóggwa re toh maf gorídiya zaybo; montor honókiye Pak-Ruhr hélaf hotá hoilé, yóggwa re maf gorídiya no zaybo, e zobatan óu no zaybo, aar aiyér de zobatan óu no zaybo. (aĩon g165) **33** “Gas gom de óile yíbar gula yó gom óibo, aar zodi gas hóraf de óile yíbar gula yó hóraf óibo; kiyólla-hoilé gas toh gulaye éna siná zah. **34** Ó háf or fuain ókkol! Tuáñra hóraf ói keéngori gom hotá hoói faribá? Kiyólla-hoilé dil zíne furaiya, muké híin beh hoó. **35** Gom manúce gom zomaiya ttu gom mún neela; aar hóraf manúce hóraf zomaiya ttu hóraf fun neela. **36** Montor Añí tuáñra re hoór, manúce no báfi hoó de fottí hotár hísaf ítara ttu kiyamot or din diya foribó. **37** Kiyólla-hoilé tuáñra behosúr ṭóoriba de yó tuáñrar

hotáye, aar hosúrbon tóoriba de yó tuáñrar hotáye.” **38** Yárbaade hoozzon alem edde Féroci ókkole Isá re hoór de, “Úzur, añára Tuáñr ttu ekkán nicán saitó saái.” **39** Íba ye ítara re zuwabe hoór de, “E zobanar hóraf edde zenákur maincé nicán dabi goré, montor ítara re nobi Yunus or nicán bade ar honó nicán diya no zaybo. **40** Kiyólla-hoilé Yunus zendilla tin din tin rait ðoóñr mas or feřot accíl, héndilla Manúc or Fua yó meřir tole tin din tin rait tákibo. **41** Kiyamot or din Ninivi cóor or manúc ókkol e zobanar manúc iín or fúañti tíyaibo, aar itará re hosúr díbo; kiyólla-hoilé ítara toh Yunus or elan fúni touwá goijjíl, aar soó, Yunus or túaro ðoóñr Ekzon iñyót asé. **42** Kiyamot or din Cibá mulluk or rani e zobanar manúc iín or fúañti uríbo, aar itará re hosúr díbo; kiyólla-hoilé híba ye toh Sóloman or buddír hotá fúni bolla duniyair céc matá ttu aiccíl, aar soó, Sóloman or túaro ðoóñr Ekzon iñyót asé. **43** “Zeñtté honó manúc ottu hóraf jin neele, héñtte hé jin nwá fúana zaga ókkol ot zai aram goittó zaga tuwa. Montor no faile, **44** nizoré nize hoó de ‘Añí añr góř ot waafes zaiyumbói, zentú añí neeliaicci,’ Yíba zeñtté waafes aiyé, hé zaga gán háli, sáf goijjá edde tík goijjá lootfa. **45** Baade yíba zai aró háñt twa nizor túaro hóraf jin ané, aar híin góli héře táke; tói hé manúc cwar fisór hálót agor hálót or túaro bicí hóraf óizagoi. E zobanar hóraf maincór hálót óu héndilla beh óibo.” **46** Isá ye manúc or dol ore híin hoór de októt, íbar maa edde báiyain íba llói hotá hoitó baäre tíyai táikke. **47** Ezzone íba re hoór de, “Soó, Tuáñr maa edde báiyain de Tuáñr llói hotá hoitó baäre tíyai táikke.” **48** Zee niki íba re zanaíyé, yóggwa re Isá ye hoór de, “Añr maa hon? Aar Añr báiyain hontará?” **49** Baade íba ye ummot ókkol or uzu át barái hoór de, “Ótiya, Añr maa edde Añr báiyain. **50** Kiyólla-hoilé zee niki Añr asmani Baf or moncá mozin sole, yóggwa óilde Añr báí, bóin aar maa.”

13 Hé din Isá góř or baäre neeli ðířr hañsat zai boiccégoi. **2** Aar íbar hañse becábici manúc ókkol zoma óiye dé hétolla, íba ekkán noow ot urí boiccé, aar manúc cún beggún kul or uore tíyai táikke. **3** Tarfore íba ye meésal ókkol dí ítara re boóut kessú hoiyé, ki hoilé, “Fúno, ezzon bis cínřoya bis cínřto neeillé. **4** Yóggwa ye cínřer de októt, hodún bis rastarhañsat foijjíl, aar faik ókkole aái híin háifelaiye. **5** Hodún bis cíl zobin ot foijjíl, zeřé bicí meři náí. Mur meři nu accíl ísafe híin ot hára ges aiccé. **6** Montor beil uitté rár

híin furigiyói, aar cínřor nó gasá ísafe híin fúaigiyoi. **7** Hodún bis keñřabon ot foijjíl, keñřabon barí urí híin ore sibi raikké. **8** Lekin ar hodún bis gom zobin ot foijjíl, aar híin ot fósol dóijje: kessút ek cót gun, kessút háit gun, ar kessút tiríc gun. **9** Zar ttu fúniabar han asé, yóggwa ye fúno.” **10** Baade cárít tun aái Isá re hoór de, “Tuñí maincóre meésal dí kiyá hotá hoó?” **11** Íba ye ítara re zuwabe hoór de, “Asmani raijior gufoni re zainto tuáñra re beh diya giyéh, montor ítara re híyan diya nó zah. **12** Kiyólla-hoilé zar ttu niki asé, yóggwa re aró diiya zaybo, aar yóggwa ttu ódorbaára tákibo; montor zar ttu niki náí, yóggwa ttu asé de híin úddwa loiféla zaybo. **13** Añí ítara re meésal dí etollá beh hoói, kiyólla-hoilé ítara sailé yo no deké, fúnile yo no fúne, aar no yó buzé. **14** Ítarar híyane nobi Yesáyahr agun hotá yían fura óiye, ‘Tuáñra hane fúnat tákiba montor no buzíba, tuáñra suké saát tákiba montor no siníba. **15** Kiyólla-hoilé manúc ítarar dil toh doró óigiyoi, ítarar han bór óigiyoi, aar ítara nizor suk bon gorífelaiye. Arnóile ítara nizor suké dekító, hane fúnito, nizor dile buzí Añr hañse fíři aító, aar Añí ítara re gom goittám.’ **16** Lekin mubarek tuáñrar suk, híine deké de hétolla; mubarek tuáñrar han, híine fúne de hétolla. **17** Kiyólla-hoilé Añí tuáñra re sóiyi hoóir, boóut nobi edde forhésgar manúc ókkole tuáñra zíin dekor híin deki bolla azzu goijjíl, montor nó deké; tuáñra zíin fúnor híin fúni bolla yó azzu goijjíl, montor nó fúne. **18** “Yala bis cínřoyar meésal lan or maáni kii fúno. **19** Zeñtté honókiye raijior kalam fúne montor no buzé, íbilíce aái yóggwar dil ot zíin cínřa gíyeh híin harí loizagói. Manúc yóggwa óilde rastar hañsat foijjé de bis. **20** Cíl zobin ot foijjé de bis óilde ubá, zee niki kalam fúne aar éhon híin ore kúcir sáañte kobul goré; **21** montor nizor bútoře mozbut cínřor nó gasá de hétolla híin hooddin beh táke. Zeñtté hé kalam or zoriya mosibot yáh zulúm aiyé, yóggwa éhon fissá mare. **22** Keñřabon ot foijjé de bis óilde ubá, zee niki kalam fúne, montor duniyair sintabáfaniye edde dón-doulot or adore hé kalam ore sibi raké, hétolla híin ot gula no dóre. (aiñ g165) **23** Lekin gom zobin ot foijjé de bis óilde ubá, zee niki kalam fúne edde buzé, aar gula dóra: kessú ye ek cót gun, kessú ye háit gun, aar kessú ye tiríc gun.” **24** Isá ye ítara re arekkán meésal dí hoór de, “Asmani raijio óilde undilla manúc or dóilla, zee niki nizor zobin ot gom bis ókkol cínřte. **25** Montor yóggwar manúc ókkol gúm gíyeh rár, yóggwar duccon aái giyuñt mazé

kérkuñrar bis ókkol cínñidi giyyégoi. **26** Zeñtté giyuñr sara barí urí fósol dóijje, héñtte kérkuñra yó dahá giyeh. **27** “Tói gór or goóur ókkole girós or hañse aái hoór de, ‘Jonab, tuñí tuñir zobin ot gom bis cínñtilla de nó né? Tói kérkuñra hontú aiccé?’ **28** “Yóggwa ye ítara re hoór de, ‘Ezzon duccone híyan goijjé deh.’ Goóur gúne yóggwa re hoór de, ‘Tóoile añára zai híin háñri félaítamboi né?’ **29** “Montor yóggwa ye hoór de, ‘No, no, tuñára kérkuñra háñribarcot giyuñ yó háñrifelaiba. **30** Daibar ainda nú aiyé foijjonto duni gún ore fúañti baríto doh; one daibar ainda ailé añí dooíya ókkol ore hoíyúm de, furat difélai bolla age kérkuñra gún zoma gorífelai tara bañdifelo; baade giyuñ gún añr gudam ot zoma goró.” **31** Isá ye ítara re aró ekkán meésal dí hoór de, “Asmani raijjo óilde eggwá hóroir danar dóilla, zibá re ezzon manúce looi nizor kítit lagayégoi; **32** yíba oinno bis beggún or túaro cóñro de óile yo, barí uríle yíba kétir tamám sara ókkol or túaro doóñr ói endilla eggwá gas bone, zeén níki faik ókkole aái yíbar déeila ókkol ot bahá bañdé.” **33** Isá ye ítara re aró ekkán meésal díye de ki hoilé, “Asmani raijjo óilde cútar or dóilla, zín ore eggwá mayafua ye looi tokoriban ekkuri tin cér ațat miyáíye, baade guñra hañi or dola fúli uitté.” **34** Isá ye maincóre híin beggún meésal dí beh hoíyé; meésal sára íba ye ítara re honó kessú no hoító. **35** Zeéne nobir duara howá gíyl de yían fura ó: “Añí meésal ókkol dí Añr muu kúliyum; Añí uúin boiyan goríyum zín duniyair foidayecir héñtte lóti lukaiya asé.” **36** Baade Isá manúc ókkol ore eri gór or bútoire giyyé. Aar íbar cárít tune íbar hañse aái hoór de, “Añára re zobin or kérkuñrar meésal lan buzáido.” **37** Íba ye ítara re hoór de, “Zibá ye niki gom bis cínñtte, íba óilde Manúc or Fua. **38** Zobin nán óilde duniyai, gom bis sún óilde raijior fuain, aar kérkuñra gún óilde lbiílíc or fuain, **39** ze duccone híin cínñtte íte óilde lbiílíc, daibar ainda óilde duniyair ahérot, aar dooíya gún óilde fírísta ókkol. (aiñ g165) **40** “Zendilla, kérkuñra gún ore zoma gorífelai ooin ot furat diféle, e duniyair ahérot ot óu héndilla beh óibo. (aiñ g165) **41** Manúc or Fua ye Nizor fírísta ókkol ore diferáibo, aar híine íbar raijior bútotu zetará oinno zon ore gunát foraba edde zetará kuham goré, ítara beggún ore ekkán ot zoma goríbo, **42** aar ítara re zoler de ooin or fooin ot félaídibo; hére hañdahari edde date dat kirkirani óibo. **43** Héñtte forhésgar ókkol nizor Baf or raijior mazé beil or dóilla somkibó. Zar ttu fúnibar han asé, yóggwa ye fúno.

44 “Asmani raijjo óilde zobin ot lukai raikká dón or dóilla, zín ezzon manúce fai abar lukai raikké; aar hé kúciye zai nizor ttu asé de hárr kessú besi hé zobin nán kinnégoi. **45** “Abar, asmani raijjo óilde undilla códor or dóilla, zee niki háti mukta ókkol or talac ot asé; **46** zeñtté yóggwa ye eggwá bicí dami mukta faiyé, hétunot zai nizor ttu asé de hárr kessú besi yíba kinnégoi. **47** “Abar, asmani raijjo óilde undilla țana-zal or dóilla, ziyán fanít buwái hárr kisím or mas dóijje, **48** aar híyan bórigiyoi rár zaila ókkole țani sor ot ainné. Tarfore ítara boói gom mún gom mún dulat bóijje, montor hóraf fun hóraf fun félaídiye. **49** Duniyair ahérot ot borabor héndilla beh óibo. Fírísta ókkol aibó, aái forhésgar ókkol ottu nafórman ókkol ore alok gorífelaiibo, (aiñ g165) **50** baade ítara re zoler de ooin or fooin ot félaídibo; hére hañdahari edde date dat kirkirani óibo.” **51** Isá ye ítara re hoór de, “Tuñára iín beggún buijjó né?” Ítara hoór de, “Buijji ze.” **52** Íba ye ítara re hoór de, “Hétolla fottí alem zetará asmani raijior cárít bonigiyói, ítara beggún endilla ezzon gór or girós or dóilla zee niki nizor gudam ottu noya edde furan jiníc ókkol neela.” **53** Zeñtté Isá ttu meésal híin hoíyá óiye, íba héntu giyyégoi. **54** Íba Nizor wotón ot aái manúc ókkol ore ítarar mujilíc-hánat eén taalim diyat doijje, zeén níki ítara am múke hoór de, “E Manúc cwa ye e giyan edde keramoti ham iín goríbar kémota hontú faiyé? **55** Ibá kí mistírir fua no? Ibár maa Moriyam hoó de híba no né, aar Ibár báiyain Yakub, Yusúf, Sáimon edde Yohúdah no né? **56** Ibár bóinain beggún añárar fúañti asé de no né? Tói Ibá ye iín beggún hontú faiyé?” **57** Héndilla hoói ítara íba re inkar goijjé. Montor Isá ye ítara re hoór de, “Ze honó nobir izzot nizor wotón ot edde nizor gór ot bade beggúlla asé.” **58** Aar ítarar nabiccác or zoriya íba ye hére bicí keramot nó goré.

14 Hé októt Galil elakar hókumot-goróya Hérude Isár baabute hóbor fúinne, **2** tói yóggwa ye nizor uzir-nazir ókkol ore hoór de, “Íba óilde bápťismadoya Yaháya, íba mora ttu zinda óiye deh; hétolla toh íba ye keramoti ham híin gorí farer.” **3** Kiyólla-hoilé Hérude nizor báí Filíp or bou Hérudias or wasté hé Yaháya re gereftar gorí bañdifelai ziyól ot díyl. **4** Yaháya ye yóggwa re endilla hoító de hétolla, “Tuñir ttu híba re biyá goríbar zayes náí.” **5** Yóggwa ttu íba re marifélaíto monehoító, montor awam ókkol ore dooraitó, kiyólla-hoilé ítara Yaháya re nobi manitó. **6**

Lekin zeñtté Hérud or zormo-din aiccé, Hérudias or zí ye maáfil ot nasi Hérud ore kúci goijjé. 7 Hétolla yóggwa ye hosóm hái waada goijjé de, híba ye zín mage híin diibo hoói. 8 Nizor maa ye cíkaidiye de héndilla híba ye hoór de, “Báptismadoya Yaháyar holla wa re ekkán tálit góri eré añré doo.” 9 Híyan fúni baáñcca ttu bicí afsús laiggé, montor toóu nizor hosóm edde meéman ókkol or zoriya yóggwa ye hókum díye de, híbar aros sán fura gorá záy bolla. 10 Tarfore yóggwa ye manúc difeřái, ziyól ot Yaháyar holla hariféla baye. 11 Baade íbar holla wa ekkán tálit góri aní zéřfua wa re diiya giyéh, aar zéřfua wa ye nizor maar hañse ainné. 12 Yárbaade Yaháyar ummot ókkole aái yore íbar lac cwa loizai dohón gorífelaiye; baade zai Isá re híyan zanaiyé. 13 Isá ye Yaháyar baabute fúinne rár, héntu sira ói noow ot gori ekkán bocóti-sára zagat giyói. Aar manúc ókkole híyan fúni, cóor ókkol ottu neeli áñři-áñři íbar fisá doijje. 14 Zeñtté Isá noow ttu laimmé, íba ye đoóñr ek dol manúc deikké; aar ítara lla feřfuri ítarar biyaram ókkol gom goijjé. 15 Zeñtté háñz óiye, íbar cárít tune íbar hañse aái hoór de, “Yián toh ekkán bocóti-sára zaga, aar beil óu giyói. Hétolla manúc cún ore duñraido, zeéne tará fara ókkol ot zai nizor lla hána kinigói fare.” 16 Montor Isá ye ítara re hoór de, “Tará ttu zaagói no foribó; hái bolla kessú tará re tuáñra doo.” 17 Ítara íba re hoór de, “Añára ttu eré fañs swá ruři edde duwá mas bade ar kessú náí.” 18 Íba ye hoór de, “Híin eré Añr hañse anógói.” 19 Baade íba ye manúc cún ore kér or uore boitó hókum díye, aar hé fañs swá ruři edde duwá mas sún looi asman or uzu saái cúkuriya goijjé. Tarfore ruři gún báñgi-báñgi cárít tun ore diiyé, aar cárít tune manúc cún ore bařidiyé. 20 Tará beggúne feř bóri háíye. Baade ze tukuřa ókkol basigiyói, cárít tune híin feñřai looi fura baró báñir bóijje. 21 Háíye de ítara beriyáin edde fuain bad di tokoriban fañs ázar beřaáin. 22 Baade éhon or bútoře Isá ye Nizor cárít tun ore mojbur goijjé de, íba ye manúc cún ore bidai gorí dite-dite ítara zeéne noow ot urí íbar age đíir okule zaagói. 23 Manúc cún ore bidai gorídi baade, íba ekéla faár or uore dua goittó uiřřói. Aar háñz óiye de heñtte, íba héře háliga, 24 montor noow gán kul ottu boóut duré, aar boiyar uzan baát accíl ísafe híyan léinge éñskar. 25 Fuáñitta, Isá fanír uottú áñři-áñři ítarar héře aiccé. 26 Íba fanír uottú áñřer de híyan cárít tune deká bicí đooraiyói, aar hoór de, “Íbá búti!” Héndilla hoói, ítara đooro guzoran

maijjíl. 27 Montor Isá ye éhon-éhon ítara re hoór de, “Hímmot goról Ibá Añí; no đooraiyó.” 28 Zuwabe Fitore íba re hoór de, “Malik, zodi Tuñí de óile, añré fanír uottú Tuáñr héře aitó hókum dóh.” 29 Íba ye hoór de, “Ai.” Hétunot Fitor noow ttu lami, fanír uottú áñři-áñři Isár híkka zaat doijje. 30 Montor zeñtté tez boiyar deikké íba đooraiyói, aar đufizargoi rár guzori hoór de, “Malik, añré basol!” 31 Isá ye toratori Nizor át barái íba re dórifelai hoór de, “Ó hom biccác ola, cóok kiyá goijjós?” 32 Baade zeñtté ítara noow ot uiřřégai, boiyar támaigiyoi. 33 Aar zetará noowr uore accíl ítara íba re eén hoói sóida goijjé, “Becók, Tuñí óilade Allar Fua.” 34 Ítara đíí farái, Genesáret elakat foóñicce. 35 Aar hé zagar maincé Isá re sinné rár, ítara sairó đak or elakar agagurat hóbor foóñsai, biyaraimma ókkol beggún ore íbar hañse ainné; 36 baade ítara íba re fóriyat gorát doijje de, biyaraimma gún ore siríf íbar fucák or hañra óile súito dí bolla; aar zetó zone súiye ítara beggún gom óigiyoi.

15 Yárbaade Jerúsalem ottu hoozzon alem edde Féroci, Isár hañse aái hoór de, 2 “Tuáñr ummot ókkole agor zobanar buzurgó ókkol or rosóm kiyá báñge? Ítara hána háibar agor ttu át no dúwe.” 3 Isá ye ítara re zuwabe hoór de, “Tuáñra nize yó kiyá tuáñrar rosóm or zoriya Allar hókum báñgo? 4 Alla ye toh endilla hoiyé, ‘Bafmaa re izzot goríba’ aar ‘Zee niki baf or yáh maar bodnam goré, ítare mariféla zaybo.’ 5 Montor tuáñra hoó de, ‘Zodi honókiye baf ore yáh maa re eén hoó, “Ze siz loi tuáñra añr ttu laf feita híyan Alla re diífela gíyeh,” 6 tóoile ítar ttu baf ore yáh maa re izzot gorár zorur náí.’ Héen gorí, tuáñra tuáñrar rosóm or zoriya Allar kalam ore baatel gorífelaiyo. 7 Ó munafék ókkol, tuáñrar baabute nobi Yesáyah ye sóiyi hotá hoiyé, ki hoilé, 8 ‘Manúc ííne Añré nizor muké beh izzot goré, montor tarár dil Añr ttu duré. 9 Tará Añr ebaadot goréde behar; kiyólla-hoilé tará taalim ísafe cíka de óilde insán or niyom-kaanun ókkol.” 10 Isá ye manúc ókkol ore Nizor hañse matai, ítara re hoór de, “Fúno aar buzó. 11 Gal ot zín góle manúc ore híine nafak goré de no, bólke gal ottu zín neeliayé manúc ore híine beh nafak goré.” 12 Hétunot cárít tune aái íba re hoór de, “Tuñí hoi faro né, Féroci ókkole yíán fúni bezar óiye dé?” 13 Íba ye zuwabe hoór de, “Ze sara Añr asmani Bafe lagaiyé de no, híyan háñrifela zaybo. 14 Ítarar hotá félai ero. Ítara óilde ańdá ókkol or ańdá fońt dahóya; zodi ek

ańdá ye arek ańdá re fońt dahá, duní zon toh gańt ot forizaybói.” **15** Fitore ĩba re hoór de, “Ańára re meésal híyan buzáido.” **16** Isá ye hoór de, “Tuáńra yó aijjó obuz táigiyogoi dé? **17** Tuáńra kí no buzó, zín gal or bútoe góle híin zaa de óilde feřot, aar feikána ttu neelizagói dé? **18** Montor zín gal ottu neeliayé híin aiyé de óilde dil ottu, aar manúc ore híine beh nafak goré. **19** Kiyólla-hoilé dil ottu éna kukíyal, kotólakotóli, ęoilla-boęoilla zenákari, suri, misá gobá, edde gifot aiyé. **20** Manúc ore híine beh nafak goré; montor adúiya áte hána háile manúc ore nafak goré de no.” **21** Baade Isá hé zaga félai, Tayár edde Sídón cóor or elakat giyyégoi. **22** Hé elakar eggwá Kánani mayafua neeli aái yore guzori-guzori ĩba re hoór de, “Ó Malik, Dawud or Fua, añr uore rahám goró! Ańr zéřfua wa búte fai bicí duk far.” **23** Montor Isá ye híba re honó zuwab nó deh. Hétunot ĩbar cárit tune aái yore ĩba re aros gorér de, “İbáh re duńrai difélo, kiyólla-hoilé ibáh toh ańárar fisé-fisé guzorat asé.” **24** Isá ye zuwabe hoór de, “Ańré siríf Isráil koum or ańzigiyoi de bérasóol ókkol or hańse beh diferá gýeh.” **25** Montor mayafua wa aái yore ĩbar muńtu sóida fori hoór de, “Ó Malik, ańré modot goró!” **26** Isá ye zuwabe hoór de, “Fuain dor hána looi kuńir or muńtu félai dón gom no.” **27** Híba ye hoór de, “Ói, Malik, montor toóu de girós or mes ottu forizagói de tukura híin kuńire háa.” **28** Hétunot Isá ye híba re hoór de, “Ó mayafua, tuáńr iman bicí ęoóńr! Tuńi ziyán soór tuáńr ĩla híyan gorá záybo.” Tói éhon or bútoe híbar zéřfua wa gom óigiyoi. **29** Baade Isá héntu bacá lói, Galil Díř báy zai eggwá faár or uore urí boiccégoi. **30** Hétunot ĩbar hańse becábici manúc ókkol aiccé, zetará fúańti leng, ańdá, mazur, buk, edde aró boóut kisím or biyaraimma ókkol aní ĩbar țęg or gurat eijjé; aar ĩba ye ĩtara re gom goijjé. **31** Zeńtté manúc ĩtara buk ókkole hotá hoór de, mazur gom óiye de, lenge ańrer de, ańdá ye dekéř de híin deikké, ĩtara taajup óigiyoi, aar ĩtara Boni Isráil or Allar taarif goijjé. **32** Isá ye Nizor cárit tun ore matai hoór de, “Ańr ttu manúc itará ĩla feřfurer, kiyólla-hoilé itará Ańr fúańti asé de tin din óiye aar itará ttu háito kessú náı. Ańr ttu itará re waacca duńraidito mone no hoór, zeéne itará fońt ot matá gúrai fori no zagói.” **33** Cárit tune ĩba re hoór de, “Manúc or ettór ęoóńr dol ore feř bóri hábai bolla ańára e bocóti-sára elakat héđun ruři hořé faiyum?” **34** Isá ye ĩtara re hoór de, “Tuáńra ttu ruři houwá asé?” ĩtara hoór de,

“Háńt twa, aar houggwá gura mas.” **35** ĩba ye manúc cún ore meřit boitó hoiyé; **36** baade hé háńt twa ruři edde mas sún looi Alla re cúkuriya goijjé, aar híin báńgi cárit tun ore diiyé, aar cárit tune manúc cún ore diiyé. **37** Beggúne feř bóri háiye, baade ze tukura ókkol basi accł híin bóijje rár lai loi háńt lai óiye. **38** Zetará háiye ĩtara óilde sair ázar beřaáin, beřiyáin edde fuain bad dih. **39** Isá ye manúc or dol ĩwá re bidai gorđi baade, noow ot urí Magáđan elakat giyyégoi.

16 Ek din Féroci ókkole edde Sadukái ókkole aái Isá re entán gorí bolla ĩba re hoiyé de, ĩtara re ekkán asmani nicán daháito. **2** ĩba ye ĩtara re zuwabe hoiyé de, “Háńz óile tuáńra hoó de, ‘Moósum gom óibo, kiyólla-hoilé asman ĩal óiye.’ **3** Aar bińna hoó de, ‘Aijja tuwán óibo, kiyólla-hoilé asman ĩal óiye edde gubbar óiye.’ Tuáńra toh asman or súrot saái moósum forók gorí zano, montor zobanar alamot ore forók gorí no faroór dé? **4** E zobanar hóraf edde zenákur maincé nicán tuwa, montor ĩtara re nobi Yunus or nicán bade ar honó nicán diya no zaybo.” Tói ĩba ĩtara re eri, giyyégoi. **5** Aar Cárit tun ęiřr okule zaibarcót, fúańti ruři loizaitó foóraigilgoi. **6** Isá ye ĩtara re hoór de, “Hóboroddar, Féroci ókkol or edde Sadukái ókkol or cúřar ottu uńciyar táikko.” **7** Hétunot ĩtara afós ot howáhoi gorér de, “ĩba ye híyan hoór de ańára ruři nú aní de hétolla.” **8** Montor Isá ye híyan zani fari, ĩtara ttu fusár gorér de, “Ó hom biccác ola ókkol! Tuáńra ttu ruři náı de híyan kiyá afós ot howáhoi gorór? **9** Tuáńra aijjó nó buzó níki? Tuáńra ttu monet náı né, fańs ázar maincóre fańs swá ruři loi hábai baade aró ho báńir bóri loóila? **10** Héndilla, sair ázar maincóre háńt twa ruři loi hábai baade aró ho lai bóri loóila? **11** Ańi tuáńra re ruřir baabute hoóir de no de híyan no kiyá buzór? Féroci ókkol or edde Sadukái ókkol or cúřar ottu uńciyar táikko.” **12** Hétunot ĩtara buzí faijjé de, ĩba ye ĩtara re ruřir cúřar ottu uńciyar tákito hoiyé de no, bólke Féroci ókkol or edde Sadukái ókkol or taalim ottu. **13** Baade Isá zeńtté Kaisáriya Filippi elakat aiccé, ĩba ye ĩbar cárit tun ottu fusár gorér de, “Maincé Manúc or Fua re hon bouli hoó?” **14** ĩtara zuwab der de, “Hodúne hoó de Tuńi bóle bápřismadoya Yaháya; ar hodúne hoó de, nobi Eliyas; ar hodúne hoó de, Yarmíyah yáh oinno nobi ókkol ottu honó eggwá.” **15** Tói ĩba ye ĩtara re hoór de, “Montor tuáńra kii hoó, Ańi hon?” **16** Sáimon Fitore zuwabe hoór de, “Tuńi óilade hé Mosih, zinda Allar Fua.” **17** Isá ye ĩba re hoór de, “Yunus or fua Sáimon,

tui mubarek, kiyólla-hoilé toré yían honó insáne zahér goijjé de no, bólke Añr asmani Bafe goijjé deh. **18** Añí yó toré hoóir, tui óilide Fitor, aar Añí e fattór or uore Añr zomát banaiyúm; híyan ore moote úddwa no zitibó. (Hadēs g86) **19** Añí toré asmani raijor sabí diiyum; tui e duniyait zín bañdibi híin asman ot óu bañdá zaybo, aar e duniyait zín ezazot dibi híin asman ot óu ezazot diya zaybo.” **20** Baade íba ye íbar cárit tun ore horagori nicót goijjé de, íba Mosih de híyan honókiyo re no hoitó. **21** Hé októť lóti Isá ye Nizor cárit tun ore zanaidiyat doijje de, íba ttu hámaha Jerúsalem ot zaa foribó; aar murubbi, doónr imam, edde alem ókkol or át ot boóut dóilla duk faa foribó; íba re mariféla zaybo, montor tin din ot din zinda gorá zaybo. **22** Hétunot Fitore íba re ekkinare loizai buzár de, “Ó Malik, híyan dur óuk. Tuáñr uore héndilla honódin no óuk.” **23** Isá ye firi Fitor ore hoór de, “Cóitan, Añr muúntu dur ól Tui óilide Añr lla oñsá; kiyólla-hoilé tor díyan toh Allar gún or uzu no, bólke insán or gún or uzu.” **24** Isá ye tarfore íbar cárit tun ore hoór de, “Zodi honókiyo ttu Añr fisáli aitó monehoó, yóggwa ttu nizoré inkar gorífela foribó, aar nizor kúruc boói Añr fisáli dora foribó. **25** Kiyólla-hoilé zee niki nizor zan basaitó saá, yóggwa ye híyan háraifeleibo; montor zee niki Añr wasté nizor zan háraifele, yóggwa ye híyan faibo. **26** Kii laf, zodi honókiye tamám duniyai faa, montor nizor zan nán háraifele? Insáne nizor zan or bodol kii dii faribó de asé? **27** Kiyólla-hoilé Manúc or Fua toh Nizor Baf or mohímaye Nizor fírista ókkol ore fúañti looi aibó, tarfore fottí zon ore nizor-nizor ham mozin bodola diibo. **28** “Añí tuáñra re sóiyi hoóir, eřé endilla hodún manúc tíyaiya asé, zetará Manúc or Fua re íbar raijot hókumot goittó aiyér de nó dekíte no moribó.”

17 Sów din baade Isá ye siríf Fitor ore, Yakub ore, edde yóggwar báí Yohánna re looi, ítara re eggwá uñsol faár or uore loigiyé. **2** Héře ítarar muúntu íbar súrot bodoligiyói. Íbar siyára beil or dóilla zolat doijje, aar íbar hoor nur or dóilla dúf óigiyoi. **3** Hétunot ítara deikké de, Muúsa edde Eliyas íba llói hotá hoór. **4** Fitore zuwabe Isá re hoór de, “Malik, gom óiye añára eřé así. Zodi Tuñí soó, añí eřé tin nán řambu řakiyúm: ekkán Tuáñr lla, ar ekkán Muúsa lla, edde ar ekkán Eliyas olla.” **5** Fitore hotá hoór de októť, ekkán nurani miyúla ye ítara re saífelaiye, aar hé miyúla ttu eggwá abas aiccé de, “Íbá óilde Añr adorja Fua, zibá re lói Añí

bicí kúci. Ibár hotá fúno!” **6** Cárit tune híyan fúinne rár, merít uúñtoi foijjé, aar bicí dooraigiyói. **7** Montor Isá aái ítara re súi hoór de, “Uřó, no dooraigyo.” **8** Hétunot ítara suk tulí saiyé rár, siríf Isá re bade ar honókiyo re nó deké. **9** Ítara faár ottu lami aiyér de októť, Isá ye ítara re hókum gorér de, “Tuáñra ziyán deikkó, híyan Manúc or Fua re mora ttu zinda gorá nó zah foijjonto honókiyo re no hoiyó.” **10** Íbar cárit ítara íba ttu fusár gorér de, “Tóoile alem ókkole kiyá endilla hoó, age nobi Eliyas aár zorur?” **11** Isá ye zuwabe hoór de, “Becók, age Eliyas aibó aar hárr kessú zendilla ówa foitto héndilla gorídibo. **12** Montor Añí tuáñra re hoóir, Eliyas aáigiyoi. Lekin manúc ókkole íba re nó siné, bólke íba re ítara ttu zeén monehoiyé héen goijjé. Borabor héndilla, Manúc or Fua yó ítarar át ot duk faibar asé.” **13** Hétunot cárit ítara buijjé de, íba ye ítara re bápřismadoya Yaháyar baabute hoór deh. **14** Baade ítara zeñtté manúc or dol or héře aiccé, ezzon manúce Isár hañse aái añrú félai hoór de, **15** “Ó Malik, añr fua war uore rahám goró, ítar ttu súańfira asé, aar bicí duk faar; íte egazá ooin ot edde fanít fore. **16** Añí ítare Tuáñr cárit tun or hañse ainnílam, montor tará ítare gom gorí nó fare.” **17** Hétunot Isá ye zuwabe hoór de, “Ó iman sára edde baañra nosól, Añí tuáñrar fúañti-fúañti aró hotókkal tákitam? Hotódin Añí tuáñra re bordac goittám? Ítare eřé Añr hañse anó.” **18** Isá ye bít twa re dómkidiye rár, yíba fua war bítottu neeligiyói, aar íte éhon-éhon gom óigiyoi. **19** Tarfore cárit tune Isár hañse aiddone aái hoór de, “Yíba re añára kiyá neelai nó fari?” **20** Isá ye ítara re hoór de, “Tuáñrar iman or homir zoriya. Kiyólla-hoilé Añí tuáñra re sóiyi hoóir, zodi tuáñra ttu hóroir danar héttirin iman táke, tuáñra e faár gwá re eén hoói faribá, ‘Entú lori uré zaagói,’ tói yíba lorizaybói. Tuáñra gorí no faribá de kessú no tákibo. **21** Lekin dua edde ruza sára endilla gún neelai no fare.” **22** Zeñtté cárit tun Galil ot zoma óiye, Isá ye ítara re hoór de, “Manúc or Fua re manúc ókkol or át ot gosáidiya zaybo; **23** aar ítara íba re marifélaibo, montor íba re tin din ot din zinda gorá zaybo.” Híyan fúni ítara ttu bicí ferecan laiggíl. **24** Isá edde íbar cárit tun Kaparnahúm ot foóñsi baade, baitul-mukaddos or házana-tulóya ókkol Fitor or hañse aái hoór de, “Tuáñrar ustate baitul-mukaddos or házana no dee nřki?” **25** Fitore hoór de, “Becók, dee.” Zeñtté Fitor gór or búture aiccé, íba ye hoibár agor ttu Isá ye íba re hoór de, “Sáimon, tui kii báfos? Duniyair baáñcca

ókkole hásil yáh házana har ttu tulé, nizar maincór ttu né náki baár or maincór ttu?” 26 Fitore hoór de, “Baár or maincór ttu.” Isá ye íba re hoór de, “Tóoile toh nizar manúc ókkol basigiyói. 27 Montor añára ítara re bezar no gorí fán, ðift zai borkí baágói. Ze mas age foribó yíba re loibi; aar yíbar gal kúlile ekkán rufar foicá faibi ziyán kafí óibo. Híyan looi Añr lla edde tor lla híyan ítara re házana dic.”

18 Hé októót cárit tune Isár hañse aái hoór de, “Tóoile asmani rajijot ebbe ðoóñr honnwá?” 2 Tói íba ye eggwá gura fua re íbar hañse matai ítara mazé týagaraiye, 3 aar hoór de, “Añí tuáñra re sóiyi hoóir, zodi tuáñra bodoli gura fuain dor ðóilla no bono, tóoile asmani rajijot bilkúl góli no faribá. 4 Hétolla zee niki nizaré e gura fua war ðóilla cóñro bana, yóggwa óilde asmani rajijot ebbe ðoóñr. 5 Aar zee niki endilla honó gura fua re Añr name kobul goré, íte Añré kobul goré deh.” 6 “Zee niki Añr uore iman ainné de e cóñro ókkol ottu honókiyo re guná gorába, ítara lla beétor óilde, ítara golat eggwá bór cíl or sakki bañdí mur doiijit ðufáidiya zah. 7 Duniyair uore siz uúin or zoriya afsús, zíine gunát foraba. Kiyólla-hoilé híin toh aibár zorur, montor uitara uore afsús, zar duara niki híin aiyé.” 8 Zodi tuáñr áte yáh ténge tuáñre gunár uzu tane, tóoile híyan harí tuáñr héntu félaido. Dui át yáh dui ténge táki ofúrani ooin ot félaidiya zar túaro, tññra yáh leng ói zindigit góla tuáñr lla beétor. (aíñnios g166) 9 Aar zodi tuáñr suké tuáñre gunár uzu tane, tóoile yíba tuáñr héntu neelai félaido. Dui suk táki zuzuk or ooin ot félaidiya zar túaro, eggwá suk loi zindigit góla tuáñr lla beétor. (Geenna g1067) 10 Saiyó, e cóñro ókkol ottu ezzon ore yó hékarot no goijjó; kiyólla-hoilé Añí tuáñra re hoóir, tarár fírista ókkole asman ot mazé hámica Añr asmani Baf or siyára deké. 11 Manúc or Fua aiccé de añzigiyoi de ítara re nejat di bolla. 12 Tuáñra kii báfo? Zodi honó manúc ottu ek cót bérasóol táke aar héntu eggwá ór óizagoi, íte nobboi-now wa re faár or uore eri, ór óigiyoi de yíba re tuwaitó no zaibo né? 13 Añí tuáñra re sóiyi hoóir, íte yíba re tuwai faile, ór nó de nobboi-now wa bérasóol lun ore lói túaro íte yíba re lói bicí kúci goríbo. 14 Héndilla, tuáñrar asmani Baf or moncá yáin no de ki, e gura itará ttu ezzon úddwa dónco óizon. 15 “Zodi tuáñr báí ye tuáñr ulða hosúri goré, tóoile zai aiddone ítara hosúr daháidiyo. Zodi íte tuáñr hotá dóre, tóoile tuñí tuáñr báí ore fírai faiyó.

16 Montor zodi íte tuáñr hotá no dóre, tóoile tuáñr fúañti aró ezzon yáh dui zon manúc loizaiyó, zeéne ‘ze honó maamela dui zon yáh tin zon gobár zobane sóiyi bouli sábut óizagoi.’ 17 Aar zodi íte ítara hotá yó no dóre, tóoile híyan zomát ore hoiyó. Aar zodi zomát or hotá yó no dóre, tóoile íte tuáñra lla ezzon gairimandár yáh házana-tulóyar ðóilla óuk. 18 “Añí tuáñra re sóiyi hoóir, tuáñra duniyait zíin bañdíba, híin asman ot óu bañdá zaybo; aar duniyait zíin ezazot díba, híin asman ot óu ezazot díya zaybo. 19 “Añí tuáñra re yáin óu hoóir, zodi duniyait tuáñrar bútotu dui zone ektofák ói dua goríle, Añr asmani Baf or torfóttu ítara lla híyan gorá zaybo. 20 Kiyólla-hoilé zere dui zon yáh tin zon Añr name zoma ó, hére Añí ítara mazé así.” 21 Hétunot Fitore aái Isá re hoór de, “Malik, zodi añr báí ye añr ulða hosúri gorát táke, añí ítara ho bar maf goittám? Háñt bar né?” 22 Isá ye íba re hoór de, “Añí toré háñt bar bóuli no hoóir, bólke hóittor gun háñt bar. 23 “Kiyólla-hoilé asmani rajijó óilde endilla baáñcar ðóilla, zibá ye nizar goóur ókkol ottu ísaf loito saiyé. 24 Zeñtté yóggwa ye ísaf lowa cúru goijjó, hétunot yóggwar hañse endilla ezzon ore aná gíyeh, zar ttu yóggwa ye lak-lak tññ footi faar. 25 Íte zettót híin fúnzi no farer, ítara giróse hókum díye de, híin fúnzi bolla ítara, ítara bou fuain dore edde ítara ttu zíin asé híin beggún besiféla zay bolla. 26 “Hétolla goóur gwá ye yóggwar muúntu uúinñtoi fori hoór de, ‘Ó malik, hooddin ánik sobór goró, añí tuáñre beggún fúnzifelaiyum.’ 27 Hétunot goóur gwar girós ottu ítara lla feñfuije, aar footi gún maf di ítara eridiyé. 28 “Montor hé goóur gwá baárkule zai, nizar sáañti goóur ottu ezzon ore loot faiyé, zibá ye ítara ttu ek cót dinártññ udár loóil. Íte íba re dóri gola sibi hoór de, ‘Añr footi diiféla.’ 29 “Hétunot ítara sáañti goóur gwá ye ítara ténge ot uúinñtoi fori fóriyat gorér de, ‘Hooddin ánik sobór goró, añí tuáñre beggún fúnzifelaiyum.’ 30 “Montor íte nó mane, bólke zai ítara otókkal olla ziyól ot diyégoi, zetókkal foijjonto footi híin nó fúnze. 31 Zeñtté ítara oinno sáañti goóur ókkole híyan deikké, ítara ttu bicí ferecan laiggé, aar aái ítara girós ore zíin díye híin beggún zanaiyé. 32 “Tói giróse ítara matai hoór de, ‘Tui toh hóraf goóur! Tui añré fóriyat goijjó de hétolla, añí toh tor footi beggún maf diyí. 33 Tor ttu yó tor sáañti goóur or uore rahám gorón nu accíl né, zendilla añí tor uore rahám goijjí?’ 34 Girós ottu guccá urí, ítara otókkal foijjonto sáñza dí bolla ziyól or zimmadar ore gosáidiye, zetókkal ítara footi

beggún fúñzi nó fele. **35** “Añr asmani Bafe yó tuáñra re héndilla beh goríbo, zodi tuáñra fottfkiye nizor báí ore dil ottu maf no doh.”

19 Zeñtté Isá ttu hotá híin hoiyá óiye, íba Galil ottu bacá lói Jordán hál or farkul or Yohúdiya elakat giyyé. **2** Becábicí manúc ókkol íbar fisá doijjil, aar hére íba ye ítarar biyaram gom goijjil. **3** Isár hañse hodún Féroci yó aiccé; ítara íba re entán gorí bolla súwal gorér de, “Morotfua ye nizor bou wóre ze honó wajáye sárifelaibar zayes asé né?” **4** Íba ye zuwabe hoór de, “Tuáñra kí nó foró, zibá ye ítara re foida goijjé íba ye cúrut lóti ítara re morot aar maya banaiyé deh, **5** aar hoiyé de, ‘Híyan olla toh morotfua ye nizor bafmaa ttu zuda ói nizor bou wór fúañti tákibo, aar ítara duní zon ek jisím óizayboi?” **6** Hé ísafe, ítara ar dui no, bólke ek jisím. Hétolla Alla ye zetará re zur goijjé, ítara re honó manúce síra no goróuk.” **7** Ítara íba re hoór de, “Tóoile Muúsa ye endilla kiyá hókum díye, híba re sárhabos dii duñrai diyo?” **8** Isá ye ítara re zuwab der de, “Tuáñrar dil doró de hétolla Muúsa ye tuáñra re tuáñrar bouwáin sárifelar ezazot diyé deh, montor cúrut lóti héndilla nu accíl. **9** Añí tuáñra re hoóir, zee kiyé nizor bou wóre zenár hosúri lla bade ar honó wajáye sárifele aar ar eggwá re biyá goré, íte zená gorér deh.” **10** Cárit tune íba re hoór de, “Zodi zamai bou wór hálót héndilla ó, tooile biyá no gorón éna beétor.” **11** Isá ye ítara re hoór de, “Hotá híyan beggúne kobul gorí no fare, montor siríf uitará beh fare zetará re híyan or toóufik diiya giyéh. **12** Kiyólla-hoilé ízara ókkol or bútoe hodún óilde maar feřot lóti ízara, aar hodún ore ízara banaiyé de óilde maincé; endilla yó hodún ízara asé zetará asmani raijor wasté biyá no goré. Zee niki híyan kobul gorí fare, íte kobul goróuk.” **13** Ek din maincé gura fuain dore Isár hañse anát doijje, zeéne íba ye ítarar uore át dé edde ítara lla dua goré; montor cárit tune manúc cún ore bóřboráye. **14** Lekin Isá ye hoór de, “Fuain dore Añr hañse aitódo; ítara re no oónillo, kiyólla-hoilé asmani raijjo toh ítarar dóilla maincé éna hásil goré.” **15** Ítarar uore át dí baade íba héntu giyyégoi. **16** Fore ezzon manúc Isár hañse aái hoór de, “Ustat, ofúrani zindigi faite añr ttu kii gom ham gorá foribó?” (aiñnios g166) **17** Íba ye yóggwa re hoór de, “Gom orbaabute tuñí Añr ttu kiyá fusár gorór? Gom toh siríf Ekzon éna asé. Montor tuáñr ttu zindigit góilto monehoilé, hókum ókkol amól goró.” **18**

Yóggwa ye íba re hoór de, “Hon nún?” Isá ye hoór de, “Kún no goríba; zená no goríba; suri no goríba; misá gobá no diba; **19** bafmaa re izzot goríba,’edde ‘nizor atehañsór maincóre nizor dóilla muhábbot goríba.” **20** Juwan manúc cwa ye íba re hoór de, “Añí híin beggún amól gorí-gorí aiyír. Añr ttu ar kii baki asé?” **21** Isá ye yóggwa re hoór de, “Zodi tuáñr ttu furafuri háři óito monehoó, tooile zoo, tuáñr cómbotti ókkol besi gorif ore diífélogoi, tói tuñí asman ot dón faiba; baade aái Añr fisáli óiyogai.” **22** Montor juwan manúc cwa ye híyan fúinne rár, ferecanir sáañte giyyégoi; kiyólla-hoilé yóggwa ttu becábicí dón-cómbotti asé. **23** Hétunot Isá ye íbar cárit tun ore hoór de, “Añí tuáñra re sóiyi hoóir, tuangor manúc ottu asmani raijot gólite bicí mockil. **24** Añí tuáñra re abar hoóir, tuangor manúc Allar raijot gólar túaro, eggwá uñř fúñc or faái ttu goli zaa aró aásan.” **25** Cárit tune híyan fúinne rár bicí taajup óigiyoi, aar hoór de, “Tóoile hone nejat fai faribó?” **26** Isá ye ítarar uzu saái hoór de, “Híyan insáne gorí no fare, montor Alla ye hárr kessú gorí fare.” **27** Hétunot Fitore íba re hoór de, “Soó, añára de hárr kessú eridi Tuáñr fisáli óigiyigoi. Tóoile añára kii faiyum?” **28** Isá ye ítara re hoór de, “Añí tuáñra re sóiyi hoóir, tuáñra zetará Añr fisáli óiyo, noya foidayecir októť zeñtté Manúc or Fua íbar mohímar toktót boibó, héñtte tuáñra yó baró wan toktót boói Isráil or baró háandan or bisar goríba, **29** aar zee niki Añr wasté nizor gór, báí, bóin, baf, maa, bou, fuain, yáh zagazobin eridiyé, yóggwa ye ek cóť gun bicí faibo, aar ofúrani zindigi miras faibo. (aiñnios g166) **30** Lekin boóut zon, zetará yala age asé, ítara fisé óizayboi; aar zetará yala fisé asé, ítara age óizayboi.”

20 “Kiyólla-hoilé asmani raijjo toh endilla zomidar or dóilla, zibá ye ek din biñnna sóore yóggwar anggur-bariza lla mozur dóitto giyyé. **2** Yóggwa ye ítara re dine ek dináror dóre dii bolla razi ói, ítara re yóggwar anggur-barizat diferáidiye. **3** “Yóggwa now wa báze góri baárkule giyyé rár, aró hodún manúc ham sára, bazar ot tíyai táikke de deikké. **4** Yóggwa ye ítara re hoór de, “Tuáñra yó zai añr anggur-barizat ham gorógoi, añí tuáñra re hók motafe góri dam diiyum.’ Baade ítara giyyé. **5** “Yóggwa abar baró wa báze edde tin nwá báze góri baárkule zai, ekí dóilla goijjé. **6** Fañs swá báze góri yóggwa baárkule giyyé rár, hére aró manúc ókkol tíyai táikke de deikké. Yóggwa ye ítara re hoór de, “Tuáñra eřé dinbór ham sára kiyá

tíyai táikko?’ 7 “Ítara yóggwa re hoór de, ‘Añára re honókiye ham ot nó loo de hétolla.’ “Yóggwa ye ítara re hoór de, ‘Tuáñra yó zai añr anggur-barizat ham gorógoi.’ 8 “Háñzinna óiye rár, anggur-barizar giróse mazí re hoór de, ‘Mozur gún ore mata, aar fisór ttu aiccé de ítare lóti cúru gorí age aiccé de ítare foyjonto dam diiféla.’ 9 “Zetará re fañs swá báze ham ot laga giyéh, ítara fottíkiye aái ek dinár or dóre faiyé. 10 Hétolla zetará re age ham ot laga giyéh ítara aái, bicí faibo bouli táaije. Montor ítara fottí zone yó faiyé de ek dinár or dóre. 11 Ítara faiyé rár, zomidar gwar ulða monmonat doijje. 12 Eén hoói, ‘Fisór manúc itará siríf ek gónða beh ham goijjé, montor añára de dinbór roid or gorom ot ham goijjí, toóu tuñí itará re añára llói fúwan goijjó.’ 13 “Hétunot yóggwa ye ítara ezzon ore zuwabe hoór de, ‘Bái, añí toré honó nainsáfi nó gorí. Tui ek dinár lói ham gorí bolla añr llói razi óilide no né? 14 Tor dam looi yore zaagói. Fisé aiccé de manúc ítare yó añr ttu tor fúwan dam diito monehoór. 15 Añr nizor jiníc lói añr ttu zeén monehoó héen gorí bolla añr ttu hók náí niki? Aar náki añí gom de hétolla tor ttu ric lager dé?’ 16 “Hétolla hoóir, zetará yala age asé, ítara fisé óizayboi; aar zetará yala fisé asé, ítara age óizayboi.” 17 Isá uore Jerúsalem ot zaar de októ, íba ye baró zon cárit tun ore ekkinare loizai foñt or uore ítara re hoór de, 18 “Soó, añára uore Jerúsalem ot zairgói, hére Manúc or Fua re ðoóñr imam ókkol or edde alem ókkol or hañse dóridiya zaybo; ítara íba re moot or fótua díbo, 19 edde Beyohúdi ókkol or hañse gosáidibo, íba re ínca gorí bolla, coónk mari bolla, edde kúruc ot dífelai bolla. Lekin tin díu ot díu íba re zinda gorá zaybo.” 20 Yárbaade Zebedair fuain dor maa ye híbar fuain looi Isár hañse aiccé, aar sóida fori íba re ekkán aros goijjé. 21 Isá ye híba re hoór de, “Tuñí kii soór dé?” Híba ye Isá re hoór de, “Añré waada doo de, Tuñí añr e fua duní wa re Tuáñr raijot buágaraiba, ezzon ore Tuáñr den dák ottu, ar ezzon ore Tuáñr ban dák ottu.” 22 Montor Isá ye zuwabe hoór de, “Tuáñra kii magor híyan tuáñra no zano. Añí fiíyum de fiyala yíba tuáñra fií faribá né?” Ítara íba re hoór de, “Fariyúm.” 23 Isá ye ítara re hoór de, “Becók tuáñra Añr fiyala fiíba, montor Añr den dák ottu yáh ban dák ottu honókiyo re buágaron Añr ham no. Zaga híin óilde uitará lla zetará lla niki Añr Bafe toiyar gorí raikké.” 24 Baki doc zon cárit tune híyan fúni, ítara duní báí lói guccá óigiyoi. 25 Montor Isá ye ítara beggún ore Nizor hañse matai hoór de, “Tuáñra toh

zano, Beyohúdi ókkol or hókumot-goróya ókkole tarár uore raastri goré; aar tarár ðoóñr sóddar ókkole itarar uore adíkar sola. 26 Montor tuáñrar bútoire héndilla ón tík no, bólke tuáñra ttu zee niki ðoóñr óito saá, ítár ttu tuáñrar háadem bonar zorur; 27 aar tuáñra ttu zee niki age óito saá, ítár ttu tuáñrar gulam bonar zorur; 28 zendilla Manúc or Fua yó hédmot faito aiccé de no, bólke aiccé de hédmot goittó, edde boóut zon or bodol Nizor zan dito.” 29 Zeñtté ítara Jerikó cóor ottu neeler, ðoóñr ek dol manúc Isár fisá doijje. 30 Dui zon añdá manúc rastar hañsat boirá accí; ítara Isá hé rasta báy zaar de fúinne rár, guzori-guzori hoór de, “Ó Malik, Dawud or Fua, añárar uore rahám goró!” 31 Manúc cúne ítara re jéjjerai nizám óito hoiyé, montor ítara aró ðoóñr góri guzori hoór de, “Ó Malik, Dawud or Fua, añárar uore rahám goró!” 32 Hétunot Isá tíyaiyoi, aar ítara re matai hoór de, “Tuáñra kii soó, Añí tuáñra lla kii goittám?” 33 Ítara íba re hoór de, “Malik, añára saái, añárar suk kún kúlizoggoi.” 34 Isá ttu itarar uore rahám lagi itarar suk kún súiye; itarar suk éhon-éhon gom óigiyoi, aar ítara íbar fisá doijje.

21 Zeñtté ítara Jerúsalem or dáce Zaitun Faár ot asé de Betfégi edde Betániya farat foónicce, hétunot Isá ye dui zon cárit ore difeñáye, 2 ítara re endilla hoói, “Tuáñra muúm or fara gán ot zoo, hére zai mottor eggwá gadá baindá loot faiba, yíbar fúañti eggwá sóo yó faiba. Híin ore kúli Añr hére anógoi. 3 Zodi honókiye tuáñra re kessú hoó, tuáñra hoibá de, ‘Malik ottu iín ore lager.’ Tói yóggwa ye híin ore éhon difeñáidibo.” 4 Híyan etollá óiye, zeéne nobir duara howá gíyl de yíán fura ó: 5 “Síyon or zérfua re hoibá de, ‘Soó, tuáñr Baáñcca tuáñr hañse aiyér. Íba cída, íba gadár uore gori, gadár sóor uore gori aiyér.” 6 Hé cárit ítara zai, Isá ye ítara re zendilla cíkaidiye héndilla goijjé. 7 Ítara gadá edde gadár sóo wa re ainné, aar híin or uore nizor hoor ókkol bicáidiye, aar Isá híin or uore boiccé. 8 Beec bák maincé nizor hoor ókkol rastar uore bicáidiye; argúne gas or ðaggwa ókkol harí rastat bicáidiye. 9 Zedún manúc Isár age-age edde fisé-fisé zaat accí, ítara guzori-guzori hoór de, “Dawud or Fua re Hósana! Mubarek Ubá zibá Mabud or name aiyér. Ebbe uore asman ot Allar taarif óuk!” 10 Zeñtté Isá Jerúsalem ot góille, guñra cóor úrussul ot forigiyói; ítara hoór de, “Íbá hon?” 11 Manúc cúne hoór de, “Íbá óilde Isá nobi, Galil or Nasárat cóor or.” 12 Fore Isá baitul-mukaddos ot góille, aar zetará hére

besa kina gorér ítara re loraidiyat doiije; aar baṭṭa bāṅgoyar ṭebíl edde hoitor besoyar boiṛóni ókkol natḍiyagarai diye. 13 Íba ye ítara re hoór de, “Pak-kalam ot endilla asé, ‘Añr gór ore munazat or gór howá zaybo,’ montor tuáñra toh híyan ore ḍahañit or aḍḍa-hána banaifélaiyo.” 14 Tarfore ańdá ókkol edde leng ókkol baitul-mukaddos ot Isár hañse aiccé, aar íba ye ítara re gom goijjé. 15 Lekin ḍoóñr imam ókkole edde alem ókkole zeñtté Isá ye goijjé de taajuippa ham ókkol deikké, edde baitul-mukaddos or bútoṛe fuain de guzori-guzori, “Dawud or Fua re Hósana!” hoór de fúinne, ítara ttu bicí guccá urígiyoi. 16 Ítara íba re hoór de, “Tuñí fúnor né fuain iíne kii hoór?” Isá ye ítara re hoór de, “Fúnir, tuáñra kí yían honódin nó foró, ‘Gura fuain dor edde dud or fuain dor muk ottu Tuñí Tuáñr taarif óibar entezam goijjó?’” 17 Baade íba ye ítara re eri cóor or baáre Betániya farat giyégoi, aar hére rait haraáil. 18 Bíinna sóore, Isá cóor ot waafes zaibarcót, íba ttu búk laiggé. 19 Íba ye foñit ot eggwá ḍuñir-gas deká, yíbar íñiyot giyé, montor yíbat fata bade ar kessú loot nó faa. Hétunot íba ye gas swá re hoór de, “Ar honódin tor ttu gula no dórouk.” Tói ehon or bútoṛe ḍuñir-gas swá fúaigiyo. (aĩñ g165) 20 Híyan deká cárit tun taajup óigiyo, aar hoór de, “ḍuñir-gas swá eén toratori keén fúaigiyo?” 21 Isá ye ítara re zuwabe hoór de, “Añí tuáñra re sóiyi hoóir, zodi tuáñra ttu iman táke aar cók no goró, tooile tuáñra siríf ḍuñir-gas swár uore ziyán óiye híyan gorí faribá de no, bółke zodi e faár gwá re yó hoó, ‘Urí doiijjat forgói,’ híyan óibo. 22 Tuáñra duat mazé iman or sáañte zín magibá híin beggún faiba.” 23 Isá ye baitul-mukaddos or urán ot góli baade taalim der de októ, Yohúdir ḍoóñr imam ókkol edde murubbi ókkol íbar hañse aiccé, aar hoór de, “Tuñí ham iín kii adíkare gorór? Tuáñre e adíkar hone diiyé?” 24 Isá ye ítara re zuwabe hoór de, “Añí yó tuáñra ttu ekkán súwal fusár goríyumu. Tuáñra Añré híyan or zuwab dilé Añí yó tuáñra re hoiyúm Añí iín kii adíkare gorír deh. 25 Yaháya ye báptisma díbar adíkar hontú faáil? Asman ottu né náki insán ottu?” Ítara afós ot biyasana gorér de, “Zodi añára hoói ‘asman ottu,’ íba ye añára re hoibó de, ‘Tooile tuáñra íba re biccác kiyá nó goró?’ 26 Montor zodi hoói, ‘insán ottu,’ tooile añára de maincóre ḍoorai, kiyólla-hoilé beggúne toh Yaháya re nobi mane.” 27 Hétolla ítara Isá re zuwabe hoór de, “Añára no zani.” Íba ye yó ítara re hoór de, “Tooile Añí yó tuáñra re no hoiyúm Añí iín kii adíkare

gorír.” 28 “Tuáñrar buzá kii? Dóro, ezzon manúc ottu duwá fua asé, yóggwa ye fua ḍoóñr gwar hañse zai hoór de, ‘Ó fut, aijja anggur-barizat zai ham gorgói.’” 29 Fua ye zuwab diyé de, ‘Añí no zaiyumu,’ montor íte fisór ttu mon fírai yore giyé. 30 Yóggwa ye fua cóñro war hañse yó zai ekí ḍóilla hoiyé. Íte zuwab diyé de, ‘Jii, zaiyumu,’ montor íte nó zaa. 31 Fua duní wa ttu hone baf or moncá fura goijjé?” Ítara íba re hoór de, “ḍoóñr gwá ye.” Isá ye ítara re hoór de, “Añí tuáñra re sóiyi hoóir, házana-tulóya ókkol edde magi mayafuain ókkol Allar raijot tuáñrar age góler. 32 Kiyólla-hoilé Yaháya toh forhésgarir torika dahái bolla tuáñrar hañse aiccé, aar tuáñra íba re ekin nó goró; montor házana-tulóya ókkole edde magi mayafuain ókkole íba re ekin goijjé; tuáñra híyan deká baade yo mon nó fíro aar íba re ekin nó goró.” 33 “Arekkán meésal fúno: Ekgwá zomidar accé, zibá ye ekkán anggur-bariza lagaiyé. Yóggwa ye híyan or sairó ḍák ottu gíra díye, anggur or roc neelai bolla hére bútoṛe eggwá gañrá kuijé, aar ekkán ṭongki baindé. Baade bariza gán cacá ókkol ore ṭeka dí yóggwa oinno mulluk ot giyói. 34 Zeñtté anggur or ainda aiccé, yóggwar gula yóggwa ye fai bolla nizor goóur ókkol ore cacá gún or hañse diferáiyé. 35 Montor cacá gúne yóggwar goóur híin ore dóri, eggwá re mara-dóra goijjé, ar eggwá re zane marifélaiye, ar eggwá re fattór maijé. 36 Abar yóggwa ye agor gún or túaro beecgori goóur ókkol diferáiyé; cacá gúne ítara re yó ekí ḍóilla goijjé. 37 Ebbe ahérit, yóggwa ye eén báfi nizorfua re ítarar hére diferáiyé, ‘ítara añr fua re izzot goríbo.’ 38 Montor cacá gúne fua wa re deká afós ot hoór de, ‘Íte toh mirasdár; aiyó itaré marifélai itar miras loifélai.’ 39 Tói ítara íba re dóri barizar baáre loizai marifélaiye.” 40 “Hé ísafe, barizar girós ailé, hé cacá gún ore kii goríbo fáñllar?” 41 Ítara íba re hoór de, “Yóggwa ye hóraf manúc híin ore saabgori hótom gorífelaibo, aar bariza gán undilla cacá ókkol ore ṭeka dífelaibo zetará ainda ailé yóggwa re gular bák diibo.” 42 Isá ye ítara re hoór de, “Tuáñra pak-kalam ot yían bilkúl nó foró níki, ‘Ze fattór mistíri ye inkar gorífelaibe, yíba fattór beggún or túaro bicí zoruri wa óigiyo. Híyan Mabud or torfóttu óiaicce, aar híyan añárar suk ot taajuippa?’” 43 “Hétolla Añí tuáñra re hoóir, Allar raijjo tuáñra ttu loifélai undilla eggwá koum ore diiféla zaybo, zibá ye níki híyan orgulagala dóraibo. 44 Zee níki hé fattór or uore foribó, íte bāṅgi hán-hán óizayboi; montor zar uore níki hé fattór foribó, íte fici záyboi.” 45 ḍoóñr

imam ókkole edde Féroci ókkole Íbar meésal lun fúni buzígiyoi de ki Íba ye Ítarar baabute hoór deh. **46** Ítara Íba re dórifelai bolla kucíc goijjíl, montor ítara awam ókkol ore dooraitó, kiyólla-hoilé ítara Íba re nobi mainto.

22 Isá ye ítara re aró ekbar meésal dí hoór de: **2** “Asmani raijjo óilde undilla baáñccar dóilla, zibá ye nizor fuar boirat or hána goijjé. **3** Zetará re boiraitta hánar dawot diya giyé, ítara re matai bolla yóggwa ye nizor goóur ókkol difeřáye, montor ítara aitó nó saá. **4** “Yóggwa ye abar ar hodún goóur ore endilla hoóí difeřáye, ‘Zetará re dawot diya giyé ítara re hoibá de, yala añr ttu hána nal goijjá óiye; añr doónra goru edde boli goru zooráyi, yala beggún nal. Tuáñra boirat or hánat aiyó.’ **5** “Montor ítara éckara gorí nizor-nizor ham ot giyyégoi, kiyé nizor kétéit ar kiyé nizor códorit, **6** aar baki gúne yóggwar goóur gún ore dóri ítara re bodsólluk goijjé edde marifélaye. **7** Lekin híyan fúni baáñcca bicí rak ógiyoi, aar nizor fóous ókkol difeřái hé kúni ókkol ore dóncó gorífelaye, edde Ítarar cóor furat difélaye. **8** “Baade yóggwa ye nizor goóur gún ore hoór de, ‘Boirat or hána toh nal óiye, montor zetará re dawot diya gyíl ítara aibár laayek no. **9** Hétolla, cóor or rastar muáñ-muáñ zai zetó zon loot foo, ítara re boirat or hánar dawot dogói.’ **10** Tói goóur gúne baáre rastat zai zaré-zaré loot faiyé, gom hóraf beggún ore dola goijjé; baade boiraitta-hána gán meémane furaigiyói. **11** “Montor baáñcca ye bútoe meéman ókkol ore saitó aiccé de októit, hére boiraitta hoor afindá ezzon manúc deikké. **12** Yóggwa ye Ítar ttu fusár gorér de, ‘Dustó, tuñí boiraitta hoor sára eřé bútoe kéngori góillo?’ Manúc cwa ye honó zuwab di nó fare. **13** “Hétunot baáñcca ye háadem ókkol ore hoór de, ‘Ítar át téng bañdí, itaré baáre andár ot félai dogói; hére hañdahari edde date dat kirkirani óibo.’ **14** “Kiyólla-hoilé řaha toh boóut zon ore giyé, montor hoozzon ore beh bařilowa gýyeh.” **15** Hétunot Féroci ókkol zai, Isá re kii bote Íbar hotá lói hol ot félai faribó híyan sólla goijjégoi. **16** Ítara nizor cárit tun ore Hérudiól or fúañti Íbar hañse difeřái hoór de, “Ustat, añára zani de, Tuñí sóiyi hoó edde sóiyigori Allar rastar taalim doh. Tuñí maincé kii hoór forba no goró, kiyólla-hoilé Tuñí toh honókiyo re forók goró de náí. **17** Añára re hoósai, Tuñí kii báfo? Romi baáñcca re házana doon zayes asé né náki náí?” **18** Montor Isá ye tarár hóraf niyot ore zani

hoór de, “Ó munafék ókkol, tuáñra Añré entán gorór kiyá? **19** Házana dee de héndilla ekkán Añré foicá dahó.” Tói tará Íbar re ekkán dinár aní diiyé. **20** Íba ye tará re hoór de, “Yían har sóbi edde har nam?” **21** Tará Íba re hoór de, “Romi baáñccar.” Tói Íba ye tará re hoór de, “Tóoile zín baáñccar híin baáñcca re diyo, aar zín Allar híin Alla re diyo.” **22** Híyan fúni tará taajup ógiyoi, aar Íba re eri giyyégoi. **23** Hé din Sadukái ókkol Isár hañse aiccé, Sadukái ókkole hāñcor náí hoó, ítara aái Íba re ekkán súwal goijjé, **24** ki hoilé, “Ustat, Muúsa ye hoiyé de, ‘Zodi honó manúc fuain sára morizagói, tóoile Ítar báí ottu Ítar bou híba re biyá gorífelai nizor báí olla nosól foida gorá foribó.’ **25** Dóro, añárar bútoe háñt zon báí accíl. Foólla wa ye biyá gorí fuain sára morigiyói, hétolla íte nizor bou wóre báí olla rakígiyoi. **26** Héndilla hálot dusára, tisára ebbe háñto báí foijjonto óiye. **27** Ahérit, mayafua wa yó morigiyói. **28** Hé ísafe, hāñcor or hale híba ítara háñto zon ottu har bou óibo? Kiyólla-hoilé híba re toh ítara beggúne biyá goijjíl.” **29** Isá ye ítara re zuwabe hoiyé de, “Tuáñra gollot ot asó, kiyólla-hoilé tuáñra toh no pak-kalam zano, aar no Allar kudurut zano. **30** Kiyólla-hoilé hāñcor or hále manúc ókkole no biyá goríbo aar no ítara re biyá díya zaybo, bólke ítara asman ot fíristar dóilla beh óibo. **31** Mora ókkol zinda ówar baabute hoitó sailé, tuáñra kí Alla ye tuáñra re hoiyé de yían nó foró, **32** ‘Añí óilam de Ibrahim or Alla, Isahák or Alla edde Yakub or Alla?’ Alla toh mora ókkol or Alla no, bólke zinda ókkol or éna.” **33** Manúc cúne híyan fúinne rár, Íbar hé taalime taajup ógiyoi. **34** Zeñtté Féroci ókkole fúinne de, Isá ye Sadukái ókkol ore nizám márai raikké, ítara ekkán ot zoma óiye. **35** Ítara ttu Córivot or ézzon aleme entán gorí bolla Íba re súwal gorér de, **36** “Ustat, Tourat Córif ot hókum hon nán ebbe řoóñr?” **37** Isá ye yóggwa re hoór de, “‘Mabud tuáñrar Alla re nizor fura dile, fura zane, edde fura demake muhábbot goríba.’ **38** Híyan óilde ebbe řoóñr edde ebbe zoruri hókum. **39** Ebbe zoruri hókum dui nombór or gán óilde, ‘Nizor atehañsór maincóre nizor dóilla muhábbot goríba.’ **40** Hé hókum duníyan ot fura Córivot edde nobi ókkol or hotá lořkaiya.” **41** Féroci gún ekkán ot zoma asé de októit, Isá ye ítara re ekkán súwal gorér de, **42** “Mosíhr baabute tuáñrar buzá kii? Íba har Fua?” Ítara Íba re hoór de, “Dawud or Fua.” **43** Íba ye ítara re hoór de, “Tóoile Dawude kéngori Íba re Ruhr hédaiyote ‘Malik’ řaikké? Íba ye

toh endilla hoiyé, **44** ‘Mabude añr Malik ore hoór de, “Añr den ðák ottu boiyó, zetókkal foyjonto Añí Tuáñr duccon ókkal ore Tuáñr foor tole gorí nó felai.”’ **45** Tói Dawude íba re ‘Malik’ ðaikké de óile, íba kéngori Dawud or fua dé?’ **46** Íba re honókiye ehoór óu zuwab di nó fare, aar hé din lóti íba re ar súwal gorí bolla honókiye hímmot no goittó.

23 Baade Isá ye manúc or dol ore edde Nizor ummot ókkal ore hoór de, **2** “Córiyot buzáidi bolla alem ókkal edde Férocí ókkal óilde Muúsar zagat. **3** Hétolla, ítara tuáñra re zín goittó hoó, híin beggún goijjó edde mainno, montor ítara goré de híin no goijjó; kiyólla-hoilé ítara zín hoó híin toh nize no goré. **4** Ítara bór-bór fuñzá ókkal bañdí maincór hañd or uore tulí déh, montor híin lari bolla ítara nize eggwá ooñl úddwa dito no saá. **5** “Ítara zín goré híin maincóre dahái bolla beh goré; ítara toh pak-kalam or ayat leikká tabis ore ðoóñr góri bana, edde nizor fucák or hañrar doói lamba goré. **6** Ítara mela-cóbat barík zaga edde mujilíc-hána ókkal ot uñsol tokkar hadírat boitó fosón goré, **7** ítara aró, bazare-bazare sólam faito, edde maincé ítara re ‘Rabbí, Rabbí’ hoói ðakilé fosón goré. **8** “Montor tuáñra re ‘Rabbí’ ðaha no baiyó; kiyólla-hoilé tuáñrar Ustat toh eggwá éna, aar tuáñra beggún óilade báí báí. **9** Duniyait honókiyo re baf no ðakiyó; kiyólla-hoilé tuáñrar Baf toh ekgwá éna, zibá niki asman ot asé. **10** Tuáñra re ‘Sóddar’ dahá no baiyó, kiyólla-hoilé tuáñrar Sóddar toh ekgwá éna, íba óilde Mosih. **11** Lekin tuáñra ttu zee niki ebbe ðoóñr, íte tuáñrar háadem bonouk. **12** Zee niki nizoré nize ðoóñr kúwala, ítare cóñro gorá zaybo; aar zee niki nizoré nize cóñro kúwala, ítare ðoóñr gorá zaybo. **13** “Ó munafék alem ókkal edde Férocí ókkal, tuáñrar uore afsús! Kiyólla-hoilé tuáñra toh maincór ttu asmani rajjo bon gorífelo; tuáñra nize yó no gólo aar zetará bútoe góilto sár ítara re yó góilto no doh. **14** Ó munafék alem ókkal edde Férocí ókkal, tuáñrar uore afsús! Kiyólla-hoilé ek mikká ttu tuáñra toh rari ókkal or gór ókkal luj gorífelo, arek mikká ttu maincóre dahái bolla lamba-lamba dua goró. Hétolla tuáñra sánza bicí ðoóñr faiba. **15** “Ó munafék alem ókkal edde Férocí ókkal, tuáñrar uore afsús! Kiyólla-hoilé tuáñra toh ezzon manúc ore tuáñrar dórmot aní bolla doijsa-doijsa edde zaga-zaga lamba sofór goró; aar zeñtte ezzon aní faro, héñtte tuáñra ítare nizor túaro dui gun zuzuki bano. (Geenna g1067) **16** “Ó aña

foñt dahóya ókkal, tuáñrar uore afsús! Tuáñra hoó de, ‘Honókiye baitul-mukaddos or hosóm háile, kessú no; montor honókiye baitul-mukaddos or cúnar hosóm háile, híyan hámaha adai gorá foribó.’ **17** Ó bekuf edde aña ókkal! Hon nán bicí ðoóñr, cúna né náki cúna re pak-sáf goré de baitul-mukaddos? **18** Tuáñra yían óu hoó de ki, ‘Honókiye kurbani-gáñr hosóm háile, kessú no; montor honókiye híyan or uore asé de kurbani hosóm háile, híyan hámaha adai gorá foribó.’ **19** Ó aña ókkal! Hon nán bicí ðoóñr, kurbani ne náki kurbani re pak-sáf goré de kurbani-gáñr? **20** Hétolla zee niki kurbani-gáñr hosóm há, íte kurbani-gáñr edde híyan or uore asé de híin beggún or beh hosóm há. **21** Aar zee niki baitul-mukaddos or hosóm há, íte baitul-mukaddos or edde híyan or bútoe táke de íbar beh hosóm há. **22** Zee niki asman or hosóm há, íte Allar toktór edde híyan or uore zibá boiyé íbar beh hosóm há. **23** “Ó munafék alem ókkal edde Férocí ókkal, tuáñrar uore afsús! Kiyólla-hoilé tuáñra toh fudinar, masswá bahór or, edde zirar doc bák or ek bák doo, lekin Córiyot orbicí dami hotá re, yáni insáf, rahám edde imandari re tuáñra bad difélo. Tuáñra ttu iín óu gorón accíl aar uúin óu bad no don accíl. **24** Tuáñra óilade aña ókkal, zetará oinno zon ore foñt dahó, zetará eggwá masí re úddwa saí yore félaido, montor uñt gilifélo. **25** “Ó munafék alem ókkal edde Férocí ókkal, tuáñrar uore afsús! Kiyólla-hoilé tuáñra toh fiyalar edde tálbason or baárdák sáf goró, montor híin or bútoe de tuáñra zulúm edde lalsí gorí faiyó de híine furaiya. **26** Ó aña Férocí! Age fiyalar edde tálbason or bútor or ðák sáf gorífelo, tói baárdák óu sáf óizayboi. **27** “Ó munafék alem ókkal edde Férocí ókkal, tuáñrar uore afsús! Kiyólla-hoilé tuáñra toh endilla hobor or dóilla, zín ore dóla gorá gíyeh. Híin baár ttu saité de cúndor, montor bútoe mora maincór áñdqi ókkal lói edde hárr dóilla hoñsara loi furaiya. **28** Héndilla tuáñra re yó, maincé baár ttu saité forhéggar deké, montor tuáñrar bútoe munaféki edde kuhame furaiya. **29** “Ó munafék alem ókkal edde Férocí ókkal, tuáñrar uore afsús! Kiyólla-hoilé tuáñra toh nobi ókkal or hobor ore banaituló, aar forhéggar manúc ókkal or hobor ore háñzo. **30** Aar tuáñra hoó de, ‘Zodi añára añárar bafdáda ókkal or októ tákítam, nobi ókkal ore kún gorí bolla añára ítarar fúañti córik no óítam.’ **31** Héngori tuáñra nize nizor baabute gobá dó de, tuáñra óilade nobi ókkal ore kún goijjíl de ítarar fuain. **32** Yala zoo, tuáñrar bafdáda ókkole zín cúru

goijjíl, tuáñra híin furussat gorífelogoi. **33** “Ó háf or fuain háf ókkol! Tuáñra zuzuk or hókum ottu keéngori háriba? (Geenna g1067) **34** Hétolla, fúno, Añí tuáñrar hañse nobi, giyani manúc, edde alem ókkol diferáir; tuáñra héntu hodún ore kún goríba edde kúruc ot díba, aar hodún ore tuáñrar mujilíc-hána ókkol ot coónik maribá edde cóore-cóore loraibá. **35** Hétolla duniyait zedún behosúr manúc ore kún gorá gíyeh, ítara beggún or zimmadar óiba de tuáñra, behosúr Abel or lou wóttu lóti Berekaiyos or fua Zakariyahr lou foijjonto, zibá re tuáñra kurbani-gáñr edde baitul-mukaddos or mazémaijja kún goijjila. **36** Añí tuáñra re sóiyi hoóir, híin beggún or zimmadar óibo de e nosól. **37** “Jerúsalem, ó Jerúsalem, tui zee niki nobi ókkol ore kotól gorós edde zetará re tor hére diferá gíyeh ítara re cíl or dola maros. Kuúñri-kurá ye zendilla nizor sóo ókkol ore yíbar fak or bútoze zoma gorí raké, héndilla tor fuain dore zoma gorí rakí bolla Añí hotó bar saiýi de asé, montor tuáñra híyan nó soó. **38** Fúno, tuáñrar gór tuáñrar suk or muúntu sáragor óizayboi. **39** Kiyólla-hoilé Añí tuáñra re hoóir, tuáñra Añré otókkal ar no dekíba zetókkal tuáñra nó hoó de, ‘Mubarek Ubá zibá Mabud or name aiýér.”

24 Isá baitul-mukaddos ottu neeli zaargói, héntte íbar cárít tun íbar hañse aiccé, íba re baitul-mukaddos or billíng ókkol dahái bolla. **2** Íba ye ítara re zuwabe hoór de, “Tuáñra iín beggún dekór né? Añí tuáñra re sóiyi hoóir, eýe eggwá fattór or uore ar eggwá fattór no tákibo, híin fottí ekgwá re félaidiya zaybo.” **3** Isá Zaitun Faár or uore boirá accíl de októ, cárít tune íbar hañse aiddone aái hoór de, “Añára re hoóna, híin hoóntté óibo dé? Tuñí aibár edde duniyai ahéri óibar alamot kii óibo?” (aiñ g165) **4** Isá ye ítara re zuwabe hoór de, “Saiyó, honókiye zen tuáñra re gollot ot no loiza. **5** Kiyólla-hoilé boóut zone Añr name aái hoibó de, ‘Añí óilam de Mosih,’ ítara boóut zon ore gollot ot loizayboí. **6** Tuáñra laráir abas edde laráir hóbora-hóbori ókkol fúniiba; hóboroddar, no dooraibá, kiyólla-hoilé híin ówar zorur, montor híyala yó ahérot óibo de no. **7** Ek koume arek kouw or ulða edde ek raijjo ye arek raijzor ulða tíyaibo, aar zaga-zaga rať ókkol edde búsal ókkol óibo. **8** Lekin híin beggún óilde siríf, fua hálas óibar cúrrur duk ókkol or dóilla. **9** “Héntte maincé tuáñra re tokolíf di bolla dóridibo, aar tuáñra re marifélaibo; Añr lla bouli tuáñra re tamám kouw ókkole nafórot goríbo. **10** Héntte boóut zon iman ottu fissá maribó; ítara ezzon ore ezzone

dóridibo, edde ezzon ore ezzone nafórot goríbo. **11** Aar boóut misá nobi ókkol urí, boóut zon ore gollot ot loizayboí. **12** Bedini ókkol barízayboi de hétolla, beec maincór muhábbot homi zayboi. **13** Montor zee niki ahéri foijjonto bordac gorí tákibo, íte beh nejat faibo. **14** Aar tamám kouw ókkol or hañse gobá ó fán asmani raijzor kúchóbor fura duniyait tobolik gorá zaybo, tói baade beh ahérot aibó. **15** “Dániyel nobir duara hoóil de hé bicí hótara jiníc ziyáne nafak goré, híyan ore zeñtté tuáñra pak zagat tíyaiba dekíba—foróya ye buzó— **16** héntte zetará Yohúdiyat tákiba, ítara ttu faár ot dáizagoi foribó. **17** Zee niki gór or sád or uore asé, ítara ttu nizor gór or bútottu kessú looi bolla lamat no lama foribó. **18** Aar zee niki kítit asé, ítara ttu nizor saddor looi bolla waafes nu aá foribó. **19** Montor hé din ókkol ot hámil mayafuain dor lla edde dud or maa ókkol olla bicí afsús or hálót óibo. **20** Dua goró, zeéne tuáñra ttu cítkhale yáh ebaadot-or-din dáizagoi no fore. **21** Kiyólla-hoilé héntte ettór doóñr mosibot óibo, zendilla duniyair foidayecir héntte lóti aijjó óiye de náí, aar abar no yó óibo. **22** “Zodi hé din híin homaidiya no zayto, tóoile honókiye no basitó; montor Allar basíloiya bonda ókkol olla bóuli din híin homaidiya zaybo. **23** Héntte zodi honókiye tuáñra re eén hoó, ‘Soó, Mosih eýe asé!’ yáto ‘Uré asé!’ híyan ekin no goijjó. **24** Kiyólla-hoilé misá Mosih ókkol edde misá nobi ókkol uríbo, aar ítara doóñr-doóñr illayinícán ókkol edde taajuippa harhána ókkol daháibo, maincóre gollot ot loizai bolla, farilé Allar basíloiya bonda re úddwa. **25** Saiyó, Añí tuáñra re age lóti hoóidiyi. **26** “Hétolla zodi maincé tuáñra re eén hoó, ‘Soó, íba moidan zagat asé!’ tuáñra baáre no neeillo, aar zodi eén hoó, ‘Soó, íba bútor or kamárat asé!’ híyan ekin no goijjó. **27** Kiyólla-hoilé zendilla fuk ottu bijili somkilé fosím foijjonto foór óizagoi, Manúc or Fuar aá yó héndilla beh óibo. **28** Mora lac zeýe, hére toh hóun ókkol zoma óibo. **29** “Montor hé din ókkol or mosibot fúrai mottor beil andár óizayboi, aar sane foór no dibo; asman ottu tara ókkol forizayboí, aar asmani jiníc ókkol tóttoraibo. **30** “Héntte asman ot Manúc or Fuar nicán dahá zaybo, hé októ duniyair tamám háandan ókkole ferecani zahér goríbo, aar ítara dekíbo de, Manúc or Fua kudurut edde doóñr mohímar sáañte asman or miyúlar uottú aiýér. **31** Aar íba ye eggwá doóñr cíañr abas diyabai Nizor firista ókkol diferáibo, aar ítara duniyair ek matá ttu arek matá foijjonto zai sairómikka ttu íbar basíloiya bonda

ókkol ore ekkán ot zoma goríbo. **32** “Đuñir-gas ottu meésal loo: zeñtté đuñir-gas or đéila hórot ói fata neele, tuáñra zanizogói de, hóran đáke. **33** Héndilla tuáñra yó, zeñtté iín beggún dekíba, héntte buzíba de, Manúc or Fua đáke, ebbe dorozat. **34** Añí tuáñra re sóiyi hoóir, iín beggún fura nó óiyoi foijjonto e nosól bikkúl no fúraibo. **35** Asman zobin toh zari no tákibo, montor Añr hotá hámica zari tákibo. **36** “Lekin hé din edde októ aibár baabute honókiye no zane, asman or fírista ókkole yó no zane, aar Fua ye yó no zane, siríf Bafe beh zane. **37** Manúc or Fua aibár októ undilla óibo zendilla nobi Nuhr din ókkol ot óoil. **38** Zendilla hé din ókkol ot tuwán óibar age, zetódin Nuh kicítit nó uré hétodin foijjonto manúc ókkole háafiya gorát, biyá gorát edde, biyá diyat accíl, **39** aar tuwán aái ítara beggún ore bácai nó loiza foijjonto ítara kessú hoi nó fare, Manúc or Fua aibó de híyala yó héndilla beh óibo. **40** Héntte dui zon manúc bil ot óibo de tákibo; ítara ttu ezzon ore loiza zaybo, ar ezzon ore bad diya zaybo. **41** Duwá mayafua ye ekkú fúañti sakki gúraibo de tákibo; ítara ttu ezzon ore loiza zaybo, ar ezzon ore bad diya zaybo.” **42** Hétolla seton táko, kiyólla-hoilé tuáñra toh no zano tuáñrar Malik hon din aibó. **43** Lekin yíán zanilo de ki, zodi gór or giróse sur raitta hotúnót aibó de zanitó, tooile yóggwa seton tákito aar nizor gór ore bāngito no dito. **44** Hétolla tuáñra yó toiyar táko, kiyólla-hoilé Manúc or Fua tuáñra no țáaro de októ beh aibó. **45** “Tooile eén biccácdar edde buddíman goóur hon asé, zaré ítar giróse nizor gór or oinno goóur ókkol or uore zimmadar banaiyé, ítara re țaim or uore hána dii bolla? **46** Mubarek goóur ubá zaré nizor giróse waafes ailé ham híin gorér de lootfa. **47** Añí tuáñra re sóiyi hoóir, yóggwa ye nizor tamám cómbottir uore ítare zimmadar banaibó. **48** Lekin zodi hé goóur gwá hóraf ó, aar nizor dile-dile endilla hoó, ‘Añr girós aité boút deri asé,’ **49** aar íte sáañti goóur ókkol ore marat dore edde nicákur ókkol or fúañti háafiya goré, **50** tooile hé goóur gwar girós eén din ot aibó, ze din íte yóggwa aibó de no țáare, edde eén októ aibó, ze októ íte hoi no fare. **51** Tói yóggwa ye ítare haři hán-hán gorífelaibo edde munafék ókkol or hére cámil goríbo; hére hañdahari edde date dat kirkirani óibo.

25 “Hé októ asmani raijjo undilla doc zon abiyáta mayafuain dor dóilla óibo, zetará nizor-nizor serak looi dulá llói milto neeillé. **2** Ítarar bútoe fañs

zon accíl bekuf, aar fañs zon accíl salák. **3** Bekuf fúne ítarar serak loigiyé, lekin fúañti battí tel nó loiza; **4** montor salák kúne ítara serak or fúañti forot gori battí tel loigiyé. **5** Dulá aité zettót deri ór, ítara beggún zúri-zúri gúm ot forigiyói. **6** “Adá raitta hére eggwá uzor fúna gíyeh de, ‘Soó, dulá aiyér; íba llói milto neelo.’ **7** “Hétunót abiyáta mayafuain ítara beggún urí nizor-nizor serak nal gorát doiije. **8** Bekuf fúne salák kún ore hoór de, ‘Tuáñra ttu añára re kessú tel doóna, kiyólla-hoilé añárar serak nifizargoi.’ **9** “Salák kúne zuwab der de, ‘Tel asé de híin lói añára lla edde tuáñra lla no kulaitó fare. Yárbodol zai besoya ókkol ottu tuáñra lla kini anógoi.’ **10** “Baade zeñtté ítara tel kinto giyégoi, dulá foóniccegai; tói zetará nal ói accíl, ítara íbar fúañti boirat or melat góilloi; aar duwar gán bañdfela gíyeh. **11** “Hotukkún baade abiyáta mayafuain uitará yó aiccé, aar hoór de, ‘Malik, ó Malik, añára lla duwar gán kúlona.’ **12** “Montor íba ye zuwabe hoór de, ‘Añí tuáñra re sóiyi hoóir, añí tuáñra re no siní.’ **13** “Hétolla seton táko, kiyólla-hoilé tuáñra toh hé din yáh októ no zano. **14** “Kiyólla-hoilé asmani raijjo toh ezzon sofór ot zaar de manúc or dóilla, zibá ye nizor goóur ókkol ore matai nizor cómbotti beggún ítara re gosáidiye. **15** Yóggwa ye ítarar kabiliyot mozin, ítara ezzon ore fañs ázar țiañ diiyé, ar ezzon ore dui ázar țiañ diiyé, edde ar ezzon ore ek ázar țiañ diiyé. Baade yóggwa nizor sofór ot giyégoi. **16** Zee niki fañs ázar țiañ faiyé, íte toratori zai híin lói códori gorí aró fañs ázar hamaiyé. **17** Héndilla zee niki dui ázar faiyé, íte yó híin lói aró dui ázar hamaiyé. **18** Montor zee niki ek ázar faiyé, íte zai yore merít gañt kurí ítar malik or hé țiañ lukai eijjé. **19** “Boút din baade goóur gún or malik aái yore ítara ttu ísaf lowat doiije. **20** Zee niki fañs ázar țiañ faáil, íte aró fañs ázar aní hoór de, ‘Malik, tuñí añré fañs ázar dífla. Soó, añí aró fañs ázar țiañ hamaiyí.’ **21** “Tói malike ítare hoór de, ‘Cabác, gom edde biccácdar goóur! Tui hom jiníc ot imandari daháiyos, hétolla añí toré bicí siz or uore zimmadar banaiyúm. Ai, tor malik or kúcit cámil ógai.’ **22** “Héndilla zee niki dui ázar țiañ faáil, íte yó aái hoór de, ‘Malik, tuñí añré dui ázar țiañ dífla. Soó, añí aró dui ázar țiañ hamaiyí.’ **23** “Tói malike ítare hoór de, ‘Cabác, tui gom edde biccácdar goóur! Tui hom jiníc ot imandari daháiyos, hétolla añí toré bicí siz or uore zimmadar banaiyúm. Ai, tor malik or kúcit cámil ógai.’ **24** “Tarfore zee niki ek ázar țiañ faáil, íte aái hoór de, ‘Malik, añí zani de tuñí hora

manúc; tuñí toh zeṛé nó lago héntu haṛo, aar zeṛé bis nó cǎñro héntu dola goró. **25** Hétolla añí ñoore zai yore tuáñr tiañ iín meṛir bútoṛe lukai eijjílám. Soó, ótiya tuáñr tiañ.’ **26** “Ítar malike ítare zuwabe hoór de, ‘Tui hóraf edde alcíya goóur! Tui toh zainti, añí zeṛé nó lagai héntu haṛi deh, aar zeṛé bis nó cǎñri héntu dola gorí deh. **27** Tóoile tor ttu añr tiañ gún benggót óile rakón accíl, tói añí aái yore añr tiañ gún cúť or fúañti waafes faitam.’ **28** “Tuáñra itar ttu tiañ gún loifélai, zar ttu niki doc ázar tiañ asé ítare diifélo. **29** Kiyólla-hoilé zar ttu asé, yóggwa re aró diiya zaybo, aar yóggwa ttu ódorbaára tákibo; montor zar ttu náí, yóggwa ttu asé de híin úddwa loiféla zaybo. **30** Yala e behazor goóur itaré baáre andár ot félai dogói; hére hañdahari edde date dat kirkirani óibo. **31** “Zeñtté Manúc or Fua íbar mohímaye aibó aar firista beggún íbar fúañti óibo, héñtte íba Nizor mohímar toktót boibó. **32** Tamám koum ókkol ore íbar muúntu zoma gorá zaybo; aar íba ye manúc beggún ore dui dol goríbo, zendilla sóol soroya ye sóol ottu bérasóol ore alok gorífele. **33** Íba ye bérasóol lun ore íbar den dáikka goríbo, montor sóol lun ore ban dáikka. **34** “Baade Baáñcca ye íbar den dák or gún ore hoibó de, ‘Aiyó, Añr Baf or rahámot faiya manúc ókkol, tuáñra raijjo miras loogái, ziyán duniyair foidayecir héñtte lóti tuáñra lla toiyar raká gíyeh. **35** Kiyólla-hoilé Añí búka accílám, tuáñra Añré hána dífla; Añí tiráci accílám, tuáñra Añré faní dífla; Añí forbáci accílám, tuáñra Añré zaga dífla; **36** Añí biyossor accílám, tuáñra Añré hoor dífla; Añí biyaraimma accílám, tuáñra Añré kermos goijjíla; Añí ziyól ot accílám, tuáñra añré saitó aiccíla.’ **37** “Hétunot hé forhésgar gúne íba re zuwabe hoibó de, ‘Malik, añára hoñtté Tuáñre búka deká hána diiyí deh, yáto tiráci deká faní diiyí dé? **38** Añára hoñtté tuáñre forbáci deká zaga diiyí deh, yáto biyossor deká hoor diiyí dé? **39** Añára hoñtté Tuáñre biyaraimma deká kermos goijjí deh, yáto ziyól ot deká saitó giijí dé?” **40** “Hétunot Baáñcca ye ítara re zuwabe hoibó de, ‘Añí tuáñra re sóiyi hoóir, tuáñra Añr e báiboináin dor bútotu ebbe niróc ezzon ore úddwa ziyán goijjíla, híyan Añré beh goijjó.’ **41** “Baade íba ye íbar ban dák or gún ore hoibó de, ‘Ó laánoitta manúc ókkol, tuáñra Añr héntu dur ói ofúrani ooin ot zoogói, zín íbilic edde ítar firista ókkol olla toiyar gorá gíyeh; (aiñnios g166) **42** kiyólla-hoilé Añí búka accílám, montor tuáñra toh Añré hána nó doo; Añí tiráci accílám, montor tuáñra Añré faní nó doo; **43** Añí forbáci accílám,

montor tuáñra Añré zaga nó doo; biyossor accílám, montor tuáñra Añré hoor nó doo; biyaraimma accílám edde ziyól ot accílám, montor tuáñra Añré saásita nó goró.’ **44** “Hétunot ítara yó íba re zuwabe hoibó de, ‘Malik, añára hoñtté Tuáñre búka, tiráci, forbáci, biyossor, biyaraimma yáh ziyól ot deká hédmot nó gorí dé?’ **45** “Íba ye ítara re zuwabe hoibó de, ‘Añí tuáñra re sóiyi hoóir, tuáñra Añr e báiboináin dor bútotu ebbe niróc cwa re úddwa ziyán nó goró, híyan Añré beh nó goró.’ **46** “Ítara ofúrani sáñza fai bolla zaibo, montor forhésgar gún ofúrani zindigit gólibo.” (aiñnios g166)

26 Zeñtté Isá ttu hotá híin beggún hoiyá óiye, íba ye Nizor cárit tun ore hoór de, **2** “Tuáñra toh zano, dui din baade Azadir-id óibo, aar Manúc or Fua re kúruc ot dí bolla dóridiya zaybo.” **3** Hé októť ñoóñr imam ókkol edde manúc or murubbi ókkol, Káiyafas hoó de boro imam or mohól ot zoma óiye; **4** aar mili sólla goijjé de, Isá re zuitégori dórifelai zane marifélai bolla. **5** Montor ítara hoór de, “Íd or októť no, manúc or bútoṛe úrussul óitofare.” **6** Isá zeñtté Betáníyat máze kurus biyaraimma Sáimon or gór ot accíl, **7** hére eggwá mayafua ye fúañti fattór or háñrit góri bicí moóngga añtor looi íbar hañse aiccé, aar Isá hána háito boiccé de októť híba ye añtor gún Isár matát dǎlidiye. **8** Cárit tun ottu híyan deká gom nó lage, aar hoór de, “Íin borbad kiyá díféler? **9** E añtor gún de boóut tiañ di besi gorif ókkol ore diifélai faitto.” **10** Montor Isá ye híyan zani fari ítara re hoór de, “Tuáñra mayafua wa re ferecan kiyá gorór? Ibáh ye Añr bálai éna goijjé. **11** Gorib ókkol toh tuáñrar fúañti nitti asé, montor Añré tuáñra nitti no faiba. **12** Ibáh ye Añr gaat añtor dǎlidiye de híyan óilde ibáh ye Añré dohón olla toiyar gorí bolla goijjé deh. **13** Hétolla Añí tuáñra re sóiyi hoóir, fura duniyait zeṛé-zeṛé e kúchóbor tobolik gorá zaybo, e mayafua wa ye ziyán goijjé híyan ore yó ibáhr yadgari ísafe hére-hére howá zaybo.” **14** Hétunot baró zon cárit tun ottu ezzon, zar nam niki Yohúdah Iskáriyet, íte ñoóñr imam ókkol or hére giijyé, **15** aar hoór de, “Zodi Isá re tuáñrar át ot dóridi, tuáñra añré kii diiba?” Baade ítara ítare tiríc cwa rufar tiañ goni diiyé. **16** Hé októť lóti íte Isá re dóridi bolla moukar talac ot accíl. **17** Cúťar-sára Ruťir-id or foóila din, cárit tune Isár hañse aái fusár gorér de, “Tuáñr ttu hondilla monehoór, Tuñí hái faro fán añára Tuáñr lla Azadir-id or hánar toiyari

hoře goittám?” 18 Íba ye hoór de, “Tuáñra cóor ot fólonar hēre zoo,” yóggwa re hoibá de, “Ustate hoór de, ‘Añr októ dāke; Añí Añr cárit tun or fúañti tuáñr gór ot Azadir-id goríyūm.” 19 Tóí cárit tune Isá ye ítara re hókum díye de mozin gorí, Azadir-id or hánar toiyari goijjé. 20 Baade zeñtté hánz óiye, Isá baró zon cárit tun or fúañti hána háito boiccé. 21 Ítara háar de októ t Íba ye hoór de, “Añí tuáñra re sóiyi hoóir, tuáñra ttu ezzone Añré dórídibo.” 22 Hétunot ítara bicí ferecan ói zonfoti Íba ttu fusár gorér de, “Malik, íte bilkúl añí no de no né?” 23 Íba ye ítara re zuwabe hoór de, “Zee Añr fúañti hoddát át dāler, íte óilde zee niki Añré dórídibo. 24 Manúc or Fua toh Íbar baabute zendilla leikká asé héndilla éna zaar; montor afsús manúc uitar uore zar duara Manúc or Fua dóra háibo. Manúc íte toh zormo no óito bóuli ítar lla gom accíl.” 25 Hétunot Yohúdah, zee niki Íba re dórídibo íte hoór de, “Rabbí, íte honó añí né?” Isá ye ítare hoór de, “Tui nize híyan hoóifelayos.” 26 Ítara háar de októ t, Isá ye ruṭi looi Alla re cúkuriya goijjíl, aar bāngi cárit tun ore dii hoór de, “Looi hóo; yíán Añr gaa.” 27 Tarfore Íba ye fíyala looi Alla re cúkuriya goijjíl, aar ítara re dii hoór de, “Tuáñra beggúne entú hóo; 28 kiyólla-hoilé iín óilde noya razinama lla Añr lou, zíín ore boóut kiyé guná maf fai bolla dālidiyūm. 29 Añí tuáñra re hoóir, ehón ottu lóti e anggur or roc iín Añí ar na háiyūm, otódin zetódin foijjonto tuáñrar fúañti Añr Baf or raijjot noya gori ná hái.” 30 Yárbaade ítara eggwá seér gaái, neeli Zaitun Faár ot giyyói. 31 Tarfore Isá ye ítara re hoór de, “Aijja raitta Añr zoriya tuáñra beggún or dil ot cóok aibó aar dáibagoi; kiyólla-hoilé pak-kalam ot toh endilla asé, ‘Añí sóol soroya re marifélaiyūm, tóí zák or sóol beggún cīñraciñttá óizayboi.’ 32 Lekin Añré zinda gorá zay baade, Añí tuáñrar age Galil ot zaiyūm.” 33 Fitore Íba re zuwabe hoór de, “Tuáñr zoriya beggúne iman ottu zailé yo, añí honódin no zaiyūm.” 34 Isá ye Íba re hoór de, “Añí toré sóiyi hoóir, aijja raitta ratakurá bak dibar age, tui Añré tin bar inkar goríbi.” 35 Fitore Íba re hoór de, “Zodi añr ttu Tuáñr fúañti mora fore yó, añí Tuáñre inkar no goijjūm.” Héndilla cárit beggúne hoiyé. 36 Yárbaade Isá ítara re looi ekkán zagat giyyé, ziyán ore Getsámani hoó. Baade Íba ye cárit tun ore hoór de, “Añí woóñt zai dua goijjūmboi, tuáñra iñyót boói táko.” 37 Íba ye fúañti Fitor ore edde Zebedair fua duní wa re loigiyé, aar hēre Íba ttu ocánti edde bicí ferecan lagat diojje. 38 Hétunot Íba ye ítara re hoór de, “Bicí ocántiye Añr

foran neelizaytói sár. Tuáñra iñyót táki Añr fúañti seton táko.” 39 Baade Íba héntu ekkágori muúmmikka zai, uúñtoi fori dua gorér de, “Ó Añr Baf, zodi ói faille, e duk-mosibot or fíyala yibá Añr ttu dur óuk; montor toóu Añr moncá mozin no, bóлке Tuáñr moncá mozin óuk.” 40 Baade Íba cárit tun or hēre aái ítara re gúm ot loot faiyé. Íba ye Fitor ore hoór de, “Tuáñra Añr fúañti ek gónḁa úddwa seton táki no faroór dé? 41 Seton táko aar dua goró, zeéne entán ot no foro; becók ruh ttu monehoór, montor jisím komzur deh.” 42 Íba ye dusárabar zai endilla dua gorér, “Ó Añr Baf, Añí na háile zodi e fíyala yibá Añr ttu dur no, tóoile Tuáñr moncá fura óuk.” 43 Íba aái ítara re abar gúm ot loot faiyé, kiyólla-hoilé ítara suk gúme bór óigilgoi. 44 Íba ye ítara re abar erizai ekí dóilla hotá hoói tisárabar dua goijjé. 45 Baade Íba cárit tun or hēre aái ítara re hoór de, “Tuáñra aijjó gúm ot edde aram gorát asó dé? Soó, októ aáigiyoí, Manúc or Fua re gunágar ókkol or át ot dórídiya zaybo. 46 Uṛó, zaigói. Soó, Añré dórídoya dāke foóñiccegai.” 47 Íba ye híin hoór de októ t, Yohúdah foóñiccegai, zee niki baró zon cárit tun ottu ezzon. Ítar fúañti dōóñr ek dol manúc toluwar edde laṛí-cúra looi aiccé, zetará re diferáiyē de óilde dōóñr imam ókkole edde manúc or murubbi ókkole. 48 Zee niki Íba re dóri dér, íte tará re endilla hoói ekkán nicán díyl, “Añí zibá re appá diyūm, manúc Íba; Íba re gereftar gorífelaiyo.” 49 Yohúdah éhon Isár iñyot aái hoór de, “Rabbí, assalamu alaikum!” Héen hoói Íba re appá díye. 50 Isá ye ítare hoór de, “Douós, tui ziyán olla aiccós híyan gor.” Éhon ítara aái Isá re dóri gereftar gorífelaiye. 51 Hétunot Isár fúañti accíl de ítara ttu ezzone nizor toluwar neelaiye, aar híyan solai boro imam or gulam or han harífelaiye. 52 Isá ye Íba re hoór de, “Tor toluwar ḁaf ot gólai er; kiyólla-hoilé zetará oinno zon or uore toluwar sola, ítara beggún toluware beh moribó. 53 Tui ki no zanos, zodi Añí Añr Baf ore aros gorí Íba ye Añré éhon-éhon ázar-ázar fírísta ókkol fóous or dóilla góri diferáibo dé? 54 Lekin héen óile, endilla ówa foribó hoiyé de pak-kalam or hé hotá keéngori fura óibo?” 55 Hé októ t Isá ye manúc or dol lwá re hoór de, “Tuáñra ḁahañit dóitto aiccó fángori toluwar edde laṛí-cúra lóí Añré gereftar goittó neeilló dé? Añí toh fottí din baitul-mukaddos ot boói taalim ditam, aar héñtte de Añré gereftar nó goró. 56 Lekin iín beggún etollá óiye, zeéne nobi ókkole leikké de pak-kalam or hotá híin fura óizagoi.” Hétunot cárit beggúne Íba re eri dái

giyyégoi. 57 Zetará Isá re gereftar goijjé ítara Íba re boro imam Káiyafas or hañse loigiyói, zeře alem ókkol edde murubbi ókkol zoma óiye. 58 Fitor duré-duré tái Íbar fisé-fisé boro imam or urán or héddur foijjonto giyyé, aar kii-kii ó sai bolla bútoře góli faáradar ókkol or fúañti boói táikke. 59 Ðoóñr imam ókkole edde fótuayi-mujilíc tíya ye Isár ulða misá gobá tuwat accíl, zeéne ítara Íba re zane marifélai fare. 60 Boóut zone misá gobá díto muúmmikka ailé yo, toóu háře de héndilla honó gobá nó faa. Lekin fore dui zon manúc muúmmikka aiccé, 61 aar hoór de, “E manúc cwa ye hoiyé de, ‘Añí Allar baitul-mukaddos bāngifelai, híyan tin din or bútoře abar banaidi fajjium.’” 62 Hétunot boro imame tíyai Isá re hoór de, “Tuñí honó zuwab no diba? Manúc itará Tuáñr ulða iín kii gobá dér?” 63 Montor Isá nizám mári táikkil. Boro imame Íba re hoór de, “Tuñí añára re zinda Allar hosóm hái hoó sái, Tuñí Allar Fua Mosih de ói ne?” 64 Isá ye yóggwa re hoór de, “Tuñí nize toh híyan hoóifelaiyo. Toóu Añí tuáñra re hoóir, yarbaade tuáñra dekiġa, Manúc or Fua Alla Tálar den ďák ottu boirá asé edde asman or miyúlar uore góri aiyér.” 65 Hétunot boro imame nizor gair or hoor fári hoór de, “Íbá ye kuféri goijjé! Añára ttu ar kii gobá lager dé? Tuáñra toh ehón Ibár kuféri fúinno; 66 tuáñrar rai kii?” Ítara zuwabe hoór de, “Íbá moot or laayek!” 67 Baade ítara Íbar muk ot sép maijjé edde Íba re gúca maijjé; ar hodúne Íba re suwar mari 68 hoór de, “Héy Mosih, añára re antas gorí hoósai, Toré hone maijjé?” 69 Héñtte Fitor baáre urán ot boirá accíl, aar eggwá bañdi mayafua aái Íba re hoór de, “Tuñí yó toh Galil or Isár fúañti accíla!” 70 Montor Íba ye ítara beggún or muúntu endilla hoói inkar gorídiye, “Tuñí kiyór baabute hoór añí no zani.” 71 Zeñtté Íba baáre baanďat giyyé, ar eggwá bañdi mayafua ye Íba re deki, héře asé de ítara re hoór de, “E manúc cwa Isá Nasárir fúañti accíl.” 72 Montor Íba ye hosóm hái endilla hoói abar inkar gorídiye, “Añí manúc Íba re no siní.” 73 Hotún baade ďake tíyai asé de manúc cúne aái Fitor ore hoór de, “Sóiyi tuñí yó tarár bútottu ekzon; kiyólla-hoilé tuáñr zobane úddwa tuáñre dóra dér.” 74 Hétunot Fitore hosóm hái hoór de, “Añr uore laánat óuk zodi añí misá hotá hoóir de óile; añí manúc Íba re no siní!” Baade éhon-éhon ratakurá bak diyé. 75 Hétunot Fitor ottu Isá ye hoóil de hotá monot uitté, ki hoilé, “Ratakurá bak dibar age tui Añré tin bar inkar goríbi.” Baade Íba baáre neeligói kúb hañďat doijje.

27 Zeñtté biínna óiye, ďoóñr imam ókkol edde manúc or murubbi beggúne mili sólla goijjé de, Isá re zane marifélai bolla. 2 Baade ítara Íba re bañďi loizai hákim Filat ore gosáidiye. 3 Zeñtté Yohúďah, zee niki Isá re dóridiye, íte deikké de Íba lla moot or hókum óiye, hétunot íte bicí afsús hái tiríc cwa rufar foicá gún ďoóñr imam ókkol ore edde murubbi ókkol ore fíraidi 4 hoór de, “Añí behosúr manúc cwa re marifélai bolla dóridi guná goijjé.” Montor ítara hoór de, “Tóoile añárar kii óiye? Híyan tui buzós.” 5 Hétunot íte rufar foicá gún baitul-mukaddos or bútoře melámari giyyégoi, aar zai nizoré nize fáñci háifelaiye. 6 Ðoóñr imam ókkole rufar foicá gún looi hoór de, “Ín baitul-mukaddos or baccút rakón zayes no, kiyólla-hoilé iín lou wór dam.” 7 Baade ítara biyasana gorí, bidecóiġta ókkol olla hoborostán banai bolla hé rufar foicá gún lói Kuáñijjar Zobin nán kinné. 8 Hétolla hé zaga gán ore aij foijjonto Lou wor Zaga hoói ďake. 9 Híyane, nobi Yarmíyahr duara howá gíyl de yíán fura óiye, “Ítara hé tiríc cwa rufar foicá gún loiyé, híin óilde Ubár dam, zibár dor Boni Isráil ókkole tġk goijjíl; 10 aar ítara híin ore Kuáñijjar Zobin nán kinat estemal goijjé, zendilla Mabude añré hókum díye.” 11 Isá hákim Filat or muúntu tíyai accíl, hákime Íba ttu fusár gorér de, “Tuñí Yohúdi ókkol or Baáñca nġki?” Isá ye yóggwa re hoór de, “Ói, tuñí hoór de héndilla.” 12 Montor ďoóñr imam múne edde murubbi gúne Íba re elzam lagat accíl de októġ, Íba ye honó zuwab nó deh. 13 Hétunot Filate Íba re hoór de, “Tuñí no fúnor nġki itará Tuáñr ulða hodún gobá dér?” 14 Montor Íba ye yóggwa re ekkán elzam or úddwa zuwab nó de, hétolla hákim ebbe taajup óigiyoi. 15 Hákim or niyom óilde, fottí Azadir-id or októġ maincé ze hodi re hálas gorídito hoó hé hodi re hálas gorídon. 16 Hé októġ ítara ttu ézzon nam hóraf mocúr hodi accíl, zar nam Bárabba. 17 Hétolla, zeñtté manúc ókkol zoma óiye, Filate ítara ttu fusár gorér de, “Tuáñra ttu añré haré tuáñrar hañse hálas gorídiya baitó monehoór, Bárabba re né, náki Isá re, zibá re Mosih hoó?” 18 Kiyólla-hoilé Filate zainto de, Yohúďir neta ókkole Isá re yóggwar hañse hásorot góri gosáidiye deh. 19 Filat bisar or toktór uore boói accíl de októġ, yóggwar bou wé yóggwar hañse hóbor foóñsaiye de, “Hé behosúr Manúc cwa re kessú no goríyo, kiyólla-hoilé gel de raitta añí cóppon ot Íbar zoriya bicí duk faiyí.” 20 Lekin ďoóñr imam ókkole edde murubbi ókkole manúc or dol ore uskaidiyé de, Bárabba re

magi bolla aar Isá re marifélaito hoi bolla. **21** Hákime abar ítara re hoór de, “E duní zon ottu tuáñra ttu añré haré hálas gorídiya baitó monehoór?” Ítara hoór de, “Bárabba re.” **22** Filate ítara re hoór de, “Tóoile Isá, zibá re Mosih hoó, íba re añí kii goittám?” Ítara beggúne hoór de, “Íba re kúruc ot dífelo!” **23** Montor yóggwa ye hoór de, “Kiyá, íba ye kii bura goijjé dé?” Toóu ítara aró guzori-guzori endilla howát accíl, “Íba re kúruc ot dífelo!” **24** Baade Filate dekér de, yóggwa ye kessú gorí no farer, bólke úrussul cúru óizargoi, hétunot yóggwa ye faní looi manúc ókkol or muúntu nizor át dúifelai hoór de, “E Manúc cwar lou wór zimma añí no; híyan or zuwab tuáñra beh diba.” **25** Hétunot manúc beggúne zuwabe hoór de, “Íbar lou wór zimma añára edde añárar fuain óiyum!” **26** Tói yóggwa ye ítarar hañse Bárabba re hálas gorídiye; montor Isá re coónk marabai baade, kúruc ot dí bolla gosái dífelaiye. **27** Baade hákim or fóous ókkole Isá re yóggwar mohól or bútoe loigiyé, aar tээрang tía re íbar sairókul ttu zoma goijjé. **28** Ítara íbar gair or hoor kúlifelai íba re eggwá lal rong or zubba fiñdáidiye. **29** Ítara keñrar eggwá tas banai baade íbar matát diyaidiyé, aar den át ot eggwá larí dóradiye. Ítara íbar muúntu añrúr tók dí íba re tátтай gorí hoór de, “Héy Yohúdi ókkol or Baáñcca, Toré sólam!” **30** Baade ítara íba re sép maijjé edde larí wa looi íbar matá sái bari maijjé. **31** Ítara íba re tátтай gorí baade, íba ttu lal rong or zubba wa kúlifelai íbar hoor íba re fiñdáidiye; baade kúruc ot dí bolla loigiyégoi. **32** Ítara cóor ottu baäre neeler de októ, Kureni cóor or ezzon manúc loot faiyé zibár nam Sáimon; ítara yóggwa re Isár kúruc can boói loizai bolla mojbur goijjé. **33** Baade ítara zeñtté Golgota nam or ekkán zagat, yáni Matár Malar Zagat foónicce, **34** ítara íba re tita jiníc miyáiya anggur or roc háito diiyé; montor íba ye híin hái saái ná háa. **35** Ítara íba re kúruc ot dífelai baade, loťari mari ítarar bútoe íbar hoorsuor ore bák goijjé. **36** Aar hére boói táki ítara íba re sooñi gorát doiije. **37** Íbar matár uottú ítara íbar e hosúri gán saáinbút maridiye, ziyán óilde, “Íbá óilde Isá, Yohúdi ókkol or baáñcca.” **38** Hé októ íbar fúañti dui zon đahañit ore yó kúruc ot díyl, ezzon ore íbar den đák ottu edde ar ezzon ore íbar ban đák ottu. **39** Aar zetará hé foñt báý zaar, ítara matá lari-lari íba re técerai **40** hoór de, “Tui toh baitul-mukaddos bañgi tin din or bútoe abar banaidoya, yala Tui Nizoré Nize basa sái! Zodi Tui Allar Fua de óile, kúruc ottu lami ai.” **41** Héndilla góri đoóñr imam,

alem edde murubbi ókkole yó tátтай gorí hoór de, **42** “Íbá ye toh oinno zon ore basaitó; montor Nizoré Nize de basai no farer! Íbá Isráil or Baáñcca no né, yala íbá kúruc ottu lami aiyóuk, baade añára íbár uore iman aníyum. **43** Íbá ye Allar uore bóraca raké; zodi Alla ttu monehoó, tóoile ehón Alla ye íbá re basouk, kiyólla-hoilé íbá ye hoiót de, “Añí óilam de Allar Fua.” **44** Ze đahañit tun ore íbar fúañti kúruc ot díyl, ítara yó héndilla-héndilla hotá hoói íba re beizzoti goijjé. **45** Hé din duúñijjar baró wa báze lóti tin nwá báze fán guñra mulluk andár ói accíl. **46** Tin nwá ánik baijjé de októ, Isá ye eggwá đoóñr abase guzori hoór de, “Elí, Elí, lamá sabakhtáni?” yáni, “Ó Añr Alla, ó Añr Alla, Tuñí Añré kiyólla sáridiyo?” **47** Hére tíaí accíl de ítara hodúne híyan fúni hoór de, “E Manúc cwa ye nobi Eliyas ore đaker.” **48** Ítara ttu ezzone ekkú duñre zai ekkán esfónj looi sírkat buraiyé, aar ekkán súañr matát bazáidi Isá re hái bolla diiyé. **49** Montor argúne hoór de, “Tíyo, íbá re Eliyase basaitó aiyé né saái.” **50** Isá ye abar eggwá đoóñr abase guzori íbar foran dífelaiye. **51** Hétunot baitul-mukaddos or foroda gán uottú lóti nise foijjonto fári dui bák óigiyoi; aar zobin ot búsal baiyé, đoóñr-đoóñr cíl ókkol fárigiyoi, **52** hobor ókkol kúligiyoi, edde Allar pak bonda ókkol zetará moot or gúm ot accíl ítara boóut zon ore zinda gorá gíyeh. **53** Isá mora ttu zinda ói baade, ítara hobor ottu neeli aáigiyoi aar pak cóor ot zai boóut maincóre dahádiye. **54** Romi cáap edde yóggwar fúañti zetará Isá re faára díyat accíl, ítara zettót búsal edde aró kii-kii ór de híin deikké, ítara bicí đoorraigiyói aar hoór de, “Sóiyi íbá Allar Fua accíl!” **55** Boóut beriyáin zetará Galil ottu lóti Isár fisá dori íba re hédmot gorí-gorí aiccíl, ítara dur ottu góri híin saái táikkil. **56** Ítarar bútoe Moriyam Makdálani accíl, Yakub edde Yusúf or maa Moriyam accíl, edde Zebedair fuain dor maa accíl. **57** Háñzinna óiye rár, hére Aramátia cóor ottu Yusúf nam or ezzon tuangor manúc aicce, zibá nize yó Isár éggwa ummot óigilgoi. **58** Yóggwa ye Filat or hañse zai Isár lac cwa maiggé. Hétunot Filate hókum díye de, lac cwa yóggwa re diiféla zay bolla. **59** Yusúfe lac cwa looi, ekkán sáf hohón or hoor ot beráiyé, **60** aar nizor noya hobor ot raikkégoi, zibá re yóggwa ye cíl kúñdi banaail. Baade hobor or muk ot ekkán đoóñr cíl ouzaydi, giiyégoi. **61** Héñtte Moriyam Makdálani edde arek Moriyam hére hobor or muúntu boirá accíl. **62** Tarfor din, zibá ebaadot-or-din accíl, đoóñr imam ókkol edde Féroci ókkol Filat or hañse

zoma óiye, **63** baade ítara hoór de, “Jonáb, añára ttu monot asé, hé dúkabaz íba zinda tákite hoóil de, “Tin din baade Añí abar zinda óiyum.’ **64** Hétolla tin din foijjonto hobor gwá re horagori faára díya zay bolla hókum dóh; arnóile íbar ummot ókkole aái íbar lac cwa sur gorí loizai maincóre hoibó de, ‘Íba mora ttu zinda óigiyoi,’ tói fisór dúka agor dúkar túaro hóraf óibo.” **65** Filate ítara re hoór de, “Faáradar ókkol loizo, zai zeddúr horagori faro héddur gorí hobor gwá re faára dógoi.” **66** Baade ítara zai cíl lan ot moór lagai edde faáradar ókkol hére rakí, hobor gwá re horagori faáradiye.

28 Ebaadot-or-din baade, háftar foóila din fózor októ, Moriyam Makdálíni ye edde arek Moriyame hobor gwá saitó giyyé. **2** Asimbit hére eggwá ðoóñr búsal óiye, kiyólla-hoilé Mabud or ek fírista asman ottu laimmé, aar hobor gwat aái yíbar muk ot accíl de cíl lan larifélai híyan or uore boiccé. **3** Íbar súrot accíl bijilir dóilla, aar íbar hoor accíl borók or dóilla dóla. **4** Faáradar gúne íba re ðoorai hafi uiṭṭíl aar mora manúc or dóilla óigilgoi. **5** Fírista wa ye beṛiyáin nún ore hoór de, “No ðooraiyó, kiyólla-hoilé añí zani tuáñra Isá re tuwoór deh, zibá re kúruc ot dí mariféla gýl. **6** Íba eṛé náí; íba zinda óigiyoi, zendilla íba ye hoóil. Aiyó, íba re raikkíl de zaga gán soógai. **7** “Yala toratori zoo, íbar cárit tun ore hoibá de, ‘Íba mora ttu zinda óigiyoi, aar íba tuáñrar age Galil ot zaar. Hére tuáñra íba re dekába!’ Soó, añí tuáñra re hoóidiyi.” **8** Tói beṛiyáin ítara toratori hobor ottu giyyégoi; ítara ðooraaíl, toóu bicí kúci óoil, aar Isár cárit tun ore hóbor dí bolla duñri-duñri giyyé. **9** Atíkka Isá ítara llói millé. Íba ye hoór de, “Sólami!” Hétunot ítara íbar hañse giyyé aar íbar foot dóri íba re sóida goijjé. **10** Isá ye ítara re hoór de, “No ðooraiyó, zoo, Añr báiyain ókkol ore Galil ot zaito hoógoi; ítara hére Añré dekábo.” **11** Beṛiyáin ítara foñt ot tákite, hodún faáradare cóor ot aái, ziín-ziín óiye híin beggún ðoóñr imam ókkol ore zanaiyé. **12** Aar ðoóñr imam ókkole murubbi-neta ókkol lói dola ói ekkán sólla-mocuwara gorí, fóous sun ore boóut ṭiañ diiyé, **13** aar hoiyé de, “Tuáñra hoibá de, ‘Añára raitta gúm ot accílami de októ, íbar ummot ókkol aái íba re sur gorí loigiyégoi.’ **14** Zodi hotá yáin hákim or han ot foónse, one añára yóggwa re buzái tuáñra re hótara ttu basaiyúm.” **15** Tói hé fóous suné ṭiañ gún looi, ítara re cíkaidiye de héndilla goijjé. E kaháni yáin Yohúdi ókkol or bútoe aij foijjonto bicígori fólaiya.

16 Tarfore egaro zon cárit tun Galil or oh faár gwat giyyé, zibát zaito Isá ye ítara re hoóil. **17** Ítara íba re deká sóida goijjíl; montor hodún ottu cóok laiggíl. **18** Hétunot Isá ye ítara hañse aái hoór de, “Asman or edde zobin or tamám kémota Añré diiféla giyéh. **19** Hétolla zoo, tamám kounm ókkol ore Añr ummot banogoi; ítara re Baf or, Fuar edde Pak-Ruhr name báptisma díyo, **20** aar Añí tuáñra re zedún hókum díyi, híin beggún amól gorí bolla ítara re taalim diyo. Aar soó, duniyair ahéri foijjonto Añí hámica tuáñrar fúañti-fúañti así.” Amin. (aíṭn g165)

Markus

1 Yíán óilde Allar Fua Isá Mosihr baabute kúchóbor, 2 zendilla nobi Yesáyahr kitab ot leikká asé: “Soó, Añí Añr hóborgwa re Tuáñr age diferáir, zibá ye Tuáñr foñt toiyar goríbo.” **3** “Moidan zagat ezzone guzori-guzori eén hoór, ‘Mabud or foñt toiyar goró; íbar rasta uzu goró.’” **4** Báptismadoya Yaháya aái moidan zagat tobolik goittó de, gunár maf fai bolla touwá gorí báptisma loito. **5** Fura Yohúdiya elakar manúc beggún edde Jerúsalem or tamám bácinnda ókkol neeli yóggwar hañse giiyé, aar nizer-nizer guná ókkol cíkar gorí Jordán hál ot yóggwa ttu báptisma loiyé. **6** Yaháya ye uñt or keñc loi banaiya hoor fiñdíto, aar yóggwar keeníl ot samarar duali baindá tákito. Yóggwa ye háito de óilde fíring edde zooñl or modú. **7** Yóggwa ye endilla tobolik goittó, “Añí baade eén Ekzon aiyér, zibár tokka añr túaro doónr. Añí niyúri íbar centár or fíta kúli bolla úddwa laayek no. **8** Añí de tuáñra re fanít éna báptisma dír, montor íba ye tuáñra re Pak-Ruh lói báptisma díbo.” **9** Hé din ókkol ot eén óiye, Isá Galil or fara Nasárat ottu aái yore Jordán hál ot Yaháya ttu báptisma loiyé. **10** Isá faní ttu kul ot uittégai mottor, íba ye dekér de, asman kúlizargoi aar Pak-Ruh hoitor or dóilla ói íbar uore lamer. **11** Aar héñtte asman ottu eggwá abas aiccé de, “Tuñí Añr adorja Fua, Tuáñre lói Añí bicí kúci.” **12** Éhon or bútoe Pak-Ruh ye íba re moidan zagat diferáidiye. **13** Aar hére moidan zagat íba re Cóitane salic din foijjonto entán gorát accíl. Íba jonnigoli januwar ókkol or fúañti tákito, aar fírsta ókkole íba re hédmot goittó. **14** Yaháya re ziyól ot dí baade, Isá Galil ot aái Allar kúchóbor tobolik gorát doijje, **15** endilla hoói, “Októ óiye, Allar raijjo dáke aáigiyo. Touwá goró edde kúchóbor ore ekin goró.” **16** Isá Galil Díir hañsa báy zaar de októto, íba ye Sáimon ore edde íbar báí Enderiyas ore deikké. Héñtte ítara ñíft zal marer, kiyólla-hoilé ítara zailla accíl. **17** Isá ye ítara re hoór de, “Añr fisáli doro, Añí tuáñra re manúc dóre de zailla banaiyúm.” **18** Ítara éhon or bútoe ítarar zal lun eri, íbar fisáli doijje. **19** Híyan ttu ekkágori giiyé rár, íba ye Zebedair fua Yakub ore edde yóggwar báí Yohánna re deikké, zetará noowr uore zal ñuner. **20** Íba ye ítara re éhon mataiyé, tói hétunot ítara nizer baf Zebedaire noow ot muzur ókkol or fúañti eri, íbar fisáli doijje. **21** Tarfore ítara Kaparnahúm ot giiyé, aar ebaadot-or-din aiccé rár Isá toratori mujilíc-hánat zai taalim diyat doijje. **22**

Manúc ókkol íbar taalime ammuć óizaytoi, kiyólla-hoilé íba ye ítara re taalim dito de ezzon adíkar olar dóilla góri, alem ókkol or dóilla góri no. **23** Hére ítarar mujilíc-hánat ezzon hóraf jine-faiya manúc accíl. Yóggwa ye guzori hoór de, **24** “Ó Isá Nasári, añára llói Tuáñr kii ham asé? Tuñí añára re dónco goittó aiccó de né? Añí zani Tuñí hon, Tuñí óilade Allar Pakzon nwá.” **25** Montor Isá ye jin nwá re jéjjeñai hoór de, “Nizám ó, yoggwár bútotu neelizagói.” **26** Tói hé hóraf jine yóggwa re musori eggwá doónr guzoran mari yóggwar bútotu neeligiyói. **27** Híyane manúc beggún eén taajup óigiyo, ítara ezzon ore ezzone hoór de, “Yíán kii? Yíán toh ekkán noya taalim! Íba ye adíkar hóraf jin ókkol ore úddwa hókum déh aar híine íbar hotá mane!” **28** Éhon or bútoe íbar hóbor Galil or sairó dák or elaka beggún ot fóligiyo. **29** Yárbaade ítara mujilíc-hána ttu neeli mottor, Yakub edde Yohánnar fúañti Sáimon edde Enderiyas or gór ot giiyé. **30** Héñtte Sáimon or hóuri gaatzore bisánat fori accíl. Ítara éhon Isá re yóggwar baabute zanaiyé. **31** Íba yóggwar dáke aái yóggwa re át ot dóri tuillí, tói yóggwa ttu gaatzor giiyégoi, baade yóggwa ye ítara re meémadari gorát doijje. **32** Házinná beil góli baade, maincé íbar hañse biyaraimma beggún ore edde búte-faiya manúc ókkol ore ainníl. **33** Aar guñra cóor or manúc duwar or gurat zoma óoil. **34** Isá ye boóut biyaraimma ókkol gom goijjé zetará dóilla-boóilla biyarame duk faat accíl, edde boóut búttó dáfaiye; montor íba ye búttó ókkol ore matitó no dito, kiyólla-hoilé híine íba hon de síníto. **35** Baade bíinna kúb sóore andár tákite, Isá urí gór ottu neeli ekkán bocótisára zagat giiyé, aar hére dua goijjé. **36** Sáimon edde yóggwar sáañti ókkole íba re tuwaitó neeillé. **37** Ítara íba re tuwai fai hoór de, “Beggúne Tuáñr talac gorér.” **38** Íba ye ítara re hoór de, “Aiyó, añára atehańsór honó ekkán farat zai, zeéne hére yó Añí tobolik gorí fari, kiyólla-hoilé Añí hétolla beh neeillí.” **39** Tói íba Galil or agagura zai-zai ítarar mujilíc-hána ókkol ot tobolik gorát accíl edde búttó dáfat accíl. **40** Ezzon kurus biyaraimma Isár hañse aái sóida gorí íba re fóriyat gorér de, “Tuñí sailé añré pak-sáf gorí faribá.” **41** Isá ttu feñfuri Nizer át barái yóggwa re dóijje, aar hoór de, “Añí saái; pak-sáf óizogoi.” **42** Tói éhon or bútoe yóggwa ttu kurus biyaram giiyégoi, aar yóggwa pak-sáf óigiyo. **43** Baade Isá ye yóggwa re dorógori nicót gorí éhon-éhon duńraidiyé, **44** yóggwa re hoiyé de, “Saiyó, honókiyo re kessú no zanaiyó; bólke zoo,

nizoré imam or hañse dahógoi, aar tuñí pak-sáf óiyo de híyan maincór hañse gobá ó fan, Muúsa ye hókum díye de hé kurbani dogói.” **45** Lekin yóggwa baáre zaigói kúlamela góri zanai-zanai agagura hé hóbor fólat doijje, eddúr zeén níki Isá honó cóor or bútoore ar kúlamela góri góli nó fare, bólke ekkán bocóti-sára zagat zai táka foiijé. Toóu agagura ttu manúc ókkol íbar hére aitó.

2 Hooddin baade zeñtté Isá Kaparnahúm ot waafes aiccé, fúna gíyeh de, íba gór ot asé. **2** Baade hére edún manúc zoma óigiyoi, gór gán guñra bóri duwar or ðáke úddwa ar zaga nu accíl. Aar Isá ítarar hañse kalam tobolik gorát accíl. **3** Hé októót hére hodún manúc aiccé, fúañti ítara ek añtur manúc ore sair zon or áta boói íbar hañse ainné. **4** Aar zeñtté ítara manúc or zam olla bóuli íbar ínyot zai no farer, hétunot ítara íbar uzu-uzu uottú sád or ʔali larifélaie, aar hana gorifelai baade, añtur manúc cwa neittá asé de bisána wa lamaidiyé. **5** Isá ye ítarar iman deki añtur manúc cwa re hoór de, “O fut, tor guná maf gorídiya gíyeh.” **6** Hére hoozzon alem boiřá accíl, ítara dile-dile báfer de, **7** “E Manúc cwa ye endilla hotá kiyá hoór? Ibá ye toh kuféri gorér! Sirif Alla bade guná maf gorífaroya hon asé?” **8** Éhon or bútoore Isá ye Nizor ruht zani faijé de, ítara dile-dile héndilla báfer. Hétolla íba ye ítara re hoór de, “Tuáñra dile-dile híin kiyá báfor? **9** E añtur manúc cwa re hoité hon nán aásan, ki ‘Tor guná maf gorídiya gíyeh,’ aar náki, ‘Uʔ, tor bisána tulí looi añʔ?’ **10** Lekin Añr ttu tuáñra re yíán zanaidito monehoór, e duniyait guná maf goríbar kémota Manúc or Fua ttu asé.” Tói íba ye añtur manúc cwa re hoór de, **11** “Añí toré hoóir, uʔ, tor bisána tulí looi gór ot zaagói.” **12** Hétunot yóggwa uitté, aar toratori bisána wa tulí looi ítara beggún or muúntu baárkule giyégoi. Híyane ítara beggún taajup ói Allar taarif gorát doijje, eén hoói, “Añára endilla harbar honódin nó deki!” **13** Isá abar baáre neeli ðiir hañsat giyé; aar manúc beggún íbar hañse aiccé rár, íba ye ítara re taalim diyat doijje. **14** Íba zaite-zaite dekér de, Alfáiyas or fua Leévi házana tulé de gór ot boói táikke. Íba ye yóggwa re hoór de, “Añr fisáli doro.” Hétunot yóggwa urí íbar fisáli doijje. **15** Yárbaade eén óiye, Isá zeñtté Leévir gór ot hána háar, boóut zon házana-tulóya edde gunágar ókkol óu Isá edde íbar ummot ókkol or fúañti háito boiccé, kiyólla-hoilé íbar fisá dori accíl de boóut zon accíl. **16** Férocir alem ókkole íba re házana-

tulóya edde gunágar or fúañti hána háar de deki, íbar ummot ókkol ore hoór de, “Íbá ye házana-tulóya edde gunágar ókkol or fúañti kiyá hána háa?” **17** Híyan fúni Isá ye ítara re hoór de, “Araimma ókkol ottu toh ðaktór no lage, montor biyaraimma ókkol ottu beh lage. Añí dawot dito aiccé de forhésgar ókkol ore no, bólke gunágar ókkol ore.” **18** Ekbar, Yaháyar cárit ókkole edde Férocí ókkole ruza raikké, ítara aái Isá re hoór de, “Yaháyar ummot ókkole edde Férocir cárit ókkole toh ruza raké, montor Tuáñr ummot ókkole kiyá ruza no raké?” **19** Isá ye ítara re hoór de, “Dulá fúañti tákite kí boiraitta ókkole ruza rakí fare? Zetó din dulá ítarar fúañti táke, hétodin toh ítara ruza rakí no fare. **20** Montor eén din aibó, zeñtté dulá re ítarar hañsottu loiféla zaybo, one héñtte ítara ruza rakíbo. **21** “Honókiye toh furan fucák ot noya hoor tali dede náí, zodi dilé toh héntu noya gán zórizayboi, aar fára híyan aró ðoóñr óizayboi. **22** Héndilla, honókiye noya anggur or roc ore furan samarar hóillat raké de náí; zodi rakíle toh noya roc cúne hóilla gún fářifelaibo, tói roc óu borbád zayboi aar hóilla gún óu borbád zayboi. Hétolla, noya anggur or roc ore noya samarar hóillat raká fore.” **23** Ekbar eén óiye, ebaadot-or-din Isá giyuñr kuñřá báy zaar, zaite-zaite íbar ummot ókkole giyuñr túr ókkol tulát doijje. **24** Férocí ókkole íba re hoór de, “Soó, ebaadot-or-din ziyán goríbar maná, itará híyan kiyá gorér?” **25** Montor íba ye ítara re hoór de, “Tuáñra kí yíán honódin nó foró, zeñtté Dawud edde íbar sáañti ókkol ottu zorurot óiye edde búk laiggíl, héñtte íba ye kii goijjíl de? **26** Íba ye toh boro imam Abiyótar októót Allar gór ot goíllegeoi, aar Allar hañse peec goijjá ruʔi háail, zín sirif imam ókkole bade ar honókiye háibar ezazot náí. Íba ye híin nizor sáañti ókkol ore yó díł.” **27** Tarfore Isá ye ítara re hoór de, “Ebaadot-or-din banaiyé de óilde manúc olla, manúc ore ebaadot-or-din olla banaiyé de no. **28** Hé ísafe Manúc or Fua ebaadot-or-din or óu Malik.”

3 Isá aró ekbar mujilíc-hánat góille; aar hére ézzon endilla manúc accíl, zar át fúaiyai. **2** Ítara íba ye ebaadot-or-din yóggwa re gom goré né háas nozor di saái táikke, zeéne ítara íba re hosúr dí fare. **3** Íba ye át fúana manúc cwa re hoór de, “Uří eřé muúntu aiyó.” **4** Baade íba ye ítara re hoór de, “Ebaadot-or-din gom ham goríbar zayes asé né náki hóraf goríbar? Foran basaibár né náki marifélaibar?” Montor ítara nizám mári táikkil. **5** Íba ye sairómikka ítarar uzu guccár sáañte saái, ítarar díł dorór zoriya bicí duk

lagi manúc cwa re hoór de, “Tuáñr át tan baró.” Tói yóggwa ye híyan baráiyé, hétunot yóggwar át tan agor dóilla gom óigiyoi. **6** Hétunot Féroci ítara baáre zai Hérudiól lói sólla gorát dojjegoi de, ítara Íba re kii bote marifélai faribó. **7** Montor Isá ye Nizor cárit tun ore fúañti looi díir hañsat giyyégói. Doóñr ek dol manúc Íbar fisá dojjil; ítara aiccé de óilde Galil ottu, Yohúdiya ttu, **8** Jerúsalem ottu, Idumaya ttu, Jordán hál or farkul ottu, Țayár edde Sídón cóor or sairó dák or elaka ttu. Ítara Isá ye goittó de hárr kessú fúni beh Íbar hére aiccé. **9** Manúc or dol lwár zoriya Íba ye Nizor cárit tun ore hoiyé de, Íba lla ekkán gura noow zuu gorí rakító, zeéne maincé Íba re sibasippa no goré. **10** Kiyólla-hoilé Íba ye boóut maincóre gom goijjíl de hétolla, biyaraimma ókkol beggúne Íba re súi bolla tétateli goittó. **11** Aar hóraf Jin ókkole zeñtté Íba re dekító, Íbar muúntu merít fori guzori hoitó de, “Tuñí óilade Allar Fua.” **12** Montor Íba hon de híyan honókiyo re zahér no gorí bolla Íba ye ítara re horagori nicót goittó. **13** Yárbaade Isá faár or uore uiyyəgoi, baade Nizor ttu zaré-zaré monehoiyé taré-taré mataiyé, aar ítara Íbar hére aiccé. **14** Íba ye baró zon ore basíloiye, zeéne ítara Íbar fúañti-fúañti táke, aar zeéne ítara re tobolik goittó difeřái fare, **15** edde ítara ttu bít dáfaibar kémota táke. **16** Hé baró zon ítara óilde: Sáimon zaré Íba ye Fitor nam diyé; **17** Zebedair fua Yakub, aar yóggwar báí Yohánna. Íba ye ítarar nam diyé de Bowanergis, maáni óilde, “Țáral or Fuain”; **18** Enderiyas, Filíp, Bartólomiyo, Moti, Tómas, Alfáiyas or fua Yakub, Táadiyas, Sáimon, zibá óilde Zélot, **19** edde Yohúdah Iskáriyet, zee niki Isá re dóridil. **20** Baade Isá ek góor ot góille, aar ebar óu edún manúc zoma óiye, zeén níki Íba edde Íbar cárit tune hána úddwa hái nó fare. **21** Zeñtté Íbar góor or maincé híyan fúinne, ítara Íba re dóri loianí bolla neeillé; kiyólla-hoilé ítara hoór de, “Íbar matá hóraf óigiyoi.” **22** Ze alem ókkol Jerúsalem ottu nise aiccé, ítara hoór de, “Íbá re Belzebule faiyé. Íbá ye bít dáfa de bít ókkol or sóddar or taakote.” **23** Hétolla Isá ye ítara re matai ekkán meésal dí hoór de, “Cóitane keéngori Cóitan dáfaí fare? **24** Zodi honó raijjet faáta-faáti foida ó, híyan toh țiki táki no fare. **25** Aar zodi honó góor ot faáta-faáti foida ó, híyan óu țiki táki no fare. **26** Héndilla, zodi Cóitane nizor ulđa nize ói faát-faát óizagoi, íte toh țiki táki faribár náí, bólke íte hótom óigiyoi. **27** Honókiye boluwar manúc or góor ot góli yóggwar cómbotti luț gorí no fare, zodi age

boluwar manúc yóggwa re bañdí no ere. Bañdí erilé éna yóggwar góor luț gorí faribó. **28** “Añí tuáñra re sóiyi hoór, adomzat or tamám guná edde ítara goré de kuféri ókkol maf gorídiya zaybo, **29** montor zee niki Pak-Ruhr ulđa kuféri goré, íte bilkúl maf no faibo, bólke abadulabadi gunár hosúrbon țóoribo.” (aïñ g165, aïñios g166) **30** Isá ye hotá híin kiyólla hoiyé hoilé, alem ókkole hoiyé de, “Íba re hóraf jine faiyé.” **31** Yárbaade hére Isár maa edde báiyain aiccé, aar baáre tíyai táki Íba re mataitó difeřáiyé. **32** Íbar sairókul ttu ek dol manúc boiřá accíl; ítara Íba re hoór de, “Soó, Tuáñr maa edde báiyain baáre Tuáñr talac gorér.” **33** Íba ye zuwabe ítara re hoór de, “Añr maa hon? Aar Añr báiyain hontará?” **34** Baade Íba ye zetará Íbar sairókul ttu boiřá asé, ítarar uzu saái hoór de, “Ótiya, Añr maa edde Añr báiyain. **35** Kiyólla-hoilé zee niki Allar moncá mozin sole, yóggwa óilde Añr báí, bóin, aar maa.”

4 Isá abar díir hañsat taalim diyat doijje. Íbar hére manúc or ettóor dol zoma óiye, zeén níki Íba díit asé de ekkán noow ot urí boiccé; aar manúc cún beggún díir kul or uore. **2** Íba ye ítara re meésal ókkol dí boóut kessú cíkat doijje. Íba ye taalim ot ítara re hoór de, **3** “Fúno, ezzon bis cínřoya bis cínřto neeillé. **4** Yóggwa ye cínřer de októť, hodún bis rastarhañsat foijjíl, aar faik ókkole aái híin háifelaiye. **5** Hodún bis cíl zobin ot foijjíl, zeřé bicí meri náí. Mur meri nu accíl ísafe híin ot hára ges aiccé. **6** Montor beil uiyyə rár híin furigiyói, aar cínřyor nó gasá ísafe híin fúaigiyoi. **7** Hodún bis keñřabon ot foijjíl, keñřabon barí urí híin ore sibi raikké ísafe híin ot fósol nó dóre. **8** Lekin ar hodún bis gom zobin ot foijjíl, híin barí urí doóñr ói fósol dojjil: kessút tiríc gun, kessút háit gun, ar kessút ek cóť gun.” **9** Tarfore Isá ye ítara re hoór de, “Zar ttu fúnibar han asé, yóggwa ye fúno.” **10** Zeñtté Isá gaaga óigiyoi, Íbar sairókul or manúc cúne edde baró zon cárit tune Íba ttu meésal lun or baabute fusár goijjé. **11** Íba ye ítara re hoór de, “Allar raijjet gufoni re zainto tuáñra re beh diya giyéh; montor baárgwa maincóre meésal dí etollá howá zah, **12** zeéne, ‘ítara saité saibó montor no dekíbo, fúinte fúnibo montor no buzíbo, arnóile toh ítara fíri aitó aar maf faito.’” **13** Tarfore Isá ye ítara ttu fusár gorér de, “Tuáñra e meésal lan or maáni nó buzó níki? Tóoile oinno meésal lun or maáni keéngori buzíba? **14** Cínřoya ye cínřte de híin óilde Allar kalam. **15** Hodún manúc rastar hañsat foijjé

de bis híin or dǫílla; ítara kalam fúnile Cóitan toratori aái ítara bútoe cǫñra gýyeh de kalam loizagói. **16** Hodún manúc cǫl zobin ot foijjé de bis híin or dǫílla, zetará kalam fúnile mottor kúcir sáante kobul goré, **17** montor híin ot mozbut cǫñyor nó gasá de hétolla hooddin beh ǫiki táke. Zeñtté hé kalam or zoriya mosibot yáh zulúm aiyé, ítara éhon fissá mare. **18** Ar hodún manúc keñṛabon ot foijjé de bis híin or dǫílla; ítara kalam fúne, **19** montor duniyair sintabáfaniye, dón-doulot or adore, edde oinno jiníc ókkol or lalóse hé kalam ore sibi raké, hétolla híin ot gula no dóre. (aíṛon g165) **20** Ar hodún manúc gom zobin ot foijjé de bis híin or dǫílla; ítara kalam fúne edde kobul goré, aar gula dóra: kessú ye tiríc gun, kessú ye háit gun, ar kessú ye ek cót gun.” **21** Isá ye ítara re hoór de, “Serak ki báñir yáh falong or tole rakí bolla ané de né? Serak boiṛnir uore rakí bolla no né? **22** Kiyólla-hoilé endilla luki asé de kessú náí ziín zahér no óibo, aar endilla lukai eijja honó kessú náí ziín kúláhala no óibo. **23** Zodi honókiyo ttu fúnibar han táke, yóggwa ye fúno.” **24** Íba ye ítara re yáin óu hoiyé, “Tuáñra ziín fúnor híin or uzu díyan dóh. Tuáñra ze mafe diiba, tuáñra re yó hé mafe diiya zaybo, tuáñra re óile aró diiya zaybo. **25** Kiyólla-hoilé zar ttu asé yóggwa re aró diiya zaybo, montor zar ttu náí yóggwa ttu asé de híin úddwa loiféla zaybo.” **26** Isá ye aró hoór de, “Allar raijjo óilde endilla manúc or dǫílla zee niki zobin ot bis cǫñṭte, **27** yóggwa raitta gúm zah aar din ot seton táke, hé bis ottu ges aái keéngori dǫóñr óigiyoi de yóggwa nize hoi no fare. **28** Zobine toh nizorgá nize fósol dóra: age sara, baade aga, aar agat foona fósol. **29** Zeñtté fósol fagigiyói, yóggwa ye híin toratori hañsi loi haṛat doijje, kiyólla-hoilé fósol haṛibár ainda aáigiyoi.” **30** Isá ye aró hoór de, “Añára Allar raijjo kiyór dǫílla bóuli hoitám? Yáh kiyór meésal dí buzáitam? **31** Híyan óilde eggwá hóroir danar dǫílla; zibá re zobin ot lagaibárcot saité zobin or tamám bis or bútoe ebbe cǫñro, **32** toóu yíba re lagailé, yíba barí kétir gas beggún or túaro dǫóñr ói endilla dǫóñr-dǫóñr déeila ókkol fára, zeén niki faik ókkole yíbar sábar nise bahá bañdí fare.” **33** Héndilla boóut meésal ókkol dí Isá ye ítara buzí fare de héddur mozin Allar kalam hoitó. **34** Íba ye meésal sára ítara re hotá no hoitó; montor Nizor cárit tun ore aiddone hárr kessú buzáidito. **35** Hé din hañz óiye rár, Isá ye cárit tun ore hoór de, “Aiyó, añára oh hañsat zai.” **36** Manúc or dol lwá re eri, ítara Isá ze noow ot accǫl híyan ot góri Íba re

fúañti loigiyé. Íbar fúañti aró noow ókkol óu gífl. **37** Asimbit hére eggwá dǫóñr tuwán cúru óiye, aar eén dǫóñr-dǫóñr goir ókkol marat doijje, zeén niki noow gán faní lói bórizargoi. **38** Montor Isá noow or fasíl ot eggwá balúc cítan ot dí gúm ot accǫl. Ítara Íba re tulídi hoór de, “Ó Ustat, añára morizayrgói de híyan ot kí Tuáñr honó díyan náí?” **39** Tói Íba urí boiyar ore dǫóñk díye, aar faní re hoór de, “Nizám ó, táma.” Hétunot boiyar bon óigiyoi, aar furafuri támaigiyoi. **40** Íba ye ítara re hoór de “Tuáñra dǫoorór kiyá? Tuáñra ttu kí aijjó iman náí?” **41** Ítara bicí dǫoorraigiyói aar ezzon ore ezzone hoór de, “Íbá hon? Boiyare edde faní ye úddwa de Íbár hotá manel!”

5 Yárbaade ítara dǫíir okule Geraséni ókkol or mulluk ot foóñicce. **2** Zeñtté Isá noow ttu laimmé, éhon-éhon ezzon hóraf jine-faiya manúc hobor ottu neeli aái Íba llói dola óiye. **3** Yóggwa tákito de óilde hobor ókkol ot; honókiye yóggwa re bañdí rakí no faitto, síyol lói úddwa no faitto. **4** Yóggwa re boóut bar berí edde síyol lói bañdí raká gýl, montor yóggwa ye síyol ókkol sírifelaito, aar berí ókkol hán-hán gorífelaito. Honókiye yóggwa re sóoñli rakí no faitto. **5** Yóggwa hámica raite dine hobore-hobore edde faáre-faáre guzorat tákito, aar nizoré nize fattór lói haritó. **6** Zeñtté yóggwa ye Isá re dur ottu lóti deikké, duñri zai Íba re sóida goijjé. **7** Yóggwa ye eggwá dǫóñr abase guzori hoór de, “Ó Isá, Alla Tálar Fua, Tuáñr ttu añr llói kii ham asé? Allar wasté añré toziya no diyó.” **8** Kiyólla-hoilé Isá ye yóggwa re hoiyé de, “Héy hóraf jin, manúc cwa ttu neelíai.” **9** Isá ye yóggwa ttu fusár gorér de, “Tor nam kii?” Yóggwa ye hoór de, “Añr nam Zák; kiyólla-hoilé añára boóut twa así.” **10** Tarfore yóggwa ye Íba re becábicí fóriyat goijjé de, híin ore hé elaka ttu duñrai no di bolla. **11** Hére faár or hañsat dǫóñr ek zák cúwor sorer de accǫl. **12** Bút tune Íba re fóriyat gorér de, “Añára re oh cúwor gún or bútoe duñraido, zeéne añára híin or bútoe góli fari.” **13** Isá ye ezazot diyé rár, hóraf jin nún neeli cúwor gún or bútoe góillegoi; tói zák kwa faár or haíndá báy zure díft duñrdiyé, aar hére dǫufí morigiyói. Hé zák kwat tokoriban dui ázar cúwor accǫl. **14** Cúwor soroya gún duñrdiyé, aar cóor ot edde gang zagat híyan hóbor díye. Baade manúc ókkole kii óiye de saító neeillé. **15** Ítara Isár hére aiccé, aar dekér de, búte-faáil de, yáni jin or zák accǫl de manúc cwa Íbar dǫake boiṛá, hoor findá aar sóiyi úñice asé;

hétunot ítara ðooraiگییوی. 16 Zetará hé maamela gán deikké ítara búte-faáil de manúc cwar uore kii óiye de híyan manúc ítara re zanaiyé, héndilla cúwor gún or baabute yó zanaiyé. 17 Baade manúc ókkole Isá re ítara elaka ttu zaitogói bicí aros gorát doiije. 18 Íba noow ot uřérgoi de októť, búte-faáil de manúc cwa ye Íbar fúańti zai bolla fóriyat goijjíl. 19 Lekin Isá ye yóggwa re ezazot nó deh, bólke hoiiyé de, “Tuńi tuáńr góť ot zoogói aar maincóre zanogói de, Mabude tuáńr lla hottór ðoóńr ham goijjé, aar tuáńr uore hotó rahám goijjé.” 20 Baade yóggwa giyyégoi, aar Isá ye yóggwa lla ze ðoóńr ham goijjé híin Dekapólis elakat boiyan gorát doiije; híin fúnile beggúne taajup óito. 21 Zeńtté Isá abar noow ot gori ðiír oh hańsat faráiyé, ðoóńr ek dol manúc Íba re gíri zoma óiye, aar Íba ðiír hańsat accíl. 22 Hétunot mujilíc-hánar sóddar ézzon hére aiccé, zibár nam Záiras. Yóggwa ye Isá re deki Íbar foot foijjé, 23 aar fóriyat gorér de, “Ańr gura zérfua wa moron-moron óiye; meérbani góri aái Tuáńr át tan híbar uore doogái, zeéne híba gom óizagoi aar basi táke.” 24 Hétunot Isá yóggwar fúańti rowana loiyé. Ðoóńr ek dol manúc Íbar fisá doiije aar sairókul ttu Íba re řélaťeli gorér. 25 Hére eggwá mayafua accíl, zibá ttu kúnzari zár de baró bosór óiye. 26 Híba ye boóut ðakťor ókkol or hańsóttu bicí tokolif bordac goijjíl, aar nizor ttu accíl de beggún hóssa gorífelai baade yo honó fáida nó óiyo, bólke biyaram aró barígilgoi. 27 Zeńtté híba ye Isár baabute fúinne, manúc or dol lwár bútoře góli Isár fisór ttu aái Íbar hoor súiye, 28 kiyólla-hoilé híba ye báippil de, “Ańi sirif Íbar hoor súi faille gom óizaiyumboi.” 29 Tói éhon or bútoře híbar kúnzari bon óigiyoi, aar híba biyaram ottu gom óigiyoi de híyan nizor jisím ot maásus gorí faijjé. 30 Aar éhon-éhon Isá ye zani faijjé de, Íba ttu kudurut neeillé. Íba ye manúc or dol or bútoře sairómikka saái hoór de, “Ańr hoor hone súiye?” 31 Íbar cárít tune hoór de, “Tuńi toh dekor, manúc ókkole Tuáńre řélaťeli gorér de, aar Tuńi keéngori hoór de, ‘Ańré hone súiye?’” 32 Lekin hé ham goijjé de híba re sai bolla Isá sairómikka saat accíl. 33 Montor mayafua wa ye nizor hálót kii óiye de zani, ðoore hafi-hafi aái Isár muúntu uúĩntoi foijjé, aar Íba re fura hákikot zanaáil. 34 Isá ye híba re hoór de, “O zii, tor imane toré gom goijjé. Cáńtir sáańte zaagói, tor ttu e biyaram ar no óuk.” 35 Íba hotá howát accíl de októť, mujilíc-hánar sóddar gwar góť ottu hoozzon manúc aái hoór de, “Tuáńr zii zuraigiyói;

Ustat ore ar kiyá ferecan gorór?” 36 Montor Isá ye ítara hotár uzu díyan no di mujilíc-hánar sóddar gwá re hoór de, “No ðooraiyó; sirif biccác goró.” 37 Tarfore Íba ye Fitor, Yakub, edde Yakub or báí Yohánna re bade ar honókiyo re Íbar fúańti zaito nó deh. 38 Ítara zeńtté mujilíc-hánar sóddar gwar góť ot foóńicce, Íba ye dekéť de, héře holholar, aar manúc ókkole ðoóńr-ðoóńr góri hańdahari edde bilak gorér. 39 Íba ye bútoře zai ítara re hoór de, “Tuáńra uzor edde hańdahari kiyá gorór? E fua wa moijjé de no, bólke gúm zar deh.” 40 Hétunot ítara Íba re lói áńcat doiije, lekin Íba ye beggún ore neelaidi mayafuar bafmaa re edde Íbar fúańti accíl de cárít tun ore lói, fua wa asé de kamárat góille. 41 Aar zérfua war át dóri híba re hoór de, “Táľita kum,” ziyán or torjuma óilde, “Gura futúni, Ańi toré hoór, ut.” 42 Éhon zérfua wa uří áńřat doiije, kiyólla-hoilé híbar boc accíl baró bosór. Híyane ítara ebbe taajup óigiyoi. 43 Íba ye ítara re horagori hókum díye de, híyan or baabute honókiyo re no zanai bolla, aar hoiiyé de, háito híba re kessú dii bolla.

6 Isá héntu neeli nizor wotón ot aiccé, fúańti Íbar cárít tun óu gíľ. 2 Aar ebaadot-or-din aiccé rář, Íba ye mujilíc-hánat taalim diyat doiije. Íbar boiyan fúni boóut zone ammúk ói hoór de, “E Manúc cwa ye iín hontú cíkke? Ibá re diiya giyéť de híin hondilla giyan? Ibá ye gorér de híin kii keramot? 3 Ibá kí mistíri no, zibá Moriyam or fua aar Yakub or, Yusuf or, Yohúdahr, edde Sáimon or báí? Ibár bóinain eřé ańárar fúańti nó ne?” Héndilla hoói ítara Íba re inkar goijjé. 4 Hétunot Isá ye ítara re hoór de, “Ze honó nobir izzot nizor wotón ot, egana-guccít, edde nizor góť ot bade beggúlla asé.” 5 Íba ye héře ar honó keramot gorí nó fare, sirif hoozzon biyaraimma re ítara uore át dí gom gorí faijjíl deh. 6 Aar ítara nabiccácit Íba bicí taajup óigilgoi. Yárbaade Isá farafara zai taalim diyat accíl. 7 Íba ye baró zon cárít tun ore matai, dui zon dui zon gorí diferát doiije. Íba ye ítara re hóraf jin ókkol neelaibár kémota díľ. 8 Íba ye ítara re nosiyot gorér de, “Fońť olla laři bade ar kessú no loizaiyó: no ruťi, no hóilla, no zalit gori řiań. 9 Cenřár fińdíyo, montor battí hoor no loizaiyó.” 10 Íba ye ítara re aró hoór de, “Tuáńra ze góť ot góľiba hé góť ot cóor híyan ottu neeli nó zoogói foijjonto tákiyo. 11 Ze zagat tuáńra re kobul no goré yáto tuáńrar boiyan no fúne, híyan ottu zaibarcót tuáńrar řéng or tollar dúil zárifelaiyo, zeéne híine ítara ulđa

gobá deh.” 12 Baade ítara rowana loi endilla tobolik gorát doiije, touwá goró. 13 Ítara boóut bútt ókkol neelaiye, aar boóut zon biyaraimma re ítara uore tel di gom goijjé. 14 Aar baáñcca Hérude Isár baabute fúinne, kiyólla-hoilé íbar nam agagura mocúr ógilgoi. Hodúne hoór de, “Báptismadoya Yaháya mora ttu zinda óiye deh, hétolla toh íba ye keramoti ham híin gorí farer.” 15 Kiyé-kiyé hoór de, “Íba Eliyas.” Ar kiyé-kiyé hoór de, “Íba eggwá nobi, agor zobanar nobi ókkol or dóilla.” 16 Montor Hérude híyan fúni hoór de, “Yaháya zibár holla añ hariféla báilam, íba mora ttu zinda óiye deh.” 17 Kiyólla-hoilé Hérud nize manúc difeíai, nizar báí Filíp or bou Hérudias or wasté hé Yaháya re gereftar gorí ziyól ot bañdí raikkíl, kiyólla-hoilé Hérude híba re biyá gorífelail. 18 Yaháya ye Hérud ore endilla hoitó de hétolla, “Tuáñr ttu nizar báí or bou wóre biyá goríbar zayes náí.” 19 Hétolla Hérudias Yaháya llói rak táigilgoi, híba ttu íba re zane marifélaito monehoitó, montor nó fare, 20 kiyólla-hoilé Hérude Yaháya re dooraitó, yóggwa ye zainto de, íba ézzon forhésgar edde pak manúc, aar hé ísafe yóggwa ye íba re héfazot rakíto. Yóggwa ye Yaháyar hotá fúnile bicí oulzóul ot forizaytói; toóu yóggwa ttu íbar hotá fúinte gom lagító. 21 Ahérit Hérudias ekkán mouka faáil, zeñtté Hérude nizar zormo-din or din córkari doóñr manúc ókkol, fóous or zonnal ókkol, edde Galil or ðaídoñr ókkol olla eggwá doóñr hána goijjé. 22 Hérudias or zii nizorgá nize hére bútoe aái, nasi yore Hérud edde yóggwar meéman ókkol ore kúci goijjé rár, baáñcca ye zérfua wa re hoór de, “Tor ttu ziyán monehoó híyan añr ttu mag, añ toré híyan diiyum.” 23 Yóggwa ye híba re hosóm háí hoiyé de, “Tui añr ttu ziyán magos, añ toré híyan diiyum, añ rajjo ekdók óile úddwa diifélaiyum.” 24 Baade híba neeli zai maa re hoór de, “Añí kii magitám?” Maa ye hoór de, “Báptismadoya Yaháyar holla wa.” 25 Éhon híba toratori bútoe baáñccar hañse aái hoór de, “Añí tuáñr ttu báptismadoya Yaháyar holla wa ekkán tálit góri ehón saái.” 26 Híyan fúni baáñcca ttu bicí afsús laiggé, montor toóu nizar hosóm edde meéman nún or zoriya yóggwa ye híba re inkar goittó nó saá. 27 Baáñcca ye éhon-éhon ezzon zollat ore Yaháyar holla wa aintó hókum dí difeíaiye. Manúc cwa ye zai, ziyól or bútoe íbar holla wa harifelaiye, 28 aar holla wa re ekkán tálit góri aní zérfua wa re diiyé; baade zérfua wa ye híbar maa re diiyégoi. 29 Zeñtté íbar ummot ókkole híyan fúinne, ítara aái íbar lac cwa loizai hobor

ot dohón gorífelaiye. 30 Sáhabi gún aái Isár hañse zoma óiye, aar ítara kii-kii goijjíl edde kii-kii cíkail híin beggún íba re zanaiyé. 31 Héñtte boóut manúc ókkol aa-zaat accíl ísafe ítara hána háito úddwa ðaim nó faa de hétolla, íba ye ítara re hoór de, “Tuáñra ekkán nizám zagat aái essát zirogái.” 32 Tarfore ítara noow ot gori ekkán bocóti-sára zagat giyyé. 33 Manúc ókkole ítara zaar de deikké, tará boóut zone ítara re siní fari tamám cóor ókkol ottu duñri-duñri hére giyyé, zai ítara age hére foóñcce. 34 Zeñtté Isá noow ttu laimmé, íba ye doóñr ek dol manúc deikké, aar íba ttu ítara lla feífuije, kiyólla-hoilé ítara soroya sára bérasóol or dóilla ói accíl. Tói íba ye ítara re boóut kessú taalim diyat doiije. 35 Zeñtté bicí háñz óigiyoi, íbar cárit tune íbar hañse aái hoór de, “Yián toh ekkán bocóti-sára zaga aar bicí háñz óigiyoi; 36 tará re duñraido, zeéne tará atehaísór gang zaga ókkol ot edde fara ókkol ot zai nize háí bolla kessú kini fare.” 37 Montor Isá ye ítara re hoór de, “Hái bolla kessú tará re tuáñra doo.” Ítara íba re hoór de, “Tóoile añára zai dui cót dinár or ruṭi kini aní tará re hábaitam né?” 38 Montor íba ye ítara re hoór de, “Tuáñra ttu ruṭi houwá asé? Zai soógoi.” Ítara saái baade íba re hoór de, “Fañs swá, aar duwá mas óu asé.” 39 Baade íba ye ítara re, manúc cún beggún ore áil kér or uore ðaái-ðáái góri buágaraito hókum díye. 40 Tói tará ek cót zoinna edde fonzaic zoinna ðaái góri-góri boiccé. 41 Tarfore íba ye hé fañs swá ruṭi edde duwá mas sún looi asman or uzu saái cúkuriya goijjé, aar manúc cún ore dii bolla ruṭi gún báñgi-báñgi cárit tun ore diiyé; héndilla gorí íba ye mas duní wa yó tará beggún ore baṛidiyé. 42 Aar tará beggúne feṭ bóri háíye. 43 Baade ruṭir edde mas or ze tukuṛa ókkol basigiyói, cárit tune híin feñrai looi fura baró báñir bóijje. 44 Zetará ruṭi háíye ítara óilde fañs ázar beṛaáin. 45 Éhon or bútoe Isá ye Nizar cárit tun ore mojbúr goijjé de, íba ye manúc cún ore bidai gorí dite-dite ítara zeéne noow ot urí íbar age okule Betsáidat zaagói. 46 Manúc cún ore bidai gorídi baade, íba faár or uore dua goittó giyyé. 47 Aar háñz óiye de héñtte, noow gán ḏír mazé accíl, aar Isá hálíga kul or uore. 48 Íba ye deké de, cárit tune mockil or sáañte dar baár, kiyólla-hoilé boiyar ítara uzan baát accíl. Fuáñitta, íba fanír uottú añri-añri ítara hére aiccé, aar ítara re bárai zaito saáil. 49 Lekin íba fanír uottú añrer de híyan cárit tune deki, bútt bóuli táari guzori uiṭṭíl, 50 kiyólla-hoilé íba re deki ítara beggúne dooraáil. Montor íba ye éhon-éhon

ítara llói hotá hoiyé; ítara re hoiyé de, “Hímmot goról íbá Añí; no ðooraiyó.” 51 Tarfore íba ítara asé de noow ot uittégói, aar hétunot boiyar támaigiyoi. Híyane ítara ebbe taajup óigiyoi, 52 kiyólla-hoilé ítara ruṭir keramot tán nó buzé, bólke ítara dil doró óigilgoi. 53 Ítara díí farái, Genesáret elakat foónsi noow gán bíraiye. 54 Aar noow ttu laimmé mottor, maincé Isá re siní, 55 hé elakar agagurat duñri zai biyaraimma ókkol ore bisánat góri, íba zeṛé-zeṛé asé bóuli hóbor faiyé hére-hére anát doijje. 56 Íba zeṛé-zeṛé zaito, farat óuk, cóor ot óuk, yáh gang zagat óuk, hére maincé biyaraimma ókkol ore bazar ot aní íba re aros goittó de, ítara re siríf íbar fucák or hañra óile súito dí bolla; aar zetó zone súito, ítara beggún gom óizaytoi.

7 Ek din Féroci ókkol edde hoozzon alem Isár hañse zoma óiye, ítara aiccé de óilde Jerúsalem ottu. 2 Ítara deikké de, Isár hodún ummote nafak áte yáni adúiya áte hána háar. 3 Asóle Féroci ókkole edde tamám Yohúdi ókkole cúndorgori át no dúi hána na háa, héndilla gori ítara agor zobanar buzurgó ókkol or rosóm dóri táke. 4 Aar bazar ottu ailé nizoré no dúi honó kessú na háa. Ítara ttu aró boóut ðoilla rosóm ókkol asé ziín ítara amól gori bolla bouli hé buzurgó ókkol ottu faiyé, zendilla niki, fiyala dúwa, zok dúwa, edde ketúri dúwa. 5 Hé Féroci edde alem múne Isá ttu fusár gorér de, “Tuáñr ummot ókkole agor zobanar buzurgó ókkol or rosóm mozin no kiyá sole, bólke nafak áte hána háa?” 6 Íba ye ítara re zuwabe hoór de, “Nobi Yesáyah ye tuáñra munafék ókkol or baabute sóiyi hotá hoiyé, zendilla leikká asé, ‘Manúc ííne Añré nizor muké beh izzot goré, montor tarár dil Añr ttu duré. 7 Tará Añr ebaadot goréde behar, kiyólla-hoilé tará taalim ísafe cíka de óilde insán or niyom-kaanun ókkol.’ 8 Tuáñra toh Allar hókum ore bad dí, insán or rosóm ore dóri táko.” 9 Isá ye ítara re aró hoór de, “Tuáñra toh tuáñrar rosóm amól gori bolla Allar hókum ore bad diyat bicí salák. 10 Muúsa ye hoóil de, ‘Nizor bafmaa re izzot goró,’ aar ‘Zee niki baf or yáh maar bodnam goré, ítare mariféla zaybo.’ 11 Lekin tuáñra hoó de, ‘Zodi honókiye baf ore yáh maa re eén hoó, ze siz loi tuáñra añr ttu laf feita híyan Korban,’ yáni, Alla re diíféla gíyeh, 12 tuáñra ítare nizor baf olla yáh maa lla ar honó kessú goittó no doh. 13 Héen gori, tuáñra zari goijjó de rosóme Allar kalam ore baatel gorífelo; héndilla aró boóut kessú goró de asé.” 14 Isá ye abar manúc ókkol ore Nizor hañse matai ítara re hoór de, “Beggúne Añr hotá fúno, aar buzó: 15

baár ttu manúc or bútoṛe góli ítare nafak gorí fare de honó kessú náí; bólke manúc or bútottu ziín neeliyaiyé, ítare hííne beh nafak goré. 16 Zar ttu fúnibar han asé, yóggwa ye fúno.” 17 Baade zeñtíte Isá manúc or dol eri ek gór ot góille, íbar cárit tune íba ttu meésal lan or maáni fusár goijjé. 18 Hétolla íba ye ítara re hoór de, “Tuáñra yó héndilla obuz táigiyogoi dé? Tuáñra kí no buzó, baár ttu ziín manúc or bútoṛe góle, hííne ítare nafak gorí no fare dé? 19 Kiyólla-hoilé híin zaa de toh ítar dil or bútoṛe no, bólke feṛor bútoṛe, aar híin feikána báy neelizagói.” Héndilla hoói Isá ye hárr hána hálal bóuli hoiyé. 20 Íba ye aró hoór de, “Ziín manúc or bútottu neeliyaiyé, manúc ore hííne beh nafak goré. 21 Kiyólla-hoilé manúc or bútottu, yáni dil ottu éna kukíyal, zenákari, suri, kotólakotóli, 22 oinno zon or bou loi zenákari, lalsí, burai, dúkabazi, bodmaci, ric, gifot, borái, edde bekufai aiyé. 23 E burai iín beggún bútottu neeli aái manúc ore nafak goré.” 24 Isá urí hé zaga ttu Ṭayár cóor or elakat giyyé. Íba ek gór ot góillegoi, aar híyan honókiyo re zainto dito mon nu accíl; montor íba luki táki nó fare. 25 Hére ek mayafua ttu hóraf jine-faiya eggwá gura zérfua accíl; híba ye Isár baabute fúni mottor aái íbar foot foijjé. 26 Mayafua wa accíl ezzon Beyohúdi, híba zormo óiye de óilde Síiriya mulluk or Penicíyar elakat. Híba ye Isá re aros gorát accíl de, zérfua ttu hé búttwa neelaifélai bolla. 27 Montor Isá ye híba re hoór de, “Age fuain dore feṭ bóri háito doh, kiyólla-hoilé fuain dor hána looi kuñir or muúntu félai dón gom no.” 28 Híba ye zuwabe hoór de, “Ói Malik, montor toóu de mes or tolór kuñire fuain dor hánar tukuṛa ókkol háa.” 29 Isá ye híba re hoór de, “E zuwab or zoriya tuñí zaigói faribá; tuáñr zérfua ttu bútt neeligiyói.” 30 Híba gór ot waafes zai loot faiyé de, zérfua wa bisánat neittá, aar bútt neeligiyói. 31 Tarfore Isá Ṭayár edde Sídon or elaka ttu neeli Dekapólis elakar mazór ttu Galil Ḍíft aiccé. 32 Hére maincé ezzon náfang edde túta re íbar hañse ainné, aar íba re fóriyat goijjé de, yóggwar uore íbar át dito. 33 Isá ye yóggwa re manúc or dol ottu ek ðáikka loizai íbar ooñl yóggwar duní han ot gólaidiye, aar íbar ooñl ot sép dí yóggwar zir súiye. 34 Baade íba ye asman or uzu saái ðoóñr niyác félaiye, aar yóggwa re hoór de, “Effata” yáni, “Kúlizagoi.” 35 Tói éhon yóggwar han nún kúligiyoi, edde zir eridiya óigiyoi, aar yóggwa sáf-sáf góri hotá howát doijje. 36 Híyan or baabute honókiyo re no hoiót Isá ye manúc cún ore maná goijjé; montor íba ye zetó maná goittó, ítara

héto fólat tákito. 37 Ítara ebbe taajup ói hoór de, “Íbá ye ziín goijjé híin beggún gom ham goijjé. Íbá ye toh náfang ore fúnibar aar buk ore matibár toóufik dee.”

8 Hé din ókkol ot, zeñtté abar ðoóñr ek dol manúc zoma óiye aar ítara ttu háito kessú nu accíl, Isá ye íbar cárit tun ore matai hoór de, 2 “Añr ttu manúc itará lla feṭfurer, kiyólla-hoilé itará Añr fúañti asé de tin din óiye aar itará ttu háito kessú náí. 3 Zodi Añí itará re gór ot waacca duñraidi, itará foñt ot matá gúrai forizayboí, kiyólla-hoilé itará ttu hodún bici dur ottu aiccé de asé.” 4 Íbar cárit tune zuwabe hoór de, “Montor manúc itará re feṭ bóri hábai bolla e bocóti-sára elakat hédun ruṭi hoṙé faibo?” 5 Isá ye ítara ttu fusár gorér de, “Tuáñra ttu ruṭi houwá asé?” Ítara hoór de, “Háñt twa.” 6 Íba ye manúc cún ore meṙit boitó hoiyé; baade háñt twa ruṭi gún looi Alla re cúkuriya goijjé, aar manúc cún ore dii bolla híin báñgi Nizor cárit tun ore diiyé, aar ítara manúc cún ore baṙidiyé. 7 Ítara ttu houggwá gura mas óu accíl. Isá ye híin olla yó cúkuriya gorí yore, híin baṙidito cárit tun ore hoiyé. 8 Manúc cúne feṭ bóri háiye, baade ze tukuṙa ókkol basi accíl híin bóijje ráṙ ðoóñr lai loi háñt lai óiye. 9 Hére sair ázar foijjonto beṙaáin accíl. Yárbaade íba ye ítara re bidai gorídiye, 10 aar éhon or bútoṙe Nizor cárit tun or fúañti noow ot uṙí Dalmanuta nam or ekkán elakat giyyégoi. 11 Fore Féroci ókkol neeli aái Isá llói torkatorki diyat doiije. Ítara íba re entán goríbar niyote, íba ttu ekkán asmani nicán dabi goijjé. 12 Íba ye ðoóñr góri niyác félai hoór de, “E zobanar maincé nicán dabi kiyá goré? Añí tuáñra re sóiyi hoóir, e zobanar maincóre honó nicán dahá no zaybo.” 13 Tóí Íba ítara re eri, abar noow ot uṙí ðiír okule giyyói. 14 Aar cárit tun ottu ruṭi loizaité foóraigilgoi; noow ot mazé ítara ttu ekgwár túaro bici ruṭi nu accíl. 15 Isá ye ítara re nicót gorér de, “Hóboroddar, Féroci ókkol or cúṭar ottu edde Hérud or cúṭar ottu úñciyar táikko.” 16 Hétunot ítara afós ot howáhoi gorér de, “Íba ye híyan hoór de ańára ttu ruṭi náí de hétolla.” 17 Montor Isá ye híyan zani fari, ítara ttu fusár gorér de, “Tuáñra ttu ruṭi náí de híyan kiyá howáhoi gorór? Tuáñra kí aijjó ót nó foh yáh nó buzó? Tuáñrar dil aijjó doró dé? 18 Tuáñra suk táí no dekoré dé? Aar han táí no fúnor dé? Tuáñra ttu monot náí ne, 19 zeñtté Añí fañs ázar maincór lla fañs swá ruṭi báinggilám héñtte ruṭir tukuṙa ókkol ho báñir bóri loóila?” Ítara íba re hoór de, “Baró báñir.”

20 “Aró, zeñtté Añí sair ázar maincór lla háñt twa ruṭi báinggilám héñtte ruṭir tukuṙa ókkol ho lai bóri loóila?” Ítara íba re hoór de, “Háñt lai.” 21 Baade Isá ye ítara re hoór de, “Tóí tuáñra aijjó nó buzó dé?” 22 Tarfore ítara Betsáida farat aiccé. Aar maincé ek ańdá manúc ore Isár hañse ainné, aní íba re fóriyat goijjé de, yóggwa re súito. 23 Íba ye ańdá manúc cwa re át ot dóri farar baáre loigiyé, aar yóggwar suk ot sép dí baade íbar duní át yóggwar uore dí fusár gorér de, “Tuñí kessú dekoré né?” 24 Yóggwa ye uormikká saái hoór de, “Añí manúc ókkol dekir, ítara re saité gas áñṙer fán lager.” 25 Isá ye abar Nizor át yóggwar suk ot diyé, hétunot yóggwa ek díyane saái táikke. Yóggwa agor dóilla gom óigiyoi, aar hárr kessú sáf-sáf góri deki faijjé. 26 Baade íba ye yóggwa re eén hoói gór ot duñraidiyé, “Farat úddwa no goílo.” 27 Isá ye Nizor cárit tun ore fúañti looi, Kaisáriya Filíppi elakar fara ókkol ot zaargói; foñt ot íba ye cárit tun ottu fusár gorér de, “Maincé Añí hon bouli hoó?” 28 Ítara zuwab der de, “Tuñí bóle báptismadoya Yaháya; ar hodúne hoó de, nobi Eliyas; ar hodúne hoó de, nobi ókkol ottu honó eggwá.” 29 Tóí íba ye ítara ttu fusár gorér de, “Lekin tuáñra kii hoó, Añí hon?” Fitore zuwabe hoór de, “Tuñí óilade hé Mosih.” 30 Hétunot íba ye ítara re nicót goijjé de, íbar baabute honókiyo re no hoitó. 31 Yárbaade Isá ye ítara re endilla taalim diyat doiije, Manúc or Fua ttu háamaha boóut dóilla duk faa foribó; aar murubbi, ðoóñr imam edde alem ókkol ottu inkar háibo; íba re mariféla zaybo, montor tin din baade abar zinda óizayboi. 32 Íba ye hotá híyan sáf-sáf góri hoiyé. Hétolla Fitore íba re ekinare loizai buzát doiije. 33 Montor Isá fíri Nizor cárit tun or uzu saái Fitor ore jéjjerai hoór de, “Cóitan, Añr muúntu dur ó; kiyólla-hoilé tor díyan toh Allar gún or uzu no, bólke insán or gún or uzu.” 34 Hétunot íba ye Nizor cárit tun ore cóo manúc or dol ore matai hoór de, “Zodi honókiyo ttu Añr fisáli aitó monehoó, yóggwa ttu nizoré inkar gorífela foribó, aar nizor kúruc boói Añr fisáli dora foribó. 35 Kiyólla-hoilé zee niki nizor zan basaitó saá, yóggwa ye híyan háraifelaibo; montor zee niki Añr edde kúchóbor or wasté nizor zan háraifele, yóggwa ye híyan basaifelaibo. 36 Kii laf óibo, zodi honókiye tamám duniyai faa, montor nizor zan nan háraifele? 37 Insáne nizor zan or bodol kii dii faribó de asé? 38 Zee kiyé e zenákur edde gunágar manúc or bútoṙe Añré lói edde Añr hotá re lói córma, yóggwa

re lói Manúc or Fua yó cóрмаibo zeñtté Íba Nizor Baf or mohímaye pak firista ókkol ore fúañti looi aibó.”

9 Isá ye ítara re aró hoór de, “Añí tuáñra re sóiyi hoór, eřé endilla hodún manúc tíyaiye asé, zetará Allar rajjo taakote aáigiyo de nó dekite no moribó.” **2** Sów din baade Isá ye siríf Fitor ore, Yakub ore, edde Yohánna re looi, ítara re eggwá uñsol faár or uore loigiyé. Héře ítara muuntu Íbar súrot bodoligiyói. **3** Íbar hoor sossokat doijje edde fúut dóla óigiyo, eén zeén níki duniyair honó hoor dúwoya ye héndilla dóla gorí no fare. **4** Hétunot ítara hañse Eliyas edde Muúsa dahádiye, aar Isá llói hotá howát doijje. **5** Fitore zuwabe Isá re hoór de, “Rabbí, gom óiye añára eřé así. Añára eřé tin nán řambu řaki: ekkán Tuáñr lla, ekkán Muúsa lla, edde ar ekkán Eliyas olla.” **6** Ítara bicí řooraiyói ísafe, íba nize kii hoór nize no zane. **7** Hétunot ekkán miyúla aái ítara re sáifelaiye, aar hé miyúla ttu eggwá abas aiccé de, “Íbá óilde Añr adorda Fua, Íbár hotá fúno!” **8** Éhon ítara sairómikka saiyé rár, Isá re bade ar honókiyo re ítara fúañti nó deké. **9** Ítara faár or uottú lamer de októť Isá ye ítara re hókum goijjé de, ítara ziín deikké híin Manúc or Fua mora ttu zinda nó óiyo foijjonto honókiyo re no hoitó. **10** Ítara Íbar hókum híyan yaad raikké. Montor mora ttu zinda ówa hoiyé de híyan or maáni kii afós ot toskara gorát doijje. **11** Baade ítara Íba ttu fusár gorér de, “Alem ókkole kiyá endilla hoó, age nobi Eliyas aar zorur?” **12** Isá ye ítara re zuwabe hoór de, “Becók, age Eliyas aibó aar hárr kessú zendilla ówa foitto héndilla gorídibo. Aar toóu kiyá pak-kalam ot Manúc or Fuar baabute endilla asé, íba ttu bicí duk faa foribó edde íba re hékarot gorá zaybo? **13** Lekin Añí tuáñra re hoór, Eliyas aáigiyo, aar íba re ítara ttu zeén monehoiyé héen goijjé, zendilla íbar baabute leikká asé.” **14** Aar zeñtté ítara baki cárit tun or héře aiccé, ítara dekér de, tarár sairó řák ottu řoóñr ek dol manúc asé, aar hodún aleme tará llói barábari dér. **15** Dol říya ye Isá re deikké mottor bicí taajup óigiyo, aar íba re sólám gorí bolla duñri-duñri zaat doijje. **16** Íba ye ítara ttu fusár gorér de, “Tuáñra ítara llói kii barábari dór dé?” **17** Dol ottu ezzone íba re zuwab der de, “Ustat, añr fua wa re Tuáñr hañse ainní, ítare buk gorifele de jine faiyé. **18** Zeñtté ítare hé jine dóre, héñtte ítare meřit añsár mare. Tói ítara gal ottu féna aiyé aar íte date dat kirkira edde doró óizagoi. Añí Tuáñr cárit tun ore hé jin nwá neelaifélaito hoóilam,

montor ítara nó fare.” **19** Hétunot Isá ye zuwabe hoór de, “Ó iman sára nosól, Añí tuáñrar fúañti-fúañti aró hotókkal tákitam? Hotódin tuáñra re bordac goittám? Fua wa re Añr hañse anó.” **20** Tói ítara fua wa re Íbar hañse ainné. Jin nwá ye Íba re deki, fua wa re toratori dórforabat doijje. Tói fua wa meřit fori ikká-uikká goijjat doijje, aar gal ottu féna neelat accíl. **21** Isá ye fua war baf ottu fusár gorér de, “Íte hoñtté lóti endilla óiye?” Yóggwa ye hoór de, “Gura hale lóti. **22** Hóraf jin nwá ye itaré zane marifélai bolla egazá ooin ot edde fanít féla. Montor zodi Tuñí kessú gorí faille, feřfuri añára re modot goró.” **23** Isá ye yóggwa re hoór de, “‘Zodi gorí faille,’ hoó de híyan kii hotá? Zee niki biccác goré yóggwa lla hárr kessú ói fare.” **24** Éhon fua war bafe guzori hoór de, “Añí biccác gorí, añr biccác or komzuri řík gorído.” **25** Isá ye bici manúc ókkol duñri-duñri aái zoma ór de deki, hóraf jin nwá re dóoñk dí hoór de, “Héy náfang edde buk jin, Añí toré hókum gorír, itar ttu neeli aáizagoi, itar bútoře abar no gólic!” **26** Hétunot jin nwá guzoran mari, fua wa re bici dórforabai neeli aáigiyo. Fua wa murudar řóilla óigiyo de deki boóut zone hoór de, “Íte morigiyói.” **27** Montor Isá ye ítare át ot dóri tuillé, tói íte urí tíyaiye. **28** Zeñtté Isá gór ot aiccé, Íbar cárit tune Íba ttu aiddone fusár gorér de, “Yíba re añára kiyá neelai nó fari?” **29** Íba ye zuwab der de, “Dua sára ar honó kessú lói endilla gún neelai no fare.” **30** Baade ítara héntu rowana loi Galil báy zaar. Isá ttu híyan or baabute honókiyo re zainto dito mon nu accíl. **31** Kiyólla-hoilé íba ye cárit tun ore taalim dito de edde hoitó de, “Manúc or Fua re manúc ókkol or át ot gosáidiya zaybo; aar ítara íba re marifélaibo, montor íba tin din baade zinda óizayboi.” **32** Lekin ítara hotá híyan nó buzító, aar íba ttu fusár goitté yó řooraitó. **33** Tarfore ítara Kaparnahúm ot aiccé. Isá gór ot oiyé rár, cárit tun ottu fusár gorér de, “Tuáñra foñt ot kiyór baabute barábari díla dé?” **34** Montor ítara nizám mári táikkil, kiyólla-hoilé ítara foñt ot barábari díyl de, añárar bútoře ebbe řoóñr honnwá hoói. **35** Boói baade, Isá ye hé baró zon cárit tun ore matai hoór de, “Zar ttu age óito monehoó, yóggwa ttu beggún or fisé ówa foribó edde beggún or háadem bona foribó.” **36** Tarfore íba ye eggwá gura fua looi ítara maze tíyagaraiye, aar fua wa re hañdót félai looi ítara re hoór de, **37** “Zee kiyé endilla eggwá gura fua re Añr name kobul goré, yóggwa ye Añré kobul goré deh; aar zee kiyé Añré kobul goré, yóggwa ye Añré kobul goré

de no, bólke Añré diferáiyé de Íba re kobul goré deh.”
38 Yohánna ye Íba re hoór de, “Ustat, añára deikké de, eggwá maincé Tuáñr name bút neelar; yóggwa añárar ðaái or manúc no de hétolla, añára yóggwa re maná goijji.” **39** Lekin Isá ye hoór de, “Yóggwa re maná no goijjó, kiyólla-hoilé Añr name keramot dahái baade éhon Añr baabute hóraf hoói fare de honókiye náí.
40 Kiyólla-hoilé zee niki añárar ulða no, yóggwa toh añárar híkka. **41** Tuáñra Mosihr ummot de hétolla zee kiyé tuáñra re ek fiyala faní dee, Añí tuáñra re sóiyi hoóir, yóggwa ye hámaha nizor boccíc fai zaybo. **42** “Zee niki Añr uore iman ainné de e cóñro ókkol ottu honókiyo re guná gorába, ítar lla beétor óilde, ítar golat eggwá bór cíl or sakki bañdí doijjat félaidiya zah. **43** Zodi tuáñr áte tuáñre gunár uzu ðane, toooile híyan harífélo. Dui át táki zuzuk ot, yáni honódin no nifé de ooin ot zaar túaro, túñra ói zindigit góla tuáñr lla beétor, (Geenna g1067) **44** hé zuzuk ot, manúc haa de log no more aar ooin no nifé. **45** Zodi tuáñr ténge tuáñre gunár uzu ðane, toooile híyan harífélo. Dui téng táki zuzuk ot félaidiya zar túaro, leng ói zindigit góla tuáñr lla beétor, (Geenna g1067) **46** hé zuzuk ot, manúc haa de log no more aar ooin no nifé. **47** Aar zodi tuáñr suké tuáñre gunár uzu ðane, toooile yíba neelaifélo. Dui suk táki zuzuk ot félaidiya zar túaro, eggwá suk loi Allar raijot góla tuáñr lla beétor, (Geenna g1067) **48** hé zuzuk ot, ‘manúc haa de log no more aar ooin no nifé.’ **49** Fottí ekzon ore ooin loi pak-sáf gorá zaybo zendilla kurbani re nun loi pak-sáf gorá zah. **50** “Nun toh gom jiníc, montor zodi nun or dok zaagói, toooile híin ore keéngori abar nuncá gorá zaybo? Tuáñrar búture nun raikkó, aar ezzon loi ezzone cántit táikko.”

10 Baade Isá híyan ttu urí, Yohúdiya elaka félai Jordán hál or farkule giyyé. Manúc or dol Íbar hañse abar zoma óiye, aar Íba ye Nizor niyom mozin ítara re abar taalim diyat doijje. **2** Hodún Féroci aái Íba re entán gorí bolla súwal gorér de, “Morotfua ye nizor bou wóre sárifelaibar zayes asé né?” **3** Íba ye zuwabe ítara re hoór de, “Muúsa ye tuáñra re kii hókum díye?” **4** Ítara hoór de, “Muúsa ye de ekkán sárhabos lekí dí duñraidi bolla ezazot díyé.” **5** Montor Isá ye ítara re hoór de, “Tuáñrar dil doró de hétolla íba ye tuáñrar hañse héndilla hókum leikké deh. **6** Lekin foidayecir héñtte lóti Alla ye ítara re morot aar maya banaiyé. **7** ‘Híyan olla toh morotfua ye nizor bafmaa ttu zuda ói nizor bou wór fúañti tákibo, **8**

aar ítara duní zon ek jisím óizayboi.’ Hé ísafe, ítara ar dui no, bólke ek jisím. **9** Hétolla Alla ye zetará re zur goijjé, ítara re honó manúce síra no goróuk.” **10** Yárbaade ítara gór ot óiye rár, cárit tune híyan or baabute Íba ttu abar fusár goijjé. **11** Íba ye ítara re hoór de, “Zee kiyé nizor bou wóre sárifelai ar eggwá re biyá goré, íte nizor bou wór ulða zená gorér deh. **12** Aar ze mayafua ye nizor zamai re sárifelai ar ezzon biyá goré, híba ye zená gorér deh.” **13** Ek din manúc ókkole gura fuain dore Isár hañse anát doijje, zeéne Íba ye ítara re súwe; montor cárit tune manúc cún ore jéjjeraiye. **14** Montor Isá ye híyan deki bicí naras óiye, aar ítara re hoór de, “Fuain dore Añr hañse aitódo; ítara re no oóñillo, kiyólla-hoilé Allar raijjo toh ítarar dóilla maincé éna hásil goré. **15** Añí tuáñra re sóiyi hoóir, zee kiyé Allar raijjo re eggwá gura fuar dóilla góri kobul no goré, yóggwa híyan ot bilkúl góli no faribó.” **16** Baade Íba ye ítara re hañd ot félai loiyé, aar Íbar át ítarar uore dí ítara re borhot diyé. **17** Isá sofór ot zaito neeillé de óktót, ezzon manúc duñri aái Íbar muúntu aññúr tók dí fusár gorér de, “Gom Ustat, ofúrani zindigi miras faite añr ttu kii gorá foribó?” (aiōnios g166) **18** Isá ye yóggwa re hoór de, “Tuñí Añré gom kiyá ðakoór? Alla bade toh ar kiyé gom náí. **19** Tuñí de hókum ókkol zano, zendilla niki, ‘Kún no goríba, zená no goríba, suri no goríba, misá gobá no diba, férokbazi no goríba, bafmaa re izzot goríba.” **20** Manúc cwa ye Íba re hoór de, “Ustat, gurahale lóti añí híin beggún amól gorí-gorí aiyr.” **21** Isá ye yóggwar uzu saái, yóggwa re ador lagi hoór de, “Tuáñr ttu ekkán ham baki asé. Zoo, tuáñr ttu asé de híin beggún besi gorif ókkol ore diifélogoi, tói tuñí asman ot dón faiba; baade aái Añr fisáli óiyogai.” **22** Híyan fúni yóggwa bezar óigiyoi, edde ferecanir sáañte giyyégoi, kiyólla-hoilé yóggwa ttu becábici dón-cómbotti accíl. **23** Hétunot Isá ye sairómikka saái Nizor cárit tun ore hoór de, “Dón-doulot ola ókkol ottu Allar raijot gólite hotó mockil!” **24** Cárit tun Íbar hotáye ammúk óigiyoi. Montor Isá ye ítara re abar hoór de, “Ó fuain, Allar raijot gólite hotó mockil! **25** Tuangor manúc Allar raijot gólar túaro, eggwá uñt fúñc or faái ttu goli zaa aró aásan.” **26** Cárit tun aró bicí ammúk óigiyoi, aar ezzon ore ezzone hoór de, “Tooile hone nejat fai faribó?” **27** Isá ye ítarar uzu saái hoór de, “Híyan insáne gorí no fare, montor Alla ye fare; kiyólla-hoilé Alla ye toh hárr kessú gorí fare.” **28** Hétunot Fitore Íba re hoór de, “Soó, añára de hárr

kessú eridi Tuáñr fisáli óiyi.” 29 Isá ye hoór de, “Añí tuáñra re sóiyi hoóir, zee niki Añr wasté edde Allar kúchóbor or wasté gór, báiboináin, bafmaa, fuain, yáh zaga-zobin eridiyé, 30 yóggwa ye e zobanat ek cót gun bicí gór, báiboináin, maa, fuain edde zaga-zobin faibo, aar fúañti-fúañti zulúm óu faibo; aar aiyér de zobanat ofúrani zindigi faibo. (aïñ g165, aïñios g166) 31 Lekin boóut zon, zetará yala age asé, ítara fisé óizayboi; aar zetará yala fisé asé, ítara age óizayboi.” 32 Héñtte ítara uore Jerúsalem ot zaar de foñt ot accíl, aar Isá ítara age-age zaat accíl. Cárit tun ammúk óigiyoi, aar zetará Íbar fisé-fisé zaat accíl ítara ðooraiyói. Íba ye baró zon cárit tun ore abar ekkinare loizai, Íbar uore kii-kii óibo de híin ítara re howát doiije, 33 ki hoilé, “Soó, añára uore Jerúsalem ot zair, hére Manúc or Fua re ðoóñr imam ókkol or edde alem ókkol or hañse dóridiya zaybo; ítara Íba re moot or fótua díbo edde Beyohúdi ókkol or hañse gosáidibo. 34 Ítara Íba re ínca goríbo, sép maribó, coónk maribó, edde zane marifélaibo. Lekin tin din baade Íba zinda óizayboi.” 35 Yárbaade Zebedair fuain Yakub edde Yohánna Isár hañse aái hoór de, “Ustat, añára saái de añára Tuáñr ttu ziyán aros gorí, híyan Tuñí añára lla goró.” 36 Íba ye ítara ttu fusár gorér de, “Tuáñra kii soór de, Añí tuáñra lla kii goittám?” 37 Ítara Íba re hoór de, “Tuñí Tuáñr mohímat máze añára ezzon ore Tuáñr den dák ottu edde ar ezzon ore ban dák ottu buágaraiyo.” 38 Montor Isá ye ítara re hoór de, “Tuáñra kii magor híyan tuáñra no zano. Añí fiyúm de báptisma tuáñra loi faribá né? Yáto Añí loiyum de báptisma tuáñra loi faribá né?” 39 Ítara hoór de, “Añára fariyúm.” Isá ye ítara re hoór de, “Becók, ze fiyala Añí fiyúm, yíba tuáñra fiíba; aar ze báptisma Añí loiyum, yíba tuáñra loiba. 40 Montor Añr den dák ottu yáh ban dák ottu honókiyo re buágaron Añr ham no. Zaga híin óilde uitará lla zetará lla toiyar gorí raká gíyeh.” 41 Baki doc zon cárit tune híyan fúni, Yakub edde Yohánna llói guccá óigiyoi. 42 Montor Isá ye ítara re Nizor hañse matai hoór de, “Tuáñra toh zano, zetará re Beyohúdi ókkol or hókumot-goróya ísafe zana zah, ítara tarár uore raastri goré; aar tarár ðoóñr sóddar ókkole tarár uore adíkar sola. 43 Montor tuáñrar bútoe héndilla ón tík no, bólke tuáñra ttu zee niki ðoóñr óito saá, ítar ttu tuáñrar háadem bonar zorur; 44 aar tuáñra ttu zee niki age óito saá, ítar ttu beggún or gulam bonar zorur. 45 Kiyólla-hoilé Manúc or Fua yó toh hédmot faito aiccé de no, bólke aiccé de hédmot goittó, edde

boóut zon or bodol Nizor zan dito.” 46 Yárbaade ítara Jerikó cóor ot aiccé. Zeñtté Isá Nizor cárit tun lói edde ðoóñr ek dol manúc lói Jerikó ttu neeler, hé óktót Timáiyus or fua Bartimai nam or ezzon añdá manúc rastar hañsat boói hórat mager de accíl. 47 Yóggwa ye Íba Isá Nasári de híyan fúinne rár, endilla guzorat doiije, “Ó Dawud or Fua Isá, añr uore rahám goró!” 48 Boóut zone yóggwa re jéjjeñr nizám óito hoiyé, montor yóggwa ye aró ðoóñr góri guzori hoór de, “Ó Dawud or Fua, añr uore rahám goró!” 49 Hétunot Isá tíyaiyoi aar hoór de, “Yóggwa re eñe aító hoó.” Tói ítara añdá manúc cwa re ðahai hoór de, “Hímmot goró, uró. Íba ye tuáñre matar.” 50 Hétunot yóggwa ye nizor gaar saddor ekkinare félai, fál dí urí Isár hañse aiccé. 51 Aar Isá ye yóggwa ttu fusár gorér de, “Tuñí kii soó, Añí tuáñr lla kii goittám?” Añdá manúc cwa ye Íba re hoór de, “Ó Rabbí, añár ttu abar deki faitto monehoór.” 52 Isá ye yóggwa re hoór de, “Zoo, tuáñr imane tuáñre gom goijjé.” Yóggwa éhon deki faijíl, aar rasta ttu Isár fisáli doiije.

11 Zeñtté ítara Jerúsalem or ðáke Zaitun Faár ot asé de Betfégi edde Betániya farat foónicce, Isá ye Nizor dui zon cárit ore diferáye, 2 ítara re endilla hoói, “Tuáñra muúm or fara gán ot zoo, hére góli mottor eggwá gadár sóo baidá loot faiba, zibár uore aijjó honókiye nó soré. Yíba re kúli eñe anógoi. 3 Zodi honókiye tuáñra re eén hoó, ‘Tuáñra yían kiyólla gorór?’ Hoibá de, ‘Malik ottu yibá re lager.’ Tói yóggwa ye yíba re éhon eñe diferáidibo.” 4 Ítara rowana loiyé, aar gadár sóo wa re baárkule rastar uore gór or dorozat baidá loot faiyé; ítara yíba re kúlifelaiye. 5 Montor hére tíyai accíl de tará ttu hodúne ítara re hoiyé de, “Tuáñra kii gorór deh, gadár sóo wa re kúlur de níki?” 6 Isá ye ítara re zendilla hoító hoóil, ítara tará re héndilla hoiyé, tói tará ítara re ezazot diyé. 7 Ítara gadár sóo wa re Isár hañse ainné, aar yíbar uore nizor hoor ókkol bicáidiye, aar Isá yíbar uore boiccé. 8 Bicí maincé nizor hoor ókkol rastar uore bicáidiye, argúne bariza ttu fatar ðaggwa ókkol harí bicáidiye. 9 Zetará age-age edde fisé-fisé zaat accíl, ítara guzori-guzori hoór de, “Hósana! “Mubarek Ubá zibá Mabud or name aiyér. 10 “Mubarek añárar baf Dawud or raijjo ziyán aiyér. “Ebbe uore asman ot Allar taaríf óuk!” 11 Isá Jerúsalem ot góli baade, baitul-mukaddos or urán ot giiyé; aar sairómikka beggún saái yore, hánzinna óigiyoi de ísafe baró zon cárit tun ore fúañti looi

Betáníyat giyyégoi. **12** Tarfor din, zeñtté ítara Betániya ttu bacá lóiyé, Isá ttu búk laiggé. **13** Íba ye dur ottu tái fata furaiya eggwá ñuñir-gas deki, yíbat gula asé né saító giyyé; montor Íba gas swár íñyot aiccé rár, fata bade ar kessú loot nó faa, kiyólla-hoilé héñtte ñuñir gula dóríbar moósum no. **14** Hétunot Íba ye gas swá re hoór de, “Ar honódin tor ttu honókiye gula hái no farouk.” Íbar cárít tune hotá híyan fúinnil. (aiñ g165) **15** Baade ítara Jerúsalem ot foónicce. Isá baitul-mukaddos or urán ot góli, zetará hére besa kina gorér ítara re loraidiyat doijje, aar baṭṭa bāṅgoyar ṭebíl edde hoitor besoyar boiróni ókkol natḍiyagarai diyé. **16** Íba ye Baitul-mukaddos or urán báy honókiyo re malsáman loizaitó nó deh. **17** Íba ye taalim ot ítara re hoór de, “Pak-kalam ot ki yíán náí, ‘Añr gór ore tamám koun ókkol olla munazat or gór howá zaybo”? Montor tuáñra toh híyan ore ḍahañit or aḍḍa-hána banaifélaioy.” **18** Ḍoóñr imam ókkole edde alem ókkole híyan fúni Íba re marifélaibar mouka tuwat accíl. Ítara Íba re ḍooraitó, kiyólla-hoilé manúc beggún Íbar taalime ammúk óizaytoi. **19** Aar zeñtté hánzinna óiye, Isá edde Íbar cárít tun cóor or baáre giyyégoi. **20** Biñna ítara héntu zaar de októṭ, ñuñir-gas swá cíníyor ottu lóti fúaiyai de deikké. **21** Fitor ottu monot urí Íba re hoór de, “Rabbí, soó, Tuñí boddua diíla de ñuñir-gas swá fúaiyai.” **22** Isá ye ítara re zuwabe hoór de, “Allar uore iman rakó. **23** Añí tuáñra re sóiyi hoóir, zee kiyé e faár gwá re eén hoó, ‘Urí doijjat forgói,’ aar nizor dil ot honó cók no raké bólke ziyán hoiyé híyan óibo de biccác goré, tooile yóggwa lla híyan óibo. **24** Hétolla, Añí tuáñra re hoóir, tuáñra duat mazé ziín mago, híin faifelaioy bóuli biccác goijjó, tói tuáñra re híin diiya zaybo. **25** Zeñtté tuáñra tíyai dua goró, héñtte honókiyor ulḍa kessú tákile yóggwa re maf gorídiyo, zeéne tuáñrar asmani Bafe yó tuáñra re tuáñrar hosúri maf gorí deh. **26** Montor zodi maf no goró, tooile tuáñrar asmani Bafe yó tuáñrar hosúri maf no goríbo.” **27** Ítara abar Jerúsalem ot aiccé. Isá baitul-mukaddos ot gúraḥra gorér de októṭ, ḍoóñr imam ókkol, alem ókkol, edde murubbi ókkol Íbar hañse aiccé, **28** aar Íba re hoór de, “Tuñí ham iín kii adíkare gorór? Iín gorí bolla Tuáñre e adíkar hone diiyé?” **29** Isá ye ítara re zuwabe hoór de, “Añí yó tuáñra ttu ekkán súwal fusár goríyüm, Añré zuwab diyo, baade Añí tuáñra re hoiyüm Añí iín kii adíkare gorír deh. **30** Añré zuwab do sái, Yaháya ye bápṭisma díbar adíkar faáil de asman ottu né náki insán ottu?”

31 Baade ítara afós ot biyasana gorér de, “Zodi añára hoói, ‘asman ottu,’ Íba ye hoibó de, ‘Tóoile tuáñra Íba re biccác kiyá nó goró?” **32** Montor zodi hoói, ‘insán ottu’ tooile?” Ítara maincóre ḍooraitó, kiyólla-hoilé beggúne Yaháya nobi de mainto. **33** Hétolla ítara Isá re zuwabe hoór de, “Añára no zani.” Isá ye ítara re hoór de, “Tóoile Añí yó tuáñra re no hoiyüm Añí iín kii adíkare gorír.”

12 Isá ye ítara re meésal ókkol dí hotá howát doijje, “Ezzon maincé ekkán anggur-bariza lagaiyé. Yóggwa ye híyan or sairó ḍák ottu gíra díye, anggur or roc neelai bolla eggwá gañrá kuijje, edde ekkán ṭongki baindé. Baade bariza gán cacá ókkol ore ṭeka dí oinno mulluk ot giyyói. **2** Aar anggur or ainda aiccé rár, yóggwa ye eggwá goóur ore cacá gún or hañse diḥéraiye, cacá ítara ttu barizar gular bák fai bolla. **3** Lekin ítara taré dóri, mara-dóra gorí háli áte duñraidiyé. **4** Yóggwa ye abar ítarar hañse ar eggwá goóur diḥéraiye, ítara taré matá sái mari bicí beizzoti goijje. **5** Yóggwa ye aró éggwa diḥéraiye; ítara taré zane marifélaie. Héñdilla, ítara aró boóut twa re goijje, hodún ore mara-dóra goijje, hodún ore zane marifélaie. **6** “Yala yóggwa ttu siríf ar ezzon diḥélaibar asé deh, íba óilde yóggwar adorja fua. Ahérit yóggwa ye nizorgá nize eén hoói fua wa re diḥéraiye, ‘ítara añr fua re izzot goríbo.’ **7** “Lekin cacá gúne afós ot hoór de, ‘Ite toh mirasdár; aiyó itaré marifélaí, baade miras añárar óizayboi.’ **8** Tói ítara íba re dóri marifélaie, aar barizar baáre félaide. **9** “Barizar giróse ítara re kii goríbo fáñllar? Yóggwa ye aái hé cacá gún ore marifélaibo, aar bariza gán oinno kiyó re diifélaibo. **10** Tuáñra pak-kalam ot yíán úddwa nó foró niki, ‘Ze fattór mistíri ye inkar gorífelaiye, yíba cíl beggún or túaro bicí zoruri wa óigiyoi. **11** Híyan Mabud or torfóttu óiaicce, aar híyan añárar suk ot taajuippa?” **12** Hétunot ítara Íba re dórifelai bolla kucíc goijjíl, kiyólla-hoilé ítara buzígíyoi de ki Isá ye hé meésal lan ítarar hélaf hoiyé deh. Montor ítara maincóre ḍoore Íba re eri giílgoi. **13** Fore ítara hodún Féroci edde Hérudiól ore Isár hañse diḥéraiye, zeéne tará Íba re Íbar hotá loi hol ot félaí fare. **14** Tará aái Íba re hoór de, “Ustat, añára zani de, Tuñí sóiyi hoó. Tuñí maincé kii hoór forba no goró, kiyólla-hoilé Tuñí toh honókiyo re forók goró de náí, bólke sóiyigori Allar rastar taalim doh. Añára re hoósai, Romi baáñcca re házana doon zayes asé ne náí? **15** Añára diitam ne

náki no diitam?” Montor Íba ye tarár munaféki re zani hoór de, “Tuáñra Añre entán gorór kiyá? Sai bolla Añr hañse ekkán dinár anó.” 16 Tói tará ainné. Íba ye tará re hoór de, “Yián har sóbi edde har nam?” Tará Íba re hoór de, “Romi baáñccar.” 17 Tói Isá ye tará re hoór de, “Ziín baáñccar híin baáñcca re diiyo, aar ziín Allar híin Alla re diiyo.” Híyane tará ebbe taajup óigiyoi. 18 Baade Sadukái ókkol Isár hañse aiccé, Sadukái ókkole hañcor náí hoó, ítara aái Íba re ekkán súwal goijjé de, 19 “Ustat, Muúsa ye añára lla leikké de, zodi honókiyor báí fuain sára morizagói aar ítar bou táizagoi, tooile ítar hé báí ottu bou híba re biyá gorífelai nizor báí olla nosól foida gorá foribó. 20 Dóro, háñt zon báí accíl. Foóila wa ye bou looi, fuain sára morigiyói. 21 Baade híba re dusára wa ye biyá goijjé, aar íte yó fuain sára morigiyói; tisára war hálot óu héndilla óiye. 22 Héndilla, háñto báí ye híba re biyá gorí fuain sára morigiyói. Ahérit, mayafua wa yó morigiyói. 23 Hé ísafe, hañcor or hale híba har bou óibo? Kiyólla-hoilé híba re toh háñto zone nizor bou banaáil.” 24 Isá ye ítara re hoór de, “Tuáñra etollá éna gollot ot asó deh! Tuáñra toh no Allar pak-kalam zano, aar no Allar kudurut zano. 25 Kiyólla-hoilé zeñtté ítara mora ttu zinda óibo, héñtte ítara no biyá goríbo aar no ítara re biyá diya zaybo, bólke ítara asman or fíristar dóilla beh óibo. 26 Mora ókkol zinda ówar baabute hoitó sailé, tuáñra kí Muúsar kitab ot zeré niki zoler de záđđwar zikír asé hére nó foró, Alla ye Muúsa re endilla hoiyé de, ‘Añí óilam de Ibrahim or Alla, Isahák or Alla, edde Yakub or Alla?’ 27 Alla toh mora ókkol or Alla no, bólke zinda ókkol or éna. Tuáñra ttu doónr gollot óiye.” 28 Ekzon alem aái ítara barábari dér de fúinne, aar Isá ye ítara re ṭík zuwab diyé de zani Íba re súwal gorér de, “Beggún or túaro hókum hon nán doónr?” 29 Isá ye zuwab der de, “Ebbe doónr gán óilde, ‘Fúno, ó Isráil! Mabud añárar Alla óilde ekgwá Mabud. 30 Mabud tuáñrar Alla re nizor fura dile, fura zane, fura demake, edde fura bole muhábbot goríba.’ 31 Dui nombór or gán óilde, ‘Nizor atehañsór maincóre nizor dóilla muhábbot goríba.’ Hé duníyan or túaro ar doónr hókum náí.” 32 Alem mwa ye Íba re hoór de, “Cabác, Ustat! Tuñí sóiyi hoiyó, Alla ekgwá beh asé, Íba bade ar honókiye náí. 33 Íba re fura dile, fura buddíye, fura bole muhábbot goittó, aar nizor atehañsór maincóre nizor dóilla muhábbot goittó. Hókum hé duníyan, fura kurbani edde oinno kurbani beggún or túaro zoruri.” 34 Isá ye zettót yóggwa ye

buddír sáañte zuwab diyé de deikké, Íba ye yóggwa re hoór de, “Tuñí Allar raijjo ttu duré no.” Héñtte lóti honókiyo ttu Íba re ar súwal goittó hímmote nó deh. 35 Isá ye baitul-mukaddos ot taalim der de októtt hoór de, “Alem ókkole keéngori hoó de Mosih Dawud or Fua? 36 Kiyólla-hoilé Dawud nize toh Pak-Ruhr hédaiyote endilla hoiyé, ‘Mabude añr Malik ore hoór de, ‘Añr den dák ottu boiyó, zetókkal foijjonto Añí Tuáñr duccon ókkol ore Tuáñr foor tole gorí nó felai.’” 37 Dawud nize toh Íba re ‘Malik’ ðaikké, tooile Íba hon bote Dawud or fua de?” Becábici maincé kúcir sáañte Íbar boiyan fúnat accíl. 38 Isá ye Nizor taalim ot hoór de, “Alem ókkol ottu úñciyar táikko, zetará lamba-lamba kuruta fiñdí gúrafira goittó saá, aar bazare-bazare sólam faito, 39 mujílíc-hána ókkol ot uñsol tokkar hadírat boitó edde mela-cóba ókkol ot barík zagat boitó fosón goré. 40 Ek mikká ttu ítara rari ókkol or gór ókkol luṭ gorífele, arek mikká ttu maincóre dahái bolla lamba-lamba dua goré. Manúc híne sáñza bicí doónr faibo.” 41 Baade Isá baitul-mukaddos or dan-baccúr muúntu boiccé, aar dan-baccút maincé ṭiañ-foicá hondilla deer saái táikke. Boóut tuangor ókkole bicí-bicí diiyat accíl. 42 Eggwá gorif rari aái duiyán cónro foicá diiyé, yáni hoek fiyá. 43 Hétunot Íba ye Nizor cárít tun ore matai hoór de, “Añí tuáñra re sóiyi hoóir, zedúne dan-baccút sótká diiyé ítara beggún or túaro e gorif rari wa ye bicí diiyé; 44 kiyólla-hoilé oinno beggúne ítarar aṭalikka dón ottu diiyé deh, montor ibáh ye toh nizor gorif hálot ot basi táki bolla ziín accíl híin beggún diífélaiye.”

13 Isá baitul-mukaddos ottu baáre zaargói de októtt, Íbar ézzon cáríte hoór de, “Ustat, soó, keén cúndor-cúndor fattór edde keén cúndor-cúndor billíng!” 2 Isá ye Íba re hoór de, “Tui e doónr-doónr billíng iín dekór de né? Eṛé eggwá fattór or uore ar eggwá fattór no tákibo, híin fottí ekgwá re félaidiya zaybo.” 3 Aar Isá baitul-mukaddos or muúm or Zaitun Faár ot boirá accíl de októtt, Fitor, Yakub, Yohánna edde Enderiyase aiddone Íba ttu fusár gorér de, 4 “Añára re hoóna, híin hoñtté óibo dé? Híin beggún fura óibar októ aiccé de híyan or alamot kii óibo?” 5 Isá ye ítara re zuwabe howát doijje de, “Saiyó, honókiye zen tuáñra re gollot ot no loiza. 6 Boóut zone Añr name aái hoibó de, ‘Añí Íba,’ ítara boóut zon ore gollot ot loizaybói. 7 Zeñtté tuáñra laráir abas edde laráir hóbora-hóbori ókkol fúniba, no dooriayó;

kiyólla-hoilé híin ówar zorur, montor híyala yó ahérot óibo de no. **8** Ek koume arek koum or ulða edde ek rajjo ye arek rajjor ulða týaiþo; zaga-zaga búsal ókkol edde raṭ ókkol óibo. Montor híin óilde siríf, fua hálas óibar cúrrur duk ókkol or ḍóilla. **9** “Lekin tuáñra úñciyar táikko; kiyólla-hoilé maincé tuáñra re adalot ot gosáidibo, aar tuáñra re mujilíc-hánat bet mara zaybo. Añr lla bóuli tuáñra re hákim edde baáñcca ókkol or muúntu házir gorá zaybo, zeéne tuáñra ítarar hañse Añr gobá dí faro. **10** Age tamám koum ókkol or hañse Allar kúchóbor tobolik gorá zar zorur. **11** Zeñtté maincé tuáñra re dóri bisar ot tulíbo, héñtte kii hoibá age lóti sinta no goijjó, bólke hé októ tuáñra re zín diiya zaybo híin hoijó; kiyólla-hoilé hoóiya toh tuáñra no, bólke Pak-Ruh éna. **12** “Bái ye bái ore aar bafe fua re marifélai bolla dóridibo. Fuain de nizor bafmaar hélaf týai ítara re mariféla báibo. **13** Añr nam olla bóuli tuáñra re beggúne nafórot goríbo; montor zee niki ahéri foijjonto bordac goríbo, yóggwa ye nejat faibo. **14** “Tuáñra hé bicí hótara jiníc ziyáne nafak goréhíyan ore no tákon accíl de zagat zeñtté týaiya dekába—foróya ye buzó—héñtte zetará Yohúdiyat tákiba ítara ttu faár ot dáizagoi foribó. **15** Zee niki gór or sád or uore asé, ítar ttu lamat no lama foribó, nizor gór ttu kessú looi bolla bútoe no zaa foribó. **16** Zee niki kítit asé, ítar ttu nizor saddor looi bolla waafes nu aá foribó. **17** Montor hé din ókkol ot hámil mayafuain dor lla edde dud or maa ókkol olla bicí afsús or hálot óibo. **18** Dua goró, zeéne híin cítkhale no. **19** Kiyólla-hoilé din híin eén mosibot or din óibo, zendilla Alla ye duniyai foida goijjé de héñtte lóti aijjó óiye de náí, aar abar no yó óibo. **20** “Zodi Mabude hé din ókkol homai no dito, tooile honókiye no basitó; montor íbar basíloiya bonda ókkol olla bouli íba ye din híin homaidiyé. **21** Héñtte zodi honókiye tuáñra re eén hoó, ‘Soó, Mosih eré asé!’ yáto ‘Soó, íba uré asé!’ híyan ekin no goijjó. **22** Kiyólla-hoilé misá Mosih ókkol edde misá nobi ókkol uríbo, aar ítara keramot ókkol edde taajuippa harhána ókkol daháibo, maincóre gollot ot loizai bolla, farilé Allar basíloiya bonda re úddwa. **23** Lekin tuáñra úñciyar táikko; Añí toh tuáñra re hárr kessú age lóti hoóidiyi. **24** “Montor din híin ot, hé mosibot baade, beil andár óizayboi, aar sane foór no dibo; **25** asman ottu tara ókkol forizaybói, aar asmani jiníc ókkol tóttoraibo. **26** “Héñtte ítara dekába de, Manúc or Fua ḍoóñr kudurut edde mohímar sáañte miyúlar bútoe góri aiyér. **27**

Aar íba ye fírista ókkol ore duniyair ek matá ttu arek matá foijjonto difeṛái, sairómikka ttu Nizor basíloiya bonda ókkol ore ekkán ot zoma goríbo. **28** “Ḍuñir-gas ottu meésal loo: zeñtté ḍuñir-gas or ḍéela hórot ói fata neele, tuáñra zanizogói de, hóran ḍáke. **29** Héndilla tuáñra yó, zeñtté iín ór de dekába, héñtte buzíba de, Manúc or Fua ḍáke, ebbe dorozat. **30** Añí tuáñra re sóiyi hoóir, iín beggún fura nó óiyo foijjonto e nosól bilkúl no fúraibo. **31** Asman zobin toh zari no tákibo, montor Añr hotá hámica zari tákibo. **32** “Lekin hé din yáto októ aibár baabute honókiye no zane, asman or fírista ókkole yó no zane, aar Fua ye yó no zane, siríf Bafe beh zane. **33** Hóboroddar, seton táko edde dua goró; kiyólla-hoilé tuáñra toh no zano hé októ hoñtté aibó. **34** Hé októ yíba ezzon duré sofór ot zaar de manúc or ḍóilla, zee niki nizor gór eri zaite goóur ókkol or át ot zimma ókkol dii giijyé, yáni zarzar ham taré-taré diijyé, aar duwar soonídar ore yó seton tákito hókum díye. **35** “Hétolla hoóir, seton táko, kiyólla-hoilé tuáñra toh no zano, gór or girós hotúnót aibó—ki háñzinna, ki adá raitta, ki fuáñitta, aar náki bíinna. **36** Arnóile yóggwa asimbit ailé tuáñra re gúm ot loot faibo. **37** Añí tuáñra re ziyán hoóir, híyan beggún ore hoóir de, ‘Seton táko!’”

14 Azadir-id edde Cúṭar-sára Ruṭir-id aité dui din asé. Aar ḍoóñr imam ókkole edde alem ókkole Isá re kii bote zuitégori dórifelai marifélai faribó de híyan or talac ot accíl. **2** Montor ítara hoór de, “Id or októ no, manúc or bútoe úrussul óitofare.” **3** Isá Betáníyat kurus biyaraimma Sáimon or gór ot tákite, íba ye hána háar de héñtte, hére eggwá mayafua ye fúañti fattór or háñrit góri háti narḍ-gas or bicí moóngga añtor looi aiccé. Baade híba ye háñri wa báñgi añtor gún Isár matát ḍálidiye. **4** Montor hodún ottu gom no lagi afós ot howáhoi gorér de, “E añtor gún kiyá borbád difélaiye? **5** E añtor gún de tin cót dinár or túaro bicí dí besi tiañ gún gorif ókkol ore diifélai faitto.” Héndilla hoóí ítara híba re bótḥoráiyé. **6** Montor Isá ye hoór de, “Íbáh re goittó doh; tuáñra íbáh re ferecan kiyá gorór? Íbáh ye Añr bálai éna goijjé. **7** Gorib ókkol toh tuáñrar fúañti nitti asé, tuáñra ttu zetúnót monehoó hétunót ítarar bálai gorí faribá; montor Añré tuáñra nitti no faiba. **8** Íbáh ye ziyán faijjé híyan éna goijjé. Íbáh ye Añr dohón olla Añr gaat age lóti añtor ḍálidiye deh. **9** Hétolla Añí tuáñra re sóiyi hoóir, fura duniyait zeṛé-zeṛé

kúchóbor tobolik gorá zaybo, e mayafua wa ye ziyán gojiyé híyan ore yó ibáhr yadgari ísafe hére-hére howá zaybo.” 10 Baade Yohúdah Iskáriyet, zee accíl baró zon cárit tun ottu ezzon, íte doóñr imam ókkol or hañse giyyé, Isá re ítarar át ot dóridi fare fán. 11 Híyan fúni ítara kúci óiye, aar ítare òiañ díibo bouli waada diyé. Tarfore íte Isá re dóridi bolla moukar talac ot accíl. 12 Cútar-sára Ruñir-id or foóila din ot, ze din Azadir-id or hána lla bérasóol or sóo kurbani goré, Isár cárit tune íba ttu fusár gorér de, “Tuáñr ttu hondilla monehoór, Tuñí hái faro fán añaara hoře zai Tuáñr lla Azadir-id or hánar toiyari goittám?” 13 Íba ye Nizor dui zon cárit ore endilla hoói diferáíye, “Tuáñra cóor ot zoo; zok ot gori faní loizar de ézzon manúce tuáñra llói milibó; íbar fisé-fisé zaiyo. 14 Íba ze gór ot góle hé gór gan or girós ore hoibá de, ‘Ustate hoór de, “Añr meéman-hána hoře, ziyán ot Añí Añr cárit tun or fúañti Azadir-id or hána hái faijjum?” 15 Hétunot yóggwa ye tuáñra re háñzaíya edde toiyar goijjá ekkán uoror òalar doóñr kamára daháibo. Hére añaara lla toiyar goijjó.” 16 Tói cárit tun zai cóor ot góille, aar Isá ye ítara re zendilla hoíyé héndilla faiyé; baade ítara Azadir-id or hána toiyar goijyé. 17 Zeñtté háñz óiye, Isá baró zon cárit tun ore fúañti looi hére aiccé. 18 Ítara boói hána háar de októ, Isá ye hoór de, “Añí tuáñra re sóiyi hoóir, tuáñra ttu ezzone Añré dóridibo; íte Añr fúañti hána háar.” 19 Hétunot ítara ferecan ói zonfoti íba ttu fusár gorér de, “Íte añí no de no né?” 20 Íba ye ítara re zuwabe hoór de, “Íte baró zon nun ottu ezzon, íte Añr fúañti hoddát ruñi burar. 21 Manúc or Fua toh íbar baabute zendilla leikká asé héndilla éna zaar; montor afsús manúc uitar uore, zar duara Manúc or Fua dóra háibo. Manúc íte toh zormo no óito bóuli ítar lla gom accíl.” 22 Ítara háar de októ, Isá ye ruñi looi Alla re cúkuriya goijjíl, aar báñgi cárit tun ore dii hoór de, “Loo, yíán Añr gaa.” 23 Tarfore Íba ye fiyala looi Alla re cúkuriya gorí ítara re diiyé, baade ítara beggúne héntu háíye. 24 Íba ye ítara re hoór de, “Íín óilde noya razinama lla Añr lou, zíín ore boóut kiyór lla dálidiyum. 25 Añí tuáñra re sóiyi hoóir, Añí e anggur or roc íín abar na háíyum, otódin zetódin foijjonto tuáñrar fúañti Allar raijot noya gori ná hái.” 26 Yárbaade ítara eggwá seér gaái, Zaitun Faár ot giyyé. 27 Tarfore Isá ye ítara re hoór de, “Tuáñra beggún or dil ot cóok aibó aar dáibagoi, kiyólla-hoilé pak-kalam ot toh endilla asé, “Añí sóol soroya re marifélaíyum, tói sóol ókkol cínṛaciñṭṭá óizayboi.” 28 Montor Añré zinda

gorá zay baade, Añí tuáñrar age Galil ot zaiyum.” 29 Fitore íba re hoór de, “Beggúne iman ottu zailé yo, añí no zaiyum.” 30 Isá ye íba re hoór de, “Añí toré sóiyi hoóir, aijja raitta ratakurá duibar bak dibar age, tui nize Añré tin bar inkar goríbi.” 31 Lekin Fitore aró zure hoór de, “Zodi añr ttu Tuáñr fúañti mora fore yó, añí Tuáñre inkar no goijjúm.” Héndilla ítara beggúne hoíyé. 32 Yárbaade ítara ekkán zagat aiccé, ziyán ore Getsámani hoó. Isá ye Nizor cárit tun ore hoór de, “Añí zetún dua goijjúm hétun íñyót boói táko.” 33 Íba ye fúañti Fitor ore, Yakub ore edde Yohánna re loigiyé, aar hére íba ttu ocánti edde bicí ferecani lagat doijje. 34 Íba ye ítara re hoór de, “Bicí ocántiye Añr foran neelizaytóí sár. Tuáñra íñyót táki seton táko.” 35 Baade Íba héntu ekkágori muúmmikka zai, meñit fori dua gorát doijje de, zodi farilé hé dukkór októ re íba ttu dur gorífelaito. 36 Íba ye hoór de, “Ó Abba, ó Baf, Tuñí hárr kessú gorí faro. E duk-mosibot or fiyala yibá Añr ttu dur gorífelo; montor toóu Añr moncá mozin no, bóлке Tuáñr moncá mozin óuk.” 37 Baade íba aái ítara re gúm ot loot faiyé, aar Fitor ore hoór de, “Sáimon, tui gúm ot níki? Tui ek gónḡa úddwa seton táki no faroór dé? 38 Seton táko aar dua goró, zeéne entán ot no foro; Bécok ruh ttu monehoór, montor jisím komzur deh.” 39 Íba abar zai ekí dóilla hotá hoói dua goijyé. 40 Íba waafes aái, ítara re abar gúm ot loot faiyé, kiyólla-hoilé ítarar suk gúme bór óigilgoi; aar ítara íba re kii zuwab díibo hoi no fare. 41 Íba tisárabar aái yore ítara re hoór de, “Tuáñra aijjó úddwa gúm ot edde aram gorát asó de? Óiye, októ foóñiccegai. Soó, Manúc or Fua re gunágar ókkol or át ot dóridiya zaybo. 42 Uró, zaigói. Soó, Añré dóridoya dáke foóñiccegai.” 43 Íba ye híín hoór de októ, éhon Yohúdah foóñiccegai, zee niki baró zon nún ottu ezzon. Ítar fúañti ek dol manúc toluwar edde larí-cúra looi aiccé, zetará re diferáíye de óilde doóñr imam ókkole, alem ókkole, edde murubbi ókkole. 44 Zee niki íba re dórider, íte tará re endilla hoói ekkán nicán dífl, “Añí zibá re appá diyum, manúc íba. Íba re gereftar gorífelaiyo aar soikkal di loizaiyogói.” 45 Yohúdah aái mottor íbar íñyot giyyé, aar “Rabbí!” hoói íba re appá díye. 46 Baade éhon tará íba re dóri gereftar gorífelaiye. 47 Montor dáke tíyai accíl de ítara ttu ezzone nizor toluwar neelaiye, aar híyan solai boro imam or gulam or han hañfélaiye. 48 Isá ye tará re hoór de, “Tuáñra ðahañit dóitto aiccó fángori toluwar edde larí-cúra lói Añré dóitto aiccó de? 49 Añí

toh fottí din baitul-mukaddos ot tuáñrar fúañti táki taalim ditam, aar héñtte de Añré gereftar nó goró. Montor iín etollá óiye, zeéne pak-kalam or hotá fura óizagol.” 50 Hétunot carít beggúne íba re eri dáigiyoí. 51 Ezzon juwan manúc íbar fisé-fisé zaat accíl, yóggwa ye nizor biyossor gaat kessú nó fiñdé, ekkán saddor beraiyé deh. Tará yóggwa re dóitto saiyé, 52 montor yóggwa ye saddor gán félai biyossor duñrdiyé. 53 Tarfore tará Isá re boro imam or hañse loigiyói, aar tamám ðoóñr imam, murubbi edde alem ókkol zoma óiye. 54 Fitor duré-duré tái íbar fisé-fisé boro imam or urán or bútoe foiijjonto giyyé, aar faáradar ókkol or fúañti boói ooin fuwát accíl. 55 Ðoóñr imam ókkole edde fótuayi-mujilíc tíya ye Isár ulða gobár talac ot accíl, íba re marifélai fare fán; montor honó gobá nó faa. 56 Becók boóut zone íbar ulða misá gobá díyl, montor ítarar gobá mil ná há. 57 Fore hodúne urí íbar baabute endilla misá gobá díye, 58 “Añára Ibá ye eén hoiyé de fúinni, ‘Añí át or banaiya baitul-mukaddos yían bāñgifelai, tin din or bútoe ar ekkán banaidiyum, ziyán át or banaiya no óibo.’” 59 Lekin ebar óu ítarar gobá mil ná há. 60 Hétunot boro imame urí muúntu tíyai Isá ttu fusár gorér de, “Tuñí honó zuwab no diba? Manúc itará Tuáñr ulða iín kii gobá der?” 61 Montor íba nizám mári táikkil, aar honó zuwab nó deh. Boro imame abar fusár gorér de, “Tuñí kí Taarífdár Allar Fua Mosih?” 62 Isá ye hoór de, “Ói Añí. Tuáñra dekiíba, Manúc or Fua Alla Tálar den ðák ottu boirá asé edde asman or miyúlat góri aiyé.” 63 Boro imame nizor gair or hoor fári hoór de, “Añára ttu ar kii gobá lager dé? 64 Tuáñra toh íbár kuféri fúinno; tuáñrar rai kii?” Ítara beggúne íba moot or laayek bouli fótua díye. 65 Tarfore hodúne íba re sép marat doiije, aar íba re suk bandi gúca mari hoór de, “Hone maijjé antas gor sái!” Baade faáradar ókkole íba re loizai suwar maijjíl. 66 Fitor nise urán ot accíl de októ, boro imam or bañdi mayafuain ókkol ottu ezzon hére aiccé. 67 Aar Fitor ooin fuwár de deki, íbar uzu saái hoór de, “Tuñí yó toh Nasári Isár fúañti accíla.” 68 Montor íba ye endilla hoói inkar gorídiye, “Tuñí kiyór baabute hoór añí no zani aar no yó buzír.” Baade íba baáre baandat giyyégol. Hétunot ratakurá bak diyé. 69 Bañdi mayafua wa ye íba re abar deikké rár, ðáke tíyai asé de ítara re hoór de, “Íbá tarár bútotu ekzon!” 70 Montor íba ye abar inkar gorídiye. Hotún baade ðáke tíyai asé de ítara Fitor ore abar hoór de, “Sóiyi tuñí tarár bútotu ekzon, kiyólla-hoilé

tuñí yó Galil or manúc.” 71 Montor íba ye hosóm hái hoór de, “Añr uore laánot óuk zodi añí misá hotá hoóir de óile. Tuáñra ze manúc cwar hotá hoór añí íba re no siní.” 72 Baade éhon-éhon ratakurá dusárabar bak diyé. Hétunot Fitor ottu hotá waán monot uiyyə ziyán Isá ye íba re hoóil, ki hoilé, “Ratakurá duibar bak dibar age tui Añré tin bar inkar goríbi.” Baade íba ye híyan monot gorí hañdat doiije.

15 Biínna kúb sóore, ðoóñr imam ókkole murubbi ókkol, alem ókkol edde fótuayi-mujilíc tíya lói sólla-mocuwara goijjé; baade ítara Isá re bañdí loizai Filat ore gosáidiye. 2 Filate Isá ttu fusár gorér de, “Tuñí Yohúdi ókkol or Baáñcca niki?” Íba ye yóggwa re zuwabe hoór de, “Ói, tuñí hoór de héndilla.” 3 Ðoóñr imam múné íbar uore boóut ðóilla elzam ókkol lagat accíl. 4 Filate íba ttu abar fusár gorér de, “Tuñí honó zuwab no diba? Soó, itará Tuáñr uore hodún elzam lagar.” 5 Montor Isá ye toóu ar honó zuwab nó deh, híyane Filat taajup óigiyoi. 6 Azadir-id or októ manúc ókkole ze hodi re hálas gorídito aros goré, Filate hé hodi re hálas gorídito. 7 Hé októ Bábabba nam or ezzon manúc ítar sáañti bagi ókkol or fúañti ziyól ot accíl, zetará bagiayi gorér de októ manúc kún goijjíl. 8 Manúc or dol aái Filat ore aros gorát doiije de, nizor niyom mozin ítara lla goittó. 9 Filate ítara re zuwabe hoór de, “Tuáñra ttu yían monehoór ne, añí tuáñrar hañse Yohúdir Baáñcca wa re hálas gorídi de híyan?” 10 Kiyólla-hoilé yóggwa ye zainto de, ðoóñr imam ókkole Isá re yóggwar hañse hásoot góri gosáidiye deh. 11 Montor ðoóñr imam ókkole manúc or dol ore uskaidiyé, zeéne Filate Isár bodol Bábabba re hálas goríde. 12 Filate abar ítara re zuwabe hoór de, “Tóoile, zibá re tuáñra Yohúdir Baáñcca hoó íba re añí kii goittám?” 13 Ítara abar guzori hoór de, “Íba re kúruc ot dífelol” 14 Montor Filate ítara re hoór de, “Kiyá, íba ye kii bura goijjé dé?” Toóu ítara aró guzori-guzori hoór de, “Íba re kúruc ot dífelol!” 15 Filate manúc or dol ore kúci gorár eradaye Bábabba re ítarar hañse hálas gorídiye; aar Isá re coónk marabai baade, kúruc ot dí bolla gosái dífelaiye. 16 Baade fóous ókkole Isá re Praitoriyum hoó de razmohól or bútoe loigiyé, aar teérang tíya re ðaki zoma goijjé. 17 Ítara íba re bayoinna rong or eggwá zubba fiñdáidiye, aar keñrar eggwá tas banai íbar matát diyaidiyé. 18 Baade ítara íba re endilla sólam gorát doiije, “Héy Yohúdi ókkol or Baáñcca, Toré sólam!” 19 Ítara eggwá

larí lói íbar matá sai marat accíl edde íba re súp maijíl, aar añrú felaí íba re sóida goijíl. **20** Ítara íba re técerai baade, íba ttu bayoinna rong or zubba wa kúlifelai íbar hoor íba re fiñdáidiye; tarfore íba re kúruc ot dí bolla baäre loigiyói. **21** Kureni cóor or Sáimon nam or ezzon manúc gang zaga ttu aiyér de októť hé foñť báy zaar. Yóggwa accíl Alexzendar edde Rufus or baf. Isár kúruc can boói loizai bolla fóous suné yóggwa re mojbur goijjé. **22** Fore ítara íba re Golgota zagat ainné, ziyán or torjuma óilde Matár Malar Zaga. **23** Héře ítara íba re mur hoó de híin miyáiya anggur or roc diiyé, montor íba ye híin ná háa. **24** Baade ítara íba re kúruc ot dífelaiye, aar íbar hoorsuor ítarar bútoře bák goijjé; har bák ot kii fore sai bolla ítara loťári maijíl. **25** Héñtte biñna now wa beh baijíl, zeñtté ítara íba re kúruc ot díyl. **26** Íbar ze hosúri sáainbút maridiye híyan óilde, “Yohúdi ókkol or baáncca.” **27** Íbar fúañti ítara dui zon đahañit ore yó kúruc ot díyl, ezzon ore íbar den đák ottu edde ar ezzon ore íbar ban đák ottu. **28** Híyane pak-kalam or yían fura óiye, “Íba re hosúrbon ókkol or fúañti gona giyéh.” **29** Zetará hé foñť báy zaar, ítara matá lari-lari íba re técerai hoór de, “Há! Tui toh baitul-mukaddos bāñgi tin din or bútoře abar banaidoya, **30** yala Tui kúruc ottu lami Nizoré Nize basa sái!” **31** Héndilla góri đoóñr imam ókkole edde alem ókkole yó řáťtai gori hoór de, “Íbá ye toh oinno zon ore basaitó, montor Nizoré Nize de basai no farer!” **32** E Mosih, Isráil or Baáncca yala kúruc ottu lami aiyók, zeéne añára dekí iman aní fari.” Zetará re íbar fúañti kúruc ot díya giyeh, ítara yó íba re beizzoti goijjé. **33** Baade zeñtté duññija baró wa baijé, héñtte lóti tin nwá báze fán guñra mulluk andár ói accíl. **34** Tin nwá baijé de októť Isá ye eggwá đoóñr abase guzori hoór de, “Elói, Elói, lamá sabakhťáni?” ziyán or torjuma óilde, “Ó Añr Alla, ó Añr Alla, Tuñí Añré kiyólla sáridiyo?” **35** Đake tíyai accíl de ítara hodúne híyan fúni hoór de, “Soó, Ibá ye Eliyas ore đaker!” **36** Hétunot ekzone duñri zai sírkat ekkán esfónj buraiye, baade ekkán súañr matát bazáidi Isá re hái bolla diiyé, aar hoór de, “Tíyo, Ibá re Eliyase basaitó aiyé né saái.” **37** Baade Isá ye eggwá đoóñr guzoran mari entehal óigiyoi. **38** Hétunot baitul-mukaddos or foroda gán uottú lóti nise foijjonto fári dui bák óigiyoi. **39** Ze Romi cáap Isár muúntu tíyai accíl, yóggwa ye Isá hondilla gori entehal óigiyoi de dekí hoór de, “Sóiyi e Manúc cwa Allar Fua accíl!” **40** Héře hodún beriyáin

óu dur ottu góri saái táikke de accíl. Ítarar bútoře Moriyam Makdálani, cónro Yakub or edde Yosés or maa Moriyam, edde Salómi yó accíl; **41** zetará yó Isá Galil ot táite íbar fisá dori íba re hédmot goijjíl. Héře aró boóut beriyáin óu accíl zetará íbar fúañti uore Jerúsalem ot aiccé. **42** Hé din accíl entezam-or-din, yáni ebaadot-or-din or agor din. Hé din hāñzinna óiye rár, **43** Aramátia cóor or Yusúf, zibá fótua-yimujílíc or ézzon namdár manúc aar Allar raijjo lla entezar gori accíl, yóggwa ye hímmot góri Filat or hañse zai Isár lac cwa maiggé. **44** Isá morigiyói de híyane Filat taajup óigiyoi. Yóggwa ye cáap pwá re matai Isá morigiyói de ói né fusár goijjíl. **45** Yóggwa ye cáap pwá ttu fakkagori baade, Yusúf ore lac cwa diifélaie. **46** Yusúfe ekkán hohón or hoor kinné, aar lac cwa lamai hoor gán berái yore, cíl kúñdi banaiyé de eggwá hobor or bútoře raikké. Baade hobor gwar muk ot ekkán cíl ouzaydiyé. **47** Isár lac cwa hoře rakér de híyan Moriyam Makdálani ye edde Yosés or maa Moriyame saái táikkil.

16 Ebaadot-or-din fúraigiyoi rár, Moriyam Makdálani ye, Yakub or maa Moriyame, edde Salómi ye kúcbu mosólla ókkol kinné, zeéne ítara aái Isár lac ot dii fare. **2** Ítara háftar foóila din biñna kúb sóore beil urér de októť, hobor ot aiccé. **3** Ítara ezzon ore ezzone hoór de, “Añára lla hobor or muk ottu cíl lan hone laribó?” **4** Montor ítara uormikká saiye rár dekér de, cíl lan larifelaiya. Híyan bicí đoóñr accíl. **5** Ítara hobor or bútoře goílle rár, dóla hoor findá ek juwan manúc den đák ottu boirá deikké, híyane ítara bicí đooraiyói. **6** Montor yóggwa ye ítara re hoór de, “No đooraiyó; tuáñra Isá Nasári re tuwoór deh, zibá re kúruc ot dí mariféla gyl. íba zinda óigiyoi; íba eře náí. íba re raikkíl de zaga gán soó. **7** Yala zoo, íbar carit tun ore edde Fitor ore hoógoi de, ‘Íba tuáñrar age Galil ot zaar. Tuáñra íba re héře dekíba, zendilla íba ye tuáñra re hoóil.” **8** Ítara hafi-hafi edde ammúke hobor ottu neeli duñrdiyé. Ítara honókiyo re kessú nó hoó, kiyólla-hoile ítara ttu kúb đoor láigge. **9** (note: The most reliable and earliest manuscripts do not include Mark 16:9-20.) Háftar foóila din biñna sóore Isá mora ttu zinda óizaygoi baade, age Moriyam Makdálani re dahádiye, zibár bútotu íba ye hañť twa búť neeláil. **10** Híba ye zai, Isár fúañti accíl de ítara re hóbor díye, héñtte ítara ferecani zahér gorát edde hañdahari gorát accíl. **11** Isá zinda de edde Moriyame íba re deikké de fúni

ítara biccác nó goré. **12** Yárbaade Isá ye arek doilla súrote ítara ttu dui zon ore dahádiye, zeñtté tará áñri-áñri farar híkka zaat accíl. **13** Tará zai badbaki gún ore hóbor díye, montor ítara tará re yó biccác nó goré. **14** Fore Isá ye egaro zon cárit tun ore dahádiye, héñtte ítara hána háat accíl. Íba ye ítara re ítarar nabiccác edde dil dorór zoriya jéjjeraiye, kiyólla-hoilé íba zinda óizaygoi baade zetará íba re deikkíl tará re ítara biccác nó goré. **15** Íba ye ítara re hoór de, “Tuáñra fura duniyait zoo, zai manúc beggún or hañse kúchóbor tobolik gorógoi. **16** Zee niki iman aní báptisma loh, yóggwa ye nejat faibo; montor zee niki iman nu ané, yóggwa hosúrbon tóoribo. **17** Zetará iman ainné, ítara re e keramot iín goríbar toóufik diiya zaybo: Añr name ítara bút ókkol dáfaibo; gabi zubane hotá hoibó; **18** ítara nizor áte háf ókkol tulí dóribo; zodi ítara moot goré de kessú háifele, ítarar honó hání no óibo; aar ítara biyaraimmar gaat át dilé, tará gom óizayboi.” **19** Malik Isá ttu ítara re híin beggún hoiyá ói baade, íba re asman ot tulfela gíyeh, aar Allar den dák ottu boói táikke. **20** Baade ítara neeli zai hárr zagat tobolik goijjé. Malike ítara re lói ham gorí íbar kalam sóiyi de híyan ítara re diiya giyéh de keramot or duara sábut gorát accíl.

Lukás

1 Zettót boóut zone ziín-ziín añárar dormiyan ot óiye híin or baabute lekí bolla meénnot gorát doijje, 2 zendilla uitará añára re zanaíyē zetará foóila cúru ttu lóti nizor suké deikké edde kalam or háadem accíl. 3 Hétolla, ó izzotdár Tiyoфі́las, añí yó híin beggún ore cúru ttu lóti cúndorgori tahákit gorí baade tuáñr hañse híin ekkán-ekkán góri lekón gom óibo de báippi, 4 zeéne tuñí ze hotá gún or taalim faiyó, híin furafuri sóiyi de zano. 5 Yohúdiya elakar baáñcca Hérud or hale, Abíya dol or imam ókkol or bútoze Zakaríyah nam or ézzon imam accíl. Yóggwar bou óilde Aron or nosól or mayafua, híbar nam Elízabet. 6 Ítara duní zon Allar nozor ot forhésgar accíl, zetará Mabud or tamám hókum ókkol edde niyom ókkol mozin behosúr góri soilto. 7 Lekin ítara ttu fuain nu accíl, kiyólla-hoilé Elízabet báz accíl, aar ítara duní zon bicí burá óigilgoi. 8 Ek din zeñtté Zakaríyah ye nizor dol or háin mozin Allar muúntu imami ham goittó aiccé, 9 imami ham or niyom mozin loťári mari yóggwa re basíflowa gíyeh, Mabud or baitul-mukaddos ot góli agórbatti zolai bolla. 10 Héñtte agórbatti zolaibár októť baáre bicí manúc ókkol dua gorát accíl. 11 Hétunot Mabud or ek fírista agórbattir-gáñr den ďák ottu tíyai yóggwa re dahádiye. 12 Íba re deki Zakaríyah songki uiťťíl, edde bicí đooraiyói. 13 Montor fírista wa ye yóggwa re hoór de, “Ó Zakaríyah, no đooraiyó; Alla ye tuáñr dua fúinne. Tuáñr bou Elízabet ottu eggwá morotfua óibo, aar tuñí íbar nam Yaháya rakíba. 14 Tuáñr ttu kúcir uore kúci tákibo, aar íbar zormoye boóut manúc ókkol kúci óibo. 15 Kiyólla-hoilé íba Mabud or nozor ot muhán óibo; íba ye no anggur or roc or córab háibo aar no nicá háibo, íba maar feřot tákite lóti Pak-Ruh lói furaiya óibo. 16 Aar íba ye boóut Boni Isráil ókkol ore Mabud ítarar Allar hañse firai aníbo. 17 Íba ye Eliyas or ruh edde taakote Malik or age-age zaibo; zai baf ókkol or dil fuain dor híkka aar nafórman ókkol ore forhésgar or demak or híkka fíraibo; héndilla gorí Mabud olla nal goijjá eggwá kouv toiyar goríbo.” 18 Zakaríyah ye fírista wa re hoór de, “Añí híyan keéngori ekin goittám? Añí de ézzon burá manúc, aar añr bou ottu yó bicí boc óigiyoi.” 19 Fírista wa ye yóggwa re zuwabe hoór de, “Añí óilam de Jibrail, zibá Allar muúntu tíyai táki; añré tuáñr llói hotá hoói bolla edde tuáñr hañse e kúcir hóbor gán foónsai bolla diferá gíyeh deh. 20 Aar soó,

zetódin foijjonto iín fura nó óiyo, hétodin tuñí buk tákiba, aar mati no faribá, kiyólla-hoilé tuñí toh añr hotá gún ekin nó goró, ziín ťık októ ailé fura óibo.” 21 Héñtte manúc ókkole Zakaríyah lla entezar gorí táikkil, aar yóggwa baitul-mukaddos ottu aité deri ór bóuli ítara báfat forigiyói. 22 Zeñtté yóggwa baáre aiccé, yóggwa ye ítara llói mati nó fare. Hétunot ítara zani faijjé de, yóggwa ye baitul-mukaddos ot dorcón deikké. Yóggwa ye ítara llói icára gorí-gorí hotá howát accíl, aar buk táigilgoi. 23 Zeñtté yóggwar imami ham or din fúraigiyoi, yóggwa nizor gór ot waafes giiyégoi. 24 Fore yóggwar bou Elízabet hámil óiye, aar híba ye nizoré fañs mac foijjonto aiddone raikké, endilla hoói, 25 “Ze din ókkol ot Mabude añr córom ore maincór ttu dur gorífelai bolla añr uzu nozor diyé, héñtte íba ye añr lla yían goijjé.” 26 Sów mac soler de októť, Alla ye Jibrail fírista re Galil or Nasárat nam or ekkán cóor ot 27 eggwá kuwári mayafuar hañse diferáiyē, zibár zuragatá Dawud or nosól or Yusúf nam or ézzon manúc lói óoil. Hé kuwári mayafuar nam Moriyam. 28 Fírista wa híbar hañse aái hoór de, “Tuáñre sólám, tuñí zibár uore đooñr rahámot óiye. Mabud tuáñr fúañti asé.” 29 Montor híyan fúni híba ebbe alabúlat forigiyói, aar yibá hondilla sólám hoi báfat doijje. 30 Fírista wa ye híba re hoór de, “Ó Moriyam, no đooraiyó, kiyólla-hoilé tuáñr uore Allar rahámot óiye. 31 Fúno, tuñí hámil óiba, aar tuáñr ttu eggwá Morotfua óibo, tuñí íbar nam Isá rakíba. 32 Íba muhán óibo, aar íba re Alla Tálar Fua howá zaybo. Mabud Alla ye íba re íbar baf Dawud or toktó diibo. 33 Íba ye Yakub or nosól or uore abadulabad hókumot goríbo, aar íbar raijjo honódin hótom no óibo.” (aíñ 9165) 34 Moriyame fírista wa re hoór de, “Híyan keéne óibo? Añí de aijjó kuwári.” 35 Fírista wa ye híba re zuwabe hoór de, “Pak-Ruh tuáñr uore aibó, aar Alla Tálar kudurut or sába tuáñr uore foribó, hétolla tuáñr ttu óibo de hé pak Fua re Allar Fua howá zaybo. 36 Soó, tuáñr egana Elízabet ottu yó híbar burá bocót fua feřot óiye, híba zibá re niki báz howá zayto híba ttu yala sów mac soler. 37 Kiyólla-hoilé Alla ye no fare de toh kessú náí.” 38 Tói Moriyame hoór de, “Soó, añí Mabud or bañdi; añr uore tuñí zeén hoiyó héen óuk.” Baade fírista wa híbar héntu giiyégoi. 39 Yárbaade Moriyam nal ói toratori faári elakat Yohúdahr ekkán cóor ot giiyé, 40 aar Zakaríyahr gór ot góli Elízabet ore sólám díye. 41 Zeñtté Elízabete Moriyam or sólám fúinne, híbar feřot fua wa fálidi uiťťé, aar Elízabet

Pak-Ruh lói furaiya óiye. 42 Tarfore híba ye ðoóñr-ðoóñr góri hoór de, “Mayafuain dor bútoe tuñi beh mubarek, aar tuáñr feřor fua wa yó mubarek! 43 Aar añr uore eén rahámot kiyá óiye, zeén níki añr Malik or maa añr hére aiccé? 44 Kiyólla-hoilé fúno, añr hane tuáñr sólám fúinne mottor, añr feřot fua wa kúciye fáldi uitté. 45 Ubá hotó mubarek, zee niki biccác goré de, Mabude híba re zín hoiyé híin fura óibol!” 46 Moriyame hoór de: “Añr kollófe Mabud or taarif gorér, 47 aar Alla añr Nejatdoya re lói añr ruh kúci óiye. 48 Kiyólla-hoilé íba ye toh íbar bañdir niróc tokkar uzu nozor diyé, hétolla, soó, yala lóti añré mubarek hoibó nosól beggúne. 49 Kiyólla-hoilé zibá Taakotwala íba ye goijjé añr lla ðoóñr-ðoóñr ham, pak íbar nam. 50 Doorá zetará íba re, íbar rahámot zari táke ítarar nosóle-nosóle. 51 Nizor ðuwañ lói íba ye ðoóñr-ðoóñr ham goijjé, aar dile-dile zetará nizoré ðoóñr báfe ítara re cínřaciñttá gorífelaiye. 52 íba ye toktó ttu lamaidiyé hókumot-goróya ókkol ore, montor uoror tokkat goijjé niróc cún ore. 53 Búka ókkol ore íba ye gom jiníc lói bóraidíye; montor tuangor ókkol ore háli áte duñraidíye. 54 íba ye Nizor gulam Isráil ore modot goijjé, íbar oh rahámot monot rakí yore, 55 ziyán tákibo abadulabad Ibrahim edde íbar nosól ókkol or uore, zendilla hoóil íba ye añárar bafđada ókkol ore.” (aiōn g165) 56 Moriyam tin mac hañsáhañsi Elízabet or fúañti táki baade nizor góř ot waafes aáigiyoi. 57 Zeñtté Elízabet ottu fua zormo dibar októ aiccé, híba ttu eggwá fua óiye. 58 Mabude híbar uore ðoóñr rahámot goijjé de híyan híbar atehañsór maincé edde egana-guiccí ye fúni, ítara híbar fúañti kúci goijjé. 59 Baade eén óiye, ítara añçto din ot din fua wa re ázomi goráito aiccé, aar ítara fua war nam baf or nam or ðóilla Zakaríyah rakító saáil. 60 Montor íbar maa ye hoór de, “No, itar nam raká zaybo de Yaháya.” 61 Ítara híba re hoór de, “Tuáñr egana-guicccr bútoe de hé nam honókiyo ttu náí.” 62 Tarfore ítara baf ore icára gorí, fua war nam kii rakító monehoór de saáil. 63 Yóggwa ye ekkán lekíbar siz magari yore híyan ot leikké de, “Tar nam Yaháya.” Híyane ítara beggún taajup óigiyoi. 64 Aar éhon or bútoe yóggwar muu kúligiyoi edde zir eridiya óigiyoi, baade yóggwa ye mati faijje aar Allar taarif gorát doijje. 65 Ítarar atehañsór manúc beggún ðooraiyói, aar Yohúdiyar faári elakar agagurat maincé híin or baabute howáhoi gorát doijje. 66 Zetará hé hotá gún fúinne ítara híin dile-dile rakí báfer de, “Tóoile e fua wa hondilla

óibo?” Kiyólla-hoilé Mabud or át íbar uore accíl. 67 Baade íbar baf Zakaríyah ye Pak-Ruh lói furaiya ói agun hotá hoór de: 68 “Taarif óuk Isráil or Mabud Allar, kiyólla-hoilé íba aái azad goijjé ze bonda íbar. 69 íba ye Nizor gulam Dawud or nosól ottu añára lla taakotwala Nejatdoya tuillé, 70 zendilla íba ye boóut age lóti hoóil Nizor pak nobi ókkol or muké; (aiōn g165) 71 ki hoilé, añára re basa zaybo añárar ducon ókkol ottu edde añára re nafóřot-goróya beggún or át ottu; 72 añárar bafđada ókkol or uore rahám gorí bolla edde Nizor pak razinama re yaad rakí bolla, 73 yáni sóon waán ore ziyán íba ye goijjíl añárar baf Ibrahim lói, 74 añára re añárar ducon ókkol or át ottu basai honó ðoor sára íbar ebaadot gorá baitó, 75 íbar muúntu paki edde forhésgarir sáañte añárar zindigibór. 76 “Ó añr fua, toré ðaha zaybo de Alla Tálar nobi, kiyólla-hoilé tui Malik or rasta toiyar gorí bolla íbar age-age zaibi, 77 zai tui íbar bonda ókkol ore guná maf fai yore nejat faibar zankari dibi, 78 añárar Allar meérbani edde raháme uottú Beil or Foór aibó añárar hañse, 79 foór dí bolla uitará re zetará andár ot edde moot or sábat asé, edde cántir rastat loizai bolla añárar řeng or fata re.” 80 Baade fua wa ðoóñr óiye edde ruht mazé mozbut óiye, aar Boni Isráil ókkol or hañse kúlamela góri dahá nó dé foijjonto íba moidan elakat táikkil.

2 Hé din ókkol ot eén óiye, Rom or baáñcca Agástas or torfóttu hókum zari óiye de, yóggwar fura raijior manúc beggún or seráng gorá foribó. 2 Yíba óilde foóilabar or seráng, zibá Kurinias Siřriya mulluk or hákim accíl de héñtte gorá gíyl. 3 Tói manúc beggúne nam lekái bolla zar-zar cóor ot tee-tee zaat doijjil. 4 Héndilla, Yusúf óu Galil or cóor Nasárat ottu neeli, uore Yohúdiya elakat Dawud or cóor Betélhem hoó de híyan ot giiyé, kiyólla-hoilé Yusúf óilde Dawud or háandan ottu edde nosól ottu. 5 Hére giiyé de, yóggwar zuijja bou Moriyam or fúañti nam lekái bolla; héñtte híba hámil accíl. 6 Ítara hére tákite, híba ttu fua hálás óibar din furafuri aáigiyoi. 7 Tói híba ye híbar foóila-fua morotfua zormo diyé. Híba ye Fua wa re hoor berái hánđail ot neřai raikkíl, kiyólla-hoilé hére ítara lla musáfer-hánat honó zaga nu accíl. 8 Hé elakat hodún sóol-soroya accíl, zetará raitta kílat táki ítarar sóol or zák sooñi gorí accíl. 9 Asimbit Mabud or ek fírista ítarar muúntu tíyaiye, aar Mabud or tozolli ítarar sairókul ttu soimké. Ítara bicí hoilé bicí ðooraiyói, 10 montor fírista ye ítara re hoór de,

“No ðooraiyó, kiyólla-hoilé soó, ańı tuáńrar hańse kúcir hóbor ainnı, ziyáne tamám manúc ókkol ore bicı kúci gorıbo. **11** Aijja Dawud or cóor ot tuáńra lla eggwá Nejatdoya zormo óiye; İba óilde Mosih hé Malik. **12** Tuáńra İba re e nicáne sinı farıbá: eggwá dud or Fua re hoor beráiya, urar hándail ot neıaiya loot faıba.” **13** Hétunot hé fırista war fúańti asimbit ek zák asmani fóous dahádiye, ziıne Allar taarif gorı-gorı hoór de, **14** “Ebbe uore asman ot Allar taarif óuk, aar zobin ot ze manúc ókkol lói İba kúci, İtarar búture cántı óuk.” **15** Fırısta gún İtarar héntu asman ot giyiói rár, sóol-soroya gúne ezzon ore ezzone hoór de, “Aiyó, ańára Betélhem ot zai, aar ziyán óiye bóuli Mabude ańára re zanaıdiyé híyan saáigoi.” **16** Baade İtara toratori aái Moriyam edde Yusúf ore deikkıl, aar Fua wa re hándail ot neıaiya loot faiyé. **17** Zeńtté İtara Fua wa re deikké, İtara re Fua war baabute ziın howá gıyl híın agagura zanaıdiyé. **18** Aar sóol-soroya gúne hoiyde de híın zedúne fıınne İtara beggún ammúk óigilgoi. **19** Montor Moriyame hotá híın beggún dil ot gańti rákı híın báfi-báfi accıl. **20** Sóol-soroya gúne İtara re howá gıyl de mutafek beggún fııni edde dekı Allar mohıma edde taarif gorı-gorı waafes giyyégoi. **21** Ańcto din furaiyé rár, Fua wa re ázomi goráıbar októť, İbar nam Isá ráká gıyeh, ze nam mán fırista ye İba feřot óıbar age lóti dıyl. **22** Baade zeńtté Muısar Córiyot mozin Yusúf edde Moriyam pak-sáf óıbar din aáigiyoi, İtara Isá re Mabud or hańse peec gorı bolla uore Jerúsalem ot ainné. **23** Zendilla Mabud or Córiyot ot leikká asé de ki, “Foóila fua zodi morotfua óile, İba re Mabud olla pak gorıfela forıbó.” **24** Edde kurbani di bolla oh mozin zendilla Mabud or Córiyot ot hoiyé, ki hoilé, “Ek zur hoóıl yáh duwá hoitor or basa.” **25** Hé októť heře Jerúsalem ot Símiyon nam or ézzon manúc accıl, forhésgar edde dındár, zıbá Boni Isráıl ókkol or tosóllir októř entezar ot accıl; aar yóggwar uore Pak-Ruh accıl. **26** Yóggwa re Pak-Ruh ye zahér goijjıl de, Mabud or Mosih re dekıbar age yóggwar moot no óıbo. **27** Pak-Ruhr hédaiyote yóggwa baitul-mukaddos ot aiccé, aar zeńtté bafmaa ye gura Fua Isá re Córiyot or niyom mozin ziın gorá fore híın goittó búture ainné, **28** Símiyone Isá re fatáijja kul ot looi eén hoói Allar taarif goijjé: **29** “Ó Malik, Tuńı Tuáńr hotá mutafek Tuáńr gulam ore yala cántir saánte zaito dor, **30** Kiyólla-hoilé ańr suké Tuáńr nejat dekıfelaiye, **31** ziyán Tuńı tamám manúc ókkol or cáıkkat toiyar goijjó. **32** Hıyan toh Beyohúdi

ókkol or hańse Tuáńr moncá zahér gorıbar ekkán nur, aar híyan óilde Tuáńr koum Boni Isráıl or ızzot.” **33** Isár baabute ziın howá gıyeh, híın fııni İbar bafmaa taajup óigiyoi. **34** Baade Símiyone İtara re dua diyé, aar İbar maa Moriyam ore hoór de, “Soó, e Fua wa re basılowa gıyeh de, Boni Isráıl or boóut zon ore félai bolla edde tulı bolla, edde endilla ekkán nicán ói bolla ziyán or muhálef gorá zaybo, **35** zeéne boóut dil or kolfona ókkol zahér óizagoi. Héńtte tuáńrar kollóf óu ekkán súri lói gańtá zaybo.” **36** Hére Acer or háandan or Anna nam or eggwá ambiya accıl, zıbá Fanuel or zérfua. Hıba ttu bicı boc óigilgoi, hıba biyá gorı hócom or fúańti háńt bosór beh táıkkil, **37** baade lóti rarir zindigi haráitè-haráitè híbar boc acı-sair bosór óiye. Hıba baitul-mukaddos ottu honó mikká no zaito, bółke ruza rákı edde dua gorı-gorı raite dine ebaadot gorát tákito. **38** Hétunot hıba aái Allar cúkur gorát doiije, aar uitará beggún ore Fua war baabute howát doiije zetará Jerúsalem or azadir entezar ot accıl. **39** Baade zeńtté Yusúf edde Moriyame Mabud or Córiyot mutafek hárr kessú gorıfelaiye, İtara Galil ot nizor cóor Nasárat ot waafes aáigiyoi. **40** Baade Fua wa giyan or saánte ðoóńr ówat edde mozbut ówat accıl; aar Allar rahámot İbar uore accıl. **41** Isár bafmaa fottı bosór Azadir-id olla Jerúsalem ot zaito. **42** Zeńtté İba baró bosór óiye, İtara hé niyom mozin heře id ot giyyé. **43** Id fıurı baade İtara waafes aázargoi de októť, Fua Isá Jerúsalem ot táigiyoi; montor İbar bafmaa ye hoi no fare. **44** Bółke Isá manúc or dol or búture asé bóuli táari İtara ek din or fońt ot giyyégoi, baade İtara nizor egana-guiccı edde sinforiso maincór búture İba re tuwat doiije. **45** Zeńtté İtara İba re tuwai nó faa, İba re tuwai-tuwai Jerúsalem ot waafes giyyé. **46** Tin din baade İtara İba re baitul-mukaddos ot alem ókkol or mazé boói İtarar hotá fıner de edde İtara re súwala-súwali gorér de loot faiyé. **47** Aar zetará İbar hotá fıınne, İtara beggún İbar buzáye edde zuwabe taajup óiye. **48** Zeńtté İbar bafmaa ye İba re deikké, İtara ammúk óigiyoi. Maa ye İba re hoór de, “Ó Fut, Tuńı ańára llói héndilla kiyá goijjó? Soósai, Tuáńr baf loi ańı loi sinta gorı-gorı Tuáńre tuwat ası.” **49** Isá ye İtara re hoór de, “Tuáńra Ańré tuwoór kiyá? Tuáńra no zano né, Ańr ttu Ańr Baf or gór ot tákar zorur dé?” **50** Montor İba ye İtara re ziyán hoiyé híyan İtara nó buzé. **51** Baade İba İtarar fúańti bacá lói nise Nasárat ot waafes aiccé, aar İtarar hotá mani soıllıl. Aar İbar maa ye hotá híın beggún nizor dil ot gańti

raikkíl. **52** Isá giyane edde gaafiré, Allar edde manúc or muhábbote barí urát accíl.

3 Tibiriyus Káisar or hókumot fundóro bosór soler de októt, zeñtté Pontiyus Filat accíl de Yohúdiyar hákim, aar Hérud accíl de Galil or hókumot-goróya, yóggwar báí Filíp accíl de Itúriyar edde Trakonitis elakar hókumot-goróya, Laisénias accíl de Abilenir hókumot-goróya, **2** Boro imam accíl de Hánan edde Káiyafas, héñtte Allar kalam moidan elakat Zakariyáhr fua Yaháyar hañse nazil óiye. **3** Tói yóggwa Jordán hál or sairókul or elaka beggún ot zai tobolik gorér de, gunár maf fai bolla touwá gorí báptisma loito. **4** Zendilla nobi Yesáyahr kitab ot leikká asé: “Moidan zagat ezzone guzori-guzori eén hoór, ‘Mabud or foñt toiyar goró, Íbar rasta uzu goró. **5** Fottí gúna bóra zaybo, fottí faár edde murá fúwan gorá zaybo. Behańsúra foñt ókkol uzu gorá zaybo, ńeílameila rasta ókkol fúwan gorá zaybo, **6** aar fura insán zati ye Allar nejat dekíbo.” **7** Hétunot yóggwa ye zetará yóggwa ttu báptisma loito aiccé ítara re hoór de, “Ó haf or fuain ókkol! Aibár gozzob ottu dáizayboi lla tuáńra re hone úńciyari díye? **8** Touwá lói mil há de héndilla gulagala ókkol dóro, aar nizor dil ot endilla howát no doijjo de ki, ‘Ańára ttu toh baf ísafe Ibrahim asé.’ Ańí tuáńra re hoór, Alla ye sailé e cíl lun ottu yó Ibrahim olla fuain foida gorí fare. **9** Aar ehón toh gas or gurat kuróil raká gíyeh. Hétolla, ze gas ot gom gula no dóre, yíba re harí ooin ot félaidiya zaybo.” **10** Manúc cúne yóggwa ttu fusár gorér de, “Tóoile ańára ttu kii gorár zorur?” **11** Yóggwa ye ítara re zuwabe hoór de, “Zar ttu duwá kuruta asé, íte náí de ítare eggwá doo, aar zar ttu hána asé, íte yó héndilla goró.” **12** Házana-tulóya ókkol óu báptisma loito aiccé; ítara yóggwa re hoór de, “Úzur, ańára ttu kii gorár zorur?” **13** Yóggwa ye ítara re hoór de, “Ain ot asé de yár túaro barái no loiyó.” **14** Héndilla, fóous ókkole yó yóggwa ttu fusár gorér de, “Ańára ká, ańára ttu kii gorár zorur?” Yóggwa ye ítara re hoór de, “Kiyó ttu dómki dí kessú no loiyó, honókiyor uore misá elzam no lagaiyó, nizor muzuri loi kúci táikko.” **15** Zeñtté manúc cún acár hálót ot accíl, aar ítara beggúne nizor dile-dile Yaháyar baabute báfat accíl de, yóggwa Mosih ói né no, **16** hétunot Yaháya ye zuwabe ítara beggún ore hoór de, “Ańí toh tuáńra re fanít éna báptisma díh; montor zibár tokka ańr túaro doónr íba aiyér; ańí íbar cenńár or fíta kúli bolla

úddwa laayek no. Íba ye tuáńra re Pak-Ruh edde ooin loi báptisma díbo. **17** Íba ttu Nizor kula Nizor át ot asé, Nizor hóńla re cúndorgori sáf gorí bolla edde giyuń ókkol ore dolagorí gudam ot rakí bolla; montor íba ye suwa gún ore honódin no nífé de ooin ot furat difélaibo.” **18** Héndilla aró boóut nosíyot ókkol lói Yaháya ye maincór hańse kúchóbor tobolik goijjíl. **19** Lekin hókumot-goróya Hérude nizor báí or bou Hérudias ore biyá goijjíl de hétolla edde yóggwa ye ze bura ham ókkol goijjíl híin beggún olla zeñtté Yaháya ye yóggwa re bóńboráíye, **20** tói yóggwa ye hé bura ham beggún ot aró ekkán baráíye, híyan óilde, yóggwa ye Yaháya re ziyól ot bon gorí raikké. **21** Zeñtté manúc beggúne báptisma loiyé, Isá ye yó báptisma loiyé. Íba dua gorér de októt asman kúligiyoi, **22** aar Pak-Ruh hoitor or dóilla jisím or súde íbar uore lami aiccé. Aar asman ottu eggwá abas aiccé de, “Tuńí Ańr adorda Fua, Ańí Tuáńre lói bicí kúci.” **23** Zeñtté Isá ye Allar ham gorá cúru goijjé, héñtte íbar boc tokoriban tiríc bosór; maincé ńáaitto de, íba Yusúf or fua. Yusúf óilde Héilir fua. **24** Héili Mattát or fua, Mattát Leévir fua, Leévi Melkir fua, Melki Jannair fua, Jannai Yusúf or fua, **25** Yusúf Mattatíyas or fua, Mattatíyas Ámos or fua, Ámos Nahum or fua, Nahum Esáilir fua, Esáli Naggair fua, **26** Naggai Maát or fua, Maát Mattatíyas or fua, Mattatíyas Sémiyir fua, Sémiyi Josék or fua, Josék Jodar fua, **27** Joda Joannar fua, Joanna Resár fua, Resá Zerubabel or fua, Zerubabel Cáltiyel or fua, Cáltiyel Nerir fua, **28** Neri Melkir fua, Melki Addir fua, Addi Kosám or fua, Kosám Elmadom or fua, Elmadom Er or fua, **29** Er Yehócuar fua, Yehócu Eliyazar or fua, Eliyazar Jorim or fua, Jorim Mattát or fua, Mattát Leévir fua, **30** Leévi Símiyon or fua, Símiyon Yohúdahr fua, Yohúdah Yusúf or fua, Yusúf Jonam or fua, Jonam Eliyakím or fua, **31** Eliyakím Maleyar fua, Maleya Minnar Fua, Minna Mattátar fua, Mattáta Natan or fua, Natan Dawud or fua, **32** Dawud Jesir fua, Jesi Obed or Fua, Obed Boaz or fua, Boaz Sálmon or fua, Sálmon Nacon or fua, **33** Nacon Amminadab or fua, Amminadab Admin or fua, Admin Arnir fua, Arni Hisron or fua, Hisron Fares or fua, Fares Yohúdahr fua, **34** Yohúdah Yakub or fua, Yakub Isahák or fua, Isahák Ibrahim or fua, Ibrahim Téar fua, Téra Nahor or fua, **35** Nahor Sérug or fua, Sérug Rau or fua, Rau Falek or fua, Falek Eber or fua, Eber Cílahr fua, **36** Cílah Kéinan or fua, Kéinan Arfakcád or fua, Arfakcád Ceém or fua, Ceém Nuhr fua, Nuh Lamak or fua, **37**

Lamak Matúcilahr fua, Matúcilah Idiris or fua, Idiris Jared or fua, Jared Mahálalel or fua, Mahálalel Kéinan or fua, **38** Kéinan Enoc or fua, Enoc Sét or fua, Sét Adom or fua, Adom Allar fua.

4 Isá, Pak-Ruh lói furaiya ói Jordán hál ottu waafes aiccé, aar hé Ruhr hédaiyote moidan zagat gúrat accíl. **2** Hére Íba re salic din foijjonto Ibilíce entán goijjé. Hé din ókkol ot Íba ye honó kessú ná háa; híin fúrai baade Íba ttu búk laiggé. **3** Ibilíce Íba re hoór de, “Tuñí zodi Allar Fua de óile, e cíl lwá re ruṭi óizaytoi hókum dóh.” **4** Isá ye ítare zuwab der de, “Pak-kalam ot endilla asé, ‘Manúc siríf ruṭi loi base de no.’” **5** Tarfore Ibilíce Íba re ekkán uñsol zagat loigiyé, aar éhon or bútoe Íba re duniyair tamám raijjo ókkol daháye. **6** Tarfore Ibilíce Íba re hoór de, “Añí Tuáñre yían or fura adíkar edde cáan diifélaikum, kiyólla-hoilé yían añré diiféla gyéh, aar añí añr ttu zaré diito monehoó taré dii fari. **7** Hétolla zodi Tuñí añré sóida goró, iín beggún Tuáñr óizayboi.” **8** Isá ye ítare zuwab der de, “Pak-kalam ot endilla asé, ‘Tuñí tuáñr Mabud Alla re beh sóida goríba, aar siríf Íbar beh ebaadot goríba.’” **9** Baade Ibilíce Íba re Jerúsalem ot loigiyé, aar baitul-mukaddos or tullit tíyagarai Íba re hoór de, “Tuñí zodi Allar Fua de óile, entú nise záp maro, **10** kiyólla-hoilé pak-kalam ot toh endilla asé, ‘Íba ye Tuáñr baabute Nizor fírista ókkol ore hókum díbo, Tuáñre héfazot gorí bolla. **11** Ítara nizor áte Tuáñre dórifelaibo, zeéne Tuáñr ténge honó cíl ot duk no faa.’” **12** Isá ye ítare zuwabe hoór de, “Pak-kalam ot endilla asé, ‘Tuñí tuáñr Mabud Alla re entán no goríba.’” **13** Zeñtté Ibilíc ottu hárr dóilla entán goijjá óiye, arek mouka nó faa foijjonto Íbar héntu giiyégoi. **14** Baade Isá Pak-Ruhr kudurute furaiya ói Galil ot waafes aiccé, aar Íbar hóbor hériyar sairó dák or elakar agagura fóligiyoi. **15** Íba ye ítatar mujilíc-hána ókkol ot taalim diyat doijje, aar beggúne Íbar taarif goijjíl. **16** Baade Íba Nasárat ot aiccé, zeṛé Íba doónr óoil, aar Nizor niyom mutafek ebaadot-ordin mujilíc-hánat giiyé, aar telawot goittó tíyaiye. **17** Íba re nobi Yesáyahr kitab diiya giyéh; aar hé boiṭṭa kitab pwá melí, e zaga gán tuwai loiyé zeṛé leikká asé de, **18** “Mabud or Ruh Añr uore asé, kiyólla-hoilé Íba ye Añré gorif ókkol or hañse kúchóbor boiyan gorí bolla basíloiye. Íba ye Añré diferáye de, bondi ókkol ore súribar hotá, edde ańdá ókkol ore dekíbar hotá elan goittó; aró, zetará zulúm faar ítara re azad

goittó, **19** edde Mabud or meérbanir bosór or elan goittó.” **20** Tarfore Íba ye kitab pwá bańdí háadem mwa re waafes diifélai baade boiccé. Aar mujilíc-hánat asé de manúc beggúne Íbar uzu suk lagaidi saái táikke, **21** zeñtté Íba ye ítara re hoiyé, “Aijja e pak-kalam tuáñra fúnar fúañti-fúañti fura óiye.” **22** Manúc beggúne Íbar nam gorát doijje, aar ze rahámoti hotá Íbar muk ottu neeillé híine ítara taajup óigiyoi. Ítara hoór de, “Íbá Yusúf or fua no níki?” **23** Íba ye ítara re hoór de, “Tuáñra Añré e meésal lan háamaha hoibá de ki, ‘Ḍakṭor, age nizoré gom goró. Tuñí ze ham mún Kaparnahúm ot goijjó de añára fúinni, híin eṛé Nizor farat óu gorí dahó.’” **24** Íba ye tarfore hoór de, “Añí tuáñra re sóiyi hoóir, honó nobi re nizor wotón ot gosé de náí. **25** Yían sóiyi de ki, nobi Eliyas or zobatan zeñtté cáro tin bosór fán zór nó deh, edde guñra mulluk ot eggwá doónr raṭ óoil, héñtte Boni Isráil or bútoe boóut rari ókkol accíl; **26** toóu úddwa Eliyas ore ítara honókiyor hére diferá nó zah, bólke siríf Sídón elakar Zárefat ot asé de eggwá rari mayafuar hére beh diferá gýl. **27** Héndilla, nobi Eliyasár zobatan Boni Isráil or bútoe boóut kurus biyaraimma ókkol accíl, montor ítara honókiyo re pak-sáf gorá nó zah, bólke siríf Siíriya mulluk or Naman ore beh gom gorá gýl.” **28** Híin fúni, mujilíc-hánat accíl de manúc beggún guccáye bórigiyoi. **29** Ítara urí Íba re cóor or baárkule neelaiye, aar haında ttu félaidi bolla Íba re faár or tullit loigiyé, zeṛé uore ítatar cóor banaiyé. **30** Montor Íba ítatar mazór ttu neeli héntu giiyégoi. **31** Tarfore Íba nise Kaparnahúm ot giiyé, ziyán ekkán Galil or cóor, aar ebaadot-or-din manúc ókkol ore taalim diyat accíl. **32** Manúc ókkol Íbar taalime ammuć óizaytoi, kiyólla-hoilé Íba ye hotá hoitó de adíkar or saáñte. **33** Hére mujilíc-hánat endilla ezzon manúc accíl, zibá nafak bút or jine faiya. Yóggwa ye eggwá doónr abase guzori hoór de, **34** “Ó Isá Nasári, añára llói Tuáñr kii ham asé? Tuñí añára re dónco goittó aiccó de né? Añí zani Tuñí hon, Tuñí óilade Allar Pakzon nwá.” **35** Montor Isá ye jin nwá re jéjjeṛai hoór de, “Nizám ó, yoggwár bútotu neelizagói.” Hétunot hé jine yóggwa re beggún or mazé ańsár mári edde honó zohóm no gorí yóggwar bútotu neeligiyói. **36** Híyane manúc beggún taajup óigiyoi, aar ezzon ore ezzone hoór de, “Íín hondilla hotá? Kiyólla-hoilé Íba ye adíkare edde taakote hóraf jin ókkol ore hókum déh aar híin neelizagói!” **37** Tói Íbar hóbor hé elakar sairó dák or fottí zagat fóligiyoi. **38** Baade Isá mujilíc-hána ttu

neeli, Sáimon or gór ot giyyé. Héñtte Sáimon or hóuri ttu bicí gaatzor uiñté. Yóggwa re gom gorí bolla ítara Isá re aros goijjíl. **39** Íba yóggwar ñáke tíyai yore gaatzor zaibói lla hókum díye rár, yóggwa ttu gaatzor giyyégoi. Baade yóggwa éhon or bútoze urí ítara re meémandari gorát doijje. **40** Zeñtté beil gólizargoi, zetará ttu ñoilla-boñoilla biyaram ola biyaraimma asé, ítara beggúne tará re Isár hañse ainné, aar íba ye tará re fottí ekzon or uore át dídi gom goijjé. **41** Boóut zon ottu bút ókkol óu eén hoói guzori neeillé de asé, “Tuñí óilade Allar Fual” Montor híine íba Mosih de siné de hétolla, íba ye híin ore dómkí dí matitó no dito. **42** Baade din óiye rár, Isá neeli ekkán bocótí-sára zagat giyyé; aar manúc ókkole íba re tuwai-tuwai dóijjegai. Ítara íba re ítara héntu zaitogói no dito saái; **43** montor íba ye ítara re hoiyé de, “Añr ttu ar cóor ókkol ot óu Allar raijor baabute tobolik gorár zorur, kiyólla-hoilé Añré hétolla beh díferá gíyeh.” **44** Yárbaade íba Yohúdiyar mujilíc-hána ókkol ot tobolik gorát accíl.

5 Ek din zeñtté Isá Genesáret Ðiír kul ot tíyai accíl, manúc ókkole íbar sairó ñak ottu ñeláñeli gorí-gorí Allar kalam fúnat accíl. **2** Íba ye ñiír hañsa loi duyán noow deikké, zín ottu zailla ókkole lami ítara zal dúifelat accíl. **3** Íba héntu ekkán noow ot uiñtégoi, ziyán óilde Sáimon or, baade íba re noow gán kul ottu ekkágori duré loizaitó hoiyé. Tarfore íba boói noow ttu táí manúc ókkol ore taalim diyat doijje. **4** Zeñtté íba ttu taalim diya óiye, íba ye Sáimon ore hoór de, “Noow gán mur fanít loizai ekkúf mas sai bolla zal félo.” **5** Sáimone zuwabe hoór de, “Úzur, añára raitbór meénnot gorí kessú nó fai. Toóu Tuñí zettót hoór, añí zal félaiyum.” **6** Ítara zal félaiye rár, edún mas foijjé zeén níki ítara zal fári zargoi. **7** Hétunot ítara ítara ze sáañti ókkol oinno noow ot asé ítara re icára gorí mataiyé, zeéne aái ítara re modot goré. Tói tará aái duní noow eddúr bóijje, zeén níki híin ñufóm-ñufóm óiye. **8** Híyan deki Sáimon Fitore Isár foot fori hoór de, “Malik, añr héntu zoogói; añí toh gunágar manúc.” **9** Kiyólla-hoilé ítara hédun mas faiyé de hétolla íba edde íbar fúañti zetará accíl ítara beggún kúb taajup óigilgoi. **10** Héndilla, Zebedair fuain Yakub edde Yohánna yó, zetará accíl Sáimon or sáañti. Isá ye Sáimon ore hoór de, “No ñoorac, ehón ottu lóti tui manúc dóribi.” **11** Tarfore ítara ítara noow gún kul ot ainné, aar hárr kessú eri íbar fisáli doijje. **12** Ekbar Isá

ekkán cóor ot accíl, hére kuruse furaiya ezon manúc accíl. Yóggwa ye Isá re deikké rár, uúñtoi fori íba re fóriyat gorér de, “Ó Malik, Tuñí sailé añré pak-sáf gorí faribá.” **13** Isá ye Nizor át barái yóggwa re dóri hoór de, “Añí saái; pak-sáf óizogoi.” Tói éhon or bútoze yóggwa ttu kurus biyaram giyyégoi. **14** Baade Isá ye yóggwa re nicót goijjé de, “Yián honókiyo re no hoiyó, bóke zai nizoré imam or hañse dahógói, aar tuñí pak-sáf óiyo de híyan maincór hañse gobá ó fan, Muúsa ye hókum díye de hé kurbani dogói.” **15** Lekin Isár hóbor aró bicígori fóligiyoi, aar becábici manúc ókkol íbar hotá ókkol fúni bolla edde nizor biyaram ókkol ottu gom ói bolla aát tákito. **16** Montor íba Nize egazá-egazá bocótí-sára zagat zai dua goittó. **17** Ek din zeñtté Isá ye taalim der, hére hoozzon Férocí edde Córíyot or alem ókkol boirá accíl, zetará aiccé de óilde Galil or fottí fara ttu, Yohúdiya ttu, edde Jerúsalem ottu. Aar biyaraimma ókkol ore gom gorí bolla Mabud or kudurut Isár fúañti accíl. **18** Hé októót hodún maincé ek añtur manúc ore bisánat góri boói ainné; ítara kucíc goijjíl de, yóggwa re gór or bútoze gólai Isár muúntu eri bolla. **19** Montor zeñtté ítara manúc or zam olla bóuli yóggwa re bútoze loizaibár rasta nó faa, hétunot ítara gór or sád or uore uiñtégoi, aar sáni bay yóggwa re bisána cóo manúc ókkol or mazéhale Isár muúntu lamaidiyé. **20** Ítarar iman deki Isá ye hoór de “Dustó, tor guná maf gorídiya gíyeh.” **21** Híyane alem ókkole edde Férocí ókkole báfat doijje de, “E Manúc cwa hon, zibá ye kuféri gorér? Siríf Alla bade guná maf gorífaroya hon asé?” **22** Isá ye ítara báfani re zani, ítara re zuwabe hoór de, “Tuáñra dile-dile héndilla kiyá báfor?” **23** Hoité hon nán aásan, ki ‘Tor guná maf gorídiya gíyeh,’ aar náki, ‘Urí añt?’ **24** Lekin Añr ttu tuáñra re yán zanaidito monehoór, e duniyait guná maf goríbar kémota Manúc or Fua ttu asé.” Tói íba ye añtur manúc cwa re hoór de, “Añí toré hoóir, ut, tor bisána tulí looi gór ot zaagói.” **25** Yóggwa éhon or bútoze ítara muúntu uiñté, aar nize neñi accíl de bisána wa tulí looi Allar taaríf gorí-gorí gór ot giyyégoi. **26** Híyane ítara beggún taajup óigiyoi, aar Allar taaríf gorát doijje. Ítara kúb ñoorazai hoór de, “Aijja añára harhána deikkí!” **27** Yárbaade Isá baárkule zai deké de, Leévi nam or ézzon házana-tulóya házana tulé de gór ot boói táikke. Íba ye yóggwa re hoór de, “Añr fisáli doro.” **28** Hétunot yóggwa hárr kessú eri urí íbar fisáli doijje. **29** Baade Leévi ye nizor gór ot Isá lla eggwá ñoñr hána goijjé; aar

ítarar fúañti háito boicccé de hére házana-tulóya ókkol edde oinno manúc ókkol ðoóñr ek dol accíl. **30** Féroci ókkole edde ítarar alem ókkole íbar ummot ókkol or hañse endilla cékayot gorát doiije, “Tuáñra házana-tulóyar edde gunágar ókkol or fúañti kiyá hána-fina hoo?” **31** Isá ye ítara re zuwabe hoór de, “Araimma ókkol ottu toh ðaktor no lage, montor biyaraimma ókkol ottu beh lage. **32** Añi touwár dawot dito aicci de forhésgar ókkol ore no, bólke gunágar ókkol ore.” **33** Ítara Isá re hoór de, “Yaháyar ummot ókkole toh egazá-egazá ruza raké edde dua goré, héndilla Férocir gúne yó goré, montor Tuáñr gúne toh hána-fina bad dede náí.” **34** Isá ye ítara re hoór de, “Dulá fúañti tákite kí tuáñra boiraitta re ruza rakái faribá? **35** Montor eén din aibó, zeñtté dulá re ítarar hañsottu loiféla zaybo, héñtte ítara din híin ot ruza rakíbo.” **36** Íba ye ítara re e meésal lan óu hoiyé, “Honókiye toh noya fucák ottu ekkágori fári looi furan ekgwát tali dede náí; zodi dilé toh noya wa yó fári zayboi, aar noya wa ttu loiyé de tali gán óu furan nwát no háribo. **37** Héndilla, honókiye noya anggur or roc ore furan samarar hóillat raké de náí; zodi rakíle toh noya roc cúne hóilla gún fárifelai golizaybói, aar hóilla gún óu borbad zayboi. **38** Hétolla, noya anggur or roc ore noya samarar hóillat raká fore. **39** Honókiye toh furan anggur or roc hái baade noya anggur or roc háito azzu goré de náí, kiyólla-hoilé tee hoó de, ‘furan nún beh beétor.’”

6 Ekbar eén óiye, ebaadot-or-din Isá giyuñr kuñrá báy zaar, aar íbar ummot ókkole giyuñr túr ókkol tulí áte ðoli-ðoli háat doiije. **2** Montor hodún Féroci ye hoór de, “Ebaadot-or-din ziyán goríbar maná, tuáñra híyan kiyá gorór?” **3** Isá ye ítara re zuwabe hoór de, “Tuáñra kí yíán úddwa nó foró, zeñtté Dawud edde íbar sáañti ókkol ottu búk laiggil, héñtte íba ye kii goijjíl dé? **4** Íba ye toh Allar gór ot goíllegoi, aar Allar hañse peec goijjá ruṭi looi háail, zíin siríf imam ókkole bade ar honókiye háibar ezazot náí. Íba ye híin nizor sáañti ókkol ore yó diíl.” **5** Tarfore Isá ye ítara re hoór de, “Manúc or Fua óilde ebaadot-or-din or Malik.” **6** Aro éggwa ebaadot-or-din Isá mujilíc-hánat góli taalim diyat doiije; hére ézzon endilla manúc accíl, zar den át tan fúaigiyo. **7** Alem ókkole edde Féroci ókkole íba ye ebaadot-or-din gom goré né háas nozor di saái táikke, zeéne ítara íbar uore elzam lagaibár mouka faa. **8** Montor íba ye ítarar báfani re zani, át fúana manúc cwa re hoór de, “Uró, eré mazé tiyogai.” Tói

yóggwa urí tíaíye. **9** Tarfore Isá ye ítara re hoór de, “Añi tuáñra re ekkán súwal gorí, ebaadot-or-din gom ham goríbar zayes asé né náki hóraf goríbar? Foran basaibár né náki hálak goríbar?” **10** Íba ye sairómikka ítara beggún or uzu saái, manúc cwa re hoór de, “Tuáñr át tan baró.” Tói yóggwa ye héndilla goijjé, hétunot yóggwar át tan agor ðóilla gom óigiyo. **11** Montor ítara ttu bicí guccá urígiyo, aar ezzon loi ezzone biyasana gorát doiijegoi de, ítara ttu Isá re kii gorá foribó. **12** Hé din ókkol ot ek din, Isá dua gorí bolla eggwá faár or uore uiṭṭégoi, aar fura rait Allar hañse dua gorát haraiyé. **13** Zeñtté din óiye, íba ye Nizor ummot ókkol ore matai ítara ttu baró zon basíloiye, zetará re íba ye sáhabi hoi lokób diyé. **14** Ítara óilde: Sáimon zaré íba ye Fitor nam diyé, edde íbar báí Enderiyas; aar Yakub, Yohánna, Filíp, Bartólomiyo, **15** Moti, Tómas, Alfáiyas or fua Yakub, Sáimon zibá re Zélot hoó, **16** Yakub or fua Yohúdah, edde Yohúdah Iskáriyet zibá dóridoya óoil. **17** Isá ítarar fúañti lami aái ekkán fúainna zagat tíaíye; hére íbar ðoóñr ek dol ummot accíl, fúañti aro becábici manúc ókkol óu accíl zetará óilde Yohúdiyar, Jerúsalem or, Ṭayár or, edde Sídon or doiijar hañsar, **18** zetará íbar boiyan fúni bolla edde ítarar biyaram ottu gom ói bolla beh aiccé. Aar zetará re hóraf jine duk der, ítara re gom gorá gíyeh. **19** Manúc beggúne íba re súibar kucíc goijjíl, kiyólla-hoilé íba ttu taakot neeli zai beggún ore gom gorát doiije. **20** Isá ye Nizor ummot ókkol or uzu saái hoór de: “Mubarek tuáñra zetará gorif, kiyólla-hoilé Allar raijjo toh tuáñrar. **21** Mubarek tuáñra zetará ehón búka, kiyólla-hoilé tuáñra re bóraidíya zaybo. Mubarek tuáñra zetará ehón hañdoór, kiyólla-hoilé tuáñra ánciba. **22** Mubarek tuáñra zeñtté maincé tuáñra re Manúc or Fuar zoriya nafórot goré, maárum goré, ínca goré, edde bodnam goré. **23** “Hé din kúci goijjó, edde kúciye fál maijjo, kiyólla-hoilé fúno, asman ot tuáñra lla ðoóñr bocci asé. Héndilla toh ítarar bafdáda ókkole nobi ókkol ore yó goittó. **24** Montor afsús tuáñrar uore zetará tuangor, kiyólla-hoilé tuáñra toh tuáñrar cúk beggún eré faifelaiyo. **25** Afsús tuáñrar uore zetará yala feṭ bórai faroór, kiyólla-hoilé tuáñra búka óiba. Afsús tuáñrar uore zetará yala áncor, kiyólla-hoilé tuáñra ferecan óiba edde hañdahari goríba. **26** Afsús tuáñrar uore zeñtté manúc beggúne tuáñrar nam goré, kiyólla-hoilé héndilla toh ítarar bafdáda ókkole misá nobi ókkol ore yó goittó. **27** “Lekin tuáñra zetará fúnor, Añi tuáñra re hoóir:

nizor duccon ore muhábbot goijjó; zetará tuáñra re nafórot goré, ítara re bálai goijjó; 28 zetará tuáñrar uore gozzob deh, ítara re borhot diyo; zetará tuáñra re bodsólluk goré, ítara lla dua goijjó. 29 Zee niki tuáñre ek galsaba sái suwar mare, ítare oh ďák óu fíraidiyo; zee niki tuáñr saddor loizagói, ítare tuáñr kuruta yó loizaitó maná no goijjó. 30 Zee niki tuáñr ttu mage, ítare diiyo; aar zee niki tuáñr jiníc loizagói, ítar ttu fírai no magiyó. 31 Maincóre undilla goró zendilla tuáñra soó de, ítara tuáñre goróuk. 32 “Zodi tuáñra cúdu tuáñra re muhábbot goré de ítara re muhábbot goró, tóoile súwab kiyólla faiba? Kiyólla-hoilé gunágar ókkole úddwa toh nizoré muhábbot goré de ítara re muhábbot goré. 33 Aar zodi tuáñra cúdu tuáñra re bálai goré de ítara re bálai goró, tóoile súwab kiyólla faiba? Kiyólla-hoilé gunágar ókkole úddwa toh héndilla goré. 34 Zodi tuáñra fírai faibar acá goró de hé manúc ítara re beh udár dóh, tóoile súwab kiyólla faiba? Kiyólla-hoilé gunágar ókkole úddwa toh gunágar ókkol ore udár déh, zeéne beggún fírai faa. 35 Montor tuáñra nizor duccon ore muhábbot goró, ítarar bálai goró, aar kessú fírai faibar acá no gorí udár dóh; tói tuáñra lla boccíc ďoóñr tákibo, aar tuáñra Alla Tálar fuain tóoriba, kiyólla-hoilé Íba Nize yó toh nacúkur edde hóraf manúc ókkol or uore rahám goré. 36 Rahám dil ola ó, zendilla tuáñrar Baf óu rahám dil ola. 37 “Ar ezzon or hosúri no doijjo, tói tuáñrar hosúri yó dóra no zaybo. Ar ezzon ore hosúrbon no tóoraiyo, tói tuáñra re yo hosúrbon tóora no zaybo. Maf gorídiyo, tói tuáñra re yó maf gorídiya zaybo. 38 Diiyo, tói tuáñra re yó diiya zaybo. Sibi-sibi edde lari-lari baái fore fángori gom mafe tuáñrar kussát ďálidiya zaybo. Kiyólla-hoilé tuáñra ze mafe doo, tuáñra re yó hé mafe beh diiya zaybo.” 39 Isá ye ítara re e meésal lan óu diyé, “Ek ańdá ye kí arek ańdá re fońt dahái fare? Tará duní zon kí gańt ot no foribó né? 40 Cárít toh nizor ustat or túaro ďoóñr no, lekin zar ttu niki furafuri cíkka óizagoi, íte nizor ustat or dóilla beh óibo. 41 “Tuńí tuáñr báí or suk ot asé de hál lan kiyá dekór, montor tuáñr nizor suk ot asé de hodda gán toh ót no gorór? 42 Tuńí zettót tuáñr suk ot asé de hodda gán no dekór, tói tuńí tuáñr báí ore keéngori hoór de, ‘Bái, ańí tuáñr suk ottu hál lan neelaiféłai?’ Ó munafék! Age tuáñr nizor suk ottu hodda gán neelaiféłó, baade tuáñr báí or suk ot asé de hál lan neelai bolla sáf góri dekíba. 43 “Kiyólla-hoilé gom gas ot toh hóraf gula dóre de náí,

aar hóraf gas ot gom gula dóre de náí. 44 Ze honó gas ore yíbar gulaye beh síná zah. Kiyólla-hoilé maincé toh keńřabon ottu ďuńir gula no fare, yáh keńřar záli ttu anggur no fare. 45 Gom manúce nizor dil or gom zomaiya ttu gom mún neela; aar hóraf manúce nizor dil or hóraf zomaiya ttu hóraf fun neela. Kiyólla-hoilé zar dil díne furaiya, nizor muké híin beh hoó. 46 “Tuáñra zettót Ańí zíin hoói híin amól no goró, tói Ańré kiyólla, ‘Malik, Malik,’ ďako? 47 Zee niki Ańr hańse aiyé aar Ańr boiyan fúni amól goré, íte har dóilla de Ańí tuáñra re daháir: 48 Íte óilde endilla ezzon manúc or dóilla, zee niki gór banaibárcot mur gori meri kurí cíl ot mazé buniyadi ďáille. Zeńtté faníban aái hé gór gán ot dósadiye híyan ore lari nó fare, kiyólla-hoilé híyan toh mozbut gori bana giyé. 49 Lekin zee niki fúni amól no goré, íte óilde endilla ezzon manúc or dóilla, zee niki honó buniyadi no ďáli merir uore ekkán gór banaiyé. Tói zeńtté faníban aái hé gór gán ot dósadiye, híyan éhon or bútoře fori ebbe nac óigiyoi.”

7 Zeńtté Isá ttu manúc cún ore híin beggún boiyan goijjá óiye, Íba Kaparnahúm cóor ot giyyé. 2 Héře ézzon ek cót fóous or cáap or bicí adorja gulam biyarame moron-moron óiye. 3 Hé cáap pwá ye Isár baabute fúinne rár, Yohúdir hoozzon murubbi re íbar hańse diferái Íba re aros goijjé de, aái yóggwar gulam mwa re gom goittó. 4 Ítara Isár hańse aái íba re becábicí fóriyat goijjé, eén hoói, “Hé manúc cwa Tuáñr e modot tán or laayek; 5 kiyólla-hoilé yóggwa ye ańárar koum ore muhábbot goré, aar ańárar mujilíc-hána gán yóggwa ye beh banaidiyé.” 6 Hétunot Isá ítarar fúańti zaat doijje, lekin íba zeńtté gór or hańsáhańsi foóńicce, cáap pwá ye hoozzon dustó diferái íba re hoór de, “Malik, Nizoré ar duk no diyó, kiyólla-hoilé Tuńí ańr gór or sal or nise aibár ańí laayek no; 7 hétolla ańí nizoré Tuáñr hańse aibár laayek bouli nó báfi. Siríf muké hoó, tói ańr gulam gom óizayboi. 8 Kiyólla-hoilé ańí nize yó ar ezzon or hókumot or tole así, aar fóous ókkol ańr nise asé. Ańí ezzon ore, ‘Zaa,’ hoilé, íte zaa, ar ezzon ore, ‘Ai,’ hoilé, íte aiyé, aar ańr gulam ore, ‘Yían gor,’ hoilé, íte híyan goré.” 9 Híyan fúni Isá taajup óigiyoi, aar zetará íbar fisá dori accíl ítarar híkka fíri hoór de, “Ańí tuáñra re hoóir, Ańí ettór ďoóñr iman Isráili ókkol or bútoře úddwa loot nó fai.” 10 Zetará re diferá gýl ítara gór ot waafes aái, gulam mwa re gom óiya loot faiyé. 11

Baade eén óiye, yárbaade Isá Nain nam or ekkán farat giyyé, fúañti íbar ummot ókkol edde ɔóñr ek dol manúc óu giñl. **12** Íba cóor or geit̃ or ɔáke foónicce de októť, maincé eggwá muruda baáre loizar, íte óilde ítar maar lehár ek fua, aar maa wa accíl rari. Cóor ottu ɔóñr ek dol manúc híbar fúañti accíl. **13** Malik ottu híba re deki, híba lla feťfuijje, baade íba ye híba re hoór de, “No hañdiyó.” **14** Baade íba ɔáke aái tabut twa súiye, aar muruda boói loizar de ítara tíaigiyoi. Íba ye hoór de “Ó nojuan, Añi toré hoóir, uť!” **15** Hétunot muruda wa urí boiccé aar hotá howát doijje. Baade Isá ye ítare ítar maar hañse waafes diifélaiye. **16** Híyane manúc beggún or bútoře ɔoor góligiyoi, aar ítara Allar taarif gorát doijje, eén hoói, “Añárar bútoře eggwá ɔóñr nobi uitté. Alla ye Nizor bonda ókkol ore modot goittó aiccé.” **17** Íbar hé hóbor híyan Yohúdiya agagurat edde sairó ɔák or elaka beggún ot fóligiyoi. **18** Yaháyar ummot ókkole yóggwa re híin beggún or baabute zanaiyé. **19** Tói Yaháya ye nizor duwá ummot ore matai, ítara re Malik or hañse yíán fusár goittó diferáiyé, “Tuñi aibár hotá asé de íba né, aar náki añára ar ezzon olla entezar goittám?” **20** Zeñtté manúc ítara íbar hañse foónicce, ítara hoór de, “Añára re bápťismadoya Yaháya ye diferáiyé deh, Tuáñr ttu yíán fusár goittó, ‘Tuñi aibár hotá asé de íba né, aar náki añára ar ezzon olla entezar goittám?’” **21** Hé októť íba ye boóut zon ore biyaram, afot, edde hóraf jin ottu basaiyé; íba ye boóut zon añdá re yó dekíbar toóufik diiyé. **22** Íba ye ítara re zuwabe hoór de, “Zoo, tuáñra ziín deikkó edde fúinno híin Yaháya re zanoói, ki hoilé, añdá ye dekéř, lenge añřer, kurus biyaraimma pak-sáf ór, náfange fúner, muruda zinda ór, edde gorif ókkol or hañse kúchóbor tobolik gorá zar. **23** Mubarek ubá, zee niki Añr baabute andacá no goré.” **24** Zeñtté Yaháyar hóborgwa gún bacá lóiyé, íba ye manúc cún ore Yaháyar baabute howát doijje de, “Tuáñra moidan zagat kii saitó giñla dé? Boiyare lore de hóir né? **25** Arnóile tuáñra kii saitó giñla dé? Barik hoor findá manúc né? Zetará dami-dami hoor fiñdí rongzuingga gorí sole, ítara toh razmohól ot éna. **26** Tóoile tuáñra kii saitó giñla dé? Honó nobi né? Ói, Añi tuáñra re hoóir, nobir túaro ɔóñr ézzon ore. **27** Yóggwa óilde ubá, zibár baabute pak-kalam ot endilla asé, ‘Soó, Añi Añr hóborgwa re Tuáñr age diferáir, zibá ye Tuáñr age Tuáñr foñť toiyar goríbo.’” **28** Añi tuáñra re hoóir, mayafuain dor ttu zormo óiye de ítarar bútoře bápťismadoya

Yaháyar túaro ɔóñr honókiye náí; montor toóu úddwa Allar raijot zee niki ebbe cóñřo, íte yóggwar túaro ɔóñr.” **29** Zeñtté tamám manúc ókkole edde házana-tulóya ókkole híyan fúinne, ítara Yaháyar hañsóttu bápťisma loi, Alla insáfwa de maniloiyé. **30** Montor Féroci ókkole edde Córiyot or alem ókkole Yaháyar hañsóttu bápťisma no loi, Alla ttu ítara lla accíl de moksót ore inkar gorídiye. **31** Isá ye aró hoór de, “Añi e zobanar maincóre kii loi fúwan goittám? Ítara kiyór ɔóilla? **32** Ítara undilla fuain dor ɔóilla, zetará bazar ot boói ezzon ore ezzone matai hoó de, ‘Tuáñra lla añára bací bazaiyí, montor tuáñra nó naso; tuáñra lla añára bilak or zari gaiyí, montor tuáñra nó hañdo.’” **33** Kiyólla-hoilé bápťismadoya Yaháya aái zettót honó ruťi edde anggur or roc ná háa, tuáñra hoó de, ‘Íba re búte faiyé.’” **34** Aar Manúc or Fua aái zettót háafiya goréř, tuáñra hoór de, ‘Soó, ezzon fitác edde córabkur, házana-tulóya edde gunágar ókkol or dustó.’” **35** Lekin giyan sóiyi de híyan giyane soloya beggúne sábut goijjé.” **36** Féroci ókkol ottu ezzone Isá re nizor fúañti hána háito dawot diyé, tói íba hé Féroci war gór ot zai háito boiccé. **37** Hé cóor gán ot eggwá hóraf mayafua accíl; Isá Féroci war gór ot hána háar de híyan híba ye zani faijjé rár, híba ye fúañti fattór or háñrit góri añtor ainné, **38** aar íbar fis ottu țéng or ɔáke tíaí, hañdi-hañdi íbar țéng ore nizor suk or faní lói bízat doijje, baade nizor matár sul loi híin fuñsídiye edde íbar țéng ot appá dí añtor gún ɔálidiye. **39** Íba re dawot diyé de Féroci wa ye híyan deikké rár, yóggwa ye nizoré nize hoór de, “Zodi e Manúc cwa nobi óito, tóoile toh íbá ye zainto, Nizoré hone edde hondilla mayafua ye dórer deh; mayafua wa toh hóraf.” **40** Hétunot Isá ye yóggwa re zuwabe hoór de, “Sáimon, Añr ttu tuáñre kessú hoibár asé.” Sáimone hoór de, “Ustat, hoói faribá.” **41** “Ezzon hozzo-dooya ttu dui zon hazzodár asé: ekzone loiyé fañs cóť dinár, ar ekzone loiyé fonzaic dinár. **42** Ítara zettót híin fúñzi no farer, yóggwa ye ítara duní zon or hozzo maf gorídiye. Tóoile ítara ttu yóggwa re hone bicí muhábbot goríbo?” **43** Sáimone zuwabe hoór de, “Añr kíyal mozin, zar niki bicí hozzo maf gorídiya gíyeh íte.” Íba ye yóggwa re hoór de “Tuñi sóiyi kíyal goijjó.” **44** Baade mayafua war híkka firi íba ye Sáimon ore hoór de, “Tuñi e mayafua wa re dekor né? Añi toh tuáñr gór ot ailám; tuñi Añré foo dúí bolla faní nó doo, montor íbáh ye nizor suk or faní lói Añr foo bízai nizor sul loi fuñsídiye. **45** Tuñi toh Añré

appá nó doh, montor Añí bútoře góilli lóti ibáh ye Añr foot appá díya bon nó goré. **46** Tuñí Añr matát tel nó doh, montor ibáh ye Añr foot añtor dálidiye. **47** Hétolla Añí tuáñre hoóir, ibáh ttu bicí guná tákile yo, ibáhr hé guná híin maf gorídiya gíyeh, kiyólla-hoilé ibáh ye bicí muhábbot goijjé. Montor zaré hom maf gorídiya gíyeh, yóggwa ye hom muhábbot goré.” **48** Baade Isá ye híba re hoór de, “Tuáñr guná maf gorídiya gíyeh.” **49** Hétunot zetará íbar fúañti hána háito boiccíl, ítara afós ot howáhoi gorér de, “Íbá hon, zibá ye guná úddwa maf goré?” **50** Lekin Íba ye mayafua wa re hoór de, “Tuáñr imane tuáñre basaiyé; cántir sáañte zoogói.”

8 Yárbaade, Isá cóore-cóore edde fara-fara zai Allar raijor baabute kúchóbor boiyan gorát edde tobolik gorát doiije. Baró zon nún íbar fúañti accíl, **2** hodún beřiyáin óu accíl zetará re hóraf jin ókkol ottu edde ocúk ókkol ottu gom gorá gíyl; tará óilde: Moriyam, zibá re Makdálini ďake, zibár bútotu háñt twa bút neeillíl; **3** Joanna, zibá Hérud or uzir Kuzar or bou; Sosánna edde aró boóut beřiyáin ókkol. Tará nizor cómbotti lói ítarař hédmot goittó. **4** Ek din zeñtté fottí cóor ottu đoóñr ek dol manúc Isár hañse aái zoma óiye, íba ye ítara re e meésal lan hoiyé: **5** “Ezzon bis cínřoya bis cínřto neeillé. Yóggwa ye cínřer de októť, hodún bis rastarhañsat foijjíl; híin or uore úñran foijjíl, aar faik ókkole híin háifelaiye. **6** Hodún bis cíl or uore foijjíl, híine tocă nó faa ísafe barí urár fúañti-fúañti fúaigiyoi. **7** Hodún bis keñřabon ot foijjíl, fúañti keñřabon barí urí híin ore sibi raikké. **8** Lekin ar hodún bis gom zobin ot foijjíl; híin barí uitté, aar ek cóť gun fósol dóiije.” Isá ye híin hoói baade guzori hoór de, “Zar ttu fúnibar han asé, yóggwa ye fúno.” **9** Isár ummot ókkole íba ttu fusár gorér de, “E meésal lan or maáni kii?” **10** Íba ye hoór de, “Allar raijor gufoni re zainto tuáñra re beh diya gíyeh, montor oinno kiyó re meésal dí etollá howá zah, zeéne ‘ítara sailé yo no deké, aar fúnile yo no buzé.’” **11** “Meésal lan or maáni óilde yíán: bis óilde Allar kalam. **12** Rastar hañsat foijjé de híin óilde uitará zetará fúne, montor íbilíce aái ítarař dil ottu kalam loizagói, zeéne ítara iman nu ané aar nejat no faa. **13** Cíl zobin ot foijjé de híin óilde uitará, zetará kalam fúnile kúcir sáañte kobul goré; aar mozbut cínřyor nó gasá de hétolla kessú októ lla beh iman raké, montor entán ot fore de októť fissá mare. **14** Ze bis keñřabon ot foijjé híin óilde

uitará, zetará kalam fúne, montor zindigi haraité-haraité sintabáfaniye, dón-doulote, edde e zindigir ayaci-kúciye ítara re sibi raké, hétolla ítarař gula fagi no tooñre. **15** Lekin ze bis gom zobin ot foijjé híin óilde uitará, zetará cúndorgori edde gom dile kalam fúne, híin ore mozbut gori dóri raké, edde sobór or sáañte gula dóra. **16** “Honókiye toh serak dórai tára lói záfai no raké, yáh falong or tole yó no raké, bółke boiřónir uore éna raké, zeéne bútoře aiyé de ítara foór deké. **17** Kiyólla-hoilé endilla surha kessú náí zín zahér no óibo, aar endilla lukaiya yó kessú náí zín zana no zaybo aar kúláhala no óibo. **18** Hétolla tuáñra hondilla gori fúnor úñciyar, kiyólla-hoilé zar ttu niki asé, yóggwa re aró diiya zaybo; montor zar ttu niki náí, yóggwa ye nizor ttu zín asé bóuli báfe híin úddwa loiféla zaybo.” **19** Yárbaade Isár maa edde báiyain íbar héře aiccé, montor maincór zam olla bóuli ítara íbar íñyot foóñsi no farer. **20** Ezzone íba re hóbor díye de, “Tuáñr maa edde báiyain baáre tíyai táikke, ítara Tuáñr llói milto sar.” **21** Montor íba ye ítara re zuwab diyé de, “Añr maa edde báiyain óilde itará, zetará Allar kalam fúne edde híin amól goré.” **22** Ek din Isá edde íbar cárít tun ekkán noow ot uitté, tarfore íba ye ítara re hoór de, “Aiyó, ańára đířr oh hañsar farái.” Baade ítara bacá lóiyé. **23** Zaité-zaité Isá gúm ot forigiyói. Aar đířt eggwá đoóñr tuwán aiccé, hétolla noow gán faní lói bórízargoi, aar ítara hótorat foijjíl. **24** Ítara íbar hañse aái íba re tulídi hoór de, “Ustat, ó Ustat, ańára morizayrgói!” Tói íba urí boiyar edde fanír goir ore dóoñk diyé, baade híin bon ói támaigiyoi. **25** Íba ye ítara re hoór de, “Tuáñrar iman hoře?” Ítara đoorraigiyói aar taajup ói ezzon ore ezzone hoór de, “Íbá hon? Íbá ye de boiyar edde faní re úddwa hókum díle híine íbár hotá manel!” **26** Yárbaade ítara Geraseníol or mulluk ot foóñicce, ziyán Galil Đířr muńtu. **27** Zeñtté Isá kul or uore laimmé, hé cóor or ezzon búte-faiya manúc íba llói dola óiye. Yóggwa ye hoorsuor no fińđer de bicí deri lóti, aar yóggwa gór ot no táki hobor ókkol ot tákito. **28** Zeñtté yóggwa ye Isá re deikké, guzori íbar muńtu uuińtoi forigiyói, aar eggwá đoóñr abase hoór de, “Ó Isá, Alla Tálar Fua, Tuáñr ttu añr llói kii ham asé?” **29** Kiyólla-hoilé Isá ye hé hóraf jin nwá re yóggwar bútotu neeliai bolla hókum dífelaiye. Hé jine yóggwa re bicí faito; aar yóggwa re síyol edde berí lói bańdí faára dí raká zayto, montor híin sířifelaito, aar búte

yóggwa re moidan zagat loizaitói. **30** Isá ye yóggwa ttu fusár gorér de, “Tor nam kii?” Yóggwa ye hoór de, “Zák” kiyólla-hoilé yóggwar bútoore boóut twa bít góli táikke. **31** Híine Isá re fóriyat gorát doiije de, híin ore oṭái gañt ot zaito hókum no di bolla. (Abyssos g12) **32** Hére faár or uore ḑoóñr ek zák cúwor sorer de accíl. Bút tune íba re fóriyat gorér de, híin ore hé cúwor gún or bútoore góiltoi ezazot di bolla. Tói íba ye híin ore ezazot diyé. **33** Hétunot hé bít tun manúc cwa ttu neeli aái cúwor gún or bútoore góillegoi, tói cúwor or zák kwa faár or haíndá báy zure ḑiñt duñrdiyé aar ḑufí morigiyói. **34** Cúwor soroya gúne zeñtté kii óiye de deikké, ítara duñrdiyé aar cóor ot edde gang zagat híyan hóbor díye. **35** Baade kii óiye de sai bolla manúc ókkol neeillé. Manúc ítara Isár hére aái loot faiyé de, ze manúc cwa ttu bít neeillé yóggwa hoor findí edde sóiyi únice Isár téng or ḑáke boirá asé; hétunot ítara ḑooraiyói. **36** Zetará hé maamela gán deikké ítara búte-faáil de manúc cwa keéngori gom óigiyoi de híyan hé manúc ítara re zanaíyé. **37** Hétolla Gerasénioi or sairó ḑák or manúc beggúne Isá re ítarar héntu zaitogói hoiyé, kiyólla-hoilé ítara ttu bicí ḑoor laigge; hétunot íba noow ot urí waafes aáigiyoi. **38** Ze manúc cwa ttu bít ókkol neeillí, yóggwa ye íbar fúañti zai bolla íba re fóriyat goijjíl, lekin Isá ye yóggwa re eén hoói duñraidiyé, **39** “Tuñi tuáñr gór ot waafes zoogói, aar Alla ye tuáñr lla ze ḑoóñr ham goijjé híin boiyan gorógói.” Baade yóggwa giíyégói, aar Isá ye yóggwa lla ze ḑoóñr ham goijjé híin cóor or agagura howát doiije. **40** Zeñtté Isá waafes aiccé, manúc ókkole íba re estekbal goijjé, kiyólla-hoilé ítara beggúne íba lla soóni táikkil. **41** Hétunot Záiras nam or ézzon manúc hére aiccé, zibá mujilíc-hánar ézzon sóddar; yóggwa ye Isár foot fori íba re fóriyat gorér de, yóggwar gór ot ai bolla; **42** kiyólla-hoilé yóggwa ttu siríf eggwá baró bosórja zérfua accíl deh, aar híba morizargói. Íba zaar de októť, manúc ókkole íba re ṭélaṭeli gorát accíl. **43** Hére eggwá mayafua accíl, zibá ttu kúnzari zár de baró bosór óiye, zibá ye nizor ttu accíl de beggún ḑaktór ókkol or hañse hóssa gorífelai baade yo honókiyor át ot gom ói nó fare; **44** híba Isár fisór ttu aái íbar hoor or hañra súiye, tói éhon or bútoore híbar kúnzari bon óigiyoi. **45** Hétunot Isá ye hoór de, “Añré hone súiye?” Beggúne inkar gorí baade Fitore hoór de, “Úzur, manúc ókkole de zam gorí Tuáñre sairó ḑák ottu ṭélaṭeli gorér.” **46** Montor Isá ye hoór de, “Honnwággwa ye Añré súiye, kiyólla-hoilé Añr ttu

kudurut neeli giíyé de Añf hoi faijji.” **47** Hé mayafua wa ye zettót híba hári nó fare de deikké, híba hafi-hafi aái íbar muuntu uúñtoi foijjé, aar híba ye kiyólla íba re súiye, edde híba keéngori éhon or bútoore gom óigiyoi, híin manúc beggún or muuntu boiyan goijjé. **48** Isá ye híba re hoór de, “O zii, tor imane toré gom goijjé; cántir sáañte zaagói.” **49** Íba hotá howát accíl de októť, mujilíc-hánar sóddar gwar gór ottu ezzone aái hoór de, “Tuáñr zii zuraigiyói; Ustat ore ar ferecan no goijjó.” **50** Montor Isá ye híyan fúni yóggwa re hoór de, “No ḑooraiyó, siríf biccác goró, híba gom óizayboi.” **51** Íba gór ot foóñsi, Fitor, Yohánna, Yakub, edde mayafuar bafímaa re bade ar honókiyo re íbar fúañti bútoore góilto nó deh. **52** Manúc beggúne híba lla hañdaharí gorát edde buk kilat accíl, montor Isá ye hoór de, “No hañdiyó, ibáh moiijjé de no, bólke gúm zar deh.” **53** Hétunot ítara íba re lói áñcat doiije, kiyólla-hoilé ítara hoi fare de ki híba morigiyói. **54** Montor íba ye híbar át dóri ḑak mari hoór de, “O zii, uṭ.” **55** Hétunot híbar foran waafes aiccé, aar híba éhon urí tíyaiye. Baade háito híba re kessú dii bolla Isá ye ítara re hókum díye. **56** Híbar bafímaa taajup óigilgoi; montor ziyán óiye híyan honókiyo re no hoi bolla Isá ye ítara re nicót goijjé.

9 Yárbaade Isá ye baró zon carít tun ore fúañti matai, fottí ḑoilla bít ókkol neelai bolla edde biyaram ókkol gom gorí bolla ítara re taakot edde kémota diiyé. **2** Tarfore ítara re Allar raijor baabute tobolik gorí bolla edde biyaraimma ókkol ore gom gorí bolla difeṛáiyé. **3** Íba ye ítara re hoiyé de, “Foñt olla kessú no loizaiyó: no larí, no hóilla, no hána, no ṭiañ, no battí hoor. **4** Tuáñra ze gór ot góliba hé gór ot cóor híyan ottu neeli nó zoogói foijjonto tákiyo. **5** Ze cóor or maincé tuáñra re kobul no goré, hé cóor ottu neeli zaibarcót tuáñrar téng or tollar ḑuñl zárifelaiyo, zeéne híine ítarar ulḑa gobá déh.” **6** Baade ítara rowana loi fara-fara zai, kúchóbor tobolik gorát edde fottí zagat biyaraimma ókkol ore gom gorát doiije. **7** Galil or hókumot-goróya Hérude, zín ór híin beggún fúinne. Yóggwa bicí oulzóul ot forigiyói, kiyólla-hoilé hodúne hoór de, Yaháya mora ttu zinda óiye deh, **8** hodúne hoór de, Eliyas zahér óiye deh, ar hodúne hoór de, agor zobanar nobi ókkol ottu nobi eggwá zinda óiye deh. **9** Montor Hérude hoór de, “Yaháyar holla de añf nize haríféla báilam, montor ibá hon zar baabute añf endilla hotá ókkol fúnir?” Híya lóti yóggwa ye Isá re

sai bolla kucíc gorát accíl. **10** Sáhabi gún waafes aái, ítara ziín-ziín goijjíl híin Isá re zanaiyé. Tarfore Íba ye ítara re fúañti looi, Betsáida hoó de fara híyan ot zuitégori giíyégói. **11** Montor manúc ókkole híyan hoi fari Íbar fisá doijjil. Íba ye ítara re kúcir sáañte kobul goijjé, aar ítara re Allar raijior baabute taalim diyé edde biyaraimma zetará ttu gom óibar zorurot accíl ítara re gom goijjé. **12** Zeñtté beil gólibar óktó óiye, hé baró sáhabi gúne aái Isá re hoór de, “Manúc cún ore duñraido, zeéne tará atehañsór fara ókkol ot edde gang zaga ókkol ot zai kessú háibar edde tákibar zaga tuwai fare, kiyólla-hoilé añára así de yíán toh ekkán bocóti-sára zaga.” **13** Montor Íba ye ítara re hoór de, “Hái bolla kessú tará re tuáñra doo.” Ítara hoór de, “Añára ttu de fañs swá ruṭi edde duwá mas bade ar kessú náí, hétolla añára zai tará beggún olla hána kini aintámboi né?” **14** Kiyólla-hoilé hére fañs ázar foijjonto beṛaáin accíl. Montor Isá ye Nizor cárit tun ore hoór de, “Tará re ek ḍaái ot fonzaic zon fonzaic zon gorí buágaro.” **15** Ítara héndilla gorí beggún ore buágaraíye. **16** Íba ye hé fañs swá ruṭi edde duwá mas sún looi asman or uzu saái híin ore borhot diyé, aar Íba ye híin ore báñgi-báñgi cárit tun ore diiyé, manúc ókkol ore baridi bolla. **17** Tará beggúne feṭ bóri háíye. Baade ze tukura ókkol basigiyói, cárit tune híin feñṛai looi fura baró báñir bóijje. **18** Ekbar zeñtté Isá hálíga dua gorér, aar cárit tun Íbar fúañti accíl, Íba ye ítara ttu fusár gorér de, “Maincé Añí hon bouli hoó?” **19** Ítara zuwabe hoór de, “Tuñí bóle bápṭismadoya Yaháya; ar hodúne hoó de, nobi Eliyas; ar hodúne hoó de, agor zobanar nobi ókkol ottu nobi eggwá zinda óiye deh.” **20** Tói Íba ye ítara re hoór de, “Lekin tuáñra kii hoó, Añí hon?” Fitore zuwabe hoór de, “Allar Mosih.” **21** Isá ye ítara re horagori úñciyari díye, aar híyan honókiyo re no hoitó maná goijjé. **22** Íba ye hoór de, “Manúc or Fua ttu hámaha boóut dóilla duk faa foribó; aar murubbi, ḍoóñr imam edde alem ottu inkar háibo; Íba re mariféla zaybo, montor tin din ot din zinda gorá zaybo.” **23** Baade Íba ye ítara beggún ore hoór de, “Zodi honókiyo ttu Añr fisáli aitó monehoó, yóggwa ttu nizoré inkar gorífela foribó, aar fottí din nizor kúruc boói Añr fisáli dora foribó. **24** Kiyólla-hoilé zee niki nizor zan basaitó saá, yóggwa ye híyan háraifelaibo; montor zee niki Añr wasté nizor zan háraifele, yóggwa ye híyan basaifélaibo. **25** Kii laf, zodi honókiye tamám duniyai faa, montor nizoré háraifele yáto lussán gorífele? **26**

Zee kiyé Añré lói edde Añr hotá re lói córma, yóggwa re lói Manúc or Fua ye yó córmaibo zeñtté Íba Nizor, Baf or, edde pak fírista ókkol or mohímaye aibó. **27** “Lekin Añí tuáñra re sóiyi hoóir, eṛé endilla hodún manúc tíyaiya asé, zetará Allar raijio nó dekéte no moribó.” **28** Híin hoói añcto din ánik baade, Isá ye Fitor ore, Yohánna re, edde Yakub ore looi faár or uore dua goittó uiṭṭégói. **29** Zeñtté Íba dua gorát accíl, Íbar siyárar súrot bodoligiyói, aar Íbar hoor dóla ói sossóhat doijje. **30** Asimbit dui zon manúc Íba llói hotá hoór, ítara óilde Muúsa edde Eliyas. **31** Tará mohímar sáañte dahá dí Íbar entehal or baabute hoóil, ziyán Íba ye Jerúsalem ot fura goríbar asé. **32** Fitor edde Íbar sáañti ókkol mur gúm ot accíl; lekin ítara támfaiye rár, Isár mohíma edde Íbar fúañti tíyai táikke de manúc duní zon ore deikké. **33** Baade hé manúc duní zon Íbar héntu zaargói de óktót, Fitore Isá re hoór de, “Úzur, gom óiye añára eṛé así. Añára eṛé tin nán ṭambu ṭaki: ekkán Tuáñr lla, ekkán Muúsa lla, edde ar ekkán Eliyas olla.” Háleke Íba nize kii hoór nize no zane. **34** Fitore híyan hoór de óktót, ekkán miyúla aái ítara re saífelaiye. Ítara miyúla lói saízargoi de óktót, ḍooraaíl. **35** Aar hé miyúla ttu eggwá abas aiccé, ki hoilé, “Íbá óilde Añr Fua zibá re Añí basfloiyyi; Ibár hotá fúnol!” **36** Abas swá aiccá ói baade, ítara Isá re gaaga loot faiyé. Ítara híyan aiddone raikkíl, aar ziín deikké híin hé din ókkol ot honókiyo re nó zana. **37** Tarfor din zeñtté ítara faár ottu lami aiccé, ḍoóñr ek dol manúc Íba llói dola óiye. **38** Dol ottu ezzone guzori hoór de, “Ustat, añí Tuáñre fóriyat gorír, añr fua wa re ekká soó, íte añr lehár ek fua. **39** Ítare eggwá jine dóre, aar íte éhon guzoran mare; yíba ye ítare dórforabai gal ottu féna ané. Yíba ye ítare bicí duk di mockil or sáañte beh eride. **40** Añí Tuáñr cárit tun ore hé jin nwá neelaifélaito fóriyat goijjílám, lekin ítara nó fare.” **41** Hétunot Isá ye zuwabe hoór de, “Ó iman sára edde baañra nosól, Añí tuáñrar fúañti-fúañti aró hotókkal tákitam? Hotódin tuáñra re bordac goittám? Tuáñr fua wa re eṛé anó.” **42** Fua wa aiyér de óktót, ítare búttwa ye merít ańsári dórforabat doijje. Montor Isá ye hé hóraf jin nwá re dóoñk dí, fua wa re gom gorífelaiye, baade ítare baf or hañse waafes diifélaiye. **43** Aar manúc beggúne Allar ḍoóñr kudurut deki taajup óigiyo. Ze óktót ítara fottíkiye Isá ye goittó de híin beggúne taajup óiye, Íba ye Nizor cárit tun ore hoór de, **44** “Tuáñra Añr e hotá iín han ot gólai loo, ki hoilé, Manúc or Fua

re manúc ókkol or át ot gosáidiya zaybo.” 45 Lekin ítara hotá híyan no buzító. Ítara ttu híyan lukaiféla gíyeh, zeéne ítara buzí no fare; aar ítara íba ttu hé hotár baabute fusár goitté yó dooraitó. 46 Yárbaade ítara bútore ekkán barábari cúru óiye, añárar bútore ebbe doónr honnwá hoói. 47 Lekin Isá ye ítara dil or báfani re zani, eggwá gura fua looi íbar dake góri tíyagaraiye, 48 baade ítara re hoór de, “Zee kiyé e fua wa re Añr name kobul goré, yóggwa ye Añré kobul goré deh; aar zee kiyé Añré kobul goré, yóggwa ye Añré difeřáiyé de íba re kobul goré deh; kiyólla-hoilé tuáñra beggún or bútore zee niki ebbe cóñro, yóggwa óilde ebbe doónr.” 49 Yohánna ye zuwabe hoór de, “Úzur, añára deikkí de, eggwá maincé Tuáñr name bít neelar; yóggwa añárar fúañti Tuáñr fisáli nó dóre de hétolla, añára yóggwa re maná goijjí.” 50 Lekin Isá ye hoór de, “Yóggwa re maná no goijjó, kiyólla-hoilé zee niki tuáñrar ulda no, yóggwa toh tuáñrar híkka.” 51 Isá asman ot urí zaibar din zettót dake aiyér, íba ye Jerúsalem ot zai bolla fáisela loiyé. 52 Íba ye Nizor age hóborgwa ókkol difeřáiyé; ítara zai Samári ókkol or ekkán farat góille, zeéne íba lla beggún entezam gorí fare. 53 Lekin héřiyar manúc ókkole íba re kobul nó goré, kiyólla-hoilé íbar sofór accíl de Jerúsalem or uzu. 54 Íbar cárit Yakub edde Yohánna ye híyan dekí hoór de, “Malik, añára hókum dí asman ottu ooin nazil gorí ítara re fúraifelaitam né?” 55 Montor íba fíri ítara re jéjjeřai hoór de, “Tuáñra hondilla ruhr de tuáñra no zano; 56 kiyólla-hoilé Manúc or Fua manúc ókkol or zan dónco gorífelaito aiccé de no, bókke basaitó aiccé deh.” Baade ítara ar ekkán farat giiyói. 57 Zeñtté ítara rasta báy zaar, manúc ézzone Isá re hoór de, “Tuñí zeřé zaiba, añí yó héře Tuáñr fisáli zaiyum.” 58 Isá ye yóggwa re hoór de, “Cíyal ókkol ottu gañt asé aar faik ókkol ottu bahá asé, montor Manúc or Fua ttu Nizor matá rakí bolla úddwa honó mikká zaga náí.” 59 Baade íba ye ar ezzon ore hoór de, “Añr fisáli aiyó.” Montor yóggwa ye hoór de, “Malik, age añí zai añr baf ore dohón gorí aiyí.” 60 Isá ye yóggwa re hoór de, “Muruda ókkole ítara nizar muruda re dohón goróukgoi, montor tuñí zai Allar raijor baabute tobolik gorógói.” 61 Ar ekzone yó hoór de, “Malik, añí Tuáñr fisáli aiccúm, lekin age añí añr gór or manúc ottu bidai loi aiyí.” 62 Montor Isá ye yóggwa re hoór de, “Zee niki nizor át nahol ot rakí fissá saái táke, yóggwa Allar raijor laayek no.”

10 Yárbaade, Malike oinno hóittor-dui zon ore yó basíloiye, baade ítara re dui zon dui zon gorí Nizor age oh cóor edde zaga fottí ekkán ot difeřáiyé, zeřé-zeřé íba Nize zaibo. 2 Íba ye ítara re hoiyé de, “Fósol de bicí asé, montor dooiya bicí hom; hétolla fósol or Malik ore fóriyat goró, íbar fósol daito dooiya ókkol difeřái bolla. 3 Zoo; fúno, Añí tuáñra re bérásóol-or-sóor dóilla góri rangkuñir or mazé difeřáir deh. 4 Honó tiañr zali, hóilla, yáh cenřar no loizaiyó; aar foñt ot honókiyo re sólam no diyó. 5 “Tuáñra ze gór ot góliba, age hoibá de, ‘E gór ot cánti óuk.’ 6 Zodi héře cántir laayek honó manúc táke, tuáñrar cánti yóggwar uore tákibo; montor zodi no táke, tuáñrar héře fíri aázayboi. 7 Hé gór ot tákiyo, aar ítara ziín dee híin háiyó edde fiíyo, kiyólla-hoilé muzur toh nizor muzuri faibar laayek. Góre-góre no gúriyo. 8 “Tuáñra ze cóor ot góliba, zodi héřiyar maincé tuáñra re kobul goré, tóoile tuáñra re ziín dee híin háiyó. 9 Héřiyar biyaraimma ókkol ore gom goijjó, aar ítara re hoibá de, ‘Allar raijjo tuáñrar dake aáigiyoí.’ 10 Lekin tuáñra ze cóor ot góliba, ítara zodi tuáñra re kobul no goré, tóoile híyan or goldi-goldi zai hoibá de, 11 ‘Tuáñrar cóor or dúil ziín añárar tęng or tollat bazí táikke, añára híin úddwa tuáñrar ulda zárifelair; montor monot raikkó de ki, Allar raijjo dake aáigiyoí.’ 12 Añí tuáñra re hoóir, oh dinSódom cóor or túaro hé cóor híyan ottu bicí bordac gorá foribó. 13 “Ó Korazin, tor uore afsús! Ó Betsáida, tor uore afsús! Kiyólla-hoilé ze keramoti ham ókkol tuáñrar bútore gorá gíyl híin zodi řayár edde Sídon ot gorá zayto, ítara sálarcoř fiñdí edde saí or uore boói boóut age lóti touwá gorífelaito. 14 Montor kiyamot or din řayár edde Sídon or maincór ttu tuáñrar túaro hom bordac gorá foribó. 15 Aar tui, ó Kaparnahúm, toré kí asman ot bazé fán uore tulá zaybo? Toré toh nise fatalfur ot éna félaidiya zaybo.” (Hadēs g86) 16 Isá ye Nizor cárit tun ore hoór de, “Zee niki tuáñrar hotá fúne, yóggwa ye Añr hotá fúne deh; zee niki tuáñra re inkar goré, yóggwa ye Añré inkar goré deh; zee niki Añré inkar goré, yóggwa ye Añré difeřáiyé de íba re inkar goré deh.” 17 Baade hóittor-dui zon nún kúcir saáñte waafes aiccé, aar hoór de, “Malik, Tuáñr name toh bít ókkole úddwa añárar hotá manel!” 18 Isá ye ítara re hoór de, “Cóitan bijili somke fángori asman ottu forer de Añí deikkí. 19 Soó, Añí tuáñra re háf edde bissúr uottú áñřibar edde duccon or hárr taakot or uore kémota diiyí; honó kessú ye tuáñra re hótí gorí no

faribó. **20** Lekin bít-ferot ókkole tuáñrar hotá mane de híyane kúci no óiyo, bóлке etollá kúci ó, kiyólla-hoilé tuáñrar nam asman ot leikká asé.” **21** Hétunot Isá ye Pak-Ruhr kúciye furaiya ói hoór de, “Ó Baf, asman zobin or Malik, Añí Tuáñre cúkuriya gorír, kiyólla-hoilé Tuñí iín giyani edde buddíman ókkol ottu lukai rakí gura fuain dor dóilla maincór hañse zahér goijjó. Ói, ó Baf, kiyólla-hoilé Tuáñr ttu híyan bicí fosón laiggé. **22** “Añr Bafe Añré hárr kessú diifélaíye. Fua hon de híyan Bafe bade ar honókiye no zane, aar Baf hon de híyan Fua edde Fua ye zaré zahér goittó saá, yóggwa ye bade ar honókiye no zane.” **23** Baade íba ye cárit tun or uzu fíri, zuitégori hoór de, “Mubarek suk uíin zííne tuáñra deké de híin deké. **24** Kiyólla-hoilé Añí tuáñra re hoóir, boóut nobi edde baáñcca ókkole tuáñra zíin deké híin deké bolla azzu goijjíl, montor nó deké; tuáñra zíin fúnor híin fúni bolla yó azzu goijjíl, montor nó fúne.” **25** Ekbar, Córiyot or ézzon aleme tíyai Isá re entán gorí bolla hoór de, “Ustat, ofúrani zindigi miras faite añr ttu kii gorá foribó?” **(aiñios g166)** **26** Íba ye yóggwa re hoór de, “Córiyot ot kii leikká asé? Tuñí hére kii foijjó?” **27** Yóggwa ye zuwabe hoór de, “Mabud tuáñrar Alla re nizor fura dile, fura zane, fura bole, edde fura demake muhábbot goríba, aar nizor atehańsór maincóre nizor dóilla muhábbot goríba.” **28** Isá ye yóggwa re hoór de, “Tuñí sóiyi zuwab diyó; héndilla gorógoi, tói tuñí basibá.” **29** Montor nizoré sóiyi sábut goríbar kíyale, yóggwa ye Isá ttu fusár gorér de, “Añr atehańsór manúc hon?” **30** Isá ye zuwabe hoór de, “Ekbar, ezzon manúc Jerúsalem ottu nise Jerikót zaar, aar hére dahanit or át ot foijjé. Ítara yóggwar hoorsuor kúlifelai mara-dóra gorí, adá mora félai giyyégoi. **31** Baade eén óiye, ezzon imam hé fońt báy zaar, íba ye manúc cwa re deki fachaři giyyói. **32** Héndilla, ezzon Leévi yó hé zagat aái manúc cwa re deki, fachaři giyyói. **33** Lekin ezzon Samári sofór goitté-goitté manúc cwar ínyot fońnicce; aar íba ttu manúc cwa re deki fetfuijje. **34** Tói íba manúc cwar hañse aái, yóggwar zohóm ókkol ot tel edde anggur or roc dálidi faṭṭi bańdídíye; baade yóggwa re nizor gadár uore tulí looi, ekkán musáfer-hánat loizai kermos goijjé. **35** Tarfor din íba ye dui dinárṭiań neelai musáfer-hánar girós ore dii hoór de, ‘Yóggwá re kermos goró; zodi iín or túaro bicí hósso ó, añí ailé tuáñre fúnzifelaiyum.’ **36** “Hé ísafe, hé tiní zon ottu, dahanit or át ot foijjé de manúc cwar atehańsór manúc honnwá bóuli táaro?” **37** Alem mwa ye zuwab der de, “Yóggwar uore rahám

goijjé de íba.” Isá ye yóggwa re hoór de, “Zoo, tuñí yó héndilla gorógoi.” **38** Isá edde íbar cárit tun zaite-zaite ekkán farat góille; aar hére Morota nam or eggwá mayafua ye íba re nizor gór ot estekbal goijjé. **39** Híba ttu Moriyam nam or eggwá bóin accíl, zibá ye Malik or téng or gurat boói íbar hotá fúnat accíl. **40** Lekin Morota meéman ókkol olla waán-yián nal goitté-goitté ferecan óigiyoi; híba ye Isár hañse aái hoór de, “Malik, Tuñí no deké né, añr bóine hédmot or ham beggún añí ezzon ore lagaidi táikke dé? Híba re añré modot goittó hoóna.” **41** Malike híba re zuwabe hoór de, “Morota, Morota, tui boóut kessú lói sintabáfanat edde ferecanit asós, **42** lekin ekkán siz beh zoruri; Moriyame hé gom híssa gán basíloíye deh, aar híyan híba ttu loiféla no zaybo.”

11 Ekbar eén óiye, Isá ye ekkán zagat dua gorér; íba ttu dua goijjá óiye rá, Nizor cárit tun ottu ezzone íba re hoór de, “Malik, añára re dua gorá ciko, zendilla Yaháya ye yó nizor ummot ókkol ore cíkaiye.” **2** Íba ye ítara re hoór de, “Zeńtté tuáñra dua goró, hoibá de: ‘Ó Baf, Tuáñr nam pak mana zouk. Tuáñr raijjo aiyóuk. **3** Añára re añárar din or hána dine doo. **4** Añárar guná ókkol maf goró, kiyólla-hoilé añára nize yó de zetará añára llói hosúri goré ítara re maf gorí. Añára re entán ot foitto no diyó.’” **5** Baade Isá ye ítara re hoór de, “Dóro, tuáñra honó ezzon ottu eggwá dustó asé, yóggwa ye dustór hañse raitnicít zai hoór de, ‘Dustó, añré tin nwá ruṭi udár dóh; **6** kiyólla-hoilé añr ek dustó íbar sofór ot zaite-zaite añr hére aiccé, aar íba re hábai bolla añr ttu kessú náí.’” **7** Hétunot bítottu táí dustó ye hoór de, ‘Añré ferecan no goijjó, ehón duwar bańdá, aar añr fuain edde añí bisánat. Añí urí tuáñre kessú dii no faijjum.’” **8** Añí tuáñra re hoóir, zodi íte nizor dustó de hétolla urí kessú no diilé yo, toóu yóggwar warawori magar zoriya íte urí yóggwa ttu zedún lager hédun diibo. **9** “Hétolla Añí tuáñra re hoóir, mago, tuáñra re diiya zaybo; tuwo, tuáñra faiba; duwar baijjo, tuáñra lla duwar kúla zaybo. **10** Kiyólla-hoilé zee niki mage, íte faa; zee niki tuwa, íte tuwai faa; aar zee niki duwar baijja, ítar lla kúla zaybo. **11** “Tuáñrar bútoe endilla baf hon asé, nizor fua ye mas magilé, mas or bodol háf diibo dé? **12** Yáto anda magilé, bissú diibo dé? **13** Hé ísafe, zodi tuáñra hóraf ói baade úddwa tuáñrar fuain dore gom-gom jiníc ókkol dii zano, tóoile tuáñrar asmani Bafe kiyá zetará íba ttu mage ítara re Pak-Ruh no diito?” **14** Ek

din Isá ye eggwá buk bít dáfai; bít twa neeligiyói rár, buk accíl de manúc cwa mati faijé, aar híyane manúc ókkol taajup óigiyoi. **15** Lekin ítara hodúne hoór de, “Íbá ye bít ókkol dáfa de bít ókkol or sóddar Belzebul or taakote.” **16** Ar hodúne Íba re entán gorár niyote, Íba ttu ekkán asmani nicán dabi goijjé. **17** Montor Íba ye ítara báfani re zani ítara re hoór de, “Ze raijot faáta-faáti foida ó, híyan toh fána óizagoi; aar ze gór ot faáta-faáti foida ó, híyan óu toh borbad óizagoi. **18** Héndilla, zodi Cóitan nizor ulða nize ó, ítara raijjo keéngori tìkibó? Kiyólla-hoilé tuáñra hoór de, Añí bít dáfai de Belzebul or taakote. **19** Toóu zodi Añí bít dáfai de Belzebul or taakote de óile, tóoile tuáñrar fuain de har taakote dáfa dé? Hétolla tuáñrar bisarhar óibo de ítara. **20** Lekin zodi Añí bít dáfai de Allar taakote de óile, tóoile toh Allar raijjo tuáñrar hére aáigiyoi. **21** “Zeñtté honó boluwar manúce átiyar fiñdí nizor gór ore faáradí táke, héñtte yóggwar sámán ókkol héfazot táke. **22** Montor zeñtté yóggwar túaro boluwar ezzon aái yóggwa re hámla gorí háraifele, héñtte manúc íba ye yóggwar hé átiyar loizagói zín or uore yóggwa ye bóraca goittó, aar ziti zín luj goijjé híin bařidiféle. **23** “Zee niki Añr híkka no, yóggwa Añr ulða; aar zee niki Añr fúañti dola no goré, yóggwa ye cínraciñttá goré. **24** “Zeñtté honó manúc ottu hóraf jin neele, héñtte hé jin nwá fúana zaga ókkol ot zai aram goittó zaga tuwa. Montor no faile, nizoré nize hoó de, ‘Añí añr gór ot waafes zaiyumbói, zentú añí neeliaicci.’ **25** Yíba zeñtté waafes aiyé, hé zaga gán sáf goijjá edde tìk goijjá lootfa. **26** Baade yíba zai aró háñt twa nizor túaro hóraf jin ané, aar híin gólí hére táke. Tói hé manúc cwar fisór hálot agor hálot or túaro bicí hóraf óizagoi.” **27** Isá ye híin hoór de októ, manúc or dol ottu eggwá mayafua ye guzori Íba re hoór de, “Mubarek oh feř zibát Tuñí accíla, edde oh dud zín Tuñí háaila.” **28** Hétunot Isá ye hoór de, “Montor uitará aró bicí mubarek, zetará Allar kalam fúne edde amól goré.” **29** Zettót bicí manúc zoma ór, Isá ye howát cúru doiije de, “E zobanar manúc ókkol hóraf; itará nicán dabi goré, montor itará re nobi Yunus or nicán bade ar honó nicán diya no zaybo. **30** Kiyólla-hoilé Yunus zendilla Ninivi cóor or maincór Ila nicán óoil, héndilla Manúc or Fua yó e zobanar maincór Ila nicán óibo. **31** Kiyamot or din Cibá mulluk or rani e zobanar manúc iín or fúañti urřbo, edde itará re hosúr díbo; kiyólla-hoilé híba ye toh Sóloman or buddír hotá fúni bolla duniyair céc matá ttu aiccíl, aar soó, Sóloman

or túaro doónr Ekzon iñyót asé. **32** Kiyamot or din Ninivi cóor or manúc ókkol e zobanar manúc iín or fúañti tíyaibo, aar itará re hosúr díbo; kiyólla-hoilé ítara toh Yunus or elan fúni touwá goijjíl, aar soó, Yunus or túaro doónr Ekzon iñyót asé. **33** “Honókiye toh serak dórai lukai yáh báñir or tole raké de náí, bólke boiřonir uore beh raké, zeéne zetará bútoire aiyé ítara foór deké. **34** Tuáñr gaar serak óilde tuáñr suk; hétolla tuáñr suk gom asé de óile, tuáñr guñra gaa foóre furaiya óibo; montor hóraf óile, tuáñr gaa yó andáre furaiya óibo. **35** Hétolla úñciyar, tuáñr bútoire ze foór asé híyan zeéne andár no. **36** Zodi tuáñr guñra gaa foóre furaiya táke aar honó ekkán híssa andár ot no táke, tóoile toh híyan endilla furafuri foór ot óibo, zendilla serak dóraile tuáñre foór deh.” **37** Isá ye híin boiyan gorér de októ, ezzon Féroci ye Íba re nizor fúañti hána háito dawot diyé; tói Íba bútoire zai háito boiccé. **38** Íba ye hána háibar age át nó dúwe de dekí, Féroci wa ammúk óigiyoi. **39** Malike yóggwa re hoór de, “Tuáñra Féroci ókkole fiyalar edde tál-basón or baárdák beh sáf goró, montor tuáñrar bútoire toh lalóse edde hórafiye furaiya. **40** Ó fool ókkol, baárdák banaiyé de Alla ye ki bútor or dák óu nó bana né? **41** Tuáñra ttu zín asé híin sótka gorífelo, tói tuáñra Ila hárr kessú pak-sáf óizayboi. **42** “Ó Féroci ókkol, tuáñrar uore afsús! Kiyólla-hoilé tuáñra toh fudinar, tesfatar edde kétir hárr kisím or hák or doc bák or ek bák doo, lekin Allar insáf edde muhábbot ore bad diféle. Tuáñra ttu iín óu gorón accíl aar uúin óu bad no don accíl. **43** “Ó Féroci ókkol, tuáñrar uore afsús! Kiyólla-hoilé tuáñra toh mujilíc-hána ókkol ot uñsol tokkar hadírat boitó fosón goró, edde bazare-bazare sólám faito soó. **44** “Tuáñrar uore afsús! Kiyólla-hoilé tuáñra toh ót no faa de hobor or dóilla, zín or uottú maincé hoi no fari áñre.” **45** Hétunot Córiyot or alem ókkol ottu ezzone Isá re hoór de, “Ustat, Tuñí de híin hoói añára re yó beizzoti gorór.” **46** Íba ye hoór de, “Ó alem ókkol, tuáñrar uore yó afsús! Kiyólla-hoilé tuáñra toh maincór uore endilla fuñzá tulído, zín boité duk, montor tuáñra nize toh fuñza híin ot eggwá ooñl úddwa no lago. **47** “Tuáñrar uore afsús! Kiyólla-hoilé tuáñra toh nobi ókkol or hobor ore banaituló, aar ítara re marifélail de tuáñrar bafdáda ókkole. **48** Héengori tuáñra gobá dó de ki, tuáñra tuáñrar bafdáda ókkole goijjíl de ham ot razi asó; kiyólla-hoilé nobi ókkol ore marifélaíye de toh ítara, aar ítara hobor ore banaituló de tuáñra. **49** Hétolla toh Alla

ye Nizor giyane endilla hoiyé, ‘Añí ítarar hañse nobi edde rosúl ókkol diferáiyum, ítara héntu hodún ore marifélaibo edde hodún ore zulúm goríbo. 50 Hétolla duniyair foidayecir héntte lóti zedún nobi ókkol or lou báca gíyeh, híin beggún or zimmadar óibo de e zobanar manúc ókkol, 51 Abel or lou wóttu lóti oh Zakaríyahr lou foijjonto, zibá re kurbani-gáñr edde pak zagar mazémaijja kún gorá gíyeh. Ói, Añí tuáñra re hoóir, híin or zimmadar óibo de e zobanar manúc ókkol.’ 52 “Ó Córíyot or alem ókkol, tuáñrar uore afsús! Kiyólla-hoilé tuáñra toh buddír sabí loifélaio; tuáñra nize yó nó gólo, aar góler de ítara re yó oónsi raikkó.” 53 Isá héntu neeli zaargói de októť, alem edde Férocí ókkole rak gorí íba re ñoilla-boñoilla súwal ókkol gorát doijje, 54 aar héengori ítara íba re íbar hotá lói hol ot félaíto sooñi gorí accíl.

12 Hé októť, zeñtté edún ázar-ázar manúc zoma óiye zeén níki ítara ezzon or uore ezzon forer, Isá ye ebbe age Nizor cárít tun ore howá cúru goijjé de ki, “Férocí ókkol or cúťar ottu únćiyar táikko, yáni ítarar munaféki ttu. 2 Kiyólla-hoilé zahér no óibo de héndilla honó jiníc gúijja náí, aar zana no zaybo de héndilla honó jiníc lukaiya náí. 3 Hé ísafe, tuáñra zín andár ot hoiyó, híin foór ot fúna zaybo; aar zín bútor or kamára ókkol ot fúfcucaiyo, híin gór or sád or uottú elan gorá zaybo. 4 “Ó añr dustó ókkol, Añí tuáñra re hoóir, uitará re no ñooraiyó zetará haiya re kotól goré montor yárbaade ar kessú gorí faribár no táke. 5 Lekin Añí daháidi tuáñra ttu haré ñooro foribó: Ubá re ñooro zibá ttu tuáñr haiya re marifélaí baade zuzuk ot félaidibar kémota asé. Ói, Añí tuáñra re hoóir, íba re beh ñooro. (Geenna g1067) 6 Fañs swá fiañijja ki hom ťiañ loi no bese né? Toóu híin or bútotu Alla ye eggwá re yó no foóra. 7 Becók tuáñrar matár sul úddwa beggún íba ttu gona asé. No ñooraiyó, tuáñrar kimot boóut fiañijja ókkol or túaro bicí. 8 “Añí tuáñra re hoóir, zee niki Añré maincór muúntu ckar goré, yóggwa re Manúc or Fua ye yó Allar fírista ókkol or muúntu ckar goríbo. 9 Montor zee niki Añré maincór muúntu inkar goré, yóggwa re Allar fírista ókkol or muúntu inkar gorá zaybo. 10 Honókiye Manúc or Fuar hélaf honó hotá hoilé, yóggwa re toh maf gorídiya zaybo; montor zee niki Pak-Ruhr kuféri goré, yóggwa re maf gorídiya no zaybo. 11 “Zeñtté maincé tuáñra re mujilíc-hána ókkol ot, edde hákim edde adikari ókkol or hañse loiza, héntte hondilla yáh kii zuwab

diba yáto kii hoibá de sinta no goijjó; 12 kiyólla-hoilé tuáñra ttu zín howá foribó, híin tuáñra re Pak-Ruh ye hétunot ckaidibo.” 13 Manúc or dol lwá ttu ezzone Isá re hoór de, “Ustat, añr báí ore añár lói miras bák gorífelaito hoó.” 14 Montor íba ye yóggwa re hoór de, “O miyañ, Añré tuáñrar bisarhar yáh bák gorídoya hone banaiyé?” 15 Tarfore íba ye ítara re hoór de, “Hóboroddar, hárr kisím or lalsí ttu basi táikko; kiyólla-hoilé insán or zindigi nizor ťal-ťal dón-cómbottir uore no.” 16 Íba ye ítara re ekkán meésal hoiyé, ki hoilé, “Ezzon dónir zobin ot bicí fósol dóijje. 17 Yóggwa ye nizorgá nize báfer de, ‘Añí kii goittám, añr ttu de fósol zoma rakíbar zaga náí?’ 18 “Yóggwa ye hoór de, ‘Añí endilla goijjúm: añr gudam ókkol báñgífelai ñoóñr-ñoóñr góri banaiyúm, aar añr fósol edde mal-sámana beggún hére rakíyum. 19 Baade añr añr ruh re hoiyúm de, ó ruh, tor ttu boóut bosór olla bicí kúraf asé. Yala cúk gór, háafiya gór edde kúci ták.’ 20 “Montor Alla ye yóggwa re hoór de, ‘Ó fool, aijja raitta de tor zan loiféla zaybo; tói tui zín zoma goijjós híin har óibo?’ 21 “Héndilla óilde manúc ubá, zee niki nizor lla dón zoma goré, montor Allar nozor ot tuangor no.” 22 Yárbaade Isá ye íbar ummot ókkol ore hoór de, “Hétolla Añí tuáñra re hoóir, kii háiyum hoói zindigi lla sinta no goijjó, aar kii fiñdíyum hoói gaa lla sinta no goijjó. 23 Kiyólla-hoilé zindigi toh hánar túaro kimoti, aar gaa toh hoorsuor or túaro kimoti. 24 Hawa ókkol or baabute báfiso; híine toh no cínre, no daa, aar no híin ottu gudam yáh hañja asé; toóu Alla ye híin ore háaba. Tuáñra toh faik ókkol or túaro bicí kimoti. 25 Tuáñra hone sinta gorí nizor hóiyat ore ek gónđa barái faribá de asó? 26 Tuáñra héttirin ham mán úddwa gorí no faille, oinno siz olla kiyá sinta goró? 27 “Fúl ókkol or baabute báfiso, híin keéngori barí uré deh; híine toh no meénnot goré, aar no fúñta hare; montor Añí tuáñra re hoóir, baáñcca Sólomane úddwa yóggwar tamám dón-doulot loi híin ekgwár ñoílla nizoré hánzai faijje de náí. 28 Hétolla, zodi Alla ye moidan or kér ore héndilla góri hánza, zín aijja asé aar hailla ooin ot félaidiya zah; tooile ó hom biccác ola ókkol, íba ye tuáñra re aró hotó hánzaibo fáñllar? 29 Kii háiba yáh kii fííba híin or talac ot fori no táikko; híin or baabute sinta no goijjó. 30 Kiyólla-hoilé duniyair bedini ókkole éna híin beggún or fisé lagi táke, montor tuáñra ttu híin lager de híyan tuáñrar Bafe zane. 31 Yárbodol Allar raijor talac ot táko, tói tuáñra re híin beggún óu diiya zaybo. 32

“Ó bérasóol or gura zák, no ɖooraiyó, kiyólla-hoilé tuáñrar Baf ottu tuáñra re raijjo diiya fosón laiggé. **33** Tuáñrar jiníc ókkol besi sótka gorífelo, aar nizor lla endilla ɖiañr zali toiyar goró zibá furan ói no zagói, yáni asman ot endilla dón-cómbotti zoma goró, zín honódin no fúra, zeɖe sur ɖáke nu aiyé aar fuke nac no goré. **34** Kiyólla-hoilé tuáñrar dón-cómbotti zeɖe, tuáñrar dil tákibo de yó héɖe. **35** “Tuáñra guɖ doh edde serak dórai rakó. **36** Tuáñra yó undilla manúc or ɖóilla ó zetará nizor girós boirat ottu hoñtté waafes aibó de híyan or entezar ot táke, zeéne yóggwa aái duwar baijjaile mottor yóggwa re duwar kúlidi fare. **37** Mubarek goóur uitará zetará re girós ailé sooñi táikka lootfa. Añi tuáñra re sóiyi hoóir, yóggwa ye keeñil bañdi hé goóur ókkol ore hána háito buágaraibo, aar ɖáke aái itara re hána hábaibo. **38** Zodi yóggwa ye adá raitta yáh yárbaade ailé yo itara re toiyar táikka lootfa, tóoile hé goóur ókkol toh mubarek. **39** “Lekin yían zani rakó de ki, zodi góor or giróse sur hoñtté aibó de zainto, yóggwa ye nizor góor ore bañgito no dito. **40** Tuáñra yó toiyar táko, kiyólla-hoilé Manúc or Fua tuáñra no ɖáaro de októót beh aibó.” **41** Hétunot Fitore hoór de, “Malik, Tuñi e meésal lan añára re hoór de né náki beggún ore?” **42** Malike hoór de, “Tóoile eén biccáɖaredde buddíman mazí hon asé, zará itar giróse nizor oinno goóur ókkol or uore zimmadar banaibó, itara re ɖaim or uore hána baɖidi bolla? **43** Mubarek goóur ubá zará nizor giróse waafes ailé ham híin gorér de lootfa. **44** Añi tuáñra re sóiyi hoóir, yóggwa ye nizor tamám cómbottir uore itare zimmadar banaibó. **45** Lekin zodi hé goóure nizor dile-dile endilla hoó, ‘Añr girós aité boóut deri asé,’ aar íte oinno goóur edde bañdi ókkol ore marat dore edde háafiya gorí ɖuúl óizagoi; **46** tóoile hé goóur or girós eén din ot aibó, ze din íte yóggwa aibó de no ɖáare, edde eén októót aibó, ze októót íte hoi no fare. Tói yóggwa ye itare haɖi hán-hán gorífelaibo edde nafórman ókkol or héɖe cámil goríbo. **47** “Ze goóure girós or moncá re zane montor toiyar nó yáto yóggwar moncá mozin nó goré, íte bicí fiɖa háibo; **48** montor zee niki no zani, fiɖa há de héndilla ham goré, íte bicí hom fiɖa háibo. Kiyólla-hoilé zará bicí diiya giyéh, itar ttu bicí dabi gorá zaybo; aar zará bicí gosáidiya giyéh, itar ttu aró bicí maga zaybo. **49** “Añi duniyait ooin zolaidito aiccí deh, zodi age lóti zolaiya óito, Añi keén kúci óitam! **50** Lekin Añr ttu eggwá báptisma loibar asé, yíba nó loi foijjonto Añi keén

ferecanit así! **51** Añi duniyait cánti diito aiccí bóuli ɖáaro níki? Añi tuáñra re hoóir, no, bóлке faáɖa-faáɖi foida goittó aiccí deh; **52** kiyólla-hoilé ehón ottu lóti ek góor or fañs zon manúc alok-alok óizayboi: tin zon dui zon or ulɖa, aar dui zon tin zon or ulɖa. **53** Ítara endilla alok óizayboi: fuar ulɖa baf, baf or ulɖa fua, zérfuar ulɖa maa, maar ulɖa zérfua, bou wór ulɖa hóuri, aar hóurir ulɖa bou.” **54** Íba ye manúc ókkol ore yó hoór de, “Fosím ottu miyúla urér de dekilé tuáñra toratori hoó de, ‘Zór aibó,’ aar borabor héndilla ó. **55** Aar doóinali boiyar bailé hoó de, ‘Gorom foribó,’ aar héndilla ó. **56** Ó munafék ókkol! Tuáñra toh zobin or edde asman or súrot saái moósum forók gorí zano, montor ehón or zobana re kiyá forók gorí no zano? **57** “Tuáñra nize kiyá ziyán sóiyi híyan or fáisela no goró? **58** Zeñtté tuñi tuáñr duccon or fúañti bisarhar or hañse zoo, héñtte foñt ot tákite itar lói maamela hól gorífelaibar kucíc goijjó, arnóile íte tuáñre bisarhar or át ot gosáidibo, aar bisarhare tuáñre fulic or át ot gosáidibo, baade fulice tuáñre ziyól maribó. **59** Añi tuáñre hoóir, tuñi ahéri foicá nó doo foijjonto héntu hálas ói no faribá.”

13 Hé októót héɖe endilla hodún manúc házir accíl, zetará Isá re Galil or manúc uitarár baabute hóbore díyl zetará re baitul-mukaddos ot kurbani dibarcót Filate kotól goijjíl. **2** Isá ye itara re zuwabe hoór de, “Galil or manúc ítarar uore hé docá gán óiye de híyan olla tuáñrar kíyal ot kí itara Galil or oinno manúc beggún or túaro bicí gunágar accíl? **3** Añi tuáñra re hoóir, no, bóлке touwá no goríle, tuáñra beggún óu héndilla hálak óizaybagoi. **4** Yáh ze añráro zon manúc Sílom or minár fori morigiyói, tuáñrar kíyal ot kí itara Jerúsalem ot táke de oinno manúc beggún or túaro bicí gunágar accíl? **5** Añi tuáñra re hoóir, no, bóлке touwá no goríle, tuáñra beggún óu héndilla hálak óizaybagoi.” **6** Tarfore Isá ye e meésal lan hoyé: “Ezzon maincé nizor bagan ot eggwá ɖuñir-gas lagaáil. Yóggwa ye gas swát gula tuwaitó aiccíl, montor eggwá yó nó faa. **7** Hétolla yóggwa ye bagan sóoñloya re hoór de, ‘Saá, añi tin bosór foijjonto e ɖuñir-gas swát gula tuwaitó aiyír, montor eggwá yó nó fai. Yibá re harífela, yibá ye hánnak meɖi kiyá esternal goittó? **8** “Sóoñloya ye yóggwa re zuwabe hoór de, ‘Ó malik, yibá re e bosór óu tákito dóh, añi yibár sairókul ttu kurí fáñic díyum. **9** Baade zodi aiyér de bosór gula dóre, tóoile ɖík asé; montor

zodi no dóre, harífelaiyo.” **10** Ek ebaadot-or-din Isá ekkán mujilíc-hánat taalim der. **11** Hére endilla eggwá mayafua accíl zibá re eggwá hóraf jine biyaraimma banai raikké de añráro bosór óiye. Yóggwa guza accíl, aar bilkúl uzu ói no faitto. **12** Isá ye yóggwa re deki, dake matai hoór de, “O hála, tuñi tuñir biyaram ottu azad óiyo.” **13** Tarfore íba ye yóggwar uore át díye, tói éhon-éhon yóggwa uzu óigiyoi aar Allar taarif gorát doijje. **14** Lekin mujilíc-hánar sóddare, Isá ye ebaadot-or-din biyaraimma gom goijjé de hétolla guccá góri manúc ókkol ore hoór de, “Ham goittó sów din asé; hétolla din híin ot aái gom óiyogai, ebaadot-or-din no.” **15** Montor Malike yóggwa re zuwabe hoór de, “Ó munafék ókkol, tuáñra fottíkiye kí ebaadot-or-din nizor doónra goru re yáh gadá re ura ttu kúli faní hábaito no loizo né?” **16** Tói e mayafua, zibá Ibrahim or zérfua, zibá re Cóitane añráro bosór fán bañdí raikkíl, yóggwá re kí ebaadot-or-din hé bañdá ttu azad gorídiya no zah né?” **17** Íba ye híyan hoiyé rár, íbar muhálef-goróya beggúne córom faiyé; aar íba ye ze taajuippa ham goittó híine awam ókkol beggún kúci óiye. **18** Tói Isá ye hoór de, “Allar raijjo kiyór dóilla? Híyan ore Añi kii loi borabor goittám?” **19** Híyan óilde eggwá hóroir danar dóilla, zibá re ézzon manúce looi nizor kítit lagayégoi; yíba barí urí eggwá gas boinné, aar faik ókkole yíbar déeila ókkol ot bahá bairiné.” **20** Íba ye abar hoór de, “Añi Allar raijjo re kii loi borabor goittám?” **21** Híyan óilde cútar or dóilla, zín ore eggwá mayafua ye looi tokoriban ekkuri tin cér aţat miyáiyé, baade guñra hañi or dola fúli uitté.” **22** Isá cóore-cóore edde fara-fara taalim di-di, Jerúsalem or uzu zaat doijje. **23** Ezzone íba re hoór de, “Malik, nejat foya hom níki?” Íba ye ítara re hoór de, **24** “Siyon doroza báy góli bolla zan-forane kucíc goró, kiyólla-hoilé Añi tuáñra re hoóir, boóut zon góilto kucíc goríbo montor no faribó. **25** Zeñtté gór or giróse urí duwar bañdifelaibo, tuáñra baáre tíyai duwar bajjai-bajjai endilla howát doriba, ‘Ó Malik, añára lla duwar gán kúlo.’ ‘Montor íba ye tuáñra re zuwabe hoibó de, ‘Añi no zani tuáñra horíyar.’ **26** “Hétunot tuáñra howát doriba de, ‘Añára toh Tuáñr fúañti háafiya goijjílám, aar Tuñi añárar rasta-rasta taalim dita.’ **27** “Montor íba ye hoibó de, ‘Añi tuáñra re hoóir, Añi no zani tuáñra horíyar. Kuham-goróya ókkol, tuáñra beggún Añr héntu dur ó.’ **28** “Hére tuáñra hañdahari goríba edde date dat kirkiraibá zeñtté tuáñra dekíba de, Ibrahim, Isahák, Yakub edde tamám nobi ókkol Allar

raijjor bútoe, montor tuáñra re baáre félaidiya gíyeh. **29** Aar manúc ókkol fuk, fosím, uttor, edde doóin ottu aái Allar raijjo háito boibó. **30** Becók, zetará éhon fisé asé, ítara age óizayboi; aar zetará éhon age asé, ítara fisé óizayboi.” **31** Hé októt hoozzon Féroci ye aái Isá re hoór de, “Tuñi e zaga ttu honó mikká zoogói, kiyólla-hoilé Hérud ottu Tuáñre marifeilto monehoór.” **32** Íba ye ítara re hoór de, “Zoo, hé cíyal ore hoibá de, ‘Añi aijja edde hailla bút dáfaiyum edde biyaraimma ókkol ore gom goríyum, aar tin din ot din Añr moksót fura óibo.’ **33** Zeén óibo óuk, Añr ttu aijja, hailla edde foórur uzu sofór gorá foribó; kiyólla-hoilé honó nobir moot toh Jerúsalem or baáre ói no fare. **34** “Jerúsalem, ó Jerúsalem, tui zee niki nobi ókkol ore kotól gorós edde zetará re tor hére diferá gíyeh ítara re cíl or dola maros. Kuúñri-kurá ye zendilla nizor sóo ókkol ore yíbar fak or bútoe zoma gorí raké, héndilla tor fuain dore zoma gorí rakí bolla Añi hotó bar saiýi de asé, montor tuáñra híyan nó soó. **35** Fúno, tuáñrar gór tuáñrar suk or muúntu sáragor óizayboi. Añi tuáñra re hoóir, tuáñra Añré etókkal no dekíba zetókkal tuáñra nó hoó de, ‘Mubarek Ubá zibá Mabud or name aiyér.’”

14 Ekbar eén óiye, ek ebaadot-or-din zeñtté Isá Féroci ókkol or ezzon sóddar or gór ot hána háito giiyé, manúc ókkole íbar uore háas nozor raikkíl. **2** Hére íbar muúntu endilla ezzon manúc accíl zibá ttu fúla biyaram asé. **3** Isá ye alem edde Féroci ókkol ottu fusár gorér de, “Ebaadot-or-din biyaram gom goríbar zayes asé né ná?” **4** Montor ítara nízám mári táikkil. Íba ye manúc cwa re áte dóri gom goijjé, baade duñraidiyé. **5** Tarfore íba ye ítara re hoór de, “Tuáñrar bútoe endilla hon asó, zee niki nizor fua yáh doónra-goru ebaadot-or-din kuwat forilé, yíba re éhon-éhon tulí no loiba de?” **6** Montor ítara híyan or honó zuwab di nó fare. **7** Isá ye zeñtté dawot faiyé de meéman ókkole hondilla gori izzoitta zaga basíloor de deikké, íba ye ítara re ekkán meésal diyé: **8** “Honókiye tuáñre boiraitta hánat dawot dilé, zai yore izzoitta zagat no boiccógói, kiyólla-hoilé óitofare yóggwa ye tuáñr túaro izzotdár ézzon ore dawot diyé. **9** Zodi boiyó, zee niki tuáñre edde íba re dawot diyé, yóggwa ye aái tuáñre hoibó de, ‘Tuáñr zaga gán e manúc cwa re dóo.’ Hétunot tuáñr ttu córom fai, nisor zagat zai buá foribó. **10** Yárbodol, dawot faile, zai yore nisor zagat boiccógói, zeéne zee niki tuáñre dawot diyé, yóggwa ye aái hoó de, ‘Dustó, uoror zagat zai

boiyógói.’ Hétunot tuñí tuáñr fúañti hána háar de ítara beggún or muuntu izzot faiba. **11** Kiyólla-hoilé zee niki nizoré nize doónr kúwala, ítare cóñro gorá zaybo; aar zee niki nizoré nize cóñro kúwala, ítare doónr gorá zaybo.” **12** Baade Isá ye zee niki Íba re dawot diyé yóggwa re hoór de, “Tuñí duúñijjar yáh biyal or hána goríle, tuáñr dustó ókkol ore, báiyain dore, eganaguicci re, yáh atehańsór tuangor ókkol ore dawot no diyó; zodi doh, ítara yó waafes tuáñre dawot di fúñzaydibo. **13** Yár túaro, tuñí hána goríle, lulá, leng, edde ańdá manúc ókkol ore dawot diyo, **14** tói tuñí borhot faiba, kiyólla-hoilé ítara toh tuáñre fúñzaidi no faribó; aar forhéggar ókkol háńcor-or-din zinda ói uríbo de híyala tuñí bodola faiba.” **15** Isár fúañti hána háito boiccc de ítara ttu ezzone híyan fúni hoór de, “Mubarek ubá zibá ye Allar rajjot hána háibo.” **16** Íba ye yóggwa re hoór de, “Ezzon maincé eggwá doónr hána goijjé, aar boót kiyó re dawot diyé. **17** Háñar októ óiye rár, ítara re endilla hoói matai bolla yóggwa ye nizor goóur difeřáiyé, ‘Aiyó, yala beggún toiyar óiye.’ **18** “Montor ítara zon-zon beggúne bahána diyat doijje. Foóilar íte hoór de, ‘Ańí ekkán zaga kinní, ańr ttu híyan saitó zaa foribó; meərbani góri ańré maf goró.’ **19** “Ar ezzone hoór de, ‘Ańí fańs zura doónra-goru kinní, ańí híin hářibo né saitó zair; meərbani góri ańré maf goró.’ **20** “Aró ézzone hoór de, ‘Ańí noya-noya biyá goijjé deh; ańí aái no faijjum.’ **21** “Tói goóur gwá aái tar girós ore híin zanaiyé. Baade gór or giróse guccá góri nizor goóur ore hoór de, ‘Toratori cóor or rasta-rasta edde goldi-goldi zai gorif, mazur, ańdá edde leng ókkol ore angói.’ **22** “Tarfore goóur gwá ye hoór de, ‘Malik, tuñí zeén hókum goijjé héen goijjé óiye, lekin aijjé zaga háli asé.’ **23** “Giróse goóur gwá re hoór de, ‘Baäre rasta-rasta edde fońté-fońté zaa, zai manúc ókkol ore eřé ai bolla mojbur gorif, zeéne ańr gór bórizagói. **24** Kiyólla-hoilé ańí tuáñra re hoóir, zetará re dawot diya giyéh, ítara honókiye ańr hána hái no faribó.” **25** Ekbar zeńtté becábicí manúc Isár fúañti zaat accíl, íba ye fıri ítara re hoór de, **26** “Zee niki Ańr héře aiyé yóggwa ye nizor baf, maa, bou, fuain, báiyain edde bóinain ore, bółke nizor zan ore úddwa Ańré goré de yár túaro hom muhábbot no goillé, yóggwa Ańr ummot ói no fare. **27** Zee niki nizor kúruc no boói Ańr fisáli dore, yóggwa Ańr ummot ói no fare. **28** “Kiyólla-hoilé tuáñrar bútoře endilla hon asé, ekkán minár banaitó sailé age boói nizor ttu

híyan furafuri banai bolla kula de hédun řiań-foicá asé né nai kiyas no goríbo dé? **29** Arnóile toh zeńtté yóggwa ye guijja gán tulí baade guńra tulí no fare, zetará dekíbo ítara beggúne yóggwa re téceraibo, **30** eén hoói, ‘E manúc cwa ye bana cúru goijjıl, montor guńra tulí nó fare.’ **31** “Yáto, endilla baáńcca hon asé, arek baáńcca llói larái goittó zaibar tákile age boói nizor doc ázar fóous lói, nizor hélaf aibó de kuri ázar fóous or mukabela gorí faribó né no faribó kiyas no goríbo dé? **32** No faribó de óile, yóggwa ye duré tákite nomainda difeřái, bonizaybói lla corót or aros goríbo. **33** Borabor héndilla, tuáñra ttu zee niki nizor hárr kessú eri no deh, yóggwa Ańr ummot ói no fare. **34** “Nun toh gom jiníc, montor zodi nun or dok zaagói, tóoile híin ore keéngori abar nuncá gorá zaybo? **35** Híin toh no zobin olla ham aiyé aar no fáńic ísafe ham aiyé; maincé híin ore baäre félaide. “Zar ttu fúnibar han asé, yóggwa ye fúno.”

15 Tamám házana-tulóya edde gunágar ókkol Isár hotá fúni bolla íbar hańse aitó. **2** Montor Féroci ókkole edde alem ókkole endilla hoói cékayot gorát doijje, “E Manúc cwa ye gunágar ókkol lói miyáń, aar ítarar fúañti hána háa.” **3** Hétunot íba ye ítara re e meésal lan hoiyé: **4** “Dóro tuáñra honó ezzon ottu ek cót bérasóol asé, zodi héntu eggwá áńzizagói, tóoile íte kí nobboi-now wa re kílat eri, áńzigiyoi de yíba re tuwai nó faa foijjonto no tuwaibó né? **5** Íte tuwai faile toh kúciye yíba re hańd ot loibo, **6** aar gór ot aái ítar fúańijja edde atehańsór manúc ókkol ore matai hoibó de, ‘Ańr fúañti kúci gorógai, kiyólla-hoilé ańí ańr áńzigiyoi de bérasóol lwá tuwai faiyí.’ **7** Ańí tuáñra re hoóir, řík héndilla, touwá gorá no fore de nobboi-now zon forhéggar or túaro ezzon gunágar touwá goillé asman ot aró bicí kúci óibo.” **8** “Yáh, dóro eggwá mayafua ttu doc cán rufar foicá asé, zodi héntu ekkán foicá áńzizagói, tóoile híba ye kí serak dórai gór kuuńsai híyan ore tuwai nó faa foijjonto cúndorgori no tuwaibó né? **9** Híba ye tuwai faile toh nizor fúańijjani edde atehańsór manúc ókkol ore matai endilla hoibó, ‘Ańr fúañti kúci gorógai, kiyólla-hoilé ańí ańr áńzigiyoi de foicá gán tuwai faiyí.’ **10** Ańí tuáñra re hoóir, řík héndilla, ezzon gunágar touwá goillé Allar fırista ókkol or muuntu kúci ó.” **11** Isá ye aró hoór de, “Eggwá maincór ttu duwá fua accíl. **12** Ítara ttu cóñro wa ye baf ore hoór de, ‘Abá, ańr borat ot fore de cómbotti ańré diífelo.’ Tói bafe nizor

cómbotti ítara re borat gorídiye. **13** “Hooddin baade, fua cóñro wa ye nizor hárr kessú dola gorí looi ekkán durór mulluk ot giiyégói, aar hére íte monzakká soli nizor cómbotti sárhar gorífelaiye. **14** Zeñtté ítár ttu hárr kessú hóros gorífelaya óiye, hé mulluk ot eggwá ðoóñr raṭ óiye, aar íte muútac ot forat doijje. **15** Tói íte zai hé mulluk or ezzon bácinda ttu ham saiyégói, aar yóggwa ye ítare cúwor sorai bolla nizor kílat diferaíye. **16** Cúwor gúne ze gas or sóñi ókkol háito, ítár ttu híin hái feṭ bóraitó monehoitó, montor honókiye ítare no diito. **17** “Fore íte buzón ot aái hoór de, ‘Añr baf or edún muzur ókkole háito becábici hána faar, aar ańí toh eṛé búkke morir! **18** Ańí urí añr baf or hére zaiyumbói, zai íba re hoiyúm de: Abá, ańí Allar edde tuáñr ulḁa hosúri goijjí. **19** Ańré ar tuáñr fua hoibár laayek no; ańré tuáñr eggwá muzur or dóilla góri rakó.’ **20** Tói íte urí baf or hére giiyé. “Íte duré táite ítare deké baf ottu feṭfuijje, aar duńiri zai ítare ańza mari appá díye. **21** “Fua ye baf ore hoór de, ‘Abá, ańí Allar edde tuáñr ulḁa hosúri goijjí, ańré ar tuáñr fua hoibár laayek no.’ **22** “Montor bafe nizor goóur ókkol ore hoór de, ‘Toratori ebbe barík zubba aní itaré fińdáido; itar át ot oóñri diyaido aar téng ot centṭar fińdáido. **23** Goru boli wa aní zooró. Ańára hái kúci-áci gorí. **24** Kiyólla-hoilé añr e fua wa mora accíl, montor abar zinda óiye; ite áñzigilgoi, montor yala faa giyéh.’ Tarfore ítara beggúne kúci gorát doijje. **25** “Héńtte yóggwar fua ðoóñr gwá kítit accíl; íte gór or ḁake foóńce rár, talbazanar edde nas or abas fúinne. **26** Hétunot íte eggwá goóur ore matai, eṛé kii ór de fusár goijjé. **27** Tee ítare hoór de, ‘Tuáñr báí waafes aiccé, aar tuáñr bafe goru boli wa zooráíye, kiyólla-hoilé yóggwa ye ítare sóiyi-sólamote firai faiyé.’ **28** “Híyan fúni íte guccá óigiyoi aar bútoṛe góilto no sar. Montor baf baáre aái, ítare manat doijje. **29** Lekin íte baf ore zuwabe hoór de, ‘Soó, etó bosór fán ańí tuáñr gulami gorí-gorí aiyír, aar ańí tuáñr hókum honódin no mani nó táki; toóu tuńí ańré añr dustó ókkol or fúańti kúci-áci gorí bolla eggwá sóol or sóo úddwa honódin diiyó de náí. **30** Montor tuáñr fua ite zeńtté aiccé, zee niki tuáñr cómbotti magi ókkol lói fúraifelaiye, tuńí ítár lla goru boli wa zooráíyo.’ **31** “Hétunot bafe ítare hoór de, ‘O fut, tui toh añr fúańti hámica asós, aar añr ttu ziín asé híin beggún de tor. **32** Montor ańára ttu yala kúci-áci edde mela gorár zorur, kiyólla-hoilé tor báí íbá mora accíl, aar abar zinda óiye; áñzigilgoi, yala faa giyéh.”

16 Isá ye cárit tun ore yó hoór de, “Ezzon tuangor manúc ottu eggwá zimmadar accíl, hé zimmadar gwá ye yóggwar dón-cómbotti sárhar gorífelar hoói yóggwar hańse hóbor foóńce. **2** Tói yóggwa ye ítare matai fusár gorér de, ‘Ańí tor baabute iín kii fúnir? Tor zimmadari ham or ísaf déh, kiyólla-hoilé tui ar zimmadar táki no faribí.’ **3** “Hétunot zimmadar gwá ye nizoré nize hoór de, ‘Yaa ańí kii goittám? Ańr giróse de añr ttu zimmadari ham loifeler. Ańr ttu de meṛi haṛitó bol náí, aar hórat magité yó córom lage. **4** Ańí kii goijjúm de zani faijjí, zeéne zeńtté añr ttu zimmadari ham loiféle, maincé ańré ítaraṛ gór ot zaga dee.’ **5** “Tói íte zon-zon gori girós or footidár ókkol ore mataiyé, matai foóila wa re hoór de, ‘Ańr giróse tuáñr ttu footi hodún faar?’ **6** “Tee hoór de, ‘Now cót gelómzaitun tel.’ “Íte hoór de, ‘Tuáñr bil lán loo, toratori boói sair-có fonzaic gelóm lekído.’ **7** “Tarfore íte ar ezzon ore hoór de, ‘Tuáñr ttu hodún faar?’ “Tee hoór de, ‘Fonzaic mongiyuń.’ “Íte taré hoór de, ‘Tuáñr bil lán loo, looi salic mon lekído.’ **8** “Giróse hé beiman zimmadar or saláki ham deké taarif goijjé; kiyólla-hoilé e duniyair manúc ókkol nizor dóilla manúc lói solafira gorát, nur or manúc or túaro bicí salák. (aión g165) **9** Ańí tuáñra re hoóir, duniyaibi dón-doulout lói nizor lla dustó bano; zeéne zeńtté híin fúraizagoi, ítara tuáñra re abadulabadi zagat kobul goré. (aiónios g166) **10** “Zee niki hom ot imandari táke, yóggwa ye bicít óu imandari táke; aar zee niki hom ot beimani goré, yóggwa ye bicít óu beimani goré. **11** Hé ísafe, zodi tuáñra duniyaibi dón-doulout ot imandari no táko, tóoile tuáñra re bóracá gorí asól dón hone diibo? **12** Aar zodi tuáñra ar ezzon or gún ot imandari no táko, tóoile tuáñrar gún tuáñra re hone diibo? **13** “Honó gulame dui girós or hédmot gorí no fare; kiyólla-hoilé íte ezzon ore nafórot goríbo aar ar ezzon ore muhábbot goríbo; yáto ezzon loi ṭík tákibo aar ar ezzon ore hékarot goríbo. Tuáñra ekkú fúańti Allar edde dón-doulout or hédmot gorí no faribá.” **14** Féroci ókkole híin beggún fúni Isá re técerat doijje, kiyólla-hoilé ítara ṭiańr lalósbon accíl. **15** Íba ye ítara re hoór de, “Tuáñra óilade uitará zetará maincór muúntu nizoré nize forhésgar kúwalo, montor Alla ye tuáñrar dil zane. Ziyán maincór nozor ot bicí kimoti híyan Allar nozor ot honó kimot náí. **16** “Tourat edde nobi ókkol or kitab, Yaháya foijjonto soillíl; yárbaade lóti Allar raijor kúchóbor tobolik gorá zar, aar fottíkíye zuresúre híyan ot gólat asé. **17** Lekin Tourat Córif

or ekgwá noktá búzi zar túaro, asman zobin ofát ówa aró aasan. **18** “Zee kiyé nizer bou wóre sárfelai ar eggwá re biyá goré, íte zená gorér deh; aar zee kiyé zamair sárfelaiya mayafua re biyá goré, íte yó zená gorér deh. **19** “Ezzon endilla tuangor manúc accíl, zibá ye bayoinna rong or edde dami-dami hoor fiñdító, aar fottí din ayaci-kúci gorí tákito. **20** Ítar geit ot Lasár nam or ézzon hórat-magoya re raká záyto, yóggwa gáaye furaiya accíl. **21** Yóggwa ttu tuangor manúc cwar mes ottu forizaytóí de hána lói feť bóraitó monehoitó. Aar kuñir ókkole aái yóggwar gáa ókkol lekító. **22** “Fore eén óiye, hé gorif manúc cwa morigiyói aar firista ókkole yóggwa re Ibrahím or hére loigiyói. Ek din tuangor manúc cwa yó morigiyói aar dohón gorá gíyeh. **23** Íte zuzuk ot azab faar de héntu uormikká saiyé rár, duré Ibrahím ore edde íbar ďák ottu Lasár ore deikké. (Hadēs g86) **24** Hétunot íte guzori hoór de, ‘Ó baf Ibrahím, añr uore rahám gorí Lasár ore añr hére difeřó, zeéne yóggwa ye fanít mazé nizer ooñl or matá burai añr zir řánda goré, kiyólla-hoilé añl e ooin ot bicí toziya fair.’ **25** “Montor Ibrahíme hoór de, ‘O fut, řaar gorí saá, tui tor zindigit gom-gom jiníc ókkol lói hotó cúk goijjílí, aar Lasáre hotó duk faail; montor yala yóggwa eřé cánti faar, aar tui toziya foór. **26** Ín beggún baade, tor edde añárar dormiyan ot řoóñr dumburu asé, zeéne entú tor hére zaito monehoó de ítara zai no fare aar héntu añárar hére aitó monehoó de ítara aái no fare.’ **27** “Hétunot íte hoór de, ‘Ó baf, héen óile añl tuáñre fóriyat gorí, Lasár ore añr baf or gór ot difeřó; **28** kiyólla-hoilé añr ttu fañs swá báí asé. Yóggwa ye ítara re uñciyari douk, arnoile ítara yó e azab or zagat foóñsibai.’ **29** “Montor Ibrahíme hoór de, ‘Ítarar hére Muúsar edde nobi ókkol or kitab asé. Ítara híin or hotá fúnouk.’ **30** “Íte hoór de, ‘No, no, ó baf Ibrahím, zodi mora ókkol ottu kiyé ítarar hére zaa, ítara touwá goríbo.’ **31** “Montor Ibrahíme ítare hoór de, ‘Zodi ítara Muúsar edde nobi ókkol or hotá no fúne, tooile mora ttu honókiye zinda ói zailé yo ítara no manibó.”

17 Isá ye Nizer ummot ókkol ore hoór de, “Gunár uzu řane de híin toh nu aái no tákibo; montor uitar uore afsús, zar duara niki híin aiyé. **2** Ítar lla beétor óilde, ítar golat eggwá cíl or sakki bañdí doijjat félaidiya zah, zodi íte e cónřo ókkol ottu honókiyo re guná gorába. **3** Nizeró nize uñciyar. Zodi tuáñr báí ye hosúri goré, yóggwa re bótřboráiyó; zodi yóggwa ye

touwá goré, yóggwa re maf gorídiyo. **4** “Zodi yóggwa ye tuáñr ulđa ek dine háñt bar hosúri goré, aar háñt óu bar tuáñr hañse aái hoó, ‘Añl touwá goijjílí,’ tooile yóggwa re maf gorídiyo.” **5** Sáhabi gúne Malik ore hoór de, “Añárar iman baráido.” **6** Malike hoór de, “Zodi tuáñra ttu hóroir danar héttirin iman táke, tuáñra e tut-gas swá re eén hoói faribá, ‘Háñri zai doijjat fúťgoi,’ gas swá ye tuáñrar hotá manibó. **7** “Dóro tuáñra honókiyo ttu ál soibó lla yáh sóol sorai bolla eggwá goóur asé. Yóggwa ye kí goóur gwá bil ottu ailé ítare endilla hoibó, ‘Hára aái, háito bogái?’ **8** Bólke yóggwa ye kí ítare endilla no hoibó né, ‘Añr lla hána toiyar gor, aar nizer keeñil bañdí añr ttu hána-fina háiya nó óiyo foijjonto añré hédmot gór, baade tui hána-fina hái faribó?’ **9** Yóggwa ye kí goóur gwá re cúkuriya goríbo, ítare ziyán hókum goijjé híyan goijjé de hétolla? Bilkúl no goríbo. **10** Héñdilla tuáñra yó, zeñtté tuáñra ttu tuáñra re hókum gorá gíyeh de híin beggún goijjá ó, hoibá de, ‘Añára behazor goóur ókkol; añára baná añárar fóros adai goijjílí deh.” **11** Baade eén óiye, Isá Jerúsalem ot zaito Samáriar edde Galil or maz ottu zaar. **12** Íba ekkán farat gólibarcot, doc zon kurus biyaraimma íba llói dola óiye. Ítara duré říyaya accíl, **13** aar guzoran mari hoór de, “Isá, ó Ustat, añárar uore rahám goról!” **14** Íba ye ítara re deki hoór de, “Zoo, nizeró imam ókkol or hañse dahógoi.” Aar eén óiye, ítara zaita-zaita pak-sáf óigiyoi. **15** Ítara ttu ezzone zeñtté nize gom óigiyoi de deikké, yóggwa řoóñr abase Allar taarif gorí-gorí řiri aiccé, **16** aar Isár foot uúĩntoi fori íba re cúkuriya goijjé. Yóggwa óilde ézzon Samári. **17** Hétunot Isá ye fusár gorér de, “Doc zon beggún pak-sáf óiye de no né? Ar now zon hořé? **18** Allar taarif gorí bolla e bidecóitta wa bade ar honókiye řiri nú aiyé de níki?” **19** Baade íba ye yóggwa re hoór de, “Uřó, zoogói; tuáñr imane tuáñre gom goijjé.” **20** Ekbar, Féroci ókkole Isá ttu fusár goijjé de, Allar raijjo hoñtté aibó? Íba ye ítara re zuwabe hoiyé de, “Allar raijjo aité dahá zah fángori nu aibó, **21** aar maincé yó no hoibó de ki, ‘Soó, híyan eřé asé,’ yáto, ‘Uřé asé,’ kiyólla-hoilé Allar raijjo toh tuáñrar mazé asé.” **22** Tarfore íba ye Nizer ummot ókkol ore hoór de, “Eén din aibó zeñtté tuáñra Manúc or Fuar din ókkol ottu ek din óile sai bolla azzu goríba, montor no dekíba. **23** Maincé tuáñra re hoibó de, ‘Eřé soó,’ yáto ‘Uřé soó.’ Montor no zaiyo, ítarar fisá no dóijjo. **24** Kiyólla-hoilé zendilla asman or ek ďák ottu bijili somkilé arek ďák ot óu foor zaa, Manúc or Fua aibó de

híyala yó héndilla beh óibo. **25** Lekin age Íba ttu boóut kessú duk faa foribó, aar e zobanar manúc ottu inkar há foribó. **26** “Nobi Nuhr din ókkol ot zendilla óoil, héndilla Manúc or Fuar din ókkol ot óu óibo. **27** Zetó din Nuh kicítit nó uré aar tuwán aái manúc beggún ore hálak nó goré, hétodin foijjonto manúc ókkole háafiya gorát, biyá gorát, edde biyá diyat accíl. **28** “Luút or din ókkol ot óu héndilla óoil; manúc ókkol háafiyat, besa kinat, kėti gorát, edde gór banat accíl; **29** montor ze din Luút Sódóm ottu neeli aáigiyo, asman ottu ooin edde gónðokzór fore fán fori ítara beggún ore hálak gorífelaiye. **30** “Manúc or Fua zahér óibo de hé din óu héndilla beh óibo. **31** Hé din zee niki gór or sád or uore de óibo aar nizor mal-sáman gór or bútoze óibo de tákibo, ítara ttu híin looi bolla lamat no lama foribó; héndilla zee niki kétit óibo, ítara ttu waafes nu aá foribó. **32** Luút or bou wór hálót yaad raikkó. **33** Zee niki nizor zan basaitó saá, íte híyan háraifeleibo; aar zee niki nizor zan háraifele, íte híyan basai rakíbo. **34** Añí tuáñra re hoóir, hé raíitta dui zon manúc ek bisánat óibo de tákibo; ítara ttu ezzon ore loiza zaybo, ar ezzon ore bad diya zaybo. **35** Duwá mayafua ye ekkú fúañti sakki gúraibo de tákibo; ítara ttu ezzon ore loiza zaybo, ar ekzon ore bad diya zaybo. **36** Dui zon manúc bil ot óibo de tákibo; ítara ttu ezzon ore loiza zaybo, ar ezzon ore bad diya zaybo.” **37** Ítara Íba ttu fusár gorér de, “Malik, íin hořé óibo dé?” Íba ye ítara re hoór de, “Mora lac zeřé, héře toh hóun ókkol óu zoma óibo.”

18 Baade Isá ye ítara re ekkán meésal hoiyé, ítara ttu hárr októť dua gorá foribó de aar hímmot no hára foribó de híyan cíkai bolla. **2** Ki hoilé, “Ekkán cóor ot eggwá bisarhar accíl, zibá ye no Alla re ðooraitó aar no honó manúc ore forba goittó. **3** Aar hé cóor ot eggwá rari accíl; híba ye yóggwar hañse aái-aái hoitó de, ‘Añr duccon ókkol ottu añré insáf loido.’ **4** “Yóggwa ye hooddin inkar goijjíl, montor fore nizoré nize hoór de, ‘Añí de no Alla re ðoorai aar no honó manúc ore forba gorí, **5** montor toóu e rari wa ye zettót añré ferecan gorát asé, añí ibáh re insáf loidiyum, arnóile ibáh ye barbár aái-aái añré óran gorífelaibo.” **6** Yárbaade Malike hoór de, “Fúno, nainsáfi bisarhar gwá ye kii hoiyé. **7** Héndilla, Alla ye ki Íbar basíloiya bonda ókkol ore insáf loi no dibo né, zetará dine raite Íbar hañse hañde? Íba ye kí ítara lla híyan goitté deri goríbo? **8** Añí tuáñra re hoóir, Íba ye

ítara re toratori insáf loidibo. Lekin Manúc or Fua zeñtté aibó, Íba ye kí duniyait iman faibo?” **9** Hodún manúc zetará nizoré forhészgar táare aar oinno zon ore hékarot goré, Isá ye ítara re e meésal lan hoiyé, **10** “Dui zon manúc baitul-mukaddos ot dua goittó giyyé; ezzon óilde Féroci, ar ezzon óilde házana-tulóya. **11** Féroci wa ye tíyai nizor baabute endilla dua gorát doiije, ‘Ya Alla, añí Tuáñre cúkuriya gorír, kiyólla-hoilé añí oinno manúc or dóilla ðahañit, nainsáfi, aar zenákur no; e házana-tulóya war dóilla úddwa no. **12** Añí háftat duibar ruza rakí; aar añr tamám amodoni ttu doc bák or ek bák Tuáñre diífélai.’ **13** “Lekin házana-tulóya wa ekkágori duré tíyai accíl; yóggwa ye asman or uzu sai bolla úddwa moncá no gorér, bólke buk kilai-kilai hoór de, ‘Ya Alla, añí gunágar or uore rahám goró.’ **14** “Añí tuáñra re hoóir, e manúc cwa beh forhészgar tóori gór ot giyyé, Féroci wa nó tóore; kiyólla-hoilé zee niki nizoré nize ðoóñr kúwala ítare cóñro gorá zaybo; aar zee niki nizoré nize cóñro kúwala ítare ðoóñr gorá zaybo.” **15** Ek din maincé ítara gura fuain dore yó Isár hañse anát doiije, zeéne Íba ye ítara re súwe; montor carít tune deikké rár, manúc cún ore bóťbořaiye. **16** Montor Isá ye fuain dore Íbar hañse matai hoór de, “Fuain dore Añr hañse aitódo; ítara re no oóñillo, kiyólla-hoilé Allar raijjo toh ítara ðóilla maincé éna hásil goré. **17** Añí tuáñra re sóiyi hoóir, zee kiyé Allar raijjo re eggwá gura fuar dóilla góri kobul no goré, yóggwa híyan ot bilkúl góli no faribó.” **18** Fore ezzon sóddare Isá ttu fusár gorér de, “Gom Ustat, ofúrani zindigi miras faite añr ttu kii gorá foribó?” (aiñios g166) **19** Isá ye yóggwa re hoór de, “Tuñí Añré gom kiyá ðakoór? Alla bade toh ar kiyé gom náí. **20** Tuñí de hókum ókkol zano, zendilla niki, ‘Zená no goríba; kún no goríba; suri no goríba; misá gobá no diba; bafmaa re izzot goríba.” **21** Yóggwa ye hoór de, “Añí híin beggún gurahale lóti amól gorí-gorí aiyr.” **22** Híyan fúni Isá ye yóggwa re hoór de, “Tuáñr ttu aijjó ekkán ham baki asé. Tuáñr ttu zín asé híin beggún besi gorif ore bařidogói, tói tuñí asman ot dón faiba; baade aái Añr fisáli óiyogai.” **23** Híyan fúni yóggwa kúb bezar óigiyo, kiyólla-hoilé yóggwa ðoóñr dóni accíl. **24** Isá ye yóggwar uzu saái hoór de, “Dón-doulot ola ókkol ottu Allar raijjot gólite hotó mockil! **25** Kiyólla-hoilé tuangor manúc Allar raijjot gólar túaro, eggwá uñť fúñc or faái ttu goli zaa aró aásan.” **26** Híin fúinne de ítara hoór de, “Tóoile hone nejat fai faribó?” **27** Íba ye hoór de, “Zín insáne gorí

no fare, híin Alla ye fare.” 28 Fitore hoór de, “Soó, añára de górbari eridi Tuáñr fisáli ógiyigoi.” 29 Íba ye ítara re hoór de, “Añí tuáñra re sóiyi hoóir, zee niki Allar raijor wasté gór, bou, báiyain, bafmaa yáh fuain eridiyé, 30 yóggwa ye e zobanat híin boóut gun bicí faibo, aar aibó de zobanat ofúrani zindigi faibo.” (aiñ g165, aiñios g166) 31 Yárbaade Isá ye baró zon cárit tun ore ekinare loizai ítara re hoór de, “Soó, añára uore Jerúsalem ot zair, Manúc or Fuar baabute nobi ókkole ziín-ziín leikké híin beggún hére fura óibo. 32 Íba re Beyohúdi ókkol or hañse gosáidiya zaybo; ítara Íba re ínca goríbo, beizzoti goríbo, edde sép maribó; 33 ítara Íba re coónk mari baade zane marifélaibo. Lekin tin din ot din Íba zinda óizayboi.” 34 Cárit tune hotá híin ekkán óu nó buzé; hé hotár maáni ítara ttu lukaiféla gíyeh, hétolla ziín hoiyé híin ítara buzí nó fare deh. 35 Isá zeñtté Jerikó cóor or dáke foónicce, ezzon añdá manúc rastar hañsat boói hórat mager de accíl. 36 Yóggwa ye ek dol manúc dák ottu zaar de abas fúni, eré kii ór de fusár goijjé. 37 Maincé yóggwa re hoór de, “Isá Nasári e boli zaar deh.” 38 Hétunot yóggwa ye guzori-guzori hoór de, “Ó Dawud or Fua Isá, añr uore rahám goró!” 39 Zetará age-age zaar de accíl, ítara yóggwa re jéjjerai nizám óito hoiyé; montor yóggwa ye aró guzori-guzori hoór de, “Ó Dawud or Fua, añr uore rahám goró!” 40 Hétunot Isá tíyagiyoi aar hókum díye de, yóggwa re Íbar hañse aná zay bolla. Yóggwa dáke aiccé rár, Isá ye yóggwa ttu fusár gorér de, 41 “Tuñí kii soó, Añí tuáñr Ila kii goittám?” Yóggwa ye hoór de, “Malik, añr ttu deki faribár toóufik faito monehoór.” 42 Isá ye yóggwa re hoór de, “Dekí faribár toóufik loo; tuáñr imane tuáñre gom goijjé.” 43 Éhon yóggwa ye deki faribár toóufik faiyé aar Allar taarif gorí-gorí Isár fisáli doijje. Manúc beggúne híyan deki Allar taarif goijjíl.

19 Isá Jerikó cóor ot góli bútotu zaat accíl. 2 Hére Zakéyos nam or ézzon manúc accíl; yóggwa accíl házana-tulóya ókkol or sóddar edde tuangor manúc. 3 Yóggwa ye Isá hon de híyan saitó kucic goijjíl, montor manúc or dol or zoriya saái nó fare, kiyólla-hoilé yóggwa gaafiré barí accíl. 4 Hétolla yóggwa ye Isá re sai bolla muúmmikka duñri zai eggwá duñir-gas ot uittégoi, kiyólla-hoilé Íba hé foñt báy zaibo. 5 Zeñtté Isá hé zagat foónicce, Íba ye uormikká saái yóggwa re hoór de, “Zakéyos, toratori lamogái, kiyólla-hoilé aijja Añr ttu tuáñr gór ot tákar zorur.” 6 Hétunot yóggwa

toratori laimmégai, aar Íba re kúcir sáañte estekbal goijjé. 7 Híyan deki manúc beggúne endilla cékayot gorát doijje, “Íba ezzon gunágar or gorba óito giyé.” 8 Zakéyose tíyai Malik ore hoór de, “Soó Malik, añr cómbotti ttu ekdók añr gorif ókkol ore diífélair, aar zodi añr honókiyo ttu na hókkot kessú loiyi de óile, ítare añr sair gun waafes fraidiyum.” 9 Isá ye yóggwa re hoór de, “Aijja e gór ot nejat aiccé, kiyólla-hoilé yóggwá yó toh Ibrahím or fua. 10 Manúc or Fua aiccé de toh ánzigiyo de ítara re tuwai bolla edde nejat di bolla.” 11 Ítara híin beggún fúner de októ, Isá ye ítara re ekkán meésal hoiyé, kiyólla-hoilé Íba Jerúsalem or dáke accíl aar ítara táaijil de Allar raijjo bicí hára zahér óibo. 12 Íba ye hoór de, “Ezzon bóddoro manúc ekkán durór mulluk ot giyé, baáñcca boni waafes ai bolla. 13 Zaibar age yóggwa ye nizor goóur ókkol ottu doc zon ore matai ítara re doc cán cúnar foicádiiyé, dii ítara re hoór de, ‘Añí nú aiyi foijjonto iín lói códori gorógoi.’ 14 “Lekin yóggwa re nizor decóitta ókkole nafórot goittó, hétolla ítara yóggwar fisé nomainda diferái hoiyé de, ‘Añára e manúc cwa ye añárar uore hókumot goré de híyan no saái.’ 15 “Zeñtté yóggwa baáñcca boni waafes aiccé, yóggwa ye nizor tiañ dyíl de goóur gún ore mata baiyé, zeéne ítara códori gorí hodún hamaiyé de zani fare. 16 “Cúrrur íte aái hoór de, ‘Malik, tuáñr foicá lói añr aró doc cán foicá baráiyi.’ 17 “Yóggwa ye ítare hoór de, ‘Cabác, gom goóur! Tui zettót bicí hom ot imandari táikkos, yala tui doc cán cóor or uore hókumot gór.’ 18 “Dusára wa ye aái hoór de, ‘Malik, tuáñr foicá lói añr aró fañs sán foicá baráiyi.’ 19 “Yóggwa ye ítare yó hoór de, ‘Tui yó fañs sán cóor or uore hókumot gór.’ 20 “Baade ar ezzone aái hoór de, ‘Malik, ótiya tuáñr foicá, añr yíán ore ekkán fakít berái lukai raikkílam; 21 kiyólla-hoilé añr tuáñre dooraiyi, tuñí ézzon hora manúc; tuñí toh nize ziín nó rakó híin loifélo, aar ziín nó lago híin haro.’ 22 “Yóggwa ye ítare hoór de, ‘Ó behar goóur! Tor muk or hotá loi añr tor bisar goijjúm. Tui de zainti añr ézzon hora manúc deh, añr ziín nó rakí híin loifélai, aar ziín nó lagai híin harí. 23 Tói tui añr tiañ gán benggót óile kiyá nó rakós? Héndilla goittí bóuli añr ailé híyan or fúañti kessú cút faitam.’ 24 “Tarfore yóggwa ye ínyot házir accíl de ítara re hoór de, ‘Ítar ttu foicá gán loifélai, zar ttu doc cán foicá asé ítare diífélo.’ 25 “Ítara yóggwa re hoór de, ‘Malik, ítar ttu de age lóti doc cán foicá asé.’ 26 “Añí tuáñra re hoóir, zar ttu asé, yóggwa re aró diiya zaybo; montor zar ttu náí, yóggwa ttu asé

de híin úddwa loiféla zaybo. **27** Montor añr duccon zetará niki añí ítarar uore hókumot gorí de no saitó, ítara re iñyót aní añr cáikkat zane marifélo.” **28** Isá ye híin hoói baade, ítarar age-age Jerúsalem or uzu zaat doijje. **29** Zeñtté íba Zaitun Faár ot asé de Bettégi edde Betániya farar hañsáhañsi foónicce, íba ye Nizor dui zon cárit ore diferáiyé, **30** endilla hoói, “Tuáñra muúm or fara gán ot zoo, hére góli mottor eggwá gadár sóo baindá loot faiba, zibár uore aijjó honókiye nó soré. Yíba re kúli eřé anógoi. **31** Zodi honókiye tuáñra ttu fusár goré, ‘Tuáñra yíba re kiyólla kúlor?’ Yóggwa re hoibá de, ‘Malik ottu yibá re lager.’” **32** Tói zetará re diferáiyé ítara rowana loiyé, aar íba ye zeén hoiyé héen loot faiyé. **33** Ítara gadár sóo wa re kúler rár, yíbar giróse ítara re hoór de, “Tuáñra gadár sóo wa re kiyólla kúlor?” **34** Ítara hoór de, “Malik ottu yibá re lager.” **35** Baade ítara yíba re Isár hére ainné, aar yíbar uore ítarar hoor ókkol bicáidi Isá re uore buágaraíye. **36** Íba zaar de októ, manúc ókkole nizor hoor ókkol rastat bicáidiyat accíl. **37** Zaité-zaité íba Zaitun Faár or lamonir hañsáhañsi foónicce rár, ummot ókkol or dol řiya ye ítara ze keramot ókkol deikkíl híin beggún olla guzori-guzori kúcir sáañte Allar taarif gorát doijje, **38** hoór de, “Mubarek Baáñcca Ubá zibá Mabud or name aiyér. Ebbe uore asman ot cánti óuk, aar hére mohíma óuk!” **39** Dol ottu hoozzon Féroci ye íba re hoór de, “Ustat, Tuáñr ummot ókkol ore éggwa bóřboro.” **40** Íba ye zuwabe hoór de, “Añí tuáñra re hoór, zodi itará nizám ói táke, fattór ókkol guzori uríbo!” **41** Zeñtté íba Jerúsalem or hañsáhañsi foónicce, cóor gán deki híyan olla haíndé, **42** hoór de, “Áh, tui yó aijja zodi cánti kiyé ané de zaintiya! Montor yala de híyan tor suk or argwal ógiyoi. **43** Kiyólla-hoilé tor uore eén din aibó, tor duccon ókkole tor ulđa đeбал tulí toré giridoribo, aar toré hárr mikká ttu gérgwal goríbo, **44** toré edde tor bútor or fuain dore merít ańsáribó, aar tor bútoře eggwá fattór or uore ar eggwá fattór no rakíbo, kiyólla-hoilé tui toh Alla ye toré basaitó aiccé de októ nó sínós.” **45** Fore Isá baitul-mukaddos or urán ot góli, zetará hére besa kina gorér ítara re loraidiyat doijje; **46** ítara re hoór de, “Pak-kalam ot endilla asé, ‘Añr gór munazat or gór óibo,’ montor tuáñra toh híyan ore đahańit or ađđa-hána banaifélayo.” **47** Íba ye baitul-mukaddos ot fottí din taalim dito. Montor đońńr imam ókkole, alem ókkole, edde manúc or đaiđońńr ókkole íba re marifélaibar kucíc ot accíl. **48** Lekin híyan gorí bolla

ítara honó mouka nó faa, kiyólla-hoilé tamám manúc ókkole íbar hotá oóńlgori fúnito.

20 Ek din zeñtté Isá ye baitul-mukaddos ot manúc ókkol ore taalim der edde kúchóbor tobolik gorér, đońńr imam ókkole edde alem ókkole murubbi ókkol ore fúańti looi íbar hańse aiccé, **2** aar íba re hoór de, “Ańára re hoósai, Tuńí ham iń kii adíkare gorór? Tuáñre e adíkar diiyé de íba hon?” **3** Íba ye ítara re zuwabe hoór de, “Ańí yó tuáñra ttu ekkán súwal fusár goríyum. Ańré hoósai, **4** Yaháya ye bápťisma díbar adíkar faail de asman ottu né náki insán ottu?” **5** Ítara afós ot biyasana gorér de, “Zodi ańára hoói ‘asman ottu,’ íba ye hoibó de, ‘Tóoile tuáñra íba re biccác kiyá nó goró?’ **6** Montor zodi hoói, ‘insán ottu,’ tóoile manúc beggúne ańára re cíl or dola maribó, kiyólla-hoilé ítara toh Yaháya eggwá nobi de biccác goré.” **7** Hétolla ítara zuwab der de, “Ańára no zani híyan hontú.” **8** Tói Isá ye ítara re hoór de, “Tóoile Ańí yó tuáñra re no hoiyúm Ańí iń kii adíkare gorír.” **9** Tarfore Isá ye manúc ókkol ore e meésal lan howá cúru goijjé, “Ezzon maincé ekkán anggur-bariza lagaiyé, yóggwa ye híyan cacá ókkol ore řeka dí lamba řaim olla oinno mulluk ot giyiói. **10** Aar anggur or ainda aiccé rár, yóggwa ye eggwá goóur ore cacá gún or hańse diferáiyé, zeéne ítara yóggwa re barizar gular bák dee; montor cacá gúne taré mara-dóra gorí háli áte duńraidiyé. **11** Yóggwa ye abar ar eggwá goóur diferáiyé; ítara taré yó mari edde bicí beizzoti gorí háli áte duńraidiyé. **12** Baade yóggwa ye tisára goóur diferáiyé; ítara taré yó zohóm gorí baáre félaidiye. **13** “Tarfore barizar giróse hoór de, ‘Yala añí kii goittám? Ańí añr adorja fua re diferáiyum; ítara íba re izzot goittó fare.’ **14** “Montor cacá gúne hé fua re deki afós ot biyasana gorér de, ‘Ite toh mirasdár; aiyó itaré marifélai, zeéne miras ańárar óizagoi.’ **15** Tói ítara íba re barizar baáre loizai marifélaye. “Hé ísafe, barizar giróse ítara re kii goríbo fáńllar? **16** Yóggwa ye aái hé cacá gún ore marifélaibo, aar bariza gán oinno kiyó re diifélaibo.” Ítara híyan fúni hoór de, “Alla ye héndilla no goróuk.” **17** Montor Isá ye ítarar híkka saái hoór de, “Tóoile pak-kalam ot asé de e hotár maáni kii, ‘Ze fattór mistíri ye inkar gorifelaye, yíba cíl beggún or túaro bicí zoruri wa ógiyoi?’ **18** Ze kiyé hé cíl or uore foribó íte bāńgi hán-hán óizayboi, montor zar uore niki hé cíl yíba foribó, íte ficí zayboi.” **19** Hétunot đońńr imam ókkole edde alem ókkole íba re dórifelai

bolla kucíc goijjíl, kiyólla-hoilé ítara buzígiyoi de ki meésal híyan ítara hélaf hoiyé deh; montor ítara awam ókkol ore dlooraitó. **20** Ítara Isár uore háas nozor raikké, hétolla gom manúc or bét dórai gurinda ókkol dīferáiyē, zeéne ítara Íba re Nizor hotár fán ot félai fare edde Íba re hákim or hókumot ot edde adíkar ot gosáidi fare. **21** Gurinda gúne Íba re súwal goré de, “Ustat, añára zani Tuáñr hotá edde taalim sóiyi, aar Tuñí honókiyo re forók goró de náí, bólke sóiyigori Allar rastar taalim doh. **22** Romi baáñcca re házana doon añára lla zayes asé né náki náí?” **23** Montor Íba ye tarár sail ore zani fari tará re hoór de, **24** “Añré ekkán dinár dahó. Yíán har sóbi edde har nam?” Tará zuwab der de, “Romi baáñccar.” **25** Tóí Íba ye tará re hoór de, “Tóoile zín baáñccar híin baáñcca re diiyo, aar zín Allar híin Alla re diiyo.” **26** Tará manúc or muúntu Íba re Nizor hotár fán ot félai nó fare, bólke Íbar zuwabe ammúk ói nízam óigiyoi. **27** Baade hodún Sadukái Isár hañse aiccé, Sadukái ókkole háñcor náí hoi biccác goré, ítara aái Íba re ekkán súwal goijjé, **28** ki hoilé, “Ustat, Muúsa ye añára lla leikké de, zodi honókiyor biyáta báí fuain sára morizagóí, tóoile ítar hé báí ottu bou híba re biyá gorífelai nizor báí olla nosól foida gorá foribó. **29** Dóro, háñt zon báí accíl. Foóila wa ye bou looi, fuain sára morigiyói. **30** Baade híba re dusára wa ye biyá goijjé, aar íte yó fuain sára morigiyói; **31** tarfore híba re tisára wa ye biyá goijjé. Héndilla, ítara háñto báí ye híba re biyá gorí fuain sára morigiyói. **32** Ahérit, mayafua wa yó morigiyói. **33** Hé ísafe, háñcor or hale híba har bou óibo? Kiyólla-hoilé híba re toh háñto zone nizor bou banaáil.” **34** Isá ye ítara re zuwab diyé de, “E zobatan maincé biyá-cádi goré edde biyá-cádi deh. (aiñ g165) **35** Montor zetará re aibó de zobanar bági óibar edde háñcor-ordin mora ttu zinda óibar laayek bouli gona zah, ítara no biyá goríbo aar no ítara re biyá díya zaybo; (aiñ g165) **36** ítara ar mori yó no faribó, kiyólla-hoilé ítara fíristar dóilla óizayboi; aar ítara háñcor or bági ói Allar fuain óizayboi. **37** Mora ókkol zinda ó de híyan toh Muúsa ye úddwa zoler de záđđwar zikír gorá gíyeh de hére zahér goijjé, hére íba ye Mabud ore Ibrahim or Alla, Isahák or Alla, edde Yakub or Alla ñaikké. **38** Kiyólla-hoilé Alla toh mora ókkol or Alla no, bólke zinda ókkol or éna, kiyólla-hoilé Íbar hañse beggún zinda.” **39** Hétunot hodún aleme Íba re zuwabe hoór de, “Ustat, Tuñí gom hoiyó.” **40** Yárbaade ítara ttu Íba re ar honó súwal goittó hímmote nó deh. **41** Isá ye

ítara re hoór de, “Mosih re Dawud or fua keéngori hoó? **42** Kiyólla-hoilé Dawud nize toh Zobur Córif ot endilla hoiyé, ‘Mabude añr Malik ore hoór de, ‘Añr den ñák ottu boiyó, **43** zetókkal foijjonto Añr Tuáñr duccon ókkol ore Tuáñr foor tole gorí nó felai.” **44** Dawude toh Íba re ‘Malik’ ñaikké, tóoile keéngori Íba Dawud or fua dé?” **45** Manúc beggúne Isár boiyan fúnat asé de októtt Íba ye Nizor ummot ókkol ore hoór de, **46** “Alem ókkol ottu úñciyar táikko, zetará lamba-lamba kuruta fiñdí gúrafira goittó saá, aar bazare-bazare sólam faito, mujilíc-hána ókkol ot uñsol tokkar hadírat boitó edde mela-cóbat barík zagat boitó fosón goré. **47** Ek mikká ttu ítara rari ókkol or gór ókkol luť gorífele, arek mikká ttu maincóre dahái bolla lamba-lamba dua goré. Manúc híine sáñza bicí ñoóñr faibo.”

21 Baade Isá ye suk tulí saiyé rár dekér de, tuangor ókkole ítara sótka ókkol baitul-mukaddos or dan-baccút deer. **2** Íba ye eggwá gorif rari ye yó hére duiyán cónño foicá deer de deikké. **3** Hétunot Íba ye hoór de, “Añí tuáñra re sóiyi hoóir, e gorif rari wa ye beggún or túaro bicí diiyé; **4** kiyólla-hoilé oinno beggúne ítara aťalikka dón ottu diiyé deh, montor ibáh ye toh nizor gorif hálót ot basi táki bolla zín accíl híin beggún diífelaiye.” **5** Zeñtté hodúne baitul-mukaddos or baabute endilla howáhoi gorér, híyan ore keén cúndor-cúndor fattór lói edde Alla re diiya hádiya ókkol lói háñza gíyeh, Isá ye hoór de, **6** “Tuáñra eřé zín dekór híin olla eén din aibó, eřé eggwá fattór or uore ar eggwá fattór no tákibo, híin fottí ekgwá re félaidiya zaybo.” **7** Ítara Íba ttu fusár gorér de, “Ustat, híin hoñtté óibo dé? Híin beggún fura óibar októ aiccé de híyan or alamot kii óibo?” **8** Íba ye zuwab der de, “Saiyó, honókiye zen tuáñra re gollot ot no loiza, kiyólla-hoilé boóut zone Añr name aái hoibó de, ‘Añí Íba,’ edde ‘Októ ñáke.’ Montor ítara fisáli no dóijjo. **9** Zeñtté tuáñra larái edde úrussul or abas ókkol fúniba, no dlooraiyó; kiyólla-hoilé age híin ówar zorur. Montor híyala yó toratori ahérot óibo de no.” **10** Íba ye ítara re aró hoór de, “Ek koume arek koun or ulđa edde ek raijjo ye arek raijjor ulđa tíyaibo. **11** ñoóñr-ñoóñr búsal óibo, aar zaga-zaga rať ókkol edde ababiyaram ókkol óibo; aró, asman ottu hótara jiníc edde ñoóñr nicán ókkol dahá zaybo. **12** “Lekin híin beggún óibar age, maincé Añr nam or wasté tuáñra re dórifelaibo edde zulúm goríbo. Ítara tuáñra re mujilíc-hánat gosáidibo edde ziyól ot díbo. Añr nam or wasté

tuáñra re baáñcca edde hákim ókkol or muúntu házir gorá zaybo. **13** Montor híyan tuáñra gobá díbar mouka óibo. **14** Hétolla dil ot gañtí rakó de ki, kii zuwab diba age lóti sinta gorár zorur náí; **15** kiyólla-hoilé Añí tuáñra re eén zaban edde giyan diiyum, zín ore tuáñrar honó duccone mukabela yáh inkar gorí no faribó. **16** Tuáñra re nizor bafmaa ye, báiboináin de, egana-guicci ye edde dustó ókkole úddwa dóridibo; tuáñra hodún ore marifélaibo yó. **17** Aar Añr lla bouli tuáñra re beggúne nafórot goríbo. **18** Lekin tuáñrar matár ekkán sul úddwa borbad no zaybo. **19** Tuáñrar sobóre tuáñra nizor zan basai rakíba. **20** “Tuáñra zeñtté fóous ókkole Jerúsalem ore sairókul ttu berái dóijje de dekíba, héñtte fáariyo de, híyan bocóti sára óibar októ dake. **21** Héñtte zetará Yohúdiyat tákiba ítara ttu faár ot dáizagoi foribó, zetará cóor ot bútoze tákiba ítara ttu baäre neelizagói foribó, aar zetará farat tákiba ítara ttu cóor ot no góla foribó. **22** Kiyólla-hoilé din híin óilde bodola loibar din, zeéne pak-kalam ot asé de híin beggún fura ó. **23** Montor hé din ókkol ot hámil mayafuain dor lla edde dud or maa ókkol olla bicí afsús or hálot óibo! Kiyólla-hoilé mulluk ot dōóñr mosibot óibo edde manúc ítarar uore gozzob aibó. **24** Ítara re toluwar loi kotól gorífela zaybo, aar bañdí fottí koun or hañse loiza zaybo. Jerúsalem ore otókkal foijjonto Beyohúdi ókkole tēnge uñrat tákibo, zetókkal Beyohúdi ítarar októ fura nó óiyo. **25** “Aar san, beil edde tara ókkol ot taajuippa nicán ókkol dahá zaybo; duniyait koun ókkol ferecanit forizaybói, kiyólla-hoilé ítara doriyar abase edde goire súharaíya óizayboi, **26** manúce duniyait óibo de híin or dōore edde báfaniye beúñic óizayboi, kiyólla-hoilé asmani jiníc ókkol tóttoraibo. **27** Héñtte ítara dekíbo de, Manúc or Fua kudurut edde dōóñr mohímar sáañte ekkán miyúlat góri aiyér. **28** Montor zeñtté híin fura ówat dore, tuáñra uzu gori tíyai tuáñrar matá uormikká goríyo, kiyólla-hoilé tuáñrar rehái dake.” **29** Tarfore Isá ye ítara re ekkán meésal hoiyé, ki hoilé, “Dūñir-gas edde oinno gasgusala beggún ore soó. **30** Zeñtté híin ot fata aiyé, tuáñra híin saái nizorgá nize zanizogói de, hórán dake. **31** Héndilla tuáñra yó, zeñtté iín ór de dekíba, héñtte yíán buzíba de, Allar raijjo dake. **32** “Añí tuáñra re sóiyi hoóir, iín beggún fura nó óiyo foijjonto e nosól bilkúl no fúraibo. **33** Asman zobin toh zari no tákibo, montor Añr hotá hámica zari tákibo. **34** “Hétolla uñciyar táikko, zeéne tuáñrar dil ayaciye, nicábaziye, edde zindigir sintabáfaniye

bóri no zagói, arnóile din yíba tuáñrar uore fán or dōilla bánggori aázayboi; **35** kiyólla-hoilé din yíba fura duniyait asé de tamám manúc ókkol or uore héndilla góri aázayboi. **36** Hétolla tuáñra hárr októ uñciyar táikko, aar dua goríyo de, tuáñra ttu zen muúntu fura óibar asé de híin ottu basi zayboi lla bol táke aar Manúc or Fuar muúntu tíyai faro.” **37** Din ot Isá baitul-mukaddos ot taalim dito, montor háñzinna neeli Zaitun Faár hoó de yíbat zai rait hañaitó; **38** aar biñna sóore manúc beggúne íbar boiyan fúni bolla baitul-mukaddos ot aitó.

22 Héñtte Yohúdi ókkol or Cútar-sára Ruñir-id or din dake aiccé, ze id ore Azadir-id bouli hoó. **2** Aar dōóñr imam ókkole edde alem ókkole Isá re kii bote marifélaí faribó híyan or talac ot accíl, kiyólla-hoilé ítara maincóre dōoraitó. **3** Héñtte Yohúdah zaré Iskáriyet dake, ítar bútoze Cóitan góille, zee accíl baró zon cárít tun ottu ezzon. **4** Íte zai dōóñr imam ókkol lói, alem ókkol lói, edde faáradar ókkol lói sólla goijjégói de, íte kii bote Isá re tarár át ot dóridi faribó. **5** Híyan ot ítara kúci óiye, aar ítare tñañ diibo bouli hoiyé. **6** Íte razi óiye, aar manúc or dol no táke de októ Isá re dóridi bolla moukar talac ot accíl. **7** Tarfore Cútar-sára Ruñir-id or din aiccé, ze din ot Azadir-id or hána lla bérasóol or sóo kurbani gorá fóros. **8** Isá ye Fitor edde Yohánna re diferái hoór de, “Zoo, añára hái fari fán Azadir-id or hánar toiyari gorógoi.” **9** Ítara íba re hoór de, “Tuáñr ttu hondilla monehoór, añára hoñe toiyar goittám?” **10** Íba ye ítara re hoór de, “Tuáñra cóor ot góile mottor, zok ot gori faní loizar de ézzon manúc tuáñra llói milibó; íba ze gór ot gólibo hé gór ot íbar fisé-fisé zaiyo, **11** aar gór gan or girós ore hoibá de, ‘Ustate tuáñr re hoór de, “Meéman-hána hoñe, ziyán ot Añí Añr cárít tun or fúañti Azadir-id or hána hái fajjum?”” **12** Hétunot yóggwa ye tuáñra re háñzaiya ekkán uoror talar dōóñr kamára daháibo; héñe toiyar goijjó.” **13** Tói ítara zai, Isá ye ítara re zendilla hoiyé héndilla faiyé; baade Azadir-id or hánar toiyari goijjé. **14** Zeñtté októ aáigiyoi, Isá hána háito boicccé, íbar fúañti sáhabi gún óu boicccé. **15** Íba ye ítara re hoór de, “Añí duk faibar age tuáñrar fúañti e Azadir-id or hána háito bicí azzu goijjé; **16** kiyólla-hoilé Añí tuáñra re hoóir, zetódin foijjonto yíán Allar raijjet fura no, hétodin iín Añí abar na háiyum.” **17** Baade íba ye fiyala looi Alla re cúkuriya gorí hoór de, “Yibá looi tuáñrar bútoze borat

goró. **18** Kiyólla-hoilé Añí tuáñra re hoóir, ehón ottu lóti Allar raijjo nú aiyé foijjonto Añí anggur or roc na háiyum.” **19** Tarfore Íba ye ruṭi looi Alla re cúkuriya goijjíl, aar báñgi ítara re dii hoór de, “Yíán Añr gaa, ziyán tuáñra lla diiya zaybo; Añré monot gorí bolla endilla goijjó.” **20** Héndilla ruṭi hái baade fiyala wa looi hoór de, “Añr lou loi óibo de noya razinamar nicán óilde e fiyala, ze lou tuáñra lla dálidiyum. **21** “Montor soó, zee Añré dóridibo íte ehón Añr fúañti mes ot hána háar. **22** Becók, Alla ye fáisela goijjé de mozin Manúc or Fua moribó, montor afsús uitar uore, zee Íba re dóride.” **23** Híyan fúni, tarár bútotu hé ham mán hone goríbo hoói ezzon ottu ezzone fusár goijjíl. **24** Ítarar bútotu haré beggún or túaro ḑoóñr mana zaybo hoói yó ekkán barábari uittíl. **25** Isá ye ítara re hoór de, “Beyohúdi ókkol or baáñcca ókkole tarár uore hókumot goré, aar tarár uore zará adíkar sola, ítara ‘manúc or dustó’ bóuli dabi goré. **26** Montor tuáñra héndilla no óiyo, bóлке zee niki tuáñrar bútoze ebbe ḑoóñr asé, tee ebbe cónro war ḑóilla óuk; aar zee niki sóddar asé, tee gulam or ḑóilla óuk. **27** Kiyólla-hoilé honnwá ḑoóñr, ki mes ot hána háito boiyé de íba, aar náki hédmot goré de íba? Mes ot háito boiyé de íba no né? Lekin Añí tuáñrar bútoze hédmot-goróyar ḑóilla. **28** “Tuáñra óilade uitará zetará Añr dukkór októ fúañti-fúañti accíla. **29** Añr Bafe zendilla Añré ekkán raijjo diiyé, héndilla Añí yó tuáñra re ekkán raijjo diir, **30** zeéne tuáñra Añr raijot mazé Añr mes ot háafiya goró, edde toktót boói Isráil or baró guiccír bisar goró.” **31** “Sáimon, Sáimon, fún, Cóitane tuáñra re giyuñr ḑóilla salifélai bolla ezazot maiggé. **32** Montor tor iman komzur no fán Añí tor lla dua goijjí, aar zeñtté tui Añr hére waafes aibí, tor báiyain dore mozbut goríc.” **33** Fitore hoór de, “Malik, añí Tuáñr fúañti ziyól ot zaito edde moitto toiyar así.” **34** Isá ye hoór de, “Fitor, Añí toré hoóir, aijja ratakurá bak dibar age tui Añré no sinós hoói tin bar inkar goríbi.” **35** Tarfore Isá ye ítara re hoór de, “Zeñtté Añí tuáñra re ṭiañr zali, cenṭar edde hóilla sára diferáilam, héñtte tuáñra ttu kessúr homi aiccíl né?” Ítara hoór de, “Kessúr homi nu accíl.” **36** Íba ye hoór de, “Ehón zar ttu ṭiañr zali asé tee fúañti loo, héndilla hóilla yó loo, aar zar ttu súri náí, tee nizor saddor besi ekkán kinilo. **37** Pak-kalam ot toh endilla asé, ‘Íba re gunágar orfúañti gona giyéh,’ Añí tuáñra re hoóir, hé hotá Añr bútoze fura ówa zorur, kiyólla-hoilé Añr baabute zín leikké híin fura ór.” **38** Ítara Íba re hoór de, “Malik,

soó, eṛé duiyán súri asé.” Íba ye hoór de, “Íin óile kafi.” **39** Isá neeli Nizor niyom mozin Zaitun Faár ot giyyé; cárit tun óu Íbar fisé-fisé giyyé. **40** Hé zagat foóñsi Íba ye ítara re hoór de, “Dua goró, zeéne entán ot no foro.” **41** Íba ítarar híyan ttu eggwá cíl or dola melá máille zeddúr zaa, héddur ánik duré zai añṛúr tókdi dua gorér de, **42** “Ó Baf, zodi Tuñí soó, e duk-mosibot or fiyala yibá Añr ttu dur gorífelo, montor toóu Añr moncá mozin no, bóлке Tuáñr moncá mozin óuk.” **43** Hétunot asman ottu eggwá fírista dahá dí Íba re bol diiyé. **44** Íba ocánti ói dilmon di aró bicí dua gorát accíl, aar Íbar gám lou wór fúṛar ḑóilla ói meṛit foijjíl. **45** Íba zeñtté dua ttu urí cárit tun or hére aiccé, héñtte ítara ferecane óran ói gúm gíye de loot faiyé. **46** Íba ye tará re hoór de, “Tuáñra gúm zoór kiyá? Uró aar dua goró, zeéne entán ot no foro.” **47** Íba ye híin hoór de októ, ek dol manúc aiccé, aar baró zon cárit tun ottu Yohúdah hoó de íte tarár age-age accíl. Íte Isá re appá dí bolla Íbar ḑáke giyyé. **48** Montor Isá ye ítare hoór de, “Yohúdah, tui Manúc or Fua re appá dí dóri dór dé?” **49** Zeñtté Íbar sáañti ókkole kii óibo de ót faiyé, ítara hoór de, “Malik, añára toluwar solaiyum né?” **50** Ítara ttu ezzone toluwar solai boro imam or gulam or den ḑák or han haṛifélaiye. **51** Montor Isá ye hoór de, “Bon gor, endilla aar no goríc.” Baade Íba ye tar han dóri gom gorídiye. **52** Tarfore Isá ye ḑoóñr imam ókkol, baitul-mukaddos or sóddar ókkol, edde murubbi ókkol, zetará Íba re dóitto aiccé, tará re hoór de, “Tuáñra ḑahañṭ dóitto aiccó fángori toluwar edde laṛí-cúra loi aiccó dé? **53** Añí tuáñrar fúañti fottí din baitul-mukaddos ot tákite toh tuáñra Añr uore át nó lago; lekin ehón tuáñrar októ, ze októ aṇdáre hókumot gorér.” **54** Tarfore tará Íba re gereftar gorífelai boro imam or gór ot loigiyói. Fitor duré-duré táí fisé-fisé zaat accíl. **55** Tará zeñtté urán or mazé ooin zali fúañti gul gorí boiccé, Fitor óu tarár fúañti boiccé. **56** Ekgwá bañdi mayafua ye Fitor ore ooin or ṭal ot boiṛa deki, gúañrai saái hoór de, “E manúc cwa yó Isár fúañti accíl.” **57** Montor Íba ye endilla hoói inkar gorídiye, “Héy mayafua, añí Íba re no siní.” **58** Hotún baade Íba re ar ezzone deki hoór de, “Tuñí yó ítarar bútotu ekzon.” Montor Fitore hoór de, “No báí, añí no.” **59** Arek gónḑa ánik baade ar ezzon manúce yó ekin or sáañte hoór de, “Sóiyi, e manúc cwa yó Íbar fúañti accíl, kiyólla-hoilé íbá yó Galil or manúc.” **60** Montor Fitore hoór de, “Ó báí, tuñí iín kiyór baabute hoór añí no zani.” Íba ye híyan hoór de októ, éhon-

éhon ratakurá bak diyé. **61** Hétunot Malike fíri Fitor or uzu saiyé. Aar Fitor ottu Malik or hotá waán monot uitté, ki hoilé, “Aijja ratakurá bak dibar age tui Añré tin bar inkar goríbi.” **62** Baade íba baäre neeligói kúb hañdat doijje. **63** Zetará Isá re faáradi accíl, tará íba re ínca gorát edde marat doijje. **64** Tará íbar suk bañdí fusár gorér de, “Toré hone maijje antas gor sái?” **65** Héndilla tará íbar hélaf bicí hotá ókkol hoói íba re beizzoti goijjíl. **66** Bíinna foór fáitte rár, ñoóñr imam ókkol or edde alem ókkol or, yáni Yohúdir murubbi ókkol or mujilíc óiye; ítara Isá re fótuayi-mujilíc ot aní hoór de, **67** “Tuñí zodi Mosih de óile, añára re hoó.” íba ye ítara re hoór de, “Zodi Añí tuáñra re hoói, tuáñra ekin no goríba, **68** aar zodi Añí tuáñra ttu ekkán súwal fusár gorí, tuáñra zuwab no dibá. **69** Lekin yala lóti Manúc or Fua Alla Tálar den dák ottu boói tákibo.” **70** Hétunot ítara beggúne fusár gorér de, “Tóoile Tuñí Allar Fua níki?” íba ye ítara re hoór de, “Tuáñra sóiyi hoór, ói Añí.” **71** Híyane ítara hoór de, “Añára ttu ar kii gobá lager dé? Kiyólla-hoilé añára toh híyan Ibár nizer muk ottu fúinni.”

23 Tarfore mujilíc tyya urí Isá re Filat or hañse loigiyé. **2** Aar ítara íbar uore endilla elzam ókkol lagat doijje, “Añára loot faiyí de, e Manúc cwa ye añárar koum ore gumrá gorífeler. Ibá ye Romi baáñcca re házana no diito maná goré, edde dabi goré de ki íba Nize Mosih, Baáñcca.” **3** Filate Isá ttu fusár gorér de, “Tuñí Yohúdi ókkol or Baáñcca níki?” íba ye yóggwa re zuwabe hoór de, “Ói, tuñí hoór de héndilla.” **4** Tói Filate ñoóñr imam mún ore edde manúc or dol ore hoór de, “Añí toh e Manúc cwa ttu honó hosúri no fair.” **5** Montor ítara zit gorát accíl, ítara hoór de, “Íbá ye fura Yohúdiyat taalim di manúc ókkol ore uskai der. Ibá ye héndilla Galil ottu lóti cúru gorí e zagat foijjonto aiccé deh.” **6** Filate híyan fúinne rár, Manúc íbá Galil or niki fusár goijjé. **7** Yóggwa ye Isá zettót Hérud or elakar Manúc de zani faijje, yóggwa ye íba re Hérud or hére diferaídiye, kiyólla-hoilé hé októť Hérud óu Jerúsalem ot accíl. **8** Hérude Isá re deki bicí kúci óiye, kiyólla-hoilé yóggwa ye bicí deri lóti íba re deki bolla azzu gorí accíl. Yóggwa ye íbar baabute fúinnil de híyala lóti íba ttu kessú keramot sai bolla acá goijjíl. **9** Yóggwa ye Isá re boóť súwala-súwali goijjíl, montor íba ye yóggwa re honó zuwab nó deh. **10** Ñoóñr imam múne edde alem múne hére tyyai zuresúre íbar uore elzam lagat accíl. **11** Tarfore

Hérude edde yóggwar fóous ókkole Isá re beizzoti edde táťtai goijjíl. Ítara íba re sosoikka eggwá zubba fiñdái Filat or hañse waafes diferaídiye. **12** Hé din Filat edde Hérud dustó óigiyoi, age ítara ezzon loi ezzon duccon accíl. **13** Filate ñoóñr imam ókkol ore, sóddar ókkol ore edde awam ókkol ore matai zoma goijjé, **14** tói ítara re hoór de, “Tuáñra e Manúc cwa re añr hañse ainnó de, Ibá ye maincóre bagi boni bolla uskai der hoói. Montor soó, añí Ibá re tuáñrar cáikkat zerá goijjí, tuáñra e Manúc cwar uore ziín elzam lagoór, híin or baabute añí Ibá ttu honó hosúri no fair. **15** Hérude yó nó faa, hétolla yóggwa ye Ibá re añárar hañse waafes diferaídiye deh; tuáñra dekor, moot or laayek Ibá ye honó kessú nó goré. **16** Hétolla añí Ibá re sáñza dí hálas gorídiyum.” **17** Yóggwa ttu fottí Azadir-id or din honó ek hodi re ítarar hañse hálas gorídiya foitto. **18** Montor ítara beggúne ekkú fúañti guzori hoór de, “Íba re marifélo, Bárabba re añárar hañse hálas gorído.” **19** Bárabba re ziyól ot díya gyíl de, íte cóor ot bagiyai goijjíl de hétolla edde kún goijjíl de hétolla. **20** Filate Isá re hálas gorídirar niyote, ítara re ekí ñóilla hotá abar hoóil. **21** Lekin ítara guzori-guzori endilla howát accíl, “Kúruc ot dífeló, íba re kúruc ot dífeló!” **22** Filate tisárabar ítara re hoór de, “Kiyá, e Manúc cwa ye kii bura goijjé dé? Añí toh Ibá ttu mora fore de héndilla honó hosúri nó fai; hétolla añí Ibá re sáñza dí hálas gorídiyum.” **23** Montor ítara zit gorí guzori-guzori dabi gorát accíl de ki, íba re kúruc ot dí mariféla záy bolla. Aar ahérit ítarar guzora kaamiyab óiye. **24** Tói Filate ítarar dabi mozin gorá záy bolla hókum díye. **25** Yóggwa ye ítara maiggíl de manúc cwa re hálas gorídiye, zibá re ziyól ot díya gyíl de, bagiyai edde kún goijjíl de hétolla; montor Isá re ítarar moncá mozin gorá záy bolla gosái dífelaiye. **26** Fóous ókkole Isá re loizargói de októť, ítara Kureni cóor or Sáimon nam or ézzon manúc ore gang zaga ttu aiyér de hére dórifelaiye, dóri yóggwar uore kúruc can tulídiye, híyan Isár fisé-fisé boói loizai bolla. **27** Ñoóñr ek dol manúc Isár fisé-fisé zaat accíl, ítarar búťore boóť beriyáin óu accíl zetará íba lla buk kilai-kilai hañdat accíl. **28** Isá ye ítarar híkka fíri hoór de, “Ó Jerúsalem or mayafuain, Añr lla no hañdiyó, bóke tuáñra nizer lla edde nizer fuain dor lla hañdo. **29** Kiyólla-hoilé soó, eén din aiyér, ze din maincé hoibó de, ‘Mubarek báz mayafuain ókkol, zetará ttu honódin fuain nó óiyo, zetará honódin buk or dud nó háaba.’ **30** Héntte maincé murá ókkol ore hoibó de, ‘Añárar uore

for,’ aar faár ókkol ore hoibó de, ‘Añára re záfaifel.’

31 Kiyólla-hoilé manúce dargwá keeñsa tákite zodi endilla goré, fúaile kii no goríbo de asé?” **32** Ítara oinno dui zon acámi re yó Íbar fúañti marifélaí bolla loizar. **33** Ítara zeñtté Matár Mala hoó de zaga híyan ot foónicce, hére ítara Íba re edde hé acámi gún ore kúruc ot díye, ezzon ore Íbar den dák ottu edde ar ezzon ore Íbar ban dák ottu. **34** Isá ye hoór de, “Ó Baf, itará re maf goró; kiyólla-hoilé itará kii goré de híyan itará no zane.” Baade ítara lojárí mari ítarar búture Íbar hoorsuor ore bák goijjé. **35** Manúc ókkole tíyai saái táikkil. Yohúdir neta ókkole yó Íba re táttai gorí hoór de, “Íbá ye toh oinno zon ore basaitó; zodi Íbá Allar Baicá Mosih wa de óile, yala Nizoré Nize basouk saí.” **36** Fóous ókkole yó dáké aái Íba re táttai gorát accíl. Ítara Íba re hái bolla sírka dii **37** hoór de, “Zodi Tui Yohúdir Baáñcca de óile, yala Nizoré Nize basa saí!” **38** Íbar matár uottú ekkán sáainbút óu maridiíl, ziyán ot leikké de, “Íbá óilde Yohúdi ókkol or Baáñcca.” **39** Kúruc ot díya giyéh de acámi ttu ezzone Íba re beizzoti gorí hoór de, “Tui ki Mosih no? Nizoré edde añára re basa sená.” **40** Montor oinno acámi wa ye itare jéjjerai zuwab der de, “Tui ki Alla re úddwa no ñooros? Tui yó de ekí dóilla sáñza foór. **41** Becók añárar sáñza hókkot, kiyólla-hoilé añára nizar ham olla ziyán laayek híyan fair deh, lekin e Manúc cwa ye toh honó hosúri nó goré.” **42** Tarfore yóggwa ye hoór de, “Ó Isá, Tuñí Nizor raijjot aibá de októ añré yaad raikkó.” **43** Isá ye yóggwa re hoór de, “Añí tuáñre sóiyi hoóir, aijja tuñí Añr fúañti jonnotul-férodus ot óiba.” **44** Héñtte duññijar baró wa ánik baijje, héñtte lóti tin nwá báze fán guñra mulluk andár ói accíl, **45** kiyólla-hoilé beile foór díya bon gorífelaiye; aar baitul-mukaddos or foroda gán fári dui bák óigiyoi. **46** Hétunot Isá ye eggwá ñoor abase guzori hoór de, “Ó Baf, Tuáñr át ot Añr ruh gosáidiyi.” Híyan hoói baade Íba entehal óigiyoi. **47** Ziyán óiye híyan deki Romi cáape Allar taarif gorí hoór de, “Sóiyi e Manúc cwa behosúr accíl!” **48** Aar manúc zetará hé tooñcá saító zoma óiye, ítara beggúne ziín óiye híin deki buk kilai-kilai waafes giyyégoi. **49** Montor Íbar sinforiso manúc edde beriyáin zetará Galil ottu lóti Íbar fisáli doijil, ítara beggúne duré góri tíyai híin saái táikkil. **50** Yusúf nam or ézzon gom edde forhésgar manúc accíl. Yóggwa fótuayi-mujilíc or membór accíl, **51** montor yóggwa ítarar sóllat edde ham ot razi nu accíl. Yóggwa Yohúdir cóor Aramátíyat tákito, aar

Allar raijjo lla entezar gorí accíl. **52** Yóggwa ye Filat or hañse zai Isár lac cwa maiggé, **53** baade lac cwa lamai ekkán hohón or hoor ot beráiyé, aar cíl kúñdi banaiyé de eggwá hobor or búture raikkégoi, zibát honódin honókiyo re dohón goráil de náí. **54** Hé din accíl entezam-or-din, aar ebaadot-or-din cúru óibar októ óiye. **55** Galil ottu ze beriyáin nún Isár fúañti aiccíl ítara fisá dori, hobor gwá edde Isár lac cwa re keéngori raikké de deikkíl. **56** Tarfore ítara waafes zaigói, kúcho mosólla ókkol edde añtor ókkol toiyar goijjíl. Aar ebaadot-or-din Córiyot or hókum mozin ziraáil.

24 Háftar foóila din biínna kúb sóore, beriyáin nune kúcho mosólla uúin looi hobor gwat aiccé ziín ítara toiyar goijjíl. **2** Ítara hobor or muk ottu cíl lan larifelaiya loot faáil, **3** montor búture góille rár, Malik Isár lac loot nó faa. **4** Ítara oulzóul ot forigiyói de októ, asimbit sosoikka hoor findá duwá manúc ítarar dák ottu tíyaiye. **5** Beriyáin ítara ñooré matá hémmikka gorífelaiye, montor manúc cúne ítara re hoór de, “Tuáñra Zindawa re mora ókkol ot máze kiyá tuwoór?” **6** Íba eré náí, Íba zinda óigiyoi. Monot goró, Íba ye Galil ot tákite tuáñra re kii hoóil. **7** Hoóil de, Manúc or Fua re gunágar ókkol or át ot gosáidiya foribó, kúruc ot dí mariféla foribó, aar tin din ot din Íba ttu abar zinda óizagoi foribó.” **8** Hétunot ítara ttu Íbar hotá monot uittíl. **9** Baade ítara hobor ottu waafes giyyégoi, aar híin beggún egaro zon nún ore edde baki manúc beggún ore zanaiyé. **10** Zetará sáhabi gún ore híin zanaiyé, ítara óilde Moriyam Makdálíni, Joanna, edde Yakub or maa Moriyam; ítarar fúañti aró beriyáin ókkol accíl. **11** Montor ítara ttu híin altufáltu hotár dóil laiggíl, hétolla ítara beriyáin nún ore biccác nó goré. **12** Lekin Fitor urí hobor ot duñrdiyé, aar niyúri saiyé rár dekér de, siríf hohón or hoor gún beh asé. Íba ye hé hálót deki taajup ói, gór ot giyyégoi. **13** Soó, hé din ítara ttu dui zon manúc ekkán Émayus nam or farat zaar, ziyán Jerúsalem ottu háñt mail duré. **14** Aar ítara ezzon loi ezzone, ziín óiye híin beggún or baabute gofat accíl. **15** Ítara gofer de edde toskara goré de októ, Isá Nize dáké aái ítarar fúañti añrat doijje. **16** Lekin ítarar suk ore Íba re siní no fare fán gorífela giyeh. **17** Íba ye ítara re hoór de, “Tuáñra añri-áñri ezzon loi ezzone iín kiyór baabute gofór dé?” Hétunot ítara nakmuk hala gorí tíyaigiyoi. **18** Ítara ttu zar nam niki Kaleópas, yóggwa ye Isá

re zuwabe hoór de, “Jerúsalem or forbáci siríf Tuñí ezzone niki e hooddin or búture óiye de híin no zano dé?” **19** Isá ye ítara re hoór de, “Kii óiye dé?” Ítara Íba re hoór de, “Isá Nasárir uore óiye de híin. Íba Allar edde tamám manúc or nozor ot hame edde hotáhattaraye eggwá taakotwala nobi accíl. **20** Doónir imam ókkole edde añárar sóddar ókkole Íba re moot or sánza lla gosáidiye, aar Íba re kúruc ot dífela gíyeh. **21** Lekin añára ttu acá accíl de, Boni Isráil ore Íba ye beh azad goríbo. Aró hoiyúm hoilé, iín óiye de aijja tin din óigiyoi. **22** Montor añárar bútotu hoozzon beriyáin de añára re ammúk gorídiye. Ítara biínna kúb sóore hobor gwat gyl, **23** montor Íbar lac loot nó faa. Ítara aái hoiyégai de, ítara re fírista ye dahádiye aar híine ítara re hoiyé de, Íba zinda asé. **24** Hétunot añárar fúañti accíl de ítara ttu hoozzone hobor gwat giiyé rár, beriyáin núne hoiyé de mozin loot faiyé, montor ítara Isá re nó deké.” **25** Hétunot Isá ye ítara re hoór de, “Ó bekuf ókkol, tuáñrar dil toh nobi ókkole hoógiye de hotá beggún biccác goitté bicí asté! **26** Mosih ttu Íbar mohímat góilte duk híin faar ki zorur nu accíl?” **27** Baade Íba ye Muúsa edde tamám nobi ókkol ottu cúru gorí, fura pak-kalam ot Íbar baabute zín asé híin ítara re buzáidiye. **28** Zaite-zaite ítara zaar de farar hañsahañsi foónicce rár; Íba ye aró duré zaar fán goijjíl. **29** Montor ítara Íba re becábicí aros gorí hoór de, “Añárar fúañti táizogoi, kiyólla-hoilé háñz óizargoi, aar din fúriyegai.” Tói Íba ítarar fúañti táki bolla búture giiyé. **30** Aar eén óiye, zeñtté Íba ítarar fúañti hána háito boiccé, Íba ye ruñi looi Alla re cúkuriya goijjíl, aar báñgi ítara re diiyé. **31** Hétunot ítarar suk kúligiyoi, aar ítara Íba re sinné; montor Íba ítarar nozor ottu gaib óigiyoi. **32** Ítara ezzon ore ezzone hoór de, “Foñt ot zeñtté Íba ye añára llói hotá hoór aar añára re pak-kalam buzái der, héñtte añárar búture añárar dil zolat accíl de no né?” **33** Ítara éhon-éhon urí Jerúsalem ot waafes aáigiyoi, aar hére egaro zon nún ore edde ítarar sáañti ókkol ore ekkán ot zoma loot faiyé, **34** aar hoór de, “Malik sóiyi zinda óiye; Íba ye Sáimon ore dahádiye.” **35** Tarfore ítara duní zone foñt ot kii óiye de zanaiyé, edde Isá ye ruñi báñgibar októót Íba re ítara kéengori sinníl de híyan óu zanaiyé. **36** Ítara híin hoór de októót, Isá Nize ítarar mazé aái tíyaiye, aar hoór de, “Assalamu alaikum.” **37** Montor ítara doore toddó óigiyoi, ítara táaijje de bút dekér bóuli. **38** Íba ye ítara re hoór de, “Tuáñra doorór kiyá? Tuáñrar dil ot cóok kiyá aiyér? **39** Añir

át téng soó, Ibá Añí. Añré dóri soó, kiyólla-hoilé búttu toh gusso edde áñdði náí, zendilla Añr ttu asé de dekór.” **40** Híyan hoói Íba ye ítara re Nizor át téng daháiyé. **41** Ítara zettót kúciye edde taajupe biccác gorí no farer, Íba ye ítara re hoór de, “Hái bolla eré tuáñra ttu kessú asé né?” **42** Tói ítara Íba re ek hánda síañt díya mas diiyé. **43** Aar Íba ye híyan looi ítarar cáikkat háiyé. **44** Tarfore Íba ye ítara re hoór de, “Íin óilde Añr hotá zín tuáñra re Añí tuáñrar fúañti tákite hoóilam, ki hoilé, Añr baabute zín Muúsar Córivot ot, nobi ókkol or kitab ot, edde Zobur Córif ot leikká asé, híin beggún fura ówar zorur.” **45** Baade Íba ye ítarar demak kúlidiye, zeéne ítara pak-kalam buzí fare. **46** Íba ye ítara re hoór de, “Pak-kalam ot endilla asé, Mosih ye duk faibo aar tin din ot din mora ttu zinda óizayboi, **47** baade Jerúsalem ottu lóti cúru gorí tamám koun ókkol or hañse Íbar name guná maf faibar touwár tobolik gorá zaybo. **48** Tuáñra óilade iín beggún or gobá. **49** Soó, Añr Baf or waada goijjá wa re Añí tuáñrar hañse diferáidiyum; lekin asman ottu taakote bóri nó zogoi foijjonto e cóor ot táikko.” **50** Fore Isá ye ítara re baárkule Betániyar héddur foijjonto loigiyé, aar Íbar át tulí ítara re borhot diyé. **51** Íba ye ítara re borhot diyat accíl de októót, Íba ítara ttu alok óigiyoi, aar Íba re asman ot tulífela gíyeh. **52** Ítara Íba re sóida gorí baade, bicí kúcir sáañte Jerúsalem ot waafes aáigiyoi, **53** aar baitul-mukaddos ot házir táki lagatar Allar taarif gorát accíl.

Yohánna

1 Foóila cúrut Kalam accíl, Kalam Allar fúañti accíl, edde Kalam nize Alla accíl. **2** Íba foóila cúrut Allar fúañti accíl. **3** Hárr kessú Íbar duara foida gorá gíyeh, aar zedún foida gorá gíyeh híin or búture ekkán óu Íba re sára foida gorá nó zah. **4** Íbar hañse zindigi accíl, aar hé zindigi accíl insán or Nur. **5** Hé Nure andár ot foór deh, montor andáre hé Nur ore ziti no fare. **6** Alla ye Yaháya nam or ézzon manúc ore duniyait diferáil. **7** Yóggwa re hé Nur or ek gobá ísáfe diferá gíyl, zeéne beggúne yóggwar gobá fúni iman ané. **8** Yóggwa nize hóno hé Nur accíl de no, bólke yóggwa hé Nur or baabute gobá díto aiccíl deh. **9** Sóiyi Nur óilde Ubá zibá ye fottí maincóre foór deh, íba duniyait aibár accíl. **10** Íba duniyait accíl, aar duniyai Íbar duara foida gorá gíyeh, toóu duniyair maincé Íba re nó siné. **11** Íba Nizor maincór hére aiccíl, montor nizor maincé Íba re kobul nó goré. **12** Lekin zetó zone Íba re kobul gorí iman ainné, ítara fottí zon ore Íba ye Allar fuain óibar hók diiyé. **13** Ítarar hé zormo no lou wóttu óiye, no jisím or moncáye óiye, aar no manúc or moncáye óiye, bólke Alla ttu óiye deh. **14** Hé Kalam insán boinné, aar añárar fúañti táikke. Baf or lehár ek Fua ísáfe Íbar ze mohíma asé hé mohíma re añára deikkí. Íba rahámote edde sóiyiye furaiya. **15** Yaháya ye Íbar baabute gobá díyl. Yóggwa ye guzori hoóil de, “Íbá óilde Ubá zibár baabute añi endilla hoóilam, ‘Añi baade zibá aiyér Íba añr túaro ñoóñr, kiyólla-hoilé Íba añr age lóti asé.’” **16** Añára beggúne toh Íbar furaiya ttu rahámot or uore rahámot faiyí. **17** Kiyólla-hoilé Córíyot diiya gíyl de Muúsar duara, montor rahámot edde sóiyi aiccé de Isá Mosihr duara. **18** Alla re toh honókiye honódin deikké de náí, lekin Baf or buk ot accíl de lehár ek Fua ye beh Íba re zahér goijjé. **19** Yaháyar gobá accíl de yíán, zeñtté Yohúdir neta ókkole Jerúsalem cóor ottu hoozzon imam ore edde Leéviyo re yóggwar hére yíán fusár goittó diferáiyé, “Tuñí hon?” **20** Yóggwa ye inkar nó goré, bólke cíkar gorí hoiyé de, “Añí Mosih no.” **21** Ítara yóggwa ttu fusár goijjé de, “Tóoile tuñí hon? Tuñí hóno nobi Eliyas né?” Yóggwa ye hoiyé de, “No, añí no.” Tói ítara fusár goijjé de, “Tuñí kí aibár hotá asé de hé Nobí?” Yóggwa ye zuwab diyé de, “No.” **22** Tarfore ítara yóggwa re hoiyé de, “Tóoile tuñí hon añára re zuwab doh, zeéne zetará añára re diferáiyé ítara re zuwab di fari. Tuñí nizor baabute kii hoó?” **23** Yaháya

ye nobi Yesáyahr hotá lói zuwab diyé de, “Añí óilam de ubá zibá ye moidan zagat guzori-guzori eén hoór, ‘Mabud or rasta uzu goró.’” **24** Hé manúc ítara re diferá gíyeh de óilde Féroci fírkar torfóttu. **25** Ítara Yaháya ttu fusár goijjé de, “Zodi tuñí Mosih no, Eliyas no, edde hé Nobí wa yó no, tóoile tuñí báp̄tisma kiyá doh?” **26** Yaháya ye ítara re zuwabe hoiyé de, “Añí toh fanít éna báp̄tisma dí, montor tuáñrar búture eén Ekzon tíyai asé zibá re tuáñra no sinó. **27** Íba óilde Ubá zibá añi baade aiyér; añi Íbar centár or fíta kúli bolla úddwa laayek no.” **28** Íin Jordán hál or farkule Betáníyat óiye deh, zere Yaháya ye báp̄tisma díto. **29** Tarfor din Yaháya ye Isá yóggwar uzu aiyér de deki, hoór de, “Soó, Ubá óilde Allar Bérásóol-or-Sóo, zibá ye duniyair maincór guná loizagói. **30** Íba óilde Ubá zibár baabute añi endilla hoóilam, ‘Añi baade eén Ekzon aiyér, zibár tokka añr túaro ñoóñr, kiyólla-hoilé Íba añr age lóti asé.’” **31** Añí Íba re no sinítam, montor Íba Isráili ókkol or hañse zahér ó fán, añi fanír báp̄tisma díto aiccí deh.” **32** Tarfore Yaháya ye yíán gobá díye, “Añí deikkí de, Pak-Ruh hoitor or dóilla ói asman ottu lami aái Íbar uore boiccé. **33** Añí Íba re no sinítam, montor zibá ye añré fanír báp̄tisma díto diferáiyé, Íba ye añré hoiyé de, ‘Zibár uore Pak-Ruh lami aái boibó de dekíbi, Íba óilde Ubá zibá ye Pak-Ruh lói báp̄tisma díbo.’” **34** Añí héndilla deikkí edde gobá dír de ki, Íbá óilde Allar Fua.” **35** Tarfor din abar Yaháya edde yóggwar dui zon ummot hére tíyai accíl. **36** Aar Isá híyan ttu añri zaar de deki, yóggwa ye hoór de, “Soó, Ubá óilde Allar bérásóol-or-Sóol!” **37** Yóggwar hotá fúni, hé duní ummot Isár fisáli doijje. **38** Isá ye fisá firi deké de, ítara fisé-fisé aiyér; hétunot ítara re hoór de, “Tuáñra kii talac gorór dé?” Ítara zuwab der de, “Rabbí” (ziyán or maáni óilde, ustat), “Tuñí horé táko dé?” **39** Íba ye ítara re hoór de, “Aiyó soógai.” Tói ítara zai, Isá táke de zaga gán saiyé, aar hé din Isár fúañti táikkil. Héñtte hánzinna sair gwá baijíl. **40** Yaháyar hotá fúni ze dui zon Isár fisáli doijjil, ítara ttu ezzon accíl Sáimon Fitor or báí Enderiyas. **41** Yóggwa ye age nizor báí Sáimon ore tuwai loi Íba re hoór de, “Añára Mesáiya re loot faiyí” (Mesáiya maáni, Mosih). **42** Yóggwa ye Sáimon ore Isár hañse ainné. Isá ye Sáimon or híkka saái hoór de, “Tui toh Yohánnar fua Sáimon, montor toré Kéfas ñaha zaybo” (hé nam or maáni óilde, Fitor). **43** Tarfor din Isá ye Galil elakat zaitogói niyot goijjé. Íba ye Filíp ore loot fai hoór de, “Añr fisáli dor.” **44** Filíp

accíl de Enderiyas edde Fitor tarár cóor Betsáidar manúc. **45** Filípe Natanel ore loot fai hoór de, “Añára Ubá re loot faiyí zibár baabute Muúsa ye Tourat Córif ot leikké, aar nobi ókkole yó leikké; íba óilde Yusúf or fua Isá, Nasárat cóor or.” **46** Natanele íba re hoór de, “Nasárat ottu kí kessú gom aái fare?” Filípe hoór de, “Aiyó, soógai.” **47** Isá ye Natanel Nizor uzu aiyér de deki yóggwar baabute hoór de, “Soó, ezzon sóiyi Isráili, zibár búture honó dúkabazi náí.” **48** Natanele Isá ttu fusár gorér de, “Tuñí añré keéngori sinó?” Isá ye yóggwa re zuwabe hoór de, “Tuáñre Filípe ñahaibár age zeñtté tuñí ñuñir-gas tala accíla, héntte Añí tuáñre deikkí.” **49** Hétunot Natanele íba re hoór de, “Rabbí, Tuñí óilade Allar Fua, Tuñí Boni Isráil or Baáñcca.” **50** Isá ye yóggwa re zuwabe hoór de, “Añí tuáñre ñuñir-gas tala deikkí hoiyí de híyan olla kí tuñí iman ainnó? Tuñí iín or túaro ñoóñr-ñoóñr ham ókkol dekiíba.” **51** Íba ye aró hoór de, “Añí tuáñra re sóiyi-sóiyi hoóir, tuáñra endilla dekiíba, asman kúla aar Allar fírista ókkol Manúc or Fuar uore urálama gorér.”

2 Tin din ot din Galil or Kána farat ekkán boirat óiye.

Isár maa hére accíl. **2** Hé boirat ot Isá edde íbar cárit tun ore yó dawot diyé. **3** Zeñtté hére anggur or roc fúraigiyoí, Isár maa ye Isá re hoór de, “Ítará ttu ar anggur or roc náí.” **4** Isá ye maa re hoór de, “Maá, híyan or baabute tuñí lói Añí lói kii bazá asé? Añr októ de aijjó nú aiyé.” **5** Isár maa ye háadem ókkol ore hoór de, “Íba ye tuáñra re zín goittó hoó, híin goijjó.” **6** Yohúdir Córiyot mozin uzu banai bolla hére fattór or sów wa siyú buágaraiya accíl, híin ekgwát máze kuri ttu tiríc gelóm foijjonto faní añritó. **7** Isá ye háadem ókkol ore hoór de, “E siyú gún ot faní bóro.” Tói ítara híin ot tip-tip faní bóijje. **8** Baade Isá ye ítara re hoór de, “Yala entú hodún looi boiraitta hánar zimmadar ore doogói.” Tói ítara loigiyé. **9** Ze faní gún anggur or roc bonigiyói, híin hé zimmadar gwá ye háisai baade dulá re mataiyé. Yóggwa ye hé anggur or roc cún huntú aiccé hoi no fare, montor goóur zetará faní ainné ítara hoi fare. **10** Yóggwa ye dulá re hoór de, “Fottí maincé de age gom anggur or roc cún hábaifela, aar meéman ókkol or mon mozin háiya óile baade yár túaro hóraf fin háaba. Montor tuñí aijjó gom anggur or roc cún rakídiyo.” **11** Galil or Kána farat illayi-ñicán ísafe e foíla cúru keramot tán gorí Isá ye Nizor mohíma zahér goijjé. Híyan deki íbar

cárit tune íbar uore iman ainné. **12** Yárbaade Isá, Isár maa, báiyain, edde cárit tun nise Kaparnahúm cóor ot giiyé; ítara hére hooddin táikkil. **13** Yohúdi ókkol or Azadir-id zeñtté ñáke aiccé, Isá uore Jerúsalem ot giiyé. **14** Aar baitul-mukaddos or urán ot mazé íba ye dekére de, maincé goru, bérasóol, edde hoitor ókkol beser, aar hodúne boói bañta bañger. **15** Hétunot íba ye rosí lói ekkán coónk banai ítara re baitul-mukaddos or urán ottu bérasóol edde goru ókkol lói looraidiye. Íba ye bañta bañgoya ókkol or ñebíl natñiyagaraidi ítarar ñiañ-foicá cínñaciññá goridiye. **16** Zetará hoitor beser, ítara re íba ye hoór de, “Entú iín loizogói! Añr Baf or gór ore bazar no banaiyó!” **17** Hétunot íbar cárit tun ottu pak-kalam or e hotá monot uitté, “Tuáñr gór or muhábbote añré háifelaibo.” **18** Yohúdi ókkole Isá ttu fusár gorér de, “Tuáñr ttu iín goríbar adíkar asé de híyan, Tuñí añára re kii keramot dahái sábut gorí faribá?” **19** Isá ye ítara re zuwab der de, “E baitul-mukaddos yíán bañgifeló, Añí tin din or búture banaidiyum.” **20** Yohúdi ítara hoór de, “E baitul-mukaddos yíán banaité salic-sów bosór laiggé, aar Tuñí tin din or búture banai diba dé?” **21** Montor Isá ye baitul-mukaddos or bazá dí íbar Nizor gaar baabute hoiyé deh. **22** Hétolla zeñtté Isá re mora ttu zinda gorá gíyeh, íbar cárit tun ottu íba ye hoiyé de hotá monot uitté. Tarfore ítara pak-kalam edde Isár hé hotár uore iman ainné. **23** Azadir-id or októ, Isá ye Jerúsalem ot tákite ze keramot goijjíl, híin deki bíci maincé íbar uore iman ainné. **24** Lekin Isá ye ítara re bóracá nó goré, kiyólla-hoilé íba ye manúc beggún ore bálagori siné, **25** aar íba ttu maincór baabute honó gobá no lage, kiyólla-hoilé maincór dil ot kii asé de híyan íba ye zane.

3 Férocí ókkol or búture Nikódemas nam or ézzon Yohúdi ókkol or neta accíl. **2** Ek din raitta yóggwa Isár hére aái hoór de, “Rabbí, añára zani, Tuñí ézzon ustat ísafe Allar torfóttu aiccó; kiyólla-hoilé Tuñí ze keramot ókkol goró, Alla fúañti no tákile honókiye híin gorí no fare.” **3** Isá ye yóggwa re zuwabe hoór de, “Añí tuáñre sóiyi-sóiyi hoóir, noya gori zormo no óile, honókiye Allar raijjo deki no fare.” **4** Nikódemase Isá ttu fusár gorér de, “Zeñtté manúc ézzon burá óizagói, íte keéngori abar zormo loibo? Dusárabar kí íte maar feřot góli abar zormo ói faribó?” **5** Isá ye yóggwa re zuwab der de, “Añí tuáñre sóiyi-sóiyi hoóir, faní edde Ruh ttu zormo no óile, honókiye

Allar raijjot góli no fare. **6** Insán ottu ziín zormo ó híin insán, aar Ruh ttu ziín zormo ó híin ruh. **7** Añí ziyán tuáñre hoíyí, tuáñra ttu noya gori zormo ówa foribó, híyan lói ammúk no óiyo. **8** Boiyar toh zikká monehoó híkka baá, aar tuñí hé boiyar or abas fúno, montor hontú aiyér aar hoikká zaar híyan toh no zano. Zetará Ruh ttu zormo óiye ítara yó héndilla.” **9** Nikódemase Isá ttu fusár gorér de, “Íin keéngori ói fare?” **10** Isá ye yóggwa re zuwabe hoór de, “Tuñí de ézzon Boni Isráil or ustat, toóu tuñí iín no buzó dé? **11** Añí tuáñre sóiyi-sóiyi hoóir, añára ziín zani híin hoóí, aar ziín deikkí híin or baabute gobá díh, montor tuáñra añárar gobá re kobul no goró. **12** Añí tuáñra re duniyaibi jiníc or hotá hoilé zettót biccác no goró, tói asmani jiníc or hotá hoilé keéngori biccác goríba? **13** Zibá asman ot táke aar asman ottu lami aiccé, hé Manúc or Fua sára ar honókiye asman ot nó uré. **14** Muúsa ye zendilla moidan elakat háf ore uore tuillíl, héndilla Manúc or Fua re yó uore tulá zaybo, **15** zeéne zee niki Íbar uore iman ané íte ofúrani zindigi faa. (aiōnios g166) **16** “Kiyólla-hoilé Alla ye duniyair maincóre etó muhábbot goijjé, Íba ye Nizor lehár ek Fua dan gorífelaiye; zeéne zee kiyé hé Fuar uore iman ané yóggwa nac no, bólke ofúrani zindigi faa. (aiōnios g166) **17** Alla ye toh duniyair maincór hosúri dóitto Nizor Fua re duniyair diferáye de no, bólke etollá diferáye, zeéne duniyair maincé hé Fuar duara nejat fa. **18** “Zee niki hé Fuar uore iman ané, ítar hosúr dóra no zah; montor zee niki iman nu ané, ítar hosúr age lóti dóra gíyeh, kiyólla-hoilé íte de Allar siríf ek Fuar uore iman nú ané. **19** Ítar hosúr etollá bóuli dóra gíyeh, kiyólla-hoilé duniyair Nur aiccíl, montor manúc ókkol or ham hóraf de hétolla, ítara Nur or túaro andár ore bicí fosón goijjé. **20** Zee niki hóraf ham goré, íte Nur ore nafórot goré aar íte Nur ot nu aiyé, kiyólla-hoilé zodi ailé ítar hórafí dahá zaybo bouli dóora. **21** Montor zee niki sóiyi gán gorí zindigi hara, íte Nur ot aiyé, zeéne ítar ham ókkol Allar moncá mozin gorá gíyeh de híyan sáf-sáf góri dahá zah.” **22** Yárbaade Isá edde Íbar cárit tun Yohúdiya elakat giyyé. Hére Íba cárit tun or fúañti hooddin táikkil, aar manúc ókkol ore báptisma díyl. **23** Héñtte Sálím zagar dáke Ainon nam or ek farat Yaháya yó báptisma díyat accíl, kiyólla-hoilé hé zagat bicí faní accíl, aar manúc ókkol aái Íba ttu báptisma lowat accíl. **24** Yaháya re hé óktót ziyól ot díya nó zah. **25** Ek din Yaháyar hoozzon ummote Yohúdi ókkol lói uzu banar baabute torkatorki diyé. **26** Ítara Yaháyar

hañse aái hoór de, “Rabbí, Zibá Jordán hál or farkule tuáñr fúañti accíl, Zibár baabute tuñí gobá díyla, soó, Íba ye báptisma der, aar manúc beggún Íbar hére aiyér.” **27** Yaháya ye zuwab der de, “Asman ottu diiya no gilé honókiye kessú fai no fare. **28** Tuáñra nize toh añr e hotár gobá asó, ki hoilé, ‘Añí Mosih no, montor añré Íbar age diferá gíyeh.’ **29** Zar át ot dulí re tulídiya gíyeh íte óilde dulá. Dulár dustó ye toh tíyai dulár hotá fúne, aar dulár abas fúni bicí kúci ó. Borabor héndilla, yala añr kúci yó fura óiye. **30** Becók Íba ttu dóóñr ówa foribó, aar añr ttu cóñro ówa foribó. **31** “Zibá uottú aiccé, Íba beggún or uore; zibá duniyai ttu, Íba duniyair, aar duniyaibi hotá hoó. Montor zibá asman ottu aiccé, Íba beggún or uore. **32** Íba ye ziín deikké edde fúinne híin or gobá déh, toóu honókiye Íbar gobá kobul no goré. **33** Montor zee niki kobul goijjé, íte e hotát moór lagaifélaye de ki, Alla óilde sóiyi. **34** Zibá re Alla ye diferáye, Íba ye Allar hotá hoó, kiyólla-hoilé Alla ye toh mafi-mafi Ruh no dee. **35** Bafé Fua re muhábbot goré, aar hárr kessú Íbar át ot gosáidiye. **36** Zee niki hé Fuar uore iman ané, ítar ttu ofúrani zindigi asé; montor zee niki hé Fuar uore iman nu ané, íte hé zindigi no deklóbo, bólke ítar uore Allar gozzob asé.” (aiōnios g166)

4 Zeñtte Malike zani faijjé de ki, Íba ye Yaháyar túaro bicí ummot banaiyé de aar báptisma díye de híin Féroci ókkole fúinne, **2** háleke Isá Nize báptisma no dito, bólke Íbar ummot ókkole dito deh, **3** tói Íba Yohúdiya elaka ttu neeli abar Galil elakat zaargói. **4** Zaité Íba ttu Samária elaka báy zaa forer. **5** Zaité-zaité Íba Samáriar Súkor nam or ekkán farat foóñicce, ziyán Yakube nizor fua Yusúf ore dífl de zobin or dáke. **6** Hére Yakub or faṭ-kuwa accíl. Isá áñiṭṭe-áñiṭṭe óran ói hé faṭ-kuwa war hañsat boiccé. Héñtte beil ṭík óiye. **7** Ekgwá Samáriar mayafua hére faní tuiltó aiccé. Isá ye híba re hoór de, “Añré ek tirác faní háaba.” **8** Kiyólla-hoilé Íbar cárit tun cóor ot hána kinto giyyói. **9** Hétolla hé Samári mayafua ye Isá re hoór de, “Añí de ézzon Samári mayafua, Tuñí Yohúdi ói yore keéngori añr ttu faní magor?” Híba ye e hotá etollá hoíyé, kiyólla-hoilé Yohúdi ókkol lói Samári ókkol lói honó taalukat náí. **10** Isá ye híba re zuwab der de, “Tui zodi Allar hádiya re edde tor ttu hone faní maiggé hoi faitti, tooile tui Íba ttu faní magití, aar Íba ye toré zindigi dee de faní diito.” **11** Mayafua ye hoór de, “Ustat, Tuáñr ttu de faní tulí bolla honó tára náí, aar faṭ-kuwa toh mur.

Tói Tuñí hé zindigir faní hoře faiyó? **12** Tuñí añárar baf Yakub or túaro ñoññ niki, zibá ye añára re e faṭkuwa wa diiyé, aar íba nize, íbar fuain ókkole, edde íbar gorusól ókkole yibár faní háíye?” **13** Isá ye híba re zuwabe hoór de, “Zee niki e faní háa, ítar ttu abar tirác lagibó, **14** montor zee niki Añí dii de faní háa ítar ttu ar honódin tirác no lagibó, bólke Añí diiyum de hé faní ítar dil ot zónna ttu uré fángori uríbo, aar híine ítare ofúrani zindigi diibo.” (aiñon g165, aiñnios g166) **15** Mayafua ye Isá re hoór de, “Ustat, tóoile añré hé faní doo, zeéne añr ttu ar tirác no lage, aar eré faní lla yó aá no fore.” **16** Isá ye híba re hoór de, “Tóoile zaa, tor hócom ore eré matai angói.” **17** Mayafua ye Isá re zuwabe hoór de, “Añr ttu de honó hócom náí.” Isá ye híba re hoór de, “Tui sóiyi hoiyós, tor ttu honó hócom náí. **18** Kiyólla-hoilé tor ttu yaar age fañs swá hócom ógiyoi, aar ehón zee niki tor fúañti asé, íte yó tor hócom no. Tui sóiyi hoiyós.” **19** Mayafua ye hoór de, “Ustat, añí ehón zani faijji, Tuñí ézzon nobi. **20** Zeén óibo óuk, añárar bafada ókkole e faár gwar uore ebaadot goittó, montor tuáñra Yohúdi ókkole hoó de, manúc ókkol ottu Jerúsalem ot ebaadot gorár fóros.” **21** Isá ye hoór de, “Mayafua, Añr hotá biccác gór, eén októ aiyér, tuáñra Baf or ebaadot no e faár or uore goríba, aar no Jerúsalem ot goríba. **22** Tuáñra zibá re no sinó íbar ebaadot goró deh; montor añára zibár ebaadot gorí íba re siní, kiyólla-hoilé nejat or mouka Yohúdir bútotu éna aiccé. **23** Lekin eén októ aiyér, ehón óilde hé októ, zeñtté sóiyi ebaadotgár ókkole ruh edde sóiyi lói Baf or ebaadot goríbo, kiyólla-hoilé Bafe yó héndilla ebaadotgár or talac gorér. **24** Alla óilde Ruh, hétolla zetará íbar ebaadot goré ítara ttu íbar ebaadot ruh edde sóiyi lói gorár zorur.” **25** Mayafua ye hoór de, “Añí zani Mesáiya aiyér, yáni Mosih. Íba zeñtté aibó, añára re hárr kessú zanaidibo.” **26** Isá ye híba re hoór de, “Añí óilam de íba, zibá ye tor loi hotá hoóir.” **27** Hétunot íbar cárit tun aiccé, aar Isá ye eggwá mayafua lloi hotá hoór de deki ítara ammúk ógiyoi; montor toóu ítara honókiye fusár nó goré de ki, “Tuñí kii tuwoór?” yáh, “Tuñí kiyólla híba lloi hotá hoór?” **28** Baade mayafua wa ye nizor fanír góra wa eri, farat zai manúc ókkol ore hoór de, **29** “Aiyó, tuáñra eggwá Manúc ore soógai, zibá ye añí añr zindigit zín-zín goijji híin beggún añré hoiyé. Tóoile íba hóno hé Mosih né?” **30** Tói manúc ókkol fara ttu neeli íbar hére aát diijje. **31** Héñtte íbar cárit tune íba re aros gorí hoór de, “Rabbí, kessú hóona.”

32 Lekin íba ye ítara re hoór de, “Añr ttu eén háibar hána asé, zín or baabute tuáñra no zano.” **33** Hétunot íbar cárit tune afós ot hoór de, “Honókiye hóno íba re hána anídiye né?” **34** Isá ye ítara re hoór de, “Zibá ye Añré diferáíye íbar moncá edde ham fura gorón óilde Añr hána. **35** Tuáñra kí endilla no hoó né, ki hoilé, ‘Aró sair mac asé, baade fósol haribár ainda aibó?’ Montor Añí tuáñra re hoóir, suk tulí bil or uzu soó, fósol ókkol harí bolla fagigiyói. **36** Fósol haroya ókkole ehón óu muzuri faar, aar ofúrani zindigi lla fósol ókkol zoma gorí rakér, zeéne lagoya edde haroya duní zone mili kúci ó. (aiñnios g166) **37** E hotá sóiyi de ki, ‘Ezzone laga, ar ezzone hare.’ **38** Añí tuáñra re fósol uúin haritó diferáilam zín olla tuáñra meénnot nó goró; oinno maincé meénnot goijje, aar tuáñra ítarar hé meénnot or fósol haiṭṭó.” **39** Hé mayafuar e hotá fúni fara híyan or bicí Samári ókkole Isár uore iman ainné, ki hoilé, “Añí añr zindigit zín-zín goijji híin beggún íba ye añré hoiyé.” **40** Zeñtté hé Samári ókkol Isár hañse aiccé, ítara íba re ítarar fúañti tákito aros goijjíl, tói íba hére dui din táikkil. **41** Íbar hotá fúni aró bicí maincé iman ainníl. **42** Ítara mayafua wa re hoiyé de, “Ehón de añára tor hotár zoriya iman ainní de no, bólke añára nize íbar hotá fúni zani faijji de ki, íba óilde Ubá zibá duniyair manúc or sóiyi Nejatdoya.” **43** Dui din baade Isá héntu rowana loi Galil ot giyyé. **44** Isá Nize age hoóil de, “Ze honó nobir izzot nizor wotón ot náí.” **45** Hétolla íba zeñtté Galil ot aiccé, Galil or maincé íba re kobul goijje, kiyólla-hoilé Isá ye Jerúsalem ot Azadir-id ot ze ham ókkol goijjíl híin beggún ítara deikkíl, kiyólla-hoilé ítara yó hé id ot giíl. **46** Baade íba abar Galil or Kána farat giyyé, zeré íba ye faní re anggur or roc banaáil. Hére Kaparnahúm cóor ot ek cáap or fua ttu ocúk óiye. **47** Zeñtté yóggwa ye fúinne de ki, Isá Yohúdiya ttu Galil ot aáigiyo, hétunot yóggwa Isár hañse zai aros gorér de, yóggwar fua wa re gom goittó aitó, kiyólla-hoilé fua wa moron-moron óoil. **48** Isá ye yóggwa re hoór de, “Tuáñra toh illayi-nicán edde keramot ókkol no dekiíle bilkúl iman nu aníba.” **49** Baáñccar cáape hoór de, “Ó Malik, añr fua wa moribár age aiyó!” **50** Isá ye yóggwa re hoór de, “Zoogói; tuáñr fua basibó.” Baade manúc cwa ye Isár hotá ekin gorí giyyégoi. **51** Yóggwa foñt ot táite, nizor hodún gulame aái hoór de, “Tuáñr fua gom ógiyoi!” **52** Tói yóggwa ye fua hoñtté gom óiye de híyan ítara ttu hóbor lóiyé. Ítara yóggwa re hoór de, “Gel de hailla din or eggwá báze

ítar zor giyyói.” 53 Hétunot bafe zani faijjé de, sóiyi oítté fua wa gom óiye zeñtté Isá ye hoiyé de, “Tuáñr fua basibó.” Baade yóggwa edde yóggwar gór ṭiya ye Isár uore iman ainné. 54 Yíán óilde Isár dui nombór or keramot, ziyán Íba ye Yohúdiya ttu neeli abar Galil ot aái goijjé.

5 Yárbaade, Yohúdir ekkán id óiye, aar Isá uore Jerúsalem ot giyyé. 2 Jerúsalem or Bérasóol Geiṭ hoó de híyan or ḍáke eggwá foóir asé, zibá re Hibrí zuban ot Betésda hoó, hé foóir gwat fañs sán baanda asé. 3 Baanda híin ot bicí biyaraimma ókkol fori tákito, zendilla niki, ańdá, leng, mazur. Ítara beggúne fanír lorasora re sooñi gorí tákito. 4 Kiyólla-hoilé Allar ek f̣rista ṭaime-ṭaime hé foóir gwat lami aái faní laritó, aar faní lari baade zee niki age lami fare ítar ze honó biyaram gom óizaytoi. 5 Hére ézzon manúc accíl, zibá tiríc-ańcto bosórja biyaraimma. 6 Isá ye zeñtté yóggwa re hére fori táikke de deikké, aar yóggwa bicí deri lóti hé hálot ot asé de zani faijjé, Íba ye yóggwa ttu fusár gorér de, “Tuáñr ttu gom óito monehoór ne?” 7 Biyaraimma wa ye Íba re zuwab der de, “Ustat, faní lare de októť ańré dóri foóir ot lamaidi bolla ańr ttu honókiye náí. Hétolla ańí foóńsite-foóńsite ańr agor ttu ar ezzon lamizagói.” 8 Isá ye yóggwa re hoór de, “Uró, tuáñr bisána tulí looi áńřo.” 9 Baade éhon or bútoře manúc cwa gom óigiyoi, aar nizor bisána tulí looi áńřat doijje. Hé din accíl Yohúdir ebaadot-or-din. 10 Híyan olla ze manúc cwa re gom gorá gíyeh, yóggwa re Yohúdi ókkole hoór de, “Aijja toh ebaadot-or-din; aijja bisána tulí loizon Córivot or maná.” 11 Montor yóggwa ye ítara re hoór de, “Zibá ye ańré gom goijjé Íba ye ańré hoiyé de, “Tuáñr bisána tulí looi áńřo.”” 12 Ítara yóggwa ttu fusár gorér de, “Zee niki toré tor bisána tulí looi áńřito hoiyé Manúc Íba hon?” 13 Lekin ze manúc cwa re gom gorá gíyeh, yóggwa ye Íba hon hoi no fare, kiyólla-hoilé hé zagat bicí manúc accíl, aar Isá híyan ttu gaif óigilgoi. 14 Yárbaade, Isá ye yóggwa re baitul-mukaddos ot loot fai hoór de, “Soó, tuńí gom óigiyogoi. Ar guná no goijjó, zeéne tuáñr hálot agor túaro hóraf no ó.” 15 Baade manúc cwa zai Yohúdi ókkol ore hoiyé de, yóggwa re gom goijjé de Íba óilde Isá. 16 Hétolla bóuli Yohúdi ókkole Isá re zalat doijje, kiyólla-hoilé Íba ye ebaadot-or-din héndilla ham ókkol goittó. 17 Lekin Isá ye ítara re hoór de, “Ańr Baf aijjó foijjonto ham gorát asé, aar Ańí Nize yó gorír.” 18 Isár hé hotá lla bóuli Yohúdi ókkole Íba re

marifélaito aró bicí kucíc gorát accíl, kiyólla-hoilé Íba ye siríf ebaadot-or-din or niyom bāńgito de no, bólke Alla Íbar Baf hoói Nizoré Alla lloi fúainna yó goittó. 19 Tarfore Isá ye ítara re hoór de, “Ańí tuáñra re sóiyi-sóiyi hoóir, Fua Nizorgá Nize kessú gorí no fare. Íba ye siríf uúin goré zín Bafe goré de deké; kiyólla-hoilé Bafe zín goré, Fua ye yó híin éna goré. 20 Bafe Nizor Fua re muhábbot goré, aar Nize zín goré híin beggún Fua re dahá. Íba ye híin or túaro ḍoóñr-ḍoóñr ham ókkol Fua re daháibo, zeéne híin deki tuáñra taajup ó. 21 Bafe zendilla mora ókkol ore zinda goré, héndilla Fua ye yó zaré monehoó taré zinda goré. 22 Aró hoitó sailé, Bafe honókiyor bisar no goré, bólke bisar or hárr zimma Fuar át ot gosáidiye, 23 zeéne zendilla Baf ore beggúne izzot goré, héndilla Fua re yó izzot goré. Zee niki Fua re izzot no goré, íte Fua re difeřáiyē de hé Baf ore yó izzot no goré. 24 “Ańí tuáñra re sóiyi-sóiyi hoóir, zee niki Ańr hotá fúne aar Ańré difeřáiyē de Íbar uore iman ané, ítar ttu ofúrani zindigi asé. Ítar uore honó sáńzar hókum no óibo, bólke íte mora ttu zindigit faráigiyoi. (aiōnios g166) 25 Ańí tuáñra re sóiyi-sóiyi hoóir, eén októ aiyér, bólke ehón aáigiyoi, zeñtté mora ókkole Allar Fuar abas fúnibo; aar zetará fúnibo ítara zinda óibo. 26 Kiyólla-hoilé zendilla Baf Nize zindigir Malik, héndilla Íba ye Fua re yó zindigir Malik banaiyé. 27 Íba ye Fua re bisar or adíkar diiyé, kiyólla-hoilé Íba óilde Manúc or Fua. 28 “Híin fúni taajup no óiyo, kiyólla-hoilé eén októ aiyér, zetará hobor or bútoře asé, ítara beggúne zeñtté Íbar abas fúnibo, 29 héntte neeliaibó; zetará gom ham goijjé, ítara zindigi fai bolla uríbo; aar zetará hóraf ham goijjé, ítara sáńza fai bolla uríbo. 30 “Ańí Nizorgá Nize kessú gorí no fari. Ańí zendilla fúni héndilla beh bisar gorí; aar Ańr bisar sóiyi, kiyólla-hoilé Ańí Nizor moncá mozin goittó no saái, bólke Ubár moncá mozin goittó saái zibá ye Ańré difeřáiyē. 31 “Ańí zodi Nizor baabute Nize gobá díh, tóoile Ańr gobá sóiyi no. 32 Montor ar ezzon asé, zibá ye Ańr baabute gobá déh, aar Ańí zani, Íba ye Ańr baabute dede gobá sóiyi. 33 “Tuáñra toh Yaháya ttu fusár goittó difeřáila, aar yóggwa ye sóiyi gán gobá díye. 34 Becók, Ańí honó manúc or gobár uore bóraca no gorí, lekin Ańí iín etollá hoóir, zeéne tuáñra nejat fo. 35 Yaháya accíl serak waán, ziyáne zoli foór deh; aar tuáñra hooddin olla yóggwar foór ot kúci goittó razi óila. 36 “Lekin Yaháyar gobár túaro ḍoóñr gobá Ańr ttu asé; kiyólla-hoilé Ańí toh ham uúin gorír zín fura gorí bolla Bafe Ańré diiyé, aar Ańí gorí de ham

híine Añr baabute gobá dé de ki, Añré Bafe diferáiyé. **37** Hé Baf zibá ye Añré diferáiyé, Íba Nize Añr baabute gobá díye. Tuáñra honódin no Íbar abas fúinno, aar no Íbar siyára-súrot deikkó. **38** Tuáñrar dil ot Íbar kalam no táke, kiyólla-hoilé tuáñra de Íba ye zibá re diferáiyé Íbar uore iman nu anó. **39** Tuáñra toh pak-kalam or duara ofúrani zindigi faiba bouli táari dilmon di pak-kalam tahákit goró, montor hé pak-kalame Añr baabute éna gobá déh. (aiōnios g166) **40** Toóu tuáñra zindigi fai bolla Añr hañse aitó no soó. **41** “Añí insán ottu izzot feito no saái. **42** Lekin Añí tuáñra re siní, ki hoilé, tuáñrar dil ot Alla lla muhábbot náí. **43** Añí Añr Baf or name aiccí, toóu tuáñra Añré kobul no goró; montor oinno kiyé zodi nizor name ailé, tuáñra ítare kobul gorÍba. **44** Tuáñra zetará ezzone ar ezzon or hañsóttu izzot feito soó, montor ze izzot Allar hañsóttu faa zah híyan feito kucíc no goró, tuáñra keéngori iman anÍba? **45** “Tuáñra no táaijjo de ki, Añí Baf or muúntu tuáñra re hosúr díyum. Tuáñra re zibá ye hosúr díbo Íba óilde Muúsa, zibár uore tuáñrar bóraca raikkó. **46** Tuáñra zodi Muúsa re biccác goittá, tuáñra Añré yó biccác goittá, kiyólla-hoilé Íba ye Añr baabute éna leikké. **47** Lekin tuáñra zettót Íbar leká re biccác no goró, tói tuáñra Añr hotá keéngori biccác gorÍba?”

6 Yárbaade, Isá Galil Díir okule giiyégoi, ze díir re Tibiriyas Díí yó hoó. **2** Doóñr ek dol manúc Íbar fisá doijjil, kiyólla-hoilé Íba ye biyaraimma ókkol or uore goittó de keramot ókkol Ítara deikkíl. **3** Baade Isá eggwá faár or uore urí, hére Nizor cárit tun or fúañti boiccé. **4** Héñtte Yohúdi ókkol or Azadir-id dáke aiccé. **5** Isá ye suk tulí saiyé rár deké de, doóñr ek dol manúc Íbar hére aiyér, hétunot Íba ye Filíp ore hoór de “E manúc itará hái bolla añára ruṭi hontú kiniyúm?” **6** Filíp ore entán gorí bolla Íba ye híyan hoiyé deh, lekin Nize kii gorÍbo de híyan Íba ye age lóti zane. **7** Filípe Íba re zuwab diyé de, “Itará beggún ore hom-hom gori diilé yo, toóu dui cót dinár or ruṭi loi no kulaibó.” **8** Íbar cárit tun ottu ezzone, yáni Sáimon Fitor or báí Enderiyase Íba re hoór de, **9** “Ere eggwá fua ttu fañs swá barlír ruṭi edde duwá mas asé, montor edún maincóre íine kii óibo?” **10** Isá ye hoór de, “Manúc cún ore buágaro.” Hé zagat bicí kér accíl. Tói beaáin Ítara boiccé, Ítara tokoriban fañs ázar. **11** Tarfore Isá ye ruṭi gún looi Alla re cúkuriya goijjé, aar zetará boói accíl Ítara re baṛidiyé; héndilla góri Íba

ye mas óu diiyé. Ítara ttu zedún monehoiyé hédun hái faijyé. **12** Ítara beggúne feṭ bóri hái baade, Íba ye Nizor cárit tun ore hoór de, “Ze tukuṛa ókkol basigiyói híin dola gorífelo, zeéne kessú borbad no zah.” **13** Tói maincé hái baade, barlír ruṭi fañs wa ttu zedún basigiyói, híin dola gorí baró báñir bóijje. **14** Manúc cúne Isá ye goijjé de keramot tán deká hoór de, “Sóiyi Íbá óilde Nobí Ubá zibá duniyait aibár hotá asé.” **15** Tói Isá ye zani faijyé de, manúc cúne Íba re bolazuri baáñcca banai bolla dóitto aitó sár, hétolla Íba Ítara ttu alok ói gaaga abar faár or uore uittégoi. **16** Baade zeñtté háñz óiye, Íbar cárit tun díft giiyé, **17** aar noow ot urí, Kaparnahúm ot zai bolla díí farát doijje. Héñtte andár óigiyoi, aar híyala úddwa Isá Ítarar hére nú aiyé. **18** Ekgwá tez boiyar or zoriya, díft goir ókkol cúru óiye. **19** Ítara noow baái-baái tin sair mail ánik zai baade deké de, Isá fanír uottú añri-añri noow uzu aiyér; híyan deká Ítara ttu door laiggé. **20** Montor Íba ye Ítara re hoór de, “Íbá Añí; no dooraiyó.” **21** Tói Ítara Íba re noow ot tulíto razi óiye, aar Ítara zeṛé zaar noow gán éhon hé zagat foóniccegoi. **22** Díir okule ze manúc ókkol táikkil, Ítara tarfor din ót faiyé de, hére ekkán noow bade ar honó noow náí, aar Isá Nizor cárit tun or fúañti hé noow ot nó uré, bólke siríf Íbar cárit tun giiyé deh. **23** Montor kessú noow ókkol Tibiriyas cóor ottu zaga waán or dáke aiccé, ziyán ot Malik Isá ye cúkuriya gorí manúc ókkole ruṭi háail. **24** Zeñtté manúc ókkole Isá edde Íbar cárit tun hé zagat náí de deikké, Ítara noow ókkol lói Isá re tuwai-tuwei Kaparnahúm ot foónicce. **25** Aar zeñtté Ítara Íba re díir okule loot faiyé, Ítara Íba ttu fusár gorér de, “Rabbí, Tuñí ére hoñtté aiccó?” **26** Isá ye Ítara re zuwab der de, “Añí tuáñra re sóiyi-sóiyi hoóir, tuáñra Añr keramot ókkol deká Añré tuwoór de no, bólke feṭ bóri ruṭi hái faijjó de hétolla tuwoór deh. **27** Borbad zagói de hána lla meénnot no goijjó, bólke ze hána ofúrani zindigi foijjonto ṭiki táke híin olla meénnot goró, zín tuáñra re Manúc or Fua ye diibo; kiyólla-hoilé Íbar uore toh Alla Bafe Nizor moór lagaidiye.” (aiōnios g166) **28** Tói Ítara Íba ttu fusár gorér de, “Allar ham gorí bolla añára ttu kii gorá foribó?” **29** Isá ye Ítara re zuwabe hoór de, “Alla ye Zibá re diferáiyé, Íbar uore iman aná óilde Allar ham.” **30** Baade Ítara Íba ttu fusár gorér de, “Tóoile Tuñí kii illayi-nicán daháiba, zeéne añára deká yore Tuáñr uore iman aní fari? Tuñí kii ham gorÍba? **31** Añárar bafadada ókkole de moidan zagat manná háiyé. Pak-kalam ot endilla

asé, ‘ítara hái bolla Alla ye asman ottu ruṭi diiyé.”

32 Isá ye ítara re hoór de, “Añí tuáñra re sóiyi-sóiyi hoóir, tuáñra re asman ottu ruṭi Muúsa ye diiyé de no, bólke Añr Bafe diiyé deh. Íba ye tuáñra re asman ottu sóiyi ruṭi dee. **33** Kiyólla-hoilé Allar ruṭi óilde toh Ubá zibá ye asman ottu nise aái duniyair maincóre zindigi dee.” **34** Tói ítara íba re hoór de, “Malik, hé ruṭi añára re hámica doo.” **35** Isá ye ítara re hoór de, “Hé zindigir ruṭi óilam de Añí. Zee niki Añr hañse aiyé, ítar ttu honódin búk no lagibó, aar zee niki Añr uore iman ané, ítar ttu honódin tirác no lagibó. **36** Lekin Añí toh tuáñra re hoóifelaiyi, ki hoilé, tuáñra Añré deikkó, montor toóu iman nu anó. **37** Zedún ore Bafe Añr át ot dee, híin beggún Añr hañse aibó, aar zee niki Añr hañse aibó, Añí ítare honódin duñrai no diyum. **38** Kiyólla-hoilé Añí toh asman ottu nise aiccé de Nizor moncá mozin gorí bolla no, bólke Ubár moncá mozin gorí bolla, zibá ye Añré diferáiyé. **39** Añré diferáiyé de íbar moncá óilde, zedún ore íba ye Añr át ot diiyé, Añí zen héntu honókiyo re na hárai, bólke háñcor or din ítara re zinda gorí. **40** Kiyólla-hoilé Añr Baf or moncá óilde, zee niki Fua re deki íbar uore iman ané, íte zen ofúrani zindigi faa. Aar Añí ítare háñcor or din zinda goríyum.” (aiōnios g166) **41** Híyan fúni Yohúdi ókkole íbar baabute furafuri gorát doijje, kiyólla-hoilé íba ye hoiyé de, “Ze ruṭi asman ottu nise aiccé, yíba óilam de Añí.” **42** Ítara hoór de, “Íbá Yusúf or fua Isá no níki, zibár bafmaa re añára siní? Íbá ye keéngori hoór de, Añí asman ottu nise aiccé?” **43** Isá ye ítara re zuwabe hoór de, “Afós ot furafuri no goijjó. **44** Añr Baf zibá ye Añré diferáiyé, íba ye ṭani nu aníle honókiye Añr hañse aái no fare. Aar Añí ítare háñcor or din zinda goríyum. **45** Nobi ókkol or kitab ot endilla leikká asé, ‘ítara beggúne Alla ttu taalim faibo.’Hétolla zee niki Baf ottu fúni taalim faiyé, íte Añr hañse aiyé. **46** Hé Baf ore toh Allar hañsóttu aiccé de íba ye bade ar honókiye nó deké. Siríf íba ye deikké deh. **47** Añí tuáñra re sóiyi-sóiyi hoóir, zee niki Añr uore iman ané, yóggwa ttu ofúrani zindigi asé. (aiōnios g166) **48** “Zindigir ruṭi óilam de Añí. **49** Tuáñrar bafdáda ókkole de moidan elakat manná háiyé, toóu ítara morigiyói. **50** Montor yibá óilde asman ottu nise aiccé de hé ruṭi, zeéne honókiye hái no more. **51** Añí óilam de asman ottu nise aiccé de zindigir ruṭi yíba. Zodi honókiye e ruṭi háa, íte hámica lla basi tákibo. Duniyair manúce zindigi fai bolla Añí diyum de hé ruṭi óilde Añr gusso.” (aiōn g165)

52 Híin fúni Yohúdi ókkole afós ot matamati di hoór de, “E Manúc cwa ye añára re keéngori Nizor gusso hái bolla diibo?” **53** Isá ye ítara re hoór de, “Añí tuáñra re sóiyi-sóiyi hoóir, zetún foijjonto tuáñra Manúc or Fuar gusso edde lou nó hoo, hétun foijjonto tuáñra ttu zindigi náí. **54** Zee niki Añr gusso edde lou háa, ítar ttu ofúrani zindigi asé, aar Añí ítare háñcor or din zinda goríyum. (aiōnios g166) **55** Kiyólla-hoilé Añr gusso óilde sóiyi hána, aar Añr lou óilde sóiyi fiibar jiníc. **56** Zee niki Añr gusso edde lou háa, íte Añr bútoze zari táke, aar Añí ítar bútoze zari táki. **57** Zinda Bafe zendilla Añré diferáiyé aar Añí íbar zoriya zinda así, héndilla zee niki Añré háibo íte yó Añr zoriya zinda tákibo. **58** Yíba óilde asman ottu nise aiccé de hé ruṭi. Tuáñrar bafdáda ókkole hái morigiyói de héndilla ruṭi no. Zee niki e ruṭi háibo, íte hámica lla basi tákibo.” (aiōn g165) **59** Isá ye hotá híin Kaparnahúm or mujilíc-hánat taalim dibarcót hoiyé. **60** Hé taalim fúni Isár ummot ókkol ottu boóut zone íba re hoór de, “Yián toh ekkán bici hora taalim, hone gosí faribó?” **61** Nizor ummot ókkole furafuri gorér de híyan zani fari Isá ye ítara re hoór de, “E taalime ki tuáñra re bezar goijjé? **62** Manúc or Fua foóila zezé accíl, íba zodi hére urérgoi de deké, tooile tuáñra kii báfiiba? **63** Ruh ye éna zindigi dee; jisíme toh honó fáida no dee. Añí tuáñra re ze hotá gún hoiyí, híin óilde ruh edde zindigi. **64** Montor aijjó foijjonto tuáñra hodúne iman nú anó.” Isá ye foóila cúru ttu lóti zane, hontará iman nú ané aar hone íba re dóridibo. **65** Isá ye aró hoór de, “Hétolla toh Añí tuáñra re endilla hoóilam, honókiye Añr hañse aái no faribó, zetún foijjonto Añr Bafe ítare toóufik no dee.” **66** Hé óktót lóti íbar boóut ummot ókkol firigiyoi, aar íbar fúañti solafíra gorá bon gorífelaiye. **67** Hétolla Isá ye baró zon carít tun ottu fusár gorér de, “Tuáñra ttu yó kí zaitogói monehoór né?” **68** Sáimon Fitore íba re zuwab der de, “Ó Malik, añára har hañse zaitam? Ofúrani zindigir hotá Tuáñr ttu éna asé. (aiōnios g166) **69** Añára iman ainín aar sóiyigori zani faijji de, Tuñí óilade Allar Pakzon.” **70** Isá ye ítara re hoór de, “Añí kí tuáñra baró zon ore basí nó looi né? Toóu tuáñrar bútoze ezzon ibilíc asé.” **71** Híyan Isá ye Sáimon or fua Yohúdah Iskáriyet or baabute hoiyé deh. Kiyólla-hoilé íte baró zon carít tun ottu óile yo, íte Isá re dóridibo.

7 Yárbaade, Isá Galil ot solafíra gorér; kiyólla-hoilé Yohúdi ókkole íba re marifélaibar kucíc ot accíl

de hétolla Íba ttu Yohúdiyat solaffra goittó mone no hoór. **2** Héñtte Yohúdi ókkol or Bañcár-id or októ ðáke aiccé. **3** Hétolla Isár báiyain de Íba re hoór de, “Tuñí entú Yohúdiyat zoogói, zeéne Tuñí goró de ham ókkol Tuáñr ummot ókkole yó deké. **4** Kiyólla-hoilé zee niki mocúr óito saá, íte toh lukai honó kessú no goré. Tuñí zettót e ham iín gorór, tói Nizoré duniyair hañse zahér goró.” **5** Asóle Íbar báiyain de úddwa Íbar uore iman nú ané. **6** Tói Isá ye ítara re hoór de, “Añí zaibar októ aijjó nú aiyé, montor tuáñra ze honó októ zai faribá. **7** Duniyair maincé tuáñra re nafórot gorí no fare, lekin Añré nafórot goré, kiyólla-hoilé Añí toh ítatar ham ókkol hóraf bóuli gobá díh. **8** Tuáñra hé id ot zoo. Añí id híyan ot ehón no zaiyum, kiyólla-hoilé Añr októ aijjó furafuri nú aiyé.” **9** Ítara re híin hoói baade, Íba Galil ot táigiyoi. **10** Lekin Íbar báiyain ókkol id ot zaigói baade, Íba Nize yó giyé; kúlamela góri nó, bólke lukai ore giyé. **11** Id ot Yohúdi ókkole Íbar talac gorí-gorí fusár gorér de, “Íba hořé?” **12** Manúc or ðaái or bútoe Íbar baabute suppe-suppe bicí furafuri óiye. Hodúne hoór de, “Íba gom manúc.” Ar hodúne hoór de, “No, no, Íba ye maincóre gollot ot loizargói.” **13** Montor toóu Yohúdi ókkol or ðoore honókiye Íbar baabute kúlamela góri nó hoó. **14** Id ekdók ánik óiye rár, Isá uore baitul-mukaddos or urán ot zai taalim diyat doijje. **15** Aar Yohúdi ókkole taajup ói hoór de, “E Manúc cwa ye honó mikká ttu taalim hásil no gorí iín keéngori zane?” **16** Isá ye ítara re zuwab der de, “Añí zíin taalim di híin Añr Nizor no, bólke Zibá ye Añré diferáiyé Íbar. **17** Zar ttu Allar moncá mozin goittó monehoó, íte zanibó, e taalim iín kí Allar aar náki Añrgá Añí hoóir deh. **18** Zee niki nizor torfóttu hoó, íte nizor izzot tuwa. Lekin Zibá ye Diferóiyar izzot tuwa, Íba óilde sóiyi, aar Íbar bútoe honó dúkabazi náí. **19** Muúsa ye tuáñra re Córiyot diiyé de no né? Montor toóu de tuáñra honókiye hé Córiyot amól no goró. Tuáñra Añré kiyólla marifélai bolla soór?” **20** Manúc ókkole zuwab der de, “Tuáñre búte faiyé. Tuáñre hone marifélaito sár dé?” **21** Isá ye ítara re zuwab der de, “Añí ekkán ham goijjí, aar tuáñra beggún taajup óigiyogoi. **22** Muúsa ye tuáñra re ázomi gorí bolla hókum díye de hétolla, tuáñra toh ebaadot-or-din úddwa manúc ore ázomi goró. Háleke héndilla gorá Muúsa lóti cúru óiye de no, bólke bafdáda gún ottu lóti. **23** Muúsar Córiyot no bāñgi bolla zodi ebaadot-or-din manúc eggwá re ázomi gorá zah, tóoile ebaadot-or-din Añí eggwá manúc

ore furafuri gom goijjí de hétolla kiyá tuáñra Añr lói guccá óiyo? **24** Uortú saái bisar no goijjó, insáf bisar goijjó.” **25** Hétunot Jerúsalem or kessú maincé hoór de, “Íbá kí Ubá no zibá re Yohúdi ókkole marifélaito sár? **26** Lekin soó, Íbá ye toh kúlamela góri hotá hoór, toóu úddwa ítara Íbá re kessú no hoór. Hókumot-goróya ókkole hómo Íbá Mosih de híyan sóiyigori zani faijjé né? **27** Zeén óibo óuk, añára toh zani, Íbá hontú aiccé, montor zeñtté Mosih aibó, Íba hontú aiccé honókiye no zanibó.” **28** Isá baitul-mukaddos ot taalim dibarcót guzori hoór de, “Ói, tuáñra Añré sinó, aar Añí hontú aiccí yó zano. Montor Añí Nizorgá Nize aiccí de no, Zibá ye Añré diferáiyé Íba sóiyi. Tuáñra toh Íba re no sinó. **29** Lekin Añí Íba re siní, kiyólla-hoilé Añí Íbar torfóttu aiccí, Añré Íba ye diferáiyé deh.” **30** Híin fúni ítara Íba re gereftar gorí bolla saiye, montor Íbar októ nú aiyé de hétolla honókiye Íbar uore át nó laga. **31** Toóu manúc or dol ottu boóut zone Íbar uore iman ainné. Ítara hoór de, “Mosih zeñtté aibó, Íba ye kí e manúc cwa ye goijjé de yár túaro bicí keramot ókkol daháibo?” **32** Manúc or ðaái ye Isár baabute fúfcucar de híyan Férocí ókkole fúinne. Hétolla ðoóñr imam ókkole edde Férocí ókkole Íba re dóri aintó hodún faáradar diferáiyé. **33** Isá ye hoór de, “Añí tuáñrar fúañti ar bicí din náí, baade Añré diferáiyé de Íbar hañse zaiyumbói. **34** Tuáñra Añr talac goríba, montor Añré loot no faiba, aar zeřé Añí tákiyum, héře tuáñra aái no faribá.” **35** Tói Yohúdi ókkole afós ot hoór de, “Íbá re añára tuwai no fai fán Íbá hořé zaito niyot gorér dé? Ze Beyohúdi ókkol or bútoe añárar Yohúdi ókkol cñraciñttá óigiyoi, Íbá ye hómo héře zai hé Beyohúdi ókkol ore taalim dibo de né? **36** Íbá ye e hotá lói kii hoitó sár deh, “Tuáñra Añr talac goríba, montor Añré loot no faiba,” aar “Zeřé Añí tákiyum, héře tuáñra aái no faribá?”” **37** Baade id or ahéri din or din, yáni id or ebbe ðoóñr din ot, Isá tíyai yore guzori hoór de, “Zee niki tiráci asó, íte Añr hañse aái faní hóogai. **38** Zee niki Añr uore iman ané, pak-kalam mozin, ‘Ítar bútottu zindigi dee de faní urát tákibo.’” **39** Isá ye híyan Pak-Ruhr baabute hoiyé de, zibá re zetará Isár uore iman ainné ítara fai zaybo. Pak-Ruh hétun foijjonto diiya nó zah, kiyólla-hoilé Isár mohíma hétun foijjonto zahér gorá nó zah. **40** Híin fúni baade kessú maincé hoór de, “Becók, Íbá óilde hé Nobí.” **41** Ar hodúne hoór de, “Íbá óilde Mosih.” Aró hodúne hoór de, “Mosih kí Galil ottu aibó né? **42** Pak-kalam ot ki endilla náí, Mosih Dawud or

nosól ottu edde Dawud táke de Betélhem fara ttu aibó bóuli?” 43 Héndilla, Isár zoriya manúc ókkol or búture faáta-faáti foida óigiyoi. 44 Ítarar bútotu hodúne Íba re dóri bolla saiyé, montor honókiye Íbar uore át nó laga. 45 Tarfore faáradar gún ðoóñr imam edde Féroci ókkol or hañse waafes aiccé. Tará ítara ttu fusár gorér de, “Tuáñra Íba re nó kiyá anó?” 46 Faáradar gúne zuwab der de, “Hé Manúc cwar ðoílla góri honókiye honó októť hotá hoiyé de náí.” 47 Féroci gúne hoór de, “Tuáñra re yó hómo gollot ot loigiyói né? 48 Honó sóddare yáh Féroci ye Íbar uore iman ainné de asé né? 49 Montor hé awam ókkole toh Córíyot no zane. Ítarar uore laánot asé.” 50 Hé Féroci gún or búture Nikódemas óu asé, zibá yár age Isár hañse gífl. Yóggwa ye ítara ttu fusár gorér de, 51 “Honó manúc or muk ottu nó fúinte aar íte kii goijjé de híyan nó zainte, ítar hosúr dóri bolla kí añárar Córíyot ot asé?” 52 Ítara yóggwa re zuwabe hoór de, “Tuñf yó kí Galil or manúc? Pak-kalam tahákit gorí soó, Galil ottu honó nobi nú aiyé.” 53 Baade fottí zon zar-zar gór ot tee-tee giyyói.

8 Montor Isá Zaitun Faár ot giyyé. 2 Tarfor din bíñna sóore Isá baitul-mukaddos ot abar aiccé, aar manúc beggún Íbar hañse zoma óiye. Baade Íba boói ítara re taalim diyat doijje. 3 Héñtte alem ókkole edde Féroci ókkole ek mayafua re Isár hañse ainné, zibá zená gorát dóra háíye. Baade híba re manúc ókkol or mazé tíyagaraiye. 4 Tói ítara Isá re hoór de, “Úzur, e mayafua wa zená gorát dóra háíye. 5 Córíyot ot Muúsa ye añára re hókum díye de, endilla mayafuain dore cíl or dola mari marifélaíto, montor Tuñf kii hoó?” 6 Ítara Íba re hé súwal lan entán gorí bolla goijjé deh, zeéne ítara Íba re elzam dibar mouka faa. Montor Isá uñri boói ooñle merít lekát accíl. 7 Ítara zettót Íba ttu warawori fusár gorát asé, Íba urí ítara re hoór de, “Tuáñrar búture zee niki guná sára asó, mayafua wa re cíl or dola íte age maro.” 8 Baade Isá abar uñri boói merít lekát accíl. 9 Hé hotá fúni, ítara burá ttu lóti cúru gorí zon-zon neeligiyói, montor Isá ezzon táigiyoi, mayafua wa yó mazé tíyai accíl. 10 Isá urí zeñtté mayafua wa bade ar honókiyo re nó deké, Isá ye híba re hoór de, “Mayafua, uitará hoře? Honókiye tor hosúri nó dóre níki?” 11 Híba ye hoór de, “Malik, honókiye nó dóre.” Isá ye hoór de, “Añf yó tor hosúri nó dóri. Zaa, guná no goríc.” 12 Isá ye ítara re abar hoór de, “Añf óilam de duniyair Nur, zee niki

Añr fisá dore, íte andár ot nu aññibo, bólke zindigir Nur faibo.” 13 Hétolla Féroci ókkole Íba re hoór de, “Tuñf toh Nizor gobá Nize éna dor; Tuáñr gobá sóiyi no.” 14 Isá ye ítara re zuwabe hoór de, “Añf Nizor gobá Nize dilé yo, Añr gobá sóiyi, kiyólla-hoilé Añf hontú aiccé edde hoře zairgói Añf zani. Montor Añf hontú aiccé aar hoře zairgói híyan tuáñra no zano. 15 Tuáñra toh insán or niyom mozin bisar goró, montor Añf honókiyor bisar no gorí. 16 Añf zodi bisar gorí yo, Añr bisar hók, kiyólla-hoilé Añf ekéla no, Añré diferáiyé de hé Baf Añr fúañti asé. 17 Tuáñrar Córíyot ot óu leikká asé de ki, dui zone ek ðoílla gobá dé de óile hé gobá sóiyi. 18 Añr baabute Añf Nize yó gobá díh, aar Añr baabute Añré diferáiyé de hé Bafe yó gobá déh.” 19 Hétunot ítara Íba ttu fusár gorér de, “Tuáñr Baf hoře?” Isá ye ítara re zuwab der de, “Tuáñra no Añré sinó, aar no Añr Baf ore sinó. Tuáñra zodi Añré siníta, tóoile Añr Baf ore yó siníta.” 20 Isá ye hotá híin baitul-mukaddos or urán ot dan-baccúr ðáke taalim dibarcót beh hoiyé. Toóu honókiye Íba re gereftar nó goré, kiyólla-hoilé Íbar októ aijjó nú aiyé. 21 Isá ye ítara re abar hoór de, “Añf toh zairgói; tuáñra Añr talac goríba, aar nizor gunát nize moribá. Añf zeré zairgói hére tuáñra aái no faribá.” 22 Hétolla Yohúdi ókkole hoór de, “Íba ye hómo nizoré marifélaibo né? Kiyólla-hoilé Íba ye hoiyé de, “Añf zeré zairgói hére tuáñra aái no faribá.” 23 Isá ye aro hoór de, “Tuáñra nisor ttu, aar Añf uottú. Tuáñra e duniyair; Añf toh e duniyair no. 24 Hétolla Añf tuáñra re hoiyí de, tuáñra nizor gunát nize moribá. Tuáñra zodi Añf Íba de biccác no goró, tóoile nizor gunát nize moribá.” 25 Tói ítara Íba ttu fusár gorér de, “Tuñf hon?” Isá ye ítara re zuwab der de, “Añf óilam de Ubá zibár baabute Añf foóila cúrut lóti tuáñra re hoói-hoói aiyír. 26 Tuáñrar baabute hoibár edde bisar goríbar Añr ttu boóut kessú asé, lekin Zibá ye Añré diferáiyé Íba sóiyi. Añf duniyai re siríf uúin hoói zín Íbar torfóttu fúinni.” 27 Isá ye ítara re Baf or baabute hoór de híyan ítara nó buzé. 28 Hétolla Isá ye ítara re hoór de, “Tuáñra Manúc or Fua re zeñtté uore tulíba, héñtte zanibá de, Añf óilam de Íba, aar Añf Nizorgá Nize kessú no gorí, bólke Añf uúin beh hoói zín Bafe Añré cíkaiye. 29 Zibá ye Añré diferáiyé Íba Añr fúañti asé. Íba ye Añré ekéla nó ere, kiyólla-hoilé Añf toh hámica ham uúin gorí zín lói Íba kúci ó.” 30 Isár hotá híin fúni boóut zone Íbar uore iman ainné. 31 Ze Yohúdi ókkole Isár uore iman ainné, ítara re Íba ye hoór de, “Zodi tuáñra Añr

hotát lagi táko, tooile sóiyi tuáñra Añr ummot, **32** baade tuáñra sóiyi re zanibá, aar hé sóiyi ye tuáñra re azad goríbo.” **33** Ítara Íba re hoór de, “Añára óilam de Ibrahim or nosól, añára honódin honókiyor gulam óiyi de náí. Tói Tuñí keéngori hoór de, ‘Tuáñra azad faiba?’” **34** Isá ye itara re zuwab der de, “Añí tuáñra re sóiyi-sóiyi hoóir, zetará guná gorát táke itara gunár gulam. **35** Gulam toh gór ot abadulabad no táke, bólke fua beh abadulabad táke. (aíñ g165) **36** Hétolla Fua ye zodi tuáñra re azad goré, tuáñra hámaha azad óiba. **37** Añí zani, tuáñra Ibrahim or nosól, toóu tuáñra Añré marifélaíto soór, kiyólla-hoilé tuáñrar dil ot toh Añr hotá lla honó zaga náí. **38** Añí uúin hoói zín Añí Añr Baf or hañse deikkí, aar tuáñra uúin goró zín tuáñra tuáñrar baf ottu fúinno.” **39** Ítara Íba re zuwabe hoór de, “Añárar baf óilde Ibrahim.” Isá ye itara re hoór de, “Tuáñra Ibrahim or fuain óita bóuli, tuáñra Ibrahim or dóilla ham goittá. **40** Añí toh Alla ttu ze sóiyi gán fúinni, híyan éna tuáñra re hoíyí, aar toóu tuáñra Añré marifélaíto soór. Ibrahimé de héndilla nó goré. **41** Tuáñra tuáñrar baf or gún gorór deh.” Ítara Íba re hoór de, “Añára toh zoura fuain no; añára ttu Baf ekgwá asé deh, Íba óilde Alla.” **42** Isá ye itara re hoór de, “Sóiyi zodi Alla tuáñrar Baf óito, tuáñra Añré muhábbot goittá, kiyólla-hoilé Añí toh eéré Allar torfóttu éna aiccí. Añí Nizorgá Nize aiccí de no, bólke Añré Íba ye beh diferáiye. **43** Tuáñra Añr hotá kiyá no buzór? Híyan etollá, kiyólla-hoilé tuáñra Añr hotá re bordac gorí no faroór. **44** Tuáñra tuáñrar baf Ibílíc or, hétolla tuáñra ítar moncá ókkol fura goittó soó. Íte toh foóila cúru ttu lóti kúni, aar honódin sóiyit no táke, kiyólla-hoilé ítar bútoe honó sóiyi náí. Íte zeñtté misá hotá hoó, nizor bútotu hoó, kiyólla-hoilé íte óilde misákur aar misár baf. **45** Lekin Añí toh hók hotá hoói, hétolla tuáñra Añré biccác no goró. **46** Tuáñra ttu hone Añí gunágar bóuli sábut gorí faribá? Zodi Añí sóiyi hotá hoóir de óile, tuáñra Añré biccác kiyá no goró? **47** Ze manúc Allar, íte Allar hotá fúne. Tuáñra híin etollá no fúno, kiyólla-hoilé tuáñra Allar no.” **48** Yohúdi ókkole Íba re zuwabe hoór de, “Añára kí sóiyi nó hoói né, Tuñí ézzon Samári, aar Tuáñre búte faiyé?” **49** Isá ye zuwab der de, “Añré búte nó faa. Añí Añr Baf ore izzot gorí, montor tuáñra Añré beizzoti goró. **50** Añí Añr izzot tuwair de no. Lekin Ekzon asé zibá ye Añr izzot or kíyal raké aar Íba óilde bisarhar. **51** Añí tuáñra re sóiyi-sóiyi hoóir, zee niki Añr hotá amól goré, íte honódin no moribó.” (aíñ

g165) **52** Yohúdi ókkole Íba re hoór de, “Ehón añára fakkagori zani faijji, Tuáñre búte faiyé. Ibrahim edde nobi ókkol toh morigiyói, toóu Tuñí hoór de, ‘Zee niki Añr hotá amól goré, íte honódin no moribó.’ (aíñ **g165)**

53 Tuñí kí añárar baf Ibrahim or túaro doónr? Íba toh morigiyói, aar nobi ókkol óu morigiyói. Tuñí Nizoré Nize kii bouli táaro?” **54** Isá ye itara re zuwab der de, “Zodi Añí Nizor taarif Nize gorí, tooile Añr taarif or honó dam náí. Añré izzot Añr Bafe éna goré, Zibá re tuáñra tuáñrar Alla bouli dabi goró. **55** Tuáñra Íba re no sinó, lekin Añí Íba re siní. Zodi Añí hoói, ‘Añí Íba re no siní,’ tooile Añí yó toh tuáñrar dóilla misákur tóoriyum, lekin Añí Íba re siní, aar Íbar hotá amól gorí. **56** Tuáñrar baf Ibrahimé Añr din dekfíbar acáye kúci goijjíl. Íba ye deikkíl aar kúci óoil.” **57** Tói Yohúdi ókkole Íba re hoór de, “Tuáñr boc toh aijjó fonzaic bosór úddwa nó óiyo, aar Tuñí Ibrahim ore deikkó dé?” **58** Isá ye itara re hoór de, “Añí tuáñra re sóiyi-sóiyi hoóir, Ibrahim zormo óibar age lóti Añí así.” **59** Hé hotá fúni itara Íba re mari bolla cíl or dola feñrai loiyé, montor Isá Nizoré argwal gorí baitul-mukaddos ottu neeligiyói.

9 Isá rasta báy zaite-zaite, Íba ye eggwá manúc deikké, zibá zormo ttu lóti ańdá. **2** Íbar cárít tune Íba ttu fusár gorér de, “Rabbí, har gunár zoriya e manúc cwa zormo ttu lóti ańdá óiye dé? Kí nizor aar náki yóggwar bafmaar?” **3** Isá ye zuwab der de, “Héndilla no e manúc cwar gunár zoriya óiye, aar no yoggwár bafmaar gunár zoriya óiye, bólke etollá óiye, zeéne yoggwár zindigit Allar ham zahér ó. **4** Din tákite añára ttu Ubár ham gorífela foribó zibá ye Añré diferáiye. Rait aiyér zeñtté honókiye ham gorí no faribó. **5** Zetó din Añí duniyait así, Añí óilam de duniyair Nur.” **6** Híin hoói baade, Íba ye merit sép félai yore fúñt banaiyé, aar hé fúñt looi ańdá manúc cwar suk ot bóraidíye. **7** Baade yóggwa re hoór de, “Zoo, zai Sílom foóir gwá ttu dúifelogoi” (Sílom or torjuma óilde, “Diferáiye”). Tói yóggwa zai dúifelaiye, baade suké deki waafes fíri aiccé. **8** Hétolla yóggwar atehańsór manúc ókkole edde age zetará yóggwa re hórat magitó de deikkíl itara hoór de, “Manúc ibá ubá no né zibá ye boói-boói hórat magitó?” **9** Hodúne hoór de, “Ói, e manúc cwa yóggwa.” Ar hodúne hoór de, “No, montor ite yóggwar dóilla deh.” Lekin yóggwa ye, “Añí Íba,” bóuli howát accíl. **10** Ítara yóggwa ttu fusár gorér de, “Tooile tuáñr suk keéngori kúligiyoi?”

11 Yóggwa ye zuwab der de, “Isá hoó de Manúc cwa ye meri re fúñt banai añr suk ot bóraidiye, aar añré hoíy de, ‘Zai Sílom foóir gwá ttu dúifelogoi.’ Añí zai dúifelaiyi rá r suké deki farir.” **12** Ítara yóggwa ttu fusár gorér de, “Hé Manúc cwa horé?” Yóggwa ye zuwab der de, “Añí hoi no fari.” **13** Baade ítara añdá accíl de manúc cwa re Féroci ókkol or hañse loigiyé. **14** Ze din Isá ye meri re fúñt banai yóggwar suk kúillil, hé din accíl ebaadot-or-din. **15** Hétolla bóuli yóggwar suk keéngori gom óiye de híyan Féroci ókkole yóggwa ttu abar fusár goijjé. Yóggwa ye ítara re hoór de, “Íba ye añr suk ot fúñt bóraidiye, baade añí dúiyi rá r deki fajjijí.” **16** Hétolla hodún Féroci ye hoór de, “Hé Manúc cwa Allar torfóttu no, kiyólla-hoilé Íba ye ebaadot-or-din no mane.” Montor ar hodúne hoór de, “Ezzon gunágar manúce keéngori endilla keramot gorí fare?” Héndilla ítarar búto re faáta-faáti foida ógiyoi. **17** Hétunot ítara añdá accíl de manúc cwa re abar hoór de, “Íba ye tor suk kúille de híyan olla tui íbar baabute kii hoós?” Yóggwa ye zuwab der de, “Íba eggwá nobi.” **18** Lekin yóggwa age añdá accíl aar ehón deki farer de híyan yóggwar bafmaa re matai fusár nó loh foijjonto Yohúdi ítara biccác nó goré. **19** Ítara yóggwar bafmaa ttu fusár gorér de, “Íba tuáñrar fua ubá né, zibá re tuáñra zormo ttu lóti añdá hoóila? Héen óile yala ite keéngori deki farer?” **20** Yóggwar bafmaa ye ítara re zuwabe hoór de, “Añára zani íbá añárar fua, aar ite añdá zormo óoil; **21** Montor yala ite keéngori deki farer añára no zani; itar suk hone kúille yó añára no zani. Itar ttu boc óiye, tuáñra itar ttu fusár goró. Ité nizer baabute tuáñra re hoibó.” **22** Yóggwar bafmaa ye héndilla hoóil de Yohúdi ókkol or doore, kiyólla-hoilé Yohúdi ókkole age lóti fáisela goijjíl de, zee niki Isá re Mosih bóuli cíkar goré, ítare ítarar mujilíc-hána ttu neelaidiya zaybo. **23** Híyan olla bóuli yóggwar bafmaa ye hoóil de, “Itar ttu boc óiye; tuáñra itar ttu fusár goró.” **24** Hétolla ítara age añdá accíl de manúc cwa re abar matai hoór de, “Hók hotá hoóil Allar taaríf gor. Añára zani hé Manúc cwa ézzon gunágar.” **25** Yóggwa ye zuwab der de, “Íba gunágar ói ne no añí no zani. Lekin añí yíán ekkán zani, añí age añdá accíl aar yala suké deki.” **26** Ítara yóggwa ttu fusár gorér de, “Íba ye toré kii goijjé? Íba ye tor suk keéngori kúlidiye?” **27** Yóggwa ye zuwab der de, “Añí tuáñra re hoóifelaiyi, montor tuáñra toh nó fúno. Tuáñra ttu híyan abar kiyá fúinto monehoór? Tuáñra ttu yó hómo íbar ummot óito monehoór?” **28** Baade ítara

gail di yóggwa re hoór de, “Tui Manúc íbar ummot, lekin añára de Muúsar ummot. **29** Añára zani Alla ye Muúsa llói hotá hoíy, montor hé Manúc cwa hontú aiccé híyan toh añára no zani.” **30** Hétunot manúc cwa ye ítara re zuwabe hoór de, “Kí taajuippa hotá! Tuáñra íba hontú aiccé no zano, aar toóu íba ye añr suk kúlidiye. **31** Añára zani Alla ye gunágar ókkol or hotá no fúne, montor íba ye ubár hotá fúne zee niki íbar ebaadotgár edde íbar moncá mozin goré. **32** Honókiye ezzon zormo ttu lóti añdá óiye de manúc or suk kúlidiye de toh duniyai cúru óiye lóti honódin fúna nó zah. (aíōn g165) **33** Zodi hé Manúc cwa Allar torfóttu no de óito, íba ye toh kessú gorí no faitto.” **34** Ítara yóggwa re zuwab der de, “Tui toh furafuri gunát zormo óiyos, aar tui añára re cíkka dor dé?” Héndilla hoóil ítara yóggwa re mujilíc-hána ttu neelaidiye. **35** Ítara yóggwa re neelaidiye de híyan Isá ye fúinne. Íba ye yóggwa re loot fai hoór de, “Tuñí Manúc or Fuar uore iman ainnó né?” **36** Yóggwa ye zuwab der de, “Ustat, íba hon añré hoó, zeéne añí íbar uore iman aní fari.” **37** Isá ye yóggwa re hoór de, “Tuñí íba re deikkó; tuáñr llói hotá hoór de Yóggwa óilde íba.” **38** Baade yóggwa ye hoór de, “Malik, añí iman ainní.” Héndilla hoóil yóggwa ye íba re sóida goijjé. **39** Isá ye hoór de, “Añí e duniyait bisar gorí bolla aiccé deh, zeéne zetará no deki ítara deki fare, aar zetará deki ítara añdá óizagoi.” **40** Isár fúañti accíl de hodún Féroci ye híin fúni íba re hoór de, “Tóoile añára yó añdá niki?” **41** Isá ye ítara re hoór de, “Zodi tuáñra añdá óita, tuáñra ttu honó guná no tákito; montor tuáñra zettót hoór, ‘Añára deki,’ hétolla tuáñrar guná táizagoi.”

10 “Añí tuáñra re sóiyi-sóiyi hoóir, zee niki bérasóol or añrail ot duwar báy no góle, montor oinno boli farái góle, íte sur edde cháañit. **2** Lekin zee niki duwar báy góle, yóggwa óilde bérasóol soroya. **3** Yóggwa re duwar soónidare duwar kúlide, aar bérasóol ókkole yóggwar abas fúne. Yóggwa ye nizer bérasóol ókkol ore nam dori-dori matai baáre ané. **4** Zeñtté yóggwa ttu nizer bérasóol beggún ore baáre ainná ó, yóggwa híin or age-age zaa, aar bérasóol híin yóggwar fisé-fisé aiyé, kiyólla-hoilé yóggwar abas híine siné. **5** Montor híin osin manúc or fisé-fisé bilkúl no zaibo, bólke ítar ttu dáizayboi, kiyólla-hoilé híine osin manúc or abas no siné.” **6** Isá ye ítara re e meésal lan hoíy, montor íba ye ítara re kii hoitó sár de híyan ítara nó buzé. **7** Hétolla Isá ye ítara re abar hoór de, “Añí tuáñra re

sóiyi-sóiyi hoóir, bérasóol lun or duwar óilam de Añí. **8** Añir age zetará aiccíl ítara beggún sur edde dahanít, montor bérasóol lune ítara hotá nó fúne. **9** Añí óilam de duwar. Zee niki Añir dí bútoe góle, íte nejat faibo. Íte bútoe aibó edde baáre zaibo, aar soribár zaga faibo. **10** Sur toh siríf suri, kún edde dónco gorí bolla éna aiyé. Lekin Añí aiccí de, zeéne ítara zindigi faa aar hé zindigi zen ítara ttu furafuri gori táke.” **11** Gom bérasóol soroya óilam de Añí. Gom soroya ye toh bérasóol ókkol olla Nizor zan deh. **12** Montor zee niki muzur, íte asól soroya no, íte bérasóol or girós óu no. Íte rangkuñir aiyér de dekíle bérasóol félai dáizagoi, tói rangkuñir aái bérasóol lun ore dóri cínřaciñtřá gorifele. **13** Íte etollá dáizagoi, kiyólla-hoilé íte óilde muzur, aar ítara ttu bérasóol or baabute honó sintabáfana náí. **14** Gom bérasóol soroya óilam de Añí. Añí Añir bérasóol ókkol ore siní, aar híine yó Añré siné, **15** zendilla Bafe Añré siné aar Añí Baf ore siní. Añí Añir bérasóol ókkol olla Nizor zan dih. **16** Añir ttu aró hodún bérasóol asé, zín e zák ot náí. Añir ttu híin ore yó loianá foribó, aar híine yó Añir abas fúnibo. Tói eggwá zák óibo edde eggwá soroya óibo. **17** “Bafe Añré etollá muhábbot goré, kiyólla-hoilé Añí Añir zan dih, zeéne híyan abar loifélai fari. **18** Honókiye híyan Añir ttu loiféla de no, bólke Añí Nize híyan di deh. Añir ttu híyan dibar óu kémota asé, aar Añir ttu híyan abar waafes loibar óu kémota asé. Héndilla gorřbar hókum híyan Añí faiyi de óilde Añir Baf or torfóttu.” **19** Hotá híin or zoriya Yohúdi ókkol or bútoe abar faářa-faáři foida óigiyoi. **20** Ítara boóut zone hoór de, “Íbá re búte faiyé, Íbá fool. Tuáñra Íbár hotá kiyá fúnor?” **21** Ar hodúne hoór de, “Montor e hotá gún toh eggwá búte-faiya manúc or hotár dóilla no. Búte ańdár suk kúlidi fare níki?” **22** Yárbaade Jerúsalem ot Hanúka-id óiye. Héńtte cítkhal accíl, **23** aar Isá baitul-mukaddos or bútoe Sóloman or baandřat řoólat accíl. **24** Yohúdi ókkole Íba re sairó ďák ottu gíridori hoór de, “Tuńí ańára re ar hotódin andacř rakíba? Tuńí zodi Mosih de óile, ańára re sáf-sáf góri hoó.” **25** Isá ye ítara re zuwab der de, “Ańí tuáñra re hoiyí, montor tuáñra toh biccác no goró. Ze ham ókkol Ańí Añir Baf or name gorí, híine Añir gobá déh. **26** Lekin tuáñra etollá biccác no goró, kiyólla-hoilé tuáñra Añir bérasóol lun ottu no. **27** Añir bérasóol ókkole Añir abas fúne, Ańí híin ore siní, aar híin Añir fisé-fisé aiyé. **28** Ańí híin ore ofúraní zindigi dii; híin honódin dónco no óibo; aró Añir át ottu híin ore honókiye harřloifelai no faribó. (aiřnios g165,

aiřnios g166) **29** Kiyólla-hoilé Añir Baf, zibá ye híin ore Añré diiyé, Íba beggún or túaro řoóńr. Honókiye Añir Baf or át ottu híin ore harřloifelai no fare. **30** Ańí edde Baf ek.” **31** Híyan fúni Yohúdi ókkole Íba re maitto abar cíl or dola feńřai loiyé. **32** Montor Isá ye ítara re hoór de, “Ańí de Baf or torfóttu tuáñra re boóut gom-gom ham ókkol daháiyi. Híin ottu hon nán olla bóuli tuáñra Añré cíl or dola maitto soór dé?” **33** Yohúdi ókkole zuwab der de, “Gom ham olla bóuli ańára Tuáñre cíl or dola marir de no, bólke kuféri goijjó de hétolla. Tuńí manúc ói Nizoré Nize Alla dabi gorór.” **34** Isá ye ítara re hoór de, “Tuáñřar Córiyot ot leikká asé de no né, Alla ye endilla hoiyé de, ‘Tuáñra óilade kúda’? **35** Zetarár hańse Allar torfóttu kalam aiccé, ítara re toh kúda bóuli howá gíyeh. Pak-kalam or hotá toh bad di no fare. **36** Baf Nize éna Añré basíloiyé edde duniyait diferáiyé. Ańí zettót hoiyí, ‘Ańí Allar Fua,’ tói tuáñra keéngori hoór de, ‘Tuńí Allar kuféri goijjó?’ **37** Zodi Ańí Añir Baf or ham ókkol no gorí, tóoile Añré biccác no goijjó; **38** lekin zodi híin gorí, tuáñra Añré biccác no goillé yo, ham híin ore biccác goró, zeéne tuáñra zano edde buzó de, Baf Añir bútoe asé aar Ańí Baf or bútoe así.” **39** Hétunot Yohúdi ókkole abar Isá re gereřtar goittó kucíc goijjíl, montor Íba ítarař át ottu hárigilgoi. **40** Tarfore Isá abar Jordán hál or farkule zai táikkegoi, zeré age Yaháya ye bápřisma díto. **41** Boóut manúc ókkol Íbar hańse aiccíl; ítara hoitó de, “Yaháya ye honó keramot nó goré, montor toóu Yaháya ye e Manúc cwar baabute zín-zín hoóil híin beggún sóiyi.” **42** Héře boóut zone Isár uore iman ainné.

11 Lasár nam or ézzon manúc ocúk accíl. Yóggwa óilde Betániya farar, ziyán ot yóggwar bóin Moriyam edde Morota yó tákito. **2** Hé Moriyam óilde ubá zibá ye Malik or řéng ot ańtor řálidi nizor sul loi fuńsídil. Ze Lasár ocúk accíl, yóggwa óilde híbar báí. **3** Hétolla yóggwar bóinain de Isár hańse hotá fońsaiye de, “Malik, Tuńí zaré ador goró, yóggwa ttu ocúk óiye.” **4** Híyan fúinne rár Isá ye hoór de, “Hé ocúk yóggwar moot olla óiye de no, bólke Allar mohíma lla óiye de, zeéne híyan or zoriya Allar Fuar mohíma zahér ó.” **5** Isá ye Morota re, híbar bóin ore, edde Lasár ore ador goittó. **6** Toóu Íba ye yóggwa ocúk de fúni, Íba ze zagat accíl héře aró dui din táikkil. **7** Baade Íba ye cárit tun ore hoór de, “Aiyó, ańára abar Yohúdiyat zai.” **8** Cárit tune Íba re hoór de, “Rabbí,

jaar hooddin age toh Yohúdi ókkole Tuáñre cíl or dola maitto saáil, toóu Tuñí hére abar zaito soór dé?”

9 Isá ye zuwab der de, “Din ot ki baró gónḡa náí ne? Honókiye zodi din ot áñre, íte uját na há, kiyólla-hoilé íte toh duniyair foór deké.”

10 Montor honókiye zodi rait ot áñre, íte uját há, kiyólla-hoilé ítar bútoore foór náí.”

11 Híin hoói baade, íba ye ítara re hoór de, “Añárar dustó Lasár gúm ot foijjé, montor Añí yóggwa re tulúḡito zair.”

12 Tói cárit tune íba re hoór de, “Malik, yóggwa gúm ot foijjé de óile, yóggwa t̄ík óizayboi.”

13 Háleke Isá ye hoiyé de óilde yóggwar moot or baabute, montor ítara táaijil de endilla gúm or hotá hoiyé bóuli.

14 Hétolla Isá ye ítara re sáf-sáf góri eén hoóifelaiye, “Lasár morigiyói.

15 Añí hére nu accílám de híyan olla tuáñrar zoriya kúci, zeéne tuáñra ekin gorí faro. Aiyó, añára yóggwar hére zai.”

16 Hétunot Tómas, zibá re Zooñikka hoói ḡake, yóggwa ye nizor sáañti cárit tun ore hoór de, “Áñro, añára yó zai, zeéne añára íbar fúañti mori fari.”

17 Baade Isá zeñtté hére foónicce, íba ye zani faijjé de, Lasár ore hobor ot diyé de sair din ógiyoi.

18 Betániya gán Jerúsalem or ḡake accíl, siríf dui mail ánik duré deh.

19 Bicí Yohúdi ókkol Morota edde Moriyam or hére aiccíl, ítara re ítarar báí or baabute tosólí dí bolla.

20 Zeñtté Morota ye Isá aiyér de fúinne, híba ye Isá llói milto giyyé, montor Moriyam gór ot táigilgoi.

21 Morota ye Isá re hoór de, “Ó Malik, Tuñí zodi eré óita, añr báí no moritó.

22 Montor añí yíán zani, Tuñí ehón óu Alla ttu zín magibá, Alla ye híin Tuáñre diibo.”

23 Isá ye híba re hoór de, “Tor báí abar zinda ói ur̄ibo.”

24 Morota ye íba re hoór de, “Añí zani háñcor or din yóggwa abar zinda ói ur̄ibo.”

25 Isá ye híba re hoór de, “Háñcor edde zindigi óilam de Añí. Zee niki Añr uore iman ané, yóggwa morilé yo zinda tákibo,

26 aar zee niki zinda asé aar Añr uore iman ané, yóggwa bilkúl no moribó. Tui híyan ekin gorós né?” (aĩñ g165)

27 Híba ye zuwab der de, “Ói, Malik, añí iman ainní de, Tuñí óilade Allar Fua Mosih, zibá duniyait aibár hotá accíl.”

28 Híyan hoói baade, híba zai nizor bóin Moriyam ore matai zuitégori hoór de, “Ustat eré asé, íba ye tuáñre ḡaker.”

29 Híyan fúni híba toratori ur̄í Isár hañse giyyé.

30 Hén̄tte Isá farat nó foón̄se, bólke aijjó ur̄é zeḡé Morota ye íba llói dola óoil.

31 Ze Yohúdi ókkole Moriyam or fúañti gór ot táí híba re tosólí díyat accíl, ítara Moriyam toratori ur̄í baárkule zaargói de deki híbar fisá doijje. Ítara táaijje de, Moriyam hobor ot hañḡitó zaar.

32 Zeñtté Moriyam ur̄é foónicce zeḡé Isá

asé, híba ye íba re deki íbar t̄éng ot fori hoór de, “Ó Malik, Tuñí zodi eré óita, añr báí no moritó.”

33 Isá ye híbar edde híbar fúañti aiccé de Yohúdi ókkol or hañdani deikké rá̄r, Nizor dil ot bicí ferecan laiggíl, edde feḡfuri uittíl.

34 Íba ye fusár gorér de, “Yóggwa re hoḡé raikkó?”

Ítara íba re hoór de, “Malik, aiyó, soógai.”

35 Isá hañdat doijje.

36 Hétolla Yohúdi ókkole hoór de, “Soó, íbá ye yóggwa re hondilla ador goittó!”

37 Lekin ítara kiyé-kiyé hoór de, “E Manúc zibá ye añḡár suk kúli díyl, íbá ye saitó bóuli kí hé manúc cwa re no more fán gorí no faitto né?”

38 Hétolla Isá ttu Nizor bútoore abar bicí ferecan lagi, hobor or hére giyyé. Hobor gwá óilde eggwá kúñda, aar yíbar muk ot ekkán cíl ouzaiya accíl.

39 Isá ye hoór de, “Cíl lan larifélo.”

Morigiyói de yóggwar bóin Morota ye íba re hoór de, “Malik, yala héntu bac ur̄ibo, kiyólla-hoilé yóggwa morigiyói de sair din óiye.”

40 Isá ye híba re hoór de, “Añí toré hoiyí de no né, zodi ekin gorós, Allar mohíma deki bí bóuli?”

41 Tói ítara cíl lan larifélaiye. Aar Isá ye uormikká suk tulí hoór de, “Ó Baf, Tuñí Añr hotá fúinno de hétolla Añí Tuáñre cúkuriya zanair.

42 Añí zani Tuñí hámica Añr hotá fúno, montor Añr sairókul ttu ze manúc cún t̄iyai asé, ítarar wasté Añí yíán hoóir, zeéne ítara ekin goré de, Añré Tuñí beh difeḡaiyo.”

43 Híin hoói yore Isá ye ḡoóñr abase ḡak mari hoór de, “Lasár, neeliail!”

44 Tói morigiyói de yóggwa neeli aáigiyoi, yóggwar át edde t̄éng gun hohón or hoor loi bainḡá, aar yóggwar muk kán ekkán hoor loi beráiya. Isá ye ítara re hoór de, “Yoggwá re kúlifelo, aar zaito doh.”

45 Yohúdi ókkol zetará Moriyam or hére aiccíl, ítara Isá ye ziyán goijjé híyan deki boóut zone íbar uore iman ainné.

46 Montor ítarar bútotu hodúne zai, Isá ye zín goijjé híin Féroci ókkol ore zanaiyégoi.

47 Tói ḡoóñr imam ókkole edde Féroci ókkole fótuayi-mujilíc ore m̄iḡing matai hoór de, “Añára ehón kii goittám? Hé Manúc cwa ye toh boóut keramot ókkol gorér.

48 Zodi añára íba re endilla eridi rakí, tóoile beggúne íbar uore iman anífelaibo, aar Romi ókkole aái añárar pak zaga edde añárar koum ore kobza gorífelaibo.”

49 Montor ítarar bútoore Káiyafas nam or zibá hé bosór boro imam accíl, yóggwa ye ítara re hoór de, “Tuáñra toh bilkúl kessú no zano,

50 aar tuáñra yíán óu báfi no soór de ki, tuáñra lla beétor óilde fura koum dónco óizar túaro manúc beggún olla ekzon manúc moron.”

51 Yóggwa ye híyan nizor bole hoiyé de no, bólke yóggwa hé bosór boro imam accíl isafe, yóggwa ye agun hotá

hoiyé de ki, Yohúdi kounm olla Isá moribó; 52 siríf hé kounm olla no, bólke Allar fuain ókkol zetará ikká-uikká dorbodor óigiyoi ítara re ekkán ot zoma gorí bolla yó. 53 Hé din lóti ítara Isá re marifélaito sólla gorát doijje. 54 Hétolla Isá ye Yohúdi ókkol or bútoe kúlamela góri ar aa-zaa no gorér, bólke héntu moidan elakar dake asé de Eferaim nam or ekkán cóor ot giyyégoi, aar Nizor cárit tun ore looi hére tákat doijje. 55 Héntte Yohúdi ókkol or Azadir-id dake aiccé, aar id or age nizoré pak-sáf gorí bolla boóut manúc fara ttu uore Jerúsalem ot giyyé. 56 Ítara Isá re talac gorát accíl, aar baitul-mukaddos or urán ot tíyai ezzon ottu ezzone fusár gorér de, “Tuáñra kii táaro? Íba id ot ebbe nu aibó niki?” 57 Doóñr imam ókkole edde Féroci ókkole hókum zari goijjé de, zodi honókiye Isá hojé asé de zane de óile íte ítara re hóbor dito, zeéne ítara íba re gereftar gorí fare.

12 Azadir-id or sów din age, Isá Betáníyat aiccé, zere oh Lasár tákito, zibá re íba ye mora ttu zinda goijjíl. 2 Hére ítara íba lla biyal or hána goijjé. Morota ye hédmot goijjíl, aar zetará íbar fúañti háito boiccíl ítarar bútoe Lasár óu accíl. 3 Hétunot Moriyame háti narḏ-gas or bicí móongga azzér añtor looi aiccé, aar híin Isár foot dálidi nizor sul loi íbar foo fuñsídiye. Hé añtor or kúchoye gór gán bórigilgoi. 4 Montor íbar cárit tun ottu ezzon zee niki íba re dóridibo de asé, hé Yohúdah Iskáriyete hoór de, 5 “E añtor gún kiyá tin cót dinár dí besi tiañ gún gorif ókkol ore dii nó fele?” 6 Íte hotá híyan gorif ókkol olla sintabáfana táki hoiyé de no, bólke kiyólla-hoilé íte sur accíl; tiañr feñi ítar hére tákito ísafe, yíbat zíin era zayto héntu íte sur gorífelaito. 7 Montor Isá ye hoór de, “Híba re goittó doh; híba ye iín Añr dohón or din olla beh raikké. 8 Gorib ókkol toh tuáñrar fúañti nitti asé, montor Añré tuáñra nitti no faiba.” 9 Isá Betáníyat aiccé de zani fari becábicí Yohúdi ókkol hére aiccé. Ítara siríf Isá lla aiccé de no, bólke Lasár ore sai bolla yó, zibá re íba ye mora ttu zinda goijjíl. 10 Lekin doóñr imam ókkole Lasár ore yó marifélaibar sólla goijjé, 11 kiyólla-hoilé yóggwar zoriya boóut Yohúdi ókkole ítarar héntu zaigói Isár uore iman anér. 12 Tarfor din, ze becábicí manúc ókkol id ot aiccé, ítara fúinne de, Isá Jerúsalem ot aiyér, 13 tói ítara házu-gas or daggwa ókkol looi íba llói dola óito neeillé, aar guzori-guzori hoór de, “Hósana! Mubarek Ubá zibá Mabud or name aiyér, Becók, íba óilde Isráili ókkol or Baáñcca!” 14 Isá ye

eggwá gadár sóo fai yíbar uore boiccíl; zendilla pak-kalam ot asé, 15 “Ó Síyon or zérfua, no dooraiyó; soó, tuáñr Baáñcca gadár sóor uore boói aiyér.” 16 Isár cárit tune híin age buzí nó fare; montor zeñtté Isár mohíma zahér óiye, tói ítara ttu monot uitté de, híin íbar baabute beh leká gíyeh, aar manúc ókkole íba re héen-héen goijjé. 17 Isá ye Lasár ore hobor ottu daki mora ttu zinda goijjíl de héñtte ze manúc ókkol íbar fúañti accíl, ítara híyan or baabute gobá díyat accíl. 18 Hétolla bóuli yó hé manúc ítara Isá llói dola óito giíl deh, kiyólla-hoilé ítara fúinnil de, hé keramot tán íba ye beh goijjé. 19 Féroci ókkole híyan olla afós ot hoór de, “Tuáñra toh dekór, añárar honó fáida no ór. Soó, fura duniyai íbar fisáli óigiyoi.” 20 Hé id ot zetará ebaadot goittó aiccé, ítarar bútoe hodún Girík manúc óu accíl. 21 Ítara Filíp or hañse aái hoór de, “Jonáb, añára ttu Isá re saító monehoór.” Filíp óilde Galil or Betsáida farar manúc. 22 Filípe zai híyan Enderiyas ore hoiyé, baade Enderiyase edde Filípe zai Isá re hoiyégoi. 23 Montor Isá ye ítara re hoór de, “Manúc or Fuar mohíma zahér gorá zaybar októ aiccé. 24 Añí tuáñra re sóiyi-sóiyi hoóir, giyuñr bis zetún meñit fori nó more, hétun gaaga táke; montor zodi more, yíbat boóut fósol ókkol dóre. 25 Zee niki nizor zan ore muhábbot goré, yóggwa ye híyan háraifelaibo; aar zee niki e duniyait nizor zan ore deéi no fare, yóggwa ye híyan ofúrani zindigi lla basai rakíbo. (aiōnios g166) 26 Honókiye Añr hédmot goittó sailé, ítar ttu Añr fisáli dora foribó; kiyólla-hoilé Añí zere, Añr háadem óu hére beh óibo. Zee niki Añr hédmot goré, ítare Añr Bafe izzot goríbo. 27 “Yala añr ruh ferecan óigiyoi. Añí kí endilla hoitám né, ‘Ó Baf, Añré e októ ttu basai rakó’? No, Añí e októ foijjonto hétolla éna aiccí. 28 Ó Baf, Tuáñr nam or mohíma zahér goró.” Hétunot asman ottu eggwá abas fúna gíyeh de, “Añí híyan zahér goijjí yó, aar abar zahér goijjím óu.” 29 Ze manúc ókkol hére tíyai accíl, ítara hé abas swá fúni dēba maitté de bóuli hoiyé. Ar hodúne hoór de, “Íba llói honó fírista ye hotá hoiyé deh.” 30 Isá ye zuwab der de, “Hé abas swá Añr wasté aiccé de no, bólke tuáñrar wasté. 31 Yala e duniyair maincór bisar goríbar októ aáigiyoi, aar yala e duniyair sóddar ore neelaidiya zaybo. 32 Añré zeñtté zobin ottu uore tulífela zaybo, héñtte tamám manúc ókkol ore Añr hañse țani tulífelaiyum.” 33 Hotá híin lói íba ye icára díye de ki, íba hon moote moribó. 34 Manúc cúne íba re hoór de, “Añára Córivot ottu fúinni de, Mosih

abadulabad tákibo, tói Tuñí keéngori hoór de, ‘Manúc or Fua re hámaha uore tulífela zaybo?’ Hé Manúc or Fua Íba hon?” (aiñ g165) 35 Isá ye ítara re hoór de, “Nur tuáñrar dormiyan ot ar kessú októ foijjonto beh asé. Tuáñrar fúañti Nur tákite áñrat táko, arnóile andáre tuáñra re báraizayboi. Zee niki andár ot áñre, íte toh hoikká zaar hoi no fare. 36 Tuáñrar fúañti Nur tákite Nur or uore iman anó, zeéne tuáñra Nur or fuain bonizogói.” Isá ye hotá híin hoói baade ítarar héntu zaigói Nizoré ítara ttu lukai raikkíl. 37 Íba ye edún bicí keramot ítarar muúntu goríle yo, toóu ítara Íbar uore iman nú ané. 38 Héndilla etollá óiye, zeéne Yesáyah nobi ye hoóil de hotá yíán fura ó, “Ó Mabud, añárar poigam hone ekin goijjé? Aar Mabud or ðuwañr bol har hañse zahér óiye?” 39 Ítara etollá beh iman aní nó fare, zendilla hé Yesáyah ye aró hoiyé, ki hoilé, 40 “Alla ye ítarar suk ańdá gorídiye, aar ítarar dil doró gorídiye, zeéne ítara suké no deké, dile no buzé, aar Íba ye ítara re gom gorídi bolla Íbar hañse firi nu aiyé.” 41 Yesáyah ye hotá híin Isár mohíma deki Íbar baabute hoibárcot hoiyé deh. 42 Toóu neta ókkol ottu cóo boóut zone Íbar uore iman ainné, montor Féroci ókkole ítara re mujilíc-hána ttu neelaidibo de híyan or ðoore ítara híyan cíkar no goittó; 43 kiyólla-hoilé ítara Alla ttu izzot faar túaro manúc ottu izzot faa bicí fosón goittó. 44 Baade Isá ye guzori-guzori hoór de, “Zee niki Añr uore iman ané, yóggwa siríf Añr uore iman ané de no, bólke Ubár uore yó ané zibá ye Añré diferáiyé. 45 Zee niki Añré deké, yóggwa ye Añré diferáiyé de Íba re beh deké. 46 Añí e duniyait Nur ísafe aiccí, zeéne zee kiyé Añr uore iman ané, yóggwa andár ot no táke. 47 “Zodi honókiye Añr hotá fúne montor híin amól no goré, yóggwar bisar Añí no gorí, kiyólla-hoilé Añí toh duniyair maincór bisar goittó aiccí de no, bólke duniyair maincóre basaitó aiccí deh. 48 Zee niki Añré inkar goré aar Añr hotá kobul no goré, yóggwar bisarhar asé. Ze hotá Añí hoiyí, kiyamot or din híine beh yóggwar bisar goríbo. 49 Kiyólla-hoilé Añí toh Nizor torfóttu kessú hoiyí de náí, montor Añré diferáiyé de hé Baf Nize Añré hókum goijjé de, Añr ttu kii-kii howá foribó aar kii-kii boiyan gorá foribó. 50 Añí zani Íbar hókume ofúrani zindigít loiza; hétolla Añí zín hoói híin beggún Bafe Añré zendilla hoiyé héndilla beh hoói.” (aiñios g166)

13 Azadir-id or ekkágori agor hotá. Isá ye zainto de, Íba e duniyai ttu Baf or hére zaibar októ

aáigiyoi. Duniyait mazé zetará Íbar Nizor manúc accíl ítara re Íba ye muhábbot goittó aar ítara re ahéri foijjonto muhábbot goijjíl. 2 Héñtte biyal or hánar októ accíl. Íba re dórídi bolla Íbilíce Sáimon or fua Yohúdah Iskáriyet or dil ot age lóti niyot gólaidiye. 3 Isá ye zainto de, Bafe Íbar át ot hárr kessú diífélaiye aar Íba Allar torfóttu aiccé edde Allar hére beh firi zaar; 4 hétolla Íba ye hána eri uiñfíl, aar Nizor gaar uoror hoor kúli emmikká eijjé, baade ekkán gansá looi keeñil ot bairidé. 5 Tarfore Íba ye gaálat faní dáli cárit tun or téng dúwai díyat doiije, aar Íbar keeñil ot bairidíl de gansá gán lói híin fuñsí díyat doiije. 6 Baade Íba Sáimon Fitor or íñyot foóñicce. Fitore Íba re hoór de, “Malik, Tuñí añr téng dúwai díba dé?” 7 Isá ye Íba re zuwabe hoór de, “Añí kii gorír tui ehón no buzíbi, montor fore buzíbi.” 8 Fitore Íba re hoór de, “Tuñí birkúl añr téng no dúyo.” Isá ye Íba re zuwab der de, “Añí zodi tor téng no dúí, tóoile tor lloi Añr llói honó hátíl náí.” (aiñ g165) 9 Hétunot Sáimon Fitore Íba re hoór de, “Malik, tóoile siríf añr téng no, bólke añr át tun edde matá yó dúwaido.” 10 Isá ye Íba re hoór de, “Zee niki gaa dúfélaiye, ítar ttu siríf téng dúwa fore deh, kiyólla-hoilé íte toh furafuri sáfsutara. Tuáñra sáf, montor beggún no.” 11 Isá ye zane Íba re hone dórídibo deh; hétolla Íba ye hoiyé de, “Tuáñra beggún sáf no.” 12 Tói zeñtté Íba ttu ítarar téng dúiya óiye, Íba ye Nizor hoor fiñdí abar boiccé. Íba ye ítara re hoór de, “Añí tuáñra re kii goijjíl de buijjó né? 13 Tuáñra toh Añré Ustat edde Malik ðako, aar tuáñra híyan sóiyi hoó, kiyólla-hoilé Añí toh héndilla ói. 14 Tói Añí zettót tuáñrar Malik edde Ustat ói tuáñrar téng dúwai díyi, tuáñra ttu yó ezzone ar ezzon or téng dúwai díyar zorur. 15 Añí gorí tuáñra re ekkán nomuna daháiyi de, zeéne Añí tuáñra re goijjíl de héndilla tuáñra yó goró. 16 Añí tuáñra re sóiyi-sóiyi hoóir, gulam nizor girós or túaro ðoóñr no, aar zibá re diferá gíyeh Íba yó diferóyar túaro ðoóñr no. 17 Yala tuáñra toh iín zano, zodi amól goró tóoile tuáñra mubarek. 18 “Añí tuáñra beggún or hotá hoóir de no; Añí zani Añí hontará re basíloiyi. Montor héndilla etollá ór zeéne pak-kalam or hotá yíán fura ó, ‘Zee niki Añr fúañti ruñi haa, íte Añr ulða latí tuillé.’ 19 “Híyan óibar age Añí yala lóti tuáñra re zanaidir, zeéne híyan óile tuáñra ekin goró de, Añí óilam de Íba. 20 Añí tuáñra re sóiyi-sóiyi hoóir, zee niki Añí diferáide yóggwa re kobul goré, íte Añré kobul goré deh; aar zee niki Añré kobul goré, íte Añré diferáiyé

de íba re kobul goré deh.” 21 Isá ttu híin hoiyá ói baade, dil ot ferecan laiggé, aar hoóifelaiye de ki, “Añí tuáñra re sóiyi-sóiyi hoóir, tuáñra ezzone Añré dóri diba.” 22 Cárit tune Isá ye har hotá hoór de buzí no fari ezzon or uzu ezzone saat doijje. 23 Ítara ttu ze cárit twa re Isá ye muhábbot goittó, yóggwa Isár gaat élan dí boirá accíl. 24 Sáimon Fitore hé cárit twa re icára gorí hoór de, “Íba ye har hotá hoór de fusár goró.” 25 Tói hé cárit twa Isár gaat élan dí fusár gorér de, “Malik, íte hon?” 26 Isá ye zuwab der de, “Ruṭīr ṭukura yíán burai Añí zaré diiyum, tee óilde manúc íte.” Baade íba ye ruṭīr ṭukura gán burai Sáimon Iskáriyet or fua Yohúdah re diiyé. 27 Ruṭīr ṭukura gán looi baade Cóitan ítar búture gólīgiyi. Hétolla Isá ye ítare hoór de, “Tui ziyán goríbi híyan toratori gor.” 28 Montor hána háito boiccé de ítara honókiye nó buzé de, íba ye ítare hotá híyan kiyólla hoiyé. 29 Hodúne ṭaaijil de, Yohúdah ttu zettót ṭiañr feṭi accíl hétolla Isá ye ítare endilla hoiyé de, “Id olla zín zorur híin kini angói,” arnóile gorif ókkol ore kessú deegói. 30 Íte ruṭīr ṭukura gán looi toratori baárkule neeligiyói. Híyala rait. 31 Íte baáre zaigói baade, Isá ye hoór de, “Yala Manúc or Fuar mohíma zahér óibar októ aiccé, aar Allar mohíma íbar duara zahér óibo. 32 Zeñtíte íbar duara Allar mohíma zahér óibo, héñtite Alla ye yó Nizor duara hé Manúc or Fuar mohíma zahér goríbo, aar íba ye Nizor mohíma bicí toratori zahér goríbo. 33 “Ó Fuain ókkol, Añí tuáñrar fúañti ar kessú októ foijjonto así deh. Tuáñra Añr talac goríba, montor Añí Yohúdi ókkol ore zendilla hoóilam, héndilla yala Añí tuáñra re yó hoóir, ‘Añí zeṛé zairgói hére tuáñra aái no faribá.’ 34 “Añí tuáñra re ekkán noya hókum dí, ki hoilé, tuáñra ezzon ore ezzone muhábbot goró. Añí zendilla tuáñra re muhábbot goijjí, héndilla tuáñra yó ezzon ore ezzone muhábbot goró. 35 Zodi tuáñra ezzon ore ezzone muhábbot goró, híyane beggúne zanibó de, tuáñra óilade Añr ummot.” 36 Sáimon Fitore Isá re hoór de, “Malik, Tuñí hoṛé zoórgoi dé?” Isá ye zuwab der de, “Añí zeṛé zairgói, hére tui Añr fúañti yala aái no faribí, lekin fore aái faribí.” 37 Fitore íba ttu fusár gorér de, “Malik, añí Tuáñr fúañti yala kiyá aái no faittam? Añí toh Tuáñr lla bóuli nizor zan úddwa difélayum.” 38 Isá ye zuwab der de, “Tui Añr lla tor zan difélaibi dé? Añí toré sóiyi-sóiyi hoóir, ratakurá bak dibar age tui Añré tin bar inkar goríbi.

14 “Tuáñrar dil ot ferecan nu ainnó. Allar uore iman rakó, Añr uore yó iman rakó. 2 Añr Baf or gór ot tákibar zaga bicí asé, zodi no tákito, Añí tuáñra re hoói dítam, kiyólla-hoilé Añí toh tuáñra lla zaga toiyar goittó zair. 3 Añí zai tuáñra lla zaga toiyar gorí waafes aiccúm, aar Añr hére tuáñra re loizaiyúmboi, zeéne Añí zeṛé, tuáñra yó hére ó. 4 Tuáñra toh Añí hoṛé zair de híyan or rasta zano.” 5 Tómasé íba re hoór de, “Malik, añára no zani Tuñí hoṛé zoór, tooile rasta keéngori zaniyúm?” 6 Isá ye yóggwa re hoór de, “Añí óilam de rasta, sóiyi, edde zindigi; Añr duara no zailé honókiye Baf or hére zai no fare. 7 “Zodi tuáñra Añré sinnó de óile, tooile toh Añr Baf ore yó sinnó. Yala lóti tuáñra íba re sinó edde dekfélaiyo.” 8 Filípe íba re hoór de, “Malik, Baf ore añára re dahó, híyan añára lla kafí.” 9 Isá ye yóggwa re hoór de, “Filíp, Añí toh tuáñrar fúañti etókkal así, tooú tui Añré no sinós dé? Zee niki Añré deikké íte Baf ore deikké. Tui keéngori hoór de, ‘Baf ore añára re dahó?’ 10 Tui ki biccác no gorós, Añí Baf or búture así aar Baf Añr búture asé dé? Hotá zín Añí tuáñra re hoói, híin Añí Nizor torfóttu hoói de no, bólke Baf zibá Añr búture asé íba ye Nizor ham gorér deh. 11 Añré biccác goró de, Añí Baf or búture así aar Baf Añr búture asé; arnóile ham mún or wasté óile Añré biccác goró. 12 “Añí tuáñra re sóiyi-sóiyi hoóir, zee niki Añr uore iman raké, ze ham ókkol Añí gorí híin íte yó goríbo; íte híin or túaro ḑoónr-ḑoónr ham ókkol goríbo, kiyólla-hoilé Añí toh Baf or hére zairgói. 13 Aar tuáñra Añr name zín saibá híin Añí goríyum, zeéne Baf or mohíma Fuar duara zahér ó. 14 Tuáñra Añr name Añr ttu honó kessú sailé, Añí híyan goríyum. 15 “Zodi tuáñra Añré muhábbot goró, tooile Añr hókum ókkol amól goríba. 16 Añí Baf ottu magiyúm, aar íba ye tuáñra re ar ezzon Modotgár diibo, zeéne íba tuáñrar fúañti abadulabad táke. (aiñon g165) 17 Hé Modotgár óilde sóiyir Ruh; duniyai ye íba re kobul gorí no fare, kiyólla-hoilé duniyai ye íba re no yo deké aar no yo zane. Montor tuáñra toh íba re zano, kiyólla-hoilé íba tuáñrar fúañti-fúañti táke edde tuáñrar búture tákibo. 18 “Añí tuáñra re etim rakí no zaiyum; Añí tuáñrar hére waafes aiccúm. 19 Hotún ánik baade duniyai ye Añré ar no dekébo, montor tuáñra Añré dekéba, kiyólla-hoilé Añí zinda así ísafe tuáñra yó zinda tákiba. 20 Hé din ailé tuáñra zani faribá de, Añí Añr Baf or búture así, tuáñra Añr búture asó, aar Añí tuáñrar búture así. 21 Zee niki Añr hókum ókkol kobul goré edde amól goré, yóggwa óilde zee

niki Añré muhábbot goré. Zee niki Añré muhábbot goré, yóggwa re Añr Bafe muhábbot goríbo; Añí yó yóggwa re muhábbot goríyum aar Nizoré yóggwar hañse zahér goijjím.” 22 Hétunot Iskáriyet no de hé Yohúdah ye íba re hoór de, “Malik, kiyólla Tuñí duniyair hañse no gorí siríf añárar hañse Nizoré zahér goríba dé?” 23 Isá ye yóggwa re zuwabe hoór de, “Zodi kiyé Añré muhábbot goré, yóggwa Añr hotáye solibó. Añr Bafe yóggwa re muhábbot goríbo, aar Añára yóggwar hañse aiccúm edde yóggwar fúañti tákiyum. 24 Zee niki Añré muhábbot no goré, yóggwa Añr hotáye no sole. Ze hotá tuáñra fúnor híin Añr no, bólke Añré diferáye de hé Baf or. 25 “E hotá íin Añí tuáñra re tuáñrar fúañti tákite hoiyí. 26 Lekin Modotgár yáni Pak-Ruh, zibá re Bafe Añr name diferáibo, íba ye tuáñra re hárr kessú cíkaibo, aar Añí zín tuáñra re hoiyí híin beggún yaad goráidibo. 27 Añí tuáñra lla cánti rakí zair; Añr cánti Añí tuáñra re diir. Duniyai ye dee de héndilla gorí Añí no dii. Tuáñrar dil ot ferecan nu ainnó, edde no ñooraiyó. 28 “Añí tuáñra re yíán hoiyí de toh fúinno, ‘Añí zairgói, aar tuáñrar hére waafes aiccúm.’ Zodi tuáñra Añré muhábbot goittá, tooile tuáñra Añí Baf or hére zairgói de hétolla kúci óita, kiyólla-hoilé Añr Baf toh Añr túaro ñoóñr. 29 Híin óibar age lóti Añí tuáñra re hoóidiyi, zeéne híin óile tuáñra biccác goró. 30 Añí tuáñra llóí ar bicí hotá no hoiyúm, kiyólla-hoilé duniyair sóddar toh aázargoi, aar ítar ttu Añr uore honó kémota náí. 31 Montor Añí Baf ore muhábbot gorí de híyan duniyai ye zane fán, Bafe Añré zendilla hókum goijjé Añí héndilla beh gorí. “Uró, Añára yíán ttu zaigói.

15 “Añí óilam dé sóiyi anggur-gas, aar Añr Baf óilde barizar cacá. 2 Añr ze déeilat gula no dóre, yíba re íba ye haríféle; montor ze déeilat gula dóre, yíba re íba ye cáři sáf raké, zeéne yíbat aró gula dóre. 3 Añí tuáñra re ze hotá ókkol hoiyí híin lóí toh tuáñra age lóti pak-sáf óigiyogoi. 4 Añr llóí laigga táko, aar Añí yó tuáñra llóí laigga táikkum. Zendilla déeila anggur-gas ot laigga no tákile nizorgá nize gula dórai no fare, héndilla tuáñra yó no faribá zodi Añr llóí laigga no táko. 5 “Añí óilam de anggur-gas, aar tuáñra óilade déeila ókkol. Zee niki Añr llóí laigga táke aar Añí ítar llóí laigga táki, íte bicí gula dórai fare, kiyólla-hoilé Añí sára toh tuáñra kessú gorí no faribá. 6 Zee niki Añr llóí laigga no táke, ítare déeilar ñóilla baáre félaidiya zah, aar fúaizagoi; tói maincé híin

ore dolagorí ooin ot félai déh, aar híin furizagói 7 Zodi tuáñra Añr llóí laigga táko, aar Añr hotá tuáñra llóí laigga táke, tooile tuáñra ttu monehoó de híyan magiyó, tuáñra re híyan diiya zaybo. 8 Tuáñra bicí gula dórai Añr ummot de sábut goríle, Añr Baf or mohíma zahér ó. 9 “Bafe Añré zendilla muhábbot goijjé, Añí yó tuáñra re héndilla muhábbot goijjé. Añr muhábbot ot laigga táko. 10 Zodi tuáñra Añr hókum ókkol amól goró, tooile Añr muhábbot or bútoe tákiba, zendilla Añí Añr Baf or hókum ókkol amól gorí yore íbar muhábbot or bútoe táki. 11 Hotá íin Añí tuáñra re etollá hoiyí, zeéne Añr kúci tuáñrar bútoe táke, aar tuáñrar kúci zen fura óizagoi. 12 Añr hókum óilde yíán, Añí tuáñra re zendilla muhábbot goijjé, tuáñra yó ezzon ore ezzone héndilla muhábbot goró. 13 Ezzone nizor dustó ókkol olla nizor zan diféle de híyan or túaro toh ar ñoóñr muhábbot náí. 14 Tuáñra Añr dustó ókkol, zodi Añí tuáñra re zín hókum díyi híin amól goró. 15 Añí tuáñra re gulam bouli ar no hoóir, kiyólla-hoilé gulame toh nizor giróse kii gorér no zane. Montor Añí tuáñra re dustó hoiyí, kiyólla-hoilé Añí toh Añr Baf ottu zín fúinni híin beggún tuáñra re zanaidiyi. 16 Tuáñra Añré basíloiyi de no, bólke Añí éna tuáñra re basíloiyi edde ham ot lagaiyi, zeéne tuáñrar zindigit gulagala dóre aar hé gulagala ñiki táke, zeéne tuáñra Baf ottu Añr name zín magibá híin íba ye tuáñra re dee. 17 Añí tuáñra re hókum dír de ki, tuáñra ezzon ore ezzone muhábbot goró. 18 “Zodi duniyai ye tuáñra re nafórot goré, monot raikkó de, ítara tuáñra re goríbar age Añré nafórot goijjé. 19 Zodi tuáñra duniyair óita, duniyai ye tuáñra re nizor ísafe muhábbot goittó; montor tuáñra zettót duniyair no aar Añí tuáñra re duniyai ttu basíloifélaiyi, hétolla beh duniyai ye tuáñra re nafórot goré. 20 Añí tuáñra re hoiyí de hotá gán monot raikkó de ki, ‘Gulam nizor girós or túaro ñoóñr no.’ Hétolla ítara zodi Añré zulúm goijjé de óile, tuáñra re yó zulúm goríbo; zodi ítara Añr hotá amól goijjé de óile, tuáñrar hotá yó amól goríbo. 21 Lekin ítara híin beggún tuáñra re Añr nam or zoriya beh goríbo, kiyólla-hoilé ítara Añré diferáye de íba re no siné. 22 Zodi Añí nu aítám aar ítara re hotá ókkol no hoitám, tooile ítara gunágar no ñóorito; montor yala de ítara ttu nizor guná lla honó bahána náí. 23 Añré nafórot goré de íte Añr Baf ore yó nafórot goré. 24 Zodi Añí ítarar hére ham uúin no goittám zín honókiye goijjé de náí, tooile ítara gunágar no ñóorito; montor yala toh ítara Añré edde Añr Baf ore

deikké aar nafórot óu goijjé. **25** Lekin héndilla etollá óiye, zeéne ítarar Córíyot ot leikká asé de hotá yían fura ó, ‘ítara Añré hánnak nafórot goijjé.’ **26** “Zeñtté Modotgár Ubá aibó zibá re Añí Baf or torfóttu tuáñrar hére diferáiyum, yáni sóiyir Ruh zibá Baf or torfóttu aiyé íba re, héñtte íba ye Añr baabute gobá díbo. **27** Aar tuáñra yó Añr baabute gobá díba, kiyólla-hoilé tuáñra toh Añr fúañti-fúañti foóila cúru ttu lóti asó.

16 “Añí tuáñra re hotá iín etollá hoiyí, zeéne tuáñra iman ottu no zoogói. **2** Maincé tuáñra re mujilíc-hána ttu neelaidibo; ói, eén októ aiyér, zee niki tuáñra re mariféle íte táaribo de, íte Allar hédmot gorér bóuli. **3** Ítara héndilla híin etollá goríbo, kiyólla-hoilé ítara no Baf ore sinné aar no Añré sinné. **4** Lekin híin Añí tuáñra re hoiyí de, zeéne híin or októ ailé tuáñra ttu monot uré de ki, Añí tuáñra re híin or baabute hoói ráikki. Añí tuáñra re foóila lóti híin nó hoói, kiyólla-hoilé Añí toh tuáñrar fúañti-fúañti accílám. **5** “Montor yala Añí Ubár hére zairgói zibá ye Añré diferáiyé, aar tuáñra honókiye Añr ttu fusár no gorór de, ‘Tuñí hořé zoórgoi dé?’ **6** Montor Añí tuáñra re iín hoiyí de hétolla, tuáñrar dil ferecaniye bórigiyoi. **7** Lekin Añí tuáñra re sóiyi hoóir, Añí tuáñrar fáida lla zairgói deh; kiyólla-hoilé zodi Añí no zaigói, hé Modotgár tuáñrar hañse nu aibó; montor Añí zailégoi, Añí íba re tuáñrar hañse diferáiyum. **8** Aar íba zeñtté aibó, duniyai re gunár, forhéggarir edde bisar or baabute hosúrbon tóoraibo. **9** Gunár baabute tóoraibo de kiyólla-hoilé, manúc ókkole Añr uore iman nú ané; **10** forhéggarir baabute tóoraibo de kiyólla-hoilé, Añí Baf or hére zairgói aar tuáñra Añré ar no dekába; **11** bisar or baabute tóoraibo de kiyólla-hoilé, duniyair sóddar or bisar óigiyoi. **12** “Añr ttu tuáñra re hoibár aró boóut kessú asé, montor yala tuáñra híin bordac gorí no faribá. **13** Lekin zeñtté Ubá, yáni sóiyir Ruh aibó, íba ye tuáñra re fura sóiyir rasta daháibo; kiyólla-hoilé íba ye toh Nizor torfóttu kessú hoibó de no, bólke zín fúne híin beh hoibó, aar zín óibo de asé híin tuáñra re zanaidibo. **14** Íba ye Añr gún looi tuáñra re zanaidibo; héndilla gorí íba ye Añr mohíma zahér goríbo. **15** Baf ottu zín asé híin beggún toh Añr; hétolla hoiyí de, íba ye Añr gún looi tuáñra re zanaidibo.” **16** “Hotún baade tuáñra Añré ar no dekába, aar abar hotún baade tuáñra Añré dekába.” **17** Hétolla íbar hoozzon cárite afós ot hoór de, “Íbá ye añára re iín kii hoór, ‘Hotún baade tuáñra Añré ar no dekába, aar abar hotún baade

tuáñra Añré dekába?’ Aró hoór de, ‘Kiyólla-hoilé Añí Baf or hére zairgói?’” **18** Ítara hoór de, “Íbá ye ziyán ‘Hotún or’ hotá hoór híyan kii? Añára no zani íbá ye kiyór hotá hoór.” **19** Isá ye zani faijjé de, ítara ttu íba re súwal goittó monehoór, hétolla íba ye ítara re hoór de, “Tuáñra afós ot Añr hotá yían or baabute howáhoi gorór de né, ziyán Añí hoiyí de, ‘Hotún baade tuáñra Añré ar no dekába, aar abar hotún baade tuáñra Añré dekába?’” **20** Añí tuáñra re sóiyi-sóiyi hoóir, tuáñra hañdíba edde bilak goríba, montor duniyai ye kúci goríbo. Tuáñra ferecan óiba, lekin tuáñrar ferecani kúcit bodolizaybói. **21** Zeñtté honó mayafua ye fua zormo deh héñtte toh duk faa, kiyólla-hoilé híbar duk faibar októ aiccé; montor zeñtté fua hálas óizagoi, duniyait eggwá fua foida óiye de kúciye hé duk ore ar monot no raké. **22** Héndilla, tuáñra yó yala ferecanit asó; montor tuáñra llói Añí abar miliyúm, héñtte tuáñrar dil kúci óibo, aar tuáñrar kúci re tuáñra ttu honókiye looi no felaibo. **23** Hé din tuáñra Añr ttu honó kessú fusár goríba de náí. Añí tuáñra re sóiyi-sóiyi hoóir, zodi tuáñra Añr name Baf ottu kessú mago, íba ye tuáñra re diibo. **24** Aijjó foiijjonto tuáñra Añr name kessú maiggó de náí. Mago, tuáñra faiba, zeéne tuáñrar kúci fura óizagoi. **25** “Hotá iín Añí tuáñra re meésal dí beh hoiyí, lekin eén októ aiyér, Añí tuáñra re meésal dí ar no hoiyúm, bólke sáf-sáf góri tuáñra re Baf or baabute hoiyúm. **26** Hé din tuáñra Añr name magibá; aar Añí tuáñra re eén no hoóir de, Añí Baf or hañse tuáñra lla aros goijjúm. **27** Baf Nize toh tuáñra re muhábbot goré, kiyólla-hoilé tuáñra Añré muhábbot goijjó aar biccác goijjó de, Añí Allar torfóttu aiccí deh. **28** Añí Baf or héntu aái e duniyait aiccí; abar Añí e duniyai eri Baf or hére zairgói.” **29** Hétunot íbar cárit tune hoór de, “Soó, yala Tuñí sáf-sáf góri hoór, honó meésal dí no. **30** Yala añára zani faijjí de, Tuñí hárr kessú zano, aar Tuáñr ttu honókiye súwal goríbar zorur náí; híyane añára biccác gorí de, Tuñí Allar torfóttu aiccó deh.” **31** Isá ye ítara re hoór de, “Tuáñra yala biccác goró né? **32** Soó, eén októ aiyér, becók aáigiyoi, tuáñra beggún dorbodor ói zar-zar zagat tee-tee zaibagói, aar Añré hálíga eribá. Toóu Añí hálíga no, kiyólla-hoilé Baf toh Añr fúañti asé. **33** “Añí tuáñra re hotá iín etollá hoiyí, zeéne tuáñra Añr bútoe cánti foo. Duniyait mazé tuáñra duk-mosibot ot tákiba; montor hímmot na háraiyo, Añí duniyai re ziti aiccí.”

17 Isá ye híin hoói baade asman or uzu saái hoór de, “Ó Baf, októ aáigiyoi. Tuáñr Fuar mohíma zahér goró, zeéne Fua ye yó Tuáñr mohíma zahér goré, **2** Kiyólla-hoilé Tuñí toh Íba re fura insán-zatir uore adíkar diiyó, zeéne Tuñí zetará re Íbar át ot diiyó, ítara beggún ore Íba ye ofúrani zindigi dee. (aiōnios g166) **3** Aar ofúrani zindigi óilde yíán, ítara zen Tuñí siríf sóiyi Alla re edde Tuñí diferáiyoi de Isá Mosih re zane. (aiōnios g166) **4** Tuñí Añré ze ham gorí bolla diiyó, híyan fúrai Añí e duniyait Tuáñr mohíma zahér gojií. **5** Aar yala, ó Baf, Tuñí zeṛé asó hére Añré mohímawala banaifélo, oh mohímaye ze mohíma duniyai foida goríbar age lóti Tuáñr fúañti Añr ttu accíl. **6** “Añí Tuáñr nam manúc uitarár hañse zahér gojií zetará re Tuñí duniyai ttu Añr át ot diiyó. Ítara toh Tuáñr accíl; Tuñí ítara re Añr át ot diiyó aar ítara Tuáñr hotá amól gojií. **7** Yala ítara zainné de, zedún Tuñí Añré diiyó, híin beggún Tuáñr torfóttu; **8** kiyólla-hoilé ze hotá Tuñí Añré hoitó hoiyó, Añí híin ítara re hoiyí, aar ítara híin kobul gojií. Ítara fakkafakki gori zainné de, Añí Tuáñr héntu aiccí deh, aar biccác gojií de, Añré Tuñí beh diferáiyoi. **9** “Añí ítara lla beh dua gorír. Añí duniyai lla dua gorír de no, bólke zetará re Tuñí Añr át ot diiyó ítara lla, kiyólla-hoilé ítara toh Tuáñr. **10** Ziín Añr híin beggún Tuáñr, aar ziín Tuáñr híin beggún Añr. Añr mohíma híin or duara zahér óiye. **11** Añí duniyait ar no tákiyum, montor ítara toh duniyait asé, aar Añí Tuáñr hére aázairgoi. Ó pak Baf, ze nam Tuñí Añré diiyó Tuáñr hé name Tuñí ítara re héfazot rakó, zeéne ítara undilla ek óizagoi zendilla Añára ek. **12** Añí zetókkal foijjonto ítarar fúañti accílám, Añí ítara re Tuáñr oh name héfazot raikkí, ziyán Tuñí Añré diiyó. Añí ítara re faára dí ráikki, aar ítara ttu honókiye borbad nó óiyo, siríf uite beh óiye zee niki borbad óibar accíl, zeéne pak-kalam fura ó. **13** “Lekin yala toh Añí Tuáñr hére aázairgoi, aar Añí duniyait tákite iín etollá hoóir, zeéne ítara ttu Añr kúci furafuri gori táke. **14** Añí ítarar hañse Tuáñr kalam foónsaiyi, aar duniyai ye ítara re nafórot gojií, kiyólla-hoilé zendilla Añí duniyair no, héndilla ítara yó toh duniyair no. **15** Añr dua endilla no de ki, Tuñí ítara re duniyai ttu loizogói, bólke Añr dua óilde, Tuñí ítara re Íbilíc ottu héfazot rakó. **16** Zendilla Añí duniyair no, héndilla ítara yó toh duniyair no. **17** Ítara re sóiyi lói pak-sáf goró. Tuáñr kalam óilde hé sóiyi. **18** Zendilla Tuñí Añré duniyait diferáiyoi, héndilla Añí yó ítara re duniyait diferáiyi. **19** Añí ítara lla Nizoré

háas gorí rakír, zeéne ítara re yó sóiyi lói háasgori raká zah. **20** “Añí siríf ítara lla dua gorír de no, bólke uitará lla yó gorír zetará ítarar hotá fúni Añr uore iman aníbo; **21** zeéne ítara beggún ek óizagoi, zendilla, ó Baf, Tuñí Añr bútoṛe asó, aar Añí Tuáñr bútoṛe así, héndilla ítara yó zen Añáṛar bútoṛe ó, zeéne duniyai ye biccác goré de, Añré Tuñí beh diferáiyoi. **22** Tuñí Añré ze mohíma diiyó híyan Añí ítara re yó diiyí, zeéne ítara undilla ek óizagoi zendilla Añára ek. **23** Añí ítarar bútoṛe así aar Tuñí Añr bútoṛe asó, zeéne ítara furafuri ek óizagoi, zeéne duniyai ye zane de, Añré Tuñí beh diferáiyoi, aar Tuñí ítara re undilla muhábbot gojií zendilla Añré muhábbot gojií. **24** “Ó Baf, Añí saí, zetará re Tuñí Añr át ot diiyó, ítara yó zen Añí zeṛé táki hére Añr fúañti táke, zeéne Tuñí Añré diiyó de Añr hé mohíma ítara deké, kiyólla-hoilé Tuñí toh Añré duniyair foidayecir age lóti muhábbot gojií. **25** “Ó insáf-wala Baf, duniyai ye toh Tuáñre no siné, montor Añí Tuáñre siní; aar ítará zainné de, Añré Tuñí beh diferáiyoi. **26** Añí ítarár hañse Tuáñr nam zahér gojií, aar híyan aró zahér gorát tákiyum, zeéne ze muhábbote Tuñí Añré muhábbot gojií hé muhábbot ítarár bútoṛe táke aar Añí ítarár bútoṛe táki.”

18 Isá ye hotá híin hoói baade, Nizor cárít tun ore looi Kídrón zúra farái okule giyyé. Hére ekkán bagan accíl, aar Íba edde Íbar cárít tun híyan ot góille. **2** Íba re dóridiye de Yohúdah ye yó hé zaga gán zainto, kiyólla-hoilé Isá egazá-egazá hére Nizor cárít tun lói militó. **3** Hétolla Yohúdah ye doónr imam ókkol ottu edde Féroci ókkol ottu ek dol Romi fóous edde hodún faáradar ókkol ore fúañti looi fánoc, uzal, edde átiyar ókkol lói hére aiccé. **4** Isá ye Íbar uore ziín óibo híin beggún zane ísafe, baáre neeli ítara ttu fusár gorér de, “Tuáñra haré tuwoór dé?” **5** Ítara Íba re zuwab der de, “Isá Nasári re.” Isá ye ítara re hoór de, “Añí Íba.” Íba re dórider de Yohúdah yó ítarar fúañti tíyai asé. **6** Zeñtí Isá ye ítara re yíán hoiyé, “Añí Íba,” hétunot ítara fissá zai merit forigiyói. **7** Íba ye ítara ttu abar fusár gorér de, “Tuáñra haré tuwoór dé?” Ítara hoór de, “Isá Nasári re.” **8** Isá ye zuwab der de, “Añí Íba de híyan toh tuáñra re hoóifelaiyi. Hétolla zodi tuáñra Añré tuwoór de óile, tóoile ítará zoggói.” **9** Híyan etollá óiye, zeéne Íba ye hoóil de e hotá fura ó, “Zetará re Tuñí Añr át ot diiyó, Añí ítara ttu ezzon ore úddwa nó áñzai.” **10** Sáimon Fitor ottu ekkán toluwar accíl ísafe,

yóggwa ye híyan neelai boro imam or gulam or uore solai ítar den dák or han nán harífelaiye. Hé gulam mwar nam Malkus. **11** Hétolla Isá ye Fitor ore hoór de, “Toluwar ďaf ot gólai er. Ze fiyala Bafe Añré diiyé, Añí hé fiyala no fiítam né?” **12** Tói hé fóous suné, ítarar zonnale, edde Yohúdir faáradar gúne Isá re gereftar gorí bañdífelaiye. **13** Baade íba re age Hánan or hére loigiyé, kiyólla-hoilé ze Káiyafas hé bosór boro imam accíl, yóggwar hóour óilde Hánan. **14** Hé Káiyafas óilde ubá zee niki Yohúdi ókkol ore mocuwara dyíl de, beétor óilde fura koun olla ekzon manúc moron. **15** Sáimon Fitor edde ar ezzon cárit Isár kure-kure zaat accíl. Hé cárit twa re boro imame sínito ísafe, yóggwa Isár fuñde-fuñde boro imam or urán ot goíllegoi, **16** lekin Fitor baáre duwar ot tíyai táikkil. Hétolla ze cárit twa re boro imame sínito, yóggwa ye baáre neeli duwar sooñidar gwá re hoói Fitor ore búture ainné. **17** Duwar sooñidar bañdi mayafua wa ye Fitor ore hoór de, “Tuñi yó hóno e Manúc cwar cárit ottu né?” Yóggwa ye zuwab der de, “Añi no.” **18** Héñtte cítkhal de hétolla gulam ókkole edde faáradar ókkole aañra loi ooin dórai fñyot tíyai ooin fuwát accíl; aar Fitor nize yó ítarar fúañti tíyai ooin fuwát accíl. **19** Héñtte boro imame Isá ttu íbar ummot ókkol or edde íbar taalim or baabute súwal gorér. **20** Isá ye yóggwa re zuwab der de, “Añi duniyair hañse kúlamela góri hotá hoiyi. Añi hámica mujilíc-hána ókkol ot edde baitul-mukaddos ot zeré tamám Yohúdi ókkol zoma ó hére taalim diyí, aar Añi toh lukai kessú hoiyi de náí. **21** Tuñi Añr ttu kiyá fusár gorór? Fúinne de ítara ttu fusár goróna Añi ítara re kii hoiyi. Becók Añi ziín hoiyi híin ítara zane.” **22** Isá ye híin hoiyé rár, hére ďáke tíyai accíl de faáradar ottu ezzone íba re suwar mari hoór de, “Boro imam ore héndilla góri zuwab dede niki?” **23** Isá ye ítare zuwab der de, “Zodi Añi honó gollot hoiyi de óile, gollot híyan daháide; montor zodi sóiyi hoiyi de óile, Añré marór kiyá?” **24** Baade Hánane Isá re baindá hálote, boro imam Káiyafas or hére diferáidiye. **25** Sáimon Fitor aijjó foijjonto tíyai ooin fuwát accíl. Maincé yóggwa re hoór de, “Tuñi yó hóno íbar cárit tun or bútottu né?” Yóggwa ye inkar gorí hoór de, “Añi no.” **26** Boro imam or gulam ottu ezzon zee niki Fitore han harífelail de ítar egana, íte hoór de, “Añi toré íbar fúañti bagan ot nó deki niki?” **27** Fitore abar inkar goijjíl; aar éhon-éhon ratakurá bak diyé. **28** Yárbaade Yohúdir neta ókkole Isá re Káiyafas or héntu Romi razmohól ot loigiyé, héñtte

biínna sóore accíl. Ítara nize hé mohól ot nó góle, zeéne ítara nafak ói no zagói, bólke Azadir-id or hána hái fare. **29** Hétolla Filat baáre neeli ítarar hére aiccé aar hoór de, “Tuáñra e Manúc cwar ulďa kii hosúri ainnó dé?” **30** Ítara yóggwa re zuwabe hoór de, “Zodi íba acámi no óito, aañra íba re tuáñr hañse gosái no ditam.” **31** Filate ítara re hoór de, “Tuáñra íba re loizai tuáñrar córiyot mozin bisar gorógoi.” Hé Yohúdi gúne yóggwa re hoór de, “Añára ttu honókiyo re zane marifélaibar ezazot náí.” **32** Híyan etollá óiye, zeéne Isár oh hotá fura ó, ziyán íba ye íba hondilla mora moribó de híyan or icáraye hoóil. **33** Tarfore Filat abar razmohól or búture goílle, aar Isá re matai hoór de, “Tuñi Yohúdir Baáñcca niki?” **34** Isá ye yóggwa re zuwab der de, “Tuñi hotá yíán nizor torfóttu hoór de né, náki ar honókiye tuáñre Añr baabute hoiyé dé?” **35** Filate zuwab der de, “Añi Yohúdi níki? Tuáñr nizor koume edde doónr imam múné éna Tuáñre añr hañse gosáidiye. Tuñi kii goijjó dé?” **36** Isá ye zuwab der de, “Añr raijjo e duniyair no. Zodi Añr raijjo e duniyair óito, Añr gulam ókkole maramari goittó, zeéne Añré Yohúdi ókkol or hañse gosáidiya no zah. Montor Añr raijjo toh eríyar no.” **37** Híyan olla Filate íba re hoór de, “Tóoile Tuñi baáñcca níki?” Isá ye zuwab der de, “Tuñi sóiyi hoór, Añi baáñcca. Aní etollá zormo óiyi aar etollá duniyait aiccí, kiyólla-hoilé: sóiyir uzu gobá dí bolla. Zee niki sóiyir, yóggwa ye Añr hotá fúne.” **38** Filate Isá re hoór de, “Sóiyi kii?” Híyan hoói baade yóggwa abar baáre neeli Yohúdi gún or hére aiccé, aar ítara re hoór de, “Añi íba ttu honó hosúri no fair. **39** “Lekin tuáñra ttu toh ekkán niyom asé, ki hoilé, Azadir-id or októť añr ttu tuáñrar hañse honó ek hodi re hálás gorídiyar zorur. Hétolla tuáñra ttu añré Yohúdir Baáñcca wa re hálás gorídiya baitó monehoór né?” **40** Hétunot ítara beggúne abar guzori hoór de, “Hé Manúc cwa re no, bólke Bárabba re!” Hé Bárabba ézzon bagi accíl.

19 Baade Filate Isá re loizai soónk mara baáil. **2** Aar fóous ókkole keñrar eggwá tas banai íbar matát diyaidil, aar íba re bayoinna rong or eggwá zubba fiñdáidil. **3** Tarfore ítara íbar hañse aái-aái hoór de, “Ó Yohúdir Baáñcca, márhaba!” Héen hoói-hoói ítara íba re suwar maijjé. **4** Filat abar baáre neeli aái Yohúdi gún ore hoór de, “Soó, aái íba re baáre tuáñrar hañse anáir, zeéne tuáñra zano de, aái íba ttu honó hosúri no fair.” **5** Tarfore keñrar tas edde bayoinna rong or zubba findá hálote Isá baáre aiccé. Aar Filate ítara

re hoór de, “Soó hé Manúc cwa!” **6** Zeñtté doónir imam múne edde faáradar gúne Íba re deikké, ítara guzori-guzori hoór de, “Kúruc ot dífelo, Íbá re kúruc ot dífelo!” Filate ítara re hoór de, “Añí toh Íbá ttu honó hosúri no fair, hétolla Íbá re tuáñra loizai kúruc ot dógoi.” **7** Yohúdi gúne yóggwa re zuwab der de, “Añára ttu ekkán córiyot asé, aar hé córiyot mozin Íbá ttu morar zorur, kiyólla-hoilé Íbá ye Nizoré Nize Allar Fua dabi goijjé.” **8** Zeñtté Filate hotá híyan fúinne, yóggwa aró dooraigiyoí, **9** aar razmohól or bútoare abar góli Isá re hoór de, “Tuñí hořiyar?” Montor Isá ye yóggwa re honó zuwab nó déh. **10** Hétolla Filate Íba re hoór de, “Tuñí añr llóí hotá no hoibá níki? Tuñí kí no zano, añr ttu Tuáñre eridibar óu kémota asé deh, aar kúruc ot díbar óu kémota asé dé?” **11** Isá ye yóggwa re zuwab der de, “Zodi tuáñre uottú kémota diya no zayto, tooile Añr uore tuáñr honó kémota no tákito. Hétolla zee niki Añré tuáñr hañse gosáidiye ítar guná aró doónir.” **12** Hé októť lóti Filate Isá re eridibar kucíc goijjíl, montor Yohúdi gúne guzori-guzori howát accíl de, “Tuñí zodi e Manúc cwa re erido, tooile tuñí Káisar or dustó no. Zee niki nizoré nize baáñcca dabi goré, íte toh Káisar or duccon.” **13** Hétolla, zeñtté Filate híyan fúinne, yóggwa ye Isá re baäre ainné, baade ze zaga gán ore Fattór-or-Uřán hoó, aar Hibrú zuban ot Gabbata bouli hoó, híyan ot bisar or toktót boiccé. **14** Hé din nwá accíl Azadirid or toiyarir din, aar héñtte din or duúñijja ánik óiye. Filate Yohúdi gún ore hoór de, “Soó, tuáñrar Baáñcca!” **15** Montor ítara guzori-guzori hoór de, “Dur goró, dur goró, Íbá re kúruc ot dífelo!” Filate ítara ttu fusár gorér de, “Tuáñrar Baáñcca re añ kúruc ot dífelaitam?” Doónir imam ókkole zuwab der de, “Añára ttu Káisar bade ar honó baáñcca náí.” **16** Tóí kúruc ot dí marifélai bolla Filate Isá re ítarar hañse gosáidiye. Baade ítara Isá re loigiyégoi. **17** Isá ye Nizor kúruc Nize hañd ot looi baäre Matár-Mala hoó de zaga foijjonto loigiyé, ziyán ore Hibrú zuban ot Golgota bouli hoó. **18** Héře ítara Íba re edde Íbar fúañti ar dui zon manúc ore kúruc ot díye, ezzon ore ek kultú ek kultú, aar Isá re mazé. **19** Filate ekkán sáainbút óu lekí Isár kúruc ot maridíl. Híyan ot leikkíl de: Isá Nasári, Yohúdi ókkol or Baáñcca. **20** Boút Yohúdi ókkole hé sáainbút tán foijjíl, kiyólla-hoilé ze zaga gán ot Isá re kúruc ot díyl híyan cóor or dáke; aar sáainbút tán Hibrú, Girík edde Letín zuban ot leikkíl. **21** Híyan dekí Yohúdir doónir imam múne Filat ore hoiyé de, “Yohúdi ókkol

or Baáñcca’ no lekíyo, bólke endilla lekó, ‘Íbá ye hoitó de, Añí óilam de Yohúdi ókkol or Baáñcca.” **22** Filate zuwab diyé de, “Añí leikkí de híyan añí leikkí.” **23** Fóous ókkole Isá re kúruc ot dí baade, ítara Íbar uoror hoor kúli looi sair bák goijjé, ek fóous olla ek bák or dóre; ítara Íbar zubba wa yó loiyé. Hé zubba wa honó zuradiya sára, aar uottú lóti nise foijjonto ek hoor. **24** Ítara ezzon ore ezzone hoór de, “Añára e zubba wa no fáři, bólke lořári mari saái yibá har héře fore.” Híyan etollá óiye, zeéne pak-kalam or yán fura ó, “Ítarar bútoare añr hoor ore borat goijjé, aar ítara añr hoor olla lořári maijjé.” Fóous súne héndilla híin hétolla goijjé deh. **25** Isár kúruc or dáke Íbar maa, Íbar maar bóin, aar Klopas or bou Moriyam edde Moriyam Makdálini tíyai accíl. **26** Zeñtté Isá ye Nizor maa re edde Nize ador goittó de carit twa re dáke tíyaiya deikké, Íba ye maa re hoór de, “Ó maa, soó tuáñr fua óilde íbá.” **27** Baade hé carit twa re hoór de, “Soó, tuáñr maa óilde íbáh.” Héñtte lóti hé carit twa ye híba re yóggwar nizor gór ot loigílgoi. **28** Yárbaade, Isá ye hárr kessú goijjá óigiyoí de híyan hoi fari, pak-kalam fura ói bolla hoór de, “Añr ttu tirác laiggé.” **29** Hé zagat eggwá sírkar tára buágaraiya accíl; ítara híbat ekkán esfónj burai yore híso-p-gas or eggwá déeilar matát bazáidi Isár gal ot diiyé. **30** Zeñtté Isá ttu hé sírka háiya óiye, Íba ye hoór de, “Goijjá óigiyoí.” Tarfore matá re hémmikka gorí Íbar foran dífélaiye. **31** Hé din nwá zettót ebaadot-or-din or toiyarir din accíl, ebaadot-or-din kúruc ot honó lac no táke fán Yohúdi ókkole Filat ore aros goijjé de, zetará kúruc ot asé ítarar téng gún báñgidi ítarar lac lamaifélai bolla, kiyólla-hoilé ebaadot-or-din nwá háas accíl. **32** Tóí fóous ókkol aái, Isár fúañti kúruc ot díya gíyl de ítarar téng gún báñgidil, age ezzon or, baade ar ezzon or. **33** Lekin zeñtté ítara Isár íñyot aái Íba morigiyóí de deikké, ítara Íbar téng nó báñge. **34** Montor eggwá fóouse Isár gaar dák bay sél maijjé, aar éhon héntu lou edde faní neeliaicfél. **35** Nizor suké deikké de yóggwa ye beh híyan gobá díye, aar yóggwar gobá sóiyi; yóggwa ye zane de yóggwa sóiyi gán hoór de, zeéne tuáñra yó ekin goró. **36** Híin etollá óiye, zeéne pak-kalam or yán fura ó, “Íbar ekkán ańđđi úddwa báñga no zaybo.” **37** Pak-kalam ot yán óu asé, “Ítara zibá re gañitté Íbar híkka ítara saái tákibo.” **38** Híin baade, Aramátíya cóor or Yusúfe Isár lac loizaitóí Filat ottu ezazot maiggíl. Yusúf accíl de Isár ézzon lukaiya ummot, kiyólla-hoilé yóggwa ye Yohúdir neta ókkol

ore dooraitó. Filat or ezazot fai yore yóggwa aái Isár lac loigiyégoi. **39** Fúañti Nikódemas zee niki age raitta Isár hére giíl, yóggwa yó aiccé; yóggwa ye mur añtor edde alóh-gas miyái banaiya tiríc tin cér ánik kúcbor guri ainníl. **40** Tarfore ítara Isár lac cwa loizai kúcbo gún dii fúañtar hoor lói hohón solaiyé, zendilla Yohúdi ókkol ottu dohón gorár niyom asé. **41** Ze zagat Isá re kúruc ot díyl hére ekkán bagan accíl, aar hé bagan ot eggwá noya hobor accíl, zibát honódin honókiyo re dohón goráil de náí. **42** Hé din nwá Yohúdir ebaadot-or-din or toiyarir din ísafe, hé hobor gwá zettót dake, ítara Isá re yíbat dohón gorífelaiye.

20 Háftar foóila din fózor októt andár tákite, Moriyam Makdálíni hobor gwat giyé, aar deikké de, hobor or muk ottu cíl lan larífelaiya. **2** Hétunot híba duñri Sáimon Fitor edde oinno cárit zibá re Isá ye muhábbot goittó, ítara hére giyé, zai ítara re hoór de, “Maincé Malik ore hobor ottu loigiyégoi; ítara íba re hoře eijjégoi añára no zani.” **3** Hétunot Fitor edde hé oinno cárit twa neeli hobor ot zaat doijje. **4** Ítara duní zon ekku fúañti duñrat accíl, montor oinno cárit twa Fitor ore bárai zai hobor ot age foónicce. **5** Yóggwa ye niyúri bútormíkka saiye rár, hohón or hoor gún asé de deikké, montor yóggwa bútoe nó zah. **6** Tarfore Sáimon Fitor óu yóggwar fisé-fisé aái foónicce, aar hobor gwar bútoe góille; yóggwa ye yó hohón or hoor gún asé de deikké, **7** aar ze hoor gán Isár matát beráidil híyan hohón or hoor or fúañti náí, bólke alok gori ekkán ot boiṭṭa. **8** Hétunot ze oinno cárit twa hobor ot age foónicil, yóggwa yó bútoe góille, aar deki biccác goijjíl. **9** Kiyólla-hoilé hétun foijjonto toh ítara Isá ttu mora ttu zinda ówar zorur de pak-kalam or hé hotá nó buzé. **10** Tarfore hé cárit tun nizor gór ot waafes giyégoi. **11** Lekin Moriyam hobor or baárkule tíyai hañdat accíl; híba hañdi-hañdi niyúri hobor gwar bútormíkka saiye, **12** aar deikké de, Isár lac ziyóñt raká gíyl híyoñt dóla hoor findá duwá fírista boói táikke, eggwá cítan ottu, ar eggwá foitán ottu. **13** Híine híba re hoór de, “Ó Mayafua, tui hañdoór kiyá?” Híba ye híin ore hoór de, “Maincé añr Malik ore loigiyégoi; ítara íba re hoře eijjégoi añí no zani.” **14** Híyan hoói baade híba ye fissá fíri deké de, Isá tíyaiya; montor íba Isá de híyan híba ye nó siné. **15** Isá ye híba re hoór de, “Ó mayafua, tui hañdoór kiyá? Tui haré tuwoór dé?” Moriyame Isá re bagan sóonloya bouli ṭáari íba re hoór de, “Jonáb, íba re zodi

tuñí loigiyó de óile, íba re hoře eijjégoi de añré hoó, añí íba re loizayúmboi.” **16** Isá ye híba re hoór de, “Moriyam!” Moriyame fíri Hibrú zubane íba re hoór de, “Rabbúni!” ziyán or maáni, Ustat. **17** Isá ye híba re hoór de, “Añré dóri no rakíc, kiyólla-hoilé Añí toh aijjó uore Baf or hére nó zaigói; bólke Añr báiyain nún or hére zai hoógoi de, ‘Zibá Añr edde tuáñrar Baf, zibá Añr edde tuáñrar Alla, Añí uore íbar hére beh zairgói.’” **18** Tói Moriyam Makdálíni aái cárit tun ore zanaiyé de, híba ye Malik ore deikké, aar híba re hotá híin íba ye hoiyé deh. **19** Hé din or, yáni háftar foóila din or háñzinna, zeñtté Yohúdi ókkol or doore cárit tun zeře zoma ói táikke hériyar duwar ókkol bañdá accíl, Isá aái ítara mazé tíyaiye, aar ítara re hoór de, “Assalamu alaikum.” **20** Híyan hoói baade, íba ye ítara re íbar duní át edde íbar gaar dák daháye. Cárit tune Malik ore deki bicí kúci óiye. **21** Isá ye ítara re abar hoór de, “Assalamu alaikum. Bafe zendilla Añré difeṛáye, héndilla Añí yó tuáñra re difeṛáir.” **22** Híyan hoói, íba ye ítara uore fúu dí hoór de, “Pak-Ruh loo. **23** Tuáñra zetarár guná maf goríba, ítara guná maf óibo; aar zetarár guná maf no goríba, ítara guná maf no óibo.” **24** Montor Tómas, zibá baró zon cárit tun ottu ezzon, zibá re Zooñikka dake, yóggwa Isá aiccíl de héñtte ítara fúañti nu accíl. **25** Hétolla oinno cárit tune yóggwa re hoór de, “Añára Malik ore deikkí.” Montor yóggwa ye ítara re hoór de, “Zetún añí íbar duní át ot zoloir dak nó deki aar zoloir zaga híyan ot añr ooñl gólai nó dí edde íbar dák ot añr át gólai dí nó saái, hétun añí biccác no goijjúm.” **26** Yár añcto din baade, íbar cárit tun abar gór or bútoe zoma óiye, aar Tómas óu ítara fúañti accíl. Duwar ókkol bañdá de óile yo, Isá aái ítara mazé tíyaiye, aar hoór de, “Assalamu alaikum.” **27** Baade íba ye Tómas ore hoór de, “Tor ooñl eře an, aar Añr át saá; tor át Añr dák ot gólaide. Nabiccác no goríc, bólke biccác gór.” **28** Tómasé zuwabe íba re hoór de, “Ó añr Malik, añr Alla!” **29** Isá ye yóggwa re hoór de, “Tómas, tui toh Añré deikkós de hétolla éna iman ainnós. Mubarek uitará zetará Añré no deki ye toóu iman ané.” **30** Becók, Isá ye Nizor cárit tun or muuntu aró boóut keramot ókkol goijjíl, ziín ore e síyarat leká nó zah; **31** montor iín ore etollá leká gíyeh zeéne tuáñra iman anó de, Isá óilde Mosih, Allar Fua; aar héndilla iman aní tuáñra zen íbar name zindigi hásil goró.

21 Yárbaade, Tibiriyas Ðíír hañsat Isá ye abar Nizoré cárit tun or hañse dahádiye. Íba ye Nizoré dahádiye de endilla gori: **2** Sáimon Fitor, Zooñikka ñake de Tómas, Galil or Kána farar Natanel, Zebedair fuain, edde Íbar ar dui zon cárit ekkán ot accíl. **3** Sáimon Fitore ítara re hoór de, “Añí mas saitó zair.” Ítara íba re hoór de, “Tuáñr fúañti añára yó zaiyum.” Tói ítara neeli zai noow ot uiñtégoyi, montor hé raitta ítara honó mas nó faa. **4** Biínna zeñtté fózor fářer, Isá aái ñíír hañsat tíyai táikke, montor cárit tune Íba Isá de nó siné. **5** Isá ye ítara re hoór de, “Fuain, hái bolla honó mas faiyó né?” Ítara zuwab der de, “Nó fai.” **6** Íba ye ítara re hoór de, “Noowr den ñák ottu zal félo, kessú mas faiba.” Tói ítara zal félaiye, aar bicí mas foijjé de hétolla ítara zal lan ar řani tulí no farer. **7** Hétolla, Isá ye muhábbot goittó de cárit twa ye Fitor ore hoór de, “Íbá toh Malik!” Sáimon Fitore Íba Malik de híyan fúinne rár, nizor gaar uoror hoor gán berái fanít záp maijjé. Íba ye híyan ham gorí bolla kúli eijjíl deh. **8** Ítara kul ottu bicí duré nu accíl, siríf dui cót át ánik beh duré, hétolla oinno cárit tune mas furaiya zal lan řani-řani hé gura noow gán ot góri kul ot aiccé. **9** Tarfore zeñtté ítara kul or uore laimmé, deikké de, eggwá ooin or hoilar řal, yíbar uore mas edde ruři asé. **10** Isá ye ítara re hoór de, “Ehón dóijjo de héntu hooggwá mas anó.” **11** Tói Sáimon Fitore noow ot urí zal lan řani kul or uore ainné. Zal lan ek cóo fonzaic tin nwá ñoóñr mase furaiya, montor hédun de óile yo zal lan nó fáře. **12** Isá ye ítara re hoór de, “Aiyó, hána hóogai.” Cárit ítara honó ezzon ottu hímmote nó dede Íba ttu fusár goittó, “Tuñí hon?” Kiyólla-hoilé ítara Íba Malik de híyan zainto. **13** Baade Isá aái, ruři looi ítara re diiyé, héndilla, mas óu diiyé. **14** Isá re mora ttu zinda gorázai baade Íba ye cárit tun or hañse Nizoré dahá ñýl de ebar óilde tisárabar. **15** Aar zeñtté ítara ttu hána háiya óiye, Isá ye Sáimon Fitor ore hoór de, “Yohánnar fua Sáimon, tui Añré itarár túaro muhábbot gorós né?” Íba ye hoór de, “Ói, Malik; Tuñí toh zano, añí Tuáñre ador gorí.” Isá ye íba re hoór de, “Tóoile Añr bérasóol-or-sóo gún sora.” **16** Isá ye íba re dusárabar hoór de, “Yohánnar fua Sáimon, tui Añré muhábbot gorós né?” Íba ye hoór de, “Ói, Malik; Tuñí toh zano, añí Tuáñre ador gorí.” Isá ye íba re hoór de, “Tóoile Añr bérasóol lun ore saásita gór.” **17** Isá ye íba re tisárabar hoór de, “Yohánnar fua Sáimon, tui Añré ador gorós né?” Fitor ebar guccá óigiyoi, kiyólla-hoilé Íba ye e tisárabar óu fusár goijjé de, “Tui

Añré ador gorós né?” Fitore Íba re hoór de, “Malik, Tuñí toh hárr kessú zano; Tuñí zano añí Tuáñre ador gorí deh.” Isá ye íba re hoór de, “Añr bérasóol lun sora. **18** Añí toré sóiyi-sóiyi hoóir, zeñtté tui juwan acclí, héntte toh tui nizor keeñil bañdí zere monehoó hère zaiti; montor zeñtté tui burá óibi, héntte tui tor át řani dibi, aar oinno zone tor keeñil bañdí tor ttu zere mone no hoó hère toré loizaibó.” **19** Allar mohíma zahér ói bolla Fitor hondilla moote moribó de híyan buzái bolla beh Isá ye hé hotá hoiyé. Híyan hoói baade Isá ye íba re hoór de, “Añr fuñde-fuñde ai.” **20** Fitore fissá řiri dekér de, Isá ye muhábbot goré de cárit twa fuñde-fuñde aiyér, yóggwa óilde ubá zee niki hána háibarcot Isár gaat élandi fusár goijjíl de, “Malik, Tuáñre dóridibo de íba hon?” **21** Yóggwa re dekí Fitore Isá re hoór de, “Malik, manúc ubár hálót kii óibo?” **22** Isá ye Fitor ore hoór de, “Zodi Añr ttu monehoó, Añí waafes nú aiyí foijjonto íba basi tákouk, tóoile híyan tor loi kii bazá? Tui Añr fuñde-fuñde ai.” **23** Hétolla bóuli imandár báiyain dor bútoře fóligiyoi de, hé cárit twa no moribó. Lekin Isá ye yóggwa no moribó bóuli nó hoó, bólke siríf hoiyé de, “Zodi Añr ttu monehoó, Añí waafes nú aiyí foijjonto íba basi tákouk, tóoile híyan tor loi kii bazá?” **24** Hé cárit twa óilde íbá zee niki edún iín beggún or gobá der, edde iín leikké. Añára zani, yóggwar gobá sóiyi. **25** Isá ye aró boóut kessú goijjé de asé, zodi híin ore ekkán-ekkán góri leká zayto, tóoile añr kíyal mozin, odún kitab leká zayto, ziín fura duniyait úddwa nu añřitó.

Hamól

1 Ó jonáb Tiyoffilas, añr agor kitab ot añi uúin beggún or baabute beh leikkí, zín Isá ye cúru ttu lóti goijjíl edde taalim dyíl, 2 oh din foijjonto ze din íba re asman ot tulífela gíyeh. Zaibar age íba ye Nizor basíloiya sáhabi gún ore Pak-Ruhr duara hédaiyot ókkol diíl. 3 Íba ye duk fai baade ítarar hañse Nizoré zahér goijjíl, aar íba zinda asé de híyan biccác gorá zah de héndilla boóut sábut ókkol diíl. Íba ye ítara re salic din foijjonto dahá dídi Allar raijor baabute howát accíl. 4 Ítarar fúañti tákite, íba ye ítara re e hókum man dyíl, “Tuáñra Jerúsalem sári no zaiyogói, bólke Baf or waada goijjá hádiyar entezar goró, ziyán or baabute tuáñra Añr ttu fúinno. 5 Kiyólla-hoilé Yaháya ye toh fanít éna báptisma díye, montor yaar hooddin or búture tuáñra re Pak-Ruh lói báptisma díya zaybo.” 6 Hétolla zeñtté ítara ekkán ot zoma óiye, ítara Isá ttu fusár gorér de, “Malik, Tuñí e óktót Boni Isráil ore raijjo waafes loidiba niki?” 7 Íba ye ítara re zuwab der de, “Ze óktó edde tarík Bafe Nizor adíkare fík gorí raikké, híin zanon tuáñrar ham no. 8 Montor zeñtté tuáñrar uore Pak-Ruh aibó, tuáñra bol faiba; aar Jerúsalem ot, Yohúdiyar edde Samáriar agagurat, edde duniyair céc matá foijjonto tuáñra Añr gobá óiba.” 9 Híin hoói baade, ítarar suk or muúntu íba re tulífela gíyeh, aar ekkán miyúla ye íba re ítarar nozor ottu argwal gorífelaiye. 10 Íba zaargói de híyala ítara asman or uzu suk lagaidi saái táikke de óktót, asimbit dui zon dóla hoor findá manúc ítarar dák ottu tíyaiye, 11 aar hoór de, “Ó Galil or manúc ókkol, tuáñra tíyai asman or uzu kiyá saái táikko? E Isá, zibá re tuáñrar hañsóttu asman ot tulífela gíyeh, íba zendilla gori asman ot zaargói de deikkó héndilla góri waafes aibó.” 12 Yárbaade, sáhabi gún Zaitun Faár hoó de yíba ttu Jerúsalem ot waafes giiyégoi. Hé faár gwá cóor ottu tokoriban adá mail duré accíl. 13 Ítara cóor ot foónsi uoror țalar kamárat giiyé, zeřé ítara tákito. Ítara óilde: Fitor, Yohánna, Yakub, Enderiyas, Filíp, Tómas, Bartólomiyo, Moti, Alfáiyas or fua Yakub, Sáimon zibá ézzon Zélot, edde Yakub or fua Yohúdah. 14 Ítara beggúne Isár maa Moriyam, oinno hoozzon mayafuain, edde Isár báiyain dor fúañti ek mone nitti dua goittó. 15 Hé din ókkol ot zeñtté tokoriban ek-có kuri zon imandár zoma óiye, Fitor urí ítara re hoór de, 16 “Báiboináin ókkol, Isá re gereftar-goróya ókkol or foñt daháidoya accíl de Yohúdahr baabute Pak-Ruh

ye Dawud or duara hoóil de pak-kalam or hotá híin fura ówar zorur accíl. 17 Kiyólla-hoilé íte toh añárar ǵaái or accíl, aar íte e ham goríbar híssa faáil.” 18 Manúc íte nizor kuham or dam loi ekkán zobin kinné, aar hére íte matá hémmikka góri fori ítar feř fári yore ańtigíla beggún neeligiyói. 19 Híyan Jerúsalem or manúc beggúne fúinne, hétolla zaga híyan ore ítarar zuban ot Akeldama nam diyé, ziyán or maáni óilde, Lou wor Zobin. 20 Fitore hotá howá zari raikkíl, “Híyan or baabute Zobur Córif ot endilla leikká asé, ‘Ítar bíra háli óizoggoi, honókiye híyan ot no tákouk.’ Aró leikká asé, ‘Ítar zimmadari ar ezzone loifelouk.’ 21 Hétolla, añára ttu ar ezzon manúc ore gobá ísafe basílowar zorur. Íba endilla manúc ottu ówa foribó zetará hárr óktót añárar fúañti-fúañti sofór gorát accíl, oñtté zeñtté Malik Isá añárar fúañti accíl. 22 Yáni zetará Yaháyar báptisma ttu lóti cúru gorí Isá re añárar hañsóttu tulífela gíyeh de óktó foijjonto accíl, ítara ttu ekzon manúc añárar fúañti gobá bona foribó, Isá mora ttu zinda óiye de híyan or gobá dí bolla.” 23 Tói ítara dui zon manúc or baabute mocuwara diyé, ezzon óilde Yusúf, zibá re Barsába ǵake, íba re Yustus óu ǵakitó; aar ar ezzon óilde Mattíyas. 24 Baade ítara dua gorér de, “Ó Malik, Tuñí toh hárr ekzon or dil zano. Tuñí añára re dahó, Tuñí ítará dui zon ottu haré basíloiyó, 25 zeéne yóggwa ye sáhabiham gorí fare, ze ham Yohúdah ye eri zaga waán ot giiyégoi ziyán ot íte zaibar laayek accíl.” 26 Baade ítara tará lla lořári maijjé rár, Mattíyas or name lořári foijjíl; tói yóggwa re egaro zon sáhabi gún ot cámil gorá gíyeh.

2 Zeñtté Penťikos id or din aiccé, ítara beggún ek zagat zoma accíl. 2 Aar asimbit asman ottu ǵoóñr tuwán or ǵóilla góri eggwá abas aiccé, aar ítara ze gór ot boiřá accíl híyan hé abase bórigiyégoi. 3 Ítara ooin or zilhar ǵóilla kessú deikké, ziyán zir or súrot. Híyan bák-bák ói ítara fottí ekzon or uore boicccé. 4 Ítara beggún Pak-Ruh lói furaiya óiye, aar hé Ruhr diiya toóufike alok-alok zubane hotá howát doijje. 5 Héñtte duniyair hárr dec or dindár Yohúdi ókkol Jerúsalem ot tákito. 6 Zeñtté hé abas swá fúna gíyeh, manúc ókkol ekkán ot zoma óigiyoi, aar tarár nizor-nizor zubane imandár ókkole hotá hoór de fúni, tará buddí háraiya óigilgoi. 7 Tará ammuć edde taajup ói hoór de, “Soó, hotá hoór de ítara beggún Galil or manúc de nó né? 8 Tói añára fottíkiye kiyá ítara añárar maayi zubane hotá hoór de fúnir? 9 Añára toh

Partiyi, Mediyi, edde Elami ókkol, aar Mesopótomiya, Yohúdiyar, Kappadókiyar, Pontus or, edde Ecíyar bácin da ókkol, **10** aró, Fergiyar, Pampúliyar, Ijíp or, edde Kurenir ďákór Lífbiyar atehańsór bácin da ókkol. Aar Rom ottu yó hodún así. **11** Eřé Yohúdi ókkol óu asé aar Yohúdir dórmot faráye de Beyohúdi ókkol óu asé. Héndilla, Kereti edde Arob koum óu asé. Ańára beggúne de ítara ańárar nizor-nizor zubane Allar bicí ďoóńr-ďoóńr harhána ókkol or baabute hoór de fúnir! **12** Tará beggún ammúk edde buddí háraiya ói ezzon ore ezzone hoór de, “Ín kiyólla óitofare?” **13** Montor hodúne técerai hoór de, “Ítará córab hái ńuúl óigiyoi deh!” **14** Montor Fitore baki egaro zon sáhabi gún lói ńíyai guzori-guzori manúc ókkol ore boiyan gorér de, “Ó Yohúdiyar manúc edde Jerúsalem ot táko de tamám manúc ókkol, híyan ańi tuáńra re buzái dńh; ańr hotá gún díyan dí fúno. **15** Tuáńra ńáaror de héndilla itará nicá hái ńuúl óiye de no, kiyólla-hoilé aijjó toh bíńnar now wa éna baijje. **16** Bólke yían óilde waán, ziyán nobi Yoél or áta howá gýl, ki hoilé **17** ‘Alla ye fórmár de, Ańi ahéri zobanat endilla goijjúm: Ańi Ańr Ruh fottí insán or uore ďálidiyum. Tuáńrar morotfuain de edde zérfuain de Ańr kalam boiyan goríbo, tuáńrar juwan maincé dorcón dekíbo, aar tuáńrar burá maincé cóppon dekíbo. **18** Ańr gulam edde bańdi ókkol or uore yó hé din ókkol ot Ańr Ruh ďálidiyum, aar ítara Ańr kalam boiyan goríbo. **19** Aar Ańi uore asman ot taajuippa harhána ókkol daháiyum, aar nise zobin ot illayi-nicán ókkol daháiyum. Yáni lou, ooin edde dúańr miyúla ókkol daháiyum. **20** Mabud or hé ďoóńr edde mohíma ola din aibár age, beil andár óizayboi, aar san lou wór ďóilla óizayboi. **21** Aar eén óibo, zee niki Mabud or nam loibo, íte nejat faibo.’ **22** “Ó Boni Isráil ókkol, hotá iń fúno: Isá Nasári, Zibár duara Alla ye tuáńrar hańse keramot, taajuippa harhána edde illayi-nicán ókkol dahái sábut goijje de, íba óilde Allar torfóttu; tuáńra nize toh híyan zano. **23** Alla, zibá ye muúmor hálót zane, íba ye age lóti fáisela goijje de, Isá re tuáńrar át ot gosáidi bolla. Aar tuáńra toh íba re bedini ókkol or áta kúruc ot dí mariféla báila. **24** Montor Alla ye íba re moot or duk ottu azad gorí abar zinda goijje, kiyólla-hoilé moote íba re nizor kobzat rakí nó fare. **25** Íbar baabute Dawude toh endilla hoóil, ki hoilé, ‘Ańi Malik ore ańr muńtu hámica dekıtam, kiyólla-hoilé íba ańr den ďák ottu asé, zeéne ańi no hafi. **26** Hétolla ańr dil kúci óiye, aar ańr zire kúcir hotá hoór. Ańr gaar haiya yó

acáye basi tákibo, **27** kiyólla-hoilé Tuńi ańr ruh re fatalfur ot félai no rakíba, aar Tuńi Tuáńr Pakzon or gaar haiya re fońsitó no diba. (Hadés g86) **28** Tuńi ańre zindigir rasta daháiyó; Tuńi ańre Tuáńr házirí lói furafuri kúci goríba.’ **29** “Báiyain, ańi tuáńra re bafdáda Dawud or baabute sáf-sáf góri hoói faijjum de ki, íba morigiyói, aar íba re dohón gorífela gýl; íbar hobor aijjó foijjonto ańárar fúańti eřé asé. **30** Íba toh éggwa nobi accíl; íba ye zainto de, Alla ye hosóm hái íba llói waada goijjíl de ki, íbar nosól ottu ekzon ore íbar toktót buágaraibo. **31** Muńtu kii óibo de híyan dekı fari íba ye Mosih zinda ówar baabute endilla hoiyé, ‘Íba re no fatalfur ot félaidiya gýyeh, aar no íbar haiya fońiccé.’ (Hadés g86) **32** Alla ye hé Isá re zinda goijje, ańára beggún híyan or gobá así. **33** Hétolla íba re Allar den ďák ottu boibár tokka diiya gýyeh, aar íba ye Baf or torfóttu waada goijjá Pak-Ruh faáil; yala tuáńra zín dekor edde fúnor híń íba ye ďálidiye deh. **34** Kiyólla-hoilé Dawud nize toh asman ot nó uré, montor toóu íba nize hoiyé de, ‘Mabude ańr Malik ore hoór de, Ańr den ďák ottu boiyó, **35** zetukkún foijjonto Ańi Tuáńr duccon ókkol ore Tuáńr foor tole gorí nó felai.’ **36** “Hétolla tamám Boni Isráil ókkole yían fakkagori zanilo de ki, tuáńra kúruc ot dí marifélaide de hé Isá re Alla ye Malik edde Mosih banaiyé.” **37** Híyan fúni manúc ókkol ottu dil ot sél maijje fán laigge; ítara Fitor ore edde oinno sáhabi gún ore hoór de, “Báiyain, ańára kii goittám?” **38** Fitore ítara re zuwab der de, “Tuáńra fottíkiye touwá goró, aar gunár maf fai bolla Isá Mosihr name bápťisma loh; tói tuáńra hádiya ísafe Pak-Ruh faiba. **39** Kiyólla-hoilé hé waada toh tuáńra lla, tuáńrar fuain dor lla, edde zetará duré asé ítara lla—zetó zon ore ańárar Mabud Alla ye Nizor híkka ďakibó.” **40** Fitore ítara re aró boóut hotá ókkol hoói nosíyot goijjíl, aar aros gorér de, “E zobanar báańra manúc ókkol ottu nizoré basai rakíyo.” **41** Zedúne íbar boiyan kobul goijje, ítara bápťisma loiyé; hé din ítarar dol ot tokoriban tin ázar manúc cámil gorá gýl. **42** Tará sáhabi gún ottu hámica taalim fúinto, ar ítara llói bóńg góri ruńi háito edde dua goittó. **43** Manúc beggúne ďooraitó, kiyólla-hoilé sáhabi gúne boóut taajuippa harhána ókkol edde illayi-nicán ókkol daháito. **44** Tamám imandár ókkol ek zagat tákito, aar hárr kessú milizúli estemal goittó. **45** Ítara nizor malsámána edde dón-cómbotti ókkol besi yore fottí zon ore zorurot mozin bařidito. **46** Aar fottí din baitul-mukaddos ot ekkú fúańti zoma

óito, aar góre-góre ruṭi báŋgi kúcir sáañte edde dil or ehélase hána háito. 47 Ítara Allar taarif gorát tákito, aar manúc beggún lói boni tákito. Zará nejat faito, tará re Malike fottí din ítarar dol ot cámil goittó.

3 Ek din Fitor edde Yohánna duar októ, yáni tin nwá báze, uore baitul-mukaddos ot zaar. 2 Hére ézzon zormo ttu lóti leng manúc ore maincé baitul-mukaddos or Cúndor nam or dorozat aní fottí din buágarai rakíto, zeéne yóggwa ye baitul-mukaddos ot góle de ítara ttu hórat magi fare. 3 Yóggwa ye zeñtté Fitor edde Yohánna re baitul-mukaddos or bútoze góler de deikké, yóggwa ye ítara ttu hórat maiggé. 4 Fitor edde Yohánna ye yóggwar uzu díyan dóri saái hoór de, “Añárar híkka soó!” 5 Hétunot yóggwa ye ítara ttu kessú faibar acáye ítarar uzu díyan dóri saái táikkil. 6 Montor Fitore yóggwa re hoór de, “Añr ttu toh cúna-cañdi náí, montor ziyán asé híyan tuáñre diir. Nasári Isá Mosihr name urí añño!” 7 Baade íba ye yóggwar den át tan dóri yóggwa re tuillé, aar éhon or bútoze yóggwar tēnge edde sulgirá ye bol faiyé. 8 Yóggwa fál mari tíyai aññat doijje, aar aññi-aññi edde fál mari-mari Allar taarif gorí-gorí ítarar fúañti baitul-mukaddos ot góillegoi. 9 Tamám manúc ókkole yóggwa aññer de edde Allar taarif gorér de deki, 10 zani faijé de, yóggwa óilde ubá zibá ye baitul-mukaddos or Cúndor nam or dorozat boói hórat magitó. Yóggwar uore ziyán óiye híyan deki ítara bici taajup edde ammúk óigiyoi. 11 Yóggwa aijjó foijjonto Fitor edde Yohánnar fisá dóri accíl. Manúc beggúne taajup ói ítarar íñyot duñri giiyé, ze zaga gán ore Sóloman or baanda hoó. 12 Híyan deki Fitore manúc ókkol ore hoór de, “Ó Boni Isráil ókkol, tuáñra yían or uore taajup kiyá óiyo? Añára yoggwá re añárar taakote yáh dindáriye aññair fángori kiyá tuáñra añárar híkka suk ḑoóñr gorí saái táikko?” 13 Ibrahím or, Isahák or, edde Yakub or Alla ye, yáni añárar bafḑada ókkol or Alla ye Íbar Gulam Isá re mohíma diiyé. Tuáñra de Íba re marifélai bolla dóri díla, aar Filate Íba re eridi bolla fáisela gorí baade yo tuáñra yóggwar muúntu Íba re inkar goijjila. 14 Tuáñra hé Pak edde Insáfwala wa re inkar gorí ezzon kúnire tuáñrar hañse eridi bolla aros goijjila. 15 Tuáñra zindigir Malik ore marifélaila, lekin Alla ye Íba re mora ttu zinda goijjé. Añára híyan or gobá así. 16 Isár nam or uore iman ainné de hétolla e manúc cwa ye bol faiyé, zibá re tuáñra dekor aar sinó. Isár usílaye ze iman aiyé híyane yoggwá re furafuri

gom goijjé, zendilla tuáñra dekor. 17 “Yala, ó báiyain, añí zani tuáñra yó tuáñrar sóddar ókkol or ḑóilla no buzí híyan goijjila. 18 Montor Alla ye híyan lói waán fura goijjé, ziyán Íba ye tamám nobi ókkol or muké age lóti boiyan goijjil, ki hoilé, Íbar Mosih ye duk faibo. 19 Hétolla touwá goró, aar Allar uzu firo, zeéne tuáñrar guná fuñsífela zah. Tóí Mabud or torfóttu foṭfoiṭṭa goríbar októ aibó, 20 aar Íba ye Isá re, yáni Mosih re diferáibo, zibá re tuáñra lla age lóti basílowa gíyeh. 21 Hárr kessú noya gori banaibár októ nú aiyé foijjonto Isá ttu asman ot táka foribó, zendilla Alla ye Nizor pak nobi ókkol or muké boóut age lóti hoóil. (aiñ g165) 22 Muúsa ye hoóil de, ‘Tuáñrar Mabud Alla ye tuáñrar báiyain dor bútoztu tuáñra lla aññ ḑóilla ézzon nobi tulíbo; íba ye tuáñra re zín hoó híin beggún fúna foribó. 23 Aar eén óibo, zee niki hé nobir hotá no fúnibo, ítare Allar Nizor bonda ttu ekkware dóncó gorífela zaybo.’ 24 “Becók, Sémuél ottu lóti cúru gorí zedún nobi ókkole kalam hoiyé, ítara beggúne e din ókkol or baabute yó boiyan goijjil. 25 Tuáñra toh nobi ókkol or edde Alla ye añárar bafḑada ókkol lói ze razinama goijjil híyan or fuain. Alla ye Ibrahím ore hoóil de, ‘Tor nosól or duara duniyair tamám kóum ókkole rahámot faibo.’ 26 Hétolla Alla ye Nizor Gulam Isá re basí, agor ttu tuáñrar hañse diferáiyé, zeéne Íba ye tuáñra fottíkiyo re nizor-nizor burair rasta ttu fírai rahámot dee.”

4 Fitor edde Yohánna ye manúc ókkol ore boiyan gorér de októ, imam ókkol, baitul-mukaddos or sóddar, edde Sadukái ókkol ítarar hére aiccé. 2 Tará bici bezar óiye, kiyólla-hoilé sáhabi gúne maincóre taalim der, aar Isá mora ttu zinda óiye de híyan tobolik gorér. 3 Tóí tará ítara re gereftar gorí tarfor din foijjonto ziyól ot raikkíl, kiyólla-hoilé híyala háñz óigilgoi. 4 Montor boiyan fúinne de héntu boóut zone iman ainníl, aar imandár ókkol bici ói tokoriban fañs ázar óiye. 5 Tarfor din, Yohúdir neta ókkol, murubbi ókkol edde alem ókkol Jerúsalem ot zoma óiye. 6 Hére boro imam Hánan accíl, héndilla Káiyafas, Yohánna, edde Alexzendar óu accíl, aar boro imam ókkol or oinno egana-guiccí ókkol óu accíl. 7 Tará ítara re mazé tíyagarai fusár gorér de, “Tuáñra ham yían kiyór taakote yáh har name goijjó dé?” 8 Hétunot Fitore Pak-Ruh lói furaiya ói ítara re zuwab der de, “Ó manúc or sóddar ókkol edde murubbi ókkol, 9 añára ek leng manúc ore bálai goijjé de hétolla zettót

yóggwa keéne gom óiye hoói añára re zerá gorá zar, 10 tói tuáñra edde tamám Boni Isráil ókkole yíán zanilo de ki, Isá Mosih Nasári, zibá re tuáñra kúruc ot dí marifélaila montor Alla ye mora ttu zinda goijjé, íbar name beh e manúc cwa furafuri gom ói eré tuáñrar muúntu tíyai asé. 11 Íba óilde Ubá zibá baabute pak-kalam ot endilla asé, ‘Ze fattór tuáñra mistíri ókkole inkar goijjila, yíba beggún or túaro bici zoruri fattór óiaicce.’ 12 Nejat ar honókiyor hañse faa no zah, kiyólla-hoilé asman or nise insán ore ar honó nam diiya nó zah ziyán or usílaye añára nejat fai faittam.” 13 Zeñtté tará Fitor edde Yohánnar hímmot deikké, aar ítara be-elómdar edde torbiyot sára manúc de zani faijjé, tará ammúk óigiyoi; tarfore tará ót faiyé de, ítara Isár fúañti accíl. 14 Aar ze manúc cwa re gom gorá gíyl, yóggwa re zettót tará Fitor edde Yohánnar fúañti tíyaiya deké, tará ttu ítarar hélaf hoibár honó hotá nu accíl. 15 Montor ítara re fótuayi-mujilic ottu baäre neeli zai bolla hókum dí yore tará ezzon loi ezzone biyasana gorát doiije, 16 hoór de, “Añára e manúc ítará re lói kii goittám? Kiyólla-hoilé ítará ze ñoñr keramoti ham goijjé, híyan Jerúsalem or manúc beggúne zane, aar añára toh híyan inkar gorí no faijjum. 17 Montor híyan or baabute maincór bútoe ar no fóle fán, e name honókiyo re ar honó hotá no hoi bolla añára ítará re horagori úñciyari díh.” 18 Baade tará ítara re matai hókum díye de, Isár name ar bikkúl kessú no hoitó edde honó taalim no dito. 19 Montor Fitor edde Yohánna ye tará re zuwabe hoór de, “Tuáñra nize fáisela goró, Allar nozor ot hon nán sóiyi, tuáñrar hotá fúna né náki Allar hotá fúna? 20 Kiyólla-hoilé añára zín deikkí edde fúinni híin or baabute howá bon gorí no faijjum.” 21 Tarfore ítara tará re aró dómki ókkol di baade eridifélaiye. Manúc olla búuli tará ítara re sánza díbar fáisela gorí nó fare, kiyólla-hoilé ziyán gorá gíyeh híyan or zoriya manúc beggúne Allar taarif gorát accíl. 22 Kiyólla-hoilé ze manúc cwar uore gom goré de keramot tan gorá gíyeh, yóggwa ttu salic bosór or túaro bici boc óiye. 23 Fitor edde Yohánna re eridiyé mottor, ítara nizor sáañti ókkol or hére waafes giiyégoi, aar ñoñr imam ókkole edde murubbi ókkole ítara re zín hoiyé híin beggún zanaiyé. 24 Híyan fúni ítara ektofák ói Allar hañse abas tulí dua gorér de, “Ya Malik, asman, zobin, doriya edde híin or bútoe zín asé híin beggún Tuñí éna foida goijjó. 25 Tuñí Tuáñr gulam añárar baf Dawud or muké Pak-Ruhr duara

hoóila de, ‘Beyohúdi ókkol kiyá rak óiye? Manúc ókkole behar sail kiyá gorér?’ 26 Duniyair baáñcca ókkol toiyar óiye, aar hákim ókkol fúañti mili zoma óiye Mabud edde Íbar Mosihr ulða.’ 27 Tuáñr pak Gulam Isá, zibá re Tuñí basíloila, Íbar ulða Hérude edde Pontiyus Filate Beyohúdi edde Boni Isráil or fúañti e cóor ot zoma óoil, 28 uúin gorí bolla zín óibar fáisela Tuñí age lóti Nizor kudurute edde moncáye gorí raikkíla. 29 Yala, ó Mabud, ítarar dómki re soó, aar Tuáñr gulam ókkol ore endilla toófufik doo de ki, ítara zen furafuri hímmot or sáañte Tuáñr kalam hoói fare. 30 Tuáñr át baró, zeéne Tuáñr pak Gulam Isár name ítara biyaram ókkol gom gorí fare, aar illayin-icán ókkol edde taajuippa harhána ókkol dahái fare.” 31 Ítara ttu dua goijjá óiye rár, ítara ze zaga gán ot zoma accíl híyan hafi uitté. Ítara beggún Pak-Ruh lói furaiya óiye, aar hímmot or sáañte Allar kalam howát accíl. 32 Tamám imandár ókkol dile mone ek accíl. Ítara honókiye nizor siz ore nizor bouli dabi no goittó, bólke hárr kessú milizúli estemal goittó. 33 Aar sáhabi gúne Malik Isá mora ttu zinda óiye de híyan or baabute ñoñr kudurut or sáañte gobá díyat accíl, aar Allar rahámot ítara beggún or uore ódorbaára accíl. 34 Ítarar bútoe ezzon óu muútac ot nu accíl, kiyólla-hoilé zetará zaga-zobin or yáh gór or girós accíl, ítara híin besi yore tiañ-foicá feito de híin aintó, 35 aar aní yore sáhabi gún or téng or gurat rakíto, baade fottíkiyo re zorurot mozin bařidiya zayto. 36 Hére Leévir háandan ottu Yusúf nam or ézzon manúc accíl, zibá Sáifrus ñiyat zormo óoil, zibár nam sáhabi gúne Bárnabas díye ziyán or torjuma óilde, Josba-dooya. 37 Yóggwa ye nizor zaga ekkán besi, tiañ gún aní sáhabi gún or téng or gurat raikkégai.

5 Lekin Ananiyas nam or ezzon manúce yó nizor bou Safíra llói ekkán zaga beiccé. 2 Yóggwa ye besar dam ottu kessú tiañ nizor lla rakídiye, ziyán or baabute yóggwar bou wé yó furafuri zane, baade argún aní sáhabi gún or téng or gurat raikkégai. 3 Montor Fitore hoór de, “Ananiyas, Cóitane tuáñr dil eéngori kiyá kobza gorifelaiye, zeén níki tuáñre Pak-Ruhr hañse misá hotá howá baiyé, aar zaga besar dam ottu kessú tiañ nizor lla rakídiya baiyé? 4 Zaga híyan besibár age yó kí tuáñr nizor nu accíl né? Aar híyan besi baade yó kí tiañ gún tuáñr át ot nu accíl né? Tuñí e ham gorí bolla kiyá tuáñr dil ot niyot goijjó? Tuñí insán ore misá hotá hoiyó de no, bólke

Alla re.” 5 Hotá híin fúni mottor Ananiyas dorótori fori morigiyói. Aar zetará hé hálót tan fúinne ítara beggún bicí ðooraiyói. 6 Tarfore juwan fuain ókkol urí aái yóggwar gaat hohón solaiyé, aar baäre loizai dohón gorífelaiye. 7 Tin gónḁa ánik baade yóggwar bou Safira bútoore aiccé, montor zíin óiye híin híba ye no zane. 8 Fitore híba ttu fusár gorér de, “Añré hoósai, tuñí edde tuáñr hócome zaga gán e dore beiccó de né?” Híba ye zuwab der de, “Jii, hé dore beiccí deh.” 9 Tói Fitore híba re hoór de, “Mabud or Ruh re entán gorí bolla kiyá tuáñra ezzon loi ezzon razi óiyo? Soó, tuáñr hócom ore dohón gorí aiccé de ítara duwar or ḁáke tíyai asé, aar ítara tuáñre yó tulí baäre loizaybói.” 10 Híba éhon or bútoore Fitor or t́eng ot dorótori fori morigiyói. Aar juwan fuain núne bútoore aái dekér de, híba mora, tói híba re baäre loizai hócom or ḁáke gorí dohón gorífelaiye. 11 Hétolla fura zomát ot edde zetará híin fúinne ítara beggún or bútoore ḁoor gólígyoi. 12 Sáhabi gúne manúc ókkol or bútoore boóut illayi-nicán edde taajuippa harhána ókkol daháito, aar imandár ókkol beggún ekkú fúañti Sóloman or baandát zoma óito. 13 Maincé ítara re bicí izzot goittó, montor ítara dol ot cámil ói bolla ar honókiye hímmot no goittó. 14 Toóu Malik or uore iman ainné de aró boóut mayafuain edde morotfuain loi ítara dol lagatar barát accíl. 15 Sáhabi gúne gorér de ham or zoriya, manúc ókkole biyaraimma ókkol ore aní rasta-rasta gadir uore edde háit́tar uore neṛai rakíto, zeéne Fitor hé boli zailé íbar sába ítara kessú manúc or uore fore. 16 Jerúsalem or atehañsór cóor ókkol ottu yó maincé fúañti biyaraimma edde hóraf jine faiya manúc ókkol ore aintó, aar ítara beggún ore gom gorá zayto. 17 Baade boro imam edde yóggwar sáañti ókkol, zetará Sadukái f́rkar manúc, ítara beggún ricé furaiya óigiyoi. 18 Ítara sáhabi gún ore gereftar gorí córkari ziyól ot díye. 19 Montor raitta Mabud or ek f́rista ye ziyól or doroza kúli ítara re baäre neelai aní hoór de, 20 “Zoo, baitul-mukaddos ot tíyai manúc ókkol ore e noya zindigir hotá beggún boiyan gorógoi.” 21 Híyan fúni ítara biínna sóore baitul-mukaddos ot gólí taalim diyat doiije. Boro imame edde yóggwar sáañti ókkole hére foónsi, fótuayi-mujilíc t́iya re ḿting gorí bolla ḁaikké, yáni Boni Isráil or murubbi beggún ore. Tarfore sáhabi gún ore ziyól ottu tarár hañse aná zay bolla hókum foónsaiye. 22 Lekin baitul-mukaddos or faáradar ókkol hére aái, sáhabi gún ore ziyól-hánat loot nó faa. Hétolla ítara waafes zai hóbor díye de, 23

“Añára ziyól-hána gán mozbut gori ṭala maiija edde doroza ókkol ot faáradar ókkol tíyai táikka loot faiyi, montor doroza kúilli rár, bútoore honókiyo re loot nó fai.” 24 Híyan fúni baitul-mukaddos or faáradar ókkol or mazí ye edde ḁoóñr imam ókkole yaa kii óibo hoi buddí háraiya ógilgoi. 25 Hétunot ezzone aái tará re hoór de, “Soó, ze manúc cún ore tuáñra ziyól ot díla, ítara baitul-mukaddos ot tíyai maincóre taalim der.” 26 Tói hé mazí wa ye faáradar ókkol loizai sáhabi gún ore waafes ainné, lekin bolazuri gorí no, kiyólla-hoilé tará maincé cíl or dola maribó bóuli ḁooráail. 27 Tará ítara re aní, fótuayi-mujilíc or muúntu t́yagaraiye. Boro imame ítara ttu fusár gorér de, 28 “Añára toh tuáñra re e name taalim no di bolla horagori uñciyari dílam, montor toóu úddwa deh tuáñrar taalim loi Jerúsalem bóraifelaiyo, aar tuáñra añára re e Manúc cwar lou wór hosúrbon t́óoraito soór.” 29 Hétunot Fitore edde oinno sáhabi gúne zuwab der de, “Añára ttu insán or hókum manar túaro Allar hókum manon fóros. 30 Añárar bafḁada ókkol or Alla ye Isá re zinda goijjé, zibá re tuáñra kúruc ot ṭaki marifélaila. 31 Íba re Alla ye Sóddar edde Nejatdoya ísafe Nizor den ḁák ottu boibár tokka diiyé, zeéne Íba ye Isráili ókkol ore touwá goríbar edde guná maf faibar mouka dii fare. 32 Añára nize híin or gobá así aar Pak-Ruh yó asé, zibá re Alla ye uitará re diiyé zetará íbar hókum ókkol amól goré.” 33 Híyan fúni tará ttu bicí guccá uiṭt́é, aar ítara re marifélaito monehoóil. 34 Montor Gamaliel nam or ezzon Féroci zibá Córiyot or alem aar manúc beggúne izzot goittó, yóggwa ye fótuayi-mujilíc ot tíyai hókum díye de, sáhabi gún ore essát olla baäre neelai rakíto. 35 Baade yóggwa ye tará re hoór de, “Ó Boni Isráil ókkol, tuáñra e manúc itará re ziyán goittó soór híyan uñciyare goijjó. 36 Kiyólla-hoilé yaar hooddin age Teyúdas hoó de íte urí, nize eggwá sóddar hoi dabi goijjíl; aar tokoriban sair cót manúc ítar bóng ot córik óoil. Montor ítare mariféla gýyeh aar ítar llói bóng óoil de ítara beggún dorbodor ógilgoi aar kessú ói nó fare. 37 Íte baade, Galil or Yohúdah ye manúc seráng gorá zar de októṭ urí bicí manúc nizor híkka gorífelail. Ítare yó mariféla gýyeh, aar ítar manúc beggún óu dorbodor ógilgoi. 38 Hétolla bóuli ehón ańí tuáñra re hoóir, tuáñra e manúc itará ttu duré táikko; itará zoggói; kiyólla-hoilé zodi itará erada edde ham insán or torfóttu de ó, tóoile híin toh nac óizayboi. 39 Montor zodi Allar torfóttu de ó, tuáñra itará re bon gorí no faribá. Zodi goró, tuáñra Allar

ulḁa larái-goróya tóoriba de baná.” 40 Tará Gamaliel or buddí dóijje, aar sáhabi gún ore bútoze matai yore soónk mara baiyé. Baade ítara re hókum díye de, Isár name honó hotá no hoitó, tarfore ítara re eridifélaie. 41 Ítara fótuayi-mujilíc ottu zaibarcót bicí kúci accíl, kiyólla-hoilé Alla ye ítara re Isár wasté beizzot óibar laayek goinné. 42 Aar ítara fottí din baitul-mukaddos ot edde góre-góre zai-zai lagatar taalim diyat edde tobolik gorát accíl de ki, Isá óilde Mosih.

6 Hé din ókkol ot zeñtté ummot ókkol bicí ór, ítarar bútotu ze Yohúdi ókkole Girík zubane hotá hoitó ítara Hibrú zubane hotá hoitó de Yohúdi ókkol or ulḁa cékayot gorát doijje, kiyólla-hoilé fottí din hána baṛidibarcót ítarar rari ókkole no faito. 2 Tóí baró zon sáhabi gúne ummot ókkol beggún ore ekkán ot zoma gorí hoór de, “Allar kalam tobolik gorár ham bad di hána baṛidiat lagi tákon añára lla tík no. 3 Hétolla, ó báiyain, tuáñrar bútotu háñt zon izzotdár manúc basó, zetará Pak-Ruh lói edde buddí lói furaiya. Añára ítara re e ham or zimma gán gosáidiyum, 4 aar añára dua gorát edde kalam tobolik gorát lagi tákiyum.” 5 Zomát or manúc beggún hé hotát razi óiye. Baade ítara Ešťífen ore basíloiye, zibá imane edde Pak-Ruh lói furaiya, aró Filíp ore, Porokóras ore, Nikáno ore, Timon ore, Parménas ore, edde Entiyok or Nikólas ore. Hé Nikólas ézzon Beyohúdi de óile yo Yohúdir dórmoo mainto. 6 Ítara tará re sáhabi gún or muúntu házir goijjé, aar sáhabi gúne dua gorí tarár uore át díye. 7 Allar kalam fólat accíl. Jerúsalem ot ummot ókkol or dol bicígori barát accíl, aar imam ókkol ottu yó boóut zone hé iman kobul goijjé. 8 Ešťífen hoó de yóggwa Allar rahámote edde taakote furaiya aiccíl, yóggwa ye manúc ókkol or bútoze ḁoóñr-ḁoóñr taajuippa harhána ókkol edde illayi-nicán ókkol daháito. 9 Lekin ek din, Azad-Faiya-Maincór Mujilíc-hána hoó de híyan or hoozzon maincé Ešťífen or ulḁa ói yóggwa llói torkatorki diyat doijje. Ítara accíl de, Kurenir, Alexzendariyar, Kilicíyar edde Ecíya elakar Yohúdi ókkol. 10 Montor yóggwa ye Pak-Ruhr diiya giyane hoiyé de hotá re ítara ziti nó fare. 11 Hétolla honókiye no zane fán gorí ítara hodún maincóre eén hoi bolla bíraiye, ki hoilé, “Añára Ešťífen Allar edde Muúsar ulḁa kuféri hotá ókkol hoór de fúinni.” 12 Héndilla gorí ítara awam ókkol ore, murubbi ókkol ore, edde alem ókkol ore uskaidiyé, aar ítara Ešťífen or hañse aái yóggwa re dóri fótuayi-mujilíc or muúntu ainné. 13 Ítara zetará re misá gobá tiyagaraiye ítara hoór

de, “E manúc cwa ye nitti e pak zagar edde Córiyot or hélaf hotá ókkol hoó. 14 Añára yoggwá ye endilla hoór de fúinni, Isá Nasári ye e zaga yían ore dónco gorifelaibo, aar Muúsa ye añára re diíl de rosóm ókkol bodolifelaibo.” 15 Héñtte fótuayi-mujilíc ot boirá accíl de ítara beggúne yóggwar híkka díyan dóri saiyé rár dekér de, yóggwar siyára fíristar siyárar ḁóilla óigiyoi.

7 Hétunot boro imame Ešťífen ottu fusár gorér de, “Ín sóiyi ói né?” 2 Ešťífen zeuwab der de, “Ó báiyain aar bafáin, añr hotá fúno. Añárar baf Ibrahim Háran cóor ot tákibar age Mesopotomiyat accíl de októť mohímar Alla ye yóggwa re dahá díyl, 3 aar hoóil de, ‘Tor mulluk edde tor egana-guicci ókkol eri oh mulluk ot zaa ziyán Añí toré daháiyum.’ 4 “Hétunot yóggwa Kasdiyo ókkol or mulluk eri Háran ot zai táikkegoi. Aar yóggwar baf morizaygói baade, Alla ye yóggwa re e mulluk yían ot lori aái baiyé, ziyán ot yala tuáñra tákor. 5 Montor íba ye yóggwa re e mulluk yían or honó híssa miras nó dee, tēng rakí fare de héttor úddwa nó dee; lekin yóggwa ttu fua nu accíl de októť úddwa íba ye yóggwa llói waada goijjíl de ki, e mulluk yían yóggwar edde yóggwa zai yóggwar ze nosól ókkol tákibo ítarar kobzat gorídibo. 6 Alla ye yóggwa re endilla hoóil, ‘Tor nosól ókkol for or mulluk ot tór sára boni tákibo; hére ítara re gulamit rakíbo, aar sair cóť bosór foijjonto zulúm háibo.’ 7 Alla ye aró hoóil de, ‘Montor ítara ze kouw or gulami goríbo, Añí hé kouw ore sáñza díyum, yárbaade ítara hé mulluk ottu neeli aái e zagat Añr ebaadot goríbo.’ 8 Tarfore íba ye Nizor razinamar nicán ísafe yóggwa re ázomi gorár niyom diíl. Tói zeñtté Ibrahim ottu Isahák zormo óiye, yóggwa ye íba re añcto din ot din ázomi goráiyé; baade Isahák ottu Yakub zormo óoil, aar Yakub ottu baró háandan or bafḁa gún zormo óoil. 9 “Hé bafḁa gúne Yusúf ore ricé Ijíp ot besifélail, montor Alla íbar fúañti accíl, 10 aar íba re tamám mosibot ókkol ottu basaáil. Alla ye íba re Ijíp or baáñcca Féruan ottu meérbani faabáil aar buddíman banaáil, baade íte íba re Ijíp or edde ítar razmohól guñrar hákim banaáil. 11 “Yárbaade, guñra Ijíp ot edde Kánan ot eggwá rať óoil, zibá ye bicí duk ainné, aar añárar bafḁa gúne háí bolla hána nó faa. 12 Montor Yakube zettót Ijíp ot hána asé bóuli fúinnil, íba ye añárar bafḁa gún ore foóila bar hére difeřáil. 13 Dusárabar ot hére giyyé rár, Yusúfe íbar

báiyain dore nizer foriso dyíl, baade Féruane Yusúf or foribar or baabute zani fajjíl. **14** Tarfore Yusúfe íbar baf Yakub ore edde íbar tamám egana-guicci ókkol ore aitó hóbor foónsaiye. Ítara kulehale hóittor fañs zon accíl. **15** Baade Yakub Íjíp ot gífl; hére íba edde añárar bafdáda gún entehal ógiyoi. **16** Aar ítarar muruda ókkol ore Cekém ot loizai hobor ot diya gíyéh; hoborostán waán ot ziyán Ibrahíme Cekém cóor ot Hamor or fuain dor ttu tiañ dii kinilóil. **17** “Montor Alla ye Ibrahím lói goijjíl de waada fura goríbar októ zettót dake aiyér, Íjíp ot añárar kóum barí bicí ógilgoi, **18** Yárbaade, Íjíp ot ar eggwá baáncca uittíl, zee niki Yusúf or baabute kessú no zainto. **19** Íte añárar kóum loi saláki goijjíl, aar añárar bafdáda ókkol ore eddúr zulúm goijjíl zeén niki ítara ttu nizer dud or fuain dore baáre félaidiya fore, zeéne híin morizagói. **20** “Hé októ Muúsa zormo óoil. Íba bicí cúndor accíl, aar íba re tin mac foijjonto baf or gór ot fala gyíl. **21** Baade íba re zettót baáre félaidiya gíyeh, Féruan or zii ye íba re loizai nizer fuar dóilla góri faillíl. **22** Muúsa ye Íjipi ókkol or tamám cíkkar elóm faiyé, aar íba hotát edde ham ot taakotwala accíl. **23** “Baade Muúsa salic bosór óiye rár, nizer kóum Boni Isráil or hálót saitó zaito demak ot aiccé. **24** Íba ye dekér de, ezzon Íjipi maincé eggwá Isráilir uore zulúm gorér. Tói íba zai yore Isráili wa re basai Íjíp or manúc cwa re marifélaí bodola loiyé. **25** Muúsa ye báippil de, Alla ye ítara re rehái gorí bolla íba re estemal gorér de híyan íbar kóumi báiyain de buzíbo, montor ítara nó buzé. **26** Tarfor din íba ye dekér de, dui zon Isráili ye maramari der. Íba ye ítara re cántir sáañte bonaidibar kucíce hoór de, ‘Ekí, tuáñra toh báí báí, tuáñra kiyá ezzon loi ezzone maramari dor?’ **27** “Montor zee niki oinno wa re zulúm gorér, yóggwa ye Muúsa re déikka mari hoór de, ‘Toré hone añárar hákim edde bisarhar banaiyé?’ **28** ‘Tui ki añré yó marifélaibi zendilla gel de hailla ezzon Íjipi re marifélayos?’ **29** Híyan fúni Muúsa dáigiyegoi, aar Miídiyan mulluk ot ezzon bidecóitta ísafe táikkil. Hére íba ttu duwá fua zormo óoil. **30** “Salic bosór guzori zaigói baade, Kuútor Faár or moidan zagat ek fírista ye eggwá zoler de ooin or záđđwat Muúsa re dahádiye. **31** Híyan dekí Muúsa taajup ógilgoi, aar cúndorgori sai bolla aró dake giyyé rár, Mabude eén hoór de abas fúinne, **32** ‘Añí óilam de tor bafdáda ókkol or Alla, yáni Ibrahím or, Isahák or edde Yakub or Alla.’ Hétunot Muúsa doore hafat dóijjil aar saibár hímmot nó goré. **33** “Mabude íba re hoór de, ‘Tor téng

or centár kúlifela, kiyólla-hoilé tui ze zagat tíaíyos híyan pak zaga. **34** Becók, Añí Añr bonda ókkol zetará Íjíp ot asé ítarar uore ze zulúm ókkol ór híin deikkí. Añí ítarar dukkór hañdani fúni ítara re basailoibo lla nise aicci deh. Yala ai, Añí toré Íjíp ot diferáiyum.’ **35** “Íbá óilde oh Muúsa, zibá re ítara endilla hoói inkar gorídil, ‘Toré hone hákim edde bisarhar banaiyé?’ Ze fírista ye zoler de záđđwat Muúsa re dahá díyl hé fíristar duara Alla Nize íba re hákim edde rehái-goróya banai diferáiyé. **36** Íba ye Boni Isráil ókkol ore Íjíp ottu neelai ainníl, aar Íjíp ot, Nil Doriyat, edde moidan zagat salic bosór fán taajuippa harhána ókkol edde illayi-nicán ókkol daháiyé. **37** “Íbá óilde oh Muúsa, zibá ye Boni Isráil ókkol ore hoóil de, ‘Alla ye tuáñrar báiyain dor bútottu tuáñra lla añr dóilla ézzon nobi tulíbo.’ **38** Íba óilde úba, zibá moidan zagat añárar kóum zoma óoil de ítarar fúañti accíl; hére añárar bafdáda ókkol edde íba llói Kuútor Faár or uore hotá hoóil de fírista wa yó accíl, aar añárar hañse foónsai bolla íba ye zinda kalam faáil. **39** “Montor añárar bafdáda ókkole íbar hotá mainto nó saá, bólke ítara íba re inkar goijjíl, aar Íjíp ot waafes zai bolla dile-dile mon gorí, **40** Aron ore hoóil de, ‘Añárar age-age zai bolla añára lla debota ókkol bano, kiyólla-hoilé añára re Íjíp dec ottu neelai ainné de Muúsar hálót kii ógiyoi añára no zani.’ **41** Tói hétunot ítara gorur-sóor dóilla eggwá mutti banai yíbar hañse kurbani peec goijjé, aar ítara nizer át or banaiya siz or uore kúci-áci goijjé. **42** Montor Alla ye ítara ttu muk fíraifelaiye, aar ítara re asman or tara ókkol fuñzitó eridifelaiye, nobi ókkol or kitab ot zendilla leikká asé, ‘Ó Boni Isráil ókkol, tuáñra moidan zagat salic bosór foijjonto Añr hañse januwar kurbani edde oinno kurbani peec goijjila níki? **43** Tuáñra toh Molek debotar tãmbu edde tuáñrar Rifan debotar sóbi éna tulí looi fúañti-fúañti loizaitá, zín tuáñra fuñza gorí bolla banaáila. Hétolla Añí tuáñra re Babilon or okul or zagat bondit diferáiyum.’ **44** “Moidan zagat añárar bafdáda ókkol ottu Allar Házirir Tãmbu accíl; híyan ore undilla nomuna mozin bana gyíl, zendilla gori banai bolla Alla ye Muúsa re daháidi hókum goijjíl. **45** Tãmbu híyan fai baade, añárar bafdáda ókkole Yehócuar sóddarir tole tákite híyan ore nizer fúañti añárar e mulluk ot ainníl. Héñtte Alla ye ítarar muúntu oinno kóum ókkol ore neelai dyíl. Híyan Dawud or zobana foijjonto e mulluk ot accíl. **46** Dawude Allar rahámot fai yore Yakub or Alla táki bolla ékkan zaga banaibár ezazot maiggíl. **47**

Montor íba lla gór Sólomane éna banaiyé. **48** “Háleke, Alla Tála insán or át or banaiya gór ot no táke. Nobi ye endilla hoór, **49** Mabude fórmár de, ‘Asman óilde Añr toktó, aar zobin óilde Añr foo rakíbar banggú. Tui Añr lla hon kisím or gór banaibí? Añí aram goríbar zaga horé óibo? **50** Ín beggún Añr Nizor áte banaiyí de no né?” **51** “Ó uzzoti manúc ókkol! Tuáñrar dil edde han toh bedini ókkol or híin or dóilla. Tuáñra hámica Pak-Ruh re oónli rakó, zendilla tuáñrar bafadada ókkole goittó. **52** Tuáñrar bafadada ókkole hon nobi wa re zulúm nó goré de asé? Ítara toh uitará re yó marifélail zetará Insáfwała wa aibár agun hotá hoóil. Aar yala tuáñra yó íba re dóridi marifélaiyo. **53** Tuáñra toh fírista ókkol or áta diiya Córíyot faáila, montor toóu híin amól nó goró.” **54** Híin fúni fótuayi-mujilíc or membór ókkol bicí rak óigiyoi, aar yóggwar ulða datedat kirkirat doiije. **55** Montor yóggwa Pak-Ruh lói furaiya ói yore asman or uzu díyan dóri saiye rár Allar mohíma deikké. Aró deikké de, Isá Allar den dák ottu tíyaiya asé. **56** Yóggwa ye hoór de, “Soó, añí dekir de, asman kúla aar Manúc or Fua Allar den dák ottu tíyaiya asé.” **57** Hétunot ítara nizor han bon gorífelaiye, aar eggwá doónr guzoran mari beggúne ekkú fúañti yóggwar uore záp maiije. **58** Ítara yóggwa re cóor or baáre loizai cíl or dola marat doiije; aar gobá gúne nizor hoorsuor kúlifelai Sálul nam or ézzon juwan manúc or tǵeng or gurat raikké. **59** Ítara Estífen ore cíl or dola marat accíl de októ, yóggwa ye endilla hoóí dua gorér, “Ó Malik Isá, añr ruh re kobul goró.” **60** Baade yóggwa ye añrú félai eggwá doónr abase guzori hoór de, “Ó Malik, itarár e guná no dóijjo.” Híyan hoóí yóggwa moot or gúm ot foijjé.

8 Estífen ore marifélaiye de híyan ot Sálul furafuri razi accíl. Hé din, Jerúsalem ot accíl de zomát or uore eggwá doónr zulúm cúru óiye, aar sáhabi gún bade argún beggún Yohúdiya edde Samária elakar agagurat dorborod óigiyoi. **2** Hodún dindár manúce Estífen ore dohón gorífelaiye, ítara bilak gorí-gorí yóggwa lla bicí haindé. **3** Ar Sáule zomát ore dónco gorár kucíce, góre-góre góli morotfuain edde mayafuain ókkol ore tani aní ziyól ot díyat doiije. **4** Ze imandár ókkol dorborod óigiyegoi, ítara zaga-zaga zai kúchóbor tobolik gorát accíl. **5** Aar Filípe nise Samáriar ekkán cóor ot zai, maincóre Mosíhr baabute tobolik gorát doiije. **6** Manúc ókkole Filíp or boiyan fúni edde íba ye daháito de illayi-nicán ókkol deki íbar hotá aró díyan

or sáañte fúinto. **7** Kiyólla-hoilé bicí manúc ottu hóraf jin ókkol doónr abase guzoran mari neeillíl, aar boóut zon mazur edde leng gom óoil. **8** Hétolla hé cóor ot bicí kúci accíl. **9** Yár age hé cóor ot Sáimon nam or ézzon manúc accíl, zibá ye jadu dahái Samáriar manúc ókkol ore taajup gorí rakító, aar dabi goittó de, añí yó ézzon doónr manúc. **10** Gorib tuangor beggúne yóggwar hotá díyan dí fúinto aar hoitó de, “E manúc cwa óilde Allar oh kudurut, ziyán ore Doónr Kudurut bouli zana zah.” **11** Ítara yóggwar hotát etollá díyan dito, kiyólla-hoilé yóggwa ye ítara re jadu dahái bicí deri lóti taajup gorí raikkíl. **12** Montor ítara zeñtté Filípe Allar raijor edde Isá Mosíhr baabute kúchóbor tobolik goijjé de híin or uore iman ainné, ítara morotfuain mayafuain duní gúne báp̄tisma loiyé. **13** Sáimon nize yó iman aní báp̄tisma loiyé. Yóggwa Filíp or fúañti-fúañti zaito, aar íba ye daháito de illayinican ókkol edde doónr-doónr keramot ókkol deki yóggwa taajup óizaytoi. **14** Jerúsalem ot asé de sáhabi gúne zettót Samáriar maincé Allar kalam kobul goijjé de fúinne, ítara Fitor ore edde Yohánna re tarár hañse diferáiyé. **15** Ítara duní zon foónsi yore tará lla dua goijjé, zeéne tará Pak-Ruh faa; **16** kiyólla-hoilé tarár uore Pak-Ruh hétun foijjonto nú aiyé; tará cúdu Malik Isár name báp̄tisma lóil deh. **17** Baade Fitor edde Yohánna ye tarár uore át díye, tói tará Pak-Ruh faiyé. **18** Sáimone dekére de, sáhabi gúne át dile Pak-Ruh miler, tói yóggwa ye tará re tíañ dii **19** hoór de, “Añré yó e kémota gán doo, zeéne añí zar uore át dí yóggwa ye Pak-Ruh faa.” **20** Montor Fitore yóggwa re hoór de, “Tuáñr tíañ tuáñr fúañti dónco óizoggoi, kiyólla-hoilé tuñí toh Allar hádiya tíañ dii kina zah bouli tǵaijjo. **21** Ham yíán ot no tuáñr honó híssa asé aar no honó borat asé, kiyólla-hoilé Allar nozor ot tuáñr dil sóiyi no. **22** Hétolla tuñí tuáñr e hórafi ttu touwá goró, aar Malik or hañse dua goró, óitofare íba ye tuáñr dil or e hóraf báfani maf gorídibo. **23** Kiyólla-hoilé añí dekir de, tuñí lalóse bóra aar gunár kobzat asó.” **24** Hétunot Sáimone zuwabe hoór de, “Añr lla Malik or hañse dua goró, zeéne tuñí hoiyó de héntu ekkán úddwa añr uore no.” **25** Tarfore Malik or kalam tobolik gorí edde Isár baabute gobá dí baade, Fitor edde Yohánna Jerúsalem or uzu rowana loiyé, aar foñt ot Samári ókkol or boóut tan farat kúchóbor tobolik goijjíl. **26** Ek din, Mabud or ek fírista ye Filíp ore hoór de, “Tuñí urí doóin míkka rasta ubát zoo, zibá Jerúsalem ottu Gaza cóor ot foijjé.” Hé rasta wa moidan zagat accíl.

27 Hétunot íba urí rowana loiyé, aar zaite-zaite foñt ot máze Itúpiya dec or Kandes ranir ek ðoóñr uzir loi dola óiye, yóggwa accíl ízara, aar ranir tamám dón-doulot or zimmadar. Yóggwa Jerúsalem ot aiccíl de Allar ebaadot gorí bolla. 28 Yóggwa nizor gúra-garít boói gór ot waafes zaargói de foñt ot nobi Yesáyahr kitab telawot gorát accíl. 29 Hétunot Pak-Ruh ye Filíp ore hoór de, “Hé gúra-garí gán or ðáke zai híyan or fúañti-fúañti zaat dóro.” 30 Tói Filíp duñri gúra-garír ðáke giyyé rár fúner de, manúc cwa ye nobi Yesáyahr kitab telawot gorér. Íba ye yóggwa ttu fusár gorér de, “Tuñí ziín telawot gorór híin buzór né?” 31 Yóggwa ye zuwab der de, “Honókiye buzái no dilé añi keéngori buzí faijjum?” Tói yóggwa ye Filíp ore uore urí yóggwar fúañti boító aros goijjé. 32 Manúc cwa ye pak-kalam or ze híssa gán telawot gorér híyan óilde yían, “Zoorái bolla bérasóol ore zendilla gori loiza zah, íba re héndilla góri loiza giyé; aar nizor keñc haṙoyar muúntu bérasóol or sóo ye zendilla nizám ói táke, héndilla íba ye yó Nizor muk nó kúle. 33 Íba re beizzoti goijjíl de híyan or honó bisar nó faa. Hone íbar nosól or baabute hoói faribó? Kiyólla-hoilé duniyai ttu íbar zan loifélagil.” 34 Hé uzir gwá ye Filíp ottu fusár gorér de, “Meérbani góri añré hoó, nobi ye ífn har baabute hoór deh, nizor né náki oinno zon or?” 35 Hétunot Filípe hotá howá saat goijjé, aar pak-kalam or hé híssa gán lói cúru gorí yóggwa re Isár baabute kúchóbor tobolik goijjé. 36 Ítara rasta báy zaite-zaite faní asé de ekkán zagat foóñce. Uzir gwá ye hoór de, “Soó, eṙé faní asé, yala báptisma lowa ttu añré kiyé oóñli faribó?” 37 Filípe yóggwa re hoór de, “Zodi tuñí fura dile Isár uore iman ainnó de óile, loi faribá.” Yóggwa ye hoór de, “Añí iman aní de, Isá Mosih óilde Allar Fua.” 38 Baade yóggwa ye gúra-garí t́yagaraito hókum díye, tarfore Filíp edde hé uzir, tará duní zon fanít laimmé, aar Filípe yóggwa re báptisma díye. 39 Zeñtté ítara faní ttu uittégai, Malik or Ruh ye bánggori Filíp ore loigiyégoi. Hé uzir gwá ye Filíp ore ar nó deké, lekin kúci gorí-gorí nizor sofór zari raikkíl. 40 Montor Filípe nizoré Asdod cóor ot loot faiyé, íba héntu lóti Kaisáriyat foóñse foijjonto cóor beggún ot kúchóbor tobolik gorát accíl.

9 Hé hale, Sáule Malik or ummot ókkol ore dómki diyat edde zulúm gorát accíl. Íba boro imam or hañse giyyé, 2 aar Damáskas cóor or mujilíc-hána ókkol ot dii bolla ceñrí maiggé, zeéne íba ye zaré-zaré Malik or Torikat asé de lootfa, ítara beggún ore

bañdí Jerúsalem ot aní fare, ítara morotfuain óuk yáh mayafuain. 3 Zaite-zaite íba zeñtté Damáskas or hañsáhañsi foóñce, atíkka asman ottu eggwá foór íbar sairó ðák ottu soimké, 4 baade íba meṙit forigilgói, aar endilla hoór de eggwá abas fúinne, “Sául, Sául, tui Añré zulúm gorór kiyá?” 5 Sáule fusár gorér de, “Malik, Tuñí hon?” Íba ye zuwab der de, “Añí Isá, zibá re tui zulúm gorór. 6 Yala tui urí cóor or bútoze zaa, tor ttu kii gorá foribó de híyan heṙe toré howá zaybo.” 7 Oinno manúc zetará Sául or fúañti zaar, ítara ammúk ói t́iyai táikkil, kiyólla-hoilé ítara abas swá fúner montor honókiyo re no deké. 8 Tarfore Sául meṙi ttu uitté, lekin suk kúille rár kessú no deké. Baade ítara íba re át ot dóri Damáskas ot loigiyé. 9 Íba tin din foijjonto añdá accíl, aar honó hána-fina ná háa. 10 Damáskas ot Ananiyas nam or ezzon ummot accíl, Malike yóggwa re ekkán dorcón ot hoór de, “Ó Ananiyas.” Yóggwa ye zuwab der de, “Jii Malik, añí eṙé así.” 11 Baade Malike yóggwa re hoór de, “Uṭ, Uzu hoó de rasta yíbat zaa, aar Yohúdahr gór ot Sául nam or ézzon Tarsús cóor or manúc or talac gorgói. Íba ehón dua gorér. 12 Íba ye ekkán dorcón ot deikké de, ezzon Ananiyas nam or manúce aái íbar uore át díye, zeéne íba ye abar deki fare.” 13 Ananiyase hoór de, “Malik, manúc íbar baabute añí boóut maincóor ttu fúinni, íba ye Jerúsalem ot Tuáñr pak bonda ókkol ore hotó duk diyé deh, 14 aar íba eṙé Tuáñr ebaadot goré de ítara beggún ore gereftar gorí bolla ðoóñr imam ókkol ottu adíkar fai aiccé deh.” 15 Montor Malike yóggwa re hoór de, “Tui zaa, kiyólla-hoilé íba óilde Añr basíloiya usíla, Beyohúdi ókkol or, baáñcca ókkol or, edde Boni Isráil ókkol or muúntu Añr nam foóñsai bolla. 16 Añr nam or wasté íba ttu hodún duk faa foribó Añí íba re daháiyum.” 17 Tói Ananiyas zai hé gór gán ot góille, aar Sául or uore át dí hoór de, “Bái Sául, Malik Isá, zibá ye tuáñre eṙé aibárcot rastat dahá díyl, añré tuáñr hañse íba ye diferáiyé deh, zeéne tuñí abar deki faro aar Pak-Ruh lói furaiya ó.” 18 Baade ehon or bútoze Sául or suk ottu oóñc or ðóilla kessú foijjé, aar íba ye abar deki faijé. Tarfore íba urí báptisma loiyé, 19 aar hána háiyé rár abar bol faiyé. Íba ummot ókkol or fúañti Damáskas ot hooddin táikkil, 20 aar honó deri no gorí mujilíc-hána ókkol ot Isár baabute tobolik gorát doijje de ki hoilé, Isá óilde Allar Fua. 21 Zetará íbar boiyan fúinto ítara beggúne taajup ói hoító de, “Manúc ibá kí ubá no, zibá ye Jerúsalem ot Isár ebaadotgár ókkol

ore zulúm goittó? Ibá eré yó héndilla goré de ítara re gereftar gorí ðoóñr imam ókkol or hañse loizaibár niyote aiccé de no né?” 22 Montor Sául dinbodín mozbút ówat accíl, aar Isá óilde Mosih de híyan or eén dolil ókkol díyat accíl, zeén níki Damáskas ot táke de Yohúdi ókkol toddó óizaytoi. 23 Boóut din guzori zaigói baade, Yohúdi ókkole íba re marifélai bolla ekkán sail gúraiye, 24 montor Sáule ítara hé sail or baabute zani faijjé. Ítara íba re marifélai bolla dine raite cóor or geit ókkol ot faára díyat accíl, 25 montor íbar cárit ókkole raitta eggwá ðoóñr lai ot gori íba re ðeбал or ekkán zanála báy nise lamaidiyé. 26 Baade Sául Jerúsalem ot giyyégoi. Hére íba ye ummot ókkol lói bóng óito kucíc goijjíl; montor ítara beggúne íba re ðooraitó, kiyólla-hoilé íba sóiyi-sóiyi ummot bonigiyói de híyan ítara biccác no goittó. 27 Montor Bárnabase íba re sáhabi gún or hañse ainné. Yóggwa ye ítara re zanaiyé de, Sáule sofór ot zaibarcót rastar uore Malik ore hondilla gori deikkíl, Malike íba llói kéngori hotá hoóil, edde íba ye Damáskas ot Isár name keén hímmot or sáañte tobolik goijjíl. 28 Tarfore Sául ítara fúañti táikkil, aar kúlamela góri Jerúsalem or agagurat zai hímmot or sáañte Malik or name tobolik gorát accíl. 29 Íba ye Yohúdi zetarár zuban Girík ítara llói hotá hoitó edde barábari díto; montor ítara íba re marifélaito kucíc goittó. 30 Zeñtté imandár báiyain de híyan or baabute zainné, ítara íba re nise Kaisáriyat aní Tarsús ot duñraidiyé. 31 Héñtte fura Yohúdiyar, Galil or, edde Samáriar zomát ókkol ot cánti accíl, aar híin torki ówat accíl. Ítara Malik ore ðooraitó aar Pak-Ruhr tosóllye solitó; héndilla góri ítara dol barát accíl. 32 Fitor hárr zagat sofór goitté-goitté, ek dinná íba Liídiya farat Allar ze pak bonda ókkol asé ítara hañse yó aiccé. 33 Hére íba ye Ainiyas nam or ezzon manúc loot faiyé, zibá añtur de hétolla añçto bosór fán bisánat fori asé. 34 Fitore yóggwa re hoór de, “Ainiyas, Isá Mosih ye tuáñre gom goijjé; uró, tuáñr bisána boři loo.” Baade yóggwa éhon urí tíyaiye. 35 Aar yóggwa re deki Lídiyar edde Cáron elakar manúc beggún Malik or uzu fíjje. 36 Joppa cóor ot Tabita nam or eggwá mayafua ummot accíl; Girík zuban ot híbar nam Dorkas, ziyán or torjuma “Óroin.” Híba ye hámica bálai goittó aar gorif ókkol ore modot goittó. 37 Héñtte híba biyaram ói morigílgoi, aar manúc ókkole híba re dúwaidai baade uoror țalar ekkán kamárat raikké. 38 Liídiya fara gán Joppar đake accíl. Ummot ókkole zettót Fitor hére asé de fúinne ítara dui zon

manúc difeřái íba re aros gorér de, “Tuñí añárar hére aité deri no goijjó.” 39 Hétunot Fitor urí ítara fúañti giyyé. Zeñtté íba hére foóñcce, ítara íba re uoror țalar kamára gán ot ainné. Rari mayafuain beggún Fitor or sairó đák ottu tíyai táikke, aar Dorkase zinda tákite zedún kuruta edde hoorsuor ókkol banaáil híin beggún íba re hañdi-hañdi dahát doijje. 40 Montor Fitore ítara beggún ore baáre neelaidi añrú félai dua goijjé. Íba ye lac cwar uzu firi hoór de, “Tabita, uř.” Tói híba ye suk kúille, aar Fitor ore deikké rár urí boiccé. 41 Baade Fitore híba re át ot dóri tuillé, aar rari mayafuain cóo imandár beggún ore matai híba re zinda gosáidiye. 42 Hé hóbor gán Joppa agagurat fóliligloi, aar boóut maincé Malik or uore iman ainné. 43 Fitor boóut din foijjonto Joppat maze Sáimon nam or ézzon samarar ham-goróyar fúañti táikkil.

10 Kaisáriya cóor ot Kornelias nam or ezzon manúc accíl, yóggwa accíl Ítaliyo Teérang hoó de yíbar ek cót fóous or cáap. 2 Yóggwa edde yóggwar góř tíya dindár accíl aar Alla re ðooraitó; yóggwa ye gorif ókkol ore bicí hórat diito, aar Allar hañse nitti dua goittó. 3 Ekbar din or tin nwá báze yóggwa ye ekkán dorcón deikké, ziyán ot sáf-sáf góri dekér de, Allar ek fírista aái yóggwa re hoór de, “Kornelias.” 4 Yóggwa ye ðoore fíristar uzu suk ðoóñr gorí saái hoór de, “Malik, hoóna?” Baade fírista ye hoór de, “Tuáñr duaye edde hórat doone Alla kúci óiye aar íba ye híin monot raikké. 5 Yala tuñí Joppat manúc difeřó, aar Sáimon zibá re Fitor óu đake, íba re matai anó. 6 Íba samarar ham-goróya Sáimon or góř ot meéman ísafe asé, zar góř gán doijjar hañsat.” 7 Yóggwa llói hotá hoóil de fírista wa zaigói baade, yóggwa ye nizor góř or dui zon gulam ore edde yóggwa re hámica hédmot goittó de ítara bútotu eggwá dindár fóous ore mataiyé. 8 Aar ziín-ziín óiye híin beggún ítara re buzái yore Joppat difeřáiyé. 9 Tarfor din ítara zaite-zaite cóor gán or hañsahañsi foóñser de októť, din or duúñijja Fitor góř or sád or uore dua goittó uiřttégoi. 10 Íba ttu búk laiggíl, aar kessú háito monehoóil, montor hána toiyar óř de októť, íba ye ekkán dorcón deikké, 11 ziyán ot dekér de, asman kúla aar ðoóñr saddor or đóilla ekkán siz ore sair kuna ttu dóri zobin ot lamaidiya zar. 12 Híyan or bútoře hárr kisím or sair țéingga januwar, buke añre de zandár, edde faik ókkol asé. 13 Baade íbar hañse eggwá abas aiccé de, “Fitor, uř, iín ore marifélai háa.” 14 Montor Fitore hoór de, “No, no, Malik; añ

toh honódin kessú nafak yáh háram háiyi de náí.” 15 Hétunot íbar hañse abar eggwá abas aiccé de, “Alla ye ziyán ore pak-sáf goijjé híyan ore nafak bouli no hoóic.” 16 Héndilla tin bar óiye, baade saddor gán atíkka asman ot waafes tulfela gíyeh. 17 Zeñtté Fitore deikkíl de dorcón or maáni kii hoói báfer, Korneliyase diferáil de manúc cún Sáimon or gór gán horé asé de talac gorí fai yore híyan or geit ot aái tíyai táikke. 18 Ítara ðak mari fusár gorér de, “Sáimon, zibá re Fitor óu ðake, íba eřé asé né?” 19 Fitore dorcón híyan or baabute báfat accíl de októť, Pak-Ruh ye íba re hoór de, “Saá, tin zon maincé tor talac gorér. 20 Hétolla uť, nise zaa, aar honó cók-cubá sára ítarar fúañti zaa, kiyólla-hoilé ítara re Añi diferáiyi deh.” 21 Hétunot Fitor nise zai manúc cún ore hoór de, “Tuáñra zar talac gorór, íba óilam de añi. Tuáñra kiyólla aiccó dé?” 22 Ítara zuwab der de, “Añára re cáap Korneliyase diferáiyi deh. Yóggwa ézzon forhésar edde Alla re ðoora de manúc. Tamám Yohúdi ókkole yóggwar nam goré. Yóggwa re pak fírsta eggwá ye hoíy de, tuáñre yóggwar gór ot matai bolla, zeéne yóggwa ye tuáñr ttu kalam fúni fare.” 23 Hétunot Fitore ítara re bútoe matai aní meémadari goijjé. Tarfor din Fitor ítarar fúañti rowana loiyé. Íbar fúañti Joppa ttu hoozzon imandár báiyain óu giiyé. 24 Zaité-zaité ek din baade ítara Kaisáriyat foóñicce. Korneliyase nizor egana-guiccí edde háas dustó ókkol zoma gorí ítarar entezar ot accíl. 25 Fitor gór ot gólibarcot Korneliyase íba re estekbal goijjíl, aar íbar téng ot uúñtoi fori sóida goijjíl. 26 Montor Fitore yóggwa re eén hoói tulfloiye, “Uřó, añi yó toh ézzon insán.” 27 Yóggwa llóí hotá hoói-hoói Fitor bútoe góille rár dekér de, héře boóut manúc zoma óiye. 28 Íba ye ítara re hoór de, “Tuáñra toh zano, ek Yohúdi ye honó Beyohúdi llóí sákbak rakón yáh ítarar héře beraitó zoon añárar córiyot or maná. Montor honókiyo re háram yáh nafak no hoi bolla Alla ye añré daháidiye. 29 Hétolla tuáñra añré mataitó diferáiyi rár, añi honó bazá no di aiccí deh. Yala añi fusár gorí faijjum né tuáñra añré kiyólla mataitó diferáiyi dé?” 30 Korneliyase zuwab der de, “Yar sair din age, etún ot din or tin nwá báze añi añr gór ot dua gorír de októť, somoikka hoor findá ézzon manúc asimbit añr muuntu tíyaiye, 31 aar hoór de, ‘Korneliyas, Alla ye tuáñr dua fúinne edde tuáñr hórat diiya monot raikké. 32 Hétolla honókiyo re Joppat diferó, aar Sáimon zibá re Fitor óu ðake, íba re matai anó, íba samarar ham-goróya Sáimon or gór

ot meéman ísafe asé, zar gór gán doijjar hañsat.’ 33 Hétolla añi tuáñre matai bolla éhon or bútoe manúc diferáiyi deh. Gom óiye tuñí aiccó. Yala añára beggún eřé Allar muuntu házir óiyi de, Malike tuáñre añára re zín hoi bolla hókum díye híin beggún fúni bolla.” 34 Baade Fitore hotá howá cúru gorí hoór de, “Ehón añi sóiyi-sóiyi zani faijjí, Alla ye ektorffia no goré, 35 bólke hárr koum ottu zee-zee íba re ðoora aar sóiyi ham goré, taré-taré íba ye kobul goré. 36 Tuáñra toh oh kúchóbor zano ziyán Alla ye Boni Isráil ókkol or hañse foóñsaiye, ki hoilé, Isá Mosih zibá beggún or Malik, Íbar duara cánti faa zah. 37 Tuáñra nize zano, Yaháya ye báptismar baabute tobolik gorí baade Galil ottu lóti cúru gorí guñra Yohúdiyat kii óiye. 38 Tuáñra yían óu zano, Alla ye Nasárat or Isá re Pak-Ruh loi edde kudurute furaiya gorí basfíloil. Íba ye zaga-zaga zai bálai goittó, aar zetará re íbilíce duk de ítara beggún ore gom goittó, kiyólla-hoilé Alla toh íbar fúañti accíl. 39 “Íba ye Yohúdi ókkol or mulluk ot edde Jerúsalem ot zedún ham ókkol goijjé, añára híin beggún or gobá así. Manúc ókkole íba re kúruc ot ťaki marifélail. 40 Montor Alla ye íba re tin din ot din zinda goijjé, aar íba re zahér ówa baiyé, 41 beggún or hañse no, bólke siríf Alla ye age lóti basí raikké de gobá ókkol or hañse, yáni añárar hañse, zetará íba mora ttu zinda ói baade íbar fúañti háafiya goijjíl. 42 Íba ye añára re hókum díye de, manúc ókkol or hañse tobolik gorí bolla edde yían gobá dí bolla, ki hoilé, íba óilde Ubá zibá re Alla ye zinda edde mora ókkol or bisarhar banaiyé. 43 Tamám nobi ókkole yó íbar baabute endilla gobá díye de ki, zee niki íbar uore iman ané íte íbar name gunár maf faa.” 44 Fitore híin boiyan gorér de októť, fúner de ítara beggún or uore Pak-Ruh lami aiccé. 45 Joppa ttu ze ázomi goijjá imandár ókkol Fitor or fúañti aiccíl ítara taajup óigilgoi, kiyólla-hoilé Beyohúdi ókkol or uore yó hádiya ísafe Pak-Ruh ðáldiida giyé. 46 Ítara dekér de, Beyohúdi ókkole gabi zubane hotá hoór edde bicígori Allar taarif gorér. Hétunot Fitore hoór de, 47 “Yala toh itará re fanír báptisma lowa ttu honókiye oóñsi no faribó, kiyólla-hoilé añárar ðóilla itará yó de Pak-Ruh faiyé.” 48 Tóí íba ye ítara re Isá Mosihr name báptisma díya zay bolla hókum díye. Yárbaade ítara Fitor ore hooddin fúañti tákito aros goijjé.

11 Sáhabi gúne edde Yohúdiyar agagurat asé de imandár báiyain de fúinne de, Beyohúdi ókkole

yó Allar kalam kobul goijjé. 2 Hétolla Fitor zeñtté uore Jerúsalem ot giyyé, ázomi goijjá imandár ókkole íba re hosúr díye, 3 Ítara hoór de, “Tuñí be-ázomi goijjá maincór gór ot giyyó, aar ítarar fúañti hána yó háiyó.” 4 Tói Fitore ítara re ekkú ttu lóti beggún buzái hoór de, 5 “Añí Joppa cóor ot dua gorír de októtt ekkán dorcón deikkí, ziyán ot deikkílám de, ðoññir saddor or ðóilla ekkán siz ore sair kuna ttu dóri asman ottu lamaidiya zar; híyan laimte-laimte añí ziyóñt así híñyot foónicce. 6 Añí saddor gán or uzu díyan dóri saiyí rár deikkí de, híyan or bútoze zobin or sair téingga januwar, jonggoli januwar, buke áññe de zandár, edde faik ókkol asé. 7 Baade eggwá abase añré endilla yó hoór de fúinni, ‘Fitor, uť, iín ore marifélaí háa.’ 8 “Montor añí hoiyí de, ‘No, no, Malik; añí toh honódin kessú nafak yáh háram hána gal ot diyí de náí.’ 9 “Hétunot dusárabar asman ottu eggwá abas aái hoór de, ‘Alla ye ziyán ore pak-sáf goijjé híyan ore nafak bouli no hoóic.’ 10 Héndilla tin bar foijjonto óiye, baade híin beggún ore asman ot waafes tulífela giyeh. 11 “Hétukkun ot tin zon manúc zetará re añr hañse Kaisáriya ttu diferá giyeh, ítara añára ze gór gán ot accílám híyan ot foónicce. 12 Pak-Ruh ye añré honó cók-cubá sára ítarar fúañti zaito hoiyé. E sów zon báiyain itará yó añr fúañti gífl. Baade añára manúc cwar gór ot goílligoi. 13 Yóggwa ye añára re hoiyé de, yóggwa ye yóggwar gór ot eggwá fírista deikké, zibá ye hoiyé de, ‘Honókiyo re Joppat diferó, aar Sáimon zibá re Fitor óu ðake, íba re matai anó. 14 Íba ye tuáñre endilla hotá ókkol hoibó, zíne tuñí edde tuáñr gór tíya ye nejat faiba.’ 15 “Baade añí zettót boiyar gorá cúru goijjí, ítarar uore Pak-Ruh lami aiccé, zendilla foóila cúrut añárar uore aiccíl. 16 Hétunot añr ttu hotá waán monot uittíl ziyán Malike hoóil, ki hoilé, ‘Yaháya ye toh fanít éna bápťisma díye, montor tuáñra re Pak-Ruh lói bápťisma díya zaybo.’ 17 Hétolla Alla ye zettót ítara re ekkú ðoilla hádiya diiyé, zendilla añára re diíl zeñtté añára Malik Isá Mosihr uore iman ainní, tói añí hon abar Alla re oónlitam?” 18 Ítara híin fúni nizám ói táikkil aar Allar taarif gorí hoór de, “Tóoile toh Alla ye Beyohúdi ókkol ore yó touwá gorí ofúrani zindigi faibar toóufik diiyé.” 19 Estífen or uore lóti cúru óiye de zulúm or zoriya ze imandár ókkol dorbodor ógilgoi, ítara zaite-zaite Fonikcíya elakat, Sáifrus díyat, edde Enťiyok ot foijjonto foóniccegoi. Ítara Yohúdi ókkol ore bade ar honókiyor hañse kalam tobolik no goittó. 20 Montor ítarar bútoze Sáifrus or

edde Kurenir hoozzon manúc accíl, zetará Enťiyok ot zai Girík manúc ókkol ore yó Malik Isár baabute kúchóbor tobolik goijjíl. 21 Malik or át ítarar uore accíl de hétolla becábicí manúc ókkole iman aní Malik or uzu fíjjil. 22 Hé hóbor híyan Jerúsalem ot asé de zomát or hañse foónicce rár, ítara Bárnabas ore Enťiyok ot diferáiyé. 23 Yóggwa zeñtté hére foónicce, Alla ye ítara re rahámot goijjé de deki bicí kúci óiye, aar ítara re nosíyot goijjé de, fura dile Malik loi laigga táki bolla. 24 Hé Bárnabas ézzon nekkar bonda accíl, zibá Pak-Ruh lói edde imane furaiya. Héñtte bicí manúc ókkol ore Malik or hañse aná giyeh. 25 Yárbaade Sául ore tuwaitó Bárnabas Tarsús ot giyyé, 26 aar íba re tuwai fai Enťiyok ot ainné. Hére ítara duní zon zomát or manúc ókkol or fúañti fura ek bosór táikkil aar bicí manúc ore taalim dyíl. Enťiyok óilde foóila zaga, ziyán ot ummot ókkol ore Isáyi hoóí ðaka giyéh. 27 Hé októtt Jerúsalem ottu hoozzon nobi hére Enťiyok ot aiccé. 28 Ítara ttu ezzon or nam accíl Agabos, zibá ye tíyai yore Pak-Ruhr hédaiyote agun hotá hoiyé de ki, fura duniyait eggwá ðoññir rať óibo. Hotá híyan baáñcca Kalediyus or hókumot or októtt fura óoil. 29 Héñtte ummot ókkole zee zedún dii fare hédun dii, Yohúdiyat asé de imandár báiboináin dor hañse modot foónsaibar fáisela goijjé. 30 Ítara hé modot tun Yohúdiyar zomát or murubbi-neta ókkol or hañse Bárnabas edde Sául or áta foónsail.

12 Hé din ókkol ot baáñcca Hérude zomát or kessú maincóre gereftar gorí-gorí zulúm gorát doijje. 2 Hé sílsila loi yóggwa ye Yohánnar báí Yakub ore toluwar loi kotól gorá baiyé. 3 Yóggwa ye zettót Yohúdi ókkol ottu híyan fosón laiggé de deikké, Fitor ore yó gereftar goijjé. Hé goťana gán Cúťar-sára Ruťir-id or októtt óoil. 4 Yóggwa ye Fitor ore gereftar gorí ziyól ot raikkíl, aar sair zon sair zon gorí sair ðaái fóous faára díyl. Yóggwar erada accíl de, Azadir-id baade íba re awam ókkol or muúntu peec gorí bolla. 5 Hétolla bouli Fitor ore ziyól ot raikkíl deh, montor zomát or manúc ókkole íba lla Allar hañse dilmon di lagatar dua gorát accíl. 6 Ze din Hérude Fitor ore baäre neelai aníbo, hé din raitta íba duiyán síyol lói baindá accíl aar dui zon fóous or mazé gúm ot accíl, aar faáradar ókkole ziyól or dorozat faára dí táikkil. 7 Atíkka Mabud or ek fírista dahádiye, aar hétunot kamárat eggwá foór zoli uitté. Fírista ye Fitor ore ðák sai lari seton gorídi hoór de, “Hára uró!” Hétunot íbar

duní át ottu síyol lun kúli forigiyói. **8** Baade fírista ye fba re hoór de, “Keeñil bañdó, aar tuáñr cenťár fiñdó.” Tói fba ye héndilla goijjé. Fírista ye fba re aró hoór de, “Tuáñr saddor gán gaat berái añr fisé-fisé aiyó.” **9** Fitor neeli fisé-fisé zaat doijje; montor fírista ye ziyán gorér híyan fottón ot de Fitore hoi no fare. fba ye řaaijil de dorcón dekér bóuli. **10** Baade ítara foóila edde dusára faáradar ore bárai zai luwár geiř or iñyot aiccé, ziyán báy cóor or búture góli fare. Hé geiř řan ítara lla nizebaze kúligiyoi, aar ítara híyan báy neeli eggwá rasta báy zaat accíl. Zaité-zaité atíkka hé fírista wa Fitor ore eri giyyégoi. **11** Hétunot Fitor úñic ói nizoré nize hoór de, “Yala añí sóiyigori zani fajjí, Malike Nizor fírista difeřái añré Hérud or át ottu edde Yohúdi ókkole ziyán or acá gorí táikkil híyan ottu basaiyé.” **12** Híyan buzí fari fba Yohánnar maa Moriyam or gór ot giyyé. Hé Yohánna re Markus hoói yó řake. Gór híyan ot bicí manúc zoma ói dua gorát accíl. **13** Fitore geiř or doroza gán baijjaiye rár, Rođá nam or eggwá bañdi mayafua ye kúlidito aiccé. **14** Híba ye zettót Fitor or abas ót faiyé, kúciye geiř no kúli duñri búture zai hoór de, “Fitor dorozat tíyai táikke!” **15** Ítara híba re hoór de, “Tor matá hóraf óigiyoi!” Montor híba ye zettót híyan sóiyi bóuli howát accíl, ítara hoór de, “Tóoile fba Fitor or fírista óibo deh.” **16** Montor Fitor warawori doroza baijjat accíl. Aar ítara doroza gán kúille rár, Fitor ore deki taajup óigiyoi. **17** Fitore áte icára gorí ítara re nizám óito hoiyé, aar Malike fba re ziyól ottu keéngori neelai ainné de híyan ítara re buzáye. fba ye aró hoiyé de, “Tuáñra e hóbor yíán Yakub edde oinno imandár baíboináin dore yó zanaidiyo.” Baade fba héntu neeli ar ekkán zagat giyyégoi. **18** Biíinna óiye rár, Fitor hořé giyyói hoi ziyól or fóous ókkol or búture řoóñr úrussul óiye. **19** Hérude zettót Fitor ore tuwai loot nó faa, yóggwa ye hókum díye de, faáradar gún ore zera gorí mariféla zay bolla. Baade yóggwa Yohúdiya ttu nise Kaisáriyat zai yore hooddin táikkegoi. **20** Hé októt yóggwa řayár edde Sídón cóor or manúc ókkol lói bicí guccát accíl. Montor ítara beggún ek mon ói Balatái ore manaiyé, zibá razmohól or zimmadar accíl, zeéne íte ítara re modot goré. Baade ítara Hérud or hañse aái cánti magat doijje, kiyólla-hoilé ítarar mulluk ore hé baáñccar mulluke hána lói solaitó. **21** Hétunot Hérude ítara re tarík díye, aar hé tarík mozin yóggwa ye razfucák fiñdí nizor toktót boói ítara re bácon diyat doijje. **22** Yóggwar hotá fúni awam ókkole

guzori hoór de, “Íbá toh debotar abas, insán or no!” **23** Hérude Allar taarif nó goré de hétolla Mabud or ek fírista ye yóggwa re éhon agát goijjé. Baade yóggwa re logé haífelaiye aar morigiyói. **24** Montor Allar kalam fólat accíl aar imandár ókkol bicí ówat accíl. **25** Bárnabas edde Sául ottu tobolik or ham goijjá ói baade, Yohánna re fúañti looi Jerúsalem ottu waafes giyyégoi. Hé Yohánna re Markus hoói yó řakitó.

13 Enřiyok or zomát ot hoozzon nobi edde ustat accíl. Ítara óilde Bárnabas, Símiyon zibá re Halaiya řake, Kureni cóor or Lukiyus, hókumot-goróya Hérud or falok báí Manain, edde Sául. **2** Ítara zeñtté ruza rakí Malik or ebaadot gorér, Pak-Ruh ye ítara re hoór de, “Bárnabas edde Sául ore oh ham olla háas gorí rakó, ze ham olla Añí ítara re řahaiyi.” **3** Tói ítara ruza rakí edde dua gorí baade, hé duní zon or uore át dí ítara re bidai gorídiye. **4** Tói Bárnabas edde Sául ore Pak-Ruhr torfóttu difeřá giyeh. Baade ítara Selukíyat giyyé, aar héntu zaáñs ot góri Sáifrus ot giyyé. **5** Ítara Salamis cóor ot foóñsi mottor Yohúdir mujilíc-hána ókkol ot Allar kalam tobolik gorát doijje. Ítarar fúañti modotgár ísafe Yohánna accíl. **6** Guñra řiya báy zai ítara Pafós cóor foijjonto giyyé. Héře ítara eggwá Yohúdi jadugor edde misá nobi loot faáil zibár nam Bar-Isá. **7** Íte accíl hókumot-goróya Sergiyus Pául or dustó. Sergiyus ezzon buddíman manúc accíl, zibá ye Bárnabas edde Sául ore mataitó difeřáil, aar ítara ttu Allar kalam fúinto saáil. **8** Montor jadugor Elumase (Yíán óilde Girík zuban ot Bar-Isár dusára nam) ítarar muhálef goijjíl, aar hókumot-goróya re iman ottu larifelaito saáil. **9** Montor Sául zibá re Pául óu řake, fba Pak-Ruh lói furaiya ói ítar uzu suk lagaidi saái hoór de, **10** “Tui lbilíc or fua, tui hárr kisím or dúka edde férokbaži lói furaiya, aar hárr gom ham or duccon. Tui Malik or uzu rasta re behań gorá bilkúl bon no goríbi níki? **11** Saá, Malik tor ulđa tíyaiye. Tui ańdá ói hooddin fán beil or foór úddwa no dekfíbi.” Ebbe hétunot ítar uore kúwa edde andár aái foijjé; aar ítare át ot dóri loizai fare fán íte manúc átat doijje. **12** Ziín óiye híin deki hókumot-goróya wa ye iman ainné, kiyólla-hoilé yóggwa ye Malik or baabute ze taalim faiyé híin lói taajup óigilgoi. **13** Baade Pául edde íbar sáańti ókkol, Pafós ottu zaáñs ot góri Pampúliyat asé de Perga cóor ot aiccé, montor Yohánna ye ítara re eri Jerúsalem ot waafes giyyégoi. **14** Lekin ítara Perga ttu zai Pisídiyat asé de Enřiyok ot aiccé, aar ebaadot-or-

din mujilíc-hánat zai boiccégoi. **15** Tourat edde nobi ókkol or kitab ottu telawot goijjá ói baade, mujilíc-hánar sóddar ókkole ítarar hañse hotá difeřáiyé de ki, “Báiyain, zodi tuáñra ttu honó nosíyoti hotá táke, tóoile boiyan goró.” **16** Hétunot Páule tíyai, áte icára gorí hoór de, “Ó Boni Isráil ókkol, tuáñra zetará Alla re đooro, añr hotá fúno: **17** Boni Isráil or Alla ye añárar bafđada gún ore basíloil, aar ítara re lǵp dec ot táite đoóñr koum banaidíl, aar íbar kudurutir áte ítara re héntu neelai ainníl. **18** Salic bosór foijjonto íba ye moidan zagat ítarar adot ókkol ore bordac gorát accíl. **19** Yárbaade íba ye Kánan mulluk or háñt twa zati re dónco gorífelai Nizor bonda ókkol ore ítarar mulluk híyan miras diiyé. **20** Ín beggún óite tokoriban sair-có fonzaic bosór laiggé. “Yárbaade nobi Sémuel or októ foijjonto Alla ye ítara re bisarhar ókkol diiyé. **21** Baade ítara eggwá baáñcca maiggé rár, Alla ye ítara re Binyamin or háandan ottu Kic or fua Sául ore dífl, zibá ye salic bosór foijjonto hókumot goijjíl. **22** Alla ye Sául ore baáñccagiri ttu félaidi baade Dawud ore ítarar baáñcca banaáil, zibár baabute íba ye yó gobá díye de ki, ‘Añí Añr mon or manúc ísafe Jesir fua Dawud ore faiyí, zibá ye Añr moncá beggún fura goríbo.’ **23** “Hé manúc cwar nosól ottu Alla ye Nizor waada mozin Boni Isráil ókkol olla eggwá Nejatdoya difeřáiyé, íba óilde Isá. **24** Íba aibár age Yaháya ye tamám Boni Isráil ókkol or hañse touwár bápťismar tobolik goijjíl. **25** Yaháya ye íbar tobolik or ham furussat goijjá óibarcot hoóil de, “Tuáñra añí hon bóuli táaro? Tuáñra Zibár talac gorór íba añí no. Montor soó, añí baade eén Ekzon aiyér zibár téng or cenťar or fíta kúli bolla úddwa añí laayek no.’ **26** “Ó báiyain, Ibrahim or fuain edde Alla re đooroya Beyohúdi ókkol, nejat or e hóbor añárar hañse foóñsa gíyeh. **27** Jerúsalem or bácinda ókkole edde ítarar sóddar ókkole Isá re nó siné, aar hárr ebaadot-or-din nobi ókkol or ze boiyan ókkol telawot gorá zah, híin óu nó buzé, hétolla ítara íba re fótua dí híin fura goijjé deh. **28** Ítara íba re mariféla fore de héndilla honó hosúri no faile yo, toóu íba re marifélaito Filat ore aros goijjíl. **29** Zeñtté ítara ttu íbar baabute pak-kalam ot zín asé híin beggún fura goijjá óiye, íba re kúruc ottu lamai eggwá hobor ot raikkíl. **30** Montor Alla ye íba re mora ttu zinda goijjé. **31** Aar íba boóut din foijjonto uitarár hañse dahádiye, zetará íbar fúañti Galil ottu Jerúsalem ot aiccíl. Ítara yala añárar koum or hañse íbar gobá óiye. **32** “Añára tuáñrar hañse e kúcir hóbor gán boiyan

gorír, ki hoilé, Alla ye añárar bafđada ókkol lói ze waada goijjíl, **33** híyan íba ye Isá re mora ttu zinda gorí ítarar fuain dor hañse, yáni añárar hañse fura goijjé. Zobur Córif or dui nombór rukút endilla asé, ‘Tuñí óilade Añr Fua, aijja Añí Tuáñr Baf óiyi.’ **34** Alla ye íba re mora ttu zinda goijjé, hétolla íbar haiya honódin no foñsibó. Alla ye endilla hoiyé, ‘Añí tuáñra re pak edde sóiyi niyamot diiyum, zín Añí Dawud ore waada goijjílám.’ **35** Hétolla íba ye Zobur Córif or arek zagat óu hoiyé de, ‘Tuñí Tuáñr Pakzon or gaar haiya re foñsitó no diba.’ **36** “Dawud toh íbar zobatan Allar moksót or hédmot gorí baade moot or gúm ot forigiyói. Íba re nizor bafđada ókkol or fúañti dohón gorá gýl, aar íbar haiya foñsiglgoi. **37** Montor Alla ye Zibá re mora ttu zinda goijjé íbar haiya toh nó foñse. **38** “Hétolla, ó báiyain, añr ttu tuáñra re yían zanaidito monehoór, ki hoilé, Isár duara guná maf faibar hotá tuáñrar hañse tobolik gorá zar. **39** Tuáñra Muúsar Córivot or duara ze guná ttu azad nó foo, híin beggún ottu uite azad faa zee niki íbar uore iman ané. **40** Hétolla uñciyar táikko, zeéne nobi ókkole boiyan goijjé de híin tuáñrar uore no, ki hoilé, **41** ‘Ó tooñcábazi-goróya ókkol, soó, taajup ó aar dónco óizogoi, kiyólla-hoilé Añí tuáñrar din ot endilla ekkán ham gorír, ziyán tuáñra re honókiye buzáidile yo ekin goittá no.”’ **42** Pául edde Bárnabas mujilíc-hána ttu neeli zaargói de októót, manúc ókkole aros gorát doijje de, ítara re e hotá iín aibó de ebaadot-or-din aró boiyan goittó. **43** Mujilíc fúrai baade boóut zon Yohúdi edde Yohúdir dórmmot faráiyé de boóut zon Beyohúdi, Pául edde Bárnabas or fisá doijje. Tará duní zone ítara llói hotábattara hoiyé, aar Allar rahámot ot lagi táki bolla ítara re tuaijjo diiyé. **44** Tarfo ebaadot-or-din cóor or beecbák manúc, Malik or kalam fúni bolla zoma óiye. **45** Montor manúc or dol deki Yohúdi ókkol hásorote furaigiyói, aar ítara Páule hoór de hotár ulđa hotá ókkol hoói yore íba re beizzoti goijjíl. **46** Hétunot Pául edde Bárnabase hímmot or sáañte hoór de, “Añára ttu Allar kalam ebbe age tuáñrar hañse tobolik gorár zorur accíl. Tuáñra zettót híin ínkar goijjó aar nizoré ofúrani zindigir laayek no bóuli táaijjo, yala añára Beyohúdi ókkol or híkka firir. (aiōnios g166) **47** Kiyólla-hoilé Malike añára re endilla hókum díye de ki, ‘Añí tuáñra re Beyohúdi ókkol olla nur banaiyí, zeéne duniyair manúc beggúne nejat fa.”’ **48** Híyan fúni Beyohúdi ókkol bicí kúci óiye aar Malik or kalam or taarif gorát doijje; aar zetará re

ofúrani zindigi lla basflowa gýl ítara beggúne iman ainné. (aǎñios g166) 49 Héndilla góri Malik or kalam hé elakar agagurat fólīgiyoi. 50 Montor Yohúdi ókkole ebaadotgár mocúr mayafuain ókkol ore edde cóor or sóddar ókkol ore uskaidiyé. Héengori ítara Pául edde Bárnabas or uore zulúm cúru gorá bay duní zon ore hé elaka ttu neelaidiyé. 51 Tói tará duní zone ítara ulða téng or tollar dúil zárifelai Ikóniya cóor ot giyyégoi. 52 Héřiyar ummot ókkol kúciye edde Pak-Ruh lói furaiya ówat accíl.

14 Ikóniyat Pául edde Bárnabas Yohúdi ókkol or mujilíc-hánat giyyé. Héře tará éengori tobolik goijjé, zeén níki Yohúdi edde Beyohúdi becábici ye iman ainné. 2 Montor ze Yohúdi ókkole iman nú ané ítara Beyohúdi ókkol ore uskaidi yore imandár báiyain dor ulða matá hóraf gorídiye. 3 Toóu Pául edde Bárnabas héře boóut din táikkil; tará hímmot or sáañte Malik or baabute taalim dito, aar Malike tarár áta illayi-nicán ókkol edde taajuippa harhána ókkol dahái fbar rahámot or hotá sóiyi dé sábut goittó. 4 Montor cóor or manúc ókkol faát-faát ógilgoi; kessú Yohúdi ókkol or híkka, aar kessú sáhabi gún or híkka. 5 Hétolla hodún Beyohúdi ye edde Yohúdi ye ítara sóddar ókkol lói mili sólla goijjé de, Pául edde Bárnabas ore cíl or dola mari bolla edde beizzoti gorí bolla. 6 Montor tará híyan zani faijjé rár, héntu Lukáyoniya elakar cóor Lusítarat edde Darbit edde híin or atehańsór zaga ókkol ot dáigiyegei, 7 aar héře lagatar kúchóbor tobolik gorát accíl. 8 Lusítarat ézzon leng manúc boói tákito. fba héndilla zormo óoil, aar honódin áñři faijjé de náí. 9 Hé manúc cwa Pául or boiyan fúnat accíl. Páule yóggwar uzu díyan dóri saiyé rár dekér de, yóggwa ttu gom ói bolla iman asé, 10 hétolla fba ye eggwá doóñr abase đak mari hoór de, “Tuáñr ténge uzu gorí tíyo.” Hétunot yóggwa fál mari tíyaye aar áñrat doijje. 11 Páule goijjé de ham mán dekí manúc ókkole guzori Lukáyoniya zubane hoór de, “Añárar hańse insán or súrote debota ókkol lami aiccé!” 12 ítara Bárnabas or nam dyíl Zeyus, aar Pául or nam dyíl Harmis, kiyólla-hoilé fba ye kalam or hotá bicí hoitó. 13 Zeyus debotar mondir gán cóor or ekkágori baáre accíl. Híyan or imame cóor or geit ot biríc goru ókkol edde golar mala ókkol ainníl, kiyólla-hoilé ítara ttu edde manúc or dol ottu Pául edde Bárnabas or hańse kurbani peec goittó mon accíl. 14 Montor sáhabi Bárnabase edde Páule híyan fúinne rár,

nizor gair or hoor fáfifelaiye, aar manúc or dol lwát duñri zai guzori-guzori hoór de, 15 “Ó dustó ókkol, tuáñra iín kiyólla gorór? Añára yó de tuáñrar đóilla insán. Añára tuáñrar hańse kúchóbor tobolik gorír de ki hoilé, tuáñra e behar siz iín ottu zinda Allar uzu fíro, zibá ye asman, zobin, doriya, edde híin or bútoze zíin asé híin beggún foida goijjé. 16 Agor zobatan fba ye tamám koum ókkol ore nizor-nizor mon mozin soilito dyíl. 17 Toóu fba ye tuáñrar hańse endilla siz ókkol dii raikké zíine fbar gobá déh. fbar meérbani iíne zahér ó, ki hoilé, fba ye tuáñra re asman ottu zór dee edde moósum mozin fósol ókkol dee; fba ye tuáñra re hána dee edde tuáñrar dil kúciye furaide.” 18 Hotá híin hoói baade yo, manúc ókkol ore bicí mockil or sáañte tarár hańse kurbani peec gorá ttu bon gorá foijjé. 19 Lekin Enřiyok ottu edde Ikóniya ttu hoozzon Yohúdi héře aái manúc ókkol ore nizor híkka gorífelaiye. Baade ítara Pául ore cíl or dola maijíl, aar fba morigiyoí bóuli táari seńsai-seńsai cóor or baáre loigiyoí. 20 Montor ummot ókkol fbar sairókul ttu zoma ói baade, fba urí cóor or bútoze waafes giyyégoi. Aar tarfor din fba Bárnabas or fúańti Darbi cóor ot giyyégoi. 21 Tará Darbit kúchóbor tobolik gorí becábici ummot ókkol banaiyé. Baade tará abar Lusítarat, Ikóniyat, edde Enřiyok ot fřrigiyoi. 22 Héře tará ummot ókkol or dil ore mozbut goijjíl, aar iman ot lagi tákito nosfýot gorí hoiyé de, “Allar raijot góilte añára ttu hámaha bicí mosibot ókkol bordac gorá foribó.” 23 Páule edde Bárnabase hárr zomát ot murubbi-neta ókkol tuillé, aar ruza rakí edde dua gorí ítara re Malik or át ot gosáidiye, zibár uore ítara iman ainné. 24 Tarfore tará Pisídiya elaka báy zai Pampúliyat aiccé, 25 aar Perga cóor ot kúchóbor tobolik gorí Attaliya cóor ot giyyégoi. 26 Baade héntu zaáńs ot góri waafes Enřiyok olla rowana loiyé, zeře tará re ham uúin goittó Allar rahámot or át ot gosáidiya gýl zíin tará ttu fura goijjá óiye. 27 Tará héře foóńsi baade zomát or manúc beggún ore zoma goijjé, aar Alla ye tarár áta zíin-zíin goijjé híin beggún ítara hańse boiyan goijjé, aró boiyan goijjé de, Alla ye Beyohúdi ókkol olla yó iman or duwar kúille. 28 Baade tará héře ummot ókkol or fúańti boóut din táikke.

15 Yohúdiya ttu kessú manúc nise aái imandár báiyain dore endilla taalim diyat doijje de, “Zodi Muúsar Córiyot mozin ázomi no goró, tuáñra nejat fai no faribá.” 2 Híyan ot Páule edde Bárnabase ítara llói doró torkatorki edde barábari díye. Ahérit zomáte

fáisela lóiyē de, Pául, Bárnabas edde ítarar bútotu hoozzon manúc uore Jerúsalem zai sáhabi gún lói edde buzurgó ókkol lói e mosólar baabute mocuwara gorá foribó. **3** Baade zomáte tará re diferáiyē; tará Fonikcíyar edde Samáriar bútotu zaite-zaite hére imandár báiyain dore zanaiyé de, Beyohúdi ókkol kéngori Allar uzu fírer; híyane ítara beggún or hañse bicí kúci ainné. **4** Tará zeñtté Jerúsalem ot foónicce, zomát or maincé, sáhabi gúne edde buzurgó ókkole tará re estekbal goijjé, baade Alla ye tarár áta zín-zíin goijjé híin beggún ítarar hañse boiyan goijjé. **5** Montor Féroci fírka ttu imandár boinné de hoozzone urí hoór de, “Beyohúdi ókkol ottu ázomi gorár zorur aar ítara re Muúsar Córíyot amól gorí bolla hókum díyar zorur.” **6** Hétunot sáhabi gúne edde buzurgó ókkole hé mosóla gán or uore báfi bolla zoma óiyē. **7** Hére boóut torkatorki ói baade Fitore urí ítara re hoór de, “Ó báiyain, tuáñra toh zano, boóut din age Alla ye añré tuáñrar héntu basíloiyē, zeéne añr muk ottu Beyohúdi ókkole kúchóbor or hotá fúni iman ané. **8** Aar Alla, zibá ye fottí ekzon or dil zane, íba ye Beyohúdi ókkol ore yó kobul goré de híyan ítara re Pak-Ruh dii yore sábut goijjé, zendilla íba ye añára re yó dífl. **9** Íba ye añárar edde ítarar bútoore honó forók nó goré, kiyólla-hoilé íba ye toh ítara iman anóne ítarar dil ore yó sáf goijjé. **10** Tói yala, ze zuañl añárar bafadada ókkole boói nó fare aar añára yó nó fari, yíba ummot ókkol or hañd ot tulúdi Alla re kiyólla entán gorór? **11** Añára biccác gorí de, añára nejat faiyí de Malik Isár rahámote, zendilla ítara yó faiyé.” **12** Hétunot manúc beggún nizám mári táikkil, aar Pául edde Bárnabas or áta Alla ye Beyohúdi ókkol or hañse ze illayi-nicán ókkol edde taajuippa harhána ókkol daháil híin tará ttu fúnat accíl. **13** Tará ttu hotá hoiyá ói baade, Yakube hoór de, “Báiyain, añr hotá fúno. **14** Sáimone añára re buzáidiye, Alla ye Beyohúdi ókkol or bútotu Nizor lla eggwá kouw basíloito cúrut hondilla gori ítarar uzu nozor diyé deh. **15** Hotá híyan lói nobi ókkol or hotá yó mil há; pak-kalam ot endilla asé, **16** ‘Híin baade Añí waafes aiccúm, aar Dawud or raijjo re agor dóilla banai felaiyum. Híyan or bángasúra ókkol hónggori yore abar doró goríyum, **17** zeéne ar baki insán beggúne Mabud ore tuwa, tamám Beyohúdi ókkole úddwa, zetará re Añr bonda ói bolla ñaha gíyéh. Mabude héndilla fórmayie, zibá ye híin **18** boóut age lóti zanaidi di aiyér.” (aiōn g165) **19** Yakube aró hoór de, “Hétolla añr rai óilde, Beyohúdi zetará

Allar uzu fírer ítara re añára tokolif no dih, **20** bóлке añára ítarar hañse endilla lekí, ítara zen muttir hañse kurbani diya nafak hána na háa, zená no goré, gola sibi marifélaíya januwar or gusso na háa, edde lou na háa. **21** Kiyólla-hoilé Muúsar Córíyot toh agor zobana ttu lóti fottí cóore-cóore tobolik gorá zar, aar fottí ebaadot-or-din mujilíc-hána ókkol ot telawot gorá zar.” **22** Baade sáhabi gúne edde buzurgó ókkole zomát or manúc beggún lói mili fáisela goijjé de, ítarar bútotu hoozzon manúc basíloi Pául edde Bárnabas or fúañti Enṭiyok ot diferáibo. Ítara basíloiyē de óilde, imandár báiyain dor bútoore sóddar accíl de Yohúdah re, zibá re Barsába bóuli hoó, edde Sílas ore. **23** Tará áta ítara e ceñrí gán diferáil: “Enṭiyok ot, Síriyat, Kilicíyat asó de Beyohúdi imandár báiyain, tuáñrar báiyain añára sáhabi gún or edde buzurgó ókkol or torfóttu tuáñra re sólám. **24** “Añára fúinni de, añárar héntu hoozzon manúc añárar honó hókum sára aái tuáñra re tarár hotá lói ferecan goijjé, aar tuáñrar dil ot duk diyé. **25** Hétolla añára beggúne razirobbot ói fáisela goijjé de, hoozzon manúc basíloi tuáñrar hére añárar adorja Bárnabas edde Pául or fúañti diferái bolla. **26** Bárnabas edde Pául óilde endilla manúc zetará añárar Malik Isá Mosihr nam or wasté nizor zan hótarat félaíye. **27** Añára Yohúdah re edde Sílas ore tuáñrar hañse diferáir, zetará nizor muké tuáñra re añára leikkí de híin forí fúnaibo. **28** Pak-Ruh ttu edde añára ttu gom laiggé de, e zoruri hotá gún baade tuáñrar uore ar honó fuñzá tulí no di bolla, **29** ki hoilé, tuáñra muttir hañse kurbani diya hána ókkol na háíyo, lou na háíyo, gola sibi marifélaíya januwar or gusso na háíyo, edde zená no goríyo. Zodi tuáñra híin gorá ttu basi táko, bála óibo. Kúda háfiz.” **30** Baade tará re diferá gíyeh, aar tará nise Enṭiyok ot gíiyé. Hére tará zomát or manúc beggún ore zoma gorí ceñrí gán diiyé. **31** Manúc ókkole ceñrí gán forí nosíyoti hotá loot faiyé rár, bicí kúci óiyē. **32** Yohúdah edde Sílas, zetará nize nobi, tará imandár báiyain dore boóut hotá lói nosíyot goijjíl edde mozbut goijjíl. **33** Tará hére boóut din táki baade, imandár báiyain de tará re cántir dua loi bidai diyé, zeéne zetará tará re diferáiyē ítarar hére tará waafes zaigóí fare. **34** Lekin Sílas ottu hére táaiza gom laiggíl. **35** Pául edde Bárnabas óu Enṭiyok ot aró táikkil, aar hére tará aró bicí maincór fúañti manúc ókkol ore Malik or kalam or taalim diyat edde tobolik gorát accíl. **36** Hooddin baade Páule Bárnabas ore hoór de, “Aiyó,

añára ze cóor gún ot Malik or kalam tobolik goijjílám híin ot waafes zai imandár báiyain ókkol keén asé saáigoi.” 37 Bárnabase Yohánna re fúañti loizaitó saáil. Hé Yohánna re Markus hoói yó ðake. 38 Montor Páule íba re loizon gom no óibo bouli báippil, kiyólla-hoilé yár age íba ye ítara re Pampúliyat félai zai ítarar fúañti ham ar nó goré. 39 Híyan olla ítarar bútoe eén torkatorki óiye zeén níki ítara ezzon ottu ezzon síra óigiyoi. Baade Bárnabase Markus ore fúañti looi zaáns ot góri Sáifrus olla bacá lóiyé. 40 Montor Páule Sílas ore baiccé, aar imandár báiyain de ítara re Malik or rahámot or át ot gosáidi baade ítara rowana loiyé, 41 aar zomát or manúc ókkol ore iman ot mozbut gorái-gorái Siíriya edde Kilicíya báy zaat doiije.

16 Zaite-zaite Pául Darbi cóor ot foónicce, baade Lusítara cóor ot. Hére Timóti nam or ezzon ummot accíl. Yóggwar maa óilde ezzon Yohúdi zibá imandár boinné, montor yóggwar baf accíl de Girík kolum. 2 Lusítarat edde Ikóniyat asé de imandár báiyain de yóggwar nam goittó. 3 Pául ottu yóggwa re fúañti loizaitó monehoiyé, hétolla yóggwa re hériyar Yohúdi ókkol or zoriya ázomi goráil, kiyólla-hoilé yóggwar baf Girík kolum de híyan ítara beggúne zainto. 4 Tará cóore-cóore zai hookkán niyom uúin mani bolla zanaidíl zín Jerúsalem or sáhabi gúne edde buzurgó gúne zari goijjíl. 5 Héndilla góri zomát or manúc ókkol iman ot mozbut ówat accíl, aar ítarar dol dinbodin barát accíl. 6 Pául edde íbar saáñti ókkol Fergiya edde Galatíyar elaka báy zaat doiije, kiyólla-hoilé Pak-Ruh ye tará re Ecíyat tobolik no goittó maná goijjíl. 7 Tará Misíya elakar címat foónsi baade Bitúniya zilár bútoe zai bolla kucíc goijjíl, montor Isár Ruh ye tará re zaito nó deh. 8 Hétolla tará Misíya báy zai nise Toras cóor ot giyyégoi. 9 Hére Páule raitta ekkán dorcón ot dekér de, Makedóniyar ézzon manúce tíyai yore íba re bicí aros gorí hoór de, “Makedóniyat aái yore añára re modot gorógai.” 10 Páule dorcón nán deki baade, añára Makedóniyat zai bolla éhon toiyar óigiyigoi, kiyólla-hoilé añára buzí fajjíf de, ítarar hañse kúchóbor tobolik gorí bolla Alla ye añára re ðaikké. 11 Hétolla añára Toras ottu zaáns ot góri ruúru Samotarak ðiyat giílám, aar tarfor din Niyapúlís cóor ot. 12 Baade héntu Filíppi cóor ot giyyí, ziyán Makedóniyar meén cóor aar Romi ókkol táke de zaga. Añára hére hooddin táikkilám. 13 Ebaadot-or-din añára cóor or geiṭ or baáre hál or hañsat giyyí, táaijjilám de hére dua goittó ekkán

zaga faiyum. Añára boói yore hodún beṛiyáin lói hotá hoóilám zetará hére zoma óiye. 14 Fúner de ítarar bútoe Tuatíra cóor or Liídiya nam or eggwá mayafua accíl, zibá ye bayoinna rong or hoor besitó. Híba Allar ebaadotgár accíl. Pául or boiyan díyan dí fúni bolla Malike híbar dil kúlidil. 15 Zeñtté híba ye edde híbar gór ṭíya ye báptisma loiyé, híba ye añára re eén hoói nizor gór ot dawot dyíl, “Zodi tuáñra añré Malik or imandár bóuli táaro, tooile aái añr gór ot tákogai.” Héndilla hoói híba ye añára re mojbur goijjé. 16 Ek din añára duar zagat zair de októót eén óiye, añára re ek bañdi ye loot faiyé zibá re eggwá gonot bonar jine faiyé. Híba ye agun hotá hoói-hoói nizor girós ókkol olla bicí ṭiañ-foicá hamaitó. 17 Híba ye Pául or edde añárar fisé-fisé aái guzori hoór de, “Manúc itará óilde Alla Tálar gulam, zetará tuáñrar hañse nejat or rastar hotá boiyan gorér.” 18 Híba ye héndilla boóut din fán gorát accíl. Ahérit Pául ottu bezar laiggíl, aar fíri hé jin nwá re hoór de, “Añí toré Isá Mosilr name hókum dí, tui ibáñr bútottu neelizagói.” Hétunot jin nwá híbar bútottu neeligiyói. 19 Montor hé bañdir girós ókkole dekér de, ítara ṭiañ hamai faribár acá ar náí, hétunot ítara Pául edde Sílas ore dóri somónit adikari ókkol or hañse ṭani-ṭani loigiyé. 20 Ítara tará re Romi bisarhar ókkol or hañse aní hoór de, “Manúc íine añárar cóor ot úrussul foida gorér; itará óilde Yohúdi; 21 itará eén rosóm ókkol cíkar zín añára Romi ókkol olla gosón yáh manon zayes no.” 22 Awam ókkol óu Pául edde Sílas or hélaf ítarar bóng ot goíile. Tói bisarhar gúne hókum díye de, tarár gair or hoor fárifelai tará re bet mari bolla. 23 Ítara tará re bicígori mari baade ziyól ot díyl, aar tará re mozbut gori faáradi bolla ziyól or zimmadar ore hókum díyl. 24 Tói zimmadar gwá ye hé hókum fai yore tará re ziyól or ebbere bútor or kamárat raikké, aar tarár téng gun berít gólaidiye. 25 Baade tokoriban adá raitta Pául edde Sílas dua gorér edde Allar taarif or seér gaár, aar baki hodi ókkole híin fúnat accíl. 26 Atíkka hére eggwá ettór ḑoónr búsal aiccé, zeén níki ziyól-hánar guijja úddwa tóttoraiye. Hétukkun ot ziyól or doroz beggún edde hodir síyol lun kúligiyoi. 27 Zeñtté ziyól or zimmadar gwá gúm ottu tám faiyé, yóggwa ye ziyól or doroz gún kúla deikké rár súri neelai nizoré nize marifélaito saiye, kiyólla-hoilé yóggwa ye táaijjil de, hodi ókkol dáigiyegoi. 28 Montor Páule eggwá ḑoónr abase ḑák mari hoór de, “Nizoré hótí no goijjé; añára beggún eṛé así.” 29 Hétunot yóggwa ye batti

magai duñri bútoe giiyé, aar hafi-hafi Pául edde Sílas or téng or gurat foijjé. **30** Baade yóggwa ye tará re baáre aní fusár gorér de, “Jii, nejat faite añr ttu kii gorá foribó?” **31** Tará zuwab der de, “Malik Isár uore iman anó, tói tuñí edde tuáñr gór tía ye nejat faiba.” **32** Tarfore tará yóggwa re edde yóggwar gór or beggún ore Malik or kalam fúnaie. **33** Hé rait or hé októť ziyól or zimmadar gwá ye tará re loizai tarár zohóm ókkol dúifelaiye, baade yóggwa ye edde yóggwar gór tía ye éhon bápťisma loiyé. **34** Tarfore yóggwa ye tará re nizor gór ot aní hána diiyé. Allar uore iman aní yóggwa edde yóggwar gór tía bicí kúci óiye. **35** Tarfor din biínna óiye rár, bisarhar gúne ziyól or zimmadar or hañse fulic ókkol difeřái hoór de, “Manúc cún ore hálás gorí doh.” **36** Hétunot ziyól or zimmadar gwá ye Pául ore hoór de, “Tuáñra duní zon ore hálás gorídi bolla bisarhar ókkole hókum díye. Tuáñra yala zaigói faribá; cántir sáante zoogói.” **37** Montor Páule fulic cún ore hoór de, “Añára hódun Romi manúc ói baade yo ítara añára re bisar ot no tulí beggún or muuntu bet mari ziyól ot díye, aar ehón ítara añára re nizám or sáante hálás gorí dér de níki? Héndilla bilkúl ói no faribó; ítara nizebaze aái añára re hálás goróukgai.” **38** Baade fulic cúne hotá híin bisarhar gún ore zanaie, aar Pául edde Sílas Romi manúc de fúni ítara đoorraigíyói. **39** Ítara aái tará ttu maf saie, aar tará re ziyól or baáre aní aros gorér de, “Meərbani góri cóor gán ottu zoogói.” **40** Tará ziyól ottu hálás ói baade Lídiyar gór ot giiyé; hére tará imandár báiboináin ókkol lói dola óiye, aar ítara re hímmot díye. Tarfore tará héntu giiyégoi.

17 Tará Amfipolis edde Apoloníya cóor báy zai Tisólonika cóor ot aiccé, zeřé Yohúdir ekkán mujilíc-hána accíl. **2** Páule nizor niyom mozin mujilíc-hánat giiyé, aar lagatar tin ebaadot-or-din foijjonto ítara llói pak-kalam ottu toskara ókkol goijjé. **3** Íba ye toskara gorí buzár de edde dolil der de ki, Mosih ttu duk faibar edde mora ttu zinda ówar zorur accíl. Íba ye hoie de, “Añi tuáñra re ze Isár baabute boiyan gorír, íba óilde hé Mosih.” **4** Ítara hoozzone iman aní Pául edde Sílas lói búng óiye, héndilla đoóñr ek dol Girík dindár manúc edde boóut zon mocúr mayafuain óu búng óiye. **5** Montor ar baki Yohúdi ókkol ottu gairot lagi bazar ottu hodún hóraf manúc lói eggwá đaái bainde aar cóor ot úrussul foida goijjé. Ítara Jason or gór ore hámlla gorí Pául edde Sílas ore

tuwaiyé, zeéne tará re awam ókkol or muuntu aní fare. **6** Montor tará re zettót tuwai nó faa, ítara Jason edde kessú imandár báiyain dore řani-řani cóor or adikari ókkol or muuntu ainné, aar guzori hoór de, “Manúc itará fura duniyait ferecani foida gorí yala eřé yó aiccé, **7** aar Jasone itará re nizor gór ot zaga diiyé. Itará beggúne baáñcca Káisar or hókum or ulđa goré, aar hoó de, Káisar bade aró ekgwá baáñcca asé, zibár nam Isá.” **8** Héndilla hoói ítara awam ókkol or edde cóor or adikari ókkol or matá hóraf góriidiye. **9** Montor Jason edde oinno manúc ókkol tará lla zabin óiye rár, sóddar ókkole tará re eridiyé. **10** Hé din raitta imandár báiyain de toratori Pául edde Sílas ore Beriyat duñraidiyé. Hére foóñsi yore tará Yohúdir mujilíc-hánat giiyé. **11** Héřiyar Yohúdi híin Tisólonika cóor or Yohúdi ókkol or túaro cáda-cída accíl, kiyólla-hoilé ítara đoóñr azzuye kalam fúni kobul goijjíl. Ítara Páule ziín hoitó híin fottí din pak-kalam tahákit gorí sóiyi né na sóiyi saitó. **12** Hétolla ítara ttu boóut zone iman ainné; héndilla boóut zon Girík mocúr mayafuain edde morotfuain de yó iman ainné. **13** Montor Tisólonikar Yohúdi ókkole zeñtté Páule Beriyat óu Allar kalam tobolik gorér de fúinne, ítara hére yó zai manúc ókkol ore uskaidi oulzóul foida goijjé. **14** Hétolla imandár báiyain de toratori Pául ore doiřjar hañsat duñraidiyé, montor Sílas edde Timóti hére táigilgoi. **15** Zetará Pául ore baráidito giíl ítara íba re Aten cóor foijjonto foóñsaidiye, aar Sílas edde Timóti zendilla fare héndilla hára Pául or hañse ai bolla hókum fai yore ítara waafes giiyégoi. **16** Páule Aten cóor ot Sílas olla edde Timóti lla entezar gorér de októť, hé cóor gán mutti loi furaiya de deki íba ttu dil ot bicí ferecan laiggíl. **17** Hétolla íba ye mujilíc-hánat Yohúdi edde dindár Beyohúdi ókkol lói toskara ókkol goittó, héndilla somónit zai zetará re lootfa ítara llói yó fottí din goittó. **18** Ípíkuri edde Stoiki fírkar hoozzon úzure yó íba llói barábari díyat doiřje, hodúne hoór de, “E fálťu ite kii hoitó sár dé?” Ar hodúne hoór de, “Ite toh eggwá bidecí debotar baabute taalim der fán lager.” Ítara e hotá etollá hoie, kiyólla-hoilé Páule Isár baabute edde mora ttu zinda ówar baabute kúchóbor tobolik gorát accíl. **19** Ítara Pául ore Ariyopagus mujilíc or hére aní fusár gorér de, “Tui ze noya taalim ekkán doór híyan kii añára zani faijjum né? **20** Kiyólla-hoilé tui toh añárar han ot endilla hotá ókkol anór, ziín honódin fúna nó zah, hétolla añára ttu híin or sóiyi maáni zainto

monehoór.” **21** Tamám Ateni ókkol edde bidecóitta ókkol zetará hé cóor ot tákito, ítara siríf noya-noya hotá ókkol howát edde fúnat ñaim haraitó. **22** Páule Ariyopagus mujilíc ot tíyai hoór de, “Ó Ateni ókkol! Añí dekír de, tuáñra hárr mikká ttu bicí dindár. **23** Kiyólla-hoilé añí berai-berai tuáñra fuñza goró de jiníc ókkol díyan dóri saáir de októ, añí endilla ekkán kurbani-gáñ yó deikkí ziyán ot leikká asé de, ‘OSIN KÚDAR HAÑSE.’ Hétolla tuáñra no zani zibár fuñza gorór, añí íbar baabute boiyan gorír deh. **24** “Ze Alla ye duniyai re edde híyan ot asé de híin beggún foida goijjé, íba zettót asman zobin or Malik, íba insán or áte banaiya mondir ókkol ot no táke. **25** Íba honó kessúr muútac ot no fore, hétolla íba ttu insán or át or honó hédmot or zorur náí, kiyólla-hoilé íba Nize fottíkiyo re zindigi dee, niyác dee edde beggún dee. **26** Ekzon manúc ottu íba ye fura duniyait táki bolla tamám koun ókkol foida goijjé, aar ítara hoñtté hon zagat tákibo híin óu íba ye age lóti fáisela gorí raikké. **27** Alla ye héndilla etollá goijjé, zeéne ítara átai-atai tuwai faibar acáye íbar talac goré, montor háleke íba añára honókiyo ttu duré de no. **28** Kiyólla-hoilé añára toh íbar bútoze zindigi harai, solafira gorí edde zinda así. Tuáñrar kessú cáir ókkole úddwa endilla hoiyé, ‘Añára yó íbar fuain.’ **29** “Hétolla, añára zettót Allar fuain, añára ttu endilla kíyal nu aná foribó de ki, Kúdayi hoó de híyan cúna, sañdi, yáh fattór or dóilla ekkán sóbi, ziyán or cokól insán or añka edde báfani lói bana giyé. **30** Agor zobanat manúc ókkole Alla re no zainto de híyan íba ye deklé yo nó deké fángori tákito, montor yala íba ye hárr zagar manúc beggún ore touwá gorí bolla hókum der. **31** Kiyólla-hoilé íba ye ekgwá din tík gorí raikké, ze din ot íba ye Nizor basíloiya Manúc cwar áta insáf lói duniyair bisar goríbo. íba ye híyan íba re mora ttu zinda gorí manúc beggún or hañse sábut goijjé.” **32** Zeñtté ítara mora ttu zinda ói urár baabute fúinne, hoozzone Pául ore téceraiye, montor ar hodúne hoór de, “Añára yían or baabute tuáñr ttu arek motto fúnyum.” **33** Baade Pául hé mujilíc ottu giyégoi. **34** Hoozzon manúc íba llói bóng díye aar iman ainné. Imandár ítara bútoze mujilíc híyan or membór Diyónisiyus accíl, Damari nam or eggwá mayafua accíl, fúañti aró hoozzon accíl.

18 Yárbaade Pául Aten cóor ottu bacá lói Kórin cóor ot giyé. **2** Hére íba ye Ekúila nam or

ézzon Yohúdi loot faiyé, zibá Pontus ot zormo óoil. Baáñcca Kalediyuse Yohúdi beggún ore Rom sári zaitogói hókum díyl de hétolla, yóggwa kessú ñaim age yóggwar bou Prisíla re looi Ítali ttu aáigilgoi. Páule ítara re saitó giyé, **3** aar íba yó zettót ítara dóilla ñambu-ñakoya, íba ítara fúañti táki ham goijjíl. **4** Íba ye fottí ebaadot-or-din mujilíc-hánat toskara ókkol gorí-gorí Yohúdi ókkol ore edde Girík ókkol ore borai aníbar kucíc goittó. **5** Zeñtté Sílas edde Timóti Makedóniya ttu aiccé, Páule kalam tobolik gorát furafuri lagi táka cúru goijjé. Íba ye Yohúdi ókkol or hañse gobá díto de, Isá óilde Mosih. **6** Montor Yohúdi ókkole zettót Pául or muhálefi edde beizzoti gorér, íba ye ítara ulða nizor gair or hoor zárifelai hoór de, “Tuáñrar lou wór zimma tuáñrar matár uore óuk! Añí behosúr. Añí ehón ottu lóti Beyohúdi ókkol or hére zaiyumbói.” **7** Yárbaade Pául mujilíc-hána sári ek manúc or gór ot giyé, zibár nam Titus Yustus. Yóggwa Allar ebaadotgár accíl, aar yóggwar gór gán mujilíc-hánar dake accíl. **8** Mujilíc-hánar sóddar Krispuse edde yóggwar gór tíya ye Malik or uore iman ainníl, héndilla Pául or boiyan fúni boút Kórintióle yó iman ainníl aar báptisma lóil. **9** Ek din raitta Malike Pául ore ekkán dorcón ot hoór de, “No dlooraic, bólke howát ták, nizám ói no tákic, **10** kiyólla-hoilé Añí tor fúañti-fúañti así. Tor hótí gorí bolla toré honókiye hámla no gorfbo, kiyólla-hoilé e cóor ot Añr ttu bicí manúc asé.” **11** Tói Pául derbosór foijjonto Kórin ot táki maincóre Allar kalam or taalim díyl. **12** Montor Galiyo zeñtté Akaya elakar hókumot-goróya accíl, Yohúdi ókkol etkofák ói Pául or hélaf tíyaiye aar íba re adalot ot ainné. **13** Ítara hoór de, “Manúc ibá ye maincóre Allar ebaadot endilla torikaye goittó uskaider, ziyán Córivot or ulða.” **14** Páule hotá howá cúru goitté, Galiyo ye Yohúdi ókkol ore hoór de, “Ó Yohúdi ókkol, zodi tuáñrar elzam yían honó sóiyi hosúrír yáh gollot ham or baabute óito, tooile tuáñrar hotá fúnón añr lla hazor óito. **15** Montor yían ot zettót taalim, nam edde tuáñrar nizor córiyot or baabute súwal gólaiya asé, yían ore tuáñra nizebaze hól gorógoi; añí endilla maamelar bisarhar óito no saáir.” **16** Héen hoói yóggwa ye ítara re adalot ottu duñraidiyé. **17** Hétunot ítara beggúne mujilíc-hánar sóddar Sostin ore dóri yore adalot or muúntu mara-dóra goijjé. Montor Galiyo ye híin or híkka honó díyan nó deh. **18** Pául Kórin ot boút din táki baade, imandár báiboináin dor ttu bidai loi

zaáns ot góri Sííriya mulluk ot zai bolla rowana óiye; fúañti Prisíla edde Ekúila yó accíl. Kinkíriya cóor ot táite íba ye nizer sul harifelail, kiyólla-hoilé íba ekkán manoc or tole accíl. **19** Tará Ífisas cóor ot foónsi baade Páule Prisíla edde Ekúila re hére raikké. Baade íba nize mujilíc-hánat zai yore Yohúdi ókkol lói toskara gorát doiije. **20** Yohúdi ókkole íba re aró hooddin ítarar fúañti táki bolla aros goijjíl, montor íba razi nó. **21** Bólke zaibarcót ítarar re hoór de, “Alla ye sailé añi tuáñrar hañse abar aiccúm.” Baade íba zaáns ot góri Ífisas ottu rowana óiye, **22** aar Kaisáriyat lami baade uore Jerúsalem ot giyyé. Tarfore hériyar zomát or manúc ókkol ore sólám zanai Entiyok ot giyyégoi. **23** Hére hooddin táki baade íba Galatíya edde Fergiya elakar agagurat zai-zai ummot ókkol or iman mozbut gorát accíl. **24** Hé októt Apólos nam or ézzon Yohúdi Ífisas ot aiccíl, zibá Alexzendariya cóor ot zormo óoil. Yóggwa ye cúndorgori waáz goittó, aar pak-kalam furafuri zainto. **25** Yóggwa ye Malik or torikar baabute taalim faáil, aar bicí josbar sáañte Isár baabute sóiyigori taalim dito edde cíkka díto, montor yóggwa ye zainto de siríf Yaháyar báptismar baabute. **26** Yóggwa ye hímmot or sáañte mujilíc-hánat waáz gorát doiije, montor Prisíla ye edde Ekúila ye zeñtté yóggwar hotá fúinne, ítarar yóggwa re ítarar gór ot loizai Allar rastar baabute aró cúndorgori buzáiyé. **27** Apólos ottu Akaya elakat zaito monehoiyé rár, Ífisas or imandár báiboináin ókkole yóggwa re hímmot díye, aar yóggwa re estekbal gorí bolla hériyar ummot ókkol or hañse ekkán ceñrí leikké. Aar zetará Allar rahámote iman ainné ítarar re yóggwa ye hére foónsi baade bicí modot goijjé. **28** Kiyólla-hoilé yóggwa ye Isá óilde Mosih de híyan pak-kalam ottu dolil diyat accíl, aar héndilla gorí yóggwa ye manúc ókkol or muuntu Yohúdi ókkol ore zuresúre gollot sábut goijjíl.

19 Apólos Kórin ot tákite, Pául Ecíya elaka báy sofór gorí Ífisas ot aiccé. Hére íba ye hoozzon ummot loot faáil. **2** Íba ye ítarar ttu fusár gorér de, “Tuáñra iman ainnó de októt Pak-Ruh faáila né?” Ítarar zuwab der de, “Nó fai, añaara toh Pak-Ruh asé bóuli úddwa nó fúni.” **3** Hétunot Páule fusár gorér de, “Tóoile tuáñra har báptisma loiyó dé?” Ítarar zuwab der de, “Yaháyar báptisma.” **4** Páule hoór de, “Becók Yaháya ye touwár báptisma díye. Montor íba ye toh manúc ókkol ore endilla hoóil, ‘Añi baade aibó de íbar uore iman aníyo, yáni Isár uore.’” **5** Hotá híyan fúni ítarar

Malik Isár name báptisma loiyé. **6** Aar Páule ítarar uore át díye rár, ítarar uore Pak-Ruh aiccé, baade ítarar gabi zubane hotá howát doiije, aar Allar kalam boiyar gorát doiije. **7** Ítarar tokoriban baró zon beñaain accíl. **8** Yárbaade Pául mujilíc-hánat zai tin mac hímmot or sáañte tobolik goijjíl, aar Allar raijor baabute toskara ókkol gorí ítarar re boñabár kucíc goijjíl. **9** Montor ítarar hoozzon or dil doró ógilgoi, aar ítarar iman nu aní maincór muuntu Malik or Torikar baabute gifot ókkol gorát doiije. Hétolla Pául ítarar ttu síra ógilgoi aar ummot ókkol ore fúañti loizai Turanus nam or ezzon manúc or morkos ot fottí din toskara goittó. **10** Héndilla dui bosór fán ówat accíl, hétolla Ecíyat tákito de Yohúdi edde Girík beggúne Malik or kalam fúni faijjíl. **11** Alla ye Pául or duara endilla taajuippa keramat ókkol goittó, **12** zeén níki íbar nummal edde gaar uoror hoor ókkol íbar gaat bazái biyaraimmar hañse loizailé, ítarar biyaram ókkol gom óizaytoi aar hóraf jin ókkol neelizaytói. **13** Hoozzon Yohúdi zetará zaga-zaga zai manúc ókkol ottu hóraf jin ókkol dáfaiito, ítarar Malik Isár nam estemal gorí yó héndilla goríbar kucíc goijjíl. Ítarar hoiyé de, “Añaara toré Isár name neeliai bolla hókum dí, Zibár baabute Páule tobolik goré.” **14** Sekiva nam or ézzon Yohúdir doónr imam or háñt twa fua ye yó héndilla goittó. **15** Ekbar hóraf jine ítarar re hoór de, “Isá re toh añi siní, aar Pául ore yó siní, montor tuáñra hon?” **16** Hétunot ze manúc cwa re hóraf jine faiyé íte ítarar háñt óu zon or uore záp maiije, aar ítarar beggún ore ziti eén hámla goijjé, zeén níki ítarar zohóm fai gór gán ottu biyossor dáigiyegeoi. **17** Tói Ífisas ot tákoya Yohúdi edde Girík beggúne zettót e hóbor yíán faiyé, ítarar beggún dooraigiyói, aar Malik Isár nam or mohíma óiye. **18** Iman ainné de ítarar boóut zone aái nizer-nizer hórafi ókkol cíkar gorí zahér goijjíl. **19** Aar ítarar bútotu boóut zon zetará age jadugor accíl, ítarar nizer-nizer kitab ókkol aní yore ekkán ot zoma gorí beggún or muuntu furat difélaíye. Ítarar hé kitab pún or dam hísaf goijjé rár dekér de, muṭmaṭ fonzaic ázar dinár óiye. **20** Héndilla góri Malik or kalam bicígori fólat accíl, aar manúc ókkol or dil zitat accíl. **21** Híin beggún ói baade, Páule Makedóniya edde Akaya elaka báy Jerúsalem ot zaito niyot goijjé. Íba ye hoiyé de, “Hére zai baade añr ttu Rom cóor ot óu zaa foribó.” **22** Tói íba ye nizer dui zon modotgár ore, yáni Timóti re edde Erastus ore íbar age Makedóniyat diferáiyé, montor íba Ecíya elakat hooddin táigilgoi. **23** Hé októt Malik or Torikar

baabute doónir hánggama uitté. **24** Kiyólla-hoilé hére Dimiteriyus nam or ezzon rufar bainna accíl, zee niki devi Artemis or gura-gura mondir ókkol banaitó, aar hé hame mistíri ókkol olla bicí fáidai aintó. **25** Yóggwa ye ítara re edde héndilla ham or oinno mistíri ókkol ore fúañti matai hoór de, “Báiyain, tuáñra toh zano, añára e ham or zoriya bála amodoni fair. **26** Tuáñra yíán óu dekór edde fúnor, Páule siríf ífisas ot no bólke fura Ecíyar bicí maincóre úddwa bíraifelaiye deh. Íba ye hoó de, át or banaiya debota ókkol kessú no. **27** Híyan or zoriya siríf añárar ham or uore bodnam aibó de no, bólke muhán devi Artemis or mondir or izzot or hání yó óibo aar híbar muhángiri yó nac óizayboi, zibá re Ecíyar edde fura duniyair maincé fuñza goré.” **28** Híyan fúni ítara ttu bicí guccá uitté, aar guzori-guzori hoór de “Íficiól or devi Artemis muhán.” **29** Éhon or búture guñra cóor gán oulzóul ot forigiyói. Manúc ókkole Gayus edde Aristarkus nam or ze dui zon Makedóniol Pául or fúañti sofór ot zaar ítara re dórifelai fúañti ekku duñre, mujilíc goré de zaga gán ot giyé. **30** Montor Pául manúc or ðaái or muúntu zaito saiye rár, íba re ummot ókkole zaito nó deh. **31** Ecíyar hoozzon elakayi zimmadar ókkol zetará Pául or dustó, ítara yó íbar hañse ekkán hóbor foónsai bicí aros gojiífl de, íba zen mujilíc goré de zaga gán ot no zaa. **32** Hére manúc ókkol guzorat accíl, hodúne yíán hoói guzorer aar hodúne waán hoói guzorer. Boóut zone ítara hére kiyólla zoma óiye de úddwa hoi no fare. **33** Hodún Yohúdi ye Alexzendar ore manúc or ðaái war bútottu neelai ítarar muúntu díye; yóggwa ye manúc ókkol ore áte icára gorí nizám óito hoiyé, zeéne yóggwa ye mujilíc or muúntu sófai dí fare. **34** Montor ítara zettót yóggwa Yohúdi de híyan ót faiyé, ítara beggúne ek abase dui gónða foijjonto endilla guzorat accíl, “Íficiól or devi Artemis muhán.” **35** Baade ahérit, cóor or kerani ye manúc ókkol ore nizám márai hoór de, “Ó Íficiól, e hotá yíán toh beggúne zane, ífisas óilde muhán devi Artemis or mondir or edde sóbi waán or sóoñloya, ziyán asman ottu foijjé. **36** Hétolla, iín zettót inkar gorí no fare de héndilla hákikot ókkol, tuáñra ttu nizám ón saa, aar bánggori kessú no gorón saa. **37** Kiyólla-hoilé tuáñra e manúc ziín ore eřé ainnó, ítara no mondir ottu ðahañiti goijjé aar no añárar devir kuféri goijjé. **38** Hétolla, zodi Dimiteriyus ottu edde yóggwar sáañti mistíri ókkol ottu honókiyor ulða cékayot táke, adalot ókkol toh kúla asé, aar hákim ókkol óu asé. Hére zai ítara

ezzon olla ezzone mooddima goróukgoi. **39** Montor zodi tuáñra yaar túaro kessú goittó soó, tooile híyan kaanuni mujilíc ot fáisela gorá foribó. **40** Aijja óiye de hánggamar zoriya añárar uore elzam foribár ðoor asé. Zodi fore, añára e hánggamar honó waja dahái no faijjum, kiyólla-hoilé yíán or toh honó gom waja náí.” **41** Híyan hoói baade yóggwa ye mujilíc hótom gorífelaiye.

20 Hánggama bon óizaygoi baade, Páule ummot ókkol ore mata baiyé, aar ítara re hímmot dí baade ítara ttu bidai loi Makedóniyat zai bolla bacá lóiyé. **2** Hére foónsi baade, héřiyar elaka ókkol ot zai-zai imandár báiyain dore becábicé hímmot dí baade Giris ot aiccé. **3** Íba hére tin mac táikkil, aar zaáñs ot góri Síiríya mulluk ot zaibar age Yohúdi ókkole íbar hélaf sail gúraiye de hétolla, íba Makedóniya báy waafes zaitogói fáisela goijjé. **4** Pául or fúañti hoozzon sáañti accíl, ítara óilde, Beriya ttu Purus or fua Sopétar, Tisólónika ttu Aristarkus edde Sékundus, Darbiya ttu Gayus, Timóti, Ecíya ttu Tukikus edde Torofímos. **5** Ítara age neeli zai Toras ot añára lla entezar gorí táikkil. **6** Cútar-sára Ruřir-id baade añára zaáñs ot góri Filíppi ttu bacá lóiyí, aar fañs din or búture ítarar hére Toras ot foónicci; hére añára háñt din táikkilam. **7** Háftar foóila din, zeñtté añára fúañti hána hái bolla zoma óiyi, Páule manúc ókkol ore waáz gorát doijje, aar tarfor din rowana óibar niyote adá rait foijjonto gorát accíl. **8** Añára uoror țalar ze kamárat fúañti zoma óiyi, hére bicí serak ókkol zolat accíl. **9** Ezzon juwan manúc zanálar ðáke góri boiřá accíl. Yóggwar nam óilde Etukus. Pául or waáz zetó lamba ór, manúc cwa héto gúm ot forat accíl. Ahérit mur gúm ot fori yóggwa tin țalar uottú meřit forigiyói, aar yóggwa re tuillé rár mora loot faiyé. **10** Pául nise zai yóggwar uore fori añza mari dóri hoór de, “No ðooraiyó, yoggwá ttu aijjó foran asé.” **11** Baade Pául abar uoror țalat zai ruří bángi háiyé, aar fózor fáre foijjonto hotábattara hoói baade héntu giyégói. **12** Manúc ókkole juwan fua wa re gór ot zinda loigiyé, aar ítara añañta nó kúci óiye deh. **13** Añára age neeli zai zaáñs ot urí Asos cóor ot zai bolla rowana óiyi, zentú Pául ore tulí loiyum hoói niyot goijjé. Íba ye héndilla entezam etollá goijjé, kiyólla-hoilé íba hére áñři-áñři zaibar niyot goijjé. **14** Zeñtté íba ye añára re Asos ot loot faiyé, añára íba re zaáñs ot tulí looi Mitulen cóor ot aiccé. **15** Aar héntu zaáñs ot góri zai

tarfor din Kiyos ñiyar muuntu foónicci, yár tarfor din Sámos ñiyat aiccí, baade yár tarfor din Miletus cóor ot foónicci. 16 Kiyólla-hoilé Páule age lóti fáisela goijjíl de, zaáns ot góri zaibarcót ífisas ot no gólibo, zeéne íba ttu Ecíyat ñaim hara no fore, kiyólla-hoilé íba ye Jerúsalem ot foóni bolla duadi goijjíl, farilé, Penñikos or din. 17 Miletus ottu Páule ífisas ot hóbor diferái zomát or murubbi-neta ókkol ore mataiyé. 18 Ítara zeñtté íbar hére aiccé, íba ye ítara re hoór de, “Tuáñra nize toh zano, ań Ecíyat aiccí de foóila din lóti tuáñrar fúańti hárr októ keéngori haraáilam. 19 Yohúdi ókkol or sail or zoriya ań uore ze mosibot ókkol aiccíl, híin ań furafuri norom or sáante edde suk or faní bácai-bácai bordac gorí Malik or hédmot goijjíl. 20 Tuáñra toh zano, ań tuáñra lla fáida ó de héndilla honó hotá tuáñra ttu lukai nó rakí, bólke tuáñra re kúlamela góri edde góre-góre taalim diyí. 21 Ań Yohúdi ókkol ore edde Girík ókkol ore horagori zanaidiyí de, ítara ttu touwá gorí Allar uzu fíra foribó, aar ańárar Malik Isár uore iman aná foribó. 22 “Aar ehón, Pak-Ruhr hotá mozin ań Jerúsalem ot zair, hére ań uore kii guzoribó ań hoi no fari. 23 Ań siríf yían zani, Pak-Ruh ye ańré fottí cóor ot zanaider de ki, ziyól edde mosibot ań lla entezar gorí asé. 24 Háir! Ań ań zan ore nizar lla honó muillo bouli no ñaari; ań siríf niyot óilde, tobolik or ham edde ze zimmadari Malik Isá ttu ań faiyí híyan adai gorón, yáni Allar rahámot or kúchóbor or gobá dón. 25 “Yala ań zani, tuáñra zetarár hańse ań Allar raijior tobolik goijjíl, tuáñra ań muk ar no dekiíba. 26 Hétolla aijja ań tuáñra re hoóir, tuáñra honókiyor lou wór zimma ań no. 27 Kiyólla-hoilé ań toh Allar furafuri moncá re tuáñrar hańse boiyan goitté fissá nó mari. 28 Hétolla nizoré nize úńciyar aar Pak-Ruh ye tuáñra re bérasóol or zák zibár saásita-goróya banaiyé yíba guńra re lói yó úńciyar. Allar zomát or soroya bono, ziyán íba ye Nizar Fuar lou loi kinné. 29 Ań zani, ań zaigói baade tuáñrar bútoe hótarnak rangkuńir ókkol aibó, aar bérasóol or zák ore hótí goríbo. 30 Ebbe tuáñrar bútotu úddwa kessú manúc urí báańra-báańra hotá ókkol hoibó, zeéne ummot ókkol ore ítarar híkka gorífelai fare. 31 Hétolla úńciyar táikko! Monot rakiyo de, tin bosór foijjonto ań raite dine suk or faní bácai-bácai tuáñra re nicót gorá bon nó gorí. 32 “Yala ań tuáñra re Allar át ot edde íbar rahámoti kalam ot gosáidir. Hé kalame tuáñrar ruúhani torki gorí faribó, aar pak gorá gíyeh de ítarar bútoe cámil gorí miras

dii faribó. 33 Ań toh honókiyor cúna-cańdir, yáh hoorsuor or lalós nó gorí. 34 Tuáñra nize de zano, ań e át ííne ham gorí ań edde ań sáanti ókkol or zorurot ókkol fura goijjíl. 35 Ań goijjíl de hárr kessú loi tuáñra re daháiyi de ki, héndilla dorómoro meénnot gorí-gorí ańára ttu komzur ókkol ore modot gorár zorur, aar Malik Isár e hotá monot raká foribó, ziyán íba Nize hoiyé, ki hoilé, ‘Lowar túaro diiya bicí mubarek.’” 36 Híin hoiyá ói baade, Páule ańrú félai ítara beggún or fúańti dua goijjé. 37 Baade ítara beggúne Pául ore sibi dóri bicí haíndé, aar íba re appá díye. 38 Háasgori íba ye ítara re íbar muk ar no dekiíbo hoiyé de híyane ítara bicí ferecan óye. Tarfore ítara íba re zaáns or héddur foijjonto baráidiye.

21 Ańára ítarar héntu zaigói baade, zaáns ot góri ruúru Kos ñiyat giyí. Tarfor din Rodes ñiyat, aar héntu Patara cóor ot. 2 Fonikcíyat zaar de ekkán zaáns loot fai, ańára híyan ot urí rowana óyi. 3 Aar Sáifrus ñiya wa deikkí rár, yíbar doóin míkka báy zai Síiriya mulluk or Țayár ot laimmí, zere zaáns or malsámána ókkol lamaibár hotá accíl. 4 Hére ummot ókkol tuwai fai yore ańára ítarar fúańti ek háfta táikki. Pak-Ruhr hédaiyote ítara Pául ore maná goijjíl de, Jerúsalem ot no zaito. 5 Zeñtté ańára rowana óibar októ óye, ańára héntu bacá lói ańárar sofór ot zaa cúru goijjíl. Ítara bou fuain cóo beggúne ańára re cóor or baáre foijjonto baráidiye. Hére ańára doijjar hańsat ańrú félai dua goijjíl. 6 Baade ezzon ottu ezzone bidai loi ańára zaáns ot uittígoi, aar ítara nizor gór ot waafes giyégoi. 7 Țayár ottu zaáns lói sofór gorí Patolomis cóor ot foónicci, aar hériyar imandár báiboináin dore sólám zanai ítarar fúańti ek din táikki. 8 Tarfor din ańára rowana ói Kaisáriyat foónicci, aar kúchóbor tobolik-goróya Filíp or gór ot táikki. Hé Filíp accíl Jerúsalem ot háńt zon modotgár basíloil de ítarar bútotu ekzon. 9 Yóggwa ttu sair gwá abiyáta zérfua accíl, zetará nobi ísafe Allar kalam hoitó. 10 Ańára hére boóut din tákar baade, Yohúdiya ttu Agabos nam or ezzon nobi aiccíl. 11 Yóggwa ańárar hańse aái Pául or duali looi nizor át téng bańdifelai hoór de, “Pak-Ruh ye fórmár de, ‘Jerúsalem ot Yohúdi ókkole e dualir girós ore endilla gori bańdíbo, aar íba re Beyohúdi ókkol or át ot gosáidibo.’” 12 Híyan fúni ańára edde hériyar manúc ókkole Pául ore Jerúsalem ot no zaito fóriyat goijjíl. 13 Montor Páule zuwab diyé de, “Tuáñra hańdahari gorí ań dil bańgífelor kiyá? Ań toh Jerúsalem ot Malik Isár nam or wasté

siríf bañdá hái bolla toiyar así de no, bólke mori bolla úddwa toiyar así.” 14 Iba re zettót añára manai no farir, añára yíán hoói nizám mári táikki, “Malik or moncá fura óuk.” 15 Hé din ókkol baade añára toiyar ói uore Jerúsalem ot zai bolla rowana loiyí. 16 Añárar fúañti Kaisáriya ttu hoozzon ummot óu giíl; ítara añára re Sáifrus ñiyar Manason nam or ezzon manúc or gór ot loigiyé, zeṛe añára tákibar hotá accíl. Hé manúc cwa accíl agor ummot ókkol ottu ezzon. 17 Zeñtté añára Jerúsalem ot foónicci, imandár báiboináin de añára re kúcir sáañte estekbal goijjé. 18 Tarfor din Páule añára re fúañti looi Yakub ore saitó giyyé. Héṛe zomát or buzurgó beggún házir accíl. 19 Páule ítara re sólam zanai baade, íbar tobolik or ham or duara Alla ye Beyohúdi ókkol or dormiyan ot zín-zín goijjé híin ekkán-ekkán boiyan gorát doijje. 20 Híin fúni ítara Allar taarif goijjé, aar Pául ore hoiyé de, “Bái, tuñí toh dekór, hotó ázar Yohúdi ókkole iman ainné, aar ítara beggún ottu Córiyot olla jus asé. 21 Ítara re tuáñr baabute howá gíyeh de ki, tuñí Beyohúdi ókkol or bútoṛe ze Yohúdi ókkol asé ítara beggún ore Muúsar Córiyot bad di soli bolla taalim doh. Tuñí bóle ítara re hoiyó de, ítarar fuain dore ázomi gorá no foribó, aar añárar rosóm ókkol mozin sola no foribó. 22 Tóoile kii gorá zaybo? Manúc ókkole de tuñí eṛé aiccó de híyan hámaha fúnibo. 23 Hétolla añára hoóir de híyan goró. Añára ttu sair zon manúc asé, zetará manoc or tole. 24 Ítara re tuáñr fúañti loizo, aar nizoré ítarar fúañti pak-sáf gorógoi. Ítara nizor matá eñraifélai fare fán ítara re hóssa diiyo. Tói manúc beggúne zanibó de, ítarar hañse tuáñr baabute zín howá gíyeh híin or bútoṛe honó sóiyi náí, bólke tuñí nize yó Córiyot mozin zindigi haṛo. 25 Montor ze Beyohúdi ókkole iman ainné, ítarar hañse añára fáisela gorí e hotá hoói ceñrí leikkí, ki hoilé, tuáñra muttir hañse kurbani diya hána ókkol na háiyó, lou na háiyó, gola sibi marifélaiya januwar or gusso na háiyó, edde zená no goríyo.” 26 Tarfor din Páule manúc ítara re fúañti loigiyé, aar ítarar fúañti nizoré pak-sáf goijjé. Baade baitul-mukaddos ot zai zanaidiyé de, pak-sáf ówar din hoñtté céc óibo aar ítara fottí ekzon olla hoñtté kurbani diya zaybo. 27 Háñt din fura óibar kessú ñaim age, Ecíyar Yohúdi ókkole Pául ore baitul-mukaddos or bútoṛe deikké rár, manúc ókkol ore uskaidi íba re dórifelaiye. 28 Ítara guzoran mari hoór de, “Ó Boni Isráil ókkol, añára re modot gorógai! E manúc íbá óilde ubá zibá ye agagura

fottíkiyo re añárar koum or, añárar Córiyot or, edde e zagar hélaf taalim deh. Aar híin baade yo, íbá ye Girík ókkol ore baitul-mukaddos ot aní e pak zaga re nafak gorifelaiye.” 29 Ítara héndilla kiyólla hoiyé hoilé, yár age ítara Ífici manúc Toroffimos ore íbar fúañti cóor or bútoṛe deikkíl, aar ñaaijil de, Páule yóggwa re baitul-mukaddos ot ainné. 30 Tarfore guñra cóor ot hánggama foida óigiyoi, aar manúc ókkole fúañti ekkú duñre aái Pául ore dórifelaiye, baade íba re baitul-mukaddos ottu ñani baáre aní, éhon geiṭ tún bon gorifelaiye. 31 Ítara íba re marifélaito kucíc gorér de októt, Romi ṭeérang or zonnal or hañse ekkán hóbor foónicce de ki, “Fura Jerúsalem ot úrussul soler.” 32 Híyan fúni mottor hé zonnale hoozzon fóous edde cáap fúañti looi duñri manúc or dol lwát giyyé. Manúc ókkole zonnal lwá re edde fóous ókkol ore deikké rár, Pául ore mara-dóra bon goijjé. 33 Tói zonnal lwá ñáke aái Pául ore gereftar gorifelaiye, aar íba re duiyán síyol lói bañdá zay bolla hókum díye. Tarfore yóggwa ye fusár gorér de, “Manúc íbá hon? Íbá ye kii goijjé dé?” 34 Montor manúc or ñaái war bútottu hodúne yíán hoói guzorer aar hodúne waán hoói guzorer. Zonnal lwá ye zettót úrussul or zoriya hákikot zani no farer, Pául ore gáñṭit loiza zay bolla hókum díye. 35 Pául círir tók foijjonto foónicce rár, fóous ókkol ottu íba re boói loiza foijjé, kiyólla-hoilé manúc or dol lwá hótara accíl. 36 Manúc ítara íbar fisé-fisé zaat accíl, aar guzori-guzori howát accíl de, “Íbá re marifélo.” 37 Pául ore gáñṭit gólaibar októt, íba ye zonnal lwá ttu fusár gorér de, “Añí tuáñre kessú hoói faijjum né?” Zonnal lwá ye zuwab der de, “Tui Girík zuban zanos níki? 38 Tóoile kí tui ljípi uite no, zee níki yaar hooddin age bagiyai gorái sair ázar kúni re moidan zagat loigígoi?” 39 Montor Páule zuwab der de, “Añí ézzon Yohúdi, Kilicíya elakar Tarsús or manúc, añí aamfám cóor or manúc no. Meérbani góri añré manúc cún ore hotá hoibár ezin doh.” 40 Zonnal lwár ezin fai yore, Pául círir tók ot tíyai manúc ókkol ore áte ícára goijjé. Ítara beggún nizám óiye rár, íba ye Hibrú zubane hoór de,

22 “Ó báiyain aar bafáin, ehón añí añr sófai díyum, fúno.” 2 Manúc ókkole íba ye Hibrú zubane hotá hoór de fúni aró nizám ói táikkil. Tói Páule hoór de, 3 “Añí ézzon Yohúdi, añí Kilicíyar Tarsús ot zormo óiyi, montor ñoóñr óiyi de e cóor ot; añí Gamaliel ottu cíkka faiyí, zibá ye añré añárar bafádada ókkol or

Córiyot or baabute furafuri cíkaiye. Aijkal zendilla tuáñra beggún ottu Alla lla jus asé héndilla añr ttu yó héñtte jus accíl. 4 Hétolla añ e Torikat soilto de ítarar uore more fán zulúm goittám, aar beřaáin beřiyáin duní gún ore gereftar gorí ziyól ot dítam. 5 Boro imam edde fótuayi-mujilíc or murubbi beggún híyan or gobá asé. Añí tará ttu Damáskas ot asé de Yohúdi báiyain dor hañse loizai bolla ceñrí fai yore héře giílám, zeéne añí héře zai yore yó manúc ítara re Jerúsalem ot sáñza dí bolla bañdí aní fari. 6 “Montor eén óiye, añí zaita-zaite duúñijja góri Damáskas ot foónsir de októť, atíkka asman ottu eggwá doónr foór añr sairó dák ottu soimké. 7 Añí meřit forigiyígoi, aar añré endilla hoór de eggwá abas fúinni, ‘Sául, Sául, tui añré kiyólla zulúm gorór?’ 8 “Tói añí fusár goijjí de, ‘Malik, Tuñí hon?’ “Íba ye añré zuwab diyé de, ‘Añí óilam de Isá Nasári, zibá re tui zulúm gorór.’ 9 Zetará añr fúañti accíl ítara yó hé foór gwá deikkíl, montor añr llói hotá hoór de íbar abas ítara nó fúne. 10 “Añí fusár goijjí de, ‘Malik, añr ttu kii gorá foribó?’ “Malike zuwab diyé de, ‘Uť, Damáskas ot zaa, tor lla ziín ťík gorí raká giyeh híin beggún héře toré howá zaybo.’ 11 Añí zettót hé foór or tozolliye kessú no dekír, añr fúañti accíl de manúc cúne añré át ot dóri Damáskas ot loigiyé. 12 “Héře Ananias nam or ezzon dindár manúc accíl, zibá ye Córiyot díyan or sáañte amól goittó, aar héřiyar Yohúdi beggúne yóggwa re bicí izzot goittó. 13 Yóggwa añr héře aiccé, aar añr dák ottu ťiyai añré hoór de, ‘Bái Sául, tuáñr dekíbar toófuk firi aiyóuk.’ Hétunot añí yóggwa re dekí fajijí. 14 “Baade Yóggwa ye hoór de, ‘Añárar bafđada ókkol or Alla ye tuáñre basíloiye, íbar moncá zani bolla, aar Insáfwa wa re dekí bolla, edde íbar muk or hotá fúni bolla. 15 Kiyólla-hoilé tuñí ziín deikkó edde fúinno híin or baabute tamám manúc ókkol or hañse tuñí íbar gobá óiba. 16 Ehón aar deri kiyá gorór? Uřó, bápťisma loh aar íbar nam đaki tuáñr guná ókkol dúifelo.’ 17 “Baade eén óiye, zeñtte añí Jerúsalem ot waafes aái baitul-mukaddos or bútoře dua gorír, añí ekkán dorcón deikkí, 18 ziyán ot Malike añré hoór de, ‘Toratori gor! Ehón-ehón Jerúsalem sári zaagói, kiyólla-hoilé eřiyar maincé Añr baabute tor gobá no gosíbo.’ 19 “Hétunot añí hoóir de, ‘Malik, manúc ítara toh zane, añí fottí mujilíc-hánat zai-zai, Tuáñr uore iman ané de ítara re ziyól ot dítam edde mara-dóra goittám deh. 20 Tuáñr gobá Estífen ore mariféla zar de októť óu añí đáke ťiyai accílám. Añí ham híyan ot

furafuri razi accílám, aar zetará yóggwa re marifélar ítarar hoorsuor ókkol sooñi accílám.’ 21 “Hétunot Malike añré hoór de, ‘Zaa, Añí toré duré Beyohúdi ókkol or héře difeřaiyum.’” 22 Manúc ókkole Pául or hotá hétukkun foijjonto fúnat accíl. Baade ítara guzoran mari hoór de, “Ítaré duniyai ttu fúraifelo! Ite zinda tákibar laayek no.” 23 Ítara zettót guzori-guzori nizor hoorsuor melá márer, aar boiyar ot dúil urar, 24 zonnal lwá ye hókum díye de, Pául ore gánťit aná zay bolla, aar hoiyé de, manúc ókkole íbar hélaf endilla gori kiyólla guzorer de híyan zani fare fán Pául ore soónk mari zerá gorí bolla. 25 Ítara íba re soónk mari bolla baindé de októť, Páule đáke ťiyai accíl de cáap pwá re hoór de, “Honó hosúri faa nó zah de héndilla ézzon Romi manúc ore soónk maron kí tuáñra lla kaanuni ham?” 26 Cáap pwá ye híyan fúinne rár, zonnal lwár hañse zai hoór de, “Tuñí iín kii goittó soór? Ibá toh Romi manúc.” 27 Hétunot zonnal lwá aái Pául ottu fusár gorér de, “Añré hoósai, tui Romi manúc níki?” Íba ye zuwab der de, “Jii, ói.” 28 Zonnale íba re hoór de, “Añr ttu Rom or nagorita óite boóut ťiañ-foicá díiya foijjé.” Páule hoór de, “Montor añí de zormo ttu lóti Romi.” 29 Zetará íba re zerá goittó aiccíl ítara híyan fúinne mottor íba ttu fisságiyoi, aar íba Romi manúc de híyan zani fari zonnal lwá yó đoorraigiyói, kiyólla-hoilé yóggwa ye Pául ore bañdí raikkíl. 30 Yohúdi ókkole Pául ore kiyólla elzam der de híyan zonnal lwá ttu fakkagori zainto monehoór de hétolla, tarfor din yóggwa ye Pául ore kúlidiye, aar hókum díye de, doónr imam edde fótuayi-mujilíc or membór beggún dola óito. Baade yóggwa ye Pául ore nise aní ítarar muúntu ťiyagaraiye.

23 Páule fótuayi-mujilíc or membór ókkol or uzu díyan dóri saái hoór de, “Báiyain, añí aij foijjonto furafuri sáf hélome Allar cáikkat zindigi haraiyí.” 2 Hétunot boro imam Ananias manúc zetará Pául or đáke ťiyai accíl ítara re hókum díye de, íba re gal sái maitto. 3 Montor Páule íba re hoór de, “Héy munafék! Alla ye toré maribó. Tui eře Córiyot mozin éna añr bisar goittó boiccós, montor añré mari bolla hókum dí tui nize toh Córiyot bañgor.” 4 Zetará Pául or đáke ťiyai accíl ítara hoór de, “Allar boro imam ore beizzoti gorí bolla tor kii hímmot!” 5 Páule zuwab der de, “Báiyain, ibá boro imam de añí no zani, arnóile endilla lofzó estemal no goittám. Kiyólla-hoilé pak-kalam ot toh endilla asé, ‘Nizor koum or sóđdar or baabute bura

no hoiyó.” **6** Montor Páule zettót ek ðaái Sadukái de aar arek ðaái Féroci de ót faiyé, íba ye fótuayi-mujilíc ot guzori hoór de, “Ó báiyain, ańń ézzon Féroci aar Férocir fua; ańńre bisar gorá zar de kiyólla-hoilé, ańń acá gorí de, mora ókkol zinda ói uríbo.” **7** Íba ye héndilla hoiyé mottor, Féroci edde Sadukái ókkol or bútoe hoijja cúru óigiyoi, aar mujilíc bák óigiyoi. **8** Kiyólla-hoilé Sadukái ókkole hoó de, mora ókkol zinda ói no uríbo, ítara aró hoó de, fírista yó náí, ruh yó náí; montor Féroci ókkole híin beggún asé de biccác goré. **9** Hétunot hére eggwá ðoóńr hánggama óiye. Féroci fírkar hoozzon aleme tíyai guccár sáante eén hoói barábari díyat doijje, “Ańára e manúc cwa ttu honó hosúri nó fai. Honó ruh ye yáh fírista ye íbá llói hotá hoilé yo kí no fare né?” **10** Hoijja zettót bicí ðoóńr óigiyoi, ítara Pául ore ðukura-ðukura gorífelaibo bouli zonnal lwá ye ðooraiyé, hétolla yóggwa ye fóous ókkol ore hókum díye de, nise zai Pául ore manúc ókkol ottu bolazuri gáńńit loianí bolla. **11** Tarfor díin raitta Malike Pául or ðáke tíyai hoór de, “Hímmot gór; tui zendilla Jerúsalem ot Ańr baabute gobá díyos, héndilla tor ttu Rom cóor ot óu gobá díya foribó.” **12** Tarfor díin bíinna hodún Yohúdi ye ekkán sail gúraí hosóm háíye de, ítara zetódin Pául ore marifélai nó fare hétodin hána-fina na háibo. **13** Sail híyan ot salic zon or túaro bicí beřaáin cámil accíl. **14** Ítara ðoóńr imam ókkol or edde murubbi ókkol or hańse zai hoór de, “Ańára Pául ore marifélai nó fari foiijjonto hána-fina na háiyum hoói dorómoro hosóm háíyi. **15** Hétolla yala, tuáńra edde fótuayi-mujilíce íbar mooddima aró bálagori tahákit gorá forer hoói íba re nise tuáńrar muúntu aní bolla zonnal ore hóbor dóh. Ańára íba eřé foóńsibar age marifélai bolla toiyar así.” **16** Montor Pául or báaina ye ítarar sail or baabute fúinne rár, gáńńir bútoe góli Pául ore híin zanaiyé. **17** Hétunot Páule Romi cáap ókkol ottu ezzon ore matai hoór de, “E juwan fua wa re zonnal lwár hańse loizo, itar ttu yóggwa re kessú hoibár asé.” **18** Tói hé cáap pwá ye ítare zonnal or hére aní hoór de, “Hodi Páule ańńre matai e juwan fua wa re tuáńr hére aní bolla hoiyé, kiyólla-hoilé itar ttu bóle tuáńre kessú hoibár asé.” **19** Hétunot zonnale ítare át ot dóri ekinare loizai fusár gorér de, “Tor ttu ańńre kii hoibár asé dé?” **20** Íte hoór de, “Hodún Yohúdi ye Pául or baabute aró bálagori tahákit gorá forer hoói hailla íba re nise fótuayi-mujilíc ot aní bolla tuáńre aros goittó ek óiye. **21** Montor tuńí ítarar hotá no fúinno, kiyólla-hoilé ítara salic zon or túaro

bicí manúc luki táki Pául or entezar gorér; ítara íba re zetódin marifélai nó fare hétodin hána-fina na háibo hoói hosóm háíye. Yala ítara toiyar óiye, siríf tuáńr razirobot olla entezar gorér deh.” **22** Zonnale juwan fua wa re endilla hókum dí duńraidiyé, “Tui ańńre iin zanaidiyós bóuli honókiyo re no hoóic.” **23** Baade hé zonnal lwá ye cáap ókkol ottu dui zon ore matai hoór de, “Rait or now wa báze Kaisáriyat zai bolla dui cót fóous, hóittor zon gúra-soloinna fóous edde dui cót folóuwan toiyar gorí raikkó. **24** Pául olla yó gúra ókkol toiyar raikkó, zeéne íba sóiyo sólamote hákim Fílix or hére foóńsegoi.” **25** Tarfore yóggwa ye endilla ekkán ceńńí leikké: **26** “Ańí Kalediya Laisíyas or torfóttu bicí izzotdár hákim Fílix ore sólam. **27** E manúc cwa re Yohúdi ókkole dórifelail ar marifélaito saáil, montor ańí zeńńté íbá ézzon Romi manúc de zani faijji, ańí ańr fóous ókkol lói zai íbá re basailoiyí. **28** Aar ítara íbá re kiyólla elzam der de híyan ańr ttu zainto monehoiye rár, ańí íbá re ítarar fótuayi-mujilíc ot loigiyí; **29** baade ańí zani faijji de, ítara íbá re ítarar Córiyot or baabute elzam lagar deh; montor íbá ttu mora fore de yáto ziyól hara fore de héndilla honó hosúri náí. **30** Zeńńté ańńre hóbor díya gíyeh de ki, e manúc cwa re marifélaibar sail gúraíye; ańí íbá re éhon or bútoe tuáńr hańse dífereáiyi deh. Zetará íbá re elzam lagar, ańí ítara re hókum díyi de, ítara ttu íbár ulða ze elzam ókkol asé híin tuáńr muúntu peec gorí bolla.” **31** Tói hókum mozin fóous ókkole hé raitta Pául ore Entipateris cóor ot loigiyé. **32** Tarfor díin, ítara gúra-soloinna fóous sun ore Pául or fúańti duńraidi gáńńit waafes aáigiyoi. **33** Gúra-soloinna fóous sun Kaisáriyat foóńnicce rár, hákim ore ceńńí gán diiyé, aar Pául ore yó íbar át ot gosáidiye. **34** Hákime ceńńí gán forí, Pául ottu fusár gorér de, “Tui hon zagar?” Páule zuwab der de, “Kilicíyar.” **35** Hákime hoór de, “Tor elzam lagoya ókkol eřé foóńsile ańí tor mooddimar baabute fúniyum.” Baade yóggwa ye hókum díye de, Pául ore Hérud or razmohól ot faára dí raká zay bolla.

24 Fańs díin baade boro imam Ananiyase hoozzon murubbi looi edde Tartuliyas nam or ezzon ukil looi nise Kaisáriyat giiyé, baade ítara hákim or hańse Pául or ulða elzam ókkol peec goijjíl. **2** Pául ore bútoe mata bay baade, Tartuliyase hákim or hańse elzam ókkol peec gorát doijje, hoór de, “Tuáńr hókum or tole ańára boóut deri lóti bicí cántit así, aar tuáńr bála nozoríyar zoriya e koum or uore boóut dóilla

torki aiccé. 3 Ó izzotdár Fílix, añára híyan hárr dóillat, hárr zagat furafuri cúkuriyar sáañte kobul gorí. 4 Montor añr ttu tuáñr ãaim ar borbád dito mone no hoór, hétolla añ tuáñre fóriyat gorír, meérbani góri añárar hotá gún fúno. Añára hookkán hotát beggún fúrai díyum. 5 “Añára loot faiyí de, e manúc cwa óilde ekkán bifot; ibá ye fura duniyair Yohúdi beggún or bútoe hánggama foida goré. Ibá óilde Nasári nam or dol or eggwá sóddar. 6 Ibá ye baitul-mukaddos úddwa nafak goittó kucíc goijjé, añára ibá re hétolla gereftar goijjé deh. 7 Montor zonnal Laisíyas aái yore ibá re ádoma gorí añárar át ottu loigiyégói, 8 aró ibár mooddima-goróya ókkol ore hókum díye de, tuáñr muúntu ai bolla. Tuñí nizebaze ibá re iín beggún or baabute zerá goillé zani faribá, añára ibá re kiyólla hosúr dír.” 9 Yohúdi ókkol óu elzam lagat córik ói híin beggún sóiyi bóuli hoyié. 10 Baade hákime Pául ore hotá hoitó icára goijjé rár, Páule hoór de, “Añí zani, tuñí boóut bosór lóti e koum or joc. Hétolla añí kúcír sáañte añr sófai dír. 11 Tuñí zasai goillé sóiyigori zani faribá, añí uore Jerúsalem ot ebaadot goittó giyí de aijjó baró din or túaro bicí nó óiyo. 12 Añr uore zetará elzam lagar ítara añré no baitul-mukaddos ot honó manúc lói barábari dír de loot faiyé, aar no mujilíc-hánat yáh cóor or honó mikká hánggama foida gorír de loot faiyé. 13 Itará añr uore ze elzam ókkol lagar, híin or tuáñre honó sábut dí no faribó. 14 Montor añí tuáñr hañse yíán cíkar gorír, ki hoilé, ze Torika re itará gollot dol bouli hoór, hé Torika re mani añí añárar bafdáda ókkol or Allar ebaadot gorí. Añí ze hotá ókkol Tourat ot edde nobi ókkol or kitab ot leikká asé híin beggún ekin gorí. 15 Añr ttu Allar uore acá asé, zendilla itará ttu yó asé, híyan óilde, forhésgar edde hóraf manúc beggún ore mora ttu zinda gorá zaybo. 16 Hétolla añí furafuri kucíc gorí de, Allar edde insán or muúntu hámica sóiyi hélome táki bolla. 17 “Yala boóut bosór baade, añí Jerúsalem ot añr koum or hañse hórat foónsai bolla edde januwar kurbani di bolla aiccí. 18 Tói Ecíyar hoozzon Yohúdi ye añré baitul-mukaddos ot pak-sáf ói añí hé ham gorír de loot faiyé. Hére añr fúañti no manúc or dol accíl aar no añí honó hánggamat cámil accílám. 19 Montor zodi ítara ttu añr ulða honó kessú hoibár táke, tooile ítara ttu tuáñr muúntu aiyón accíl. 20 Arnóile eřé asé de itará nize hoók, añí fótuayi-mujilíc or muúntu tíyai accílám de híyala añr ttu kii hosúri faiyé deh. 21 Itará añré siríf yíán ekkán or hosúr dí faribó, ziyán añí

ítarar muúntu tíyai accílám de híyala guzori hoóilám, ki hoilé, ‘Mora ókkol zinda ói urár mosóla loi beh aijja añré bisar gorá zar.’” 22 Montor Fílix ottu hé Torikar baabute sóiyi zana asé de hétolla, yóggwa ye bisar gorá bon gorí hoór de, “Zonnal Laisíyas nise ailé, añí tor mooddimar fáisela goijjúm.” 23 Baade íba ye cáap ore hókum díye de, Pául ore gañrat ot rakí bolla, kessú azadi di bolla, aar Pául or dustó ókkole íba re hédmot goittó ailé ítara re maná no gorí bolla. 24 Hooddin baade, Fílix nizer bou Durusila re fúañti looi aiccé, híba ézzon Yohúdi accíl. Yóggwa ye Pául ore mataitó diferáiyé, baade Pául ottu Mosih Isár uore iman or baabute boiyan fúinne. 25 Páule zettót forhésgarir, nizeró sóonli rakár, edde aibó de kiyamot or baabute boiyan gorér, Fílix ðooragiyói, aar hoór de, “Tui ettar zaagói, one mouka faile añí toré mataitó diferáiyum.” 26 Fúañti-fúañti yóggwa ye Pául ottu gúc faibar óu acá goijjíl, hétolla yóggwa ye Pául ore egazá-egazá matai íba llói hotá hoitó. 27 Dui bosór guzori zaigói baade, Fílix or zagat Forkiyus Fistas aiccé. Montor Fílix ottu Yohúdi ókkol or nozor ot bála tóoitto monehoiyé de hétolla, yóggwa ye Pául ore ziyól ot rakígíloi.

25 Fistas hé mulluk ot aái tin din baade Kaisáriya ttu uore Jerúsalem ot giyí. 2 Hére ðoóñr imam ókkole edde Yohúdir neta ókkole Pául or ulða elzam ókkol ainné, aar aros gorí 3 Pául or ulða ekkán meérbani saiyé, zeéne íba ye Pául ore Jerúsalem ot diferáide. Kiyólla-hoilé, ítara Pául ore foñt ot máze luki táki marifélaito sólla goijjíl. 4 Montor Fistase hoór de, “Pául ore Kaisáriyat máze gañrat ot raká gíyeh, aar añí nize hére hára zaiyum. 5 Tuáñrar hoozzon sóddar añr fúañti aiyóuk. Zodi hé manúc cwar honó hosúri táke, tooile ítara hére íbar hosúr ókkol daháidouk.” 6 Fistas ítarar fúañti añçto-doc din táki baade nise Kaisáriyat giyí. Tarfor din yóggwa ye bisar or toktót boiccé, aar Pául ore aná zay bolla hókum díye. 7 Pául foónicce rár, ze Yohúdi ókkol Jerúsalem ottu aiccíl, ítara íbar sairókul ttu tíyai íbar uore bicí hótara-hótara elzam ókkol lagat doijje, montor híin sábut gorí nó fare. 8 Hétunot Páule eén hoói nizer sófai díye, “Añí no Yohúdir Córiyot or ulða hosúri goijjé, no baitul-mukaddos or ulða goijjé, aar no Káisar or ulða goijjé.” 9 Montor Fistase Yohúdi ókkol or nozor ot bála tóori bolla Pául ore hoór de, “Tui Jerúsalem ot zai e mooddimar bisar olla añr muúntu tíyaito soós né?” 10 Páule zuwab der de, “Añí toh yala Káisar or

adalot ot éna tíyai así; añr bisar or fáisela eré gorá foribó. Añí Yohúdi ókkol or ulða honó hosúri nó gorí, híyan de tuñí yó bála zano. **11** Zodi toóu añí mora fore de héndilla honó kessúr hosúrbon de óile, añí mori bolla razi así. Montor e Yohúdi itará añr uore zín elzam lagar híin zodi ekkán óu sóiyi no, tooile honókiyo ttu añré itará at ot gosáidibar hók náí. Añí Káisar ore apíl gorír.” **12** Baade Fistase uzirnazir ókkol lói mocuwara gorí hoór de, “Tui zettót Káisar ore apíl goijjós, hétolla tui Káisar or hére zaibi.” **13** Hooddin guzori zaigói baade, baáñcca Ageripa ye edde Barnise Fistas ore sólám zanaitó Kaisáriyat aiccé. **14** Ítara hére boóut din harai baade, Fistase Pául or mooddimar baabute baáñcca re zanaiyé. Yóggwa ye hoór de “Fílix manúc ézzon ore eré hodi ísafe rakígyoi. **15** Zeñtté añí Jerúsalem ot gíflam, Yohúdir doónir imam ókkole edde murubbi ókkole íbar hosúri ókkol añr hañse peec gorí hoiyé de, íba re sánza dí bolla. **16** “Montor añí ítara re hoiyí de, ‘Yían Romi niyom no de ki, honó manúc ore sánza lla gosáidon, zetún foijjonto íba ye nizor mooddima-goróya ókkol lói muámuiikka dola nó óiyo edde nizor ulða ze elzam ókkol laga giyéh híin or sófai dí bolla íba re mouka diiya nó zah.’ **17** Hétolla hé Yohúdi gún eré zoma óiye rár, añí deri no gorí tarfor din bisar or toktót boicci, aar manúc cwa re aná zay bolla hókum díyi. **18** Mooddima-goróya ókkol zeñtté hotá hoi bolla tíyaiye, ítara añí táaijilam de héndilla honó gollot ham or hosúri nó deh. **19** Montor íba llói ítara ttu nizor dórmmor edde mora manúc Isár baabute kessú obonaboni accíl, Zibá zinda asé hoi Páule dabi goré. **20** Añí hé maamela gún or baabute hondilla gori tahákit goríyom no zani ísafe, fusár goijjí de, íba ttu Jerúsalem ot zai híin or bisar olla tíyaito monehoór né. **21** Montor Páule zettót Káisar or fáisela lla íba re gañrat ot raká zay bolla apíl goijjé, añí hókum díyi de, íba re Káisar or hére nó diferái foijjonto gañrat ot raká zay bolla.” **22** Ageripa ye Fistas ore hoór de, “Añí nizor ttu yó hé manúc cwar hotá fúinto monehoór.” Yóggwa ye hoór de, “Hailla fúni faribá.” **23** Tói tarfor din baáñcca Ageripa edde Barnis, bicí dók or sáañte doónir zonnal ókkol edde cóor or daiðoónir ókkol ore loi boirók-hánat góille. Fistas or hókum mozin Pául ore bútoe aná gíyeh. **24** Fistase hoór de, “Ó baáñcca Ageripa edde eré añárar fúañti házir asó de tamám manúc ókkol, tuáñra e manúc cwa re soó, zibár baabute Yohúdi beggúne Jerúsalem ot edde eré añré apíl gorí guzori hoóil de, e

manúc cwa ar basi tákibar laayek no. **25** Montor añí zani faijji de, ibá ye moot or laayek honó hosúri nó goré. Aar ibá ye zettót Káisar ore apíl goijjé, añí ibá re hére diferáibar fáisela goijjí. **26** Montor ibár baabute añr muhán baáñccar hañse lekí bolla añí honó sóiyi hosúri nó fai. Hétolla añí ibá re tuáñrar muuntu ainní, háasgori tuñí baáñcca Ageripar muuntu, zeéne zerá gorí baade añr ttu kessú lekíbar táke. **27** Kiyólla-hoilé añr ttu lager de, hosúri ókkol dahái no dí honó hodi re hére diferái don sóiyi no.”

26 Ageripa ye Pául ore hoór de, “Toré nizor sófai díbar ezazot diya giyéh.” Hétunot Páule át barái nizor sófai díyat doijje de: **2** “Ó baáñcca Ageripa, aijja añí tuáñr muuntu Yohúdi ókkole añr uore ze elzam lagar híin beggún or ulða añr sófai dí farir de híyan añí bággitta bóuli táarir. **3** Háasgori kiyólla-hoilé, añí zani, tuñí Yohúdi ókkol or rosóm or edde torkatorkir súwal ókkol or baabute bicígori zano. Hétolla añí tuáñre fóriyat gorír, sobór or sáañte añr hotá gún fúno.” **4** Tamám Yohúdi ókkole toh zane, añr nizor koum or dormiyan ot edde Jerúsalem ot añr zindigir solasol cúru ttu lóti hondilla accíl. **5** Ítara añré bicí deri lóti siné, zodi ítara ttu gobá díto monehoó, di faribó, ki hoilé, añí añárar dórmmor ebbe hora fírka Féroci mozin zindigi haraiyí. **6** Aar yala añré etollá bisar gorá zar, kiyólla-hoilé Alla ye añárar bafdada ókkol lói ze waada goijjíl hé waadar uore añí acá rakí. **7** Añárar baró háandan or manúce toh hé waada re faibar acáye dilmon di raite dine Allar ebaadot goittó. Ó baáñcca, añré Yohúdi ókkole hé acár zoriya elzam der deh. **8** Alla ye mora re zinda goré de híyan kiyá tuáñra ttu biccác no lager? **9** Age añí nize yó táaittam de, zeéne fari héene añr ttu Isá Nasárir nam or ulða gorón fóros. **10** Héndilla añí Jerúsalem ot goijjí yó. Doónir imam ókkol ottu kémota fai yore Allar pak bonda boóut zon ore ziyól ot dílam, aar ítara re zeñtté marifélaito fáisela goré héñtte añí yó búť dítam. **11** Bicí ñaim ot añí ítara re sánza dí bolla fottí mujilíc-hánat zaitam, aar ítara re bolazuri kuféri gorá baitó kucíc goittám. Añí ítara llói bicí rak accílám de hétolla oinno mulluk or cóor ókkol ot úddwa zai-zai ítarar uore zulúm goittám. **12** “Héñtte ek din añí doónir imam ókkol ottu adíkar edde hókum fai yore Damáskas ot zair de októt, **13** óu baáñcca, duúñijja góri añí foñt ot máze asman ottu eggwá foór deikkí, zibá beil or túaro foór, yíba añr edde añr sáañti

ókkol or sairómikka ttu somkat doijje. **14** Zeñtté añára beggún merit forigiýgoi, añré Hibru zubane endilla hoór de eggwá abas fúinni, ‘Sául, Sául, tui Añré kiyólla zulúm gorór? Áilla súañr ulða latí mara tor lla aásan no.’ **15** Hétunot añí fusár goijíj de, ‘Malik, Tuñí hon?’ Malike zuwab diyé de, ‘Añí óilam de Isá, zibá re tui zulúm gorór. **16** Ehón uť, tor ťenge ťíya. Añí tor hañse zahér óiyi de, toré háadem edde gobá banai bolla; siríf ziín deikkós híin olla no bólke muúntu Añí toré ziín daháiyum híin olla yó. **17** Añí toré tor koum ottu basai rakíyumu, aar ze Beyohúdi ókkol or hañse Añí toré difeřáir, ítara ttu yó basai rakíyumu. **18** Tui ítara suk kúlidibi, zeéne ítara andár ottu foór or uzu firi aiyé, edde Cóitan or kobza ttu Allar hañse aiyé. Tói ítara gunár maf faibo, aar zará Añr uore iman aní pak-sáf óiye tarár bútoze zaga faibo.’ **19** “Hétolla, ó baáñcca Ageripa, asman ottu dorcón or duara añré ziín howá giyeh, añí híin or nafórmani nó gorí. **20** Sáat ot zetará Damáskas ot asé ítara re, baade Jerúsalem ot edde Yohúdiyar agagurat, aar Beyohúdi ókkol or hañse yó endilla hoói añí tobolik goijíj de ki, ítara ttu touwá gorí Allar uzu fíra foribó, aar touwár laayek ham ókkol gorá foribó. **21** Híyan olla bóuli hodún Yohúdi ye añré baitul-mukaddos ottu dórifelail aar marifélaito kucíc goijíj. **22** Montor aij foijjonto Alla ye añré modot goijjé, hétolla añí ťíyai ɖoñr-cónro beggún or hañse gobá ókkol dir. Nobí ókkole edde Muúsa ye ziín fura óibo bóuli hoiyé híin or baáre añí honó kessú hoiyí de náí; **23** ki hoilé, Mosih ttu duk faa foribó, aar mora ttu zinda óiye de foóila zon ói yore Yohúdi edde Beyohúdi ókkol or hañse nur or hóbor díya foribó.” **24** Páule zettót héndilla góri nizor sófai dér, Fistase gozgosai hoór de, “Héy Pául, tui fool óigiyosgoi! Bicí elóm hásil goróne toré fool banaifélar.” **25** Montor Páule hoór de, “Ó izzotdár Fistas, añí fool nó ói, añí ziín hoóir híin sóiyi aar buzón or hotá. **26** Baáñcca ye toh iín or baabute zane, hétolla añí íbar muúntu hímmot góri hotá hoói farir deh. Añí biccác gorí de, e hotá iín ekkán óu íba ye no zane de náí, kiyólla-hoilé iín toh honó ek kunat óiye de no. **27** Ó baáñcca Ageripa, tuñí nobí ókkol ore biccác goró né? Añí zani tuñí goró.” **28** Hétunot Ageripa ye Pául ore hoór de, “Tui añré ebbe hom ťaim or bútoze Isáyi banai faribí bóuli ťaaíjjos níki?” **29** Páule hoór de, “Hom ťaim ot óuk yáh lamba ťaim ot, añí Allar hañse dua gorí de, siríf tuñí no bólke zetará aijja añr hotá fúner ítara beggún óu zen añr ɖóilla ó, montor e síyol sára.” **30** Hétunot baáñcca

urígiyoi aar íbar fúañti hákim, Barnis, edde zetará ítara fúañti boiřók ot accíl ítara yó urígiyoi. **31** Ítara héntu neeli zaigói baade ezzon ore ezzone hoór de, “E manúc cwa ye mora fore de sáñzar laayek yáh ziyól hara fore de héndilla honó kessú nó goré.” **32** Ageripa ye Fistas ore hoór de, “E manúc cwa ye Káisar ore aplí no goittó bóuli, ibá re eridiya zayto.”

27 Zeñtté añára re zaáñs ot góri Ítalit loiza foribó bóuli fáisela óigiyoí, Pául ore edde ar hoozzon hodi re Baáñccar Ƨeérang hoó de yíbar ek cáap or át ot diiya giyéh, zibár nam Julius. **2** Añára Aderamitiya cóor or ekkán zaáñs ot urí zaat doijji, ziyán Ecíya elakar alok-alok gáñť ókkol ot zai bolla toiyar accíl. Aar Makedóniya elakar Tisólonika cóor or Aristarkus añárar fúañti accíl. **3** Tarfor din añára Sídón ot foóñicci, aar Juliuse Pául ore meérbaní gorí nizor dustó ókkol or héře zaibar ezazot diyé, zeéne íbar dustó ókkole íbar zorurot ókkol fura gorí fare. **4** Añára héntu bacá lóiyi, aar boiyar añárar ulða baár de hétolla Sáifrus or ze boli boiyar no baár hé boli giyi. **5** Baade Kilicíyar edde Pampúliyar doijja báy zaite-zaite añára Lusíya elakar Mira cóor ot laimmi. **6** Héře hé cáap pwá ye Alexzendariya cóor or ekkán zaáñs faail ziyán Ítali dec ot zaar. Íba ye añára re híyan ot tuillé. **7** Añárar zaáñs boóut din fán asté-asté soli baade bicí dukkór sáañte Kanidas cóor ot foóñicci. Boiyare zettót añára re aar muúmmikka zaito no der, añára Sálmon cóor or muúntu Keret ɖiyar ze boli boiyar no baár hé boli giyi. **8** Aar doijjar hañsa dóri dukkór sáañte soli-soli ekkán zagat foóñicci ziyán or nam óilde Héfazoti Gáñť Ókkol. Híyan Lasíya ťoón or ɖáke accíl. **9** Héndilla góri boóut din guzori zaigói baade, zaáñs ot góri zaibar sofór hótara óiaicce, aar Koffarar Din óu zettót faráigiyoí, Páule ítara re eén hoói uñciyari díye, **10** “Manúc ókkol, añí dekír de age zai añárar e sofór hótara óibo, aar bicí hótí ókkol óibo, siríf malsámána edde zaáñs no, bólke añárar zan úddwa.” **11** Montor cáape Pául or hotár túaro zaáñs-soloyar edde híyan or girós or hotá fúinnil. **12** Hé zaáñs gáñť ťan cítkhal haraité cúuida no de hétolla, ítara bicí zone fáisela goijjé de, héntu zai honó bote Fonis gáñřot foóñsi cítkhal harai bolla. Hé gáñť ťan óilde Keret ɖiyar zaáñs gáñť, ziyán or muu gán doóinali fosím edde uttorali fosím míkka. **13** Zeñtté doóinali boiyar asté-asté baát doijje, ítara báfer de ítara niyot fura gorí faribó; hétolla ítara zaáñs or nogol tulífelai Keret

ɖiyar sor báɣ giɣyé. **14** Montor hotún ánik baade, hé zaga ttu eggwá ɖoóŋr tuwáni boiyar cúru óiye, zibá re Yorakilo ɖake. **15** Zaáŋs sán ore zettót hé boiyare faiyé aar híyan boiyar or zoriya muúmmikka zai no farer, añára kucíc gorá bon gorí boiyar zikká baár híkka zaáŋs sán zaito diyí. **16** Aar zaite-zaite eggwá Kawuda nam or gura ɖiyar ze boli boiyar no baár hé bouli giɣíy, aar bicí mockil or sáaŋte añára zaáŋs or noow gán basai faijji. **17** Manúc ókkole noow gán zaáŋs or uore tulí yore rosí lói zaáŋs or sairókul ttu berái baŋdí eijjé, aar ítara zaáŋs sán Sartis or meřir sor ot bazíbo bóuli ɖoore zaáŋs or cór gán lamaifélai boiyar zikká baár híkka zaáŋs sán zaito diyé. **18** Baade tuwán or zoriya zettót añára bicí éŋska háir, ítara tarfor din zaáŋs or malsámana ókkol félaidiyat doijje. **19** Tisára din ítara zaáŋs sola de sáísamana ókkol nizor áte félaidiye. **20** Boóut din lóti zettót beil óu dahá no zar, tara ókkol óu dahá no zar, aar lagatar zuresúre tuwán óu baát accíl, tói añára basibár acá félaidiyi. **21** Zaáŋs or manúc ókkol boóut din foijjonto waacca de hétolla, Páule ítara mazé tíyai hoór de, “Manúc ókkol, tuáŋra ttu añr buddí gán dóri Keret ɖiya ttu zaáŋs lói nu aiyón accíl, tói e mosibot edde hótí ttu basitá. **22** Montor yala añi tuáŋra re fóriyat gorir, tuáŋra hímmot goró, kiyólla-hoilé tuáŋra honókiyor zan no zaybo; siríf zaáŋs san hótí óibo deh. **23** Añi Zibár manúc edde Zibár ebaadot gorí, hé Allar ek firista ye gel de raitta añr ɖák ottu tíyai yore **24** hoiyé de, ‘Pául, no ɖooraiyó, tuáŋr ttu Káisar or muúntu hámaha tíya foribó. Aar zetará tuáŋr fúaŋti zaáŋs ot góri zaar, Alla ye tuáŋr wasté meərbani gorí ítara beggún or zan basai raikké.’ **25** Hétolla, manúc ókkol, hímmot goró, kiyólla-hoilé añr ttu Allar uore iman asé de, añré zeén hoiyé héen óibo. **26** Lekin añára ttu honó ɖiyat oozagói foribó.” **27** Tuwán or soiddó din ot din adá raitta, añára zaáŋs lói báai Aderiya Doijjar hére aiccí rár, zaáŋs or manúc cúne ɖaijje de, ítara kul or ɖáke foóŋser bóuli. **28** Ítara fanír tola maippé rár ací át mur loot faáil, yár hotún baade abar maippé rár háit át mur loot faáil. **29** Ítara zaáŋs sán cíl ot dúc háibo bóuli ɖoore zaáŋs or fasíl ottu sair gwá nogol maijje aar din or foór fári bolla dua gorát doijje. **30** Tarfore séraingga gúne zaáŋs ottu dáizai bolla kucíce, agil ottu nogol mare fán gorí zaáŋs or uottú noow gán doijjat lamaifélaiye. **31** Hétunot Páule cáap ore edde fóous ókkol ore hoór de, “Zodi manúc itará zaáŋs or uore no táke, tuáŋra basi no faribá.” **32** Tói fóous

ókkole noowr rosí gún haridiyé, zeéne híyan fanít forizagói. **33** Bíinna foór fáriar ekkágori age, Páule ítara beggún ore hána hái bolla eén hoói aros goijjé, “Tuáŋra kessú na hái lagatar entezar ot asó de aijja soiddó din óiye. **34** Hétolla añi tuáŋra re fóriyat gorir, zane basi táki bolla tuáŋra kessú hána hoo, kiyólla-hoilé tuáŋra honókiyor matár ekkán sul úddwa no foribó.” **35** Hotá híyan hoói baade, Páule ruŋi looi ítara beggún or muúntu Alla re cúkuriya goijjé, aar baade báŋgi háat doijje. **36** Hétunot ítara beggúne hímmot faiyé, aar ítara nize yó hána háiye. **37** Zaáŋs or uore añára kulehale dui cóo hóittor-sów zon accílam. **38** Beggúne feŋ bóri hái baade, ítara giyuŋ ókkol doijjat félaidi zaáŋs or uzón hom gorát doijje. **39** Bíinna foór fáitŋe rár, ítara zaga gán siní nó fare, montor ítara doijjar eén ekkán atari deikkíl, ziyán or sor balu ola. Baade ítara fáisela goijjé de, zodi faille zaáŋs sán hére uore tulídi bolla. **40** Hétolla ítara nogol lun hari doijjat félaidiye, fúaŋti-fúaŋti súwan or rosí gún óu kúlifelaiye. Ítara zaáŋs or cór gán boiyar ot tulídiye, baade zaáŋs sán hé sor or híkka zaat doijje. **41** Montor zaáŋs sán zaite-zaite dui doriyar mudar meřir sor or uore uiŋŋégoi, aar zaáŋs or agil eén bazígiyoi, ebbe no lorer, aar goir or zoriya fasíl ottu báŋgi gurigara óizat doijje. **42** Fóous sune hodi ókkol ore marifélaiabar niyot goijjé, zeéne ítara honókiye háŋsuri dáizaigoi no fare. **43** Montor cáap ottu Pául or zan basaitó monehoóil, hétolla íba ye fóous sun ore ítara moncá mozin goittó nó déh. Íba ye hókum díye de, zetará háŋsuri fare age ítara fanít záp mari kul or uore zai bolla, **44** aar baki gúne tottá yáh zaáŋs or báŋgasúra ókkol dóri yore hére zaiboi lla. Tói héndilla gorí héfazot or sáaŋte beggún kul ot foóŋicci.

28 Zeŋtté añára héfazot or sáaŋte kul or uore foóŋicci, añára zani faijji de, hé ɖiya war nam óilde Meliti. **2** Hé ɖiyar bácinɖa ókkole añára re ódorbaára meərbani goijjíl. Híyala zór dér de edde ɖaŋɖa accíl ísafe, ítara ooin zolai añára beggún ore estekbal goijjé. **3** Páule zettót ek tara fúana dargwá dola gorí ooin ot diyé, tói gorome eggwá bic ola háf neeli aái íbar át sái hooŋri doijje. **4** Héřiyar bácinɖa ókkole zettót Pául or át ot háf fwa loŋki táikke de deikké, ítara ezzon ore ezzone hoór de, “Becók, e manúc cwa kúni; íbá doriya ttu basilé yo Insáfi nam or debota ye íbá re basitó nó dér.” **5** Lekin Páule háf fwa zári ooin ot félaidiye, aar íbar honó hótí nó. **6** Manúc

cúne táaije de, íbar gaa fúlizayboi, arnóile atíkka fori morizaybói, montor ítara boóut hotún entezar gorí baade dekér de, íba ttu kessú no ór, hétunot ítara nizor mon bodoli hoór de, “Íba eggwá debota!” 7 Hé zagar dake hé ñiyar ebbe ñoóñr manúc or zobin ókkol accíl. Manúc íbar nam óilde Fubili. Íba ye añára re estekbal goijjé, aar tin ñin fán añára re becábici meemandari goijjé. 8 Aar eén óiye, hé óktót Fubilir baf gaatzore edde gaalamaniye bisánat fori accíl. Páule íba re saitó bútoze giyyé, aar dua gorí baade íbar uore át dí íba re gom goijjé. 9 Yárbaade, hé ñiyat accíl de baki biyaraimma beggún Pául or hañse aiccé, aar ítara re yó gom gorá gýeh. 10 Ítara añára re boóut ñóilla torikaye izzot goijjé; aar añára héntu bacá lói bolla toiyar óiyi de óktót, añára ttu sofór olla lage de híin beggún ítara zaáns ot bóridiye. 11 Tin mac baade añára Alexzendariya cóor or zaáns ot góri bacá lóiyí, ziyán fura cítkhal foijjonto hé ñiyat accíl. Hé zaáns sán ore “Zooñikka Debota,” bouli hoitó. 12 Aar Sirakusa cóor ot zaáns sán bañdí yore hére tin ñin táikki. 13 Añára héntu zaáns ot góri bacá lói Regiyon cóor ot foóñicci. Ek ñin baade doóinali boiyar baát doijje, aar tarfor ñin Puteli toón ot foóñicci. 14 Hére añára hoozzon imandár báiboináin loot faiyí, zetará añára re ítarar fúañti ek háfta tákito dawot dyíl. Héengori añára Rom ot foóñicci. 15 Héñiyar imandár báiboináin ókkole zettót añára aiyír de fúinne, ítara añára llói milto hodún Appiyus or Bazar hoó de híyan or héddur aiccé, ar hodún Tinboóring hoó de híyan or héddur aiccé. Páule ítara re dekí Alla re cúkuriya goijjé, aar hímmot faiyé. 16 Añára Rom ot foóñsi baade Pául ore nizor ttu monehoó de hére táki bolla ezazot diya gýeh. Íba re ezzon fóouse faára díto. 17 Tin ñin baade, Páule Yohúdir neta ókkol ore ekkán ot mataiyé, aar ítara zeñtté zoma óiye, Páule ítara re hoór de, “Ó báiyain, zodi añí añárar koum or edde añárar bafdáda ókkol or rosóm ókkol or ulða kessú no goillé yo, toóu añré hodir ñóilla góri Jerúsalem ottu Romi ókkol or át ot gosáidiya gýeh. 18 Romi ókkol ottu añré zerá gorí baade eridito monehoóil, kiyólla-hoilé ítara añr ttu mora fore de héndilla honó hosúri nó faa. 19 Montor Yohúdi ókkole zettót híyan ot bazá díye, añí mojburi ói Káisar ore apíl goijjé, háleke híyan or maáni añr ttu nizor koum or ulða elzam lagaibár niyot accíl de no. 20 Hétolla bóuli añí tuáñra re sai bolla edde tuáñra llói hotá hoi bolla tuáñra re mataiyé deh, kiyólla-hoilé Boni Isráil ókkole ze acá raké hé acár zoriya añré e

siyol lói bañdá gýeh.” 21 Hétunot ítara íba re hoór de, “Añára tuáñr baabute Yohúdiya ttu honó ceñrí nó fai, aar héntu ze báiyain eñé aiccíl ítara ttu yó honókiye tuáñr baabute no honó hóbor díye, aar no honó hóraf hoiyé. 22 Montor añára ttu tuáñr rai ókkol fúinto monehoór, kiyólla-hoilé añára zani de, fottí zagar maincé e fírkar ulða hotá ókkol hoó.” 23 Tói ítara Pául lói mili bolla eggwá ñin tík goijjé, aar ítara edde aró bici manúc íba táke de zaga híyan ot aiccé. Tarfore Páule ítara re biñna ttu lóti háñzinna foijjonto Allar raijor baabute buzáil edde gobá díyl, aar Muúsar Córiyot edde nobi ókkol or kitab ottu dahái dídi ítara re Isár baabute iman aná baitó kucíc goijjíl. 24 Íbar boiyar fúni kiyé-kiyé iman ainné, montor argúne ekin nó goré. 25 Ítarar bútoze zettót obonaboni foida óiye, Pául or e hotá fúni ítara zaat doijje, ki hoilé, “Pak-Ruh ye nobi Yesáyahr áta tuáñrar bafdáda ókkol ore sóiyi hotá hoiyé, ki hoilé, 26 E manúc cún or hañse zai hoógoi de, “Tuáñra hane fúnat tákiba montor no buzíba, tuáñra suké saat tákiba montor no siníba. 27 Kiyólla-hoilé manúc ítarar ñil toh doró óigiyoi, ítarar han bór óigiyoi, aar ítara nizor suk bon gorífelaiye. Arnóile ítara nizor suké dekíto, hane fúni to, nizor ñile buzí Añr hañse fíri aitó, aar Añí ítara re gom goittám.’ 28 “Hétolla añr ttu tuáñra re yáñ zanaidito monehoór de ki, Allar e nejat or hóbor Beyohúdi ókkol or hañse foóñsa gýeh, aar ítara fúnibo.” 29 Páule hotá híin hoiyé rár, Yohúdi ókkole afós ot bici barábari dí giyyégoi. 30 Pául fura ñui bosór foijjonto nizor bára gór ot táikkil, aar zetó zon íbar hañse aitó ítara beggún ore íba ye estekbal gorí, 31 furafuri hímmot or sáante honó bazá sára Allar raijor baabute tobolik goittó edde Malik Isá Mosihr baabute taalim dito.

Romiól

1 Añí Pául, Mosih Isár éggwa gulam, zibá re sáhabi ói bolla ɖaka giyéh edde Allar kúchóbor or tobolik olla basílowa giyéh, **2** ze kúchóbor or waada Alla ye age lóti Nizor nobi ókkol or duara pak-kalam ot mazé goijjíl. **3** Hé kúchóbor óilde íbar Fuar baabute, zibá insán or hé rúwate Dawud or nosól ottu zormo óoil, **4** aar pakir Ruhr hé rúwate mora ttu zinda gorá giyéh de hétolla kudurut or sáañte Allar Fua de dahá giyéh. Íba óilde Isá Mosih añárar Malik, **5** zibár duara añára rahámot edde sáhabigiri faiyí, zeéne íbar nam ói bolla tamám koum ókkol ore iman ottu foida ó de fórmadarir hére aní; **6** zetará re Isá Mosihr ói bolla ɖaka giyéh, ítarar bútoze tuáñra yó asó. **7** Tuáñra zetará Rom cóor ot Allar adorbon asó, zetará re níki Alla ye Nizor pak bonda ói bolla ɖaikké, tuáñra beggún or hañse lekír: Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **8** Ebbe age, añí tuáñra beggún olla Isá Mosihr duara añr Alla re cúkuriya gorír, kiyólla-hoilé tuáñrar iman or baabute toh duniyair agagura howá zar. **9** Ze Allar Fuar baabute kúchóbor tobolik gorí-gorí añí fura dile Allar hédmot gorí, íba añr gobá asé de ki, añí honó bad sára tuáñra re yaad gorí yore **10** duat hámica magi de, Alla ye sailé añí zen ebarot óile honó bote tuáñrar hañse aibár rasta fai. **11** Kiyólla-hoilé añr ttu tuáñra llói milto kúb monehoór, zeéne añí aái tuáñra re ruúhanir kessú niyamot dii fari, ziíne tuáñra re mozbut goríbo; **12** yáni, tuáñrar hére táki, tuáñra ttu edde añr ttu asé de imane ezzon ore ezzone josba di faijjum. **13** Báiboináin ókkol, añr ttu tuáñra re zanaidito monehoór de ki, añí tuáñrar hañse ai bolla boóut bar niyot goijjílham de asé, montor etókkal foijjonto aái no faillam. Añí aító saáilam de kiyólla-hoilé zeéne añí tuáñra ttu yó kessú fólfolá fai, zendilla oinno koum ókkol ottu faiyí. **14** Añr ttu manúc beggún or uore zimmadari asé, ítara Girík manúc óuk yáh gañiya óuk, elómdar óuk yáh be-elómdar óuk. **15** Hétolla bóuli tuáñra zetará Rom ot asó, añr ttu tuáñrar hañse yó kúchóbor tobolik goittó bicí azzu asé. **16** Añí toh kúchóbor loi no córmai, kiyólla-hoilé híyan toh iman anóya fottíkiyo re nejat di bolla Allar kudurut, age Yohúdi re yárbaade Beyohúdi re. **17** Kiyólla-hoilé hé kúchóbor ot toh Allar oh forhésgari zahér ó, ziyán manúce siríf imane hásil gorí faijjíl edde faribó, zendilla pak-kalam ot asé, “Forhésgar

manúc imane beh basi tákibo.” **18** Montor asman ottu Allar gozzob manúc uitarár hárr bedini edde kuham or ulɖa zahér ó, zetará sóiyi re kuham lói záfai raké, **19** kiyólla-hoilé Allar baabute ziín zani fara zah híin toh ítarar hañse sáf zahér, kiyólla-hoilé Alla ye híin ítarar hañse sáf zahér goijjé. **20** Duniyair foidayecir héñtte lóti toh íbar deki fara no zah de sífót ókkol sáf-sáf góri dahá zar, yáni íbar ofúrani kudurut edde Kúdayi re; híin íbar banaiya mohóluk ókkol ottu ót faa zah, hétolla manúc ítara ttu honó bahána náí. (aídios g126) **21** Ítara Alla re zani baade yo toh íba re Alla ísafe izzot nó goré aar cúkuriya yó nó zana, bólke ítarar báfani behar óigiyo aar ítarar obuz dil andáre bórigiyoi. **22** Ítara giyani bouli dabi goillé yo, ítara bekuf óigiyo; **23** aar ítara fána no ó de hé Allar ebaadot bad di endilla mutti ókkol or fuíza goijjé ziín fána óizagoi de insán or, faik or, sair-téingga januwar or edde buke áñre de zandár or súrote banaiya. **24** Hétolla Alla ye ítara re ítarar dil or azzur nafak ham ókkol gorí bolla eridifélaiye, híyan olla bóuli ítara ezzon or jisím lói ezzone córmor ham goré. **25** Ítara misá ekkán olla Allar háñsa re bad difélaiye, aar Foida-goróya re no ói mohóluk or ebaadot edde hédmot goijjé. Montor Foida-goróyar taarif abadulabad ówat tákibo! Aamin. (aíon g165) **26** Alla ye hétolla toh ítara re córomi ham or azzut eridifélaiye; ítarar beriyáin de úddwa ziyán milmilab or niyom asé híyan ore ulɖat bodolifélaiye. **27** Héndilla, beřaáin de yó beriyáin lói ziyán milmilab or niyom asé híyan bad di, oinno zon loi córmor ham goittó fool óigiyo, yáni beřaáin de beřaáin lói córmor ham gorí bolla; hétolla ítara nizor uore ítarar hóraf ham or laayek zoribana ané. **28** Aró, ítara zettót Allar baabute zankari rakíto nó saá, Alla ye ítara re hóraf mon rakí bolla eridifélaiye, zeéne ítara ham uíin goré ziín gorón tík no; **29** ítara hárr kuham, burai, lalós edde hórafe furaiya; ítara hásorot, kún, hoijja, férokbazi edde ducconir kíyale bóraiya; ítara gifot-goróya, **30** bodnam-goróya, Alla re nafórot goróya, biyadof, anari, edde fohór ola; ítara hóraf ham or rasta kúle, aar bafmaar nafórman ókkol; **31** ítara obuz, beiman, zaalem, edde berahám; **32** ítara Allar e hókum zane, ki hoilé, zetará héndilla ham híin goré ítara moot or laayek, montor toóu ítara siríf híin gorát táke de no, bólke aar zetará híin goré ítarar sáañt óu deh.

2 Hétolla, ó moniccó, tui zee niki oinno zon or hosúri dóros, tor ttu honó bahána náí; kiyólla-hoilé tui ziyán olla ar ezzon or hosúri dóros, híyan toh tui nize yó gorí nizorgá nize hosúrbon de sábut gorós. **2** Añára toh zani, zetará héndilla ham goré ítara re Alla ye sóiyir uore bisar goré. **3** Lekin, ó moniccó, tui zee niki ekí ham uúin gorós ziín olla ar ezzon or hosúr dóros, tui Allar sáñza ttu hári zabigoí bóuli táaros níki? **4** Aar náki tui íbar oti meérbani, bordac, edde sobór ore oggarájja gorór dé? Tui zanos de no né, Allar meérbaniir moksót óilde toré touwá gorár uzu loizon dé? **5** Montor tor dil toh doró, tor ttu touwá goríbar dil náí; héndilla gorí tui nizor lla gozzob zoma gorór, oh din olla ze din Allar gozzob nazil óibo edde íbar hók bisar zahér óibo. **6** Íba ye toh fottíkiyo re nizor-nizor ham mozin bodola dibo: **7** zetará sobór or sáañte gom ham gorí-gorí mohíma, izzot edde fána no ó de zindigi faibar talac goré, ítara re íba ye ofúrani zindigi diibo; (aiōnios g166) **8** montor zetará siríf nizor fáida tuwa aar sóiyi gán no mane bólke kuham fisá dore, ítarar uore íba ye gozzob edde laánot nazil goríbo. **9** Kuham goré de fottí insán or uore mosibot edde ocánti aibó, age Yohúdir uore yárbaade Beyohúdir uore; **10** montor gom ham goré de ítara fottí ekzone mohíma, izzot, edde cánti faibo, age Yohúdi ye yárbaade Beyohúdi ye. **11** Kiyólla-hoilé Alla ye toh ektorfía no goré. **12** Zedúne Córíyot no fai guná goijjé, ítara dónco óibo de yó Córíyot sára; aar zedúne Córíyot fai guná goijjé, ítara re Córíyot lói beh bisar gorá zaybo; **13** kiyólla-hoilé Allar nozor ot forhégar toh Córíyot or boiyan fúne de ítara no, bólke Córíyot amól goré de ítara re beh forhégar bóuli kobul gorá zaybo. **14** Becók, Córíyot náí de Beyohúdi ókkole zeñtté nizor fítorote ham uúin goré ziín Córíyot ot asé, ítara ttu Córíyot no tákile yo héñtte ítara nizor lla nize córíyot. **15** Híyane ítara sábut goré de, Córíyot or corót ókkol ítarar dil ot leikká asé. Héndilla bóuli ítarar hélome yó gobá déh, kiyólla-hoilé ítarar báfani ye táitai ítarar hosúr deh aar táitai ítarar sófai deh. **16** Híin oh din óibo ze din Alla ye Isá Mosihr áta insán or gufoni ókkol or bisar goríbo. Hé baabute añí tobolik gorí de kúchóbor ot asé. **17** Becók tui toh nizoré nize Yohúdi hoós, aar Córíyot or uore bóraca gorós edde Allar háas bonda bouli fohórai gorós; **18** tui Córíyot ottu taalim faiyós ísafe íbar moncá zanos, aar sóiyi gán basí zanos; **19** tui furafuri táaros de, tui óilide ańđá ókkol or fońt dahóya, andár ot asé de ítara lla ekkán foór, **20** fool

ókkol or ézzon torbiyotdoya, aar nabalok ókkol or ézzon ustat; kiyólla-hoilé tor báfa óilde, Córíyot ot hárr kessúr zankari edde sóiyi asé. **21** Tóoile, tui zee niki ar ezzon ore cíkka dos, tui nizoré cíkka dos né? Tui zee niki suri no goijjó hoói waáz gorós, tui hóno suri gorós né? **22** Tui zee niki zená no goittó hoós, tui hóno zená gorós né? Tui zee niki mutti ókkol ore nafórot gorós, tui hóno mondir ottu suri gorós né? **23** Tui zee niki Córíyot lói borái gorós, tui hóno Córíyot báñgi Alla re beizzoti gorós né? **24** Pak-kalam ot toh endilla asé, “Tuáñrar solasol deki Beyohúdi ókkole Allar nam or kuféri gorér.” **25** Kiyólla-hoilé, becók tor ázomir kimot asé zodi tui Córíyot amól gorós, montor zodi tui Córíyot báñgoya de óile, tóoile toh tor ázomi gorá ázomi nó gorós fán óigiyoi. **26** Hétolla, zodi ázomi goijjá honó manúce Córíyot or dabi-dawa ókkol amól goré, ítare kí Alla ye ázomi goijjá bóuli no gonibó né? **27** Tuáñra Yohúdi ókkol ore Beyohúdi ókkole hosúr díbo, kiyólla-hoilé tuáñra ttu leikká Córíyot táki aar tuáñra ázomi goijjá manúc ói baade úddwa tuáñra Córíyot báñgo, montor ítara toh jisím ot ázomi no goré de óile yo Córíyot amól goré. **28** Kiyólla-hoilé asól Yohúdi toh uite no zee niki siríf Yohúdi kúwala, aar asól ázomi toh waán no ziyán jisím hari baár ttu gorá zah. **29** Bólke asól Yohúdi óilde uite zee niki dil ottu Yohúdi; aar asól ázomi óilde waán ziyán Allar Ruhr duara dil ot gorá zah, leikká Córíyot or duara no. Héndilla manúce taaríf faa de insán or torfóttu no, bólke Allar torfóttu.

3 Héen óile, Yohúdi ókkol ottu kii fáida asé? Ázomi gorár kii kimot asé? **2** Becók, hárr mikká ttu bicí fáida asé. Ebbe agor gán óilde, Alla ye ítarar hañse íbar kalam nazil gorí bolla ítara re bóraca goijjíl. **3** Ítara kessú ye beimani goijjé de óile yo kii óiye? Ítara beimani goijjé bóuli kí Alla ye yó beimani goríbo né? **4** Bilkúl no! Bólke fottí manúc misá tóorile yo, Alla sóiyi tóorar zorur, zendilla pak-kalam ot asé, “Tuáñr hotá ye sábut goré de, Tuñí hámica sóiyi táko, aar Tuáñre elzam laga zah de októť Tuñí ziti aiyó.” **5** Montor añárar kuham zodi Allar hók bisar zahér ó, tóoile añára kii hoitám? Alla ye añára re sáñza dé de híyan nainsáfí no ór ne? Becók híyan óilde insán or ekkán nozoriya. **6** Héndilla bilkúl no! Arnóile Alla ye duniyair bisar keéngori gorí faribó? **7** Hodúne endilla hoibó, “Añr misá hotáye zodi Alla hámica sóiyi táke de híyan zahér ó aar híyane íbar

mohíma ó, tóoile íba ye añré gunágar ísafe kiyá bisar goré?” 8 Héndilla hoó de ítara endilla yó hoibó, ziyán añára hoói bóuli hoói hodúne añárar bodnam goré, ki hoilé, “Aiyó, añára burai gorígoi, kiyólla-hoilé zetó burai gorí fare héto gom.” Hé bodnam-goróya ókkole ítara laayek sánza hámafa fai zaybo. 9 Yala añára kii hoitám? Añára Yohúdi ókkol kí Beyohúdi ókkol or túaro beétor? Bilkúl no; añára toh age yó hoóilam, tamám Yohúdi ókkol edde Beyohúdi ókkol gunár kobzat asé. 10 Zendilla pak-kalam ot asé, “Forhésar honókiye náí, ekzon úddwa náí; 11 buz ola kiyé náí, honókiye Allar talac no goré. 12 Beggún manúc sóiyi ttu lorigiyói, beggún ekku fúañti bigirigiyoi; gom ham goré de honókiye náí, ekzon úddwa náí.” 13 “Ítarar muk fooñsa lac or kúla hobor or dóilla; ítara nizor zire férokbazi goré,” “Ítarar uñt ot háf or bic asé.” 14 “Ítarar muk gozzobe furaiya; ítara hotát honó mırá náí.” 15 “Kún gorí bolla ítara duñri zaa; 16 ítara zeré zaa hére dónco edde mosibot foida goré. 17 Cánti góri tákar rasta ítara no siné.” 18 “Ítarar dil ot Allar honó door náí.” 19 Yala añára zani de, Córíyote ziín hoó hiín uitará re beh hoó zetará Córíyot or tole asé; zeéne honó insán ottu hoibár kessú no táke, aar fura duniyai ttu Allar hañse ísafkitab diya fore, 20 kiyólla-hoilé Córíyot amól gorí honó insán íbar nozor ot forhésar no tóoribo, kiyólla-hoilé Córíyot or duara toh gunár zankari éna aiyé. 21 Montor yala toh Alla ye maincóre Córíyot sára keéngori forhésar bóuli kobul goré de rasta híyan zahér óiye, ziyán or baabute Tourat Córíf ot edde nobi ókkol or kitab ot óu zikír asé. 22 Rasta híyan óilde, zetará Isá Mosihr uore iman ané ítara beggún ore nizor-nizor imane Alla ye forhésar bóuli kobul goré; rasta híyan ot Yohúdi edde Beyohúdi honó forók náí, 23 kiyólla-hoilé beggúne toh guná goijjé, aar Allar mohíma ttu maárum óigiyoi. 24 Montor Mosih Isár bútoe asé de azadir usílaye Alla ye beggún ore Nizor rahámot or hádiya ísafe forhésar bóuli kobul goré. 25 Alla ye íba re Nizor lou báca báy endilla koffara ísafe peec goijjé ziyán or uore iman aníle gunár maf faa zah. Híyan lói Alla ye daháye de, íba oñtté yó Insáfwała accíl zeñtté insáne goijjíl de gunár sánza no di íba ye cóoi-cóoi accíl. 26 Héndilla gorí íba ye e októť sábut goijjé de ki, íba insáfwała, aar zee niki Isár uore iman ané ítare íba ye forhésar bóuli kobul goré. 27 Tóoile borái goríbar kii asé? Kessú náí. Hon córiyot olla bóuli náí de? Amól or né? No, bólke iman or córiyot olla bóuli.

28 Hétolla añára dóri de ki, manúc forhésar tóore de nizor imane, Córíyot or amóle no. 29 Tóoile Alla ki siríf Yohúdi ókkol or Alla? Íba kí Beyohúdi ókkol or óu Alla no? Becók, íba Beyohúdi ókkol or óu Alla, 30 kiyólla-hoilé Alla toh ekgwá éna asé, zibá ye Yohúdi ókkol ore forhésar bóuli kobul goríbo de yó imane, aar Beyohúdi ókkol ore goríbo de yó imane. 31 Tóoile kí añára imane Córíyot ore baatel gorír? Bilkúl no! Bólke, añára Córíyot zari rakí deh.

4 Héen óile, jisím or híkka ttu añárar ze baf asé hé Ibrahíme híyan or baabute kii loot faáil hoitám? 2 Kiyólla-hoilé Ibrahím ore zodi amóle forhésar bóuli kobul gorá gíyeh de óile, tóoile toh yóggwa ttu borái goríbar kessú tákito, montor Allar muúntu no. 3 Pak-kalam ot kii asé? Yíán, “Ibrahíme Allar uore iman raikkíl, hétolla yóggwa re forhésar bóuli gona gyl.” 4 Ham goré de ítar tolof ore toh hádiya bóuli dóra no zah, bólke hók bóuli dóra zah. 5 Montor zee niki nizor amól or uore bóraca no gorí Ubár uore bóraca goré zibá ye bedini ókkol ore forhésar bóuli kobul goré, ítare ítar hé imane beh forhésar bóuli gona zah, 6 zendilla Dawude yó manúc ubá mubarek bouli hoiyé zibá re Alla ye amól sára forhésar bóuli gone. Íba ye hoiyé de, 7 “Mubarek uitará zetarár hosúr ókkol maf gorídiya gíyeh, zetarár guná dur gorífela gíyeh. 8 Mubarek manúc ubá, zibár guná Mabude hísaf no rakíbo.” 9 Eré mubarek hoiyé de híyan kí siríf ázomi goijjá ókkol olla? Aar náki ázomi agoijjá ókkol olla yó? Kiyólla-hoilé pak-kalam ot toh añára endilla faiyí, “Ibrahím ore imane beh forhésar bóuli gona gyl.” 10 Tóoile hoñtté gona gyl dé? Yóggwa ye ázomi gorí baade né náki ázomi no goríbar age? Becók ázomi gorí baade no, bólke ázomi no goríbar age. 11 Forezai yóggwa ye ázomi goijjíl; yóggwar hé ázomi óilde ekkán nicán ziyáne dahá de, yóggwa ázomi agoijjá tákite lóti yóggwa re imane beh forhésar bóuli gona gyl. Hétolla bóuli yóggwa óilde uitará beggún or baf, zetará re ázomi agoijjá óile yo iman anóne forhésar bóuli gona zah. 12 Héndilla, yóggwa ázomi goijjá uitarár óu baf zetará siríf ázomi goijjé de no, bólke endilla imane yó zindigi hara ziyán añárar baf Ibrahím ottu ázomi goríbar age accíl. 13 Kiyólla-hoilé Alla ye Ibrahím ore ze waada diíl, yóggwa edde yóggwar nosóle e duniyai miras faibo hoói, híyan toh yóggwa ye Córíyot amól gorí faiyé de no, bólke imane forhésar tóori beh faiyé. 14 Kiyólla-hoilé Córíyot amól gorí zodi honókiye mirasdár ói fare, tóoile toh

iman befózul óigiyoi, aar hé waadar honó kimot náí; **15** kiyólla-hoilé Córíyote toh gozzob éna ané, montor zeṛé córiyot náí, hére córiyot báṅgar hotá yó náí. **16** Hétolla, hé miras imane beh faa zah, zeéne híyan rahámote ó aar hé waada Ibrahím or tamám nosóle faibo de híyan fakka ó; híyan siríf Córíyot amól-goróya ókkol olla no, bólke uitará lla yó zetará ttu iman asé Ibrahím or dóilla, zibá añára beggún or baf, **17** zendilla pak-kalam ot asé, “Añí toré boóut koum or baf banaiyí.” Yóggwa óilde Ubár nozor ot añárar baf zibár uore yóggwa ye iman raikkíl, yáni Allar uore, Zibá ye mora re zinda goré edde náí de jiníc ókkol Nizor hókume foida goré. **18** Ibrahíme honó acá no tákile yo acár sáañte iman ṭikai raikkíl, hétolla yóggwa boóut koum or baf óiye, zendilla yóggwa re howá gýl de ki, “Tor nosól ókkol bicí óibo.” **19** Zeñtté yóggwa tokoriban ek cót bosór óiye, buijjíl de, nizor moot or októ dáke aáigiyoi aar Sáraḥ ttu yó fua zormo di faribár októ ar náí, montor toóu yóggwar iman komzur nó óiyo. **20** Allar waadar baabute yóggwar dil ot honó cók-cubá nú aiyé, bólke iman ot aró mozbut ói Allar taarif goittó, **21** aar yóggwa ttu furafuri ekin accíl de, Alla ttu Nizor waada fura goríbar óu kémota asé. **22** Yóggwa re hétolla beh forhésgar bóuli gona gýl. **23** “Forhésgar bóuli gona gýl” hoó de hotá híyan siríf yóggwa lla leká gýeh de no, **24** bólke añára lla yó. Añára re yó de forhésgar bóuli gona zaybo, kiyólla-hoilé añára toh Ubár uore iman ainní Zibá ye Isá añárar Malik ore mora ttu zinda goijjé, **25** zibá re añárar hosúre beh moot or át ot tulídiya gýl, aar añára forhésgar ṭoori bolla beh mora ttu zinda gorá gýeh.

5 Hétolla, añára re zettót imane forhésgar bóuli kobul gorá gýeh, Alla lloi añára llói añárar Malik Isá Mosihr duara cántit así. **2** Añára yala ze rahámot or tole así hére añára re íba ye beh foónsaiye, kiyólla-hoilé añára toh iman ainní; hétolla Allar mohímar bági óibar acáye añára kúci gorír. **3** Siríf híyan no, bólke añára mosibot ot mazé yó kúci gorí, kiyólla-hoilé añára zani de, mosibote bordac foida goré, **4** bordace sóiyi adot bana, aar sóiyi adote acá ané. **5** Hé acáye toh añára re córminda no goré, kiyólla-hoilé añára re diiya gýeh de hé Pak-Ruhr duara Alla ye añárar dil ot Nizor muhábbot dálidiye. **6** Kiyólla-hoilé zeñtté añára nizoré nize basaibár kaabel nu accílám, héñtte sóiyi októ mozin añára bedini ókkol ore basai

bolla Mosih ye zan diyé. **7** Zee tee toh honó forhésgar manúc olla úddwa nizor zan dito no saá, toóu ezzon bálai-goróya lla honókiye nizor zan dito hímmot goillé goittó fare. **8** Lekin Alla ye añára re goré de Nizor muhábbot híyan eén gorí zahér goijjé, añára gunágar accílám de októ Mosih ye añára lla bóuli zan diyé. **9** Añára re zettót Mosihr lou wór usílaye forhésgar bóuli kobul gorá gýeh, añára toh hámaha íbar duara Allar gozzob ottu basiyúm. **10** Kiyólla-hoilé añára toh age Allar ducon accílám, montor íbar Fuar moot or usílaye íba llói añárar bonot óigiyoi. Añárar bonot zettót óigiyoi, añára toh hámaha íbar zibone nejat faiyum. **11** Siríf híyan no, bólke añára Alla re lói añárar Malik Isá Mosihr duara kúci yó gorí, zibá ye añára re Alla lloi bonot gorídiye. **12** Guná duniyait ekzon manúc or duara beh aiccíl, aar hé gunár zoriya moot aái fura insán-zatir uore fólígiyoi, kiyólla-hoilé beggúne guná goijjé. **13** Becók, Córíyot diibar age duniyait guná accíl, montor zeṛé córiyot náí hére guná bóuli dóra yó náí. **14** Toóu moote Adom ottu lóti Muúsa foijjonto hókumot goijjíl, uitarár uore úddwa zetarár guná Adom or nafórmanir dóilla no. Adom accíl aibár hotá accíl de íbar icára. **15** Lekin rahámot or hádiya hé hosúrír dóilla no. Kiyólla-hoilé ekzon manúc or hosúre bicí manúc moijjé de óile yo, Allar rahámot toh yár túaro boóut bicí ḍoóñr, ziyán ar ekzon Manúc, yáni Isá Mosihr rahámot or duara hádiya ísafe hé bicí zon or uore bicígori diiya gýeh. **16** Héndilla, Allar hádiyar notiza yó hé gunár notizar dóilla no. Kiyólla-hoilé ek ruwate hé ekkán hosúrír notiza óilde hosúrbon bouli fáisela zari óiye, montor arek ruwate boóut hosúrír zoriya ze hádiya aiccé híyan óilde forhésgar ṭóora. **17** Ekzon manúc or hosúrír zoriya zettót moote hé ekzon ottu lóti hókumot gorá cúru goijjé, tói añára zetará aṭalikka rahámot faiyí aar hádiya ísafe forhésgar ṭóoiiji, añára toh zindigit maze Ubár zoriya, yáni Isá Mosihr zoriya hámaha hókumot goríyum. **18** Hoóir de ki hoilé, zendilla ekkán hosúrír notiza ísafe fura insán-zati hosúrbon ṭóoiije, héndilla ekkán gom ham or notiza óilde fura insán-zati lla forhésgar ṭóora edde zindigi aiccé. **19** Kiyólla-hoilé zendilla ekzon manúc or nafórmanir zoriya boóut zon gunágar ṭóoiije, héndilla Ekzon or fórmadarir zoriya hé boóut zon ore forhésgar bóuli kobul gorá zaybo. **20** Córíyot etollá beh diiya gýeh, zeéne hosúri bicí ó; montor zeṛé guná bicí óiye, hére rahámot toh yár túaro bicí óigiyoi, **21** zeéne guná ye zendilla

moot or duara hókumot goijjé, héndilla rahámote yó forhésgarir ham loi hókumot goré, Isá Mosih añárar Malik or duara ofúrani zindigi faa bay bolla. (aiñios g166)

6 Tóoile añára kii hoitám? Añára guná gorát tákitam né zeéne rahámot bicí ó? **2** Bilkúl no! Kiyólla-hoilé añára toh guná ttu morigiýigoi, tói añára hé gunát ar keéngori zindigi haraiyúm? **3** Tuáñra kí no zano, añára zedúne Mosih Isá llói ek óibar báp̄tisma loiyí, añára hé báp̄tismar duara íbar fúañti morigiýigoi dé? **4** Hétolla añára báp̄tismar duara íbar fúañti morigiýigoi de híyane dahá de, añára re íbar fúañti dohón gorá gíyeh, zeéne Alla Bafe Nizor mohímaye Mosih re zendilla mora ttu zinda goijjé, héndilla añára yó noya zindigi harai. **5** Kiyólla-hoilé zodi añára íbar dóilla mori yore íba llói ek óigiyigoi de óile, añára toh íbar dóilla zinda gorá zah lói yó íba llói hámaha ek óiyum, **6** kiyólla-hoilé añára toh zani, añárar furana fítorot ore íbar fúañti kúruc ot dí mariféla gíyeh, zeéne guná ye hókumot goittó de añárar jisím yíán nac óizagoi, aar añára gunár gulam ar no táki. **7** Kiyólla-hoilé zee niki morigiýói, íte toh guná ttu azad óigiyoi. **8** Añára zettót Mosihr fúañti moijjí, añára ttu ekin asé de ki, añára íbar fúañti zinda yó tákiyum, **9** añára toh zani, Mosih re zettót mora ttu zinda gorá gíyeh, íba ar honódin no moribó; moot ottu íbar uore ar honó kémota náí. **10** Kiyólla-hoilé zeñtté íba moijjíl, íba toh ekbar ot hámica lla gunár hókumot ottu morigiýói; montor yala íba ye ze zindigi harar, híyan Alla lla beh harar. **11** Héndilla tuáñra re tuáñra yó báfiyo de, gunár hókumot ottu tuáñra mora, aar yala Mosih Isár bútoe Alla lla beh zinda asó. **12** Hétolla guná re tuáñrar fána ó de jisím or uore hókumot goittó no diyó, arnóile tuáñra re hé jisím or hóraf moncá mozin sola baibó. **13** Jisím or honó híssa re gunár ham gorí bolla eridi no raikkó, bólke mora ttu zinda óiya manúc ísafe nizoré Allar át ot gosáido, aar héndilla íba lla forhésgarir sámama ísafe nizor jisím or híssa ókkol óu gosáido. **14** Kiyólla-hoilé guná ye tuáñrar uore ar hókumot no goríbo, kiyólla-hoilé tuáñra toh Córiyot or tole no, bólke rahámot or tole. **15** Tóoile kii óiye? Añára Córiyot or tole no bólke rahámot or tole así bóuli guná goittám né? Bilkúl no! **16** Tuáñra kí no zano né, zeñtté tuáñra hotábattara mani bolla nizoré honókiyor haíse gulam ísafe gosáido, héñtte tuáñra zar hotábattara manor ítar gulam dé? Héndilla,

tuáñra no óile gunár gulam boni moribá, arnóile Allar gulam boni forhésgari ham goríba. **17** Lekin Allar cúkur de ki, tuáñra gunár gulam accíla de óile yo, toóu tuáñra re diya gíyeh de taalim ot ze sóiyi faiyó híin ore fura dile manat asó. **18** Tuáñra re toh guná ttu azad gorífela gíyeh, yala tuáñra forhésgarir gulam óigiyogoi. **19** Tuáñra buzí kul no faiba de hétolla, añí insáni zindigi ttu meésal dí iín beggún hoóir. Zendilla tuáñra aró kuham gorí bolla nizor gaár híssa ókkol ore nafak edde kuham or gulam ísafe eridi raikkíla, héndilla pak ói bolla yala tuáñra nizor gaár híssa ókkol ore forhésgarir gulamit gosáido. **20** Kiyólla-hoilé zeñtté tuáñra gunár gulam accíla, héñtte toh forhésgari ttu azad accíla. **21** Tuáñra zíín gorón or zoriya yala córmindat asó, híin gorí yore kii fáida faáila dé? Kiyólla-hoilé híin or notiza toh moot. **22** Lekin yala de tuáñra guná ttu azad fai Allar gulam óigiyogoi; híyan ot tuáñrar fáida óilde, tuáñra zetó éto pak ór, aar ahérit ofúrani zindigi faiba. (aiñios g166) **23** Kiyólla-hoilé gunár muzuri toh moot, montor Mosih Isá añárar Malik or duara Allar hádiya óilde ofúrani zindigi. (aiñios g166)

7 Báiboináin ókkol, tuáñra zetará Córiyot zano, añí tuáñra re hoóir, tuáñra kí no zano né, ze honó manúc or uore Córiyot or hókumot otódin beh táke zetódin hé manúc cwa zinda táke? **2** Meésal, córiyote bou wóre nizor hócom lói otódin baindá raké zetódin hócom zinda táke; montor zodi hócom morizagói, híba hé córiyot ottu azad óizagoi ziyáne híba re hócom lói bañdí raikké. **3** Hétolla, hócom zinda tákite zodi híba ar ezzon or óizagoi, tóoile híba re zenákur howá zaybo; montor zodi híbar hócom morigiýói de óile, tóoile híba hé córiyot ottu azad faiyé, yala híba ar ezzon or óizaile yo híba re zenákur howá no zaybo. **4** Héndilla, ó añr báiboináin ókkol, tuáñra Mosihr jisím or híssa bonigiyógoi de hétolla, Córiyot ottu tuáñra yó morigiýógoi. Yala toh tuáñra ar ezzon or óigiyogoi, yáni mora ttu zinda gorá gíyeh de hé Mosihr óigiyogoi, zeéne añára Alla lla gulagala dórai. **5** Kiyólla-hoilé zeñtté añára insáni fítorot mozin zindigi haraitám, héñtte Córiyot or foida goijjá gunár azzu ókkole añárar jisím or híssa ókkol ot ham goittó, zeéne añára endilla gulagala dórai zííne moot ané. **6** Lekin añára ziyán ot bondi accílam, híyan ottu mori yore yala Córiyot ottu azad faiyí. Hétolla añára ar hé leikká Córiyot or diiya furan zindigir gulam no, bólke

Pak-Ruhr diiya noya zindigir gulam. 7 Tóoile añára kii hoitám? Córiyot guná de né? Bilkúl no! Bólke Córiyot sára añi guná siní no faittam, kiyólla-hoilé Córiyote zodi endilla no hoitó, “Lalós no goríba,” tóoile lalós kii de añi no zaintam. 8 Montor guná ye hé hókum ottu fáida tulí añr bútoe hárr dóilla lalós foida goijjé, kiyólla-hoilé Córiyot no tákile, guná toh morar dóilla ói táke. 9 Ek hale añi Córiyot sára zinda accílám, montor hé hókum aiccé rár guná zinda óiye, aar añi morigiýgoi. 10 Hé hókum ziyáne zindigi aníbar accíl, híyane añr lla moot ainné. 11 Kiyólla-hoilé guná ye hé hókum ottu fáida tulí añré daga diyé, aar hé hókum or duara añré marifélaiye. 12 Hé ísafe, Córiyot pak, aar hére asé de hókum ókkol óu pak, insáfi edde gom. 13 Híyan or maáni kí ziyán gom híyan añr lla moot boinné dé? Bilkúl no! Bólke guná re guná ísafe ót fai bolla bóuli guná ye ziyán gom híyan estemal gorí añr lla moot ainné deh, zeéne hé hókum or duara dahá zah de ki, guná ebbe hóraf. 14 Añára toh zani, Córiyot gabi; montor añi de jisími; añré gunár gulamit besiféla gyéh. 15 Añi kii gorí añi nize úddwa no buzí; kiyólla-hoilé añi añr ttu ziyán goittó monehoó híyan gorí de no, bólke añr ttu nafórot lage de híyan beh gorí. 16 Añi zettót añr ttu ziyán goittó mone no hoó híyan gorí, tóoile toh Córiyot gom bouli añi kobul gorí. 17 Hé súrote, híyan goróya añi no, bólke añr bútoe táke de hé guná. 18 Kiyólla-hoilé añi zani de, añr bútoe, yáni añr jisím or bútoe gom kessú náí. Becók, gom mán goríbar azzu añr ttu asé, montor añi híyan gorí no fari. 19 Kiyólla-hoilé ze gom ham mán añr ttu goittó monehoó, añi toh híyan no gorí; bólke ze bura ham mán añr ttu goittó mone no hoó, híyan beh gorát táki. 20 Añr ttu ziyán goittó mone no hoó híyan zettót añi gorí, tóoile toh híyan goróya añi no, bólke añr bútoe táke de hé guná. 21 Yala tóoile añr bútoe ekkán niyom loot fair de ki, gom mán goittó monehoilé, añr hañse bura gán aái boói táke. 22 Kiyólla-hoilé añi toh nizor bútotu Allar niyom ore bicí fosón gorí, 23 montor añi dekír de, añr jisím or híssa ókkol ot aró ekkán niyom asé, ziyáne añr dil or hé niyom loi larái gorí añré gunár niyom waán or bondi banai raké ziyán añr jisím or híssa ókkol ot táke. 24 Añi bicí fuckará! Moot ané de jisím yíán ottu añré hone basaibó? 25 Alla re cúkuriya, íba ye añré Isá Mosih añárar Malik or duara basaiyé! Hé ísafe, ek ruwate toh añr dil ot asé de, Allar niyom or gulami

gorí bolla; montor arek ruwate añr insáni fítorote añré gunár niyom or gulam banai raké.

8 Zetará Mosih Isár bútoe asé, ítara re yala ar hosúrbon dóra no zah. 2 Kiyólla-hoilé tuáñra re toh zindigi dooya Pak-Ruhr niyome, Mosih Isár duara, gunár edde moot or niyom ottu azad gorífelaiye. 3 Córiyote insán or jisím or komzurir zoriya ziyán gorí nó fare, Alla ye híyan endilla gorí goijjé: gunár kurbaní di bolla íba ye Nizor Fua re guná ola jisím or súrote diferáiyé. Héndilla góri íba ye insán or jisím ot asé de guná re hosúrbon tóoraiye, 4 zeéne añára zetará insáni fítorot mozin no bólke Pak-Ruhr héдайot mozin soli, añára Córiyot or dabi-dawa re furafuri adai gorífelai fari. 5 Kiyólla-hoilé zetará insáni fítorot mozin sole ítara insáni fítorot or gún or híkka beh mon deh, montor zetará Pak-Ruhr héдайot mozin sole ítara Pak-Ruhr gún or híkka beh mon deh. 6 Insáni fítorot or híkka mon dilé moot beh aiyé, montor Pak-Ruhr híkka mon dilé zindigi edde cánti faa zah, 7 kiyólla-hoilé ze mon insáni fítorot or híkka, híyan Allar ducon; kiyólla-hoilé híyane Allar córiyot mainto toh razi no, aar mani yó no fare. 8 Hé ísafe, zetará insáni fítorot mozin sole ítara Alla re kúci gorí no fare. 9 Lekin Allar Ruh sóiyi-sóiyi tuáñrar bútoe táke de óile, tóoile toh tuáñra insáni fítorot or mozin no bólke Pak-Ruhr mozin soloór deh. Lekin zar bútoe Mosihr Ruh náí, íte Mosihr no. 10 Zodi Mosih tuáñrar bútoe asé de óile, becók ek ruwate tuáñrar jisím gunár zoriya mora de óile yo, arek ruwate forhésgarir zoriya Pak-Ruh óilde foran. 11 Aar zodi Zibá ye Isá re mora ttu zinda goijjé Ubár Ruh tuáñrar bútoe táke de óile, tóoile toh íba zibá ye niki hé Mosih Isá re mora ttu zinda goijjé íba ye tuáñrar fána ó de jisím ore yó íbar oh Ruhr duara zinda goríbo zibá tuáñrar bútoe táke. 12 Hétolla, ó báiboináin ókkol, becók añára fóros or tole así, montor insáni fítorot mozin zindigi haraibár no. 13 Kiyólla-hoilé zodi jisím or fítorot mozin zindigi haro, tóoile toh hámaha moribá; montor zodi Ruhr bole jisím or fítorot ókkol marifélo, tóoile zinda tákiba. 14 Kiyólla-hoilé zedúne Allar Ruhr héдайote zindigi hara, ítara beggún toh Allar fuain. 15 Tuáñra toh gulamir Ruh faiyó de no, zeén níki ar dora foitto; bólke tuáñra Allar fuain tóora de Ruh éna faiyó, Zibár zoriya añára Alla re “Abba” yáni “Ó Baf” hoói matai fari. 16 Hé Ruh Nize añárar ruh lói mili gobá dé de ki,

añára òilam de Allar fuain. **17** Añára zettót Ìbar fuain, añára mirasdár óu; yáni añára Alla ttu miras fooya edde Mosihr fúañti miras fooya; kiyólla-hoilé añára zettót Mosihr ðóilla duk ókkol bordac gorí, añára Ìbar fúañti mohímat óu bági óiyum. **18** Añí zani, añárar hañse ze mohíma zahér óibar asé, híyan lói fúwan goillé añárar e zindigir duk-mosibot ókkol kessú no. **19** Héñtte dahá zaybo Allar fuain hontará; híyan deki bolla tamám mohóluk ókkol bicí azzur sáañte entezar ot asé. **20** Kiyólla-hoilé mohóluk ókkol or moksót toh behar óigiyoi; híin ottu monehoói héndilla óiye de no, bólke Alla ye Nizor moncá lói héndilla goijjé deh. Toóu híin ore e acá gán diiya giyé, **21** ki hoilé, ek din hé mohóluk ókkole yó borbadir gulami ttu azad fai yore, Allar fuain dor mohímar azadir bági óibo. **22** Añára toh zani, aij foijjonto tamám mohóluk ókkole endilla gori kiñyar, zendilla gori maa ye fua hálas óibar októt dukké kiñya. **23** Siríf híine no, bólke añára zetará Pak-Ruh re Allar foóila hádiya ísafe faiyí, añára nize yó búto-re-búto-re kiñyai-kiñyai oh din or entezar ot así, ze din Alla ye añára re Nizor fuain banaibó, yáni añárar gaa re azad goríbo. **24** Kiyólla-hoilé añára re toh acá dii éna nejat diya giyé. Saiyá gán sai bolla toh honókiye ar acá no goré; kiyólla-hoilé ziyán saáifelaiye híyan sai bolla acá goré de hon asé? **25** Lekin adeikká kessú lla zodi añára acá gorí, añára toh híyan olla sobór or sáañte entezar ot táki. **26** Borabor héndilla, Pak-Ruh ye yó añárar komzurit modot goré, kiyólla-hoilé añára toh kiyólla-kiyólla dua gorón sáa no zani, montor Pak-Ruh Nize endilla hañdi-hañdi añára lla cúwaric goré, zín boiyan gorí faribár raá náí. **27** Alla, zibá ye fottí dil or hotá zane, Ìba ye Pak-Ruhr báfani yó zane, kiyólla-hoilé Pak-Ruh ye Allar pak bonda ókkol olla Allar moncá mozin beh cúwaric goré. **28** Añára zani, zetará Alla re muhábbot goré, yáni zetará re Alla ye Nizor erada mozin ðaikké, ítara lla zín ó híin beggún Ìba ye ítara bálai lla beh ówaba. **29** Kiyólla-hoilé zetará re Ìba ye age lóti basí raikké, ítara toh Ìbar Fuar ðóilla ói bolla yó Ìba ye fáisela goijjé, zeéne bicí báiboináin dor búto-re hé Fua foóila zormo wa ói fare. **30** Aar zetarár baabute Ìba ye age lóti fáisela gorí raikké, ítara re Ìba ye ðaikké yó; aar zetará re Ìba ye ðaikké, ítara re Ìba ye forhésagar bóuli kobul óu goijjé; aar zetará re Ìba ye forhésagar bóuli kobul goijjé, ítara re Ìba ye mohímawala yó goijjé. **31** Yala híin beggún saái añára kii hoitám? Alla zodi añárar híkka ó, hone añárar ulða týai faribó? **32**

Ìba ye toh Nizor Fua re úddwa hárai nó raké bólke añára beggún olla moot or át ot tulí dífelaiye. Ìba ye zettót Nizor Fua re añára re diífelaiye, tói Ìba ye añára re hárr kessú yó kiyá dii no felaito? **33** Yala Allar basíloiya bonda ókkol or ulða elzam lagai faribár hon asé? Ítara re toh Alla Nize éna forhésagar bóuli kobul goijjé. **34** Ítara re hone hosúrbon tóorai faribó? Kiyólla-hoilé Mosih Isá zibá siríf moijjíl de no bólke zinda yó óiye, Ìba toh Allar den ðák ottu asé aar Ìba ye añára lla cúwaric goré. **35** Hétolla añára re Mosihr muhábbot ottu kiyé alok gorí faribó? Mosibote né? Ferecani ye né? Zulúme né? Feror búkke né? Hoorsuor or homi ye né? Afofbifote né? Duccon or toluware né? **36** Pak-kalam ot endilla asé, “Tuáñr lla bóuli añára dinbór moot or hótorat fori; maincór nozor ot añára zooráibo de bérasóol or ðóilla.” **37** Montor añára toh zibá ye añára re muhábbot goijjé Ìbar duara híin beggún ore furafuri fóta gorífelai. **38** Añr ttu yán ekin asé de ki, moote yáh zindigiye, fírista ókkole yáh búto-ferot ókkole, yaar hale yáh aibó de hale, honó ðóilla asóre, **39** asman or yáh fatalfur or honó kessú ye, yáh oinno honó mohóluka añára re Allar oh muhábbot ottu alok gorí no faribó ziyán Mosih Isá añárar Malik or usílaye faiyí.

9 Añí Mosih re gobá gorí háñsa hotá hoóir, misá hotá no, añr hélome yó Pak-Ruhr duara yán gobá der, **2** ki hoilé, añr dil ot Boni Isráil ókkol olla bicí afsús lager edde lagatar ferecan lager. **3** Añí toh añr koum, yáni zetará añr gusso edde lou, ítara lla bóuli zodi Mosih ttu alok ói bodduar tole ówa foitto úddwa óitam. **4** Alla ye toh hé Boni Isráil ókkol ore Nizor fuain óibar hók diiyé, edde ítara hañse Nizor mohíma zahér goijjé. Ìba ye ítara llói razinama ókkol goijjé, aar ítara re Córiyot edde sóiyi ebaadot or torika diiyé. Ìba ye ítara llói boóut ðóilla waada ókkol óu goijjé. **5** Ítara óilde bafadada gún or nosól, aar Mosih yó insán ísafe ítara háandan ottu beh aiccé. Zibá ye hárr kessúr uore hókumot goré, hé Allar taarif abadulabad ówat tákouk. Amin. (aiñ g165) **6** Añr hotár maáni eén no de ki, Allar kalam baatel óigiyoi. Kiyólla-hoilé Isráili beggún toh basíloiya Isráili no; **7** Ibrahim or nosól ottu aiccé maáni hóno ítara beggún Ìbar asól fuain de no. Pak-kalam ot endilla asé, “Isahák ottu beh tor nosól dóra zaybo.” **8** Hoitó sailé, insán ottu foida óiye maáni Allar fuain óigiyoi de no, bólke asól nosól bóuli uitará re beh dóra zah, zetará Allar waadar fuain. **9** Hé

waada óilde yíán, “Añí e októót waafes aiccúm, héntte Sáraħ ttu eggwá morot fua tákibo.” **10** Siríf híyan no, bółke Rebékar hálót óu héndilla; zeñtté híba ekzon manúc lói, yáni añárar baf Isahák lói hámil accíl; **11** héntte fuain nún zormo nó óite, aar honó bála-bura kessú nó goitté, híba ye Alla ttu ekkán hóbor faiyé, ziyáne dahá de, Alla ye manúc ókkol ore íbar zari táke de erada mozin beh basílo; híyan honó amól or zoriya no bółke íba ye age lóti ɗaikké de hétolla. **12** Híba re howá gýl de ki, “Fua ɗoóñr gwá ye cóñro war gulami goríbo.” **13** Hétolla pak-kalam ot endilla asé, “Yakub ore Añí muhábbot goijí, montor Isów re nafórot goijí.” **14** Tóoile añára kii hoitám? Alla ttu insáf náí de né? Bilkúl no. **15** Kiyólla-hoilé íba ye toh Muúsa re endilla hoóil, “Añr ttu zaré monehoó, tar uore rahám goijúum; aar zaré monehoó, taré feťfurani daháiyum.” **16** Hé ísafe, híyan honókiyor moncár yáh kucíc or uore no, bółke Allar rahám or uore. **17** Alla ye toh Féruan ore endilla hoiyé de Pak-kalam ot asé, “Añí toré baáñcca tuillí de kiyólla-hoilé, zeéne tor duara Añr kudurut dahái fari, baade duniyair agagura Añr nam or howáhoi óibo.” **18** Hétolla toh íba ye zaré monehoó tar uore rahám goré, aar zaré monehoó tar dil doró gorífele. **19** Yala tuáñra honókiye añré endilla hoibá, “Toóu kiyá Alla ye añárar hosúr dóre? íbar mon ore hone bazá dí fare?” **20** Añr zuwab óilde, ó moniccó, Allar uottú mati bolla tui hon? Banaiya kessú ye kí banoya ttu endilla fusár goríbo né, “Añré endilla kiyá banailá?” **21** Ek meřir dola ttu kí monehoó de héndilla jiníc ókkol banai bolla kuáñijja ttu hók náí né—kessú jiníc háas ham ot estemal gorí bolla aar kessú jiníc cáðaran ham ot estemal gorí bolla? **22** Borabor héndilla, Alla ttu Nizor gozzob nazil goittó edde Nizor kudurut zahér goittó monehoiyé de óile yo, toóu íbar gozzob faibar manúc zetará re borbadi lla toiyar gorá gýyeh, ílara re íba ye bicí sobór or sáante cóoiye. **23** íba ye ílara re etollá cóoiye, zeéne íbar oti mohíma uitarár hañse zahér ó, zetará íbar rahám faibar manúc, zetará re íba ye mohíma lla age lóti toiyar raikké. **24** Rahám faibar manúc ílara óilam de añára. íba ye siríf añára Yohúdi ókkol or bútotu ɗaikké de no, bółke Beyohúdi ókkol or bútotu yó ɗaikké. **25** Alla ye endilla hoiyé de nobi Hóciyar kitab ot asé, “Zetará Añr bonda nu accíl, ílara re Añí ‘Añr bonda’ ɗakiyúm, aar ílara zetará Añr adorbon nu accíl, Añí ílara re ‘Añr adorbon’ ɗakiyúm. **26** Ze zagat ílara re endilla howá gýyeh, “Tuáñra Añr bonda no,” hé

zagat ílara re ‘zinda Allar fuain’ ɗaka zaybo.” **27** Nobi Yesáyah ye Isráili ókkol or baabute guzori endilla hoiyé, “Boni Isráil ókkol doijjar sor or balur hédun de óile yo, toóu ílara bicí hom maincé beh nejat faibo. **28** Kiyólla-hoilé Mabude toh íbar fóрман duniyait furafurir sáante bicí toratori fura goríbo.” **29** Zendilla nobi Yesáyah ye age lóti batalai dýl, ki hoilé, “Alla Robbul Alamine zodi añára lla kessú nosól rakí no zayto, tóoile añárar hálót toh Sódóm cóor or edde Gomórah cóor or ɗóilla óizaytoi.” **30** Tóoile añára kii hoitám? Yíána, Beyohúdi ókkole forhésгарir talac no goillé yo forhésгari hásil goijjé, ze forhésгari imane beh faa zah; **31** montor Boni Isráil ókkole forhésгарir córiyot or talac goillé yo hé córiyot loot nó faa. **32** Kiyólla? Kiyólla-hoilé ílara híyan ore imane kucíc no gorí amóle faa fángori kucíc goijjíl. ílara uját há de fattór ot uját háíye. **33** Zendilla pak-kalam ot asé, “Soó, Añí Síyon ot eggwá endilla fattór rakír, ze fattóre maincóre uját hábaibo, yíba óilde oh Cíl, ze Cíle maincóre fora baibó, montor zee niki íbar uore iman ané íte bilkúl córminda no óibo.”

10 Ó báiboináin ókkol, Boni Isráil ókkol olla añr dil or azzu edde Allar hañse añr dua óilde, ílara nejat fouk. **2** Añí ítarar baabute e gobá gán dir de ki, ílara ttu Alla lla jus asé, montor sóiyi zankari táki no. **3** ílara ttu Allar forhésгарir baabute honó zankari náí, aar ílara nizor kucíce beh forhésгар óito saá; hétolla ze torika loi Allar forhésгari hásil goré hé torika ílara kobul no goré. **4** Mosih ye toh Córiyot ore hótom gorífelaiye, zeéne iman ané de ílara fottíkiye forhésгari hásil goré. **5** Córiyot lói forhésгар óibar baabute Muúsa ye toh endilla leikké, “Zee niki Córiyot or hókum ókkol mane, íte híine beh basi tákibo.” **6** Montor imane ze forhésгari hásil goré híyan or baabute pak-kalam ot asé de, “Tuáñra dile-dile no hoiyó de, ‘Hone asman ot uríbo?’” Yáni Mosih re lamai aní bolla. **7** Aar endilla yó no hoiyó de, “Hone nise fatalfur ot lamibó?” Yáni Mosih re muruda ókkol ottu waafes loianí bolla. (Abyssos g12) **8** Montor pak-kalame endilla hoór de no né? “Kalam tuáñrar ɗáke asé, yáni tuáñrar muk ot edde tuáñrar dil ot.” Híin óilde iman or baabute kalam uúin zíin añára tobolik gorí de ki, **9** zodi tuñí nizor muké Isá re Malik de cíkar goró, aar Alla ye íba re mora ttu zinda goijjé de híyan dile iman anó, tuñí nejat faiba. **10** Kiyólla-hoilé dile iman aníle forhésгар bóuli kobul gorá zah, aar

muké cíkar goríle nejat fa zah. **11** Pak-kalam ot endilla asé, “Zee niki Íbar uore iman ané íte bilkúl córminda no óibo.” **12** Híyan ot Yohúdi edde Beyohúdi honó forók náí, kiyólla-hoilé beggún or Kúda toh ekgwá. Íba re zetará mata, ítara beggún ore Íba ye aṭalikka rahámot dee, **13** kiyólla-hoilé, “Zee niki Mabud or nam loybo, íte nejat faibo.” **14** Montor zibár uore ítara iman nú ané, Íba re ítara keéngori mataibó? Aar zibár baabute honódin nó fúne, Íbar uore ítara keéngori iman aníbo? Tobolik-goróya no tákile ítara keéngori fúni faribó? **15** Aar ítara keéngori tobolik goríbo, zodi ítara re no difeṛá? Pak-kalam ot endilla asé, “Zetará gom jiníc ókkol or gom hóbor ané, ítarar t́éng hotó mubarek!” **16** Lekin ítara beggúne hóno hé gom hóbor gán kobul nó goré; kiyólla-hoilé nobi Yesáyah ye toh endilla hoiyé, “Ó Mabud, añárar poigam hone ekin goijjé?” **17** Hé ísafe, iman aiyé de fúnile, yáni Mosihr baabute kalam fúnile. **18** Lekin añr súwal óilde, Boni Isráil ókkole hé kalam nó fúne de né? Becók fúinne. Pak-kalam ot asé de, “Ítarar abas duniyair agagura ttu fúna gýeh, aar ítarar hotá duniyair céc matá foijjonto foónicce.” **19** Abar añr súwal óilde, Boni Isráil ókkole nó buzé de né? Híyan or zuwab Alla ye Muúsar áta age lóti difélaie de ki, “Ek bezatir duara Añí tuáñra re guccá tulídiyum, aar ek obuz zatir duara Añí tuáñra re guccá tulídiyum.” **20** Forezai Alla ye nobi Yesáyahr áta aró horagori endilla hoiyé, “Zetará Añr talac nó goré, ítara Añr loot faiyé; zetará Añr baabute honó fusár nó goré, ítarar hañse Añí Nizoré zahér goijjí.” **21** Lekin Boni Isráil ókkol or mutalek Íba ye hoiyé de, “Ek nafórman edde ekguañjja koum or uzu Añí dinbór Añr duní át melí raikkí.”

11 Tóí aró añr súwal óilde, Alla ye Nizor basfloiya bonda ókkol ore inkar gorífelaie de né? Bilkúl no! Kiyólla-hoilé añí nize yó de ézzon Isráili; añí óilam de Ibrahim or nosól, aar Binyamin or háandan or manúc. **2** Alla ye Nizor bonda zetará re age lóti basí raikkíl ítara re inkar gorí nó fele. Pak-kalam ot nobi Eliyas or baabute kii asé híyan tuáñra no zano né? Yóggwa ye toh Boni Isráili ókkol or ulḁa Allar hañse endilla bisar dyíl, **3** “Ó Mabud, ítara Tuáñr nobi ókkol ore marifélaie aar Tuáñr kurbani-gañ ókkol bāngifelaie. Añí ekzon beh basi así deh, yala ítara añr zan loito yó talac gorér.” **4** Montor Alla ye yóggwa re kii zuwab dyíl? Yíána, “Añí Nizor lla háñt ázar manúc rakídiyi, zetará Baal debotar hañse

añrú nó fela.” **5** Borabor héndilla, ehón or októti Boni Isráil or hodún manúc tákigiyo, zetará re Alla ye rahámote basí raikké. **6** Aar híyan zettót rahámote, tooile híyan toh honó amóle no; zodi amóle óito, tooile toh rahámot ar rahámot no tákito. **7** Tooile notiza kii? Boni Isráil ókkole ziyán or talac goijjíl híyan ítara hásil nó goré, montor ítara ttu zetará re basflowa gýeh ítara beh híyan hásil goijjé, aar badbaki gún or dil doró gorífela gýeh. **8** Zendilla pak-kalam ot asé de, “Alla ye ítara re eén súharaiya gorífelaie, zeén niki ítara aij foijjonto suké no deké, aar hane no fúner.” **9** Dawude hoiyé de, “Ítarar mela-cóba ókkol ítara lla cíyarir zal edde fán bonizoggoi; híin or zoriya ítarar uore mosibot aiyóuk, aar nizor hóraf ham or sáñza fouk. **10** Ítarar suk añdá óizoggoi, zeéne ítara no deké; ítara hámica lla guza óizoggoi.” **11** Abar añr súwal óilde, ítara hé ujáṭ háie de hámica lla fori bolla né? Bilkúl no. Bólke ítarar nafórmanir zoriya Alla ye Beyohúdi ókkol ore nejat faibar moouka diyé deh, zeéne hé Isráili ókkol ottu gairot lage. **12** Hé hálote buzá zah de, ítarar nafórmaniye zettót duniyai lla boóut fáida óiye aar ítarar lussáne Beyohúdi ókkol olla boóut fáida óiye, tóí basát máze ítara beggún cámil tákile aró hotó fáida óibo fáñllar! **13** Ó Beyohúdi ókkol, añí tuáñra re hoóir deh. Añré zettót tuáñra Beyohúdi ókkol olla sáhabi bana giyéh, añí añr hé zimma re bicí izzot dih, **14** zeéne honó bote añí añr koum ore gairot tulídi, ítara ttu hodún ore nejat fa bay fari. **15** Kiyólla-hoilé ítara re inkar gorá gýeh de híyane zettót Alla lloi duniyair manúc or bonot óigiyo, tóí ítara re kobul goríbo de híyane kii óibo fáñllar? Híyan toh mora manúc zinda ór fán óibo! **16** Ze foóila ruṭi Allar hañse peec gorá gýeh, hé ruṭi pak de óile, tooile toh ruṭi beggún pak. Gas or cíñyor pak de óile, tooile toh déeila ókkol óu pak. **17** Dóro, ek zaitun-gas ottu kessú déeila ókkol bāngifela gýeh, aar híin or zagat maze tuáñra jonggoli zaitun-gas or kessú déeila ókkol ore zuradiya giyéh, aar asól zaitun-gas or cíñyor ottu roc ṭani loor. **18** Hétolla tuáñra nizoré nize hé déeila gún or túaro barík bóuli no ṭáariyo, zodi ṭáaro, monot rakíyo de, tuáñra cíñyor ore ṭikai rakór de no, bólke tuáñra re cíñyore ṭikai rakér deh. **19** Óitofare tuáñra honókiye endilla hoibá, “Hé déeila gún bānga gýeh de, añré híin or zagat zura di bolla.” **20** Becók sóiyo. Híin ore toh iman zari no rakár zoriya éna bāngifela gýeh, montor tuñí hé zagat imane beh ṭiki asó. Híyan lóí fohórai no goijjó,

bólke door rakó; **21** kiyólla-hoilé Alla ye zettót asóli déeila ókkol ore basai nó raké, íba ye toh tuáñre yó basai no rakíbo. **22** Hétolla soó, Alla keén meérban aar keén hora: zetará forigiyói ítarar hañse íba bicí hora, montor tuáñr hañse íba meérban; hé meérbani otódin tákibo zetódin tuñí íbar meérbanit lagi táko. Arnóile tuáñre yó haríféla zaybo. **23** Aar hé Boni Isráil ókkole yó zodi abar iman ané, ítara re nizor gas ot abar zuradibo, kiyólla-hoilé Alla ye héndilla abar zura di fare. **24** Kiyólla-hoilé tuñí de éggwa jonggoli zaitun-gas or asóli déeila, zibá re hari looi nizor zat or ulða ísafe bagan or zaitun-gas ot zuradiya giyéh. Tói báfiso, zín hé bagan gas or asóli déeila asé, híin ore nizor gas ot abar zura dite hotó aásan óibo! **25** Báiboináin ókkol, tuáñra zeddúr no héddur giyani bouli no táari bolla, añí tuáñra re e gufon sóiyi gán zanaidir, ki hoilé, boóut Boni Isráil ókkol or dil otódin foijjonto doró tákibo zetódin baicáá Beyohúdi beggúne nejat nó faa; **26** aar héengori tamám Boni Isráil ókkole nejat faibo, zendilla pak-kalam ot asé, “Síyon ottu Rehái-goróya aibó, íba ye Yakub or nosól ottu tamám bedini ham ókkol dur gorífelaibo. **27** Ítara llói híyan óibo de Añr razinama, zeñtté Añí ítarar guná ókkol dur goríyum.” **28** Kúchóbor or hé rúwate tuáñrar fáida lla ítara toh Allar duccon ókkol, montor Allar basár hé rúwate bafadada gún or zoriya ítara Allar adorbon ókkol; **29** kiyólla-hoilé Alla ye ze niyamot dee edde ziyán olla ðake, híin olla íbar mon bodoli no zagói. **30** Zendilla tuáñra yó ek hale Allar nafórman accíla, montor yala ítarar nafórmanir zoriya tuáñrar uore rahám gorá giyeh, **31** héndilla, ítara yó yala nafórman boni asé, zeéne tuáñrar uore rahám gorá giyeh de hétolla ítarar uore yó rahám gorá zah. **32** Kiyólla-hoilé Alla ye beggún ore toh nafórmanit bon gorí raikké, zeéne íba ye ítara beggún or uore rahám gorí fare. (eleēē g1653) **33** Allar dón-doulot hotó bicí! Íbar giyan edde buddí hotó mur! Íbar fáisela re buzí fara no zah. Íba ye zín goré híin buzí faribár raá náí. **34** Pak-kalam ot toh endilla asé, “Hone Mabud or báfani re zani fare? Íba re mocuwara dibar laayek hon asé?” **35** “Íba re hone kii dií de asé, zeén níki íba ttu ítare fúnzai díya foitto?” **36** Kiyólla-hoilé hárr kessú toh íba ye éna foida goijjé, aar híin beggún tiki asé de íbar zoriya edde íba lla. Íbar taarif abadulabad ówat tákouk. Aamin. (aiōn g165)

12 Hétolla, ó báiboináin ókkol, Allar meérbani re yaad goráidi añí tuáñra re aros gorír, tuáñrar gaa re zinda, pak edde kobuldár kurbani ísafe Allar hañse peec goró; híyan óilde tuáñrar sóiyi ebaadot. **2** E duniyair koffiyot no loiyó, bólke tuáñra re noya demak dii yore Alla re tuáñra re bodoilto doh. Baade tuáñra zani faribá, Allar moncá kii, gom kii, kobuldár kii, edde háti kii. (aiōn g165) **3** Añré diiya giyéh de toófike añí tuáñra fottíkiyo re hoóir, nizoré zettór báfon sáa, yár túaro bicí no báfiyo, bólke Alla ye zaré zeddúr iman diiyé, hé mozin nizoré sóiyi-sóiyi báfo. **4** Kiyólla-hoilé zendilla añára ttu ekkán gaat boóut híssa ókkol asé montor híin beggún or ham ek ðoilla no, **5** héndilla, añára bicí de óile yo, añára toh Mosihr bútoire siríf ek gaa, aar añára ezzon loi ezzon bazáiya así. **6** Añára toh Allar rahámote ðoilla-boðoilla niyamot ókkol faiyí. Zodi añárar niyamot Allar kalam boiyan goríbar de óile, iman or mutabek Allar kalam boiyan gorí; **7** zodi hédmot goríbar de óile, hédmot gorí. Zee níki taalim dibar niyamot faiyó, íte taalim doh; **8** zee níki josba dibar faiyó, íte josba doh; zee níki sótká goríbar faiyó, íte dilkúla góri sótká goró; zee níki sóddari goríbar faiyó, íte díyan or sáañte sóddari goró; aar zee níki rahám goríbar faiyó, íte kúcir sáañte rahám goró. **9** Munaféki sára muhábbot goijjó. Hórafí re gín goijjó; ziyán gom híyan mozbut gori dóri táikko. **10** Ezzon ore ezzone báiyali muhábbote muhábbot goijjó; ezzon ore ezzone nizor túaro izzot diyo; **11** alcí no goijjó, bólke ruúhanir josbar sáañte Malik or hédmot goijjó; **12** acáye kúci táikko, mosibot ot sobór goijjó, nitti dua gorát táikko; **13** Allar pak bonda ókkol zorurot ot foille sañda diiyo; meémandari goijjó. **14** Zetará tuáñrar uore zulúm goré, ítara lla borhot magiyó; ói, gozzob no, borhot magiyó. **15** Zetará kúci gorér, ítarar fúañti kúci goríyo; aar zetará hañdahari gorér, ítarar fúañti hañdahari goríyo. **16** Ezzon ore ezzone ek kíyale saiyo. Fohórai no goijjó, bólke niróc ókkol lói miyái-zuwai soliyó. Nizoré nize buddíman no táariyo. **17** Honókiyo re burair bodol burai no goijjó. Manúc beggún or nozor ot ziyán sóiyi híyan goittó díyan díyo. **18** Manúc beggún lói cántit táki bolla tuáñrar torfóttu zeddúr faro héddur kucic goijjó. **19** Ó adorja ókkol, nizebaze bodola no loiyó, bólke Allar gozzob olla moouka raikko, kiyólla-hoilé pak-kalam ot toh Mabude endilla hoór, “Bodola lon Añr ham, Añí fúnzaiyum.” **20** Yárbodol, “Tuáñr duccon ottu búk lagilé, ítare hána doo; tirác lagilé, ítare faní

doo. Kiyólla-hoilé héndilla goríle toh tuñí ítar matár uore zoler de hoilar řal tulúdiyo fán óibo.” **21** Burai re tuáñra re ziti aító no diyó, bólke bálai lói burai re ziti aiccó.

13 Hárr ekzone dec or hókumot-goróya ókkol ore mani solo, kiyólla-hoilé Allar torfóttu no de honó hókumot náí. Zedún hókumot asé, híin Allar torfóttu beh zari óiye. **2** Hétolla zee niki hókumot or muhálef goré, íte Alla ye ziyán entezam goijjé híyan or beh muhálef goré. Zetará héndilla muhálef goré, ítara nizoré bisar or laayek bana. **3** Kiyólla-hoilé gom ham goillé toh adikari ókkol ore řooraiabár náí, montor kuham goillé řooraiabár asé. Tuáñra ttu adikari ókkol or řoor sára óito monehoór né? Tóoile ziyán gom híyan goró, baade tuáñra ítarar torfóttu taarif faiba; **4** kiyólla-hoilé ítara óilde Allar háadem tuáñrar bálai lla. Lekin zodi kuham goró, ítara re řooraiabár asé, kiyólla-hoilé ítara toh hánnak sáñza no déh. Ítara Allar gulam de hétolla, Allar torfóttu ói kuham-goróya ókkol ore sáñza dé deh. **5** Hétolla bóuli ítara re mani solar zorur; siríf sáñzar řoore no, bólke héndilla gorón sóiyi de buzí yore yó. **6** Tuáñra hétolla toh ítara re házana yó doo, kiyólla-hoilé ítara nizor zimmadari adai gorér de híyan óilde Allar hédmot gorér deh. **7** Beggún or hók adai goijjó; zaré házana diibar asé, yóggwa re házana diiyo; zaré hásil diibar asé, yóggwa re hásil diiyo; zee niki izzot or laayek, yóggwa re izzot goijjó; zee niki taarif or laayek, yóggwar taarif goijjó. **8** Ezzon ore ezzone muhábbot goríbar bade ar honó kessúr gun or tole no táikko. Zee niki oinno zon ore muhábbot goré, íte Córiyot furafuri adai gorífelaiye. **9** Kiyólla-hoilé Córiyot ot asé de, “Zená no goríba; kún no goríba; suri no goríba; lalós no goríba,” iín edde ar badbaki hókum beggún e hókum ekkán ot gólaiya asé, híyan óilde, “Atehañsór maincóre nizor řóilla góri muhábbot goró.” **10** Muhábbot goillé toh honókiye honókiyor hótí no goré. Hétolla muhábbot goillé fura Córiyot adai goijjá. **11** Ehón or októ buzí híin goró. Gúm ottu uríbar októ foóniccegai, kiyólla-hoilé añára zeñtté iman ainnílam híyalar túaro yala añárar nejat or októ aró řáke. **12** Rait fúron-fúron óiye, yala fózor fářibar októ órgai. Hétolla, aiyó, añára andár or ham ókkol félaidi foór or átiyar ókkol findí toiyar ói táki. **13** Aiyó, añára córabir fúrti, nicábazi, zenákari, ayaci, hoijja-fózzat, edde alingañi bad di, din or foór ot así fángori soli. **14** Tuáñra Malik Isá Mosih re findífeló,

aar jisím or bura azzu ókkol fura goríbar uzu honó diyán no dih.

14 Komzur iman ola re tuáñrar řaái ot cámil goijjó, montor yóggwar rai ókkol lói torkatorki no diyó. **2** Hodún or iman óilde, hárr kessú hái fare; lekin iman komzur ola ókkole nirićć beh háa. **3** Zee niki hárr kessú hoo, íte héndilla na háa de ítare hékarot no goijjó; aar zee niki hárr kessú no hoo, íte yó héndilla háa de ítare hosúr no diyó, kiyólla-hoilé Alla ye ítare yó toh kobul goijjó. **4** Oinno zon or gulam or bisar gorí bolla tuñí hon? Íte sóiyit asé né náki gollot ot asé híyan ítar giróse éna fáisela goríbo. Becók íte toh sóiyit tákibo, kiyólla-hoilé Malik toh ítare sóiyit rakí faribár kaabel. **5** Hodúne din eggwá re oinno din or túaro kimoti bouli řáare, aar hodúne din beggún or kimot borabor bouli řáare. Hárr ekzon ottu nizor dil ot furafuri ekin tákar zorur. **6** Ze maincé ze din ore háas bóuli mane, íte toh Malik ore kúci goríbar niyote éna mane. Héndilla, zee niki hárr kessú háa, íte Malik ore kúci goríbar niyote beh háa, kiyólla-hoilé íte toh híin Alla re cúkuriya gorí háa. Aar zee niki hárr kessú na háa, íte yó Malik ore kúci goríbar niyote beh na háa, aar íte yó zín háa híin olla Alla re cúkuriya goré. **7** Kiyólla-hoilé añára honókiye basi táki de yó nizor lla no, aar honókiye mori de yó nizor lla no. **8** Kiyólla-hoilé zeñtté añára basi táki, añára Malik olla beh basi táki; aar zeñtté morizaygói, añára Malik olla beh morizaygói. Hétolla añára basi táki yáh morizaygói, añára Malik or. **9** Kiyólla-hoilé Mosih toh etollá éna moijjíl edde abar zinda óiye, zeéne íba mora zinda duní gún or Malik ó. **10** Tói tuñí keéne tuáñr báí or hosúr dóror? Nizor báí ore hékarot kiyá gorór? Añára beggún toh ek din Allar adaloti-toktór muúntu tíyaiyum de asé. **11** Pak-kalam ot endilla asé, “Mabude fórmár de, Añr zindagirir hosóm hái hoóir, hárr ekzone Añr muúntu añřú félaiibo, aar hárr zobane Añí Alla de cíkar goríbo.” **12** Híyane dahá de, añára fottfíkiyo ttu Alla re nizor-nizor hísaf díya foribó. **13** Hétolla, aiyó, añára ezzon or hosúr ezzone ar no dóri, bólke uúin no goittó fáisela gorífelai zííne arek báí or iman or foñt ot řábba díbo, yáh yóggwa re gunát fora baibó. **14** Malik Isár ummot ísafe añí zani edde ekin gorí de ki, honó hána nizebaze háram náí, montor zee ze hána re háram řáare, híin ítar lla beh háram. **15** Zodi tuáñr hánar zoriya arek báí ye dil ot duk faa, tóoile toh tuñí muhábbot or foñt báý ar no

soloór. Ze báí olla Mosih moijjíl hé báí ore tuáñr hána lói córbonac no goijjó. **16** Tuáñrar suk ot ziyán gom híyan or bodnam no zuraiyó, **17** kiyólla-hoilé Allar raijjo toh hána-finar baabute no, bólke Pak-Ruh ye dee de forhésgari, cánti edde kúcir baabute. **18** Zee niki hé torikaye Mosihr hédmot goré, yóggwar uore Alla yó kúci táke aar manúc óu razi táke. **19** Hétolla, aiyó, añára ham uúin goríbar kúcir gorí zífne cánti ané edde zín lói ezzon ore ezzone banaitulí faijjum. **20** Honó hánar zoriya Allar ham borbad no goijjó. Becók, hána beggún hálal, montor ar ezzon ore gunát foraba de héndilla honó hána hóon gollot. **21** Beétor óilde, gusso no hóon, anggur or roc no hóon, yáh oinno honó kessú no gorón, zodi híne tuáñr honó báí ore gunát foraba. **22** Hé mosólar baabute tuáñr dil ot ze iman asé híyan Allar edde tuáñr dormiyan ot rakó. Mubarek manúc uite, zee niki gom bouli buzí honó kessú gorífelai baade dile-dile afsús na há. **23** Montor Alla ye uitaré hosúrbon bóuli dóre zee niki cók gorí honó kessú háifele, kiyólla-hoilé íte toh nizor iman or mozin háíye de no. Ziyán iman or mozin no híyan toh guná.

15 Hétolla, añára zetarár iman mozbut, añára ttu nizor kúci no saái komzur imandár ókkol ore ítarar fuñzá bowát modot gorár fóros. **2** Añára fottíkiyo ttu nizor atehañsór maincóre ítarar bálai lla kúci rakár zorur, ítara re banaitulí bolla. **3** Kiyólla-hoilé Mosih Nize úddwa Nizor kúci nó saá. Pak-kalam ot íbar baabute endilla asé, “Zetará Tuáñre beizzoti goijjíl ítarar hé beizzoti Añr uore aiccé.” **4** Yaar age pak-kalam ot zín-zín leká gýl, híin beggún añára re cíkka dí bolla beh leká gýl, zeéne hére ze sobór edde josbar baabute asé híin ottu añára acá hásil gorí. **5** Sobór edde josba dooya Alla ye Mosih Isá ttu accíl de ekí mon tuáñrar afós ot máze táki bolla toóufik douk, **6** zeéne tuáñra ek mone edde ek abase añárar Malik Isá Mosihr Alla Baf or mohíma goró. **7** Hétolla hoóir de, ezzon ore ezzone kobul goró, zendilla Mosih ye yó tuáñra re kobul goijjé, zeéne Allar mohíma ó. **8** Añí hoóir de ki hoilé, Allar hotá sóiyi de sábut gorí bolla Mosih aái Yohúdi ókkol or háadem boinné, zeéne bafdada gún lói gorá gýl de waada fura gorí fare, **9** aar Beyohúdi ókkole zen Allar rahám faiyé de híyan olla íbar taarif goré; zendilla pak-kalam ot asé, “Hétolla añí Beyohúdi ókkol or hére Tuáñr taarif goijjúm, edde Tuáñr name seér gaiyúm.” **10** Hére

yián óu asé, “Ó Beyohúdi ókkol, tuáñra Allar basfloiya bonda ókkol or fúañti kúci goró.” **11** Aró asé de ki, “Ó tamám Beyohúdi ókkol, tuáñra Mabud or taarif goró; ó duniyair manúc ókkol, tuáñra beggúne íbar taarif goró.” **12** Nobi Yesáyah ye yó endilla hoíyé, “Jesir Cíñyor zahér óibo, aar íba aái Beyohúdi ókkol or uore hókumot goríbo. Ítara beggúne íbar uore acá rakíbo.” **13** Acá dooya Alla ye tuáñra re íbar uore iman rakár zoriya hárr kúci edde cánti lói bóri douk, zeéne Pak-Ruhr kudurute tuáñrar acá baái fore. **14** Ó añr báiboínáin ókkol, añí nizor ttu yó tuáñrar baabute furafuri ekin asé de ki, tuáñrar dil bálayi lói furaiya, tuáñra ttu furafuri zankari asé, aar tuáñra ezzon ore ezzone nosíyot goríbar kaabel óu. **15** Toóu tuáñra re abar yaad goráidi bolla añí kessú mouzúr uore tuáñrar hañse bicí hímmot or sáañte leikkí, kiyólla-hoilé Alla ye añré diiyé de toóufik lói, **16** añí toh Beyohúdi ókkol or hañse Mosih Isár háadem óiyi. Añí imam or dóilla góri Allar kúchóbor or hédmot gorí, zeéne Beyohúdi ókkol Pak-Ruhr duara pak-sáf ói Allar kobuldár kurbani ói fare. **17** Hétolla toh añí Alla lla gorí de ham ot Mosih Isár duara fohórai goríbar wajá faiyí. **18** Kiyólla-hoilé añí siríf uúin hoi bolla beh hímmot goríyum, zín Mosih ye añr duara gorí Beyohúdi ókkol ore Allar fórmadar banaiyé. Mosih ye ham híyan añr hotábattara edde ham loi, **19** illayi-nicán or edde keramot or bole, aar Allar Ruhr kudurute goijjé. Hétolla toh añí Jerúsalem ottu lóti cúru gorí Ilurikúm foijjonto agagurat Mosihr kúchóbor furafuri tobolik goijjí. **20** Añr zindigir niyot óilde, uré kúchóbor tobolik gorón zeře Mosihr baabute honódin nó fúne, arnóile toh añí ar ezzon or buniyadir uore gór banaitulír fán óibo. **21** Pak-kalam ot endilla asé, “Zetará re íbar baabute howá nó zah, ítara yala deké faribó; aar ítara zetará íbar baabute nó fúne, ítara yala buzí faribó.” **22** Añí boóut bár tuáñrar hañse aító saái hé wajáye aái nó fari deh. **23** Montor yala zettót añr ttu eríyar elaka ókkol ot ham goríbar zaga baki náí aar añr ttu tuáñrar hére aító kúb monehoór de boóut bosór óiye, **24** añí acá gorír de, Espéin dec ot zaibarcót tuáñra llói miliyúm, aar tuáñrar fúañti kessú ñaim kúci-áci gorí harai baade, tuáñra añré añr sofór ot zai bolla modot goríba. **25** Lekin ehón añí Allar pak bonda ókkol or hañse modot foónsai bolla Jerúsalem ot zair. **26** Kiyólla-hoilé Makedóniyar edde Akayar zomát ókkole Jerúsalem ot Allar pak bonda ókkol or bútoze zetará gorif asé ítara lla kessú sañda tuillé. **27** Ítara híin

bicí kúcir sáañte diiyé, eéne híyan ítarar fóros óu. Kiyólla-hoilé Beyohúdi ókkole zettót Yohúdi ókkol or ruúhanir rahámot or bág faiyé, tói ítara ttu yó Yohúdi ókkol ore duniyaibi malsáman lói modot gorár fóros. **28** Añí hé sañda gún foónsai baade zeñtté ítara áte-áte faiyé de híyan fakkafakki gori zainnum, añí Espéin dec ot zaibarcót tuáñrar hére góliyum. **29** Añí zani, añí tuáñrar hére aiccúm de híyala, Mosihr furaiya rahámot fúañti looi yore aiccúm. **30** Ó báiboináin ókkol, añárar Malik Isá Mosihr name edde Pak-Ruhr muhábbote añí tuáñra re aros gorír, tuáñra añr llói bóng ói añr fúañti Allar hañse añr lla dilmon di dua goró. **31** Dua goríba de, añí Yohúdiyat Allar ze nafórman ókkol asé ítara ttu héfazot táki fán, aar añí Jerúsalem olla ze hédmot tán gorír híyan Allar ze pak bonda ókkol hére asé ítara ttu fosón lage fán, **32** zeéne Alla ye sailé añí tuáñrar hañse kúcir sáañte aái fari, aar tuáñrar fúañti táki foran zurai fari. **33** Cánti dooya Alla tuáñra beggún or fúañti-fúañti tákouk. Aamin.

16 Foibi nam or añárar ze bóin Kinkíriya cóor ot asé de zomát or háadem, híbar baabute añí tuáñra re mocuwara dir de, **2** tuáñra híba re Malik or name endilla gori gosíloiyó zendilla Allar pak bonda ókkol ore gosílowar zorur, aar híba ze modot olla tuáñrar muútac ó, híba re híyan diiyó, kiyólla-hoilé híba ye añré cóo boóut maincóre modot goijjé. **3** Prisíla re edde Ekúila re añí sólám díyi hoiyó, zetará Mosih Isár bútoe añr fúañti ham-goróya, **4** zetará añr lla bóuli nizor zan hótorat félaiye. Ítarar cúkur siríf añí gorí de no bólke Beyohúdi ókkol or tamám zomát ókkole yó goré. **5** Ítarar gór ot zoma ó de zomát twa re yó sólám díyi hoiyó. Añr adorja Ipenítus ore yó sólám díyi hoiyó, zibá Ecíya elaka ttu Mosihr foóila ummot. **6** Moriyam ore yó sólám díyi hoiyó, zibá ye tuáñra lla bicí meénnot goijjé. **7** Andrunikus edde Juúniya re yó sólám díyi hoiyó, zetará añr koumi manúc aar añr fúañti ziyól háitíttil. Sáhabi gún or bútoe ítara bicí namdár; ítara Mosihr bútoe añr age lóti asé. **8** Ampeliyatas ore yó sólám díyi hoiyó, zibá Malik or bútoe añr adorja. **9** Mosihr bútoe añárar sáañti ham-goróya Urban ore edde añr adorja Istakus ore yó añí sólám díyi hoiyó. **10** Apelis ore yó sólám díyi hoiyó, zibá re Mosihr ummot de híyan sóiyi faa giyéh. Aristobulus or gór tíya re yó sólám díyi hoiyó. **11** Hérodiyon ore yó sólám díyi hoiyó, zibá añr koumi manúc. Héndilla, Narkissus or gór

tíya re yó díyi hoiyó, zetará Malik or bútoe asé. **12** Turféna edde Turfósima re yó sólám díyi hoiyó, zetará Malik or ham-goróya. Adorja bóin Ferísa re yó sólám díyi hoiyó, zibá ye kúb meénnot or sáañte Malik or ham goijjé. **13** Malik or basíloiya manúc Rufus ore edde yóggwar maa re yó sólám díyi hoiyó. Yóggwar maa añr óu maa. **14** Asinkiritus, Felegon, Harmis, Patorobas, Hermas edde ítarar fúañti ar ze imandár báiboináin asé ítara re yó sólám díyi hoiyó. **15** Filologus edde Juliya re, Neriys edde íbar bóin ore, Olimpás ore edde ítarar fúañti Allar ze pak bonda ókkol asé ítara beggún ore yó sólám díyi hoiyó. **16** Tuáñra ezzon ore ezzone pak dile appá dí sólám zano. Mosihr tamám zomát ókkole tuáñra re sólám zanar. **17** Yala, báiboináin ókkol, añí tuáñra re aros gorír, tuáñra faiyó de taalim or ulða zetará faáta-faáti edde bazá ókkol foida goré, ítarar uore nozor rakíyo, aar ítara ttu duré tákiyo. **18** Kiyólla-hoilé héndilla manúc ókkole toh añárar Malik Mosihr hédmot gorér de no, bólke nizor feţ faler deh. Ítara miřá-miřá edde tuládiya hotá ókkol hoói cáda-cída manúc ókkol or dil ot daga deh. **19** Tuáñrar fórmadarir hóbor toh beggún or han ot foónicce, hétolla añí tuáñra re lói bicí kúci; montor añí saái de, tuáñra gom ham or buddíman ó aar kuham ottu maasum táko. **20** Cánti dooya Alla ye Cóitan ore bicí hára tuáñrar foor tole di ficífelaibo. Añárar Malik Isár rahámot tuáñrar uore zari tákouk. **21** Añr fúañti ham-goróya Timóti ye tuáñra re sólám zanar; héndilla, añr koumi manúc Lukíyas, Yason edde Sosipatere yó zanar. **22** Añí Tertiyus, zar áta e ceñrí gán lekér, añr torfóttu yó tuáñra re Malik or name sólám. **23** Gayus, zibár gór ot añí Pául táki aar fura zomát zoma ó, íba ye yó tuáñra re sólám zanar. Héndilla, cóor or kecíyar Erastuse edde báí Kuwartuse yó tuáñra re sólám zanar. **24** Añárar Malik Isár rahámot tuáñra beggún or uore zari tákouk. **25** Alla, zibá níki Isá Mosihr baabute añí tobolik gorí de kúchóbor mozin tuáñra re mozbut goríbar kaabel, íba ye boóut zobana lóti hé kúchóbor or gufon niyot ore lukai raikkíl, (aĩōnios g166) **26** montor yala hé niyot zahér gorá gíyeh, aar agor nobi ókkole leikké de kitab or duara edde abadulabadi Allar hókume híyan tamám koum ókkol or hañse zanaidiya zar, zeéne ítara iman aní fórmadar bone. (aĩōnios g166) **27** Hé lehár giyani Allar taarif Isá Mosihr duara abadulabad ówat tákouk. Aamin. (aĩōn g165)

1 Kórintiól

1 Añí Pául, zibá re Allar moncá mozin Isá Mosihr éggwa sáhabi ói bolla ðaka giyéh. Añr fúañti añárar báí Sósþines óu asé. **2** Kórin cóor ot Allar ze zomát asé yíbar hañse lekír, zetará re Mosih Isár bútoe pak gorá giyéh edde Allar pak bonda ói bolla ðaka giyéh. Uitará beggún or hañse yó lekír, ze hárr zagar maincé añárar Malik Isá Mosihr nam loh, zibá ítarar óu Malik aar añárar óu Malik. **3** Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **4** Añí tuáñra lla añr Alla re hámica cúkuriya gorí, kiyólla-hoilé íba ye toh tuáñra re Mosih Isár duara rahámot goijjé, **5** ki hoilé, íbar bútoe tuáñra tamám hotáhattaraye edde giyane hárr mikká ttu tuangor óigiyogoi, **6** kiyólla-hoilé Mosihr baabute añára diyí de gobá toh tuáñrar dil ot gañittá asé. **7** Hétolla zeñtté tuáñra añárar Malik Isá Mosihr zahéri lla dilmon di entezar gorí asó, tuáñra ttu honó niyamot or homi náí. **8** Íba ye tuáñra re ahéri foijjonto mozbut óu rakíbo, yáni tuáñra añárar Malik Isá Mosih aibó de din ot behosúr óiba. **9** Alla toh biccácdar, zibá ye niki tuáñra re Nizor Fua lloi taalukat rakí bolla ðaikké, yáni Isá Mosih añárar Malik loi. **10** Hétolla, ó báiboináin ókkol, añí tuáñra re añárar Malik Isá Mosihr name aros gorír, tuáñra beggún ek sólluk ó, zeéne tuáñrar bútoe honó faáða-faáþi no táke, bóлке tuáñrar mon edde rai zen furafuri ek ðoilla ó. **11** Kiyólla-hoilé, ó añr báiboináin ókkol, Kalowir gór or maincé añré hóbor díye de, tuáñrar bútoe bóle hoijja-fózzat soler. **12** Añí hoitám saáir de ki, tuáñrar bútotu kiyé hoó de, “Añí Pául or ummot,” kiyé hoó de, “Añí Apólos or ummot,” kiyé hoó de, “Añí Kéfas or ummot,” ar kiyé hoó de, “Añí Mosihr ummot.” **13** Mosih kí faát-faát óigiyoi? Pául ore kí tuáñra lla kúruc ot dí mariféla giyéh? Tuáñra kí Pául or name báptisma loiyó? **14** Alla re cúkuriya, añí tuáñrar bútotu Krispus edde Gayus ore bade ar honókiyo re báptisma nó díh. **15** Hétolla honókiye añr name báptisma loiyé bóuli hoi no faribó. **16** Becók, añí Estefánas or gór or maincóre yó báptisma dílam, yárbaade ar haré báptisma díyi añr ttu monot no urér. **17** Kiyólla-hoilé Mosih ye añré difeþáíye de toh báptisma díto no, bóлке kúchóbor tobolik goittó, aar híyan óu saláki hotá lói goittó no, zeéne Mosih kúruc or uore kurbaní óíye de híyan honó asór sára no. **18** Kiyólla-hoilé kúruc or hóbor toh zetará dónco óizargoi ítara lla bekuippa hóbor,

montor añára zetará nejat fair, añára lla híyan óilde Allar kudurut. **19** Pak-kalam ot endilla asé, “Añí giyani ókkol or giyan ore dónco gorífelayum, aar buddíman ókkol or buddí re behar gorídiyum.” **20** Tóí giyani manúc horé? Alem horé? E jáhan or barábari-dóya horé? Alla ye e duniyair giyan ore bekuf bouli sábut goijjé de no né? (aíon g165) **21** Kiyólla-hoilé Alla ye Nizor giyane fáisela goijjé de, duniyair manúce ítarar giyane íba re siní no fare fán. Hétolla Alla ttu yán fosón laiggé, ki hoilé, tobolik gorá zah de hóbor ore bekuf táara zah de híyan or usílaye iman anóya ókkol ore nejat don. **22** Yohúdi ókkole illayi-nicán ókkol dabi goré, aar Girík ókkole giyan or talac goré, **23** montor añára Mosih re kúruc ot dí mariféla gíyl de híyan or tobolik gorí, ziyán ore Yohúdi ókkole zari no fare aar Beyohúdi ókkole bekuippa hóbor bóuli táare, **24** lekin zetará re Alla ye ðaikké, ítara Yohúdi óuk yáh Girík, ítarar hañse Mosih óilde Allar kudurut edde Allar giyan. **25** Kiyólla-hoilé Allar bekufaiyi hoó de híyan toh insán or giyan or túaro giyani, aar Allar komzuri hoó de híyan toh insán or bol or túaro boluwar. **26** Báiyain, báfiso, Alla ye tuáñra re ðaikkíl de óktót tuáñra hondilla accíla. Insán or nozor ot toh tuáñra boóut zon giyani nu accíla, boóut zon taakotwala nu accíla, aar boóut zon uoror tokkar háandan or óu nu accíla, **27** montor giyani gún ore córom dí bolla Alla ye duniyai ye bekuf táare de híin ore basíloíye, aar boluwar gún ore córom dí bolla Alla ye duniyai ye komzur táare de híin ore basíloíye. **28** Alla ye duniyai ye niróc edde behar táare de híin ore, yáni zín náí híin ore basíloíye de kiyólla-hoilé, asé de híin ore baatel gorí bolla, **29** zeéne honó moniccó ye Allar muúntu borái gorí no fare. **30** Tuáñra íbar zoriya beh Mosih Isár bútoe asó, Mosih óilde añárar hañse Allar diiya giyan; íba añárar forhésgari, paki, edde azadi. **31** Hétolla pak-kalam ot endilla asé de mozin, “Zee niki borái goré, yóggwa ye Mabud ore lói beh borái goróuk.”

2 Báiboináin ókkol, zeñtté añí tuáñrar hañse aái Allar gufon sóiyir tobolik goijjílám, añí toh cúndor-cúndor hotá yáh giyani hotá estemal nó gorí. **2** Kiyólla-hoilé añr niyot accíl de, tuáñrar fúañti tákite añí siríf Isá Mosihr edde íba re kúruc ot dí mariféla gíyl de híyan or baabute bade ar honó kessú no zani bolla. **3** Añí tuáñrar fúañti tákite komzur accílam edde ðoore bicí hafitám. **4** Añr boiyan edde tobolik

maincóre bíra de héndilla giyani hotá lói gorá gýl de no, bólke Pak-Ruhr kudurut dahái gorá gýl deh, 5 zeéne tuáñrar iman insán or giyane no ói Allar kudurute țiki táke. 6 Giyani hotá toh añára uitará llói hoói zetará iman ot balok óiye, montor hé giyan e jáhan or yáh e jáhan or sóddar ókkol or no, zetará borbad ówat asé. (aiñ g165) 7 Háleke añára zín boiyan gorí híin óilde Allar gufoni giyan or baabute, yáni Alla ye duniyai foida goríbar age lóti añárar mohíma lla țik gorí raikkíl de hé lukaiya giyan or baabute. (aiñ g165) 8 Hé giyan ore e jáhan or honó sóddare nó buzé, kiyólla-hoilé zodi buzító toh ítara mohímar Malik ore kúrúc ot dí mari no felaito. (aiñ g165) 9 Montor pak-kalam ot asé de, “Zetará Alla re muhábbot goré, ítara lla íba ye zín toiyar gorí raikké, híin no honó suké deikké, no honó hane fúinne, aar no honó insán or dil ot aiccé.” 10 Alla ye Pak-Ruhr duara añárar hañse híin zahér goijjé, kiyólla-hoilé hé Ruh ye hárr kessú tahákit goré, hoitó sailé, Allar ebbe gufoni gún úddwa. 11 Kiyólla-hoilé insán or bútoe endilla hon asé, zee niki oinno zon or báfani re zane de? Siríf nizor ruh ye éna nizor báfani re zane. Borabor héndilla, Allar báfani re yó Allar Ruh ye bade ar honókiye no zane. 12 Añára toh duniyaibi ruh faiyí de no, bólke añára faiyí de hé Ruh óilde Allar torfóttu, zeéne Alla ye añára re ze niyamot ókkol diiyé híin ore siní fari. 13 Añára hoói de óilde híin or baabute. Híin hoité añára ze lofzó ókkol estemal gorí híin insán or giyane diya cíkkar no, bólke Pak-Ruhr diya cíkkar. Añára ruúhanir hákikot ókkol buzáite ruúhanir lofzó ókkol estemal gorí. 14 Montor zar ttu Pak-Ruh náí, yóggwa ye Allar Ruhr torfóttu zín aiyé híin kobul no goré, kiyólla-hoilé híin yóggwar nozor ot bekuippa. Yóggwa ye híin ore buzí yó no fare, kiyólla-hoilé híin ore forók gorí fare de siríf hé Ruhr duara. 15 Zar ttu Pak-Ruh asé yóggwa ye hárr kessú forók gorí saá, montor yóggwa re honókiye forók gorí no fare, 16 zendilla pak-kalam ot asé, “Mabud or demak ore hone zainné, zeén niki yóggwa ye íba re buddí dí faitto?” Montor añára ttu toh Mosihr demak asé.

3 Báiboináin ókkol, ruúhani ola maincóre zendilla gori hotá howá fore, añ tuáñra re héndilla góri hoói nó fari, bólke uitará re hoó fángori howá foijjé zetará aijjó duniyaibi, yáni zetará Mosihr bútoe aijjó dud or fuain. 2 Añí tuáñra re dud hábailam, doró hána no; kiyólla-hoilé tuáñra híin or kaabel nu accíla. Becók

aijjó úddwa nó óiyo, 3 kiyólla-hoilé tuáñra toh aijjó duniyaibi. Tuáñrar bútoe zettót hásoerot edde hoijja-fózzat asé, tói tuáñra duniyaibi de no né? Tuáñra aam maincóre dóilla góri soloór de no né? 4 Kiyólla-hoilé zeñtté ezzone eén hoó, “Añí Pául or ummot,” ar ezzone, “Añí Apólos or ummot,” tói tuáñra duniyaibi manúc de no né? 5 Eéne, Apólos hon? Aar Pául hon? Duní zon toh háadem éna, zetarár usílaye tuáñra iman ainno. Malike añára re zar-zar zimma taré-taré diiyé. 6 Añí bis lagaiyí, Apólose faní diiyé, montor baráiyé de óilde Alla ye. 7 Hé ísafe lagoya yó kessú no, faní-dooya yó kessú no, montor Alla zibá ye níki baráiyé íba óilde hárr kessú. 8 Lagoiyar edde faní-dooyar moksót ek dóilla; montor fottíkiye nizor-nizor meénnot mozin boccíc faibo. 9 Kiyólla-hoilé añára óiyi de fúañti Allar ham-goróya; tuáñra óilade Allar zobin, tuáñra Allar banaiya billíng. 10 Alla ye añré diiyé de toóufik mozin, ezzon giyani mistírír dóilla añí ekkán buniyadi dáilli, aar ar ezzone híyan or uore billíng tulér. Montor nize hondilla gori banaitulér de híyan ot fottí ekzon ottu úñciyar ówar zorur. 11 Ze buniyadi age lóti dála gíyeh, hé buniyadi óilde Isá Mosih. Honókiye toh híyan bade arekkán buniyadi dáli no faribó. 12 Hodúne cúna, rufa, dami fattór, gas, boijjal yáh nañrá lói hé buniyadir uore gór banaibó de tákibo, 13 montor fottí ekzon or ham sáf-sáf góri dahá zaybo de asé, kiyólla-hoilé dín ailé híin zahér óizayboi; kiyólla-hoilé híin ooin loi beh zahér gorá zaybo, ooine har ham hondilla de sábut goríbo. 14 Híyan or uore zee ziyán banaiyé híyan zodi no furí țiki táke, tóoile banoya ye boccíc faibo. 15 Montor zar gán furizaybói, yóggwa ttu gunári óibo. Becók yóggwa basizaybói, montor yóggwar hálót eén manúc or dóilla óibo, zibá ye ooin farái aiccé. 16 Tuáñra no zano né, tuáñra Allar gór de aar Allar Ruh tuáñrar bútoe táke dé? 17 Zodi honókiye Allar gór ore borbad gorífele, Alla ye yóggwa re borbad gorífelaibo, kiyólla-hoilé Allar gór toh pak, aar hé gór óilade tuáñra. 18 Nizoré nize fáki no diyo. Tuáñra ttu zodi honókiye e jáhan ot giyani bouli țáare, yóggwa bekuf bonouk, zeéne yóggwa sóiyi giyani óizagói. (aiñ g165) 19 Kiyólla-hoilé e duniyair giyan-buddí toh Allar nozor ot bekufaiyi. Pak-kalam ot endilla asé, “Alla ye giyani ókkol ore ítarar salákir fán ot féla.” 20 Endilla yó asé, “Mabude giyani ókkol or báfa behar de zane.” 21 Hétolla, hoitó saáir de, honókiye manúc ore lói borái no goijjó. Kiyólla-hoilé beggún toh tuáñrar: 22 Pául óuk, Apólos óuk, Kéfás

óuk, duniyai óuk, zindigi óuk, moot óuk, asé de híin óuk yáh aibó de híin, beggún tuáñrar, **23** tuáñra óilade Mosihr, aar Mosih óilde Allar.

4 Maincé añára re Mosihr háadem edde Allar gufon sóiyi ókkol zanaidíbar zimmarar bouli buzóuk. **2** Híyan ot zoruri óilde, zimmarar ókkol ore furafuri biccácdar lootfon. **3** Añr bisar tuáñra goró yáh duniyai adalote goré, híyan añr lla dōóñr hotá no; añr toh añr nizor bisar úddwa no gorí. **4** Kiyólla-hoilé añr añr ulða kessú no zani; montor híyane hóno añr behosúr bóuli sábut no goré. Añr bisar goré de óilde Malike. **5** Hétolla sóiyi októ aibár age honó kessúr bisar no goijjó; Malik nú aiyé foijjonto entezar gorí táikko. Íba ye toh zín andár ot lukaiya asé híin foór ot aníbo, aar insán or dil or erada ókkol zahér goríbo. Héñtte Allar torfóttu zar-zar taarif tee-tee faibo. **6** Báiboináin ókkol, tuáñrar bálai lla añr añr nizor edde Apólos or meésal dí tuáñra re iín hoiyí, zeéne tuáñra añára ttu e hotár maáni cíko, ki hoilé, “Zín leikká asé híin or baäre no zaiyo.” Baade tuáñra ezzon ore lói ar ezzon or ulða boráíye fúli no uríba. **7** Tuáñra re ar ezzon or túaro dōóñr hone banaiyé? Tuáñra kii nó foo de asé? Zodi faiyó de óile, tói kessú nó foo fángori kiyólla borái goró? **8** Saité de tuáñra age lóti beggún fai yore tuangor óigiyogoi; añára sára tuáñra baáñcca óigiyogoi fán lager. Becók, tuáñra baáñcca óita bóuli gom óito, kiyólla-hoilé añára yó tuáñrar fúañti hókumot gorí faittam. **9** Añr ttu lage de, Alla ye añára sáhabi gún ore beggún or fisé manúc uitarár dōilla góri raikké zetará re marifélaibar hókum óigiyoi; kiyólla-hoilé añára toh duniyair, fírista ókkol or, edde manúc ókkol or nozor ot ekkán tooñcá bonigiyígoi. **10** Añára toh Mosihr wasté bekuf bonigiyígoi, montor tuáñra Mosihr ummot ói giyani óigiyogoi. Añára komzur, montor tuáñra boluwar. Tuáñrar boóut izzot asé, montor añárar honó izzot náí. **11** Añára aijjó úddwa búkki edde tiráci. Añára ttu hoorsuor or homi asé, añára fíra hái, añára begór, **12** añára nizor áte meénnot gorí. Maincé añára re beizzoti goillé yo añára ítara re borhot dih. Añárar uore zulúm goillé yo añára bordac gorí. **13** Zeñtté maincé añárar bodnam goré, añára ítara re norom or sáañte zuwab dih. Añára toh duniyair hoñsara edde tamám fúrari ókkol or dōilla óigiyogoi, ebbe aijjó úddwa héndilla. **14** Añr iín lekír de tuáñra re córom dí bolla no, bólke añr adorja fuain ísafe tuáñra re nosíyot gorí bolla. **15** Becók, tuáñra

ttu Mosihr baabute cíkkadoya ázar-ázar tákile yo, tuáñra ttu baf bicí náí, kiyólla-hoilé tuáñrar hañse kúchóbor tobolik goróne Mosih Isár bútoze siríf añr óilam de tuáñrar baf. **16** Hétolla añr tuáñra re aros gorír, tuáñra añr nomuna mozin solo. **17** Hé niyote añr tuáñrar hañse Timóti re dīferáiyi, zibá Malik or bútoze añr adorja edde biccácdar fua. Mosihr bútoze añr solasol hondilla de aar hárr zagar fottí zomát ot añr hondilla taalim ókkol di de híin beggún yóggwa ye tuáñra re monet gorídibo. **18** Añr tuáñrar hañse ar nu aiccúm bóuli t́aari tuáñra ttu hodún manúc boráíye fúli uiñtté. **19** Malike sailé, añr tuáñrar hañse hára aiccúm, baade añr boráíye fúli uiñtté de ítarar hotá ókkol zaniloiyum de no siríf, bólke ítara ttu kii kémota asé híyan óu zaniloiyum. **20** Kiyólla-hoilé Allar raijjo toh hotábattarar uore no, bólke kudurut or uore. **21** Tuáñra hon nán basíba? Añr tuáñrar hañse lorí lói aítám né, náki muhábbot edde t́añða mezas or sáañte aítám?

5 Fúna zar de, tuáñrar bútoze zenákari soler, endilla zenákari zín Beyohúdi ókkol or bútoze úddwa náí, hoitó sailé, ezzone nizor baf or bou loi nizor bou wór dōilla góri gúm zah. **2** Híyan olla tuáñra afsús háiba tóuk, bólke aró fohórai goró. Zee niki héndilla ham gorér ítare tuáñrar bútotu neelai don nu accí né? **3** Añr tuáñrar hañse jisím or sáañte házir no tákile yo, ruhr sáañte házir así; hétolla zee niki héndilla ham gorér ítar bisar añr jisím or sáañte házir así fángori age lóti gorí raikkí. **4** Ki hoilé, tuáñra zeñtté añárar Malik Isár name zoma óiba, aar añr ruhr sáañte tuáñrar hañse házir óiyum, edde añárar Malik Isár kudurut óu añárar fúañti tákibo, **5** héñtte héndilla manúc ore Cóitan or át ot gosáidiyo, zeéne ítar jisím dónco óizagoi, aar ítar ruh ye zen Malik Isá aibó de hé din nejat fa. **6** Tuáñra borái gorór de híyan gom no. Tuáñra no zano né, ekkíní góri cūtare hañi or dola guñra fúlaifele dé? **7** Furana cūtar dur gorífelo, zeéne tuáñra noya hañi óizogoi, zendilla tuáñra asóle cūtar sára. Kiyólla-hoilé Mosih añárar azadir-id or Bérasóol-or-Sóo re añára lla kurbani gorá gíyeh. **8** Hétolla, aiyó, añára furana cūtar, yáni ducconir edde hórafir cūtar dur gorífelai yore cūtar sára ruñi loi id gorí, yáni ehélase edde sóiyir sáañte. **9** Añr ceñrít añr tuáñrar hañse leikkílame de ki, tuáñra zenákur ókkol lói taalukat no raikkó; **10** añr uitará llói taalukat no rakító hoitó saiyí de no zetará e duniyair

zenákur ókkol, lalósbon ókkol, ðahañit ókkol, yáh mutti-fuñzoya ókkol; kiyólla-hoilé héndilla óile toh tuáñra ttu e duniyair baäre zaagói foribó. **11** Bölke háleke añi tuáñrar hañse leikkílam de, tuáñra endilla honó imandár kúwala de manúc lói taalukat no raikkó zee niki zenákur, lalósbon, mutti-fuñzoya, bodnam-goróya, nicákur, yáh ðiañmaru. Héndilla manúc or fúañti hána úddwa na háiyó. **12** Añré kiyé faiyé baárgwa maincór bisar goráye? Tuáñra kí torikar bútor or maincór bisar no goró né? **13** Montor baárgwa maincór bisar Alla ye goríbo. Pak-kalam ot endilla asé, “Hé bura manúc cwa re tuáñrar cómaz ottu neelaido.”

6 Tuáñra honókiyo ttu honó imandár báí lói hoijja tákile, hon hímmote Allar pak bonda ókkol or hañse bisar saitó no zai bedini ókkol or hañse saitó zoo? **2** Tuáñra no zano né, Allar pak bonda ókkole duniyair bisar goríbo dé? Tuáñra zettót duniyair bisar goríba, tói tuáñra cóñro-cóñro hoijja ókkol or bisar goríbar kaabel no né? **3** Tuáñra no zano né, añára firista ókkol or bisar goijjúm dé? Héen óile e duniyair gún goitté kii? **4** Hétolla, tuáñra ttu héndilla maamela tákile, zomát or baárgwa maincóre kiyá bisarhar týagaro? **5** Añi iín tuáñra re córom dí bolla hoóir deh. Tuáñrar bútoe endilla honó giyani manúc náí niki, zee niki imandár báiyain dor maamelar bisar goríbar kaabel? **6** Montor tuáñra toh ek imandár báí or ulða arek imandár báí ye bisar ot zoo, aar híyan óu gairimandár ókkol or muúntu! **7** Asóle tuáñra ezzon or ulða ezzone mooddima goró de híyane dahá de, tuáñra ebbere hórri gyigoyi. Yár túaro nainsáfi kiyá bordac no goró? Nizoré beimani goittó kiyá no doh? **8** Háleke tuáñra nize yó toh nainsáfi goró, aar beimani goró, héndilla tuáñra imandár báiboináin dore úddwa goró. **9** Tuáñra no zano né, kuham-goróya ókkole Allar raijjo miras no faibo dé? Nizoré fáki no diyo; bodmac, mutti-fuñzoya, zenákur, morote-morote zená-goróya, **10** sur, lalósbon, nicákur, bodnam-goróya, ðiañmaru, ítara honókiye Allar raijjo miras no faibo. **11** Tuáñra hodún óu héndilla accíla, montor Malik Isá Mosihr name edde añárar Allar Ruhr duara tuáñra re dúifela gyieh, pak-sáf gorá gyieh, edde forhésar bóuli kobul gorá gyieh. **12** Honókiye endilla hoibá de tákito fare, “Añr lla hárr kessú zayes,” tík hotá, montor hárr kessú ye manúc ore fáida no goré. Añi yó hoói faijjum, “Añr lla hárr kessú zayes,” montor añi honó kessú re añr uore hókumot goittó no diyum. **13** Honókiye

endilla yó hoibá de tákito fare, “Hána feţ olla, aar feţ hána lla,” tík hotá, montor Alla ye toh duníyan dónco gorífelaibo. Monot raikkó, jisím zená lla no bólke Malik olla, aar Malik óilde jisím olla. **14** Alla ye toh Nizor kudurute Malik ore zinda goijjé, íba ye Nizor hé kudurute añára re yó zinda goríbo. **15** Tuáñra no zano né, tuáñrar jisím óilde Mosihr jisím or híssa ókkol dé? Tói añi kí Mosihr jisím or híssa loifélaí hín ore honó magir jisím or híssa banaiyúm? Bilkúl no. **16** Aar náki tuáñra yían no zano, ki hoilé, zee niki honó magi lloi milmilab goré ítara jisím híba llói ek gaa óizagoi dé? Kiyólla-hoilé pak-kalam ot endilla asé, “Ítara duní zon ek jisím óizayboi.” **17** Montor zee niki Malik loi ek ó, íte íba llói ek ruh óizagoi. **18** Zenákari ttu dáizogoi. Manúce ar badbaki ze guná ókkol goré hín beggún jisím or baäre goré deh, montor zee niki zená goré íte nizor jisím or ulða guná goré deh. **19** Tuáñra no zano né, tuáñrar jisím Pak-Ruh tákibar górh deh, zibá tuáñrar kollóf ot asé, zibá re tuáñra Allar torfóttu faiyó? Tuáñra tuáñrar nizor no, **20** kiyólla-hoilé tuáñra re dam dii kina giyéh, hétolla nizor jisím lói Allar mohíma zahér goró.

7 Yala añi tuáñra añr hañse leikkó de hín or zuwab dir: ói, morotfuain de mayafuain loi milmilab no gorón gom. **2** Montor zenákari ttu basi táki bolla, fottí morotfuain dor ttu nizor-nizor bou tákouk, aar fottí mayafuain dor ttu nizor-nizor hócom tákouk. **3** Hócome nizor bou wór hók adai goróuk, aar héndilla, bou wé yó nizor hócom or hók adai goróuk. **4** Bou wottu nizor gaar uore honó adíkar náí, montor hócom ottu beh asé; aar héndilla, hócom ottu yó nizor gaar uore honó adíkar náí, montor bou wóttu beh asé. **5** Ezzon ore ezzone inkar gorí no díyo, montor dua gorí bolla duní zone razirobot ói yore kessú októ lla faribá. Baade abar agor dóilla óizayogoi, zeéne tuáñra re tuáñrar nizoré sóoñli rakár homi loi yore Cóitane entán ot no féla. **6** Añi tuáñra re iín hókum gorírh de no, bólke ezazot dir deh. **7** Añr azzu óilde, fottí morotfuain añr dóilla óuk. Montor fottí zon ottu Allar diiya niyamot asé, ezzon ottu endilla asé, aar ar ezzon ottu arek dóilla asé. **8** Montor abiyáta ókkol ore edde rari ókkol ore añi yían hoóir, tuáñra yó añr dóilla abiyáta tákile gom óibo. **9** Montor zodi nizoré sóoñli rakí no faro, tóoile biyá gorífelo, kiyólla-hoilé azzuye zolifuri zar túaro beétor óilde biyá gorífelon. **10** Montor biyáta gún ore añi hókum dir, háleke añi dir

de no bólke Malike der deh, ki hoilé, bou nizor hócom ottu alok ói no zoggói. **11** Montor zodi alok óizagoi, tóoile híba ttu abiyáta tákizagoi foribó, arnóile nizor hócom lói abar bonizagói foribó, aar hócom ottu yó nizor bou wóre no sára foribó. **12** Aar badbaki gún ore Malike no, bólke añí hoóir, honó imandár báí ottu zodi gairimandár bou táke, aar híba tar loi zindigi goittó razi ó, tóoile tee híba re no sárouk. **13** Héndilla, honó imandár mayafua ttu zodi gairimandár hócom táke, aar tee híba llói zindigi goittó razi ó, tóoile híba ye nizor hócom ore no sárouk. **14** Kiyólla-hoilé gairimandár hócom bou wór zoriya pak-sáf óizagoi, aar gairimandár bou imandár hócom or zoriya pak-sáf óizagoi; arnóile toh tuáñrar fuain nafak óito, montor yala ítara pak. **15** Montor gairimandár gwá zodi alok óizaytoi saá, tóoile óizoggoi. Héndilla hálot ot honó imandár báí yáh bóin biyá-cádir ban or tole náí. Alla ye toh añára re cántir zindigi harai bolla éna ðaikké. **16** Ó bou, tui keéngori zanos, tor hócom ore nejat fa bay no faribí de? Ó hócom, tui keéngori zanos, tor bou wóre nejat fa bay no faribí de? **17** Malike zaré ze hálot ot raikké edde zaré ziyán olla ðaikké, fottíkiye hé mozin zindigi haro. Tamám zomát ókkol or hañse añí di de hókum óilde híyan. **18** Zodi ázomi goijjá honó manúc ore ðaha giyéh de óile, íte be-ázomi goijjá óibar kucíc no goróuk. Zodi be-ázomi goijjá honó manúc ore ðaha giyéh de óile, íte ázomi no goróuk. **19** Kiyólla-hoilé ázomi gorá yó kessú no, ázomi no gorá yó kessú no, montor asól hotá óilde Allar hókum ókkol amól gorón. **20** Alla ye zaré ze hálot ot tákite ðaikké, íte hé hálot ot táko. **21** Tuáñre gulami hálot ot tákite ðaha giyéh de né? Ferecan no óiyo. Montor zodi tuáñr ttu azad ói faribár moouka táke, tóoile híyan estemal goró. **22** Kiyólla-hoilé Malike zaré gulami hálot ot tákite ðaikké, íte Malik or azad goijjá manúc. Héndilla, zaré azadi hálot ot tákite ðaikké, íte Mosihr gulam. **23** Tuáñra re dam dii kina giyéh, hétolla insán or gulam no boniyó. **24** Báiyain, zaré ze hálot ot tákite ðaha giyéh, íte hé hálot ot táki Alla lloi taalukat zari rakó. **25** Yala abiyáta ókkol or baabute hoitó sailé: añí ítara lla Malik or torfóttu honó hókum nó fai, lekin Malik or rahámote añí bóracar laayek óiyi ísafe añr rai dir. **26** Yala soler de mosibot ókkol or uzu kíyal gorí sailé, añr báfa mozin, zee zendilla asé héndilla tákile gom óibo. **27** Tuáñr ttu bou asé niki? Tákile híba ttu síra óizaytoi zuu no tuwaiyó. Tuáñr ttu bou náí niki? No tákile bou no tuwaiyó. **28** Montor zodi biyá gorífelo,

tuñí guná gorór de héen no; aar zodi honó abiyáta mayafua ye biyá gorífele, híba ye yó guná gorér de héen no. Montor añí saáir de tuáñra re mosibot ókkol ottu basai bolla, ziín héndilla manúc ottu e zindigit tákibo. **29** Báiboináin ókkol, añí hoitám saáir de ki hoilé, októ ebbe hom; hétolla zetará ttu bou asé, ítara ttu yala lóti eéngori solar zorur zeén níki ítara ttu bou náí; **30** zetará hañdaharí gorér ítara eén óuk zeén níki ítara hañdaharí no gorér; zetará kúci gorér ítara eén óuk zeén níki ítara kúci no gorér; zetará kessú kiner ítara eén óuk zeén níki ítara ttu kessú náí; **31** zetará duniyaibi jiníc ókkol estemal gorér, ítara eén óuk zeén níki ítara híin lói birana náí. Kiyólla-hoilé e duniyair súrot toh bodolizargói. **32** Añí saái de, tuáñra sintabáfani sára táko. Abiyáta manúce Malik or jiníc ókkol or baabute beh báfe, ki hoilé, nize Malik ore keéngori kúci gorí faribó. **33** Montor biyáta manúce duniyaibi jiníc ókkol or baabute beh báfe, ki hoilé, nizor bou wóre keéngori kúci gorí faribó; **34** ítar mon duiharat fore. Ze mayafua abiyáta yáh kuwári, híba ye Malik or jiníc ókkol or baabute beh báfe, zeéne híba jisím ot edde ruht pak ói fare. Montor biyáta mayafua ye duniyaibi jiníc ókkol or baabute beh báfe, ki hoilé, nizor hócom ore keéngori kúci gorí faribó. **35** Añí híin tuáñrar fáida lla hoóir deh; tuáñra re sifot rakí bolla hoóir de no, bólke tuáñra zen ziyán sóiyi híyan goró, zeéne tuáñra ek díyane Malik or hédmot goró. **36** Montor zodi honókiye eén táare, íte ítar zuragatá goijjá mayafua re biyá gorí no feler de híyan gom no ór, aar zodi ítar ttu biyár furani bicí ói híba re biyá gorífelar zorur de báfe, tóoile íte nizor erada fura goróuk, híyan guná no; ítara biyá gorífelouk. **37** Montor zee niki nizor kuwári mayafua re ettar biyá no gorí bolla nizor dile-dile mozbut fáisela gorífelaiye aar honó mojburi náí, bólke nizor moncá re furafuri sóoñli fare, íte yó gom goré. **38** Hétolla, zee niki nizor zuragatá goijjá mayafua re biyá gorífele íte gom goré, montor zee niki biyá gorí no fele íte aró gom goré. **39** Hócom zetódin zinda asé, bou hócom lói hétodin beh baindá táke; montor zodi hócom morizagói, híba ttu zaré monehoó taré biyá goríbar azadi asé, lekin manúc cwa Malik or torikar ówa foribó. **40** Añr rai mozin, híba zodi héddur ot táizagoi, híba aró kúciit tákibo. Añí táarir de, añí híin Allar Ruhr hédaiyote hoóir.

8 Yala muttir hañse kurbani diya hána ókkol or baabute hoító sailé: añára toh zani, ói, añára beggún ottu zankari asé. Zankariye toh fohórai baré, montor muhábbote torki ané. **2** Zee niki nizor ttu kessúr zankari asé bóuli táare, ítar ttu aijjó oddúr zankari náí zeddúr ítar ttu táka foitto. **3** Montor zee niki Alla re muhábbot goré, ítare toh íba ye siné. **4** Hétolla muttir hañse kurbani diya hána ókkol háar baabute hoító sailé: añára zani, mutti toh duniyait mazé asóle kessú no, aar Alla ekgwá bade ar náí. **5** Kiyólla-hoilé zodi debota hoó de híin asman ot yáh duniyait tákile yo, becók debota hoó de yó bicí asé, kúda hoó de yó bicí asé; **6** montor añára ttu Alla asé de siríf ekgwá, íba óilde Baf, zibár torfóttu hárr kessú foida óiye aar zibá lla añára zindigi hařair. Aar Malik asé de yó ekgwá, íba óilde Isá Mosih, zibár duara hárr kessú foida óiye aar zibár duara añára basi así. **7** Montor hárr manúc ottu hé zankari gán náí. Hodún ottu aijjó mutti fuñzar adot táigiyoí ísafe ítara muttir hañse kurbani diya hána ókkol haa, aar ítarar hélom komzuriye nafak óizagoi. **8** Hána ye añára re Allar dake no goré; añára híin na háile yo honó lussán náí, aar háile yo añáar honó fáida náí. **9** Toóu úñciyar, zeéne tuáñrar e azadi ye hélom komzur ola ókkol ore gunát no foraba. **10** Kiyólla-hoilé zodi honó hélom komzur ola manúce tuñí zankari ola manúc ore muttir mondir ot hána hóor de deké, tooile yóggwa ye yó kí muttir hañse kurbani diya hána ókkol háito hímmot no faibo né? **11** Tói hé komzur báí zar lla Mosih moijjíl, tuáñr zankarir zoriya yóggwa dónco ói no zaybói né? **12** Héndilla góri zeñtté tuáñra imandár báiboináin dor ulđa guná gorí ítarar komzur hélom ot zohóm goró, héñtte tuáñra Mosihr ulđa guná gorór deh. **13** Hétolla, zodi hána ye añr imandár báí ore gunát foraba, tooile añí ar honódin gusso na háiyum, zeéne añr zoriya yóggwa gunát no fore. (aĩñ g165)

9 Añí kí azad no? Añí kí sáhabi no? Añí kí Isá añáar Malik ore nó dekí? Malik or hañse añr ham or notiza tuáñra no né? **2** Añí argún or hañse sáhabi de no óile yo, becók tuáñrar hañse ói; kiyólla-hoilé tuáñra óilade Malik or hañse añr sáhabigirir moór. **3** Zetará añr sáhabigirir baabute súwal goré, ítarar hañse añr zuwab óilde: **4** añára ttu hána-fina háibar hók náí niki? **5** Añára ttu kí nizor imandár bou loi sofór ot zaibar hók náí, zendilla oinno sáhabi gún ottu, Malik or báiyain dor ttu, edde Kéfas ottu asé? **6** Aar

náki siríf Bárnabas ottu edde añr ttu ham no goríbar hók náí de? **7** Nizor řiañ hóros gorí fóous ísafe ham goré de hon asé? Anggur-bariza lagai híyan ottu gula na haa de hon asé? Aar goru-sóol fali híin ottu dud na haa de hon asé? **8** Añí kí iín siríf insán or kiyase hoóir de né? Córiyote yó kí iín no hoó né? **9** Muúsar Córiyot ot toh endilla asé, “Dán úñror de goru re hoóñr no diyó.” Alla ye kí siríf goru ókkol olla sinta goré de né? **10** íba ye híyan añára lla hoiyé de no né? Becók, híyan añára lla beh leká gíyeh, kiyólla-hoilé álcac-goróya ttu acár sáante álcac gorár zorur, aar dán-úñroya ttu bák faibar acár sáante dán úñrar zorur. **11** Añára zettót tuáñrar bútoe ruúhanir bis cĩñřři, tói añára zodi tuáñra ttu fósol ísafe duniyaibi jiníc ókkol dai híyan kí řoóñr hotá né? **12** Tuáñrar uore oinno kiyó ttu zodi híin faibar hók táke, tooile añára ttu kí aró bicí náí né? Montor añára hé hók híyan or fáidai nó tulí; bólke hárr kessú bordac gorí, zeéne añáar zoriya Mosihr kúchóbor olla bazá foida no. **13** Tuáñra no zano né, zee niki baitul-mukaddos or hédmot goré, yóggwa ye baitul-mukaddos ottu hána faa dé? Aar zee niki kurbani-gáñr hédmot goré, yóggwa ye kurbani-gáñr ttu bák faa dé? **14** Borabor héndilla, Malike hókum díye de kí, zetará kúchóbor tobolik goré ítara hé kúchóbor or usílaye nizor zorurot ókkol fouk. **15** Montor añí hé hók híin ekkán ottu úddwa fáidai nó tulí. Aar añí héndilla hók or dabi gorí bolla iín lekír de no, kiyólla-hoilé honókiyo re añr e borái goríbar hók harí loifélaito díyar túaro añí morizon nán añr lla beétoe óibo. **16** Añí kúchóbor tobolik gorí de óile yo, añr ttu borái goríbar kessú náí, kiyólla-hoilé híyan toh añr fóros. Añr uore afsús, zodi añí kúchóbor tobolik no gorí. **17** Zodi añí hé ham nizor ttu monehoói goittám, tooile toh añr lla boccíc tákito; montor añí toh añr zimmadari éna adai gorír, kiyólla-hoilé añré híyan or zimma diiya gíyéh. **18** Tooile añr boccíc kii? Híyan óilde, zeñtté añí kúchóbor tobolik gorí, añí zen honó dam sára kúchóbor tobolik gorí, aar kúchóbor tobolik-goróya ísafe añr ze hók asé, añí zen híyan or furafuri fáidai no tulí. **19** Añí honókiyor gulam no de óile yo, añí nizoré manúc beggún or hañse gulam banaiyí, zeéne añí aró bicí maincóre řanianí fari. **20** Yohúdi ókkol or hañse añí Yohúdir dóilla boinní, zeéne Yohúdi ítara re řanianí fari. Zetará Córiyot or tole asé, añí Córiyot or tole no de óile yo, ítarar hañse Córiyot or tole así fángori táikki, zeéne añí Córiyot or tole asé de ítara re řanianí fari. **21**

Zetará ttu Córíyot náí, ańí ítarar hańse Córíyot sárar dǵoilla boinní, zeéne zetará Córíyot sára asé ítara re ʔanianí fari. Háleke ańí Allar diiya córíyot sára de no, ańí toh Mosihr córíyot or tole así. **22** Komzur ókkol or hańse ańí komzur boinní, zeéne ańí ítara re ʔanianí fari. Ańí beggún or hańse hárr kessú boinní, zeéne ańí ze honó bote hodún ore basai fari. **23** Ańí híin beggún goríde óilde kúchóbor or wasté, zeéne ańí yó híyan or rahámot or bági ói fari. **24** Tuáńra no zano né, zetará duńraduńri zibbat de ítara duńitte beggúne duńre, montor boccíc siríf ekzone faa dé? Héndilla, tuáńra yó ziti faro fángori duńro. **25** Zetará kélat cánil ó, ítara toh bicí hora niyom-kaanun mani nizoré sóońli raké. Ítara nac óizagoi de tas fai bolla beh héndilla goré, montor ańára nac no ó de tas fai bolla beh gorí. **26** Hétolla honó moksót sára ańí no duńri; boccin kéloyar dǵoilla ańí boiyar ot no mari. **27** Montor ańí ańr gaar uore horagori niyom-kaanun solai híyan ore nizor gulam banai rakí, zeéne oinno zon ore tobolik gorí baade ańí nize boccíc or nakaabel ói no zaygói.

10 Báiboináin ókkol, ańí no saái tuáńra yían or ozana táko, ki hoilé, ańárar tamám bafɗada ókkol miyúlar sáiyar tole accíl, aar ítara beggúne doiija farái giíl. **2** Ítara Muúsar ummot ói bolla beggúne miyúlat edde doiijat báptisma lóil; **3** beggúne ekí gabi hána háail, **4** edde beggúne ekí gabi faní háail. Kiyólla-hoilé ítara faní háito de óilde ítarar fúańti-fúańti zaito de gabi Cíl yíba ttu, hé Cíl lwá óilde Mosih. **5** Montor toóu ítara beebák lói Alla kúci nu accíl, hétolla ítarar lac ókkol moidan zagat dorbodor óigilgoi. **6** Híin ańára lla sébok boinné, zeéne ańára ttu bura ham goittó dilmon no táke zendilla ítara ttu accíl. **7** Tuáńra mutti fuńza no goijjó, zendilla ítara hodúne goijjíl. Pak-kalam ot endilla asé, “Manúc ókkole hána-fina háito boói nasító uitté.” **8** Aiyó ańára zená no gorí, zendilla ítara hodúne gorí ek din ot ekkuri tin ázar manúc morigílgoi; **9** ańára Malik ore entán no gorí, zendilla ítara hodúne goijjíl, aar haf ókkol or hońran hái morigílgoi; **10** cékayot no gorí, zendilla ítara hodúne goijjíl, aar hálak-goróya fírsta ye hálak gorifelail. **11** Maincé sébok hásil gorí bolla híin ítarar uore óiye deh, aar ańára ahéri zobanar maincór nosíyot olla híin leká gyeh. (aiŋon g165) **12** Hétolla, zee niki mozbut gori tíyayi asé bóuli táare, íte uńciyar tók, zeéne fori no zagói. **13** Tuáńra toh endilla honó entán ot nó foro, ziín insán olla aamfám no. Alla toh biccáɗdar; íba ye tuáńra re

bordac gorí no faro de héndilla entán ot foitto no dibo; bólke entán or fúańti-fúańti héntu neeliaibár foit óu milaidibo, zeéne tuáńra híyan bordac gorí faro. **14** Hétolla hoóir, ó ańr adorja ókkol, mutti fuńza ttu dáizogoi. **15** Ańí tuáńra re aholbon bouli buzí hotá iín hoóir. Ańí hoóir de hotá híin tuáńra nize báfiso. **16** Zeńtté ańára rahámot or fiyala ttu Alla re cúkuriya gorí hái, ańára kí Mosihr lou wót córik ói no zaygói né? Aar zeńtté ruʔi báńgi hái, ańára kí Mosihr gaat córik ói no zaygói né? **17** Ruʔi asé de toh ekgwá, hétolla ańára bicí de óile yo ańára ek gaa, kiyólla-hoilé ańára beggúne toh hé ekgwá ruʔi éna hái. **18** Boni Isráil or baabute báfiso: zetará kurbani diya hána ókkol háa, ítara kí kurbani-gáńt córik ói no zagói né? **19** Híyan lói kí ańí endilla hoitó saáir de, muttir hańse kurbani diya hána ókkol or kimot asé, yáh mutti ókkol or kimot asé? **20** No, bólke hoitó saáir de, Beyohúdi ókkole ziín kurbani de híin ítara Allar hańse kurbani dede no bólke bút ókkol or hańse de deh. Aar ańí no saái de ki, tuáńra bút ókkol lói honó taalukat rakó. **21** Tuáńra Malik or fiyala ttu edde bút ókkol or fiyala ttu ekkú fúańti hái no faribá. Tuáńra Malik or mes ot edde bút ókkol or mes ot ekkú fúańti córik ói no faribá. **22** Náki ańára Malik ore gairot tulidir dé? Ańára kí íbar túaro boluwar? **23** Honókiye endilla hoibá de tákito fare, “Ańr lla hárr kessú zayes,” ʔík hotá, montor hárr kessú ye manúc ore fáida no goré. Ańí yó hoói faijjum, “Ańr lla hárr kessú zayes,” montor hárr kessú ye toh manúc ore torki no goré. **24** Honókiye nizor fáida no tuwaiyó, bólke oinno zon or fáida tuwo. **25** Gussor bazar ot ziín bese híin háiyó; hélom or wasté honó súwal no goijjó; **26** kiyólla-hoilé pak-kalam ot endilla asé, “Duniyai edde duniyait asé de híin beggún Mabud or.” **27** Zodi honó gairimandáre tuáńra re hánar dawot de aar tuáńra hé dawot kobul goijjó de óile, tuáńrar muuntu ziín dee híin háifelaiyo; hélom or wasté honó súwal no goijjó. **28** Montor zodi honókiye tuáńra re eén hoó, “Gusso iín mutti re peec goijjá,” tóoile zibá ye tuáńra re batalaidiyé yóggwar wasté edde hélom or wasté híin na háiyó; **29** ańí tuáńrar nizor hélom or hotá hoóir de no, bólke yóggwar. Kiyólla-hoilé oinno zon or hélome kiyá ańr azadir fáisela goittó? **30** Zodi ańí cúkuriya gorí hái, tóoile ziín olla ańí cúkuriya gorí híin or zoriya kiyá ańr bodnam óito? **31** Hétolla hoóir, tuáńra hoo yáh fiyó, yáh oinno kessú goró, beggún Allar mohíma ói bolla goríyo. **32** Honókiyo lla ońsá no boinno; Yohúdi lla óuk yáh Girík olla, aar yáh Allar

zomát olla, **33** zendilla gori níki ańı yó hárr torikaye fottíkiyo re kúci gorıbar kucíc gorı. Ańı nızor fáidai no tuwai bicı zon or fáidai tuwai, zeéne ítara nejat fa.

11 Tuáńra ańr nomuna mozin solo, zendilla ańı Mosihr nomuna mozin soli. **2** Ańı tuáńrar taarif gorı, kiyólla-hoilé tuáńra toh ańré hárr kessút yaad rakó edde ze taalim ańı tuáńra re diyı híin mozbut or sáańte dóri asó. **3** Montor ańı tuáńra re yıán batalaidito saáir, ki hoilé, Mosih óilde fottı morotfuar matá, morotfua óilde mayafuar matá, aar Alla óilde Mosihr matá. **4** Ze morotfua ye nızor matá gúridi dua goré yáh Allar kalam boiyan goré, íte nızor matá re beizzoti goré. **5** Aar ze mayafua ye uidda matá dua goré yáh Allar kalam boiyan goré, híba ye nızor matá re beizzoti goré, kiyólla-hoilé híbar matá eńraiya matá lói ek  oilla óizagoi. **6** Ze mayafua ye nızor matá gúri no raké, híba ye nızor sul harıf elouk, montor zodi nızor sul harıf elaite yáh matá eńraif elaite honó mayafua ttu beizzoti lage, t oile híba ye nızor matá gúri rak uk. **7** Honó morotfua ttu nızor matá gúri rakár zorur náı, kiyólla-hoilé íbar duara Allar súrot edde mohıma zahér  ; montor mayafuar duara zahér   de óilde morotfuar mohıma. **8** Kiyólla-hoilé morotfua toh mayafua ttu aicc  de no, b lke mayafua  na morotfua ttu aicc ; **9** morotfua re toh mayafua lla foida gorá gıy  de no, b lke mayafua re  na morotfua lla foida gorá gıy . **10** Hıyan olla mayafua ttu nızor matát adıkar or marhá t kar zorur, kiyólla-hoilé fırista  kkole toh saáı t ıkke. **11** Bec k, Malik or b tore, morotfua mayafua ttu azad no, aar mayafua morotfua ttu azad no. **12** Kiyólla-hoilé zendilla niki morotfua ttu mayafua aicc , h ndilla morotfuar zormo   de y  mayafua ttu. Montor hárr kess  aiy  de óilde Allar torf ttu. **13** Tuáńra nize b fiso: mayafuain de Allar hańse uidda matá dua gorá k  fıık? **14** Fıtorote y  k  tuáńra re yıán no c ka né, morotfuain de sul lamba rak n c rmor hot  dé? **15** Montor mayafuain de sul lamba rak n óilde nızor lla ekk n ızzoitta ham, kiyólla-hoilé g ri rak  bolla  na ítara re sul híin diiya gıy . **16** Zodi hon kiye ıın or baabute bar bari dıto saá, t oile ańr zuwab óilde, ańara ttu ıın bade ar hon  niyom náı, Allar zomát  kkol ottu y  náı. **17** Ańı yala ze h kum diyum, híin or mutalek ańr torf ttu tuáńra lla hon  taarif náı, kiyólla-hoilé tuáńrar zoma  wa ye fáidar t aro luss n bicı goré. **18** C rur g n hoit  sail , ańı f nir de, zeńtt  tuáńra zom t  safe zoma  ,

tuáńrar b tore fa ta-fa tı t ke. Ańı híyan kess  b k bicc c  u gorı. **19** Bec k, tuáńrar b tore fa ta-fa tı  n zorur, zeéne tuáńrar b tore hontar  s iyıt as  de híyan zahér  izagoi. **20** H tolla ho ır de, zeńtt  tuáńra zoma  , tuáńra Malik or Yadgarır H na h ıbolla zoma   de no, **21** kiy lla-hoil  h ıbarcot tuáńra toh age zar-zar h na tee-tee looi h at d ro; h tolla, hod n b kki t ızagoi ar hod n  u l  izagoi. **22** Tuáńra ttu k  h afiya gorı bolla g r náı? N ki tuáńra Allar zom t ore h karot gor r de aar zetar  ttu kess  náı ítara re c rom d r dé? Ańı tuáńra re k i hoit m? Tuáńrar taarif goitt m né? Hıyan or mutalek ańı tuáńrar taarif no goijj m. **23** Kiy lla-hoil  ańı tuáńra re ze taalim diyı, híin Malik or torf ttu faiy  deh, ki hoilé, ze raitta Malik  s  re d ridiya g yl, h  rait ot  ba ye ru ı looi **24** Alla re c kuriya goijj l, aar b ńgi hoıy  de, “Yı n Ańr gaa, ziy n tuáńra lla. Ańré monot gorı bolla endilla gorıyo.” **25** H ndilla, h na baade  ba ye fıyala y  looi hoıy  de, “Ańr lou loi  ıbo de noya razınamar nic n  ilde e fıyala. Tuáńra zet bar fııba, Ańré monot gorı bolla fııyo.” **26** Kiy lla-hoil  zet bar tuáńra e ru ı h ıba edde e fıyala ttu fııba, h tobar tuáńra Malik or moot or elan gor r deh, zet dın níki  ba n  aiy . **27** H tolla, zee niki nalaayek ah lake Malik or ru ı h a y h  bar fıyala ttu fııye, y ggwa Malik or gaa edde lou w r hos rbon   orıbo. **28** Montor fott kiye h  ru ı h ıbar edde fıyala ttu fııbar age nızor  tah kit gorı so uk. **29** Kiy lla-hoil  zee niki Mosihr gaa re no sinı h  ru ı h a edde fıyala ttu fııye, y ggwa ye híin h one edde fııyone nızor uore s  za ańıbo. **30** H tolla toh tuáńrar b tore bo ut zon komzur edde biyaraimma as , aar bo ut zon moot or g m ot foijj  de y  as . **31** Zodi ańara nızor bisar nize s ıyigori goitt m, t oile ań rar bisar gor  no foitto. **32** Montor Malike ańara re bisar gorı torbiyot gor , zeéne ańara y  duniyair fı ańti hos rbon no   ori. **33** H tolla ho ır,   ańr b ıboın ın  kkol, zeńtt  tuáńra híin h ıto zoma  , ar ezzon olla entezar gorıyo. **34** Zodi hon kiyo ttu b k lage, y ggwa ye g r ottu h na h ı zaiyo, zeéne tuáńra hos rbon   ori bolla zoma  ıyo f n no. Aar badbaki maamela g n or baabute ańı h re ail  hoıy m.

12 B ıboın ın  kkol, ru hanir niyamot  kkol or baabute hoit  sail : ańı no saáı tuáńra híin or baabute ozana t ko. **2** Tuáńra toh zano, zeńtt  tuáńra bedini acc la, h ńtte tuáńra re buga muttir uzu zee zendilla loizait  h ndilla zaitag ı. **3** H tolla, ańr ttu

tuáñra re yíán zanaidito monehoór de ki, zee niki Allar Ruhr hédaiyote hotá hoó, íte endilla no hoó de, “Isár uore laánot óuk,” aar Pak-Ruhr hédaiyot sára honókiye endilla hoói no faribó de ki, “Isá óilde Malik.” **4** Niyamot toh ðoilla-boðoilla asé, montor híin dee de óilde ekí Ruh ye. **5** Hédmot goríbar torika yó ðoilla-boðoilla asé, montor ekí Malik ore. **6** Héndilla, ham óu ðoilla-boðoilla asé, montor ekí Alla ye beh beggún or bútoe hárr ðóilla ham goré. **7** Montor zon-zon or hañse Ruhr zahéri beggún or fáida lla beh ó. **8** Hé Ruhr duara kiyó re giyani hotá hoibár toóufik diiya zah; hé ekí Ruhr duara ar kiyó re ahole hotá hoibár toóufik diiya zah. **9** Kiyó re hé Ruhr duara iman diiya zah, ar kiyó re hé ekí Ruhr duara biyaram gom goríbar niyamot diiya zah. **10** Kiyó re keramot goríbar, kiyó re nobi ísafe hotá hoibár, kiyó re ruh ókkol forók goríbar, kiyó re ðoilla-boðoilla gabi zubane hotá hoibár, edde kiyó re hé zuban báñgidibar toóufik ókkol diiya zah. **11** Híin beggún óilde hé ekí edde ekgwá Ruhr ham. Íba ye fottíkiyo re zaré ze niyamot diito monehoó hé niyamot dee. **12** Zendilla ekkán gaat híssa ókkol bicí asé aar híssa híin beggún lói ekkán gaa bone, Mosih yó héndilla. **13** Kiyólla-hoilé Yohúdi óuk yáh Girík, gulam óuk yáh begulam, añára beggúne toh ek gaa ói bolla ekí Ruhr duara báptisma loiyí, aar añára beggúne ekí Ruh faiyí. **14** Gaat toh híssa ekkán asé de no, bólke bicí. **15** Téng or fata ye zodi hoó, “Añí át no de hétolla añí gaar híssa no,” tooile híyan gaar híssa no de héen no. **16** Aar zodi hane hoó, “Añí suk no de hétolla añí gaar híssa no,” tooile híyan gaar híssa no de héen no. **17** Guñra gaa zodi suk óito, tooile fúinto hontú? Aar zodi guñra gaa han óito, tooile fúuñi faitto hontú? **18** Montor Alla ye toh híssa híin fottí ekkán ore gaar bútoe woónt-woónt raikké ziyónt-ziyónt rakí bolla íba ttu monehoiyé. **19** Zodi híin beggún ekkán híssa óito, tooile gaa horé óito? **20** Montor yala toh híssa ókkol bicí asé, lekin gaa asé de ekkán. **21** Hétolla suké át ore hoói no faribó de, “Añr ttu tor zorur náí,” aar matá ye téng or fata re hoói no faribó de, “Añr ttu tor zorur náí.” **22** Háleke, gaar ze híssa gún saité komzur, híin aró bicí zoruri, **23** aar gaar ze híssa gún ore añára hom izzoti bouli táari, híin ore añára aró bicí izzot dih. Ze híssa gún ore añára córome lukai rakí, híin ore bicí zottone gúri rakí, **24** montor añáar alukaiya híssa gún ore zotton goríbar zorur náí. Alla ye toh gaa re endilla gorí-gorí milai banaiyé, zeén níki ze híssa gún hom izzoti híin ore

aró bicí izzot diya fore; **25** zeéne gaar bútoe honó na-ektofáki no táke, bólke híssa ókkole zen ekkán olla ekkáne kíyal raké. **26** Ekkán híssa ye duk faile, híyan or fúañti híssa beggúne duk faa. Aar ekkán híssa ye izzot faile, híyan or fúañti híssa beggún kúci ó. **27** Tói yala tuáñra óilade Mosihr gaa, aar fottí zon híyan or híssa ókkol. **28** Alla ye zomát ot alok-alok manúc ókkol tuillé: ek nombór ot sáhabi ókkol, dui nombór ot nobi ókkol, tin nombór ot ustat ókkol. Baade íba ye uitará re tuillé zetará ttu keramot goríbar, zetará ttu biyaram gom goríbar, zetará ttu modot goríbar, zetará ttu hókumot goríbar, edde zetará ttu ðoilla-boðoilla gabi zubane hotá hoibár niyamot asé. **29** Beggún kí sáhabi né? Beggún kí nobi né? Beggún kí ustat né? Beggún kí keramot goróya né? **30** Beggún ottu kí biyaram gom goríbar niyamot asé? Beggúne kí gabi zubane hotá hoó? Beggúne kí zuban báñgidi fare? **31** Montor tuáñra niyamot uúin olla bicígori azzu goró, ziín dóóñr. Toóu añí tuáñra re aró bicí bála ekkán rasta dahái dír.

13 Zodi añí insán or edde fíristar zubane hotá hoói fari, montor añr ttu muhábbot no táke, tooile añí toh bazailé uzor ó de búng or ðóilla yáh baza de zurir ðóilla éna. **2** Zodi añr ttu nobi ísafe hotá hoibár niyamot táke, aar añí tamám gufoni ókkol buzí edde añr ttu hárr kessúr zankari táke, aró zodi añr ttu faár larifélai fare de héndilla furafuri iman táke, lekin añr ttu muhábbot no táke, tooile toh añí kessú no. **3** Zodi añí añr cómbotti beggún sótká gorífelai aar añr gaa re furat di bolla diifélai, lekin añr ttu muhábbot no táke, tooile toh añr honó fáidai náí. **4** Muhábbot óilde sobór, aar meérban. Muhábbote hásorot no goré, muhábbote borái no goré aar fohórai no goré, **5** Muhábbote biyaddofi no goré; híyane nizer fáida no tuwa, zeenten guccá no goré, aar ar ezzon or hórafi dil ot no raké. **6** Muhábbote hórafit kúci no goré, bólke sóiyir uore kúci goré. **7** Híyane beggún cóo, beggún ekin goré, beggún ot acá raké, edde beggún bordac goré. **8** Muhábbot honódin hótom no; montor zodi nobi ísafe hotá hoibár toóufik táke, híin bon óizayboi; zodi gabi zubane hotá hoibár toóufik táke, híin óu bon óizayboi; aar zodi elóm táke, híin fúraizayboi. **9** Kiyólla-hoilé añára toh honó kessú furafuri no zani, aar nobi ísafe yó furafuri hotá hoói no fari; **10** montor zeñtte furafuri aibó, héñtte homi gún hótom óizayboi. **11** Añí gura accílám de októ, gurar ðóilla hotá hoitám,

gurar dóilla góri báfitam, edde gurar dóilla góri bisar goittám; montor añi zeñtté doónr óiyi, añi gurahal or solasol ókkol félaidiyi. **12** Ehón toh añára aainat mazé miyúnda góri dahá zah fángori éna dekir; montor héñtte muámuikka dekiyú. Yala añi honó kessú furafuri no zani, montor héñtte añi eén furafuri zaniyú zendilla furafuri gori Alla ye añré zane. **13** Hé ísafe, iman, acá, edde muhábbot, e tiniyan zari táke; montor híin or búture ebbe doónr gán óilde muhábbot.

14 Muhábbot or fisá doro, aar fúañti-fúañti ruúhanir niyamot ókkol olla yó bicígori azzu goró, háasgori nobi ísafe Allar kalam boiyan goríbar niyamot olla. **2** Kiyólla-hoilé zee niki gabi zubane hotá hoó, yóggwa ye manúc or hañse hoó de no, bólke Allar hañse hoó deh. Yóggwar hotá toh honókiye no buzé, kiyólla-hoilé yóggwa ye gufon hotá hoó de óilde Ruhr bole. **3** Montor zee niki kalam boiyan goré, yóggwa ye maincór hañse beh hoó, zeéne ítara torki ó, bol faa, edde tosólili faa. **4** Zee niki gabi zubane hotá hoó, yóggwa ye nizoré beh torki goré, montor zee niki kalam boiyan goré, yóggwa ye zomát ore beh torki goré. **5** Añi saái tuáñra zen beggúne gabi zubane hotá hoó, montor beechíssa yían saái tuáñra zen kalam boiyan goró. Kiyólla-hoilé zee niki gabi zubane hotá hoó, zodi zomát or torki lla híin báñgi no déh, tooile toh zee niki kalam boiyan goré íba yóggwar túaro doónr. **6** Báiboináin ókkol, zodi añi tuáñrar hañse aái gabi zubane hotá hoói, montor híin or duara Allar sóiyir zahérir hotá, yáh zankarir hotá, yáh nobi ísafe Allar diiya hotá, yáh taalim or hotá ókkol tuáñra re no hoói, tooile tuáñra añr ttu kii fáida faiba? **7** Ki bací ki bina, hé zan sára jiníc híin ottu zodi abas neeilte alok-alok abas no neeilto, tooile bacít yáh binat kii bazar de híyan keéngori siná zayto? **8** Cíañ ye zodi sáf-sáf góri cíañ abas no deh, tooile larái lla hone toiyar óibo? **9** Héñdilla tuáñra yó zodi oinno zone no buzé de zubane hotá hoó, tuáñra kii hoór de híin keéngori buzá zaybo? Tuáñra toh boiyar loi hotá hoór fán óibo. **10** Becók, duniyait mazé becábici zuban ókkol asé, montor híin ekgwá yó maáni sára no. **11** Hétolla, zodi añi ze zuban hoór hé zuban no buzí, tooile toh hoór de yóggwar hañse añi bidecóittar dóilla, aar yóggwa añr hañse bidecóittar dóilla. **12** Hotá híyan tuáñra lla yó háre. Tuáñra ttu zettót ruúhanir niyamot ókkol olla bicí azzu asé, tuáñra undilla niyamot olla furafuri

kucíc goró, ziíne zomát ore torki goré. **13** Hétolla, zee niki gabi zubane hotá hoó, yóggwa ye híin báñgidi fari bolla dua goróuk. **14** Kiyólla-hoilé zodi añi gabi zubane dua gorí, tooile toh añr ruh ye éna gorér, montor añr mone kessú no gorér. **15** Tooile añr ttu kii gorár zorur? Añi ruhr sáañte yó dua goijjúm, mon or sáañte yó dua goijjúm. Añi ruhr sáañte yó seér gaiyúm, mon or sáañte yó seér gaiyúm. **16** Arnóile, zodi tuñi siríf ruhr sáañte Allar taaríf goró, tooile cádaran manúce tuáñr cúkuriya gorát “Aamin” keéngori hoói faribó? Kiyólla-hoilé yóggwa ye toh tuñi kii hoór de no buzér. **17** Becók tuñi cúndorgori cúkuriya gorór, montor oinno zon torki no ór. **18** Añi Allar cúkuriya gorí, kiyólla-hoilé añi gabi zubane hotá tuáñra beggún or túaro bicí hoói. **19** Montor zomát ot máze gabi zubane doc ázar hotá howár túaro, oinno zon ore nosíyot gorí bolla añi buzá zah de héñdilla fañs sán hotá howá basíyú. **20** Ó báiboináin, buzát fuain no boinno. Burait gura fuain bono, montor buzát balok ó. **21** Córiyot ot endilla leikká asé, Mabude fórmár de, “Maincór osin zubane edde bidecóitta ókkol or muké Añi e manúc itarár hañse hotá hoiyúm, aar tooú úddwa itará Añr hotá no fúnibo.” **22** Híyane buzá zar de, gabi zuban ókkol óilde gairimandár ókkol olla ekkán nicán, imandár ókkol olla no. Montor Allar kalam boiyan gorá óilde imandár ókkol olla, gairimandár ókkol olla no. **23** Hétolla zodi fura zomát ek zagat zoma ói beggúne gabi zubane hotá hoó, aar hére baárgwa manúc yáh gairimandár ókkol aiyé, ítara kí tuáñra re fool no hoibó né? **24** Montor zodi beggúne Allar kalam boiyan goró, aar hére honó gairimandár yáh baárgwa manúc aiyé, yóggwa ye hotá híin beggún or duara nizoré nize gunágar de sábut faibo, aar híin beggún or duara yóggwar bisar gorá zaybo. **25** Héñdilla góri yóggwar dil or gufoni ókkol zahér óizayboi; aar yóggwa ye héñtte uúñtoit fori Alla re sóida goríbo aar hoibó de, “Alla sóiyi-sóiyi tuáñrar dormiyan ot asé.” **26** Báiboináin ókkol, tooile kii ówa foribó? Tuáñra zeñtté ekkán ot zoma ó, héñtte toh tuáñra kiyó ttu seér táke, kiyó ttu taalim táke, kiyó ttu wahí táke, kiyó ttu gabi zuban táke, aar kiyó ttu hé zuban báñgi díbar táke. Hárr kessú zomát or torki lla ówar zorur. **27** Zodi gabi zubane hotá hoó, dui zone yáh bicí ttu bicí tin zone hoók; ítara ekzon ekzon gori hoók, aar ar ekzone híin báñgidouk; **28** montor zodi báñgidoya no táke, tooile yóggwa zomát ot nizám mári tákouk; aar nizor lloi edde Alla lloi hoók. **29** Héñdilla, zetará

nobi ísafe hotá hoó ítara dui zone yáh tin zone hoók, aar argúne híin tadarot gorí soók. **30** Montor zodi hére boói táikke de ézzon or hañse honó wahí aiyé, tooile age lóti zee niki hoór yóggwa nizám óizoggoi. **31** Kiyólla-hoilé tuáñra beggúne ekzon ekzon gori Allar kalam boiyan gorí faribá, zeéne beggúne cíke aar beggúne josba hásil goré. **32** Nobi ókkol or ruh toh nobi ókkol or kobzat éna táke. **33** Kiyólla-hoilé Alla toh cúkcak or Alla no, bólke cántir, zendilla niki pak bonda ókkol or tamám zomát ókkol ot asé. **34** Mayafuain ókkol zomát ot nizám mári tákouk; kiyólla-hoilé ítara matibár ezazot náí, bólke ítara fórmadar tákouk, zendilla Córíyote yó hoó. **35** Zodi ítara ttu kessú cíkito monehoó, tooile nizor-nizor hócom ottu gór ot máze fusár goróuk, kiyólla-hoilé mayafuain zomát ot maton toh córmor hotá. **36** Allar kalam ki foóila cúrut tuáñrar bútottu neeillé dé? Aar náki híin siríf tuáñrar hére foónicce dé? **37** Zodi honókiye nizoré nobi yáh ruúhani ola manúc bóuli táare, yóggwa ttu yíán mani lowa foribó de ki, ańi tuáñrar hañse zín lekír híin Malik or hókum. **38** Montor zodi honókiye mani no loh, yóggwa re yó mani lowa no zaybo. **39** Hétolla, ó ańr báiboináin ókkol, nobi ísafe Allar kalam boiyan gorí bolla bicígori azzu goró, aar gabi zubane hotá no hoitó maná no goijjó. **40** Montor hárr kessú sóiyigori edde niyome-niyome gorár zorur.

15 Báiboináin ókkol, ańi tuáñrar hañse ze kúchóbor tobolik goijjílám híyan yala tuáñra re zanaidir, ziyán tuáñra kobul goijjó aar ziyán ot tuáñra lagi asó. **2** Zodi tuáñra ańi tuáñrar hañse tobolik goijjílám de kalam mozbut gori dóri asó de óile, tuáñra toh híyan or usílaye nejat foór, arnoíle tuáñrar iman aná behar óigiyoi. **3** Kiyólla-hoilé ańi tuáñrar hañse foónsaiyi de óilde uúin zín ańi faiyé de héntu bicí dorhari gún, ki hoilé, Mosih pak-kalam mozin ańárar guná lla bóuli moijjíl, **4** Íba re dohón gorá gíyl, aar pak-kalam or hotá mozin íba re tin din ot din zinda gorá gíyeh, **5** baade íba ye Kéfas ore dahádiye, tarfore baró zon sáhabi gún ore. **6** Yárbaade íba ye ekbar ot fańs cót or túaro bicí báiboináin dore dahádiye, zetarár bútottu kessú moot or gúm ot forigiyói de óile yo, lekin bicí zon aijjó basi asé. **7** Tarfore íba ye Yakub ore dahádiye, baade tamám sáhabi ókkol ore; **8** aar beggún or fisé, ańi ézzon beťaimma zormor hañse yó íba ye dahádiye. **9** Kiyólla-hoilé sáhabi gún or bútottu ańi óilam de ebbe niróc cwa; ańré sáhabi hoibár úddwa laayek no,

kiyólla-hoilé ańi toh Allar zomát ore zulúm goittám. **10** Montor yala ańi ziyán óiyi híyan Allar rahámote óiyi deh; ańr uore íba ye ze rahámot goijjé híyan behar ói nó zagoi; ańi ítara beggún or túaro bicí meénnot goijjí, háleke ańi goijjí de no, bólke ańr uore Allar ze rahámot óiye híyane goijjé deh. **11** Híyan ańi goijjí óuk yáh ítara goijjé, ańára toh waán or baabute éna tobolik gorí, ziyán or uore tuáñra iman ainno. **12** Mosih re mora ttu zinda gorá gíyeh de híyan or toh tobolik gorá zah, tói tuáñra hodúne keéngori hoó de, mora ókkol or háńcor náí? **13** Montor zodi mora ókkol or háńcor no táke, tooile toh Mosih re yó zinda gorá nó zah. **14** Aar zodi Mosih re zinda gorá nó zah de óile, ańárar tobolik toh behar aar tuáñrar iman óu behar. **15** Híyan baade yo, ańára Allar misá gobá tóoijji; kiyólla-hoilé ańára Allar baabute gobá dí de ki, íba ye Mosih re zinda goijjé. Lekin mora ókkol ore zinda gorá zah de híyan zodi sóiyi no, tooile toh íba ye Mosih re yó zinda nó goré. **16** Kiyólla-hoilé mora ókkol ore zinda gorá no zaylé, tooile Mosih re yó toh zinda gorá nó zah. **17** Aar zodi Mosih re zinda gorá nó zah de óile, tooile toh tuáñrar iman behar; tuáñra aijjó nizor gunár tole asó. **18** Héen óile, Mosihr bútore ói zetará moot or gúm ot foijjé, ítara yó dónco óigiyoi. **19** Zodi ańára Mosihr uore acá raikkí de siríf e zindigí lla de óile, tooile toh manúc beggún or túaro ańára bodnosíf ola. **20** Montor becók, Mosih re toh mora ttu zinda gorá gíyeh. Ziyáne fakka goré de, moot or gúm ot foijjé de ítara re yó zinda gorá zaybo. **21** Kiyólla-hoilé zendilla manúc or duara moot aiccé, héndilla Manúc or duara mora ókkol or háńcor óu aiccé. **22** Zendilla Adom or fuain ísafe beggún moijjé, héndilla uitará beggún ore yó zinda gorá zaybo zetará Mosihr ummot. **23** Lekin bari-bari mozin: ebbe age Mosih re gorá gíyeh, yárbaade Mosihr ummot ókkol ore gorá zaybo zeńtté íba aibó. **24** Yárbaade ahérot aibó; héńtte íba ye hárr hókumot, hárr adíkar, edde hárr taakot ore dónco gorífelai baade Alla Baf or át ot raijjo gosái dífelaibo. **25** Kiyólla-hoilé Mosih ttu otódin foijjonto hókumot gorár zorur, zetódin Alla ye íbar tamám duccon ókkol ore íbar foor tole gorí nó fele. **26** Ahéri duccon, ziyán ore fána gorífela zaybo híyan óilde moot. **27** Kiyólla-hoilé pak-kalam ot asé de, “íba ye hárr kessú íbar tole gorídiye.” Montor íba ye, “hárr kessú,” íbar tole gorídiya gíyeh hoó de híyane sábut ó de, zibá ye hárr kessú Mosihr tole gorídiye íba hére cámil náí. **28** Hárr kessú zettót íbar tole gorídiya

gýgeh, tói Fua Nize yó Ubár tole óizayboi zibá ye hárr kessú íbar tole gorídiye, zeéne hárr kessút Alla hárr kessú ó. **29** Arnóile, zetará mora ókkol olla báptisma loh, ítara kii goríbo? Mora ókkol ore zodi zinda gorá no zaybo de óile, tóoile kiyá maincé ítara lla báptisma loh? **30** Aar añára yó kiyá hárr októót hótórat forat táki? **31** Báiyain, Mosih Isá añárar Malik or hañse tuáñra re lói añr ttu ze borái asé, añí híyan or hosóm hái hoóir, añí fottí din morizaygóí. **32** Ífisas ot añr ttu joggoli januwar ókkol lói ze larái gorá foijjé, híyan zodi duniyaibi niyote goijjé de óile, tóoile añr kii fáida? Zodi mora ókkol ore zinda gorá no zaybo de óile, “Tóoile aiyó, añára háafiya gorí, kiyólla-hoilé hailla toh mori zaiyumbói.” **33** Fáki na háiyó. “Hóraf sáañti ye gom adot ókkol ore bigiríféle.” **34** Sóiyi úñic ot aiyó, aar guná gorá bon goró. Tuáñrar bútoire endilla hodún manúc asé zetará Alla re no siné. E hotá hoóir de añí tuáñra re córom dí bolla. **35** Óitofare honókiye endilla hoibó, “Mora ókkol ore keéngori zinda gorá zaybo? Ítara ttu hondilla jisím tákibo?” **36** Ó fool! Ze bis lagos yíba no moille toh sara no fúre. **37** Lagaité toh fore bonibó de sara lagos de no, bólke siríf bis éna, óitofare yíba giyuñr yáh oinno kessúr. **38** Montor Alla ye Nizor fosón mozin yíba re ekkán gaa dee. Íba ye fottí bis ore nizor-nizor zat mozin gaa dee. **39** Hárr jisím ek dóilla no, insán or jisím ek dóilla, januwar or jisím ek dóilla, faik or jisím ek dóilla, aar mas or jisím ek dóilla. **40** Héndilla, asmani jisím óu asé, aar duniyaibi jisím óu asé, montor asmani jisím or cáan ek dóilla, aar duniyaibi jisím or cáan ek dóilla. **41** Beil or cáan ek dóilla, san or cáan ek dóilla, tara ókkol or cáan ek dóilla, hoitó sailé, ek tarar cáan arek tarar cáan lói úddwa forók. **42** Mora ókkol or háñcor óu héndilla. Haiya meřit diiya zah de toh fána ó de jisím ísafe, montor tulá zaybo de fána no ó de jisím ísafe. **43** Merit diibarcót híyan or honó kodor no táke, montor híyan ore tulá zaybo de izzot ot. Merit diibarcót híyan komzur, montor híyan ore tulá zaybo de taakot ot; **44** híyan ore meřit diiya zah de insáni jisím ísafe, montor tulá zaybo de ruúhanir jisím ísafe. Zendilla insáni jisím asé, héndilla ruúhanir jisím óu asé. **45** Hétolla pak-kalam ot asé de, “Foóila manúc Adom zinda zandár óiaicce.” Aar ahéri Adom zindigi-dooya ruh óiaicce. **46** Age toh jisím ruúhanir gán aiccé de no, bólke insáni gán aiccé deh, yárbaade ruúhanir gán. **47** Foóila manúc óilde meřir, yáni meři loi banaiya; dusára Manúc óilde asmani. **48** Manúc meřir gwá

zendilla, duniyair ítara yó héndilla; aar Manúc asmani wa zendilla, asmani ítara yó héndilla. **49** Zendilla añára meřir gwar siyára-súrot faiyí, héndilla añára asmani war siyára-súrot óu faiyum. **50** Báiboináin ókkol, hoitám saáir de ki, jisím edde lou wé Allar raijjo miras fai no fare; héndilla, fána ó de híine fána no ó de híin miras fai no fare. **51** Fúno, añí tuáñra re ekkán gufoni zanaidir, ki hoilé, añára beggún moot or gúm no zaiyum, lekin beggún bodoli zaiyumbói. **52** Híyan éhon or bútoire, suk or bailfata fíraibarcot, ahéri cíañ matar fúañti-fúañti óibo. Kiyólla-hoilé cíañ matilé muruda ókkol fána no ó de hálót ot urízayboi, aar añára bodoli zaiyumbói. **53** Kiyólla-hoilé fána ó de haiya yían ot fána no ó de héndilla kessú findár zorur, aar e moroni haiya yían ot omoroni kessú findár zorur. **54** Montor zeñtté fána ó de haiya yían ot fána no ó de héndilla kessú findá zaybo, aar moroni haiya yían ot omoroni kessú findá zaybo, tói baade pak-kalam ot asé de e hotá fura óibo, “Moot ore ziti dónco gorífela gýgeh.” **55** “Ó moot, tor fóta hoře? Ó moot, tor cúm hoře?” (Hadēs 986) **56** Moot or cúm óilde guná, aar gunár bol óilde Córiyot. **57** Montor Allar cúkur óuk, zibá ye níki añárar Malik Isá Mosihr duara añára re fóta dan goijjé. **58** Hétolla, ó añr adorja báiboináin ókkol, mozbut ó aar tórok dóri táko. Malik or ham hámica bicígori goró, kiyólla-hoilé tuáñra toh zano, Malik or hañse tuáñrar meénnot befózul no.

16 Yala Allar pak bonda ókkol olla sañda tulár baabute hoitó sailé: tuáñra undilla goró zendilla añí Galatíyar zomát ókkol ore hókum dílam. **2** Fottí háftar cúrrur din, fottíkiye nizor-nizor amodoni mozin kessú tíañ alok gorí zoma rakíyo, zeéne añí ailé sañda tulá no fore. **3** Añí hére ailé, tuáñra zetará re basíloiba ítatar at ot ceñrí dii ítara re tuáñrar hádiya ókkol Jerúsalem ot foóisaito diferáiyum. **4** Aar zodi añr ttu yó zaa fore, ítara añr fúañti zaibo. **5** Añí tuáñrar hére Makedóniya báy sofór gorí baade aiccúm, kiyólla-hoilé añí Makedóniya báy sofór goijjúm. **6** Óitofare añí tuáñrar fúañti hooddin tákiyum, yáh fura cítkhal úddwa haraiyúm, zeéne añí zeře zaiyum hé sofór ot tuáñra añré rowana gorídi faro. **7** Añí ehón zaibar foñt ot tuáñra llói milto no saáir, kiyólla-hoilé añí tuáñrar fúañti kessú taim harai bolla acá gorír, zodi Malike ezazot deh. **8** Montor añí ífisas ot Penťikos Id foijjonto tákiyum, **9** kiyólla-hoilé cár ó de ham gorí bolla añr lla ekkán bóđđa dorozó kúille, aar muhálef-goróya ókkol

óu bicí asé. **10** Zodi Timóti aiyé, saiyó, yóggwa tuáñrar fúañti honó door sára táki fare fán, kiyólla-hoilé añr dõilla yóggwa ye yó Malik or ham éna gorér. **11** Hétolla honókiye yóggwa re hékarot no goijjó, bólke cántir sáañte sofór ot rowana gorídiyo, zeéne yóggwa añr hañse aái fare, kiyólla-hoilé yóggwa imandár báiyain dor fúañti aibó bóuli acá gorír. **12** Yala añárar báí Apólos or baabute hoiótó sailé: añí yóggwa re imandár báiyain dor fúañti tuáñrar hére ai bolla bicígori aros goijjí, montor yóggwa ttu ehón aibár honó mon náí; one moouka faile aibó. **13** Úñciyar ó; iman ot dorógori táko; hímmot rakó; mozbut ó. **14** Tuáñra ziín goró híin beggún muhábbot or sáañte goró. **15** Tuáñra toh zano, Eştefánas or gór řiya óilde Akaya elakar foóila imandár, aar ítara Allar pak bonda ókkol or hédmot ot nizoré gosáidiye. Báiboináin ókkol, añí tuáñra re bicígori aros gorír, **16** tuáñra yó nizoré ítara dõilla maincór hañse gosáido; héndilla, zetó zon hé ham ot edde meénnot ot córik asé, ítara hañse yó gosáido. **17** Añí bicí kúci óiyi, Eştefánas, Fortúnatus, edde Akayikus aiccé de hétolla, kiyólla-hoilé tuáñrar torfóttu ziyán una accíl híyan ítara fura goijjé. **18** Ítara añr edde tuáñrar ruh re fořfoiřřa goijjé. Hétolla, héndilla maincóre kodor goríyo. **19** Ecíya elakar zomát ókkole tuáñra re sólám zanar. Ekúila edde Prisíla ye yó tuáñra re Malik or name dil ottu sólám zanar; héndilla, ítara gór ot zoma ó de zomáte yó zanar. **20** Tamám imandár báiboináin ókkole yó tuáñra re sólám zanar. Tuáñra ezzon ore ezzone pak dile appá dí sólám zano. **21** E sólám mwa añí Pául nizor át or leká. **22** Zee niki Malik ore muhábbot no goré, ítara uore gozzob forouk. Ó añárar Malik, aiyó. **23** Malik Isár rahámot tuáñrar uore zari tákouk. **24** Mosih Isár bútoe añr muhábbot tuáñra beggún or fúañti zari tákouk. Aamin.

2 Kórintiól

1 Añí Pául, zibá Allar moncá mozin Mosih Isár ézzon sáhabi. Añárar báí Timóti yó añr fúañti asé. Kórin cóor ot Allar ze zomát asé, yíbar hañse edde Akaya elakar agagurat asé de pak bonda beggún or hañse lekír. **2** Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **3** Añárar Malik Isá Mosihr Alla edde Baf or taarif óuk, zibá rahám or Baf edde hárr dǵoilla tosóllir Alla. **4** Íba ye añára re añárar hárr duk-mosibot ot tosólli déh, zeéne añára yó Allar torfóttu faiyí de hé tosólli lói uitará re tosólli dí fari zetará ze honó duk-mosibot ot asé. **5** Kiyólla-hoilé zendilla Mosihr duk añárar uore bicí, héndilla añárar tosólli yó toh Mosihr duara bicí. **6** Zeñtté añára duk-mosibot ot fori, añára tuáñrar tosólli edde nejat olla fori deh. Zeñtté añára tosólli fai, añára tuáñrar tosólli lla fai deh, zíine sobór or sáañte duk uúin bordac gorí bolla modot goré zíin añára yó bordac gorír. **7** Tuáñrar baabute añárar acá mozbut, kiyólla-hoilé añára zani de, zendilla tuáñra añárar duk ókkol ot córik asó, héndilla tuáñra añárar tosóllit óu asó. **8** Báiboináin ókkol, añára no saái, tuáñra Ecíya elakat añárar uore óiye de duk-mosibot ókkol or baabute ozana táko. Añárar uore ettór dǵoñr sab foijjíl ziyán bordac or baáre óigilgoi, aar añára zane basi tákar acá úddwa háraifelailam. **9** Becók, añára tǵaaijilam de, añárar uore moot or hókum ógiyoi. Montor héndilla etollá óiye, zeéne añára nizor uore no bólke mora re zinda goré de hé Allar uore bóraca rakí. **10** Íba ye añára re héttor dǵoñr mooti docá ttu basaiyé, aar basai bó yó. Íbar uore añárar e acá raikkí de, Íba ye añára re basat tákibo. **11** Tuáñra yó toh añára re dua loi modot goró, zeéne boóut zon or duar usílaye añára faiyí de niyamot olla boóut zon or duara añárar bodol Allar cúkuriya adai ó. **12** Añárar borái óilde yíán ziyán níki añárar hélome yó gobá déh, ki hoilé, añára duniyait mazé paki edde dindárir ehélase zindigi haraiyí, háasgori tuáñrar dormiyan ot. Añára héndilla goijjí de hómo duniyaibi giyane no, bólke Allar rahámote. **13** Kiyólla-hoilé tuáñra zíin forí faro edde buzí faro, yár baáre añára tuáñrar hañse kessú no lekír. Añí acá gorír, tuáñra ahéri foijjonto buzíba, **14** zodi yala añára hoóir de híin beggún no buzíle yo. Kiyólla-hoilé beggún buzíle, añárar Malik Isá aibár din ot añára óiyum de tuáñrar borái, zendilla tuáñra añárar borái óiba. **15** Híyan or ekine añí erada goijjí

de, age tuáñrar hére ai bolla, zeéne tuáñra dui gun aiborhot foo; **16** yáni, Makedóniyat zaité tuáñrar hére góli bolla aar Makedóniya ttu aité yó tuáñrar hére góli bolla, baade tuáñra añré Yohúdiyat zaibar sofór ot rowana gorídiba. **17** Héndilla erada goróne kí añí tooñcá gorír bouli sábut ó? Añí kí duniyaibi manúc or dǵoilla niyot goijjí fán óiye, zetará ekbar ói ói bouli hoó arekbar no no bouli hoó? **18** Montor Alla zendilla biccácdar, yíán óu héndilla de ki, tuáñrar hañse añárar hotá ekbar “ói” edde arekbar “no” lói no. **19** Kiyólla-hoilé Allar Fua Isá Mosih, zibár baabute añára, yáni añí, Sílwanus edde Timóti ye tuáñrar hañse tobolik goijjílám, íbar bútoire toh “ói” edde “no” duniyan nu accíl, bólke íbar bútoire “ói” hoilé hámica ói. **20** Allar tamám waada ókkol íbar bútoire “ói.” Hétolla íbar usílaye añára “Aamin” hoói, zeéne Allar taarif ó. **21** Zibá ye añára re edde tuáñra re Mosihr bútoire mozbut goré edde añára re basíloiyé íba óilde Alla. **22** Íba ye añárar uore Nizor moór lagaidiye, edde boona ísafe añárar dil ot Pak-Ruh diiyé. **23** Montor añí Alla re gobá gorí añr zindigir hosóm hái hoóir, añí Kórin ot abar nú aiyí de tuáñra re basai rakí bolla. **24** Añára tuáñrar iman or uore hókumot solair de no, bólke tuáñrar fúañti tuáñrar kúci lla ham gorír deh; kiyólla-hoilé tuáñra toh imane mozbut gori tíyaiya asó.

2 Hétolla añré añí fáisela goijjí de, añí tuáñrar dil ot duk di bolla tuáñrar hére ar nu aiccúm. **2** Kiyólla-hoilé zodi añí tuáñrar dil ot duk dih, tóoile tuáñra zetarár dil ot añí duk diyí, tuáñra bade añré kúci goróya ar hon asé? **3** Añí tuáñrar hañse hotá híin leikkílam de kiyólla hoilé, zeéne añí ailé, zetará añré kúci goríbar hotá, ítara añré dil ot duk no deh; añr ttu tuáñra beggún or uore yíán ekin asé de, ziyán añr kúci, híyan tuáñra beggún or óu kúci. **4** Kiyólla-hoilé añí tuáñrar hañse leikkílam de dǵoñr mosibot or hálot ot edde dil or ferecaniye boóut suk or faní bácai-bácai; tuáñrar dil ot duk di bolla no, bólke tuáñra zen añr ttu tuáñra lla ze háas muhábbot asé híyan zani faro. **5** Montor zodi honókiye dil ot duk di táke, tóoile toh íte siríf añr dil ot duk diyé de no, bólke—bicí horagori no hoiyúm hoilé—kessú bák tuáñra beggún ore yó diyé. **6** Héndilla manúc ore bicí zone ze sáñza díyo de híyan ítar lla kaff. **7** Yárbodol yala tuáñra ttu ítare maf gorídiyar edde tosólli díyar zorur, zeéne íte bicí dukké hǵoñri no zagói. **8** Hétolla, añí tuáñra re bicí aros gorír, tuáñra ítare muhábbot goró de

híyan sábut gorí dahó. **9** Añí tuáñrar hañse etollá yó leikkílam, zeéne añí tuáñra hárr kessút fórmadar asó né entán gorí saái fari. **10** Tuáñra zaré maf gorído, añí yó ítare maf gorídi. Kiyólla-hoilé becók, añí zín maf gorídiyi, zodi maf goríðibar kessú accíl de óile, añí híin Mosihr cáikkat tuáñrar wasté maf goijjí deh; **11** zeéne Cóitane añára ttu honó fáidai tulí no fare, kiyólla-hoilé añára toh ítár sail or baabute ozana no. **12** Zeñtté añí Mosihr kúchóbor tobolik goittó Toras ot gílam, Malike añr lla ekkán duwar kúillil. **13** Toóu añr mon ot cánti nu accíl, kiyólla-hoilé añí añr báí Titus ore hére loot nó fai. Hétolla añí ítara ttu bidai loi Makedóniyat gílamboi. **14** Montor Allar cúkur óuk, zibá ye añára re Mosihr usílaye zitai hámica fisé-fisé loiza, aar añárar duara Mosihr baabute zankari hárr zagat kúcho fóla fán fóla. **15** Kiyólla-hoilé Allar nozor ot añára toh nejat foya edde hálak óoya ókkol olla Mosihr kúcho. **16** Ek gún or hañse añára moot ané de kúcho, arek gún or hañse zindigi ané de kúcho. Tóoile ham híin goríbar laayek hon? **17** Boóut zon zetará Allar kalam loi códori goré, añára toh ítárar dóilla no; bólke Alla ye zettót añára re diferáiyé, añára híin Mosihr bútoe Allar cáikkat ehélase hoói.

3 Hotá híin hoói kí añára abar nizor nam gorát doijji dé? Aar náki hodún maincór dóilla añára ttu cúwaricnamar ceñrí ókkol tuáñra re diibar yáh tuáñra ttu loibar zorurot óiye dé? **2** Añárar ceñrí toh tuáñra, ziyán añárar dil ot leikká asé, ziyán ore tamám maincé zane edde foré. **3** Yíán sáf zahér de ki, tuáñra óilade Mosihr ceñrí, ziyán íba ye añárar hédmot or duara leikké. Híyan ore leká gíyeh de cíyai lói no bólke zinda Allar Ruh lói, fattór or faṭ ot no bólke insán or faṭ ot, yáni dil ot. **4** Héndilla de híyan añára ttu Mosihr usílaye Allar uore ekin asé. **5** Añárar bútoe endilla honó toóufik asé de héen no, ziyán lói añára nizebaze kessú goijjí hoói dabi gorí fajjium; añárar toóufik óilde Allar torfóttu, **6** zibá ye añára re noya razinamar háadem óibar toóufik diiyé, ziyán lekár no bólke Ruhr. Kiyólla-hoilé leká ye ané de moot, montor Ruh ye dee de zibon. **7** Moot ainné de razinama ziyán or hórof ókkol fattór ot kúñdi yore leká gíyl, híyan or hédmotdari zettót eén tozollir sáañte aiccé zeén níki Boni Isráil ókkole Muúsar siyárar uzu lagatar saái táki nó fare, kiyólla-hoilé íbar siyárat tozollí accíl, ziyán asté-asté homi zat accíl, **8** tói Ruhr hédmotdari aró hotó tozollir sáañte óibo fánllar! **9** Kiyólla-hoilé hosúrbon tóora de razinamar hédmotdarit tozollí

tákile, Allar nozor ot forhésgar tóora de razinamar hédmotdarit toh tozollí aró boóut bicí tákibo. **10** Becók hé súrote toh ziyán tozollí ola accíl híyan ot dōñr tozollir zoriya tozollí náí fán óigiyoi. **11** Kiyólla-hoilé ziyán hótom óizagoi híyan tozollí ola de óile, ziyán ṭiki táke híyan toh aró boóut bicí tozollí ola óibo. **12** Añára ttu héndilla acá asé de hétolla, añára boiyan goitté hímmot or sáañte gorí. **13** Añára Muúsar dóilla no, zibá ye nizor siyárat ekkán foroda dito de zeéne ziyán hótom óizargoi híyan or fúrantí re Boni Isráil ókkole deki nó fare. **14** Lekin ítárar dil doró accíl. Ítara furana razinama re telawot goróne aij foijjonto ítárar dil ot hé foroda táigiyoi, kiyólla-hoilé híyan toh Mosihr ummot óile éna dur gorífela zah. **15** Aij foijjonto zeñtté-zeñtté ítara Muúsar Córiyot telawot goré, ítárar dil ore foroda ekkáne gúri raké. **16** Lekin zeñtté honókiye Malik or uzu fíre, héñtte hé foroda dur gorífela zah. **17** Hé Malik óilde Ruh; zeṛé Malik or Ruh asé, hére azadí asé. **18** Montor añára zetará beggúne beforoda siyára lói Malik or tozollí re aainat dekir fángori dekir, añára hé Malik zibá Ruh íbar usílaye zetó éto tozollíwala boni íbar súrot ot bodolizargoi.

4 Hétolla, añárar uore zettót eén rahám óiye zeén níki e hédmotdari faiyí, añára hímmot na hárai. **2** Bólke córmor ham zín lukaiya accíl híin añára inkar gorídiyi; añára no férokbaizi gorí soli aar no Allar kalam bigířifélai, bólke sóiyi re kúlamelar sáañte zahér gorí Allar cáikkat fottí maincór hélom ot añára cúnam zurai. **3** Aar zodi añárar kúchóbor foroda diya de óile yo, híyan foroda diya de uitarár hañse zetará dónco óizargoi. **4** Hé gairimandár ítárar zehén ore e jáhan or kúda ye ańdá banaífélaiye, zeéne ítara Mosihr mohímar kúchóbor or nur deki nó fare, ze Mosih óilde Allar súrot. (aĩon g165) **5** Kiyólla-hoilé añára toh nizor baabute no bólke Mosih Isár baabute éna tobolik gorí; ki hoilé, íba óilde Malik, aar Isár wasté añára óilam de tuáñrar gulam. **6** Kiyólla-hoilé ze Alla ye hoíyē de, “Andár ottu foór zolouk,” íba óilde Ubá zibá níki añárar dil ot soimké, añára re Allar oh tozollir zankari di bolla ze tozollí Isá Mosihr siyárat somke. **7** Montor añára ttu hé dón híyan meitṭa fatilat asé fán asé, zeéne hé dōñr kudurut añárar nizor torfóttu no bólke Allar torfóttu de híyan dahá zah. **8** Añárar uore hárr mikká ttu sab fore, montor hōñri no zaygói; añára buddí háraiya ói, montor acá hárai no ói; **9** añára zulúm hái, montor Alla hámica fúañti asé;

añára re meřit añsáre, montor dónco ói no zaygoí. **10** Añára nitti añárar jisím ot góri Isár moot boói loizai, zeéne añárar jisím or bútoře Isár zindigi yó zahér ó. **11** Kiyólla-hoilé añára zetará basi así, añára re toh Isár wasté moot or át ot hámica tulídiya zar, zeéne añárar fána ó de jisím or bútoře Isár zindigi yó zahér ó. **12** Hé súrot or uore, añárar bútoře ham gorér de óilde moote, montor tuáñrar bútoře zindigi ye. **13** Pak-kalam ot endilla asé, “Añí iman ainní de hétolla hoiyí déh.” Añára ttu zettót iman or hé ekí ruh asé, añára yó iman ainní de hétolla hoói deh. **14** Kiyólla-hoilé añára zani, zibá ye Malik Isá re zinda goijjé ĩba ye añára re yó Isár fúañti zinda gorĩbo, aar añára re tuáñrar fúañti ĩbar muúntu házir gorĩbo. **15** Kiyólla-hoilé híin beggún toh tuáñrar wasté éna ór, zeéne ze rahámot bicí-bicí maincór hañse fóler híyan or zoriya Allar becábicí cúkuriya adai ó, zeéne ĩbar mohíma ó. **16** Hétolla, añára hímmot na hárai. Añárar baár or haiya nac óizargoi de óile yo, añárar ruúhani dinbodin noya ówat asé. **17** Kiyólla-hoilé añárar e hooddinna cóñro mosibote añára ĩla ettór doóñr ofúrani tozollí toiyar gorér, ziyán ore honó kessú lói mafa no zah. (aiõnios g166) **18** Hétolla, añára dekí fara zah de híin or uzu no, bólke dekí fara no zah de híin or uzu beh nozor dih; kiyólla-hoilé dekí fara zah de híin toh tooitta, montor dekí fara no zah de híin ofúrani. (aiõnios g166)

5 Kiyólla-hoilé añára toh zani, zodi añára táki de e duniyaibi ĩambu, yáni haiya dónco óizagoi, añára ttu asman ot endilla ekkán billíng gór asé ziyán Allar torfóttu, híyan át or banaiya no bólke abadulabadi. (aiõnios g166) **2** Becók, e ĩambut táki añára doóñr niyác félai-félai asmani gór híyan ore hoor fiñdé fángori fiñdí bolla bicí azzu gorír, **3** kiyólla-hoilé zeñtté añára híyan ore fiñdífelaiyum, añára re biyossor faa no zaybo. **4** Becók, añára zetará e ĩambut así, añára fuñzár bóre doóñr-doóñr niyác félair, kiyólla-hoilé añára ttu afindá no bólke findá óito monehoór, zeéne fána ó de híyan ore zindigi ye giliféle. **5** Añára re hé moksót olla toiyar Alla ye goijjé deh, zibá ye añára re boona ísafe Ruh diiyé. **6** Hétolla añára hámica hímmot rakí aar zani de, zetókkal añára e insáni haiya loi así, añára Malik or hére házir náí; **7** kiyólla-hoilé añára toh solafíra iman or sáañte gorí deh, suké dekí no. **8** Ói, añára ttu hímmot asé, aar añára e haiya ttu alok ói Malik or fúañti gór ot ówa aró fosón gorí. **9** Hétolla añára e haiyar gór ot así yáh náí, añárar

monzil-moksót óilde ĩba re kúci gorón. **10** Kiyólla-hoilé añára beggún ottu toh Mosihr adaloti toktór muúntu hámaha házir ówa forĩbo, zeéne haiya loi tákite zee zendilla ham goijjé hé mozin fottíkiye bodola fai, ham híin gom óuk yáh hóraf. **11** Hétolla, Malik or door kii de híyan zani añára manúc ókkol ore bořai anĩbar kucíc gorí. Alla ye toh añára re siné; añí acá gorí, tuáñrar hélome yó añára re siné. **12** Añára tuáñrar hañse abar añárar nam gorír de no, bólke añára re lói borái gorí bolla tuáñra re ekkán moouka diir deh, zeéne tuáñra ttu uitará ĩla zuwab táke zetará dil or gún lói no bólke dekí fara zah de híin lói borái goré. **13** Kiyólla-hoilé zodi añára bekuf de óile, híyan toh Allar wasté éna; aar zodi añárar demak ĩk de óile, híyan toh tuáñrar wasté éna. **14** Hotá óilde, añára re Mosihr muhábbote mojbur goré, kiyólla-hoilé añára buijjé de, ekzon beggún olla moiijjé rár beggún morigiyói. **15** ĩba beggún olla etollá moiijjíl, zeéne zetará basi asé ítara ar nizor ĩla basi no táke, bólke Ubá ĩla táke zibá ítara bodol moiijjíl aar abar zinda óiye. **16** Hétolla, ehón ottu lóti añára honókiyo re insáni buzá lói no buijjúm. Añára Mosihr re insáni buzá lói buzítam de óile yo, yala añára ĩba re ar héndilla góri no buzí. **17** Hé ísafe, zee niki Mosihr bútoře asé, íte ézzon noya mohóluk óigiyoi; furana gún zaigói hárr kessú noya óiaicce. **18** Híin beggún Allar torfóttu beh ó, zibá ye Mosihr duara añára re Nizor loi bonot gorífelaiye, aar añára re hé bonot or hédmotdari diiyé. **19** Hoitó sailé, Alla Mosihr bútoře ói duniyair maincóre Nizor loi bonot gorífelaiye; ĩba ye ítara guná-háta ítara ulđa nó dóre. Aar ĩba ye hé bonot or hóbor zanaibár zimmadari añára re gosáidiye. **20** Hétolla añára óilam de Mosihr nomainda ókkol, zeén níki Alla ye añárar duara manúc ókkol ore becábicí aros gorér. Añára Mosihr torfóttu ói yore tuáñra re fóriyat gorí de, “Alla ĩloi bonizogói.” **21** Kiyólla-hoilé Alla ye toh añárar bodol Ubá re gunár zagat tíyagaraiye Zibá beguná accíl, zeéne añára ĩbar bútoře ói Allar forhésgarir bági óizaygoi.

6 Añára Allar sáañti ham-goróya ísafe tuáñra re aros gorír, tuáñra Allar ze rahámot faiyó, híyan ore befózul óito no diyó. **2** Kiyólla-hoilé ĩba ye fórmard, “Kobul gorá zah de októť Añí tor hotá fúinni, aar nejat or din ot Añí toré modot goijjé.” Fúno, yala óilde kobul gorá zah de októť, aijja óilde nejat or din. **3** Añára honókiyo re ĩokkor na hábai, zeéne añárar

hédmotdarir bodnam no. **4** Bólke añára Allar háadem de híyan hárr kessút zahér gorí, hoitó sailé, bicí sobór ot, duk-mosibot ot, mockil ot, ferecanit, **5** firā hāt, ziyól harāt, hánggamat, meénnot ot, urgúmat, waáccat, **6** pak-sáf ot, giyan ot, bordac ot, meérbanit, Pak-Ruht, hāṭi muhábbot ot, **7** sóiyi kalam loi, Allar kudurut loi, den át ot edde ban át ot forhéggarir átiyar ókkol lói, **8** izzot edde beizzot ówa lói, aar bodnam edde taarif faa loi. Añára sóiyi de óile yo maincé añára re dúkabaz táare; **9** añára re beggúne sínile yo no siné fán goré; añára morigiýigoi fán de óile yo, háleke añára zinda. Maincé añára re sánza déh, montor aijjó zane mari nó fele. **10** Añára ferecanit así fán de óile yo añára hámica kúcit así; añára re saité gorif, háleke añára boóut zon ore tuangor banair; añára ttu kessú náí fán, montor añára ttu hárr kessú asé. **11** Ó Kórintiól, añára tuáñrar hañse kúlamela góri hotá hoiyí, aar tuáñra lla añárar dil ebbe kúlachala. **12** Añára tuáñra lla añárar dil bon gorí raikkí de no, tuáñra éna tuáñrar dil añára ttu bon gorí raikkó. **13** Ehón añí tuáñra re añr fuain ísáfe hoóir, bodolat mazé tuáñra yó añára lla tuáñrar dil kúlido. **14** Gairimandár ókkol or fúaṇti ek zuañl ot no óiyo. Kiyólla-hoilé forhéggari lói bedini loi kii bazá asé? Andár lói foór lói kii hātíl asé? **15** Mosih ttu Belial loi kii bonot asé? Imandár ottu gairimandár lói kii bazá asé? **16** Allar gór ot máze muttir kii zaga asé? Kiyólla-hoilé zinda Allar gór toh añára éna; zendilla Alla ye fórmaye, ki hoilé, “Añí ítarar bútoṛe tákiyum edde ítarar bútoṛe solafira goríyum. Añí ítarar Alla óiyum, aar ítara Añr bonda óibo.” **17** Hétolla bouli Mabude fórmay de, “Tuáñra ítarar bútotu neeliaiyó, ítara ttu aladá óizogoi. Honó nafak jiníc no dóijjo, tói Añí tuáñra re kobul goijjúm. **18** Añí tuáñrar Baf óiyum, aar tuáñra Añr futziyáin óiba, hoóir hárr Kudurutwala Kúda ye.”

7 Ó adórja ókkol, añára llói zettót hé waada ókkol gorá giyeh, hétolla aiyó, añára jisím or edde ruhr hárr nafaki ttu nizoré pak-sáf gorí, aar héndilla góri Allar door rákí furafuri pak boni. **2** Añára re tuáñrar dil ot zaga doo. Añára toh no honókiyo re nainsáfi goijjíf, no honókiyo re bigirífélaíyi, aar no honókiyo ttu fáida tuillí. **3** Añí tuáñra re hosúr dí bolla iín hoóir de no. Añí toh tuáñra re age lóti hoiyí, ki hoilé, tuáñra lla añárar dil ot eén zaga asé, moille beggún fúaṇti moijjum, basilé beggún fúaṇti basi táikkum. **4** Añr ttu tuáñrar uore doóñr ekin asé; tuáñra re lói añí

bicí borái gorí fari. Añí tosóllye furaiya óiyi; añárar tamám mosibot ot añr ttu bicí hoilé bicí kúci táke. **5** Añára toh Makedóniyat aái úddwa añárar gaa ye honó cúk nó faa, bólke añára hárr mikká ttu mosibot ot accílám: baáre accíl hoijja-fózzat, bútoṛe accíl door. **6** Montor Alla, zibá ye mon cóñro goré de ítara re tosóllye déh, íba ye Titus or aái lói añára re tosóllye díye; **7** siríf yóggwar aái lói no, bólke yóggwa re tuáñra ze tosóllye díyo híin lói yó. Yóggwa ye añára re zanaíye de, tuáñra añré saító bicí azzu gorór; híine añí aró bicí kúci óiyi. **8** Añí añr ceñrí lói tuáñra re dil ot duk díy de óile yo, añí afsús na hái zodi yaar age afsús háilam de óile yo. Kiyólla-hoilé añí dekir de, ceñrí híyane tuáñra re duk díle yo siríf essát olla díy de. **9** Yala añí kúci de tuáñra re duk díy de hétolla no, bólke etollá kiyólla-hoilé tuáñrar hé duke tuáñra re touwár uzu loigiyé. Kiyólla-hoilé tuáñra re duk díya giyéh de toh Allar moncá mozin éna, zeéne añárar zoriya tuáñrar honó hótí no. **10** Allar moncá mozin aiyé de duk-ferecani ye endilla touwá foida goré ziyáne nejat or uzu loiza, aar híyan ot afsús háibar kessú náí; montor duniyaibi duk-ferecani ye moot foida goré deh. **11** Tuáñra nize soó, Allar díya hé duk-ferecani ye tuáñrar bútoṛe kii-kii foida goijjé: hotó azzu, nizor sófai díbar hotó josba, gollot hórkot ókkol or uore hotó guccá, hotó door, hotó tomonna, hotó jus, edde gollot ham ókkol or sánza dí bolla hotó toiyar. Tuáñra hárr mikká ttu sábut gorí daháiy de, hé mutalek tuáñra behosúr. **12** Añí ceñrí híyan tuáñrar hañse lekíle yo, híyan no zibá ye gollot goijjé yóggwar wasté aar no zibár uore gollot díye yóggwar wasté, bólke etollá, zeéne tuáñra ttu añára lla ze ṭan asé híyan Allar muúntu tuáñrar hañse zahér óizogoi. **13** Añára tosóllye hétolla faiyí deh. Añára tosóllye faiyí de híyan baade yo, Titus or kúciye añára aró bicí kúci óiyi, kiyólla-hoilé tuáñra beggún or torfóttu yóggwar ruh foṭfoiṭṭa óigiyoi. **14** Yóggwar hañse añí tuáñrar baabute borái goijjílám, aar híyan ot añr ttu córminda ówa nó fore. Bólke zendilla tuáñrar hañse añára hárr kessú sóiyi-sóiyi boíyan goijjíf, héndilla Titus or muúntu añára ze borái goijjíf híyan óu sóiyi sábut díye. **15** Tuáñra beggúne yóggwa re keéngori doore edde hafi-hafi estekbal gorí yore yóggwar hotá mainníla, híyan zeñtté yóggwa ttu monot uré, héñtte yóggwa ttu tuáñra lla ador aró bicí barízagoi. **16** Añí bicí kúci, kiyólla-hoilé hárr kessút añí tuáñra re bóraca gorí fari.

8 Ó báiboináin ókkol, añára yala tuáñra re Allar oh rahámot or baabute zanair ziyán Makedóniyat asé de zomát ókkol or uore gorá gýeh, **2** ki hoilé, ítara re duk-mosibot or duara ðoóñr entán gorá zar de októ, ítara eén bicí kúci accíl, zeén níki ítara bicí gorif de úddwa dílkúla góri sótká ókkol goijjíl. **3** Añí yán gobá dí faijjum de ki, ítara zedún faijjé hédun dífl, hoitó sailé, fare de yár túaro bicí dífl, monehoói yore. **4** Ítara añára re bicí hoilé bicí aros goijjé de, Allar pak bonda ókkol ore modot gorár rahámot ot ítara re yó cámil rakí bolla. **5** Ítara siríf añára acá goijjí de yár túaro bicí diiyé de no, bólke age ítara nizoré Malik or hañse gosáidiye, baade Allar moncá mozin nizoré añárar hañse yó gosáidiye. **6** Hétolla añára Titus ore bicí aros goijjí de ki, zendilla yóggwa ye tuáñrar bútoe sótká tulár ham cúru goijjé, héndilla híyan hótom óu gori bolla. **7** Zendilla tuáñra hárr kessút máze, yáni iman ot, hotábattarat, zankarit, fura josbat, edde tuáñra ttu añára lla asé de muhábbot ot uttom óiyo, héndilla tuáñra e sótká diiyar ham ot óu uttom ói bolla saiyo. **8** Añí yán tuáñra re hókum gorír de no, bólke oinno kiyór josba loi tuáñrar muhábbot or ehélasí re entán gorír deh. **9** Kiyólla-hoilé tuáñra toh zano, añárar Malik Isá Mosih ye tuáñrar uore hotó rahámot goijjé, ki hoilé, íba tuangor de óile yo tuáñrar wasté gorif boinné, zeéne íbar gorifiye tuáñra tuangor óizogoi. **10** Hé mosólar uore añr rai dir ziyáne tuáñra re fáida goríbo. Gelde bosór tuáñra siríf sótká diiyat foóila gún accíla de no bólke diito monehowát óu. **11** Yala hé ham hótom gorífelo, zeéne zendilla tuáñra hé ham gorí bolla kúcir sáañte niyot goijjíla, héndilla tuáñrar toófufik mozin híyan zen hótom óu óizagoi. **12** Zodi diibar mon táke, Alla ye manúc íbar sótká re íba ttu asé de hé mozin kobul goré, náí de hé mozin no. **13** Añr kíyal eén no de ki, oinno kiyé cúk fouk aar tuáñra duk foo, bólke beggún or hálot zen borabor ó. **14** Yala zettót tuáñra ttu bicí asé, híin lói ítara zorurot ókkol fura óizayboi; aar fore ítara ttu bicí tákile, híin lói tuáñrar zorurot ókkol óu fura óizayboi. Héndilla góri beggún or hálot borabor óizayboi. **15** Zendilla pak-kalam ot asé, “Zee niki bicí zoma goijjíl ítar ttu bicí ói nó zagoi, aar zee niki hom zoma goijjíl íte yó honó homit nó fore.” **16** Allar cúkur óuk, zibá ye Titus or díl ot oh kíyal foida goijjé ziyán añr ttu tuáñra lla asé. **17** Kiyólla-hoilé yóggwa ye siríf añárar aros ore kobul goijjé de no, bólke nizebaze fáisela gorí bicí jus or sáañte tuáñrar hére aiyér. **18** Añára yóggwar

fúañti báí ubá re yó difeřáir, zibá re kúchóbor or ham olla bouli tamám zomát ókkole taarif goré. **19** Siríf híyan no, bólke íba re zomát ókkole añára e sótká gún loizair de hére fúañti zai bolla basíloiye, ziyán or entezam añára etollá goijjí, zeéne Malik Nizor mohíma ó, aar añára modot goittó toiyar de híyan zahér ó. **20** Añára ham híyan héndilla góri solai loizair de kiyólla-hoilé, zeéne hé bicí sótká gún or mutalek honókiyo ttu añára re hosúr díbar no táke, **21** kiyólla-hoilé añárar niyot toh uúin gorón zín siríf Malik or nozor ot no, bólke maincór nozor ot óu sóiyi. **22** Ítarar fúañti añárar báí ubá re yó difeřáir zibá re añára boóut bar boóut kessút dáf asé de loot faiyí. Yala íbar dáf aró bicí barígíyoi, kiyólla-hoilé íba ttu tuáñrar uore ðoóñr bóraca asé. **23** Titus or baabute hoitó sailé, yóggwa óilde añr sáañti aar añr fúañti tuáñra lla ham-goróya. Aar báiyain nún or baabute hoitó sailé, ítara óilde zomát ókkol or nomainda ókkol, zetarár usílaye Mosihr mohíma ó. **24** Hétolla hoóir, tuáñrar muhábbot or sábut edde tuáñrar baabute añára kiyólla borái gorí de híyan ítara re zomát ókkol or muúntu kúlamela góri daháiyó.

9 Allar pak bonda ókkol olla soler de hé hédmotdarir baabute toh añr ttu tuáñrar hañse lekíbar zorur náí. **2** Kiyólla-hoilé añí zani, tuáñra ttu modot goríbar mon asé, ziyán ore lói añí tuáñrar baabute Makedóniol or hañse eén hoói borái gorí de ki, Akayar manúc ókkole díi bolla gel de bosór lóti toiyar ói táikke, aar tuáñrar josbaye ítara bicí zon ore josba diyé. **3** Lekin añí hé báiyain nún ore etollá difeřáir, zeéne híyan or mutalek añára tuáñra re lói gorí de borái misá no tóore, bólke añí hoíyí de héndilla tuáñra toiyar ói táko. **4** Arnóile añr fúañti Makedóniyar honó manúc aái zodi tuáñra re toiyar loot no faa, héñtte tuáñrar hotá ero, tuáñrar uore hédur bóraca goróne añára úddwa córom faiyum. **5** Hétolla añí báippi de, hé báiyain nún ore age tuáñrar hére zaito aros gorár zorur, zeéne yaar age tuáñra ze aiborhoti hádiya diibar waada goijjíla, híin ítara age lóti entezam gorí raké. Tói híyane daháibo de tuáñra híin bolazuri no bólke monehoói diiyó deh. **6** Hotá óilde, zee niki hom laga, íte hom daibo; aar zee niki bicí laga, íte bicí daibo. **7** Fottíkiye nizor dile-dile fáisela goijjó de mozin diiyó, mon bórgori yáh bolazuri no; kiyólla-hoilé Alla ye toh kúcir sáañte dooya re éna muhábbot goré. **8** Alla tuáñra re ařalikka rahámot gorí faribár

kaabel, zeéne tuáñra ttu hámica hárr kessú kafí táki yore, hárr dǵoilla gom ham olla yó ódorbaára táke. **9** Zendilla pak-kalam ot asé, “íba ye dilkúla góri goríf ókkol ore dan goijjé, íbar forhésdari abadulabad zari tákibo.” (aĩon g165) **10** Zibá ye cacá ókkol ore bis milaide aar hái bolla ruṭi dee, íba ye tuáñra re lagai bolla bis milaidibo edde híin borhot goríbo, aar tuáñrar forhésdarir fósol ókkol bicígori díbo. **11** Tói tuáñra hárr mikká ttu tuangor óiba, zeéne hámica dilkúla góri sótká gorí faro, ziiin or zoriya añárar duara Allar cúkuriya adai ór. **12** Kiyólla-hoilé hé hédmotdarir hame toh siríf Allar pak bonda ókkol or zorurot ókkol furafuri fura ór de no, bólke boóut zon or duara Allar ódorbaára cúkuriya yó adai ór. **13** Kiyólla-hoilé hé hédmotdari lói ziyán sábut óiye híyan or zoriya ítara Allar taarif goríbo, kiyólla-hoilé tuáñra toh Mosihr kúchóbor ore cíkar gorí híyan or fórmadar óiyo, aar ítara re edde oinno beggún ore dilkúla góri sótká goijjó. **14** Alla ye tuáñra re ódorbaára rahámot goijjé de hétolla ítara furanir sáañte tuáñra lla dua goré. **15** Allar cúkur óuk, íbar boiyan gorí fara no zah de hádiya lla.

10 Añí Pául zibár baabute howá zah de, tuáñra llói muámuikka óile fuñda montor gairházir óile aṭok, añí nize tuáñra re Mosihr cídayi edde noromi loi aros gorír. **2** Añí aros gorír de ki, añr ttu zen tuáñrar hére ailé oddúr aṭok ówa no fore zeddúr añr ttu kessú manúc lói ówa foribó bouli ṭáarir, zetará níki añára duniyaibi niyome zindigi haṭair bouli báfe. **3** Kiyólla-hoilé añára duniyait zindigi haṭailé yo toh añára gorí de larái duniyaibi niyome no. **4** Kiyólla-hoilé añárar laráir átiyar toh duniyaibi gún no, montor uúin ziiin ot killa ókkol ore báñgifelai bolla illayi kudurut asé. **5** Añára demaikka buzá re edde hárr uñsol jiníc ziiíne Alla re sinát oñsá ísafe tíya híin ore báñgifelai, aar hárr kíyal ore kobza gorífelai Mosihr fórmadar banai. **6** Aar añára, zeñtté tuáñra furafuri fórmadar óizaybagoi, héñtte hárr nafórmanir sáñza dí bolla toiyar así. **7** Tuáñra toh baár or súrot éna soór. Zodi honókiyo ttu nizor uore endilla bóraca asé de ki yóggwa óilde Mosihr, tóoile yóggwa ye nizor dile-dile abar báfisouk de ki, yóggwa zendilla Mosihr, héndilla añára yó toh Mosihr. **8** Zodi añí añárar adíkarir baabute aró kessú borái gorí yo, toóu añí córminda no óiyum—ze adíkar Malike diiyé de óilde tuáñra re banaitulí bolla, nac gorífelai bolla no. **9** Híyan añí etollá hoóir, zeéne añí

ceñrí lói tuáñra re ḍoor lagair fán no. **10** Kiyólla-hoilé hodúne hoó de, “íbar ceñrí ókkol bicí aṭok edde bicí hora, montor íba zeñtté nize házir táke, héñtte íba komzur aar íbar hotá ókkol gáiyot no góle.” **11** Héndilla manúce yíán buzí louk de ki, gairházirit ceñrí ókkol or sáañte añárar hotá zendilla, borabor héndilla házirir óu goijjúm. **12** Añára toh uitará llói barík kúwalaito yáh nizoré ítara llói fúwan goittó no saái zetará nizor nam nize goré. Ítara nize nizoré mafe de edde nize nizor lloi fúwan goré de híyane dahá de ítara keén obuz. **13** Añára niyom or baáre borái no goijjúm, bólke oh címar héddur goijjúm ziyán Alla ye añára lla buwáye, hé címar bútoe tuáñra yó gólaiya asó. **14** Añára toh niyom or baáre borái gorír de no, zendilla añára tuáñrar hére nu aítám bóuli óito, kiyólla-hoilé Mosihr kúchóbor loi tuáñrar hére foijjonto age añára éna aiccí. **15** Añára oinno zon or meénnot lói yó borái no gorí, héndilla goillé toh címar baáre óizayboi. Lekin añára acá gorír de, zendilla tuáñrar iman barér, héndilla tuáñrar bútoe añárar ham or zaga yó ḍoóñr óizayboi; **16** zeéne tuáñra baade asé de elaka ókkol ot óu kúchóbor tobolik gorí fari, kiyólla-hoilé añára ttu oinno zon or címar bútoe goijjá ham loi borái goittó mon náí. **17** Montor, “Zee níki borái goré, yóggwa ye Mabud ore lói beh borái goróuk.” **18** Kiyólla-hoilé nizor nam nize goillé toh sóiyi bóuli sábut óizagoi de no, bólke Mabude nam goillé éna ó.

11 Añí acá gorír tuáñra añr kessú bekufai re bordac goríba; becók tuáñra bordac gorór óu. **2** Añr ttu tuáñra lla Allar dǵoilla gairot asé; kiyólla-hoilé añí toh tuáñra re ekgwá hócom lói zuragatá gorífelayi, yáni Mosih llói, zeéne añí tuáñra re íbar át ot pak hoinna ísafe tulídi fari. **3** Lekin añí ḍoorair de ki, zendilla háfe nizor saláki lói Háwa re gunát félaiye, héndilla tuáñrar demak ore yó honókiye tuáñra ttu Mosih llói ze imandari edde pak taalukat asé híyan ottu gollot ot loizaybói. **4** Kiyólla-hoilé zodi honókiye aái ar eggwá Isár tobolik goré, zibár baabute añára tobolik nó gorí, yáto zodi tuáñra endilla honó ruh foo zibá tuáñra faiyó de íba llói alok, yáh endilla honó kúchóbor foo ziyán tuáñra kobul goijjó de híyan lói alok, híin toh tuáñra kúcir sáañte bordac goró. **5** Añí toh nizoré hé “barík sáhabi” howá zah de ítarar túaro honó hom no ṭáari. **6** Zodi añí cúndorgori boiyan di no zaniilé yo, elóm or híkka ttu toh añí héndilla no. Híyan toh añára hárr kessút máze furafurir sáañte

tuáñra re daháiyi. 7 Tuáñrar tokka barí bolla añí niróc ói tuáñrar hañse Allar kúchóbor maana tobolik goijjí de híyan kí añí guná goijjí de né? 8 Tuáñrar hédmot gorí bolla bóuli añí oinno zomát ókkol ottu dam goiccí, hoitó sailé ítara re luṭ goijjí. 9 Aar zeñté añí tuáñrar fúañti tákite muútac ot foijjílám, héñtte añí honókiyo lla zulap nó ói, kiyólla-hoilé Makedóniya ttu aiccíl de báiyain núne añr zorurot ókkol furafuri fura goijjíl. Añí hárr kessút nizoré tuáñra lla zulap no ói fán goijjílám, aar héndilla gorát tákiyum óu. 10 Mosihr ze sóiyi añr bútoze asé, añí híyan or hosóm hái hoóir, Akayar elaka ókkol ot añré e borái gorá ttu honókiye bon gorí no faribó. 11 Híyan kiyólla hoóir? Añí tuáñra re muhábbot no gorí de né? Alla ye zane, añí tuáñra re muhábbot gorí. 12 Montor añí ziyán gorír híyan gorát táikkum, zeéne añí uitará re moouka faito no diḥ, zetará añára goijjí de héndilla ham ókkol goijjé hoói borái gorí añára llói borabor óibar moouka tuwar. 13 Kiyólla-hoilé héndilla manúc ítara toḥ misá sáhabi, edde fókkorai góri ham-goróya ókkol, zetará nizoré Mosihr sáhabi ísafe dahái bolla bét dóre. 14 Taajup óibar kessú náí, kiyólla-hoilé Cóitan nize yó toḥ nurani fírista ísafe bét dóre. 15 Hétolla ítár gulam ókkole yó forhésгарir háadem ísafe bét dóre de híyan ḍoóñr hotá no. Ítarar notiza ítatarar ham mozin beh faibo. 16 Añí abar hoóir, añré honókiye bekuf bouli no báippo; montor zodi báfo, tóoile añré ezzon bekuf ísafe óile gosó, zeéne añí yó ekkaná borái gorí fari. 17 Asóle yala añí héndilla boráir ekine zín hoóir, híin Malik or mozin no bólke ezzon bekuf or ḍóilla góri hoóir deh. 18 Boóut zone zettót duniyaibi mozin borái gorér, añí yó borái goijjím. 19 Kiyólla-hoilé tuáñra toḥ giyani ói bekuf ókkol ore kúcir sáañte bordac goró. 20 Siríf híyan no, zodi honókiye tuáñra re gulam banailé, tuáñra re dónco gorífelaile, tuáñra ttu fáida tulíle, nizoré nize barík kúwalaile, yáh tuáñra re gal sái suwar maille, tuáñra híin óu toḥ bordac goró. 21 Añí córmindar sáañte yáin kobul háir de ki, añára híin gorá ttu bicí komzur accílám. Montor oinno kiyór ttu ze baabute borái goríbar hímmot asé—ezzon bekuf or ḍóilla góri hoiyúm hoilé—añr ttu yó hé baabute borái goríbar hímmot asé. 22 Ítara Hibrani de né? Añí yó toḥ héndilla. Ítara Isráili de né? Añí yó toḥ héndilla. Ítara Ibrahim or nosól de né? Añí yó toḥ héndilla. 23 Ítara Mosihr háadem de né?—Ezzon fool or ḍóilla góri hoiyúm hoilé—añí toḥ aró bicí: bicí meénnot gorát óu, ziyól ḥarát óu, háñdai fíra hát óu,

aar barbár moot loi mukabela ówat óu. 24 Yohúdi ókkol ottu añí ek hom salic cwar dóre fañs bar dura háiyi. 25 Tin bar añí ḍaṇḍa loi fíra háiyi, ekbar fattór mara háiyi; tin bar foijjonto añí zair de zaáñs báñgi ḍufígilgoi, aar añr ttu doijjat mazé ek rait ek din ḥara foijjé de asé. 26 Añr egazá sofór ot añí boóut ḍóilla hótara ókkol ot foijjílám: hál or hótarat, ḍahañit or hótarat, nizor koumi maincór hótarat, Beyohúdi ókkol or hótarat, cóor or hótarat, moidan elakar hótarat, doijjar hótarat, edde misá báiyain dor hótarat. 27 Añí bicí meénnot edde duk ókkol goijjí, aar boóut rait urgúma ḥaraiyí de asé. Añí búk tiráce duk faiyí, aar egazá-egazá waácca táikki de asé. Añí cíte edde hoorsuore yó duk faiyí. 28 Argún or hotá ero, tamám zomát ókkol olla asé de sintabáfani ye añré fottí din dabat táke. 29 Hone komzur óile añí komzur no ói de asé? Haré gunát félaile añr bútoze no fure de asé? 30 Zodi borái goríbar zorur ó, añí uúin lói borái goríyum zín añr komzuri loi bazá asé. 31 Malik Isár Alla edde Baf, zibár taarif abadulabad ówat tákibo, íba ye zane añí misá hotá hoóir de no. (aiñ g165) 32 Damáskas ot máze, añré gereftar gorí bolla bóuli baáñcca Aritas or hákime Damáskas cóor ore faára dí raikkíl. 33 Montor añré eggwá lai ot góri ḍebal or ekkán zanála báy nise lamaidiya gyíl, tói añí yóggwar át ottu basigiyoigi.

12 Añr ttu borái gorár zorur, fáida no tákile yo.

Montor yala añí Malik or diiya dorcón edde zahéri ókkol or baabute hoiyúm. 2 Añí Mosihr bútoze ezzon manúc ore siní de asé, zibá re yaar soiddó bosór age tisára asman ot tulá gyíl. Híyan jisím or sáañte óiye ne yáh jisím sára óiye añí no zani, Alla ye beh zane. 3 Añí zani de, hé manúc íba re—híyan jisím or sáañte óiye né yáh jisím sára óiye añí no zani, montor Alla ye zane— 4 jonnotul-férodus ot tulá gyíl, aar íba ye boiyan gorí fara no zah de héndilla hotá ókkol fúinnil, zín honó maincór ttu boiyan goittó ezazot náí. 5 Héndilla manúc ore lói añí borái goijjím, montor nizoré lói no. Añí borái goijjím de óilde añr komzuri ókkol or baabute. 6 Zodi añr ttu borái goittó monehoó yo añí bekuf no óiyum, kiyólla-hoilé añí sóiyi gán beh hoiyúm. Montor toóu añí híyan no goijjím, zeéne honókiye añré añr ttu zín deikké yáh fúinne yár túaro bicí bóuli no ṭáare. 7 Hé zahéri híin or oti ḍoóñrgiri lói añí barík no kúwalai fán añr gaat eggwá keñra gólai díya gíyeh; yíba óilde añré duk di bolla Cóitan or eggwá usíla, zeéne añré añí barík

no kúwalai. **8** Híyan or baabute añí Malik or hañse tin bar fóriyat goijjílám, zeéne hé keñra wa añr ttu dur óizagoi. **9** Montor íba ye añré hoíyé de, “Añr rahámot tor lla káfi, kiyólla-hoilé Añr kudurut or moksót komzurit mazé furafuri fura óizagoi.” Híyan olla añí bicí kúcir sáañte añr komzuri ókkol or baabute beh borái goijjúm, zeéne Mosihr kudurut añr bútoze zari táke. **10** Hétolla toh añí Mosihr wasté komzurit, beizzotit, ferecanit, zulúm ot, edde mockil ókkol ot máze kúci. Kiyólla-hoilé zeñtté añí komzur ói, héñtte añí mozbut óizaygoi. **11** Añí bekuf óigiyigoi de ói, montor tuáñra éna añré mojburi goijjó. Asóle tuáñrar torfóttu añr ttu nam foon accíl, kiyólla-hoilé añí kessú no de óile yo toh “barík sáhabi” howá zah de ítarar túaro honó mikká ttu hom no. **12** Becók, tuáñrar hañse toh furafuri sobór or sáañte illayi-nicán, taajuippa harhána, edde keramot ókkol or duara sóiyi sáhabir foriso diya giyé. **13** Añí tuáñra lla fuñzá nó ói de híyan bade tuáñra ar hon mikká ttu oinno zomát ókkol or túaro hom óiyo dé? Añr hé gollot tán maf goró! **14** Añí e tisárabar óu tuáñrar hére ai bolla toiyar así, aar añí tuáñra lla fuñzá no óiyum; kiyólla-hoilé añí tuáñrar honó kessú saáir de no bólke tuáñra re saáir deh. Kiyólla-hoilé bafmaa lla zoma goríbar zimma fuain dor ttu náí, montor bafmaa ttu fuain dor lla asé. **15** Añí bicí kúcir sáañte tuáñra lla añr hárr kessú hórós gorífelaiyum, bólke nizoré úddwa. Añí toh tuáñra re bicí muhábbot gorí, tuáñra kiyá añré hom muhábbot goró? **16** Zeén óibo óuk, añí toh tuáñra lla fuñza nó ói. Montor toóu hodúne hoó de, añí bóle saláki góri tuáñra re fán ot félaiyi. **17** Añí kí tuáñrar hére diferáiyi de ítara honókiyor duara tuáñra ttu fáida tuillí de né? **18** Añí Titus ore tuáñrar hére zai bolla aros goijjílám, aar yóggwar fúañti báí wa re yó diferáilám. Tituse kí tuáñra ttu fáida tuillé de né? Añára duní zon kí ekí ruhye edde ekí rastat no soli né? **19** Tuáñra aijjó foijjonto añára tuáñrar hañse gom kúwalair bóuli táaror niki? Añára ziín hoóir híin Mosihr ummot ísafe Alla re muúntu gorí hoóir deh. Ó adorda ókkol, híin beggún óilde tuáñra re banaitulí bolla. **20** Kiyólla-hoilé añí dloorair de, añí ailé tuáñra re zendilla saitó saáir héndilla loot no faiyum bóuli, aar tuáñra yó añré zendilla saitó soór héndilla loot no faiba. Añí hére iín loot faiyum bouli dloorair: hoijja-fózzat, alingañi, rakaraki, siríf nizor fáida tuwa, bodnami, gifot, tukabbori, edde gulmal ókkol. **21** Añí aró dloorair de ki, añí abar ailé añr Alla

ye añré tuáñrar muúntu córminda ówa baibó, aar añr ttu boóut zon uitará lla afsús gorá foribó zetará yaar age guná goijjíl aar nize goittó de nafaki, zenákari, edde bodmaci ttu touwá gorí nó fela.

13 Añí tuáñrar hére aiyír de ebar óilde tisárabar. Pak-kalam ot zendilla asé, “Ze honó maamela dui zon yáh tin zon gobár zobane sóiyi bouli sábut óibo.” **2** Dusárabar añí tuáñrar fúañti tákite age zendilla hoóilám, héndilla yár age guná goijjíl de ítara re edde baki beggún ore yala gairházirit óu añí age lóti hoóí rakír, añí abar ailé, honókiyo re bad no diyum; **3** kiyólla-hoilé tuáñra toh Mosih ye añr duara hotá hoó de híyan or dolil soór. Íba tuáñrar híkka komzur de no, bólke tuáñrar bútoze íba taakotwala. **4** Kiyólla-hoilé íba re komzur hálote kúruc ot dí mariféla giyé de óile yo, íba toh Allar kudurute zinda asé. Becók, añára yó íbar bútoze komzur, montor toóu tuáñrar wasté Allar ze kudurut asé híyan or zoriya añára ílar fúañti zinda tákiyum. **5** Tuáñra iman ot asó né náí nizoré entán gorí soó; nizoré tahákít goró. Isá Mosih tuáñrar bútoze asé de híyan kí tuáñra no zano? Arnóile toh tuáñra nakaabel tóorigiyogoi. **6** Aar añí acá gorír de añára nakaabel nó tóori de híyan tuáñra zanibá. **7** Añára Allar hañse dua gorí de, tuáñra zen honó hóraf ham no goró; híyan etollá no de ki zeéne añára kaabel ísafe dahá zay, bólke zodi añára nakaabel ísafe dahá zaylé yo tuáñra zen sóiyi gán goró. **8** Kiyólla-hoilé añára ttu toh sóiyir ulđa kessú gorí faribár náí, montor sóiyir cúlđa óile asé. **9** Zeñtté añára komzur óile yo tuáñra mozbut ó, héñtte añára kúci. Añára yíán óu dua gorí de ki, tuáñra zen balok óizogoi. **10** Hétolla bóuli toh añí gairházirit tákite edún iín lekír, zeéne házir táki de októť añr ttu adíkar estemal gorí aťok ówa no fore, ziyán Malike añré diiyé de óilde banaitulí bolla, bāñgifelai bolla no. **11** Ahérit hoóir, ó báiboináin ókkol, kúci goró, tuáñrar foñt tík goró, josba doh, ek mon ó, cántit táko. Muhábbot or edde cántir Alla tuáñrar fúañti tákibo. **12** Ezzon ore ezzone pak dile appá dí sólam zano. **13** Tamám pak bonda ókkole tuáñra re sólam zanar. **14** Malik Isá Mosihr rahámot, Allar muhábbot, edde Pak-Ruhr taalukat tuáñra beggún or fúañti zari tákouk.

Galatiól

1 Añí Pául, eggwá sáhabi. Añí e sáhabigiri honó ðaáir torfóttu yáh honó ezzon or torfóttu faiyí de no, bólke Isá Mosihr torfóttu edde Baf Alla, zibá ye íba re mora ttu zinda goijjé íbar torfóttu faiyí deh. **2** Añí edde añr fúañti asé de imandár báiboináin beggúne, Mosihr ze zomát ókkol Galatíyat asé híin or hañse lekír. **3** Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **4** Añára re toh e hóraf zobana ttu basai bolla hé Mosih ye añárar Baf Allar moncá mozin añárar guná lla Nizor zan diyé. (aiññ g165) **5** Abadulabad Allar taarif ówat tákouk. Aamin. (aiññ g165) **6** Añí bicí taajup óiyi, kiyólla-hoilé Zibá ye tuáñra re Mosihr rahámote ðaikké íba re tuáñra bicí hára sári, arek ðoilla kúchóbor or híkka zoórgoi. **7** Asóle kúchóbor arek ðoilla náí. Toóu endilla hodún manúc asé zetará tuáñra re oulzóul ot félaider, aar Mosihr kúchóbor bodoli félaito sár. **8** Montor ze kúchóbor añára tuáñrar hañse tobolik goijjé, hé kúchóbor or ulða zodi honókiye tuáñrar hañse arek ðoilla kúchóbor tobolik goré, híyan añára nize gorí yáh asman or honó fírista ye goré, yóggwar uore gozzob forouk. **9** Añára age zendilla hoóilam héndilla ehón óu hoóir, zodi honókiye tuáñra kobul goijjé de hé kúchóbor or ulða arek ðoilla kúchóbor tuáñrar hañse tobolik goré, yóggwar uore gozzob forouk. **10** Híyan hoói añí har taarif faito saáir deh, insán or né náki Allar? Aar náki añí maincóre kúci gorí bolla saáir de? Zodi añí aijjó foijjonto maincóre kúci goittó saitám, añí Mosihr gulam no óitam. **11** Báiboináin ókkol, añí tuáñra re yíán zanaidír, ze kúchóbor añí tobolik goijjé híyan insán or banaouti no, **12** kiyólla-hoilé añí toh híyan no honó insán or torfóttu faiyí, aar no honókiye añré cíkaiye, bólke Isá Mosih Nize híyan añr hañse zahér goijjé deh. **13** Tuáñra de fúinno, ek hale añí Yohúdir dórmot táite añár solasol hondilla accíl, Allar zomát ore añí hotó zulúm goijjílám edde híyan ore dónco gorífelaito saáilam, **14** aar Yohúdi dórmó manat añí añr boccá Yohúdi ókkol or túaro uore accílám, aar añr dada-bafdadar rosóm ókkol olla añár ttu ódorbaára jus accíl. **15** Lekin Alla ye añré añr maar feřot tákite lóti háas gorí raikkíl edde Nizor rahámote ðaikkíl. Zeñtté íba ttu fosón laiggé **16** íbar Fua re añr hañse zahér gorí bolla, zeéne añí Beyohúdi ókkol or hañse hé Fua re kúchóbor ísafe tobolik gorí, héñtte añí honó insán ottu mocuwara nó

lóí, **17** aar zetará añr age lóti sáhabi asé, ítara llóí milto Jerúsalem ot óu nó zai, bólke Arob dec ot giřlamboi, yárbaade abar Damáskas cóor ot waafes aiccílám. **18** Tarfore tin bosór baade, Kéfas lóí milto añí Jerúsalem ot giřlam, aar íbar fúañti hére fundóro din táikkilam; **19** montor sáhabi gún ottu ar honó sáhabi lóí mili nó fari. Hére añí Malik or báí Yakub loi yó millílám. **20** Añí Alla re muúntu gorí hoóir, añí tuáñrar hañse ziín lekír híin misá no. **21** Baade añí Siíriyar edde Kilicíya elaka ókkol ot giřlam. **22** Héñtte Yohúdiya elakat ze zomát ókkol Mosihr bútoze asé híine añré muk siná no sintó. **23** Ítara siríf fúinto de, “Age ze manúc cwa ye añára re zulúm goittó, íba ye yala iman waán or tobolik gorér ziyán ore íba ye foóila dónco gorífelaito saáil.” **24** Baade ítara añr zoriya Allar taarif goittó.

2 Soiddó bosór baade, Bárnabas ore looi añí abar Jerúsalem ot giřlam. Titus ore yó fúañti looi giřlam. **2** Añr ttu hére zaa foribó bóuli añr hañse zahér goijjé de hétolla añí giřlam. Beyohúdi ókkol or hañse añí ze kúchóbor tobolik gorí híyan or baabute añí hériyar ðaiñoónr ókkol ore eggwá síra boiřók ot buzáilam, kiyólla-hoilé añí nó saái de, añí gorír de meénnot yáh goijjílám de meénnot befózul óuk. **3** Lekin añr fúañti accíl de Titus ezzon Beyohúdi de óile yo, íba re ázomi gorí bolla bolazuri gorá nó zah. **4** Hé mosóla gán uittíl de kiyólla-hoilé, kessú báiyain de imandár kúwalai añára ttu Mosih Isár bútoze ze azadi asé híyan or zankari hásil gorí bolla gurinda ísafe añárar bútoze góillil, zeéne ítara añára re gulam banai fare. **5** Montor añára ítarar hotá essát olla úddwa mani nó lóí, zeéne kúchóbor or sóiyi tuáñra lla țiki táke. **6** Lekin zetará re ðaiñoónr bóuli mana zah, ítara úddwa añí tobolik gorí de kúchóbor or baabute honó noya mocuwara di nó fare. Asóle ítara ziín accíl óibo óuk, añr ttu honó forók náí. Alla ye toh ektorřía no goré. **7** Bólke ítara deikké de, Alla ye añré Beyohúdi ókkol or hañse kúchóbor tobolik goríbar zimma diiyé, zendilla Fitor ore Yohúdi ókkol or hañse goríbar diiyé. **8** Kiyólla-hoilé ze Alla ye Fitor ore ázomi goijjé ókkol or hañse sáhabi banai ham goijjé, hé Alla ye beh añré yó Beyohúdi ókkol or hañse sáhabi banai ham goijjé deh. **9** Yakub, Kéfas, edde Yohánna re toh zomát or țúni bouli mana zah. Zettót ítara añré diiya giyéh de rahámot or baabute zainné, añr lóí edde Bárnabas lóí búng bañdi bolla át milaiyé. Ítara razi óiye de, añára Beyohúdi ókkol or hañse zai tobolik goijjúm, aar ítara ázomi goijjé gún

or hañse zai goríbo. **10** Ítara añára re siríf hoóil de, gorif ókkol ore modot goittó no foóraitó, ziyán gorí bolla añr ttu yó age lóti bicí mon accíl. **11** Montor Kéfas zeñtté Entiyok ot aiccé, añí íbar cáikkacíkkít íbar ulda tíyayi, kiyólla-hoilé íba hosúrbon tóoiije, **12** ki hoilé, Yakub or héntu hoozzon manúc aibár age, íba ye Beyohúdi ókkol or fúañti hána háito; montor ítara aiccé rár, íba ye Beyohúdi ókkol ottu síra ói alok gorí táikkil, kiyólla-hoilé íba ye ázomi goijja dol ore dooraiyé. **13** Baki imandár Yohúdi ókkol óu íbar hé munafékit bóng óiye, zeén níki Bárnabas úddwa ítarar munafékit forigílgoi. **14** Montor zehón añí ítara kúchóbor or sóiyit no soler de deikkí, añí beggún or muúntu Kéfas ore hoijí de, “Tuñí toh Yohúdi, lekin tuñí de Yohúdir dóilla no ói Beyohúdir dóilla solafira gorór. Tói tuñí kéngori Beyohúdi ókkol ore Yohúdir dóilla solafira gorí bolla bolazuri gorór?” **15** Añára de zormo ttu lóti Yohúdi; añára toh gunágar howá zah de Beyohúdi ókkol or feřot ttu óiye de no. **16** Montor añára zani de, Mosih Isár uore iman aníle manúc forhészgar tóore, Córíyot amól goillé no. Hétolla toh añára nize yó Mosih Isár uore iman ainní, zeéne Córíyot amól gorí no bólke Mosihr uore iman aní añára forhészgar tóori fari, kiyólla-hoilé córiyot or amóle honó manúc forhészgar no tóoribo. **17** Lekin Mosihr duara forhészgar tóoribar kucic goitté-goitté zodi añára nize yó gunágar sábut óizaygoi, híyan or maáni kí Mosih gunár háadem? Bilkúl no! **18** Kiyólla-hoilé ziyán añí nize bāngifelaiyi híyan zodi abar banai, tóoile toh añí nizoré nize hosúrbon tóorair deh. **19** Añí Córíyot or duara Córíyot ottu morigiyígoi, zeéne añí Alla lla basi táki fari. **20** Añré Mosihr fúañti kúruc ot tákí mariféla gíyeh; yala añí ar zinda náí, añr bútoe Mosih zinda asé deh. Añí ehón e jisím lói ze zindigi hařair híyan Allar Fuar uore iman rakí beh hařair, zibá ye añré muhábbot gorí añr lla bóuli Nizor zan diyé. **21** Añí Allar rahámot ore inkar no gorí, kiyólla-hoilé Córíyot or duara manúc forhészgar tóori fare de óile, Mosih toh hánnak moijjíl.

3 Ó obuz Galatiól! Tuáñra re hone jadu goijjé? Isá Mosih re kúruc ot dí mariféla gíyeh de híyan toh nizor suké deikkó fāngori tuáñra re sáf-sáf góri buzá gíyeh. **2** Añí tuáñra ttu siríf yían zainto saáir: tuáñra Pak-Ruh faiyó de Córíyot amól gorí né, náki fúinno de hé kúchóbor or uore iman aní? **3** Tuáñra endilla obuz kiyá? Tuáñra ziyán Ruhr usílaye cúru goijjé,

híyan ehón jisíme furussat goittó soór de níki? **4** Tuáñra kí edún duk hánnak faiyó de? Hánnak no de no né? **5** Tói añr súwal óilde, Alla zibá ye tuáñra re Pak-Ruh diiyé edde tuáñrar bútoe keramoti ókkol goré, íba ye híin tuáñra Córíyot amól goróne goré de né, náki kúchóbor fúni iman ainnó de hétolla goré de? **6** Ibrahim or baabute báfiso, “Yóggwa ye Allar uore iman raikkíl, hétolla yóggwa re forhészgar bóuli gona gyíl.” **7** Hétolla yían zani rakó de ki, zetará ttu iman asé, siríf ítara óilde Ibrahim or asól nosól. **8** Pak-kalam ot toh age lóti endilla asé, iman or zoriya Alla ye Beyohúdi ókkol ore forhészgar bóuli kobul goríbo. Hétolla Alla ye Ibrahim ore e kúchóbor yían age lóti zanaidíl, ki hoilé, “Tuáñr duara tamám koum ókkole rahámot faibo.” **9** Hé ísafe, zetará ttu iman asé ítara yó iman ola Ibrahimé faiyé de hé rahámot faibo. **10** Zetará Córíyot amól gorár uore bóraca goré, ítara beggún gozzob or tole asé, kiyólla-hoilé pak-kalam ot endilla asé, “Uitará hárr ekzon gozzob or tole asé zetará Córíyot or Kitab ot leikká asé de corót beggún amól gorát no táke.” **11** E hotá sáf zahér de ki, Córíyot lói honó manúc Allar nozor ot forhészgar no tóore, kiyólla-hoilé pak-kalam ot endilla asé, “Forhészgar manúc imane beh basi tákibo.” **12** Zeén óibo óuk, iman loi Córíyot or honó bazá náí bólke pak-kalam ot asé de, “Zee níki Córíyot or hókum ókkol mane, íte híine basi tákibo.” **13** Córíyot amól no gorár zoriya añárar uore ze gozzob accíl, hé gozzob ore Mosih ye nizor uore looi añára re azad goijjé. Pak-kalam ot endilla asé, “Zaré-zaré gas or uore t́aka zah, ítara beggún gozzob or tole.” **14** Íba ye añára re etollá azad goijjé, zeéne ze rahámot Ibrahim ore diiya gíyéh híyan Mosih Isár duara Beyohúdi ókkole yó faa, tói baade añára zen waada goijjá Pak-Ruh re imane hásil gorí. **15** Báiboináin ókkol, añí tuáñra re insáni zindigi ttu ekkán meésal dí buzái: zeñtté dui zon manúce honó kessút razi ói razinama gorífela, híyan ore honókiye baatel gorí no fare, aar híyan ot kessú barái yó no fare. **16** Borabor héndilla, Alla ye Ibrahim ore edde yóggwar Nosól ore hé waada dífl. Pak-kalam ot endilla náí de ki, “Nosól ókkol lói,” ziyán or maáni bicí manúc, bólke “Tuáñr Nosól lói,” maáni ekzon loi, íba óilde Mosih. **17** Añí hoitám saáir de, Alla ye Ibrahim lói ekkán razinama gorí waada goijjíl de ki, híyan ore t́ikai rakíbo. Ze Córíyot sair có tiríc bosór baade diiya gíyéh híyane hé razinama re bāngi Allar waada re baatel gorífelai no faribó. **18** Kiyólla-hoilé Córíyote

zodi miras faa zah, tóoile toh híyan waadaye faa zah de no, montor Alla ye toh Ibrahim ore híyan waadar zoriya éna dífl. **19** Tóoile Córíyot kiyólla díló? Córíyot dífl de nafórmanir zoriya, zeéne híyan Nosól ubá nú aiyé foijjonto ñiki táke zibár waada gorá gýl. Alla ye hé Córíyot fírista ókkol or duara ekzon usílar hañse dífl. **20** Lekin ekzon olla óile toh usíla no lage; aar Alla asé de ek. **21** Héen óile Córíyot kí Allar waada ókkol or ulða? Bilkúl no! Kiyólla-hoilé zodi endilla ekkán córíyot diiya zayto ziyáne zibon dii fare, tóoile híyan or duara forhésgar ñóori faitto. **22** Montor Pak-kalame fura duniyai re gunár kobzat gólaí raikké, zeéne ziyán or waada gorá gýl híyan zetará Isá Mosihr uore iman ané ítara hé imane hásil goré. **23** Montor iman aibár age, añára re Córíyot or tole bon raká gýl. Hére añára re otódin foijjonto bon gorí raká gýl zetódin iman waán zahér nó ziyán zahér óibar accíl. **24** Hétolla Mosih nú aiyé foijjonto Córíyot añárar zimmadar accíl, zeéne añára imane forhésgar ñóori. **25** Montor yala de hé iman aiccé, añára ar zimmadar or tole no. **26** Mosih Isár uore iman anóne tuáñra beggún toh Allar fuain óigiyogoi. **27** Kiyólla-hoilé tuáñra beggún zetará bápñismar duara Mosih llói ek óiyo, tuáñra Mosihr dóilla óigiyogoi. **28** Hétolla bóuli Yohúdi edde Beyohúdir maze, gulam edde begulam or maze, morotfuain edde mayafuain dor maze honó forók náí, kiyólla-hoilé Mosih Isár uore iman anóne tuáñra beggún toh ek óigiyogoi. **29** Tuáñra Mosihr óigiyogoi de óile, tuáñra toh Ibrahim or asól nosól, aar Alla ye íba re zín or waada goijjé híin or mirasdár.

4 Añí hoitám saáir de, miras faibo de fua zetódin nabalok táke, íte baf or jiníc beggún or malik de óile yo ítar lói gulam loi honó forók no táke, **2** bólke bafe ñík gorí raikké de boc nó óiyo foijjonto ítar ttu sóonloyar edde zimmadar or tole táka fore. **3** Héndilla añára yó, zeñtté añára ruúhanit nabalok accílam, añára duniyai hókumot goré de búť-ferot ókkol or gulamit accílam. **4** Lekin zeñtté sóiyi októ furafuri aáigiyoi, Alla ye Nizor Fua re díferáiyé, Zibá ekgwá mayafua ttu zormo óoil aar Córíyot or tole zindigi hařaáil, **5** zeéne zetará Córíyot or tole asé ítara re íba ye azad gorí fare, aar añára Allar fuain óizaygoi. **6** Tuáñra Allar fuain de hétolla, Alla ye Nizor Fuar Ruh añárar díl ot díferáiyé, zibá ye níki Alla re, “Abba” yáni “Baf” hoi đahaba. **7** Hétolla yala tuáñra ar gulam no bólke fuain. Tuáñra zettót fuain, Alla ttu Nizor

fuain dore zín diibar asé híin beggún tuáñra re diibo. **8** Yaar age zeñtté tuáñra Alla re no síníta, tuáñra uúin or gulam accíla zín asóle sóiyi Kúda no. **9** Montor yala toh tuáñra Alla re sínó, yáto Alla ye tuáñra re síné. Tói tuáñra kiyólla hé komzur edde behazor búť-ferot ókkol or uzu fíri zaito soór? Tuáñra ttu hómo abar ítarar gulamit óito monehoór né? **10** Tuáñra toh háas-háas díin ókkol, mac ókkol, moósum ókkol, edde bosór ókkol falon goró. **11** Añí đoorair de ki, añí tuáñra lla ze meénnot goijjé híin hómo cár no óibo ne. **12** Ó báiboináin ókkol, añí tuáñra re becábicí aros gorí hoóir, tuáñra añr dóilla ó, kiyólla-hoilé añí yó tuáñrar dóilla óiyi. Tuáñra añr honó hótí nó goró. **13** Tuáñra toh zano, añr ttu gaat ocúk óiye de hétolla bóuli añí tuáñrar hañse foóila bar kúchóbor tobolik goríbar mouka faáilam. **14** Añr gaar ocúk or zoriya tuáñra bicí duk faáila, montor toóu tuáñra añré hékarot yáh inkar nó goró, bólke añré endilla gori kobul goijjéla zeén níki añí éggwa Allar fírista yáh Mosih Isá Nize. **15** Héñtte de tuáñra bicí kúci accíla, montor yala hé kúci hořé giyyói? Añí nize gobá dí faijyum de ki, héñtte tuáñra faitta bouli nizor suk kún úddwa neelai añré díifélaíta. **16** Montor añí tuáñrar duccon óigiyogoi de tuáñra re sóiyi gán hoiyí de hétolla né? **17** Hé manúc ókkole tuáñra llói dustí gorí bolla bicí saár, montor bála niyote no. Ítara ttu monehoór de, tuáñra re añr ttu alok goittó, zeéne tuáñra ítarar híkka óizogoi. **18** Dustí gorí bolla soón bála zodi bála niyot táke, montor siríf añí tuáñrar fúañti táki de októť no bólke hé niyot hámica tákon sáa. **19** Añr adorja fuain ókkol, fua hálas óibarcot maa ye zendilla duk faa, héndilla duk añí abar tuáñra lla bouli fair, híin añí otódin foijjonto faat tákiyum zetódin tuáñrar búťore Mosihr fíťorot boni nó zagoi. **20** Añr ttu monehoór de, tuáñra llói cáikkacákkít řanđa mezase hotá hoi bolla, kiyólla-hoilé tuáñrar baabute añí kessú buzí no farir. **21** Tuáñra zetará ttu Córíyot or tole tákito monehoór, Córíyote kii hoó de híyan tuáñra zano né? Añré hoósai. **22** Hére toh endilla leikká asé, Ibrahim ottu duwá fua accíl; ekgwá óiye de bañdi ttu, ar ekgwá óiye de bañdi no de híba ttu. **23** Fua zibá bañdi ttu zormo óiye íba jisím or niyom mozin óiye deh; montor zibá bañdi no de mayafua ttu zormo óiye, íba Allar waada mozin beh óiye. **24** Hé hotá híin ot búťorgwa maáni asé: hé duní mayafua óilde Allar duiyán razinama. Kuúťor Faár or uore gorá gýl de hé razinama óilde Házara, híba ttu zetará zormo ó, ítara beggún gulamit zormo ó. **25**

E Házara óilde Arob dec ot asé de Kuútor Faár; híba yalar Jerúsalem cóor lói ek ðoilla, kiyólla-hoilé hé cóor edde hé cóor or manúc ókkol beggún gulamit asé. **26** Montor bañdi no de mayafua loi asmani Jerúsalem cóor gán lói ek ðoilla, aar hé cóor toh añárar maa. **27** Pak-kalam ot endilla asé, “Kúci gór, ó báz mayafua, tui zibá ttu honó fuain nó óiyo. Guzori-guzori kúci zahér gór, tui zibá ye fuain hálas ówar duk nó fos; kiyólla-hoilé fiṭḍifélayi mayafua ttu hócom ola mayafuar túaro bicí fuain óibo.” **28** Ó báiboináin ókkol, Isahák or ðóilla tuáñra yó Allar waada mozin zormo óiyo de fuain. **29** Montor hé októf fua zibá jisím or niyom mozin zormo óiye, íba ye fua zibá Allar Ruhr waada mozin zormo óiye íba re zalaitó. Héndilla yala yó ór. **30** Montor Pak-kalam ot hondilla asé? Hére asé de, “Bañdi wa re edde híbar fua wa re neelaido, kiyólla-hoilé bañdir fua honódin bañdi no de híbar fuar fúañti miras or bági ói no faribó.” **31** Hétolla, ó báiboináin ókkol, añára bañdir fuain no bólke bañdi no de híbar fuain.

5 Mosih ye toh añára re azad táki fari bolla éna azad goijjé. Hétolla mozbut táko aar nizor hañd ot abar gulamir zuañl diito no diyo. **2** Fúno! Añí Páule tuáñra re hoóir, zodi tuáñra nizoré ázomi gorábo, tuáñra lla Mosih honó kimot no. **3** Honó manúc zee niki nizoré ázomi gorá báye ítar hañse añí yáñ abar hoóir, ítar ttu tamám Córíyot amól gorár fóros. **4** Tuáñra zetará Córíyot amól gorí forhésгар tóoitto soór, tuáñra Mosih ttu alok óigiyogoi aar rahámot faa ttu duré óigiyogoi. **5** Montor añára toh Ruhr duara imane acá waán or kúb entezar ot así, ziyán óilde, añára re forhésгар bóuli kobul gorá zaybo. **6** Kiyólla-hoilé Mosih Isár ummot ókkol olla ázomi gorón or no gorón or honó kimot náí, montor iman tákon beh bicí zoruri, ziyáne muhábbot or duara ham goré. **7** Tuáñra toh bálagori solat accíla; tói sóiyi gán amól gorá ttu tuáñra re hone oónicce? **8** Becók, tuáñra re ziyán hoói bíraifelaiye, híyan Ubár torfóttu aiccé de no Zibá ye tuáñra re ðake. **9** “Ekkiní góri cútare toh fura hañi or dola fúlaifele.” **10** Montor tuáñrar baabute añr ttu Malik or uore ekin asé de ki, tuáñra arek ðoilla cíkka kobul no goríba. Tuáñra re zee niki alabúlat félaider, íte zee óibo óuk, íte sánza fai zaybo. **11** Ó báiboináin ókkol, añr baabute hoitó sailé, zodi añí aijjó endilla tobolik gorí, ázomi gorár zorur; tóoile añí aijjó kiyá zulúm fair? Héen óile toh kúruc or bazá

dur óigiyoi. **12** Zetará tuáñra re ferecan gorér, ítara nizoré háñci goráifelaito bouli ebbere gom óito. **13** Ó báiboináin ókkol, tuáñra re toh azad ói bolla éna ðaha gíyéh; tuáñrar hé azadi re tuáñrar jisím olla mouka ísafe estemal no goijjó, yárbodol muhábbote ezzon ore ezzone hédmot goró. **14** Kiyólla-hoilé tamám Córíyot e ekkán hókum ot gólaiya asé, “Atehañsór maincóre nizor ðóilla muhábbot goríba.” **15** Lekin zodi tuáñra hoñrahoñri di ezzon ore ezzone hótí goró, úñciyar! Arnóile tuáñra ezzon ore ezzone fúraifelaiba. **16** Añí hoóir de ki hoilé, Pak-Ruhr hédaiyote solo, tói tuáñra jisími moncá ókkol fura no goríba. **17** Kiyólla-hoilé jisími moncá ókkol toh Ruhr moncár ulða, aar Ruhr moncá ókkol jisími moncár ulða. Híin ekgún or ulða ekgún, hétolla bóuli tuáñra nizor ttu ziyán goittó monehoó híyan no goijjó. **18** Montor zodi tuáñra Ruhr hédaiyote solo, tuáñra Córíyot or tole no. **19** Jisími ham ókkol sáf zahér, híin óilde, zenákari, nafaki, bodmaci, **20** mutti fuñza, jadugari, ducconi, hoijja, ric, guccá, baná nizor fáida tuwa, obonaboni, faáta-faáti, **21** háSOROT, nicábazi, nicá hái fúrutí gorá, héndilla aró boóut asé. Híin or baabute añí tuáñra re yaar age úñciyari dílam, aar héndilla abar óu dir de ki, zetará híin goré ítara Allar raijjo miras no faibo. **22** Montor ze gulagala Pak-Ruh ye dóraba híin óilde, muhábbot, kúci, cánti, sobór, meérbani, bálai, imandari, **23** noromi, edde nizoré sóoñlon. Ín or hélaf honó niyom-kaanun náí. **24** Zetará Mosih Isár ummot, ítara nizor jisím ore híyan or gizgizi edde moncá ókkol or fúañti kúruc ot dí marifélaye. **25** Añára zettót Ruhr zoriya zinda así, aiyó, añára Ruhr hédaiyote soli, **26** borái no gorí, ezzon or túaro ezzone barík no kúwalai, edde ezzon ore ezzone háSOROT no gorí.

6 Ó báiboináin ókkol, zodi honó manúc guná gorát dóraha, tuáñra zetará Ruhr hédaiyote zindigi hařoór, tuáñra yóggwa re bicí norom or sáante sóiyit ainté; nize yó úñciyar táikko, zeéne nize yó gunát fori no zogói. **2** Ezzon or bór ezzone cóo, kiyólla-hoilé héndilla gorí beh tuáñra Mosihr niyom fura gorí faribá. **3** Zodi honókiye nize zeén no héen kúwala, íte nizoré nize fáki dér deh. **4** Fottí ekzone nizor-nizor ham ore tahákít gorí soóuk, baade ítara nizoré oinno zon loi fúainna no gorí nizor ham or zoriya nizoré lói borái gorí faribó. **5** Kiyólla-hoilé zar-zar fuñzá tar ttu tar ttu bowá fore. **6** Zee niki honó ustat ottu kalam or cíkka hásil goré, íte hé ustat ore fottí ekkán bála

jiníc or bág douk. 7 Nizoré nize fáki no díyo, Alla lloi toh tooñcábazi no háre. Zee zín cññe híin beh daa. 8 Zee niki nizor jisím ot máze bis cññe, íte jisím ottu fósol ísafe dónco daibo; montor zee niki Ruht máze bis cññe, íte Ruh ttu fósol ísafe ofúrani zindigi daibo. (aiōnios g166) 9 Aiyó, añára bálai goitté-goitté óran no ói, kiyólla-hoilé sóiyi októ ailé añára híyan or fósol daiyum zodi añára hímmot no hárai. 10 Hétolla añára ttu mouka táite manúc beggún ore bálai goríloi, háasgori uitará re zetará Allar foribar or manúc. 11 Soó, añí hottór ðoóñr-ðoóñr hórof ókkol lói tuáñrar hañse nizor áte lekír. 12 Zedúne maincór muúntu barík kúwalaito sáa, tuáñra re ázomi gorái bolla ítara beh bolazuri gorér deh. Ítara héndilla goré de, zeéne ítara ttu Mosihr kúruc olla bouli zulúm faa no fore. 13 Zetará ázomi goijjá ítara nize úddwa Córíyot amól no goré, montor toóu ítara saá de, tuáñra ázomi goró, zeéne tuáñra jisím ot ázomi goráiyi de híyan lói ítara borái gorí fare. 14 Lekin añr ttu añárar Malik Isá Mosihr kúruc or baabute bade ar honó kessúr borái goríbar dil no tákouk, kiyólla-hoilé hé kúruc or duara duniyai toh añr lla mora, aar añí duniyai lla mora. 15 Ázomi gorár no gorár honó kimot náí, bólke Mosihr duara noya mohóluk ówar beh kimot asé. 16 Zetará hé niyom mozin sole ítara beggún or uore, edde Allar asól Isráili ókkol or uore cánti edde rahám óuk. 17 Yala lóti honókiye añré ar duk no douk, kiyólla-hoilé añí añr gaat mazé Malik Isár zohóm ókkol lói berair. 18 Báiboináin ókkol, añárar Malik Isá Mosihr rahámot tuáñrar ruhr uore zari tákouk. Amin.

Íficiól

1 Añí Pául, Allar moncá mozin Mosih Isár éggwa sáhabi. Ífisas cóor ot Allar ze pak bonda ókkol asé ítarar hañse lekír, zetará Mosih Isár bútoze imandár. **2** Tuáñrar uore Alla añárar Baf or edde Malik Isá Mosihr torfóttu rahámot edde cánti nazil óuk. **3** Añárar Malik Isá Mosihr Alla edde Baf or taarif óuk, zibá ye níki hárr dóilla ruúhani borhot ókkol asmani zagat añára re Mosihr usílaye diiyé, **4** zendilla íba ye íbar usílaye añára re duniyair foidayecir age lóti basí raikké, zeéne añára íbar nozor ot pak edde behosúr óizaygoi. Muhábbote **5** íba ye Nizor kúci edde moncá mozin age lóti añárar fáisela gorí raikké de, Isá Mosihr duara añára re íbar fuain banaitó; **6** hétolla yala íbar rahámot or mohímar taarif óibo, ziyán íba ye añára re íbar Adorja war usílaye goijjé. **7** Híyan óilde, añára hé Mosihr lou wór usílaye azad óiyi, yáni añárar guná-háta ókkol maf faiyí. Allar hé rahámot hotó dōóñr, **8** ziyán íba ye añárar uore ódorbaára nazil goijjé. Nizor furafuri giyane edde buzá lói **9** íba ye kúcir sáañte Nizor gufon moncá re añárar hañse zahér goijjé, ziyán íba ye Mosihr duara fura goríbar fáisela goijjíl. **10** Híyan óilde, sóiyi óktó furafuri ailé, asman zobin ot ziín asé hún beggún ore Mosihr bútoze ektofák ot anón. **11** Zibá ye hárr kessú Nizor moncár erada mozin goré, íba ye Nizor moksót mozin age lóti añárar ze fáisela gorí raikké, híyan olla bóuli añára Mosihr zoriya ekkán miras or bági yó óiyi, **12** zeéne añára zetará Mosihr uore agor ttu acá raikkí, añárar duara íbar mohímar taarif ó. **13** Tuáñra yó toh sóiyi kalam, yáni tuáñrar nejat or kúchóbor fúni hé Mosihr uore iman ainno. Zeñtté tuáñra iman ainno, íbar zoriya tuáñrar uore yó waada goijjá Pak-Ruh moór lagaidiya giyéh, **14** zibá óilde añárar miras or boona, otódin foijjonto lla zetódin Allar kinna bonda ókkol ore furafuri hálas gorífela nó zah, zeéne íbar mohímar taarif ó. **15** Hétolla toh tuáñra ttu Malik Isár uore ze iman asé edde Allar tamám pak bonda ókkol olla ze muhábbot asé, híin añí fúinni lóti, **16** tuáñra lla cúkuriya gorá bon gorí nó felai, bólke añr duat tuáñra re yaad rakí. **17** Añí magi de, añárar Malik Isá Mosihr Alla, zibá mohímar Baf, íba ye tuáñra re giyan or edde Alla re zahér goré de Ruh dee fán, zeéne tuáñra íba re beétor sinó. **18** Añí aró dua gorí de, tuáñrar dil or suk kún kúlouk, zeéne tuáñra zano de, íba ye tuáñra re ze acá dii ðaikké híyan kii, íba ye Nizor pak bonda ókkol

olla ze taajuippa miras raikké híyan hotó dōóñr, **19** aar íbar ze kudurut añára imandár ókkol or hañse ham gorér híyan keén cima sára dōóñr. Híyan óilde dōóñr kudurut waán, **20** ziyán estemal gorí íba ye Mosih re mora ttu zinda goijjé aar asmani zagat íba re Nizor den dák ottu buágaraiye, **21** hárr dóilla hókumot or uore, adíkar or uore, taakot or uore, sóddarir uore edde zetó dóilla nam túwa gíyeh híin beggún or uore, siríf e jáhan ot no bólke aibó de jáhan ot óu. (aĩōn g165) **22** Alla ye hárr kessú íbar foor tole gorídiye, aar íba re hárr kessúr matá banai zomát ore diifélaie; **23** zibá óilde íbar gaa; íba zibá ye níki beggúlla beggún furafíle, íba hé zomát lói beh furafuri ó.

2 Tuáñra toh tuáñrar hosúrit edde gunát mora accíla, **2** héntte tuáñra e duniyair toutorika mozin edde boiyar or uore hókumot goré de sóddar or mozin beh solitá, zibá óilde ruh ubá zibá ye níki yala nafórman ókkol or bútoze ham gorát asé. (aĩōn g165) **3** Becók añára beggúne yó toh yaar age ítarar dóilla jisím or ayaci mozin solitám; héntte añára jisím or edde mon or azzu ókkol fura goittám, aar oinno maincór dóilla fítorote añára yó gozzob or laayek accílam. **4** Montor Alla, zibá rahám or tuangor, íba ye añára re goijjé de hé dōóñr muhábbote, **5** añára re zeñtté añára añárar nafórmanit mora accílam héntu úddwa Mosihr fúañti zinda goijjé. Tuáñra rahámote beh nejat faiyó. **6** Añára Mosih Isár bútoze de hétolla íba ye añára re Mosihr fúañti zinda gorí tulí íbar fúañti asmani zagat buágaraiye, **7** zeéne Mosih Isár bútoze añárar uore ze meérbani óiye híyan or duara íba ye aiyér de zobana ókkol ot Nizor rahámot or ocímána tuangori dahái fare. (aĩōn g165) **8** Kiyólla-hoilé tuáñra iman or zoriya rahámote beh nejat faiyó; híyan tuáñra nizor torfóttu no, híyan óilde Allar hádiya; **9** híyan honó ham or dam óu no, zeén níki honókiye borái gorí faitto. **10** Kiyólla-hoilé añára de íbar át or mohóluk, añára re Mosih Isár bútoze foida gorá gíyeh de toh gom ham uúin gorí solitó, ziín añára gorí bolla Alla ye age lóti toiyar raikké. **11** Hétolla yaad raikkó de, tuáñra zetará zormo ttu lóti Beyohúdi, tuáñra re yaar age uitará “be-ázomi goijjá” ðakitó zetará nizoré nize “ázomi goijjá” dabi goré, ze ázomi insán or áte jisím ot gorá zah. **12** Aró yaad raikkó de, héntte tuáñra Mosih ttu aladá accíla, Boni Isráil ottu maárum accíla, aar Allar waadar razinama ókkol or bági nu accíla; tuáñra ttu honó acá nu accíl aar duniyait tuáñra Alla sára accíla.

13 Montor yala toh tuáñra zetará ek hale duré accíla, Mosih Isár bútoe tuáñra re Mosihr lou wór usílaye d́ake anífela gíyeh. 14 Kiyólla-hoilé íba beh añárar cánti, zibá ye níki hé duní gún ore ek goijjé, aar alok goré de mazór d́ebal ziyán accíl híyan bángifelaiye. 15 Íba ye híyan Nizor gaa kurbani di ducconi re, yáni hókum edde niyom asé de Córíyot ore baatel gorífelai goijjé; zeéne íba ye Nizor bútoe hé duní gún ore milai ekgwá noya insán banai cánti aní fare, 16 aar íba ye hé duní gún ore ek gaa gorí kúruc or usílaye Alla lloi bonot gorídi fare, ziyán lói hé ducconi re hótom gorífelaiye. 17 Íba ye toh aái, tuáñra zetará duré accíla, tuáñrar hañse yó cántir tobolik goijjíl, aar zetará d́ake accíl ítarar hañse yó cántir tobolik goijjíl, 18 kiyólla-hoilé añára duní gúne íbar zoriya beh ekí Ruhr usílaye Baf or cáikkat zai fari. 19 Hétolla, tuáñra ar for edde bidecótta no, bólke Allar oinno pak bonda ókkol ottu ze nagorita asé híyan tuáñra ttu yó asé, aar tuáñra yó Allar foribar or manúc, 20 zetará re níki sáhabi gún or edde nobi ókkol or buniyadir uore banaitulá gíyeh, ziyán or ebbe zoruri kunar-fattór gwá óilde Mosih Isá Nize. 21 Íba llói guñra gór or híssa ókkol beggún zura loi Kúda lla ekkán pak gór bone. 22 Íba llói tuáñra re yó oinno maincór fúañti milai endilla ekkán zaga boni bolla banaitulá zár, zezé Ruh ísafa Alla táke.

3 Añí Pául zee niki tuáñra Beyohúdi ókkol or wasté Mosih Isár hédmotdari goróne bondit así, añí hétolla toh Allar hañse dua gorí. 2 Becók Allar rahámot or entezam or baabute tuáñra fúinno, ziyán tuáñrar hañse foónsaibar zimmadari añré diiya gíyéh, 3 yáni, gufoni waán ziyán íba ye wahí dí añré zanaiyé, ziyán yaar age barír sáañte lekífelaiyi. 4 Híyan foríle tuáñra zani faribá, Mosihr gufonir baabute añí hoddúr buzí, 5 ziyán oinno zobana ókkol ot insán-zatir hañse zahér gorá nó zah, zendilla yala íbar pak sáhabi edde nobi ókkol or hañse Pak-Ruhr duara zahér gorá gíyeh. 6 Hé gufoni óilde yían, kúchóbor or usílaye Beyohúdi ókkol óu Yohúdir fúañti mirasdár óiye, ekí gaar híssa óiye, edde waada waán or bági óiye ziyán Mosih Isár duara gorá gíyeh. 7 Allar rahámot or hádiyaye añí hé kúchóbor or háadem boinní, ziyán íbar kudurut or bole añré diiya gíyéh. 8 Allar tamám pak bonda ókkol or bútoe añí ebbe niróc cwa de óile yo, añr uore e rahámot tán óiye, Beyohúdi ókkol or hañse Mosihr ocímána dón or tobolik goríbar, 9 edde gufoni

waán or entezam tamám manúc ókkol ore daháibar, ziyán guzorigiyói de zobana ókkol foijjonto Allar hañse lukaiya accíl, zibá ye níki hárr kessú foida goijjé, (aíñ g165) 10 zeéne yala zomát or duara Allar d́oilla-boðoilla giyan or baabute, asmani zagat asé de hókumot-goróya edde adikari ókkol ore zanaidiya zah. 11 Íba ye híyan Nizor abadulabadi moksót mozin beh goijjíl, ziyán ore íba ye Mosih Isá añárar Malik or duara fura goijjé, (aíñ g165) 12 zibár zoriya edde zibár uore iman anóne añára kúlamela góri edde hímmot or sáañte Allar cáikkat zai fari. 13 Hétolla, añí tuáñra re aros gorír, añí tuáñrar zoriya ze duk-mosibot fair hífine hímmot no háraiyo, kiyólla-hoilé híin tuáñrar izzot olla beh ór. 14 Añí hétolla oh Baf or muúntu añrú félai, 15 zibár héntu asman zobin or hárr zandár ókkol foida óiye. 16 Añí dua gorí de, íba ye Nizor mohímar tuangori mozin íbar Ruhr duara tuáñrar dil ot bol di tuáñra re mozbut goré fán, 17 zeéne iman or usílaye Mosih tuáñrar dil ot táke. Añí aró dua gorí de, muhábbot ot cíñyor gasái edde hé buniyadit t́iki táki tuáñra zen 18 tamám pak bonda ókkol or fúañti buzí faro de, Mosihr hé muhábbot hotó coṛa, hotó lamba, hotó uñsol, edde hotó mur, 19 aar hé muhábbot ziyán zani faribár baáre, tuáñra zen híyan zani faro, zeéne tuáñra Allar tamám furayir héddur furaiya óizogoi. 20 Zibá ye añárar bútoe ham goré de kudurut mozin, añára magi de edde sinta gorí de híin beggún or túaro boóut becábici gorí fare, 21 íbar mohíma zomát or duara edde Mosih Isár duara, hárr zobana edde abadulabad foijjonto hámica ówat tákouk. Aamin. (aíñ g165)

4 Hétolla añí zee niki Malik or wasté bon así, añí tuáñra re aros gorír, tuáñra re d́ahaité ziyán olla d́aha gíyéh híyan or laayek zindigi haro; 2 furafuri cídaye edde norome, sobóre, ezzon ore ezzone muhábbote bordac gorí, 3 cántir ban or bútoe Ruhr sólluk t́ikai rakí bolla hárr d́oilla kucíc gorí. 4 Jisím asé de ekkán, aar Pak-Ruh asé de ekzon, zendilla tuáñra re d́ahaité ekkán acá lla beh d́aha gíyéh; 5 Malik asé de ekzon, iman asé de ekkán, báp̄tisma asé de ekgwá, 6 beggún or Alla edde Baf asé de yó ekzon, zibá beggún or uore beggún or duara ham goré edde beggún or bútoe asé. 7 Montor añára fottíkiyor uore Mosihr barídiya mozin rahámot óiye. 8 Hétolla pak-kalame fórmар de, “Íba zeñtté asman ot uittégoi, héñtte bondi ókkol fúañti looi gyíl, aar íba ye maincóre hádiya

ókkol dífl.” 9 “Íba uittégoi” or maáni kii? Híyan or maáni óilde, Íba nise duniyair zagat óu laimmíl de asé. 10 Zibá laimmíl Íba óilde ubá zibá asman beggún or uore uittégoi, zeéne Íba ye hárr kessú re bórafelai fare. 11 Íba Nizebaze hodún ore sáhabi óibar, hodún ore nobi óibar, hodún ore tobolik-goróya óibar, hodún ore zomát or soroya óibar, edde hodún ore ustat óibar niyamot diiyé, 12 pak bonda ókkol ore Allar hédmot goittó toyar gorí bolla; zeéne héndilla góri Mosihr gaa barí uré, 13 otókkal foijjonto zetókkal añára beggún iman ot ek sólluk nó ói edde Allar Fua re zanifélai nó fari, aar oddúr balok nó ói zeddúr óile Mosihr furayir héddur foónse. 14 Tarfore añára ar fuain no tákiyum, maincé saláki edde dúkabazi gorí oinno kiyó re gollot ot loizai bolla ze taalim deh, hé taalim ot boiyare tuillá goir or dóilla añára ikká uikká dúlat no tákiyum, 15 bólike muhábbote hók hotá hoói yore fottí mikká ttu barí urí Ubár balok gaa boniyúm zibá óilde matá, yáni Mosih, 16 zibár zoriya guñra gaa gán hárr girár modote zura loh edde dóijja táke, aar zeñtté fottí híssa ye zeddúr ham gorá fore héddur goré, tói hé gaa gán baré aar híyane nizoré muhábbot or sáante banaitulé. 17 Hétolla, Malik or name añí tuáñra re hoóidir, Beyohúdi ókkole zendilla nizor behar kíyale sole, tuáñra ar héndilla góri zindigi no haraiyó, 18 kiyólla-hoilé ítarar buz andár ot fori asé, aar ítarar díloror zoriya ítara ttu Allar baabute zankari no tóne ítara Alla ye dee de zindigi ttu maárum ói asé; 19 ítara ttu honó córomhaya náí; ítara nizor ttu hárr dóilla nafak ham goríbar ze azzu asé híin gorí bolla nizoré ayacit gosáidiye. 20 Montor tuáñra toh Mosihr baabute héndilla taalim faiyó de no, 21 bólike tuáñra oh sóiyi mozin Íbar baabute fúinno aar Íbar torfóttu taalim faiyó, ze sóiyi hé Isár hañse asé, 22 ki hoilé, tuáñrar agor ze solasol asé, hé furana manúc ore fúañti kúli félaído, zibá dúkabazir azzu loi bigirizargói; 23 edde Alla re tuáñrar demak or kíyal ore noya goittó doh; 24 aar tuáñra noya manúc ore findífelo, zibá re Allar súrote sóiyi forhésgarir edde pakir sáante foida gorá gíyeh. 25 Hé ísafe, tuáñra fottíkiye misá hotá howá félaído aar ezzon loi ezzone hók hotá hoó, kiyólla-hoilé añára beggún toh ek gaar híssa ókkol. 26 “Guccá uríle uróuk, montor guná no goijjó.” Tuáñrar guccá re beil gólibar age faní gorífelaiyo; 27 Íbilíc ore mouka no diyo. 28 Sur ókkole ar suri no goijjó, bólike gom fecá banai nizor áte meénnot goró; zeéne muútac ókkol ore dii bolla nizor ttu kessú táke. 29

Tuáñrar muk ottu honó bura hotá no neelaiyó, bólike ziín oinno zon ore ítarar zorurot mozin banaitulí bolla gom híin beh neelaiyó, zeéne fúnoya ókkole híin ottu fáida faa. 30 Aar Allar Pak-Ruh re naras no goijjó, zibá re tuáñrar uore otókkal foijjonto lla moór lagaidiya gíyéh, zetókkal foijjonto hálas goríbar din nú aiyé. 31 Hárr dóilla monhalahali, rak, guccá, uzor di hoijja diya, bodnam gorá, edde hárr dóilla ducconi tuáñra ttu dur gorífelo. 32 Ezzon ore ezzone meérbani goró edde fetfurani dahó, aar ezzon ore ezzone endilla maf goró, zendilla Alla ye yó tuáñra re Mosihr bútoze maf gorídiye.

5 Hétolla hoóir, tuáñra Allar adorja fuain ísafe, Íbar kofíyot loh; 2 aar endilla gori muhábbot ot solo zendilla Mosih ye yó añára re muhábbot gorí añára lla bóuli Nizor zan ore kúcbodar kurbaní ísafe Allar hañse kurbaní dífélaiye. 3 Montor tuáñrar bútoze zenákarir, edde honó dóilla nafakir yáh lalsír hotá úddwa no tákouk, kiyólla-hoilé híin Allar pak bonda ókkol olla tík no. 4 Héndilla, honó bereijja hotá, behar hotá, yáh bírailla mockari yó no tákouk, ziín óu tík no; yárbodol Allar cúkur goró. 5 Kiyólla-hoilé tuáñra toh fakkagori zano, honó zenákur, nafak manúc yáh lalósbon ottu Mosihr edde Allar raijot honó miras náí deh. Lalós gorá mutti fuñza loi borabor. 6 Saiyó, honókiye tuáñra re galuwai gorí dúka no de fán, kiyólla-hoilé híin or zoriya éna nafórman ókkol or uore Allar gozzob aiyé. 7 Hétolla, tuáñra ítara llói honó bazá no raikkó. 8 Kiyólla-hoilé tuáñra toh ek hale andár accíla, montor Malik or ummot ísafe yala tuáñra nur; hétolla nur or fuain dor dóilla góri solo, 9 kiyólla-hoilé nur or gulagala óilde toh hárr dóilla bálai, forhésgari, edde háñsa; 10 aar Malik ziín lói kúci ó, zasai gorí híin goró. 11 Andár or befáida ham ot córik no óiyo, bólike híin or asóliyot zahér goró; 12 kiyólla-hoilé manúc ítara aiddone ziín goré híin or baabute hoón úddwa córmor hotá. 13 Montor nure zahér goillé toh hárr kessú zahér óizagoi, kiyólla-hoilé ziín zahér óizagoi híin óilde nur. 14 Hétolla toh endilla asé, “Ó gúm or manúc ókkol, seton óizogoi, mora ttu zinda ó, tói Mosih tuáñrar uore zolibó.” 15 Hé ísafe, saiyo tuáñra hondilla soloór; bekuf or dóilla no bólike buddíman or dóilla góri solo; 16 honó mouka na háraiyo, kiyólla-hoilé e zobana hóraf. 17 Hétolla hoóir, bekuf no óiyo, bólike Malik or moncá kii de buzó. 18 Córab hái tuúl no óiyo, kiyólla-hoilé

híyane tuáñra re ayaci gorá baibó. Yárbodol Pak-Ruh lói furaiya ó, **19** aar Zobur Córif or kawali, seér, edde ruúhanir gozól ókkol or duara ezzon loi ezzone hotá hoó; héndilla gorí tuáñrar dil ottu Malik or name seér goó edde bazana bazo, **20** aar hámica hárr kessú lla añárar Malik Isá Mosihr name Alla Baf or cúkur goró. **21** Mosihr door rakí tuáñra nizoré ezzon ore ezzone gosáido. **22** Bouwáin ókkol, tuáñra nizoré nizor-nizor hócom or hañse gosáido, zendilla Malik or hañse gosáidiyo. **23** Kiyólla-hoilé hócom óilde toh bou wór matá, zendilla Mosih yó zomát or matá; aar íba óilde gaar Nejatdoya. **24** Hétolla hoóir, zomáte zendilla nizoré Mosihr hañse gosáidiye, héndilla bouwáin ókkol ottu yó hárr kessút nizoré nizor-nizor hócom or hañse gosáidiyar zorur. **25** Hócom ókkol, tuáñra nizor-nizor bou wóre muhábbot goró, zendilla Mosih ye yó zomát ore muhábbot goijjé aar híyan olla Nizor zan difélaiye, **26** zeéne íba ye kalam or duara hé zomát ore faní lói dúifelai pak-sáf gorí fare, **27** zeéne íba ye hé zomát ore eén nurani banai Nizor hañse házir gorái fare, zibát honó dak, kuñraiya yáh héndilla honó kessú náí, bólke híba pak edde behosúr. **28** Hétolla, hócom ókkol ottu nizor-nizor bou wóre nizor gaar dóilla muhábbot gorár fóros. Zee niki nizor bou wóre muhábbot goré, íte nizoré muhábbot goré deh; **29** honókiye toh nizor gaa re honódin nafórot goijjé de náí, bólke híyan ore fali yore zotton beh goré, zendilla Mosih ye yó zomát ore goré; **30** kiyólla-hoilé añára de íbar gaar híssa ókkol. **31** “Híyan olla toh morotfua ye nizor bafmaa ttu zuda ói nizor bou wór fúañti tákibo, aar ítara duní zon ek jisím óizayboi.” **32** Híyan ekkán doóñr gufoni, lekin añí Mosih edde zomát or mutalek hoóir deh. **33** Zeén óibo óuk, tuáñra fottíkiyo ttu yó nizor-nizor bou wóre nizor dóilla muhábbot gorár zorur, aar bouwáin ókkol ottu yó nizor-nizor hócom ore izzot gorár uzu kíyal rakár zorur.

6 Fuain ókkol, tuáñra Malik or ísafe, tuáñrar bafmaar hotábattara mano; kiyólla-hoilé híyan toh fík. **2** “Bafmaa re izzot goríba” óilde waadar sáañte foóila hókum, ki hoilé, **3** “Zeéne tuáñr bálai ó, aar tuñí e duniyait lamba hóiyat foo.” **4** Bafáin, tuáñrar fuain dore guccá tulí no diyo, bólke Malik or torbiyote edde nosíyote ítara re doóñr goró. **5** Gulam ókkol, dil or ehélasir sáañte izzote edde doore tuáñrar duniyaibi girós ókkol or hotábattara mano, zendilla tuáñra Mosihr hotá óito mainta; **6** maincóre kúci goróya

ókkol or dóilla daháibar niyote no, bólke Mosihr gulam ísafe dil ottu Allar moncá ókkol fura gorí bolla héndilla goró. **7** Tuáñra endilla juse hédmot goró, zeén niki Malik ore beh gorór, insán ore no; **8** kiyólla-hoilé tuáñra toh zano, zee ze gom ham goré íte híyan or boccíc Malik or torfóttu faibo, íte gulam óuk yáh begulam. **9** Girós ókkol, tuáñra yó ítara re héndilla beh sólluk goró, aar ítara re dómki díya félaído; tuáñra toh zano, asman ot asé de íba óilde ítara edde tuáñrar Girós, aar íbar hañse honó ektorffía náí. **10** Ahéri hotá óilde, tuáñra Malik loi laigga táki íbar kudurut or bole mozbut óizogoi. **11** Larái lla Allar diiya tamám átiyar findífelo, zeéne tuáñra íbilíc or sail ókkol or ulda mozbut gori tíyai fero. **12** Kiyólla-hoilé añárar larái toh honó insán lói no, bólke hókumot-goróya ókkol lói, kémota ola ókkol lói, edde e andár duniyair hákim ókkol lói; yáni asmani zagat asé de íbilíc or bútferot ókkol lói éna. (aíōn g165) **13** Hétolla, tuáñra Allar diiya hárr átiyar findífelo, zeéne ze dín tuáñra re íbilíce hámla goríbo héñtte mukabela gorí fero, aar hárr kessú hótom gorífelai mozbut gori tíyai táki fero. **14** Hétolla hoóir, sóiyi lói guṭ di, forhésgarir zama findí, **15** edde cántir kúchóbor tobolik gorí bolla nal tákito centár findí, mozbut gori tíyai táko. **16** Híin beggún or fúañti iman or dál loirakó, ziyán lói tuáñra íbilíc or tamám ooini tir ókkol nifáifelai faribá. **17** Nejat ore ṭufir dóilla góri matát doh, aar Pak-Ruhr toluwar loirakó, ziyán óilde Allar kalam. **18** Pak-Ruhr bole hámica hárr dóilla dua edde fóriyat ókkol gorát táko; aar hé niyote furafuri sobór or sáañte seton táko edde Allar tamám pak bonda ókkol olla dua gorát táko. **19** Añr lla yó dua goijjó, zeéne zeñtté aní boiyan gorí héñtte añré endilla lofzó ókkol diiya zah zín lói añí hímmot góri kúchóbor or gufoni zahér gorí faijjum, **20** ziyán olla añí bon así de hálot ot óu ezzon nomainda ísafe ham gorír. Dua goríba de, añí híyan boiyan goitté eén hímmot or sáañte gorí fari fán, zeddúr góri añr ttu goríbar zorur. **21** Añr hálot keén asé aar añí kii gorír híin tuáñra zano fán, Malik or bútoe asé de adorja báí edde biccácdar háadem Tukikuse tuáñra re hárr kessú zanaidibo, **22** zibá re añí tuáñrar hañse etollá difeṛáir, zeéne tuáñra añárar baabute zano, aar yóggwa ye zeéne tuáñrar dil ot tosólíi déh. **23** Tuáñra báiboináin dor uore Alla Baf or edde Malik Isá Mosihr torfóttu cánti, iman, edde muhábbot nazil óuk. **24** Zetará añárar Malik Isá Mosih re ofúrani muhábbote

muhábbot goré, ítara beggún or uore rahámot zari
tákouk.

Filíppaiól

1 Añí Pául, añr fúañti Timóti yó asé. Añára óilam de Mosih Isár gulam. Filíppi cóor ot Mosihr búture Allar ze pak bonda ókkol asé ítara beggún or hañse lekír; hère zomát or neta ókkol edde háadem ókkol óu gólaiya asé. **2** Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **3** Añí tuáñra re zetóbar yaad gorí, hétobar añr Allar cúkur gorí, **4** aar tuáñra beggún olla gorí de hárr dua hámica kúcir sáañte gorí, **5** kiyólla-hoilé tuáñra toh foóila din ottu lóti kúchóbor fólar ham ot aij foijjonto córik asó. **6** Añr ttu yíán ekin asé de ki, zibá ye tuáñrar búture ze ekkán gom ham cúru goijjé íba ye híyan ore Mosih Isá aibó de din foijjonto solai loizai furussat goríbo. **7** Tuáñra beggún or baabute héndilla kíyal rakón añr lla tík, kiyólla-hoilé tuáñra toh añr dil ot asó, aar añí bon táki yáh kúchóbor or sófai dí híyan or sóiyi re sábut gorí, tuáñra beggún toh añr fúañti Allar rahámot or bági. **8** Alla añár gobá asé, Mosih Isár adore añr ttu tuáñra beggún olla hoddúr furer. **9** Añí dua gorí de, tuáñrar muhábbot sóiyi giyan edde hárr dóilla buddír sáañte zetó éto bicí barát táke fán; **10** zeéne tuáñra ziín uttom híin forók gorí zano, aar Mosih aibó de din foijjonto pak edde behosúr táko, **11** Isá Mosihr duara forhésarir gulagala ókkol aiyé de híin lói bóraiya ói yore; zeéne Allar mohíma edde taarif ó. **12** Ó báiboináin ókkol, añr ttu tuáñra re yíán zanaidito monehoór de ki, añr uore ziín-ziín guzoijjé, híine kúchóbor zetó éto fólat modot goijjé, **13** zeén niki añí Mosihr wasté bon así de híyan razmohól or tamám faáradar ókkole edde baki manúc beggúne zani faijjé. **14** Aar añr bon or zoriya bicí zon imandár báiboináin dor ttu Malik or uore bóraca eddúr barígíyoi zeén niki ítara no doorai kalam tobolik gorí bolla aró bicí hímmot faiyé. **15** Becók, hodúne ricé edde zibbat or niyote Mosihr tobolik goré, montor hodúne bála niyote goré de yó asé. **16** Fisór gúne híyan muhábbote beh goré, kiyólla-hoilé kúchóbor or sófai dí bolla añré basílowa giyeh de híyan ítara zane. **17** Montor agor gúne Mosihr tobolik goré de ehélasir sáañte no bólke nizor fáidar niyote; kiyólla-hoilé ítara tãare de, añí bon así de hère ítara añr lla mosibot foida gorí faribó. **18** Tói kii óiye? Asól hotá óilde, bét dóri óuk yáh sóiyi niyote óuk, fottí mikká ttu de Mosihr tobolik éna ór; hétolla añí kúci. Ói, aar kúci ówat tákiyum óu, **19** kiyólla-hoilé añí zani

de, añr uore ziín-ziín guzoror híin or notiza ísafe añí hálas óiyum. Híyan tuáñrar duaye edde Isá Mosihr Ruhr modote beh óibo. **20** Añr ttu furafuri ekin edde acá asé de ki, añr ttu honó kessút córminda ówa no foribó, bólke eén furafuri hímmot tákibo zeén níki hámicar dóilla yala yó añr gaar duara Mosihr mohíma zahér óibo, añí zinda táki yáh mori. **21** Kiyólla-hoilé añr lla Mosih óilde zindigi, aar moot óilde laf. **22** Zodi añí haiyaye zinda táki, añí kimoti ham or meénnot ókkol gorí faijjum. Hétolla hon nán basítam añí hoi no fari. **23** Añí duihařat foijjí: monehoór de, duniyai ttu zaigói Mosihr fúañti tákito, kiyólla-hoilé híyan boóut beétor óibo; **24** montor tuáñrar wasté añí haiyaye basi táka toh aró zorur. **25** Híyan or ekine añí zani de, añí basi táikkum aar tuáñra beggún or fúañti tákiyum, zeéne tuáñra iman ot baró aar híyan ot kúci táko. **26** Añí tuáñrar hère abar ailé, tuáñra ttu Mosih Isár búture asé de borái añr zoriya bicí hoilé bicí barízayboi. **27** Siríf endilla goró, ki hoilé, tuáñrar solasol ore Mosihr kúchóbor or laayek bano, zeéne añí aái yore tuáñra re saái yáh gairházir táki, añí zen tuáñrar baabute fúni de, tuáñra ek ruht máze mozbut gori tíaiaa asó aar kúchóbor ottu foida ó de iman olla ek mone milizúli bicí meénnot gorór. **28** Tuáñrar muhálef ókkol ore honó hálote no dooraiyó, ziyán óilde ítara lla hálak óibar ekkán nicán, lekin tuáñra lla nejat faibar, ze nejat óilde Allar torfóttu. **29** Kiyólla-hoilé tuáñra re toh Mosihr wasté toúfik diiya giyéh de siríf íbar uore iman aníbar no, bólke íbar wasté duk fai bolla yó. **30** Hétolla toh tuáñra yó duk uúin foór ziín añí faáilam de deikkíla aar yala yó fair de fúnor.

2 Hétolla, Mosihr ummot ísafe tuáñra ttu honó josba tákile, muhábbot or honó tosólíi tákile, Pak-Ruhr honó taalukat tákile, aar honó ador edde rahám tákile, **2** endilla gorí añr kúci fura goró: ek mon ói yore, ekí dóilla muhábbot rakí yore, zane ek ói yore, edde ekí kíyal rakí yore. **3** Nizor fáidar niyote yáh barík kúwalai bolla kessú no goijjó, bólke níróc ói oinno zon ore nizor túaro uttom báfiyo. **4** Siríf nizor fáida no saiyó, oinno zon or fáida yó saiyó. **5** Tuáñrar búture e kíyal rakó ziyán Mosih Isá ttu yó accíl: **6** íba toh Allar súrote accíl de óile yo, Allar fúainnagiri re sibi dóri rakídito nó saá, **7** bólke íba ye Nizoré háli gorífelail, gulam boni, insán ísafe zonom loi yore. **8** íba ye insáni cokóle táki, moot foijjonto, hoitó sailé, kúruc or uore more foijjonto fórmadar ói yore Nizoré níróc goijjíl. **9**

Hétolla bóuli toh Alla ye yó ĩba re bicí uĩsol tokkat tuillé, aar ĩba re nam waán diiyé ziyán hárr nam or túaro ðoóñr, **10** zeéne Isá nam ot hárr kiyé añrú féla, híin asman ot tóuk yáh zobin ot, yáh zobin or nise; **11** aar hárr zobane zen Baf Allar mohíma ói bolla cíkar goré de, Isá Mosih óilde Malik. **12** Hétolla, ó añr adorja ókkol, zendilla tuáñra siríf añr cáikkat no, bółke añr gairházirít hámica aró fórmadar accíla, héndilla tuáñra yala ðoore edde hafanir sáañte nizer nejat or ham gorízo, **13** kiyólla-hoilé tuáñrar bútoore toh Alla ye éna ham gorér, tuáñra re ĩba ye kúci ó de erada fura goríbar mon edde amól dí bolla. **14** Hárr kessú cékayot sára edde torkatorki sára goijjó, **15** zeéne tuáñra behosúr edde maasum boni, e zobanar ðerá edde báañra maincór dormiyan ot Allar dak sára fuain ðóoro, zetarár mazé tuáñra duniyait serak or ðóilla zoloór, **16** kiyólla-hoilé tuáñra toh zindigir kalam ore mozbut or sáañte dóri asó; hétolla Mosihr waafesir ðin añr borái gorí faijjum de, añr no behar ðuñijí aar no behar meénnot goijjí. **17** Fúno, zodi añr ttu tuáñrar iman or hédmot or edde kurbanir uore nizeré úddwa roc kurbanir ðóilla ðáldiida fore, toóu añr kúci aar tuáñra beggún or fúañti kúci goijjúm. **18** Tuáñra yó héndilla kúci ó, aar añr fúañti kúci goró. **19** Añr acá gorír, Malik Isá ye sailé añr Timóti re tuáñrar hére hára diferáiyum, zeéne tuáñrar hóbor fúni añr yó tosólłi fai. **20** Kiyólla-hoilé añr ttu yóggwar ðóilla ar kiyó náı, zee niki tuáñra ĩla ehélasir sáañte sintabáfana goré. **21** Beggúne nizer gún ot beh lagi asé, Mosih Isár gún ot no. **22** Lekin Timótir kimot sábut óiye de híyan toh tuáñra zano, ki hoilé, fua ye zendilla baf or fúañti meénnot goré, héndilla yóggwa ye añr fúañti kúchóbor fóla ĩla meénnot goijjí. **23** Hétolla añr acá gorír, añr hálot kii óibo híyan zani faille mottor añr yóggwa re tuáñrar hére diferáiyum. **24** Aar añr ttu Malik or uore bóraca asé de ki, añr nize yó tuáñrar hére bicí hára aiccúm. **25** Lekin añr imandár báı Epaforoditus ore tuáñrar hére waafes diferáidon zoruri bouli báfir, zibá añr sáañti ham-goróya edde sáañti fóous, aar tuáñrar hóborgwa yó, zibá re añr zorurot ókkol fura gorí bolla diferáıla. **26** Kiyólla-hoilé yóggwa ttu tuáñra beggún ore saitó kúb monehoór, aar yóggwa ocúk ot foijjé de híyan tuáñra fúinno de hétolla yóggwa ferecanit asé. **27** Bécok, yóggwa ocúke moron-moron óoil, montor Alla ye yóggwar uore rahám goijjí; siríf yóggwar uore no, bółke añr uore yó, zeéne añr ttu ferecanir uore

ferecani no táke. **28** Hétolla yóggwa re diferái bolla añr ttu aró bicí kíyal óiye, zeéne tuáñra yóggwa re abar dekí kúci ó, aar añr sinta yó home. **29** Hétolla yóggwa re Malik or ummot ísafe furafuri kúcir sáañte kobul goijjó, aar héndilla maincóre izzot goijjó; **30** kiyólla-hoilé yóggwa ye Mosihr ham or wasté moot or foñt ot óoil, aar tuáñrar torfóttu añr ĩla ze hédmot homi accíl híin adai gorí bolla nizer zan foijjonto hótarat féłail.

3 Ahérit hoóir, ó añr báiboináin ókkol, Malik or ummot de hétolla kúci goró. Añr ttu ekí hotá lekíte duk no lage, kiyólla-hoilé héndilla goillé tuáñra héfazot tákiba. **2** Kuñir ókkol ottu uñciyar táikko, yáni hóraf ham-goróya uitará ttu zetará jisím harı-sırı ázomi goré. **3** Kiyólla-hoilé añara éna asól ázomi goijjá manúc, zetará Allar Ruhr hédaiyote ebaadot gorí, Mosih Isá re lói borái gorí, aar jisím or uore honó bóraca no gorí, **4** zodi añr nizer ttu yó jisím or uore bóraca goríbar waja asé de óile yo. Honókiye ítar ttu jisím or uore bóraca goríbar waja asé bóuli táare de óile, añr ttu toh aró bicí asé: **5** añré añçto ðin ot ðin ázomi gorá gýl; añr Boni Isráılı, Binyamin or háandan ottu, añr Hibraniól or ézzon Hibrani. Córiyot amól gorár baabute hoilé, añr ézzon Féroci accílam; **6** jus tákar baabute hoilé, añr Mosihr zomát ore zulúm goittám; aar Córiyote forhésgar ówar baabute hoilé, añré nidak faa zayto. **7** Lekin zıín añr ĩla nofá accíl, yala híin ore Mosihr zoriya lussán bouli goni. **8** Aró hoitó sailé, añr hárr kessú re lussán bouli goni de kiyólla-hoilé Mosih Isá añr Malik ore zanat ódorbaára kimot asé, zibár zoriya niki añr hárr kessúr lussán cóoiyi aar híin ore fúrari bouli goni, zeéne añr Mosih re fai, **9** aar añré ĩbar bútoore faa zah, Córiyot amól goillé faa zah de héndilla nizer kucíc or forhésgarir zoriya no, bółke Mosihr uore iman anıle faa zah de forhésgarir zoriya, ze forhésgari Allar torfóttu iman or zoriya beh aiyé. **10** Añr ttu hé Mosih re, yáni ĩbar zinda ówar kudurut ore edde ĩbar dukkót híssa ówa re zainto monehoór, ĩbar moot or nomunaye mori-mori; **11** zeéne honó bote añr mora ttu zinda ówar héddur foijjonto yó foóñsi. **12** Endilla no de ki, añr híyan furafuri faiféłaiyi yáh añr furafuri sóiyi óigiyigoi, montor añr waán dórifelai bolla beh ðuñrat ası ziyán or niyote Mosih Isá ye añré dórifelaiye. **13** Báiboináin ókkol, añr nizeré nize híyan aijjó dórifelaiyi bouli no táari, lekin añr ekkán gorí de híyan óilde: fisé zıín asé híin ore foóraıfelai muuntu zıín asé híin or

hére foónsibar kucíc. **14** Añí monzil-moksót or uzu duñrat así de, Mosih Isár duara asman or uzu Allar ze ñak asé, bocccíc ísafe yíba hásil gorí bolla. **15** Hétolla, añára zetará balok así, añára beggún ottu hé kíyal rakár zorur. Aar zodi honó kessút tuáñra ttu oinno ñoilla kíyal táke, Alla ye tuáñra re híyan óu zahér goríbo. **16** Zeén óibo óuk, añára zeddúr ot foóniccigoi héddur or mutafek zindigi harai. **17** Báiboináin ókkol, tuáñra beggúne añr ñoilla góri solat táko, aar uitarár híkka díyan diyo zetará añára ttu tuáñra deikkó de hé nomuna mozin sole. **18** Kiyólla-hoilé añí toh tuáñra re yíán boóut bar hoóilam, aar yala hañdi-hañdi yó hoóir, endilla boóut zon asé zetará Mosihr kúruc or duccon or ñoilla góri sole; **19** ítarar tokdír ot borbadi asé, ítarar Kúda óilde nizor fet, ítara nizor ttu córom laga foitto de híin lói fohórai goré, ítara duniyaibi gún or híkka beh mon deh. **20** Montor añáar nagorita óilde asman ot, zentú añára éggwa Nejatdoya yáni Malik Isá Mosih aibár bicí azzur sáante entezar ot así, **21** zibá ye níki añáar niróc haiya re íbar mohíma ola gaar ñoilla ói bolla bodolifélaibo; híyan oh taakot estemal gorí goríbo ziyán lói íba ye hárr kessú re úddwa Nizor kobzat gorífelai fare.

4 Hétolla hoóir, ó añr adorja báiboináin ókkol, tuáñra zetará re añr ttu saitó kúb monehoór, zetará añr kúci edde matár tas, tuáñra héndilla soli Malik or bútoze mozbut táko, ó adorja ókkol. **2** Añí Yuwádiya re yó aros gorír aar Suntoki re yó aros gorír, Malik or bútoze tuáñrar mon ek ñoilla goró. **3** Aar, ó añr asól sáanti, añí tuáñre yó aros gorír, hé mayafuain nún ore híyan ot modot goró, kiyólla-hoilé ítara toh kúchóbor fólí bolla Kelemen edde añr oinno sáanti ham-goróya ókkol lói cóo añr fúañti bicí meénnot ókkol goijjé, zetará beggún or nam zindigir-kitab ot asé. **4** Malik or bútoze hámica kúci táko; añí abar hoóir, kúci táko. **5** Tuáñrar cídayi tamám manúc ókkol or hañse zahér goró. Malik hára aiyér. **6** Honó kessúr sinta no goijjó, bólke hárr hálót ot dua edde fóriyat or duara cúkuriyar sáante tuáñrar aros ókkol Alla re zanaiyó. **7** Baade Allar cánti, ziyán buzí farar furafuri baáre, híyane tuáñrar dil edde kíyal ore Mosih Isár usílaye héfazot rakíbo. **8** Ahérit hoóir, ó báiboináin ókkol, zín hánsa, zín izzotdár, zín sóiyi, zín pak, zín cúndor, zín namdár, yáni zín uttom aar taarif or laayek asé, tuáñrar kíyal híin or híkka beh rakó. **9** Tuáñra añr ttu zín cíkko, hásil goijjó, fúinno, edde deikkó, híin ore amól goró, tói cánti dooya Alla

tuáñrar fúañti-fúañti tákibo. **10** Añí Malik or bútoze bicí kúci, kiyólla-hoilé yala boóut din baade tuáñra ttu añr lla sintabáfani abar zari óiye; becók tuáñra ttu age yó accíl, montor daháibar mouka nu accíl deh. **11** Añí híyan muútac ot fori hoóir de no, kiyólla-hoilé añí toh ze honó hálót ot kúci táka cíkki. **12** Añí hom táka keén de yó zani, aar beec táka keén de yó zani. Añí hárr mikká edde hárr hálót ot kúci tákar gufoni cíkki, bóra ferot óuk yáh háli ferot, beec tákat óuk yáh muútac ot. **13** Añí hárr kessú Ubár duara gorí fari zibá ye níki añré bol dee. **14** Toóu gom óiye, tuáñra añr mosibot ot córik óiyo. **15** Ó Filíppaiól, tuáñra nize de zano, foóilabar tuáñrar hañse kúchóbor tobolik gorí zeñtté añí Makedóniya ttu gílamboi, héñtte siríf tuáñra bade ar honó zomáte añr llói lenden gorát cámil nó. **16** Tuáñra de Tisólonikat úddwa añr zorurot ókkol fura gorí bolla hoek bar modot foónsaila. **17** Añí hádiya saáir de héen no, bólke nofá saáir deh, zín tuáñrar hísaf ot barízargoi. **18** Becók añí hárr kessú furafuri faifélaiyi, yala añr ttu ódorbaára asé. Epaforoditus or áta tuáñra zín difeřáila híin fai yore añr ttu bicí hoilé bicí óigiyoi; híin toh kúcbodar edde kobuldár kurbani, zín lói Alla kúci ó. **19** Añr Alla ye íbar mohímar dón ottu Mosih Isár usílaye tuáñrar hárr zorurot fura goríbo. **20** Añáar Alla Baf or taarif abadulabad foijjonto hámica ówat tákouk. Aamin. (aiōn g165) **21** Mosih Isár bútoze Allar ze pak bonda ókkol asé, ítara fottíkiyo re añr sólam díyo. Añr fúañti asé de báiboináin ítara yó tuáñra re sólam zanar. **22** Allar pak bonda ókkol beggúne tuáñra re sólam zanar, háasgori baáñcca Káisar or gór or maincé. **23** Malik Isá Mosihr rahámot tuáñrar ruhr uore zari tákouk.

Kolóciól

1 Añí Pául, Allar moncá mozin Mosih Isár éggwa sáhabi. Añr fúañti añárar báí Timóti yó asé. **2** Kolóciya cóor ot Mosihr bútoe Allar ze pak bonda ókkol asé, hé imandár báiboináin ítarar hañse lekír: Tuáñrar uore añárar Baf Allar torfóttu rahámot edde cánti nazil óuk. **3** Añára hámica tuáñra lla dua goríbarcot, añárar Malik Isá Mosihr Baf Alla re cúkuriya gorí, **4** kiyólla-hoilé añára fúinni de, tuáñra ttu Mosih Isár uore iman asé aar tuáñra Allar pak bonda beggún ore muhábbot goró, **5** waán or acáye ziyán tuáñra lla asman ot héfazot raká gíyeh. Híyan or baabute tuáñra yaar age sóiyi kalam ot fúinnila, yáni oh kúchóbor ot **6** ziyán tuáñrar hañse foónicce. Hé kúchóbore fura duniyait gulagala ókkol dórar edde zetó éto fólat asé, zendilla tuáñrar hañse yó oh din lóti dórar ze din tuáñra híyan fúinno aar Allar rahámot ore sóiyigori buzí faijjó. **7** Hé kúchóbor ore tuáñra añárar adorja sáañti gulam Epafaras ottu cíkkila, zibá Mosihr ézzon biccácdar háadem ísafe añárar bodol tuáñrar hédmot gorér. **8** Yóggwa ye añára re tuáñrar muhábbot or baabute zanaíyé, ziyán Pak-Ruh ye tuáñrar dil ot foida goijjé. **9** Hétolla bouli añára híin fúinni lóti tuáñra lla dua gorá bon gorí nó felai. Añára magi de, tuáñra ruúhanir tamám giyane edde buddíye Allar moncár zankari loi furaiya óizogoi fán, **10** zeéne tuáñra Malik or laayek soli íba re hárr mikká ttu kúci goró, yáni tuáñra zen fottí gom ham ot fól ó, Alla re zetó éto sínó, **11** furafuri sobór edde bordac táki bolla íbar mohíma ola kudurutir fura bole mozbut ó, edde kúcir sáañte **12** Baf or cúkur goró, Zibá ye añára re nur ot asé de pak bonda ókkol or miras or bági óibar kaabel banaiyé. **13** íba ye toh añára re andár or hókumot ottu rehái gorí Nizor adorja Fuar raijjet fargaráifelaiye, **14** ze Fuar duara añára rehái faiyí, yáni gunár maf faiyí. **15** Hé Fua óilde noirahar Allar súrot; íba ebbe age lóti asé aar íbar tokka tamám mohóluk ókkol or uore. **16** Kiyólla-hoilé asman ot edde zobin ot ziín dahá zah de asé aar ziín dahá no zah de asé, beggún íbar duara beh foida óiye, híin raastri óuk yáh kémota, hókumot óuk yáh adíkar; hárr kessú íbar duara íba lla beh foida gorá gíyeh. **17** íba hárr kessúr age lóti asé, aar hárr kessú íba ye beh tíkai raké. **18** íba óilde gaar matá, yáni zomát or; íba óilde cúru aar mora ttu zinda gorá gíyeh de foóila zon, zeéne hárr kessút íbar tokka uore

ó. **19** Kiyólla-hoilé Baf ottu fosón laiggé de, Nizor fura kúdayi íbar bútoe táka, **20** aar íba ye kúruc or uore bácaiye de lou wór usílaye cánti aní yore íbar duara hárr kessú re Nizor lloi bonaifélaí bolla; híin zobin or gún óuk yáh asman or gún. **21** Tuáñra toh ek hale Alla ttu duré accíla aar nizor bura ham edde báfanir zoriya íbar duccon accíla, **22** montor yala íba ye Nizor Fuar insáni haiyar moot or usílaye tuáñra re Nizor lloi bonaifélaiye, tuáñra re Nizor muúntu pak, behosúr, edde honó dak sára házir gorí bolla— **23** zodi tuáñra iman ot mozbut buniyadir sáañte dorógori lagi táko, aar acá waán ottu lori no zogói ziyán fúinno de kúchóbor ottu faiyó. Hé kúchóbor toh asman or nisor tamám mohóluk ókkol or hañse tobolik gorá gíyeh; añí Pául híyan or háadem óiyi. **24** Añí tuáñrar wasté duk ókkol fair de híyan ot kúci, aar Mosihr ze duk-mosibot ókkol íbar gaa lla, yáni zomát olla baki asé híin añr gaat loi fura gorír. **25** Allar diiya zimmadari mozin añí tuáñrar fáida lla hé zomát or háadem óiyi, tuáñrar hañse Allar kalam furafurir sáañte tobolik gorí bolla, **26** yáni gufoni waán ore, ziyán guzorigiyói de tamám zobana edde nosól ókkol ottu lukai raká gíyl, montor yala íbar pak bonda ókkol or hañse zahér gorá gíyeh. (aíñ g165) **27** Alla ttu ítara re zanaidito monehoiyé de, Beyohúdi ókkol or hañse hé gufoni híyan or mohíma hotó ñoñr. Hé gufoni óilde, Mosih tuáñrar bútoe asé, ziyán óilde mohímar bági óibar acá. **28** Añára fottíkiyo re fura giyane úñciyari dí edde taalim di yore tobolik goríde óilde íbar baabute, zeéne fottíkiyo re añára Mosihr bútoe furafuri balok hálote Allar muúntu házir gorí fari. **29** Hé niyote añí zan-foran di meénnot gorír, Mosihr oh kudurut or bole ze kudurut añr bútoe zuresúre ham gorér.

2 Añr ttu tuáñra re yían zanaidito monehoór de ki, añí tuáñra lla, Laudíkiyat asé de ítara lla, edde zetará añré muk dehá nó deké ítara beggún olla hotó bicí meénnot gorír, **2** zeéne ítara muhábbote ek óizai nizor dil ot josba faa, aar furafuri buzár ttu ze furafuri fakkayi foida ó híyan or tamám dón hásil goré. Tói ítara Allar gufoni zanibó, yáni Mosih re siníbo, **3** Zibár bútoe níki giyan edde buddír tamám dón ókkol lukaiya asé. **4** Añí híyan etollá hoóir, zeéne tuáñra re honókiye miřá-miřá hotá ókkol hoói dúka dí no fare. **5** Kiyólla-hoilé añí tuáñrar hañse jisím or sáañte házir náí de óile yo, ruhr sáañte así. Tuáñrar tík solasol edde Mosihr uore tuáñrar iman or mozbuti deki añr

ttu bicí kúci lager. **6** Hétolla, tuáñra zehón Mosih Isá re Malik de kobul goijjó, tói íba llói lagi táki solo, **7** íbar bútoze mozbut cíñyor gasái edde íbar uore boni urí yore, aar tuáñra re cika gíyeh de héndilla góri iman ot mozbut táki yore edde hámica cúkuriya góri yore. **8** Úñciyar, honókiye tuáñra re insán or banaiya taalime edde behar dúkabazi lói cíkar gorífelai no fare fán, ziín aiyé de óilde insán or rosóm ókkol ottu edde duniyai hókumot goré de búť-ferot ókkol ottu; Mosihr torfóttu no. **9** Kiyólla-hoilé fura illayi íbar haiyar bútoze táke, **10** aar íbar bútoze tuáñra re furussat gorá gíyeh. íba óilde hárr hókumot-goróya edde adikari ókkol or matá. **11** íbar bútoze tuáñra re ázomi yó gorá gíyeh; hé ázomi híyan honó áte gorá gíyeh de no, bólke Mosih Nize beh goijjé, ziyán óilde jisím or uore guná ola fítorot or ze hókumot accíl, hé hókumot ottu tuáñra re azad goijjé. **12** Kiyólla-hoilé bápťisma lone tuáñra re Mosihr fúañti dohón gorífela gíyeh, aar Zibá ye íba re mora ttu zinda goijjé hé Allar kudurut or uore iman anóne tuáñra re híyan or duara íbar fúañti zinda gorá yó gíyeh. **13** Zeñtté tuáñra nizor gunáye edde jisím or be-ázomi hálote mora accíla, Alla ye toh tuáñra re Mosihr fúañti zinda goijjé, añárar tamám guná-háta ókkol maf gorídi yore, **14** edde añárar ulđa ze dolil ókkol accíl híin or dabi-dawa ókkol beggún baatel gorífelai yore. íba ye hé dolil ore kúruc ot zoloi mari dur gorífelaiye. **15** íba ye hókumot-goróya ókkol ore edde adikari ókkol ore kémota sára gorífelaiye, aar ítara ttu ziti yore beggún or muúntu ítara re córminda goijjé. **16** Hétolla honókiye tuáñra re hána-finar, honó id or, oñiccár, yáh ebaadot-ordin or baabute hosúri no douk. **17** Kiyólla-hoilé híin toh siríf muúntu aibó de híin or sába éna, montor asóliyyot toh Mosihr hañse éna asé. **18** Saiyó, zetará misá niróc kúwala re edde fírista ókkol or ebaadot gorá re fosón goré, ítara honókiye tuáñra re boccíc ottu maárum gorífelai no fare fán. Héndilla manúc ítara duniyaibi demake hánnak fúlizai, deikké de híin or đoóñr-đoóñr gof mare. **19** ítara matá re mozbut or sáañte dóri nó raké, zibá ttu modot looi gaa guñra girá edde rogťana loi zurazuijja táki Allar baráiyé baré. **20** Tuáñra de duniyai hókumot goré de búť-ferot ókkol ottu Mosihr fúañti morigiyógoi, tói tuáñra aijjó kiyá duniyaibir dóilla góri híyan or niyom-kaanune soloór, hoitó sailé, **21** “Yián no dóriyo! Waán na háiyoi! Yián no súñiyoi!” **22** Híin asé de óilde siz uúin beggún olla ziín estemal goitté-goitté borbad óizaybar asé;

híin óilde siríf insán or hókum edde taalim ókkol. **23** Becók niyom híine zettót ítara banaiya ebaadot or torika, misá niróc kúwala, edde nizor gaa re dab ot raká cika, híin saité gíyane bóra, montor jisím or azzu ókkol bon gorí bolla híine honó fáida no deh.

3 Hétolla, tuáñra re zettót Mosihr fúañti zinda gorá gíyeh, tuáñra uúin or talac ot táko ziín asman ot asé, zeřé Mosih Allar den đák ottu boirá asé. **2** Tuáñrar kíyal asmani gún or uzu rakó, duniyaibi gún or uzu no. **3** Kiyólla-hoilé tuáñra toh morigiyógoi, aar tuáñrar zindigi Mosihr fúañti Allar hañse lukaiya asé. **4** Zeñtté Mosih, Zibá óilde añárar zindigi, zahér óibo, hénťte tuáñra yó íbar fúañti mohímar sáañte zahér óiba. **5** Hétolla, tuáñra nizor duniyaibi fítorot ókkol ore marifélo, zendilla niki, zenákari, nafaki, kukíyal, bura moncá, edde lalsí ziyán óilde mutti fuñza loi borabor. **6** Kiyólla-hoilé nafórman ókkol or uore Allar gozzob toh híin or zoriya éna aiyér, **7** ziín ot tuáñra yó ek hale soillíla, zeñtté níki tuáñra híin mozin zindigi haraáila. **8** Lekin yala tuáñra ttu iín beggún óu dur gorífelo: guccá, rak, ducconi, bodnami, edde muk ottu bereijja hotá ókkol. **9** Ezzon ore ezzone misá hotá no hoíyó, kiyólla-hoilé tuáñra toh nizor furana fítorot ore híyan or hórkot cóo kúli félaidiyo, **10** aar noya fítorot ore fiñdífelaiyo, ziyán ore híyan or Banir súrot mozin noya gorá zát asé, zeéne tuáñra íba re furafurir sáañte zano. **11** Híyan ot Beyohúdi edde Yohúdir bútoze, ázomi goijjá edde be-ázomi goijjár bútoze, bidecóitta, gañiya, gulam, edde begulam or bútoze honó forók náí, montor Mosih beh hárr kessú, aar íba beggún or bútoze asé. **12** Hétolla, tuáñra zettót Allar baiccá, pak edde adorbon ókkol, tuáñra feťfurani, meérbani, niróci, cídayi, edde sobór lói nizor dil ore háñzo. **13** Ezzon or bór ezzone cóo, aar honókiyo ttu honókiyor ulđa cékayot tákile maf gorído; Malike zendilla tuáñra re maf gorídiye héndilla tuáñra ttu yó maf gorídiyar zorur. **14** Híin beggún or fúañti-fúañti muhábbot lói yó háñzo, ziyán óilde furafuri ektofákir ban. **15** Mosihr cánti re tuáñrar dil ot hókumot goittó dóh, kiyólla-hoilé tuáñra re hé cántit ek gaa ói bolla éna đaha gíyeh; aar cúkuriya gorát táko. **16** Tuáñrar dil ot Mosihr kalam ore furafurir sáañte tákito dóh, tamám gíyane ezzon ore ezzone taalim di yore edde nosíyyot gorí yore, aar nizor dil ot cúkuriyar niyyot rakí Allar hañse Zobur Córif or kawali, seér, edde ruúhanir gozól ókkol gaái yore. **17** Tuáñra ziín hoibá

hoó aar zín goríba goró, hárr kessú Malik Isár name beh goijjó, aar héntte íbar usílaye Baf Allar cúkur óu goijjó. **18** Bouwáin ókkol, tuáñra nizoré nizor-nizor hócom or hañse gosáido, kiyólla-hoilé Malik or bútoe híyan tík ham. **19** Hócom ókkol, tuáñra nizor-nizor bou wóre muhábbot goró; ítara lla tita no óiyo. **20** Fuain ókkol, hárr kessút tuáñrar bafmaar hotábattara mano, kiyólla-hoilé híyane Malik kúci ó. **21** Bafáin, nizor fuain dore no zalaíyó, zeéne ítarar dil no bángge. **22** Gulam ókkol, hárr kessút tuáñrar duniyaibi girós ókkol or hotábattara mano, maincóre kúci goróya ókkol or dóilla dahái bolla no, bólke Malik or door raki dil or ehélasir sáañte héndilla goró. **23** Tuáñra zín goró híin endilla fura dilmon di goró, zeén níki Malik olla beh gorór, insán olla no. **24** Tuáñra toh zano, tuáñra Malik or torfóttu miras boccíc faiba. Kiyólla-hoilé tuáñra toh Malik Mosihr éna hédmot gorór. **25** Kiyólla-hoilé zee niki bura ham goré íte nize goijjé de hé bura ham or notiza faibo, hére honó ektorfía náí.

4 Girós ókkol, tuáñrar gulam ókkol ore insáf edde hók adai goijjó; tuáñra toh zano, asman ot tuáñrar óu eggwá Girós asé. **2** Tuáñra úñciyare edde cúkuriyar sáañte dua gorát lagi táko, **3** aar fúañti-fúañti añára lla yó dua goríba de, Alla ye añára lla kalam boiyan goríbar duwar kúle fán, zeéne añára Mosihr gufonir baabute tobolik gorí fari, ziyán olla bouli añí bon así; **4** aró goríba de, añí híyan endilla sáf-sáf góri boiyan gorí fari fán zendilla añr ttu gorár zorur. **5** Honó eggwá mouka no hárai, torikar baárgwa manúc lói demak hárai soliyó. **6** Hámica tuáñrar hotábattarat nun diiyé fán moza tákar zorur, zeéne tuáñra haré hondilla gori zuwab diya foribó de zano. **7** Añr baabute hoitó sailé, añárar adorja báí Tukikus, zibá ézzon biccácdar háadem aar añárar fúañti Malik or ham-goróya, yóggwa ye añr hóbor beggún tuáñra re zanaibó. **8** Añí yóggwa re tuáñrar hañse etollá beh difeřáir, zeéne tuáñra añárar hálot ókkol zano aar yóggwa ye tuáñrar dil ot josba deh. **9** Yóggwar fúañti imandár edde adorja báí Onesímos ore yó difeřáir, zibá tuáñrar bútotu ekzon. Ítara tuáñra re eřé kii-kii ór beggún zanaidibo. **10** Añr fúañti ziyól ot asé de Aristarkuse tuáñra re sólám zanan, aar Bárnabas or sañsato báí Markuse yó zanan, zibár baabute tuáñra endilla hókum faiyó de ki, yóggwa tuáñrar hére ailé, estekbal goijjó. **11** Héndilla, Isá zibá re Yustus çake, yóggwa ye tuáñra re sólám zanan. Yohúdi ókkol or bútotu añr fúañti Allar

raijjo lla ham-goróya óilde siríf ítara; ítara óilde añr tosólli. **12** Mosih Isár gulam Epafaras, zibá tuáñrar bútotu ekzon, yóggwa ye tuáñra re sólám zanan; yóggwa ye tuáñra lla hámica dilmon di dua goré, zeéne tuáñra balok ói edde furafuri fakkar sáañte Allar fura moncár uore mozbut gori tíyai táko. **13** Yóggwar baabute añí hoói fajjum de ki, yóggwa ttu tuáñra lla, aar Laudíkiyat edde Hiyerapolis ot asé de ítara lla kúb sintabáfana asé. **14** Adorja çaktor Lukáse tuáñra re sólám zanan, héndilla Démase yó zanan. **15** Laudíkiyat asé de imandár báiboináin dore, aar Numfa re edde híbar gór ot zoma ó de zomát ore añr sólám díyo. **16** Ceñrí yíán tuáñrar hañse telawot goijjá óile, Laudíkiól or zomát or hañse yó telawot gorá báyo, aar Laudíkiya ttu añr ze ceñrí gán aibó, tuáñra híyan óu telawot goríyo. **17** Arkipus ore hoibá de, “Malik or hédmot gorí bolla tuáñre ze zimma diiya giyéh, híyan furafuri adai gorí bolla saiyo.” **18** Añí Páule nizor áte e sólám lekír. Añí bon así de híyan no foóraiyo. Tuáñrar uore rahámot zari tákouk.

1 Tisólóniól

1 Añí Pául, añr fúañti Sílwanus edde Timóti yó asé.

2 Añára tuáñra re añárar duat mazé yaad rakí tuáñra beggún olla Alla re hámica cúkuriya gorí. **3** Tuáñra imane goijjío de ham ore, muhábbote goijjío de meénnot ore, edde añárar Malik Isá Mosihr uore acá rakí asé de sobór ore Baf Allar muúntu dua goríbarcot añára nitti monot rakí; **4** kiyólla-hoilé, ó báiboináin ókkol, Allar adorbon ókkol, añára zani, íba ye tuáñra re basíloiye. **5** Kiyólla-hoilé añára toh tuáñrar hañse kúchóbor tobolik goijjío de siríf hotáye no, bólke kudurute, Pak-Ruhr bole, edde furafuri ekin or sáañte yó. Tuáñra toh zano, añára tuáñrar fúañti tákite tuáñrar wasté hondilla gori zindigi hařaáilam. **6** Tuáñra ɔoñr mosibot ot úddwa, Pak-Ruhr diiya kúciye añárar boiyan kobul gorí añárar edde Malik or nomuna mozin zindigi hařaáila. **7** Híyan lói tuáñra Makedóniya edde Akaya elakar tamám imandár ókkol olla nomuna bonigiyógói. **8** Tuáñrar héntu Malik or kalam siríf Makedóniyat edde Akayat fólīgiyoi de no, bólke tuáñra ttu Allar uore asé de iman or hóbor hárr zagat eén fólīgiyoi, añára ttu híyan or baabute honó kessú howá no fore. **9** Kiyólla-hoilé añára tuáñrar hére aiccílam de híyala tuáñra añára re hondilla gori kobul goijjílla de, aar tuáñra keéngori mutti fuñza bad di Allar uzu fíri aái zinda edde sóiyi Allar hédmot gorát asó de, híin manúc ókkole nize añára re hoó, **10** ítara yíán óu hoó de ki, tuáñra Allar Fua asman ottu aibár entezar ot asó, zibá re íba ye mora ttu zinda goijjé, yáni Isá re, zibá ye añára re aibó de gozzob ottu basaibó.

2 Báiboináin ókkol, tuáñra toh zano, añára tuáñrar hére aiccílam de híyan behar nó óiyó. **2** Tuáñra yíán óu zano de ki, yaar age añára Filíppi cóor ot duk faáilam edde beizzoti óilam. Montor bicí bazá ókkol tákile yo, Allar torfóttu hímmot fai yore añára tuáñrar hañse Allar kúchóbor boiyan goijjío. **3** Kiyólla-hoilé añára gorí de nosíyot toh honó gollot taalim ottu no, honó nafak yáh férokbazir niyote yó no. **4** Bólke Alla ye zendilla añára re laayek báfi kúchóbor or zimma diiyé, añára siríf hé mozin beh boiyan gorí. Insán ore kúci goríbar niyote no, bólke añárar dil zasai goré de hé Alla re kúci goríbar niyote. **5** Tuáñra toh zano, añára honódin honókiyor hañse tuládiya hotá hoiyi de náí, aar lalós or niyote honó bahána diyi de yó náí.

Alla gobá asé. **6** Añára honó insán ottu izzot faito yó saiýi de náí, tuáñra ttu yó nó saái aar oinno kiyó ttu yó nó saái. Háleke Mosihr sáhabi ísafe añára saitám bóuli tuáñra ttu dabi gorí faittam. **7** Montor tuáñrar dormiyan ot añára endilla cída ói táikkilam, zendilla gori maa ye nizor fuain dore fale. **8** Añára tuáñra re bicí ador gorí de hétolla añára tuáñrar hañse cúdu Allar kúchóbor tobolik goittó kúci accílam de no, bólke nizor zan dito yó kúci accílam, kiyólla-hoilé tuáñra toh añárar kúb adorda óigiyogói. **9** Báiboináin ókkol, tuáñra ttu toh añárar duk edde meénnot ókkol yaad asé, ki hoilé, tuáñra re Allar kúchóbor tobolik goríbar fúañti-fúañti añára dine raite ham óu goijjío, zeéne tuáñra honókiyor hañse añára zulap ói no zaygói. **10** Tuáñra yó gobá asó aar Alla yó gobá asé de ki, tuáñra imandár ókkol lói añárar solasol hotó pak, sóiyi, edde behosúr accíl. **11** Tuáñra toh zano, bafe nizor fuain dore goré de héndilla góri tuáñra fottíkiyo re añára nosíyot goijjíllam, tosólí dílam edde buz dílam de ki, **12** tuáñra Alla kúci ó de héndilla góri solo, zibá ye tuáñra re Nizor raijor edde mohímar bági ói bolla ɔaker. **13** Añára etollá yó lagatar Allar cúkur gorí, kiyólla-hoilé zeñtté tuáñra añárar boiyan fúni Allar kalam kobul goijjío, héñtte tuáñra híin insán or no bólke asóle zendilla héndilla ísafe kobul goijjío, yáni Allar kalam ísafe. Híine tuáñra imandár ókkol or bútoe ham gorát asé. **14** Báiboináin ókkol, tuáñrar hálot toh Allar zomát uúin or ɔóilla zíin Yohúdiya elakat Mosih Isár bútoe asé. Kiyólla-hoilé tuáñra yó de nizor koum ottu undilla zulúm faiyó zendilla ítara nizor koum Yohúdi ókkol ottu faáil, **15** zetará Malik Isá re yó marifélail, nobi ókkol ore yó marifélail, aar añárar uore yó zulúm goijjé. Hétolla ítara re Alla ye fosón no goré; ítara manúc beggún ore ducconi goré. **16** Beyohúdi ókkole nejat faibo bouli ítara añára re tarár hañse tobolik no goittó maná goré. Héndilla góri ítara hámica nizor guná lói gunár címa foijjonto foónsegai. Ítarar uore gozzob furafuri aáigiyoi. **17** Montor, ó báiboináin ókkol, añára re zehón tuáñrar hañsóttu kessú ɔaim olla alok gorífela gíyeh, háleke jisím duré óile yo añárar dil tuáñrar fúañti asé, añára tuáñrar muk deki bolla ɔoñr azzur sáañte bicí kucíc goijjío. **18** Kiyólla-hoilé añára ttu tuáñrar hañse aitó monehoiyé. Háasgori añí Páule barbár kucíc goijjíllam, montor Cóitane añára re bazá díye. **19** Añárar Malik Isá zeñtté aibó héñtte íbar muúntu añárar acá, kúci edde fohórar tas hontará? Híin tuáñra no né? **20**

Becók, tuáñra óilade añárar fohórai, aar tuáñra óilade añárar kúci.

3 Baade añára zettót ar bordac gorí no farir, añára Aten cóor ot ekéla táaiza gom óibo de báfi **2** añárar báfi Timóti re diferáiyi, zibá añárar fúañti Mosihr kúchóbor tobolik gorí Allar ham goré. Añára yóggwa re diferáiyi de tuáñra re mozbut gorí bolla, aar tuáñrar iman or baabute tuáñra re josba di bolla, **3** zeéne e mosibot iín or zoriya honókiye físsá no zoogói. Tuáñra nize toh zano, añára re híin olla beh tík gorá gíyeh. **4** Kiyólla-hoilé añára tuáñrar fúañti tákite tuáñra re age lóti howát accílám de ki, añárar uore zulúm óibo. Aar tuáñra zano, borabor héndilla óiye yó. **5** Hétolla bóuli añi zettót ar bordac gorí no farir, añi tuáñrar iman or hálot saitó diferáiyi deh; kiyólla-hoilé añi ttu door accíl de, óitofare lbiíce tuáñra re dúka díye aar añárar meénnot befózul óigiyoi. **6** Montor ehón Timóti tuáñrar héntu añárar hañse waafes aiccé, aar aái tuáñrar iman or edde muhábbot or bála hóbor zanaiyé. Yóggwa ye hoiyé de, tuáñra añára re hámica bála báfo, aar tuáñra ttu añára re dekíto eddúr azzu lager zeddúr añára ttu yó tuáñra re dekíto azzu lager. **7** Hétolla, ó báiboináin ókkol, añárar tamám ferecanit edde mosibot ot mazé yó tuáñrar imane añára tosólí faiyí. **8** Yala añára noya zindigi faiyí fán lager, kiyólla-hoilé tuáñra Malik or hañse mozbut asó. **9** Tuáñrar zoriya Allar muúntu añára ttu ze doónr kúci asé, híyan olla Alla re keéngori cúkuriya goittám añára no zani. **10** Añára raite dine fura dilmon di dua gorí de, añára tuáñrar muk dekí fari fán, aar tuáñrar iman or homi ókkol fura gorí fari fán. **11** Añárar Alla Baf Nize edde añárar Malik Isá ye añára tuáñrar hépe aibár rasta gorídouk. **12** Malike goróuk, zendilla añárar muhábbot tuáñra lla baái fore, héndilla tuáñrar muhábbot óu zen ezzon ottu ezzon olla edde tamám manúc ókkol olla bicí ói baái fore, **13** zeéne íba ye tuáñrar dil ore mozbut goríde, zeéne añárar Malik Isá Nizor pak bonda beggún ore fúañti looi aibó de híyala tuáñra añárar Baf Allar muúntu behosúr edde pak tóoro.

4 Ó báiboináin ókkol, ahéri hotá óilde, tuáñra de añára ttu cíkko, Alla re kúci goitté hondilla solar zorur deh, aar becók tuáñra héndilla soloór óu. Toóu tuáñra re añára Malik Isár name becábici aros gorír, tuáñra héndilla góri aró solat táko. **2** Kiyólla-hoilé tuáñra toh zano, Malik Isár díiya adíkare añára tuáñra re kii-kii hókum ókkol diyí. **3** Alla ye saá de, tuáñra pak

ó; yáni hárr dóilla zená ttu duré táko; **4** aar fottíkiye nizor-nizor gaa re pak edde izzot or sáañte sóoñli rakí zano, **5** jisím or azzu mozin soli no, zendilla Alla re no siné de Beyohúdi ókkole goré. **6** Aró saá de ki, hé mosóla lói honókiye honó imandár báfi or hótí no goróuk aar yóggwa ttu fáida no tulóuk, kiyólla-hoilé Malike híin goré de ítara re sáñza díbo. Añára híin tuáñra re yaar age lóti hoóidiyi aar horagori úñciyari díyi. **7** Kiyólla-hoilé Alla ye toh añára re nafak solasol olla ñaikké de no, bóлке pak solasol olla. **8** Hétolla, zee niki hé cíkka re inkar goré íte insán ore inkar goijjé de no, bóлке Alla re goijjé deh, zibá ye tuáñra re Nizor Pak-Ruh diiyé. **9** Báiyali muhábbot or baabute tuáñrar hañse lekíbar honó zorur náí, kiyólla-hoilé Alla ye toh tuáñra re ezzon ore ezzone muhábbot goittó cíkaiye. **10** Aar becók, tuáñra toh fura Makedóniyat asé de imandár báiboináin beggún or hañse híyan adai gorór. Toóu, ó báiboináin ókkol, añára tuáñra re aros gorír, tuáñra ítara re aró bicí muhábbot goró. **11** Añára tuáñra re hoóilam de héndilla, tuáñra cántir zindigi harai bolla, ar ezzon or gún ot nak gólai no di bolla, edde nizor áte meénnot gorí bolla niyot bano. **12** Tói tuáñra baárgwa maincór ttu kodor faiba aar tuáñra honó muútac ot no foribá. **13** Ó báiboináin ókkol, añára no saái tuáñra moot or gúm ot foijjé de ítarar baabute azanaiya táko, zeéne tuáñrar dil uitarár dóilla ferecanit no zetará ttu acá náí. **14** Añára zettót Isá moijjíl aar abar zinda óiye de biccác gorí, tói añára yíán óu biccác gorí de ki, íbar fúañti Alla ye uitará re yó loizaybói zetará hé Isár uore iman aní moot or gúm ot foijjé. **15** Malik or kalam mozin añára tuáñra re hoóir, añára zetará Malik nú aiyé foijjonto zinda basi tákiyum, añára moot or gúm ot foijjé de ítarar agor ttu zaigói no faijjum. **16** Kiyólla-hoilé Malik Nize toh doónr abase hókum díbar fúañti-fúañti asman ottu lami aibó; héñtite boro fíristar abas fúna zaybo aar Allar cíañ mata zaybo. Hé októt, age uitará zinda óibo zetará Mosihr ummot boni morigílgoi. **17** Yárbaade, añára zetará zinda basi táikkum, añára re yó ítarar fúañti asman ot Malik loi mili bolla miyúlar uore tulfela zaybo. Tói añára hámica Malik or fúañti óiyum. **18** Hétolla, hotá iín hoói ezzon ore ezzone tosólí díyo.

5 Ó báiboináin ókkol, híin hon zobatan óibo aar hon októt óibo, híin tuáñrar hañse lekíbar zorur náí. **2** Kiyólla-hoilé tuáñra nize toh bálagori zano,

ki hoilé, Malik aibár din yíba raitta sur aiyé fángori aibó. **3** Zeñtté manúc ókkole hoibó de, “Beggún cánti ógiyoi, ðoorabár kessú náí,” héñtte ítarar uore endilla asimbit ðoóñr docá aázayboi, zendilla hámil mayafuar uore hooñri dórani aázagoi. Ítara bilkúl hári no faribó. **4** Lekin, ó báiboináin ókkol, tuáñra toh andár ot no, zeén níki hé din tuáñrar uore sur aiyé fángori aitó; **5** kiyólla-hoilé tuáñra beggún toh nur or edde ðin or foór or fuain. Añára rait or óu no aar andár or óu no. **6** Hétolla, aiyó, añára oinno manúc or ðóilla gúm no zai, bólke seton táki aar úñic ot táki. **7** Kiyólla-hoilé zetará gúm zah ítara raitta éna gúm zah, aar zetará nicá háa ítara raitta éna nicá hái tuúl ó. **8** Montor añára zettót ðin or foór or, hétolla aiyó, añára úñic ot táki. Buk or héfazot olla iman edde muhábbot ore laráir zama ísafe fiñdí, aar matár héfazot olla nejat or acá re ðufi ísafe fiñdí. **9** Kiyólla-hoilé Alla ye toh añára re gozzob olla ðík gorí raikké de no, bólke añárar Malik Isá Mosihr usflaye nejat fai bolla. **10** Íba añárar wasté moijjíl de kiyólla-hoilé, añára seton táki yáh moot or gúm ot fori, añára zeéne íbar fúañti basi táki. **11** Hétolla, hámica ezzon ore ezzone tosólí dóh; aar ezzon ore ezzone torki goró, zendilla tuáñra yala yó gorór. **12** Báiboináin ókkol, añára tuáñra re aros gorír, zetará tuáñra lla meénnot goré, zetará Malik or ummot ísafe tuáñrar uore sóddari goré, edde zetará tuáñra re nosíyot goré, ítara re kodor goijjó. **13** Ítarar ham or wasté ítara re muhábbot or sáañte bicí izzot diyo. Ezzon loi ezzone cántit táikko. **14** Ó báiboináin ókkol, añára tuáñra re nosíyot gorír, ocót ókkol ore torbiyot goijjó, hímmot sára re hímmot díyo, komzur ore modot goijjó, sobór or sáañte fottíkiyo re bordac goijjó. **15** Saiyó, honókiye burair bodol burai no goijjó, bólke hámica ezzon ore ezzone edde manúc beggún ore bálai goittó kucíc goijjó. **16** Hámica kúci táikko, **17** nitti dua goijjó, **18** hárr hálót ot Alla re cúkuriya goijjó, kiyólla-hoilé Mosih Isár bútoe tuáñra lla Allar moncá óilde híyan. **19** Pak-Ruh re nifái no félaiyo. **20** Aar nobi ísafe Allar kalam boiyan goré de híin hékarot no goijjó, **21** bólke hárr kessú tahákít goijjó; ziyán gom híyan dóri táikko; **22** aar hárr ðóilla burai ttu duré táikko. **23** Cánti dooya Alla Nize tuáñra re furafuri pak-sáf goróuk, aar tuáñrar gaa re, ruh re, edde zan ore otóðin foijjonto furafuri behosúr rakóuk, zetóðin añárar Malik Isá Mosih nú aiyé. **24** Zibá ye tuáñra re ðaikké, íba toh biccácdar; íba ye héndilla háamaha goríbo. **25** Báiboináin ókkol, añára lla dua goijjó. **26**

Tamám imandár báiyain dore pak dile appá dí sólam zanaiyó. **27** Malik or name añí tuáñra re hókum gorír, e ceñrí gán báiboináin beggún or muúntu foríyo. **28** Añárar Malik Isá Mosihr rahámot tuáñrar uore zari tákouk.

2 Tisólóniól

1 Añí Pául, añr fúañti Sílwanus edde Timóti yó asé.

2 Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **3** Báiboináin ókkol, añára ttu tuáñra lla Allar hañse hámica cúkuriya gorár zorur. Héndilla gorón etollá sóiyi, kiyólla-hoilé tuáñrar iman bicí barér aar tuáñra fottíkíyior muhábbot afós ot zetó éto bicí ór. **4** Hétolla bóuli Allar zomát ókkol or hañse añára tuáñra re lói borái gorí fari, ki hoilé, tuáñra foór de tamám zulúm edde mosibot ot úddwa nizor sobór edde iman ore ñikai raikkó. **5** Híin beggúne sábut goré de, Alla ye hók bisar goré, hétolla tuáñra re Allar raijior laayek bouli gona zaybo, ziyán olla tuáñra duk foór. **6** Allar hók bisar óilde, zetará tuáñra re duk deh, íba ye ítara re duk díbo, **7** aar tuáñra zetará duk foór, íba ye añárar fúañti tuáñra re yó aram díbo, oñtté zeñtté Malik Isá Nizor taakotwala fírista ókkol ore fúañti looi zoler de ooin ot gori asman ottu zahér óibo, **8** uitará re sáñza dí bolla zetará Alla re no siné aar zetará añárar Malik Isár kúchóbor ore amól no goré. **9** Manúc ítara Malik or cáikka ttu edde íbar mohímar taakot ottu dur ói sáñza ísafe abadulabadi dónco faibo, (aiñonios g166) **10** oñtté zeñtté íba ye Nizor pak bonda ókkol or hañse nizor mohíma zahér gorá zay bolla edde íbar uore iman ainné de ítara beggún or hañse taajuippa ói bolla aibó. Ítarar bútoze tuáñra yó asó, kiyólla-hoilé tuáñra de añárar gobá fúni iman ainnó. **11** Híin monot rakí añára hámica tuáñra lla dua gorí de, Alla ye tuáñra re íbar ñak or laayek bouli gonouk, aar tuáñra ttu asé de bálai goríbar hárr azzu edde iman or amól ókkol ore Nizor kudurute fura goróuk, **12** zeéne añárar Allar edde Malik Isá Mosihr rahámote tuáñrar duara añárar Malik Isár nam or taarif ó, aar íbar duara tuáñrar taarif ó.

2 Báiboináin ókkol, añárar Malik Isá Mosih aibár edde añára re íbar hañse zoma gorá zaybar baabute hoitó sailé: añára tuáñra re yían aros gorír, **2** maincé Malik aibár din aáigiyoí hoilé bánggori buddí háraiya yáh ferecan ói no zayogói. Ítara honó dorcón deikké, yáh wahí nazil óiye, yáh añárar torfóttu ceñrí faiyé hoilé úddwa biccác no goijjó. **3** Honókiye tuáñra re honó mikká ttu dúka no douk. Kiyólla-hoilé din yíba toh otódin nu aibó zetódin beebák manúc Allar ulða ói nó zagoi, aar Nafórmainna uite, yáni borbadir fua

zahér nó. **4** Íte maincé ziín ore kúda bóuli hoó edde ziín ore fuñza goré, híin beggún or ulða goríbo edde nizoré nize híin or ñoóñr kúwalaibo. Íte endilla úddwa goríbo, Allar gór or bútoze góli boói yore Alla bouli dabi goríbo. **5** Tuáñra ttu yaad náí né, añí tuáñrar fúañti tákite híin beggún tuáñra re hoóilam dé? **6** Tuáñra toh zano, yala ítare kiyé oóñli raikké, zeéne íte nizor októ ailé zahér ó. **7** Kiyólla-hoilé bedinir gufon ham toh aijjó solat asé. Montor Zibá ye aijjó oóñlat asé íba ye otódin foijjonto héndilla gorát tákibo zetódin íba re lariféla nó zah. **8** Yárbaade hé Nafórmainna zahér óibo, zaré Malike Nizor gal or niyáce marifélaibo aar Nizor aár tozollí loi hótom gorífelaibo. **9** Hé Nafórmainna íte Cóitan or kémotaye aái hárr kisím or misá keramoti ókkol, edde taajuippa ham ókkol gorí daháibo, **10** aar borbadi ókkol ore hárr ñóilla beimani loi dúka díbo. Manúc ítara etollá borbad óibo, kiyólla-hoilé nejat fai bolla ítara sóiyir muhábbot ore kobul nó goré. **11** Hétolla bóuli Alla ye ítarar hañse gumrár asór diferáibo, zeéne ítara misá gún ore sóiyi bóuli biccác goré. **12** Aar notiza óibo de, ítara ziíne sóiyir uore iman nu aní burait ayaci goijjé, ítara beggúne Allar torfóttu sáñza faibo. **13** Lekin, ó báiboináin ókkol, tuáñra Malik or adorbon ókkol olla añára ttu Alla re hámica cúkuriya gorár zorur, kiyólla-hoilé Alla ye toh tuáñra re foóila cúrut lóti etollá basfloíye, zeéne tuáñra Pak-Ruhr duara pak-sáf ói edde sóiyir uore iman aní nejat fo. **14** Íba ye tuáñra re añára tobolik goijjé de kúchóbor or duara etollá ñaikké, zeéne tuáñra añárar Malik Isá Mosihr mohímat córik ói faro. **15** Hétolla hoóir, ó báiboináin ókkol, añára tuáñrar hañse muké yáh ceñrír sáante ze taalim diyí híin ot mozbut gori tíyai táko, aar híin ore dóri rakó. **16** Añárar Malik Isá Mosih nize, edde añára re muhábbot gorí rahámote ofúrani tosólli edde bála acá diiyé de añárar Baf Alla ye, (aiñonios g166) **17** tuáñra re dil ot tosólli douk, aar ziín gom híin amól gorí bolla edde hoi bolla tuáñra re mozbut goróuk.

3 Ó báiboináin ókkol, ahéri hotá óilde, tuáñra añára lla dua goríba de, Malik or kalam endilla hára fólizagoi fán edde izzot faa fán, zendilla gori tuáñrar dormiyan ot óiye. **2** Aró goríba de, añára hóraf edde nafórman ókkol or át ottu basi táki fán, kiyólla-hoilé manúc beggún toh imandár no. **3** Montor Malik toh biccácdar; íba ye tuáñra re mozbut goríbo, aar íbilíc or át ottu héfazot rakíbo. **4** Añára ttu tuáñrar baabute

Malik or uore bóraca asé de ki, tuáñra uúin gorór aar goríba zín añára hókum díh. **5** Malike tuáñrar dil ore Allar muhábbot or uzu edde Mosihr bordac or uzu loizat tákouk. **6** Báiboináin ókkol, añárar Malik Isá Mosihr name añára tuáñra re hókum dír, tuáñra uitará ttu duré tákiyo, zetará isarbisar sára zindigi haṛa aar añárar torfóttu tuáñra faiyó de taalim mozin no sole. **7** Tuáñra nize toh zano, tuáñra ttu añárar nomuna mozin solar keén zorur, kiyólla-hoilé añára toh tuáñrar hére tákite isarbisar sára góri nó soli, **8** aar honókiyo ttu maana hána yó ná hái, bólke añára raite dine duk-meénnot goijjí, zeéne tuáñra honókiyor hañse añára zulap ói no zaygói. **9** Añára héndilla goittám de añára ttu modot faibar hók nu accíl de no, bólke kiyólla-hoilé, zeéne añára tuáñra lla bála nomuna boni aar tuáñra añárar hé nomuna mozin solo fán. **10** Añára tuáñrar hére tákite yó tuáñra re e hókum dílam de ki, “Zar ttu ham goittó mone no hoó, íte hána no hóuk.” **11** Añára fúnir de, tuáñra ttu kessú maincé isarbisar sára góri zindigi haṛar. Ítara honó ham no goré, bólke hámica oinno maincór ham ot nak gólaide. **12** Héndilla maincóre añára Malik Isá Mosihr name hókum dír edde nosíyot gorír, tuáñra nizám or sáañte hamai nizer hána nize zuu goró. **13** Montor tuáñra, ó báiboináin ókkol, bálai goitté-goitté óran no óiyo. **14** Zee niki añára e ceñrít leikkí de hotá amól no goré, ítare ót gorí ítar lói sákbak no raikkó, zeéne íte córom faa. **15** Toóu ítare duccon bouli no ʔaaijjo, bólke imandár báí ísafe nosíyot goijjó. **16** Cánti dooya Malik Nize tuáñra re hárr hálót ot cánti diiyat tákouk. Malik tuáñra beggún or fúañti tákouk. **17** Añí Páule nizer áte e sólám lekír. Yíán óilde añr fottí ceñrír nicán; añí héndilla góri beh lekí. **18** Añárar Malik Isá Mosihr rahámot tuáñra beggún or uore zari tákouk.

1 Timóti

1 Añí Pául, añárar Nejatdoya Allar edde añárar acá Mosih Isár hókum mozin Mosih Isár éggwa sáhabi. **2** Timótír hañse lekír, zibá iman or hé rúwate añr sóiyi fua. Tor uore Baf Allar edde añárar Malik Mosih Isár torfóttu rahámot, meérbani, edde cánti nazil óuk. **3** Añí Makedóniya elakat zaibarcót toré zendilla aros goijjílám héndilla ífisas cóor ot ták, zeéne hére hodún manúc zetará gollot taalim ókkol deh ítara re maná gorí faros. **4** Ítara re hoibí de, banaouti kissá ókkol or uzu edde lamba-lamba háandan or lectír uzu díyan no di bolla, zííne ðoilla-boðoilla barábari beh foida goré. Híin lói Allar niyot buzí fara no zah, buzí fara zah de siríf imane. **5** Añr e hókum or moksót óilde, cáda dil ottu, bála hélom ottu, edde háti iman ottu muhábbot foida gorón. **6** Montor hodún manúce híin bad di behazor gof ókkol ot lagi táikke. **7** Ítara ttu monehoór de, Córiyot or alem óito; montor ítara zíin hoó yáh zíin ekin or sáañte dabi goré híin nize úddwa no buzé. **8** Añára zani, Córiyot gom, zodi sóiyi torika loi estemal goré. **9** Añára yíán óu zani de ki, Córiyot forhésgar ókkol olla díiya gyíl de no bólke Allar niyom bāngoya ókkol olla, Allar nafórman ókkol olla, bedini ókkol olla, gunágar ókkol olla, nafak ókkol olla, forhésgar no de ítara lla, baf ore yáh maa re kotól-goróya lla, kúni ókkol olla, **10** zenákur ókkol olla, morote-morote edde maya ye maya ye zená-goróya ókkol olla, gulam códor ókkol olla, misákur ókkol olla, misá gobá ókkol olla, edde ar badbaki zedúne sóiyi taalim or muhálef goré ítara lla, **11** ze taalim óilde taarífdár Allar torfóttu ðoóñr kúchóbor, ziyán tobolik goríbar zimma añré díiya giyé. **12** Añárar Malik Mosih Isá zibá ye añré toóufik díiyé, añí íbar cúkur gorír, kiyólla-hoilé íba ye añré biccácdar báfi íbar ham ot lagaiyé. **13** Zodi añí ek hale kuféri-goróya, zulúmkur, edde zaalem accílám de óile yo, toóu añr uore rahám gorá giyeh, kiyólla-hoilé híin toh añí imandár nó óite no buzí goijjílám deh. **14** Añárar Malike añr uore ódorbaára rahámot goijjé, aar Mosih Isár hañsóttu foida ó de iman edde muhábbot óu furafuri díiyé. **15** E hotá yíán sóiyi aar furafuri kobul or laayek de ki, Mosih Isá duniyait aiccíl de gunágar ókkol ore basaitó, zetarár bútoe ebbe ðoóñr gunágar gwá añí. **16** Lekin Alla ye añr uore etollá rahám goijjé, zeéne añí zibá ebbe ðoóñr gunágar, añr bútoe Mosih Isá ye Nizor ocímána sobór ore zahér gorí fare, aar híyan zen uitará lla ekkán nomuna bone,

zetará íbar uore iman aní ofúrani zindigi faibo. (aiōnios g166) **17** Becók, Zibá abadulabadi Baáñcca, Zibá fána no, Zibá noirahar, hé siríf Allar izzot edde mohíma abadulabad foijjonto ówat tákouk. Aamin. (aiōn g165)

18 Ó añr fua Timóti, yaar age tor baabute ze agun hotá howá gyíl, hé mozin añí toré e hókum man dir, zeéne tui hé agun hotá monot rakí bála laráit dilezane larái gorí faros, **19** aar tor iman edde bála hélom zen zari táke; kiyólla-hoilé hodún maincé nizor hélom or hédaiyot nó mane de hétolla, nizor iman zaáñs bānge fán bāngigiyoi. **20** Ítarar bútoe Huminayus edde Alexzendar óu cámil asé, zetará re añí Cóitan or át ot gosáidiyi, zeéne ítara kuféri no gorá cíke.

2 Añr ebbe agor aros óiye de, tuáñra tamám manúc ókkol olla Allar hañse aros, dua, cúwaric, edde cúkuriya goró. **2** Héndilla, baáñcca ókkol olla edde tamám adikari ókkol olla yó goró, zeéne añára dindári edde izzoitta solasol loi nirol or sáañte cántir zindigi harai fari. **3** Héndilla gorón nán añárar Nejatdoya Allar nozor ot bála; híyane íba kúci ó. **4** Íba ye saá de, insán beggúne nejat fouk aar sóiyi re buzí farouk, **5** ki hoilé, Alla asé de ekgwá, aar Allar edde insán or mazé usíla asé de yó ekgwá, íba óilde manúc Mosih Isá, **6** zibá ye níki insán beggún or zan or bodol Nizor zan diyé, ziyán óilde borabor októti híyan or gobá díye deh. **7** Hétolla beh Alla ye añré tobolik-goróya edde sáhabi banaiyé, zeéne añí Beyohúdi ókkol or hañse iman or edde sóiyir ustat ói fari. Añí hāñsa hotá hoóir deh, misá hotá no. **8** Hétolla, añí saái de, hárr zagat morotfuain de honó guccá sára edde torkatorki sára, nizor pak át ókkol tulí dua goróuk. **9** Héndilla añí yíán óu saái de ki, mayafuain de nizoré izzot-córome edde forhés or sáañte izzoitta gori hoorsuor loi hāñzouk, sul or binis, cúna, mukta, yáh dami hoorsuor loi no, **10** bólke ítara endilla gori zindigi harouk, zendilla dindár mayafuain dor ttu gom ham ókkol gorí zindigi harar zorur. **11** Maiya fuain de nizáme edde furafuri fórmadarir sáañte cíkka hásil goróuk. **12** Taalim di bolla yáto morotfuair uore hókumot solai bolla añí honó mayafua re ezazot no dih. Ítara ttu nizám ói tákon zorur. **13** Kiyólla-hoilé age toh Adom ore éna bana gyíl, yárbaade Háwa re. **14** Dúkat toh Adom foijjíl de no, bólke Háwa ye éna fori Allar hókum báinggil. **15** Toóu híba ye fuain biyar zoriya nejat faibo, zodi ítara nizoré forhés rakí imane edde muhábbote pak zindigi hara.

3 Yíán hók hotá de ki, ze manúce zomát or neta óito saá, íba ye ekkán gom zimmadarir azzu gorér deh. **2** Zomát or neta behosúr ówa foribó, siríf ek bou wór hócom ówa foribó, forhés góri soloya ówa foribó, nizoré sóoñloya ówa foribó, izzotdár ówa foribó, meémandari-goróya ówa foribó, edde taalim dibar kaabel ówa foribó. **3** Íba nicákur no ówa foribó, maramari-doya no bólke cída ówa foribó, hoijja-fózzat goróya no ówa foribó, òiañ-foicár lalósbón no ówa foribó. **4** Íba ttu nizor gór ore bálagori sóoñli fara foribó, aar nizor fuain dore izzot or sáañte dab ot rakí fara foribó. **5** Kiyólla-hoilé ze manúce nizor foribar ore sóoñli no zane, íba ye Allar zomát ore keéngori sóoñlibo? **6** Íba noya imandár no ówa foribó, arnóile íba fohórai ye fúli urí Ibilíc or dóilla sáñzar laayek óibo. **7** Aró, baárgwa maincór hañse íbar cúnám táka foribó, arnóile íba bodnam zurai Ibilíc or fán ot forizaybói. **8** Héndilla, zomát or háadem ókkol ottu yó izzotdár ówa foribó, ehélas ówa foribó, córabkur no ówa foribó, aar òiañ-foicár lalósbón no ówa foribó. **9** Ítara ttu iman or gufoni háñsa re sáf dile dóri raká foribó. **10** Ítara re age zasai gorí sár zorur, baade zodi behosúr tóore, tói háademi ham gorí faribó. **11** Héndilla, ítarar bou wáin ókkol ottu yó izzotdár ówa foribó, ar ezzon or gifot-goróya no bólke forhés góri soloya ówa foribó, aar hárr kessút imandari táka foribó. **12** Háadem ottu yó siríf ek bou wór hócom ówa foribó, aar nizor fuain dore edde gór or badbaki manúc ókkol ore bálagori sóoñli fara foribó. **13** Ze háadem ókkole bálagori háademi goré ítara izzot zuraibó, aar Mosih Isár uore ítara ttu asé de iman or baabute bicí hímmote boiyan gorí faribó. **14** Añí tor hépe bicí hára ai bolla acá goillé yo, añí tor hañse iín etollá lekír, zeéne **15** zodi añí aité deri óile yo, tui yíán zani faros de ki, manúc ottu Allar foribar ot, yáni zinda Allar zomát ot hondilla solasol tákar zorur, ze zomát óilde sóiyi taalim or tñni edde buniyadi. **16** Honó cók náí, añárar iman or gufoni bicí dōoñr, ki hoilé, íba zahér óoil insán or súrote; aar behosúr bóuli sábut goijjíl Pak-Ruh ye; íba re deikkíl fírista ókkole. Íbar baabute tobolik gorá gíyl Beyohúdi ókkol or hañse; maincé íbar uore iman ainníl duniyait mazé; íba re uore tulífela gíyeh mohímar sáañte.

4 Pak-Ruh ye hárasira góri hoó de ki, ahéri zobanat kessú manúc iman ottu lorizaybói, aar dúkabaz ruh ókkol or uzu edde bít or taalim ókkol or uzu

mon dibo. **2** Héndilla taalim ókkol aiyé de misákur ókkol or munaféki ttu, zetarár hélom ore gorom bóoñr lói marhá maridiya giyéh. **3** Ítara biyá-cádi no goittó edde hodún-hodún hána baz rakító maná goré, ze hána gún ore Alla ye foida goijjé de kiyólla hoilé, imandár ókkole edde sóiyi re zanoya ókkole zen híin cúkuriya gorí háa. **4** Allar foida goijjá hárr kessú gom, ekkán ore yó háram tñaribar náí zodi Alla re cúkuriya gorí háa, **5** kiyólla-hoilé híin toh Allar kalame edde duaye pak-sáf óizagoi. **6** Tui zodi e hotá gún imandár báiboináin dore buzái dós, tóoile tui Mosih Isár éggwa nekkar háadem óibi, tui toh iman or hotá ókkol or baabute edde nize mani soloór de bála taalim or baabute torbiyot faat asós. **7** Duniyaibi kissá ókkol ottu duré tákic, zín ore burá mayafuain dor banaouti kaháni hoilé yo fare. Yárbodol nizor dil ore dindári zindigi harai bolla bana. **8** Kiyólla-hoilé gaa re banailé siríf kessú fáida asé deh, lekin dil ore dindári lla banailé hárr mikká ttu fáida asé, kiyólla-hoilé dindárit e zindigir edde ahérot or zindigir waada asé. **9** Híyan toh hók hotá aar furafuri kobul or laayek. **10** Hétolla éna añára meénnot edde duk gorír, kiyólla-hoilé añárar acá zinda Allar uore raikkí, zibá manúc beggún or Nejatdoya, háasgori uitarár zetará níki íbar uore iman ané. **11** Tui ítara re iín or hókom edde taalim dic. **12** Tui juwan bouli honókiye hékarot no goróuk, bólke tui hotábataraye, solasole, muhábbote, imane, edde pak tákaye imandár ókkol olla nomuna bon. **13** Añí nú aiyí foijjonto pak-kalam telawot gorát, nosíyot gorát, edde taalim diyat birana ták. **14** Tor bútoze ze niyamot asé híyan ore éckara no goríc, ziyán zomát or buzurgó ókkole tor uore át díye rár agun hotár duara faiyós. **15** Hoiyí de híin or uzu furafuri díyan déh; híin lói fori ták, zeéne tor ruúhanir torki beggúne deké. **16** Nizor uzu edde taalim diyar uzu díyan rak. Híin ot lagi ták, kiyólla-hoilé héndilla goillé tui nizoré yó edde tor boiyan fúne de ítara re yó nejat fa bay faribí.

5 Honó morot murubbi re no jéjjeráic, bólke yóggwa re nizor baf ore buzá fángori buzáic; juwan morotfuain dore buzáite nizor báí ore buzá fángori buzáic; **2** maya murubbi ókkol ore buzáite nizor maa re buzá fángori buzáic; aar juwan mayafuain dore buzáite nizor bóin ore buzá fángori furafuri sáf dile buzáic. **3** Ze rari ókkol or saásita-goróya náí, ítarar saásita goríc. **4** Montor honó rari ttu zodi fuain yáh

natiyáin táke, ítara ebbe age nizor gór or saásita gorí dindári zindigi haṛa cíkók. Héengori ítara nizor dada-bafdadar gun fúñzi faribó, kiyólla-hoilé híyan Allar fosóndar. **5** Ze sóiyi rarir honó saásita-goróya náí híba ye nizor bóraca Allar uore rakí, raite dine fóriyat or sáañte dua gorát fori táke. **6** Montor ze rari ye ayaci gorí zindigi haṛa, híba toh zinda tákile yo mora. **7** Híin óu nosíyot goríc, zeéne ítara uore honó elzam lagaibár no táke. **8** Zodi honókiye nizor egana-guicíc re saásita no goré, háasgori nizor foribar ore, híyane dahá de íte nizor iman ore inkar goijjé. Manúc íte gairimandár ottu túaro hóraf. **9** Honó rari re rarir seráng ot tulíte híbar boc háit bosór or nise no ówa foribó; híba ye siríf nizor hócom lói milmilab goijjíl de ówa foribó, **10** gom ham or nam táka foribó, nizor fuain dore ðoóñr goijjíl de ówa foribó, for ore meémadari goijjíl de ówa foribó, Allar pak bonda ókkol or téng dúwai díyl de ówa foribó, dukkíta ókkol ore modot goijjíl de ówa foribó, edde hárr ðoilla gom ham gorát fori táikkil de ówa foribó. **11** Montor juwan rari ókkol ore seráng ot no tulíc; kiyólla-hoilé zeñtté ítara ttu biyá goríbar mon aiyé, ítara ttu Mosihr ðoor homi zay abar biyá goittó monehoó. **12** Aar héndilla góri ítara agor waada báñgi nizoré hosúrbon tóora. **13** Aró, ítara góre-góre zai yore boirá tákar adot bana; siríf híyan no, bólke ítara for or gifot goré, aar oinno zon or maamelat téng gólaidi endilla hotá ókkol hoó zín ítara ttu no hoón sáa. **14** Hétolla ańí saái, juwan rari ókkole biyá gorók, fuain biyouk, nizor gór sóoñlók, zeéne duccone bodnam goríbar moouka no faa. **15** Kiyólla-hoilé hodún rari ókkole toh sóiyi rasta ttu lorizai cóitan or fisáli doijje. **16** Zodi honó imandár mayafua ttu nizor foribar or bútoze rari ókkol táke, híba ye zomát or uore fuñzá tulí no dí nize ítara saásita gorók, zeéne zomáte rari uitarár saásita gorí fare zetará saásita-goróya náí. **17** Ze murubbi-neta ókkole zomát ore bálagori sola, ítara dui gun izzot faibar laayek, háasgori uitará zetará meénnot or sáañte tobolik goré edde taalim deh. **18** Kiyólla-hoilé pak-kalam ot toh endilla asé, “Dán úñror de goru re hoóñr no diyó.” Yíán óu asé, ki hoilé, “Muzure nizor muzuri faibar laayek.” **19** Dui zon yáh tin zon gobá no tákile murubbi-netar ulða honó elzam no gosíc. **20** Montor ze murubbi-neta ókkole guná gorát táke, ítara re manúc beggún or muúntu hosúri dahái dic, zeéne argúne úñciyari hásil goré. **21** Alla re, Mosih Isá re, edde basfloiya fírista ókkol ore muúntu

gorí ańí toré horagori nicót gorír, honókiyo lla buk no tani híin amól goríc, ektorfiaye honó kessú no goríc. **22** Zimma dii bolla honókiyor uore toratori át no dic, aar oinno zon or gunát cámil no óic. Nizoré pak-sáf rak. **23** Baná faní hái-hái no tákic; tor feṛor wasté edde tor ttu egazá ze biyaram ór híyan or wasté ekka-ekka anggur or roc óu háic. **24** Hodún manúc or guná sáf zahér, hétolla ítara bisar age ó; ar hodún or guná fore beh zahér ó. **25** Borabor héndilla, gom ham sáf zahér, aar zín sáf zahér no híin óu lukaiya táki no fare.

6 Zedún gulam ókkol gulamir zuañl or tole asé, ítara beggún ottu nizor-nizor girós ore furafuri izzot or laayek bouli báfar zorur, zeéne Allar nam or edde ańárar taalim or bodnam no. **2** Ze gulam ókkol ottu imandár girós asé, ítara imandár bóuli gulam ókkole ítara re izzot no gorí no tákók, bólke aró bicígori ítara hédmot gorók, kiyólla-hoilé ítara ham ottu zetará fáida faar ítara toh adorda imandár ókkol. Tui iín taalim deh edde nosíyot gór. **3** Zee niki arek ðoilla taalim deh zín sóiyi hotá lói, yáni ańárar Malik Isá Mosihr hotá lói edde dindárir taalim loi mil no há, **4** íte fohór ola aar kessú no buzé. Lofzó ókkol or baabute barábari don edde torkatorki don ítar ékkan biyaram, zín or notiza ric, hoijja-fózzat, galagali, gollot cók-cubá, **5** edde bigíri-zaiya demak ola edde Allar sóiyi náí de maincór dormiyan ot hámica keranghal. Ítara tãare de, dindári zindigi haṛailé nofá asé. **6** Háleke zín asé híin lói kúci táki dindári zindigi haṛailé beh ðoóñr nofá asé. **7** Kiyólla-hoilé ańára duniyait aité de kessú nú aní, aar duniyai ttu zaibarcót óu fúañti kessú loizai no faijjum. **8** Hétolla zodi ańára ttu háibar hána edde fiñdíbar hoor táke, híin lói kúci tákon sáa. **9** Lekin zetará tuangor óito saá, ítara ðoilla-boðoilla entán ot edde fán ot fore, aar ítara dil ot behazor edde lussáni azzu ókkol foida ó, ziíne manúc ore borbadi edde dóncot ðufáifele. **10** Kiyólla-hoilé tĩañfoicár muhábbot óilde hárr kisím or hórafir ékkan guijja. Kessú manúce tĩañfoicár lalóse iman ottu lorizai nizor uore ðoóñr ferecani ainné. **11** Montor tui, ó Allar bonda, híin beggún ottu dáizagoi, aar forhéggarir, dindárir, iman or, muhábbot or, sobór or edde nomir fisé lagi ták. **12** Iman or laráit bálagori larái gorí zah; ofúrani zindigi re dóri rak, ziyán olla toré ðaha giyé, ziyán or baabute tui bicí maincór cáikkat cíkar goijjíl. (aiōnios g166) **13** Alla, zibá ye hárr kessú re foran dee, íba re cáikkat gorí edde Mosih Isá,

zibá ye Pontiyus Filat or muúntu Nizor baabute sóiyi gobá díyl, íba re cáikkat gorí añí toré tuaijjo dir, **14** tui nidak edde behosúr táki añr hókum amól gór, zetódin añárar Malik Isá Mosih zahér nó. **15** Kiyólla-hoilé Alla ye toh íba re borabor ÷aim ot zahér goríbo. Hé Alla óilde taarífdár, siríf íba óilde Hókumot-goróya, íba baáñcca ókkol or Baáñcca aar malik ókkol or Malik.

16 Siríf íba óilde Zibá fána no ó. íba honó insán zai no fare de héndilla nur ot táke. íba re no honókiye deikké aar no honókiye deki fare. íbar izzot edde ofúrani raastri zari tákouk. Aamin. (aiōnios g166) **17** Zetará e duniyait tuangor asé ítara re hókum díbi de, fohór ola no óito, edde ítarar acá honó biccác náí de dón-cómbottir uore no rakí Allar uore rakíto, Zibá ye níki añára re añárar kúci lla hárr kessú a÷alikka gori diiféle. (aiōn g165) **18** Ítara re hoibí de, oinno zon or bálai goittó, gom ham or tuangor óito, dilkúla góri sótká goittó, edde oinno zon ore nizor dón-cómbottir bák diito toiyar tákito. **19** Héndilla goríle ítara nizor lla dón zoma óibo, yáni ítarar muúm or lla endilla ekkán mozbut buniyadi bonibó ziyán or uore týai ore ítara sóiyi zindigi re dóri rakí faribó. **20** Ó Timóti, toré zín or zimma diiya giyéh híin ore héfazot rak. Duniyaibi behazor hotábattara ttu edde mil no há de ze barábari re maincé goltir sáañte “giyan” hoó, híin ottu basi ták. **21** Kiyólla-hoilé hodúne hé giyan or dabi gorí iman or rasta háraifelaiye de asé. Allar rahámot tuáñra beggún or uore zari tákouk.

2 Timóti

1 Añí Pául, Allar moncá mozin edde Mosih Isár hañse asé de zindigir waada mozin Mosih Isár éggwa sáhabi. **2** Añr adorja fua Timótir hañse lekír. Tor uore Baf Allar edde Mosih Isá añárar Malik or torfóttu rahámot, meérbani edde cánti nazil óuk. **3** Ze Allar ebaadot añí añr dada-bafdada ókkol or dóilla sáf dil ottu gorí, añí toré añr duat hámica yaad gorí hé Allar cúkur gorí. **4** Tor hañdani monot urí añr ttu toré saitó kúb monehoór, zeéne añí kúciye bóri zaygoi. **5** Tor háti iman or baabute añr ttu monot asé, ziyán age tor nani Lowis ottu edde tor maa Eunik ottu yó accíl. Añr ttu furafuri ekin asé de ki, héndilla iman tor ttu yó asé. **6** Hétolla añí toré yaad goráidir, tor uore añr át díyaye Allar torfóttu tui ze niyamot faiyós, híyan ore aró zolai tul. **7** Kiyólla-hoilé Alla ye toh añára re dōor or ruh diiyé de no bólke taakot, muhábbot, edde nizoré sóoñlibar ruh diiyé deh. **8** Hétolla añárar Malik or gobá díte no cóрмаic, aar añí zee niki íbar wasté bon así, añré lói yó no cóрмаic, bólke Allar diiya taakote kúchóbor tobolik gorí bolla añr fúañti duk faa. **9** Kiyólla-hoilé Alla ye toh añára re nejat diyé aar pak zindigi harai bolla ðaikké; héndilla goijjé de añárar honó ham or zoriya no, bólke íbar erada edde rahámot mozin, ze rahámot añárar uore duniyair foidayecir age lóti Mosih Isár usílaye óiye, (aiōnios g166) **10** aar yala híyan añárar Nejatdoya Mosih Isá aiyóne añárar hañse zahér óiye. Hé Mosih ye moot ore dónco gorífelaiye, aar zindigi edde omoroni re kúchóbor or duara zahér gorídiye, **11** ze kúchóbor tobolik gorí bolla añré tobolik-goróya, sáhabi edde ustat ísafe basíloiye. **12** Hétolla bóuli añí e duk iín beggún fair; toóu añí córminda no, kiyólla-hoilé añí zani añí har uore iman ainní deh, aar furafuri ekin asé de ki, añí íbar át ot ziyán gosáidiyi híyan ore íba ye íbar waafesir din foijjonto héfazot rakí faribó. **13** Tui añr torfóttu ziín or taalim faiyós híin ore sóiyi taalim ísafe dóri rak, aar Mosih Isár uore asé de imane edde muhábbote zindigi hara. **14** Ze amanot toré diiya giyé híyan ore, añárar bútoe táke de Pak-Ruhr bole héfazot rak. **15** Tui toh zanos, Ecíya elakar manúc beggún añr ttu alok óigiyoi, ítarar bútoe Fugilas edde Hirmuginas óu asé. **16** Unisífaras or gór tía re Malike rahám goróuk, kiyólla-hoilé yóggwa ye añr mon ore boóut bar foñfoiṭṭa goijjé, aar añí bon así bouli íba córminda nó, **17** bólke Rom cóor ot aái yóggwa ye añré bicígori

tuwai añr lói dola óiye. **18** Malike goróuk, yóggwa ye zen Malik or waafesir din íba ttu rahám faa. Tui to bálagori zanos, yóggwa ye añré ífisas cóor ot hotó modot goijjíl.

2 Hétolla, ó añr fua, Mosih Isár hañse asé de rahámote mozbut óizagoi. **2** Aar bicí gobá ókkol or cáikkat añr muk ottu ze taalim tui fúinnili, hé taalim ore eén biccácdar manúc or át ot dee zetará ttu oinno zon ore yó taalim dibar kaabeliyoti asé. **3** Mosih Isár ek bála fóous or dóilla añr fúañti duk faa. **4** Honó fóouse toh larái goittó zailé awam ókkol or maamelat bazi no táke, zeéne íte ítar zonnal ore kúci gorí fare. **5** Héndilla, kélát lami zee niki kélar niyom mozin no kela, íte zitar boccíc no faa. **6** Ze cacá ye meénnot goré, niyom mozin fósol or bák ebbe age íte éna faa. **7** Añí ziín hoóir híin báfi saá, Malike toré hárr kessú buzíbar toóufik diibo. **8** Dawud or nosól or Isá Mosih re mora ttu zinda gorá giyé de híyan yaad rakíc. Híyan óilde añí tobolik gorí de kúchóbor, **9** ziyán olla añí acámir dóilla duk fair, zeén niki añí bon así; lekin Allar kalam toh bon no. **10** Hétolla Allar basíloiya bonda ókkol or wasté añí hárr kessú bordac gorí, zeéne ítara yó Mosih Isár hañse asé de nejat hásil goré, aar ofúrani mohíma miras faa. (aiōnios g166) **11** Yíán hók hotá de ki, “Añára zettót íbar fúañti moijjí, añára íbar fúañti basi tákiyum óu. **12** Zodi añára duk bordac gorí, añára íbar fúañti hókumot goríyum óu. Zodi añára íba re inkar gorí, íba ye yó añára re inkar goríbo. **13** Añára beiman óizaile yo, íba bilkúl beiman ó de náí, kiyólla-hoilé íba ye toh Nizoré misá tōorai no fare.” **14** Allar pak bonda ókkol ore tui hotá híin monot goráide, aar Alla re cáikkat gorí ítara re nosíyot goríbi de, ítara zen lofzó ókkol lói torkatorki no deh. Híine toh honó fáidai no goré, bólke fúnoya ókkol ore borbad goré deh. **15** Tui nizoré Allar muúntu endilla ham-goróya ísafe házir gorí bolla furafuri kucíc gór zibá re lói Alla kúci, yáni zibá ttu córminda óibar náí edde zibá ye sóiyi torika mozin sóiyi kalam or taalim deh. **16** Lekin duniyaibi behazor hotábattara ttu duré tákic, kiyólla-hoilé híine manúc ore zetó éto bedini banaifélaibo, **17** aar híin óilde endilla taalim ziín kensar or dóilla fólizayboi. Héndilla taalim-doyar bútoe Huminayus edde Filetus óu cámil asé, **18** zetará sóiyir rasta eridifélaiye; ítara hoó de, hañcor bitigiyói; héndilla hoói ítara hodún or iman nac gorífelar. **19** Montor toóu Allar buwáiya mozbut buniyadi toh

þíki táke, aar híyan ot e hotá moór maijja asé de ki, “Malike zane hontará íbar,” aar, “Zetará Malik or nam loh ítara kuham ottu duré tákouk.” **20** Bor gór ot toh baná cúnar edde sañdir sónhoddá ókkol táke de no, bólke gas or edde merir óu táke; hodún háas ham olla, aar hodún eénte ham olla. **21** Hétolla zee niki e bura ham íin ottu pak-sáf táke, íte háas ham or sónhoddá óibo. Ítare pak raká zaybo. Íte Malik or ham ot aibó, aar ze honó gom ham olla toiyar óibo. **22** Juwan hal or hóraf mon ottu dáizagoi, aar zetará pak dile Malik ore mata ítarar fúañti forhésgarir, iman or, muhábbot or, edde cántir fisé lagi ták. **23** Lekin behazor edde bekuippa torkatorki ókkol bad dic; tui toh zanos, híine sirif hoijja-fózzat beh foida goré. **24** Malik or gulam ottu hoijja-fózzat goróya no ówa foribó, bólke beggún or hañse meérban ówa foribó, taalim dibar laayek ówa foribó, aar bordac-goróya ówa foribó, **25** aar muhálef ókkol ore cída góri nosíyot-goróya ówa foribó, kiyólla-hoilé óitofare Alla ye ítara re touwá goríbar toóufik diibo, zeéne ítara Allar sóiyi re zani fare, **26** aar buzón ot aái íbilíc or fán ottu basizagói, ze íbilíce ítara re ítar mon mozin soli bolla bondi banai raikké.

3 E hotá monot rak de ki, ahéri zobanat ðoóñr mosibot or din aibó. **2** Kiyólla-hoilé manúc ókkol sirif nizoré muhábbot-goróya óizayboi, ðiañ-foicár lalósbon óizayboi, borái ola óizayboi, fohór ola óizayboi, bodnam-goróya óizayboi, bafmaar nafórman óizayboi, nacúkur óizayboi, nafak óizayboi. **3** Ítara ttu ador-muhábbot no tákibo; ítara berahám óizayboi, gifot-goróya óizayboi, nizoré sóoñli no faribó, zaalem óizayboi, bálai re nafórot-goróya óizayboi, **4** beiman óizayboi, senfól óizayboi, edde tukabbor óizayboi; ítara Alla re muhábbot no gorí ayaci gorá re muhábbot goríbo; **5** ítara re saité dindár lagibó, montor hákikot ot ítara dindárir asór ore inkar goríbo. Héndilla manúc ókkol ottu duré tákic. **6** Ítarar bútoe endilla hodún manúc asé zetará góre-góre zai bekuf mayafuain dore fán ot féla, ze mayafuain dor uore gunár fuñzá asé. Hé mayafuain dore ðoilla-boðoilla hóraf mone sola; **7** ítara hámica taalim fúne, montor Allar sóiyi re zani farar héddur honóðin foóñsi no fare. **8** Zendilla Jannise edde Jambrise Muúsar muhálef goijjíl, héndilla hé manúc híine yó sóiyir muhálef goré. Ítarar demak borbad óigiyoi, aar ítarar iman behar de sábut óigiyoi. **9** Montor ítara ar no baríbo, kiyólla-hoilé ítarar bekufai beggún or hañse sáf-sáf góri zahér óizayboi, zendilla

Jannis edde Jambris or óu óoil. **10** Lekin tui toh añr taalim, solasol, erada, iman, sobór, muhábbot, edde bordac or baabute zanos, **11** tui aró zanos de, añf hodún zulúm edde duk ókkol faiyí, yáni Enṭiyok, Ikóniya, edde Lusítara cóor ot añr uore kii-kii guzoijjé; hére añf hotó zulúm bordac goijjíl! Montor híin beggún ottu Malike añré basaiyé. **12** Becók, zetará Mosih Isár bútoe dindári zindigi haraitó saá ítarar uore zulúm óibo. **13** Montor bura edde dúkabaz manúc ókkol dinbodin aró hóraf óizayboi. Ítara nizoré yó gollot ot loizaybói, aar oinno zon ore yó gollot ot loizaybói. **14** Montor tui uúin ot lagi ták, zín cíkkos edde furafuri ekin goijjós, kiyólla-hoilé tui toh zanos híin hontará ttu cíkkos, **15** aar gurahale lóti tui pak-kalam zainti, zín óttu toré endilla giyan diibar taakot asé ze giyane Mosih Isár uore iman anár zoriya nejat hásil goríbar rasta daháide. **16** Pak-kalam or hárr hotá Allar torfóttu beh aiccé, híin taalim di bolla, hosúri daháidi bolla, sóiyi gorí bolla, edde forhésgarir torbiyot di bolla ham ot aiyé, **17** zeéne Allar bonda ókkol furafuri kaabel bone, aar hárr gom ham olla toiyar óizagoi.

4 Alla re cáikkat gorí, edde Mosih Isá zibá baáñcca ísafe hókumot goittó aibó de októtt zinda edde mora ókkol or bisar goríbo íba re cáikkat gorí añf toré horagori nicót gorír, **2** Allar kalam tobolik gor; ðaime beðaime toiyar ták; kúb sobór or sáañte taalim di manúc ore buz deh, uñciyari deh, edde nosíyot gór. **3** Kiyólla-hoilé eén októ aibó, zeñtté manúce sóiyi taalim no fúnibo, bólke nizor mon or azzu mozin ítara nizor lla endilla ustat ókkol dola goríbo, zetará ítara ttu zín fúnito han uñtar híin fúnaibo. **4** Ítara sóiyi ttu nizor han fíraifelai banaouti kissá ókkol or uzu han dibo. **5** Montor tui hárr hálót ot nizoré sóoñli rak, duk bordac gor, kúchóbor tobolik gor, edde Alla ye toré ze zimma diiyé híin adai gor. **6** Añr hotá hoitó sailé, añré ehón roc kurbanir ðóilla ðálidiya zar. Añf duniyai ttu zaibar októ aáigiyoi. **7** Añf bála laráit larái goijjíl, zibbat ore hótom goijjíl, aar iman ore ðikai raikkí. **8** Yala añr lla forhésgarir tas zoma goijjía asé, zibá insáfuala Bisarhar Malike íbar waafesir din ot añré diibo; sirif añré no, bólke uitará beggún ore yó diibo zetará muhábbot or sáañte íbar aár entezar ot asé. **9** Añr hañse toratori ai bolla kucíc gór. **10** Kiyólla-hoilé Démase e duniyai re muhábbot gorí añré eridiyé. Yóggwa Tisólonika cóor ot giyégói.

Kresken toh Galatíyat giyyégoi, aar Titus Dalmatiyat giyyégoi. (aiōn g165) **11** Añr fúañti asé de siríf Lukás, hétolla Markus ore tor fúañti loianíc, kiyólla-hoilé yóggwa re añr ham ot lager. **12** Añí Tukikus ore Ífisas ot diferáidiyi. **13** Toras ot Karpus or hére añí ze cál lan eri aiccí híyan tui aité loianíc, aar kitab pún óu loianíc, háasgori samara ola gún. **14** Tamar ham-goróya Alexzendare añr boóut lussán goijjé. Malike ítare ítar ham mozin bodola diibo. **15** Tui nize yó ítar ttu úñciyar tákic, kiyólla-hoilé íte añárar tobolik or bicí muhálef goijjé. **16** Zeñtté añré foóilabar añr sófai dí bolla bisar ot tulá gýl, héñtte honókiye añr sáañt nó deh, bólke beggúne añré félai giñgoi. Alla ye ítarar hé ham or ísafkitab no rakóuk. **17** Montor Malik añr fúañti accíl aar íba ye añré taakot dífl, zeéne añr duara kúchóbor furafuri tobolik goijjá óizagoi aar tamám Beyohúdi ókkole zen híin fúne. Híyan Alla ye añré cinggor muk ottu basaiyé deh. **18** Malike añré hárr bura ham ottu basaibó, aar sóiyi-sólamote íbar asmani raijjot loizaybói. Íbar taarif abadulabad foijjonto hámica ówat tákouk. Aamin. (aiōn g165) **19** Prisíla re edde Ekúila re, edde Unisífaras or gór tía re añí sólam díyi bóuli hoóic. **20** Erastus Kórin cóor ot táigiyo, aar Torofímos ore añí Miletus cóor ot eri aiccí, kiyólla-hoilé yóggwa ttu ocúk óiye. **21** Cítkhal or age ai bolla furafuri kucíc gór. Yubulus, Pudens, Linos, Kaludiya, edde tamám báiboináin dé toré sólam zanar. **22** Malik tor ruhr fúañti-fúañti tákouk. Tuáñrar uore rahámot zari tákouk.

Titus

1 Añí Pául, Allar gulam edde Isá Mosihr éggwa sáhabi. Añr zimmadari óilde, Allar basloiya bonda ókkol ore iman or foñt ot anón edde dindári zindigi haraibár ze sóiyi asé hé sóiyi ítara re zanaidon. **2** Hé sóiyiye ítara re ofúrani zindigir acá diibo; ze Alla ye bilkúl misá hotá no hoó íba ye hé zindigi diibar waada duniyai foida goríbar age lóti goijjíl, (aiōnios g166) **3** aar borabor októt Nizor hé kalam ore tobolik or duara zahér goijjé, ze tobolik or zimma añí añárar Nejatdoya Allar hókume faiyí. **4** Titus or hañse lekír, zibá Mosihr uore añárar dóilla iman ainné de hé rúwate añr sóiyi fua. Tor uore Baf Allar edde Mosih Isá añárar Nejatdoyar torfóttu rahámot edde cánti nazil óuk. **5** Añí toré Keret ñiyat etollá eri aiccí, zeéne ziín goríbar baki táigiyeigoi híin tui tík gorífelai faros edde añí toré zendilla hókum díyi hé mozin hárr cóor or zomát ot murubbi-neta ókkol tulí faros. **6** Monot rakíc, ze manúc ore tulíbi íba behosúr ówa foribó, ek bou wór hócom ówa foribó, íbar fuain imandár ówa foribó zetarár ayacir edde nafórmanir honó elzam náí. **7** Kiyólla-hoilé zomát or neta re Allar torfóttu zimma diiya giyéh isafe, íba behosúr ówa foribó, ekguañja no ówa foribó, bánggori guccá-goróya no ówa foribó, nicákur no ówa foribó, maramari-doya no ówa foribó, nazayes nofár lalósbon no ówa foribó, **8** bólke íba meémadari-goróya ówa foribó, gom ham ore fosón-goróya ówa foribó, akkól góri soloya ówa foribó, forhésgar ówa foribó, pak ówa foribó, aar nizoré sóoñli-faroya ówa foribó. **9** Íba ttu kalam uúin ot lagi táka foribó ziín biccácdar aar añára di de taalim or mozin, zeéne íba ye sóiyi taalim or duara nosíyot ókkol gorí fare aar zetará hé taalim or muhálef goré ítara gollot sábut gorí fare. **10** Kiyólla-hoilé ámanagoróya, galu edde dagabaz ókkol toh boóut zon asé, háasgori ázomi goijjá gún or bútoe. **11** Ítarar muk bon gorár zorur, kiyólla-hoilé ítara nazayes nofá hásil gorí bolla fura gór-gór endilla taalime borbád diféler ziín ítara ttu no don accíl. **12** Ítarar nizor ek nobi ye hoóil de ki, “Kereti ókkole hámica misá hotá hoó; ítara faári januwar or dóilla alcí edde ñain.” **13** Hotá híyan bilkúl sóiyi. Hétolla tui horar sáañte ítara golti daháide, zeéne ítara iman furafuri sóiyi óizagoi, **14** aar ítara zen Yohúdi ókkol or banaouti kissá ókkol or uzu edde ze manúc ókkol sóiyi ttu lorigiyói ítara hókum or uzu han no deh. **15** Zetará pak, ítara lla

toh hárr kessú pak; montor zetará nafak edde iman sára, ítara lla honó kessú pak náí, kiyólla-hoilé ítara zehén, hélom, duníyan nafak óigiyoi. **16** Ítara Alla re zani hoói dabi goré, montor nizor hamhorose íba re inkar goré. Ítara nafórot or laayek, nafórman, aar honó gom ham or kaabel no.

2 Montor tor ttu uúin boiyan gorár zorur, ziín sóiyi taalim loi mil há. **2** Morot murubbi ókkol ore hoibí de, hámica forhés góri soilto, izzotdár óito, nizoré sóoñlito; aar ítara iman, muhábbot edde sobór ore sóiyi rakíto. **3** Héndilla, maya murubbi ókkol ore yó hoibí de, izzoitta solasol rakíto, gifot-goróya no óito, córab or gulam no óito, bólke ziyán gom híyan oinno zon ore cíkaito, **4** zeéne ítara juwan mayafuain dore iín or torbiyot di fare, ki hoilé, nizor hócom ore muhábbot goittó, nizor fuain dore muhábbot goittó, **5** akkól góri soilto, pak tákito, gór or hammwa óito, meérban óito, aar nizor hócom or hókumot ore izzot goittó, zeéne Allar kalam or bodnam no. **6** Héndilla, juwan morotfuain dore yó akkól góri soilto buz dic. **7** Tui nize hárr kessút ítara hañse gom ham or nomuna bon. Taalim dite sóiyi niyote edde izzot or sáañte dic. **8** Aar héñtte endilla sóiyi lofzó ókkol estemal goríc, ziín ore honó elzam di faribár náí, zeéne tor muhálef ókkol ottu añárar baabute honó hóraf hoibár no táki córmindat fore. **9** Gulam ókkol ore hoibí de, hárr kessút mazé ítara girós or adíkar ore izzot goittó, ítara re kúci rakíto, ítara hotár uottú no matitó, **10** suri no goittó, bólke furafuri imandari daháito, zeéne ítara añárar Nejatdoya Allar taalim ore hárr mikká ttu cúndorgori háñzai fare. **11** Kiyólla-hoilé Allar oh rahámot toh zahér óiye, ziyán or usílaye insán beggúne nejat fa. **12** Híyane añára re cíka de, bedini edde duniyaibi mon ókkol ore inkar gorí, e jáhan ot máze akkól, forhésgari edde dindárir sáañte zindigi haraitó, (aiōn g165) **13** zeñtté añára kúci furaiya acá fura óibar entezar ot así, yáni zeñtté añárar Alla Tála edde Nejatdoya Isá Mosihr mohíma zahér óibar entezar ot así; **14** Zibá ye añára lla Nizor zan dyíl de, añára re hárr dóilla bedini ham ottu súrai bolla, edde añára re íba Nizor lla Nizor endilla éggwá háas koum banaitó pak-sáf gorí bolla zetará ttu gom ham goittó jus táke. **15** Híin taalim deh, aar furafuri adíkar or sáañte maincóre josba gólai déh, edde ítara golti daháide. Honókiye toré hékarot no goróuk.

3 Ítara re yaad goráide de ki, dec or hókumot-goróyar edde adikari ókkol or niyom or bútoe tákito, ítarar hotá manitó, fottí gom ham gorí bolla toiyar tákito, 2 honókiyor bodnam no goittó, hoiija-fózzat no goittó, edde cídár sáañte manúc beggún or hañse noromdari daháito. **3** Kiyólla-hoilé ek hale añára yó toh obuz, nafórman, edde gollot ot accílám, aar ðoilla-boðoilla mon or edde ayacir gulamit accílám. Añára ducconi edde hásorote beh zindigi haraitám; héñtte añára re yó nafórot gorá zayto aar añára yó nafórot goittám. **4** Montor zeñtté añárar Nejatdoya Allar meérbani edde muhábbot insán-zati lla zahér óiye, **5** héñtte Íba ye añára re basaifélaiye. Híyan añára nize goijjí de honó forhéggarir zoriya no, bólke Íbar meérbani mozin beh añára re Pak-Ruhr duara basaiyé deh, ze Ruh ye añára re dúifelai noya zormo diyé edde noya zindigi diiyé, **6** zibá re níki añárar Nejatdoya Isá Mosilhr duara Alla ye añárar uore furafuri dálidiye, **7** zeéne añára Íbar rahámote forhéggar tóori yore ofúrani zindigir mirasdár boni fari, ziyán or añára ttu acá asé. (*aiōnios g166*) **8** Híin hók hotá. Añí saái de ki, tui hotá híin hímmot or sáañte boiyan gor, zeéne zetará Allar uore iman ainné ítara gom ham ot lagi tákibar uzu díyan deh. Héndilla gom ham gorón toh manúc beggún olla bála aar fáidar ham. **9** Montor behar torkatorki, háandan or baabute matamati, aar Córiyot or baabute barábari edde hoiija-fózzat diya ttu duré tákic, kiyólla-hoilé híin ot honó fáida náí, híin behar. **10** Faáta-faáti foida goré de ítare ekbar duibar úñciyari dic, yárbaade goillé ítar llói ar taalukat no rakíc, **11** kiyólla-hoilé tui toh zanos, héndilla manúc ókkol sóiyi ttu lorigiyói, aar guná gorí-gorí nizoré hosúrbon tóora. **12** Zeñtté añí tor héře Artimas ore arnóile Tukikus ore diferáiyum, héñtte añr héře Nikópolis cóor ot zeéne faros héene ai bolla kucíc goríc, kiyólla-hoilé añí cítkhal héře haraibár fáisela goijjí. **13** Ukil Zenás ore edde Apólos ore ítarar sofór ot zai bolla zeddúr faros héddur modot goríc, zeéne ítara ttu honó homi no táke. **14** Añárar maincór ttu gom ham gorát lagi táka cíkon zorur, háasgori zeře goríbar bicí zorur óiye, arnóile ítarar zindigi cár nó óibo. **15** Añr fúañti asé de ítara beggúne toré sólám zanar. Imandár ókkol ore añárar sólám dic, zetará añára re muhábbot goré. Allar rahámot tuáñra beggún or uore zari tákouk.

Filimon

1 Añí Pául, Mosih Isár wasté eggwá hodi, añár fúañti añárar báí Timóti yó asé. Añárar adorja dustó edde sáañti ham-goróya Filimon or hañse, **2** añárar bóin Afiyar hañse, añárar sáañti iman or fóous Arkipus or hañse, edde Filimon or gór ot zoma ó de zomát or hañse lekír. **3** Tuáñrar uore añárar Baf Allar edde Malik Isá Mosihr torfóttu rahámot edde cánti nazil óuk. **4** Añí dua gorí de októ, tuáñre yaad gorí añr Alla re hámica cúkuriya gorí, **5** kiyólla-hoilé tuáñr ttu Allar tamám pak bonda ókkol olla ze muhábbot asé híyan or edde Malik Isár uore ze iman asé híyan or baabute añí fúnat así. **6** Añí dua gorí de, Mosihr duara añára ze bála-bála niyamot ókkol faiyí híin or baabute zankari hásil gorí yore imandár ókkol lói tuáñr taalukat zen aró baré. **7** Ó báí, tuáñr muhábbot dekí añí bicí kúci óiyi aar tosólli faiyí, kiyólla-hoilé tuñí de Allar pak bonda ókkol or dil ore foťfoiřřa goijjó. **8** Hétolla, sóiyi gán goittó tuáñre hókum goríbar añár ttu Mosihr bútoe furafuri hók asé de óile yo, **9** toóu añí tuáñre muhábbot or sáañte aros gorá fosón goijjúm. Añí óilam de Pául, burá manúc, añí yala yó Mosih Isár wasté hodi boni así. **10** Añí tuáñre añr fua Onesímos olla aros gorír, zibá re eřé ziyól ot imandár banai añí ítar ruúhanir baf óigiyigoi. **11** Yaar age íte tuáñr lla behazor accíl, montor yala duní zon olla, yáni tuáñr lla edde añr lla hazor óiye. **12** Añí ítare, yáni añr holizar tukuřa re tuáñr hañse waafes difeřáir. **13** Añí ítare añr fúañti rakí bolla saáilam, zeéne kúchóbor or wasté añí zetókkal ziyól ot bon táki, íte tuáñr zagat ói añr hédmot gorí fare. **14** Lekin tuáñr ezin sára añí honó kessú goríbar mon nó gorí, zeéne tuñí añré ze bálai goríba híin mojburiye no bólke kúcir sáañte goró. **15** Óitofare íte kessú októ lla tuáñr ttu etollá bóuli alok óigiyoi, zeéne tuñí ítare hámica lla waafes foo. (aiōnios g166) **16** Tuñí ítare ebarot siríf gulam ísafe faiba de no, bólke gulam or túaro bicí, yáni adorja báí ísafe faiba. Íte añr háas adorja, montor íte gulam edde Malik or bútoe báí ísafe tuáñr aró hotó adorja óibo fánllar! **17** Hétolla tuñí zodi añré tuáñr sáañti bóuli buzó, tooile añí óitam bóuli zendilla gori añré kobul goittá héndilla góri ítare kobul goró. **18** Aar zodi íte tuáñr honó lussán goijjíl de óile, yáh tuñí ítar ttu honó kessú foór de óile, híin añr name leki rakíyo. **19** Añí Páule nizor áte leki hoóir de, añí híin fúñzifelaiyum. Añr ttu de tuáñre hoibár zorurot nái

de ki, tuáñr zan añr gun or tole asé. **20** Ó báí, Malik or wasté tuñí añré ekkán meérbani goró de ki, Mosihr ummot ísafe tuñí añr dil ore foťfoiřřa goró. **21** Añí tuáñr fómadari re ekin gorí tuáñr hañse iín lekír deh; añí zani, añí tuáñre zín hoóir tuñí híin or túaro bicí goríba. **22** Aró ekkán hotá, añr lla ekkán musáferhána yó bondubos goríyo, kiyólla-hoilé añr ttu acá asé de ki, tuáñrar duaye añré tuáñrar hañse waafes diiféla zaybo. **23** Añr fúañti Mosih Isár wasté ziyól ot asé de Epafarase tuáñre sólám zanar, **24** héndilla añr fúañti ham-goróya Markus, Aristarkus, Démas, edde Lukáse yó tuáñre sólám zanar. **25** Malik Isá Mosihr rahámot tuáñrar ruhr uore zari tákouk.

Hibraniól

1 Agor zobatan Alla ye dada-bafɗada ókkol or hañse nobi ókkol or duara boóut kessú boóut torikaye hoóil de asé, **2** montor e ahéri zobatan Íba ye añára llói Íbar Fuar duara beh hotá hoiyé, Zibá re Íba ye hárr kessúr mirasdár banaiyé edde Zibár usílaye Íba ye duniyai yó foida goijjé. (aĩñ g165) **3** Aar Íba óilde Allar tozollir nur edde Íbar fura sóbi; Íba ye hárr kessú Nizor taakoti kalame sóoñli raké. Íba ye añárar guná ókkol dúifelai baade asman ot Alla Tálar den ɗák ottu boói táikke. **4** Hé ísafe, hé Fua fírista ókkol or túaro boóut bicí ɗoóñr óigiyoi, zendilla Íba ye miras ot híin or túaro boóut ɗoóñr nam faiyé. **5** Kiyólla-hoilé Alla ye Íbar honó fírista re honódin eén hoiyé de asé né, “Tuñí óilade Añr Fua, aijja Añí Tuáñr Baf óiyi”? Yáh eén hoiyé de, “Añí Íbar Baf óiyum, aar Íba Añr Fua óibo”? **6** Bólke zeñtté Íba ye Nizor foóila Fua re duniyait diferár, Íba ye hoór de, “Allar tamám fírista ókkole Íba re sóida goró.” **7** Fírista ókkol or baabute Íba ye hoór de, “Íba ye Nizor fírista ókkol ore boiyar bana, aar Nizor háadem ókkol ore ooin or zilha bana.” **8** Montor Fua re Íba ye hoór de, “Ó Alla, Tuáñr toktó abadulabad foijjonto hámica zari tákibo, aar insáfir larí óilde Tuáñr raijior larí. (aĩñ g165) **9** Tuñí forhégari re muhábbot goró aar bedini re nafórot goró; hétolla, Alla, Tuáñr Alla ye Tuáñr uore kúcir tel di basíloi yore Tuáñre Tuáñr sáañti ókkol or túaro uore goijjé.” **10** Íba ye aró hoór de, “Ó Malik, foóila cúrut duniyair buniyadi ɗáillo de Tuñí, aar asman ókkol óilde Tuáñr át or toiyari. **11** Híin toh nac óizayboi, montor Tuñí ɗiki tákiba; híin beggún hoor or ɗóilla furan óizayboi. **12** Tuñí híin ore saddor or ɗóilla bořifelaiba, aar híin ore bodoliféla zaybo. Montor Tuñí hámica ek ɗoilla tákiba, aar Tuáñr hóiyat honódin no fúraibo.” **13** Montor Íba ye honó fírista re honódin eén hoiyé de asé né, “Añr den ɗák ottu boiyó, zetukkún foijjonto Añí Tuáñr duccon ókkol ore Tuáñr foor tole gorí nó felai”? **14** Fírista ókkol beggún kí hédmot goré de ruh no, zíin ore uitarár hédmot goittó diferá gíyeh zetará nejat miras faibo?

2 Hétolla añára zíin fúinni, híin or uzu aró bicígori díyan diyar zorur, zeéne añára híin ottu dur ói no zaygói. **2** Kiyólla-hoilé zodi fírista ókkol or duara hoóil de hotá híin kaayem asé de óile, aar hárr hosúrir edde nafórmanir laayek sáñza faáil de óile, **3** tóoile añára

héntu keéngori hári fariyúm zodi añára eén ɗoóñr nejat ore éckara gorí? Hé nejat or baabute toh age Malike elan goijjé, baade zetará fúinne ítara híyan sóiyi de sábut díye. **4** Fúañti-fúañti Alla ye yó Nizor moncá mozin illayi-nicán, taajuippa harhána, ɗoilla-boɗoilla keramot, edde Pak-Ruhr niyamot ókkol lói híyan or gobá díyat accíl. **5** Íba ye añára ze aibár duniyair baabute hoóir, híyan ore toh fírista ókkol or kobzat nó deh. **6** Bólke pak-kalam ot ek zagat honókiye endilla hoiyé de asé, “Insán kii deh, Tuñí híin olla kíyal rakó de? Yáh adomzat kii deh, Tuñí híin ore saásita goró de? **7** Tuñí híin ore kessú ɗaim olla éna fírista ókkol or túaro niso banaiyó; Tuñí híin ore tas ísafe diiyó de óilde mohíma edde izzot; **8** Tuñí hárr kessú híin or foor tole gorídiyo.” Hé ísafe, Alla ye hárr kessú híin or kobzat gorídile toh Íba ye híin or kobzat no di honó kessú bad raikké de náí. Montor aijjó añára hárr kessú híin or kobzat no dekir. **9** Lekin añára toh Isá re dekir, Zibá re kessú ɗaim olla fírista ókkol or túaro niso gorá gíyeh, zeéne Allar rahámote Íba ye fottí manúc olla moot mukabela gorí fare. Íbar dukkór moot or zoriya Íba re tas ísafe mohíma edde izzot diya gíyéh. **10** Kiyólla-hoilé Alla, zibá lla hárr kessú asé, edde zibár usílaye hárr kessú asé, boóut fuain dore mohímat aní bolla Íba ttu ɗík laiggé de, ítarar nejat or bani re duk faa bay furafuri nal gorí bolla. **11** Kiyólla-hoilé zibá ye pak-sáf goré Íbar edde zetará re pak-sáf gorá gíyeh, ítara beggún or Baf toh ek. Hétolla Isá ye ítara re báiboináin hoité no cóрма; **12** Íba ye hoiyé de, “Añí Tuáñr nam Añr báiboináin dor hañse boiyar goijjúm, maáfil ot máze Añí Tuáñr taarif or seér gaiyúm.” **13** Aró hoiyé de, “Añí Íbar uore bóraca rakíyum.” Yíán óu hoiyé, “Ótiya, Añí edde Alla ye Añré diiyé de fuain híin.” **14** Fuain híin zettót gusso edde lou ola, hétolla Isá Nize yó ekí ɗóilla boinné, zeéne moot or duara Íba ye uitaré ɗonco gorífelai fare zar ttu moot or uore taakot asé, yáni lbiíc ore, **15** edde uitará re azad gorí fare zetará moot or ɗoore zindigibór gulamit asé. **16** Kiyólla-hoilé asóle Íba ye fírista ókkol ore modot goré de no, bólke Ibrahim or nosól ore beh modot goré. **17** Hétolla Íba ttu hárr ruwate Nizor báiyain lói ek ɗoilla ówa foijjé, zeéne Allar hédmot ot Íba ezzon raháman edde biccácdar boro imam boni insán or gunár koffara di fare. **18** Kiyólla-hoilé Íba Nize zettót entán or hálót ot duk bordac goijjé de asé, hétolla Íba ye zetará entán ot fore ítara re modot gorí fare.

3 Hétolla, ó pak báiboináin ókkol, zetará asmani ďak ot córik asó, Isár uzu soó, zibá Allar Rosúl edde Boro Imam bouli añára cíkar gorí. **2** Íba toh Ubár hañse biccáďdar accíl zibá ye íba re zimma dífl, zendilla Muúsa yó Allar foribar guñrat biccáďdar accíl. **3** Íba re toh Muúsar túaro bicí izzot or laayek gona gíyéh, zendilla gór banoya ttu gór or túaro bicí izzot asé. **4** Ze honó gór toh ezzon nó ezzone banaiyé de asé, montor hárr kessúr banoya óilde Alla. **5** Becók, Muúsa Allar foribar guñrat biccáďdar accíl de óilde gulam ísafe, zeéne fore boiyan óibo de híin or gobá déh; **6** montor Mosih toh Allar foribar or uore biccáďdar accíl de óilde Fua ísafe. Zodi añára añárar hímmot edde acár borái mozbut gori dóri rakí, túoile toh íbar hé foribar añára éna. **7** Hétolla, Pak-Ruh ye zendilla hoiyé, “Aijja zodi tuáñra íbar abas fúno, **8** tuáñrar dil doró no goijjó, zendilla Añré guccá tulí díyl de októt moidan zagat entán goijjíl de hé din goijjíl. **9** Hére tuáñrar bafďada ókkole Añré entán goijjíl edde zasai goijjíl, aar salic bosór foijjonto ítara Añr ham deikkíl. **10** Hétolla Añí hé nosól lói guccá óilam, aar hoóilam de, ‘ítarar dil hámica gollot ot zaat táke, ítara Añr rasta nó siné.’ **11** Tói Añí Añr guccáye hosóm háiyi de, ‘ítara Añr aram or zagat bilkúl góli no faribó.” **12** Ó báiboináin ókkol, hóboroddar, tuáñra honókiyo ttu zen endilla bura edde nabiccác ola dil no táke, ziyán zinda Alla ttu duré óizagoi. **13** Bólke ezzon ore ezzone fottí din nosíyot goró zetódin “aijja” bouli howá zah, zeéne tuáñra honókiyor dil gunár dúkaye doró ói no zagói. **14** Kiyólla-hoilé ze bóraca añára ttu cúrut accíl, híyan ore zodi ahéri foijjonto mozbut gori dóri táki, túoile toh añára Mosihr bútoe córik óigiyigoi. **15** Howá gíyeh de héndilla, “Aijja zodi tuáñra íbar abas fúno, tuáñrar dil doró no goijjó, zendilla Añré guccá tulí díyl de októt goijjíl.” **16** Abas fúni íba re guccá tulí díyl de híin hontará? Híin kí uitará beggún no zetará re Muúsa ye Ijíp ottu neelai ainní? **17** Aar salic bosór foijjonto íba hontará llói guccá accíl dé? Uitará llói no né zetará guná goijjíl, zetarár lac moidan zagat fori accíl? **18** Íba ye hontará lla e hosóm háiyi de, “ítara Añr aram or zagat bilkúl góli no faribó” zodi nafórmani goijjíl de ítara lla no óile? **19** Hé súrute añára deká de, ítara nabiccác or zoriya beh góli nó fare.

4 Hétolla, íbar aram or zagat gólibar waada zettót baki asé, añára ttu ďoorar zorur, zeéne tuáñra

honókiyo re híyan ottu maárum óiya lootfa no zah. **2** Kiyólla-hoilé kúchóbor or tobolik añárar hañse yó gorá gíyl, ítarar hañse yó gorá gíyl; montor ítara fúinne de hé kalame ítarar fáida nó goré, kiyólla-hoilé ítara toh híin fúni imane kobul nó goré. **3** Añára zetará iman ainní añára toh hé aram or zagat góli fari, zendilla íba ye hoiyé, “Tói Añí Añr guccát hosóm háiyi de, ‘ítara Añr aram or zagat bilkúl góli no faribó.” íbar ham duniyair foidayecir héñtte lóti hótom óiye de óile yo. **4** Kiyólla-hoilé íba ye pak-kalam or ek zagat háñt nombór or din or baabute hoiyé de, “Alla ye Nizor ham beggún hótom gorí háñt nombór or din aram goijjé.” **5** Aró hoiyé de, “ítara Añr aram or zagat bilkúl góli no faribó.” **6** Hétolla, zettót hodún hé aram or zagat gólibar baki asé, aar zetarár hañse age kúchóbor tobolik gorá gíyl ítara nafórmanir zoriya hére góli nó fare, **7** íba ye abar ekgwá din tĳk goijjé, zibá re boóut khál baade Dawud or duara “aijja,” bouli hoiyé. Zendilla age hoiyí, “Aijja zodi tuáñra íbar abas fúno, tuáñrar dil doró no goijjó.” **8** Zodi Yehócua ye ítara re hé aram or zagat gólaíye de óito, túoile toh Alla ye yárbaade ar ekgwá din or hotá no hoitó. **9** Hé ísafe, Allar bonda ókkol olla aram or din baki asé. **10** Hoitó saáir de, Alla ye zendilla Nizor ham hótom gorí aram goijjé, héndilla zee niki íbar aram or zagat góle, yóggwa ye yó nizor ham ottu aram faa. **11** Hétolla, aiyó, añára hé aram or zagat góli bolla hárr ďóilla kucíc gorí, zeéne honókiye uitarár nafórmanir nomunaye soli maárum ói no zagói. **12** Kiyólla-hoilé Allar kalam toh zinda, salu, edde ze honó dui ďárja toluwar or túaro bicí ďár. Hé kalame fúri zai foran edde ruh re edde girá edde fáñic ore úďďwa alok gorífele, aar dil or kíyal edde erada re zasai goré. **13** Allar nozor ottu honó mohóluk lukaiya asé de náí, bólke íba zibár hañse niki añára ttu ísaf díya foribó íbar suk or muúntu hárr kessú kúla edde uidđa. **14** Añára ttu zettót endilla ezzon ďoóñr boro imam asé zibá asman ókkol farái giiyé, yáni Allar Fua Isá, hétolla aiyó, añára cíkar goijjé de iman ore mozbut gori dóri táki. **15** Kiyólla-hoilé añára ttu toh endilla boro imam asé de no zee niki añárar komzuri re buzí no fare, bólke íba re toh añárar ďóilla hárr kisím or entán gorá gíyeh, toóu guná goijjé de náí. **16** Hétolla, aiyó, añára rahámot or toktór hañse hímmot gorí zai, zeéne añára meérbani hásil gorí edde zorurot ot fori de októt añára re modot gorí bolla rahámot fai.

5 Manúc ottu basílowa zah de fottí boro imam ore toh manúc olla Allar hédmot goittó éna tíyagara zah, guná lla nozorana edde kurbani ókkol peec gorí bolla. **2** Íba ye no zanoya edde gollot ot zah de ítara llói norom or sáañte sákbak gorí fare, kiyólla-hoilé íba nize yó komzurir gereftarit asé. **3** Hétolla toh íba ttu maincór guná lla diya fore de héndilla nizor guná lla yó kurbani diya fore. **4** Honókiye héndilla imam óibar izzot nizorgá nize looi no fare, bólke Alla ye ðake de íba ye beh híyan faa, zendilla Arone faáil. **5** Héndilla, Mosih ye yó boro imam ói bolla Nizoré Nize ðoóñr goijjé de no, bólke Ubá ye beh goijjé zibá ye íba re endilla hoiyé, “Tuñí óilade Añr Fua, aijja Añí Tuáñr Baf óiyi.” **6** Íba ye arek zagat óu hoiyé de, “Malkízadek or nomunaye Tuñí abadulabad foijjonto imam.” (aiñon g165) **7** Íba duniyait accíl de héntte, ðoóñr-ðoóñr góri guzori hañdi edde suk or faní bácai, Ubár hañse dua edde fóriyat goijjíl zibá ye íba re moot ottu basai faitto, aar íba ttu dindári solasol accíl de hétolla íba ye zuwab faáil. **8** Íba hé Allar Fua de óile yo, íba ye ziín duk faáil híin ottu fórmadari cíkke, **9** aar furafuri kaabel ói íba uitará beggún olla ofúrani nejat or guijja boinné zetará íbar hotá amól goré, (aiñonios g166) **10** aar íba re Alla ye Malkízadek or nomunaye Boro Imam óibar tokka diiyé. **11** Híyan or baabute añára ttu boóut kessú hoibár asé, montor híin buzáite mockil, kiyólla-hoilé tuáñra toh ar buzító no soór. **12** Asóle e októtt tuáñra ttu ustat óizongoi accíl, montor yala toh tuáñra re Allar sóiyi re ebbe cúru ttu lóti abar cíkaito ar ezzon lager, aar doró hánar bodol tuáñra ttu dud háibar zorurot óiye. **13** Zee niki siríf dud háa, ítar ttu forhésarir baabute honó zankari no táke, kiyólla-hoilé íte toh dud or fua. **14** Montor doró hána óilde boc óiye de manúc olla, zetará ttu akkól góri solité-solité gom hóraf forók goríbar tojurba óigiyoi.

6 Hétolla, aiyó, Mosihr baabute ebbe cúrur ze taalim asé híin bad di balok óibar híkka hañi mari. Añára ttu toh mora ham ottu touwá goríbar edde Allar uore iman aníbar abar buniyadi ðálar zorurot náí, **2** aró, bápťisma lowar, honókiyor uore át díyar, muruda ókkol or háñcor or, edde ofúrani azab or taalim faibar óu zorurot náí. (aiñonios g166) **3** Allar hókum óile, añára híyan beh goríyum. **4** Kiyólla-hoilé yíán bilkúl ói no fare de ki, zetará re ekbar foór ot aná gíyeh, asmani niyamot or moza faifélaye, Pak-Ruh faat córik óiye, **5** Allar kalam or bálai edde aibó de jáhan or

kudurut or moza faifélaye, (aiñon g165) **6** aar yárbaade iman ottu forigiyói, ítara re noya gori abar touwá gorábon; kiyólla-hoilé híyan toh ítara nize Allar Fua re abar kúruc ot dí mariféler deh edde íba re beggún or muúntu beizzoti gorér deh. **7** Ze zobine barbár aiyé de zór or faní hózom goré aar kéti-goróya ókkol olla endilla totorhari dóra ziíne ítarar fáida goré, híyane toh Allar torfóttu borhot faa, **8** montor ziyáne keñrar záli edde keñrabon fúra, híyan toh behar edde laánot faite deri náí; ahérit híyan furat diféla zah. **9** Montor ó adorja ókkol, zodi añára endilla hotá hoilé yo, añára ttu tuáñrar baabute yár túaro beétor edde nejate ané de jiníc ókkol or ekin asé. **10** Kiyólla-hoilé Alla toh nainsáf-wala no zeén níki tuáñrar ham edde muhábbot ore foórafelaito, ziín tuáñra pak bonda ókkol or hédmot gorí yore edde aijjó gorí-gorí íbar hañse zahér goijjó. **11** Añárar azzu óilde, tuáñra fottí zone ekí dóilla kucíc ahéri foijjonto dahát táko, zeéne zani faro de, tuáñrar acá hámaha fura óibo, **12** aró, tuáñra alcíya no óiyo, bólke uitarár nomunaye solo zetará imane edde sobóre Allar waada goijjá jiníc or mirasdár óiye. **13** Zeñtté Alla ye Ibrahim lói waada goijjé, íba ttu hosóm hái bolla Nizor túaro ðoóñr honókiye náí ísafe íba ye Nizor loi beh hosóm háíye. **14** Íba ye hoiyé de, “Añí toré hámaha bicí borhot diiyum, aar tor háandan boóut bicí goijjím.” **15** Hétolla, yóggwa ye sobór or sáañte entezar goijjé rár, waada goijjíl de híyan hásil goijjíl. **16** Manúce toh nizor túaro ðoóñr lói éna hosóm há, aar hosóm hái sábut goillé ítarar hárr hoijja-fózzat fúraizagoi. **17** Héndilla, Alla ttu yó zeñtte monehoiyé, íbar erada honódin bodoli no fare de híyan waadar mirasdár ókkol ore aró sáf zahér gorí bolla, híyan íba ye hosóm hái sábut goijjé, **18** zeéne no bodole de duyán jiníc ziín or baabute Alla ye misá hotá hoói no fare, añára zetará faná loiyí de así añára ttu híin or zoriya ðoóñr hímmot táke, añárar muúntu raká gíyeh de hé acá re mozbut or sáañte dóri rakí bolla. **19** Hé acá híyan óilde toh añárar foran or endilla nogol ziyán mozbut edde kaayem táke; híyan forodar búture úddwa foóñse, **20** zeñé Isá añára lla añárar age góille, Malkízadek or nomunaye abadulabad foijjonto Boro Imam ói yore. (aiñon g165)

7 Hé Malkízadek accíl de Salem cóor or baáñcca edde Alla Tálar imam. Íba ye zeñtté Ibrahimé baáñcca ókkol ore hárai waafes aiyér, héntte yóggwa llói millíl edde yóggwa re borhot dííl, **2** aar Ibrahimé íba re luť goijjá hárr kessúr doc bák or ek bák diifélail.

Agor ttu hoitó sailé, Malkízadek nam or maáni óilde “forhésgarir baáñcca,” aar Salem or baáñccar maáni óilde “cántir baáñcca.” 3 Íba baf sára, maa sára, edde honó fissán sára, íbar hóiyat or cúru yó náí fúrantí yó náí, bólke íba Allar Fuar dóilla ísafe, abadulabad foijjonto imam táigiyoi. 4 Yala báfiso manúc íba hotó ðoóñr accíl, zibá re añárar koum or baf Ibrahíme ziín luṭ goijjíl híin ottu barík kún doc bák or ek bák diífélail. 5 Leévir nosól or manúc zetará imami ham faa, ítara ttu toh maincór ttu doc bák or ek bák looi bolla Córíyot or hókum asé, yáni nizor koum ottu, zodi ítara yó Ibrahím ottu aiccé de óile yo. 6 Montor Malkízadek toh Leévir nosól ottu aiccé de no, toóu íba ye hé Ibrahím zibá llói Alla ye waada goijjíl, yóggwa ttu doc bák or ek bák loóil edde yóggwa re borhot dífl. 7 Cónño ye ðoóñr ottu beh borhot faa, hotá híyan ot de honó cóok náí. 8 Ek mikká ttu sailé, more de manúce éna doc bák or ek bák loo, montor arek mikká ttu sailé, uúin toh ubá ye éna loiyé zibá hámica zinda asé bóuli gobá díya zah. 9 Hé ísafe hoilé, ze Leévi ye doc bák or ek bák loo, yóggwa ye úddwa Ibrahím or duara doc bák or ek bák dífl de asé, 10 kiyólla-hoilé zeñtté Malkízadeke Ibrahím lói millé, héñtte toh Leévi yóggwar bafdáda Ibrahím or jisím ot accíl. 11 Hétolla, zodi Leéviól or imami ham or duara manúc furafuri sóiyi tóori faitto—kiyólla-hoilé hé bóracaye éna manúc ore Córíyot díya gíyéh—tóoile arek ðoilla eggwá imam foida óibar kii zorurot accíl, zibá Aron or nomuna no bólke Malkízadek or nomuna? 12 Imami ham or kisím bodolizaylé toh Córíyot óu bodolizar zorur. 13 Kiyólla-hoilé zibár baabute iín howá zar, íba toh arek háandan or, aar hé háandan ottu honókiye kurbani-gáñt hédmot goijjé de náí. 14 Híyane sáf zahér goré de ki, añárar Malik aiccé de óilde Yohúdahr nosól ottu, ze háandan ore hétap gorí Muúsa ye imami ham or mutalek honó kessú nó hoó. 15 Híyan toh aró sáf zahér óigiyoi, zettót Malkízadek or dóilla ar eggwá imam foida óiye, 16 zibá imam óiye de jisími dabadawar niyome no, bólke fána no ó de zindigir taakote. 17 Kiyólla-hoilé íbar baabute toh endilla gobá díya asé, “Malkízadek or nomunaye Tuñí abadulabad foijjonto imam.” (aiñon g165) 18 Ek ruwate sailé, agor furana niyom ore baatel gorífela gíyeh de, híyan komzur edde behar accíl de hétolla, 19 kiyólla-hoilé Córíyote toh honó kessú re furafuri sóiyigori faijje de náí. Ar ek ruwate sailé, híyan or zagat ekkán beétor acá díya gíyéh deh, ziyán or usílaye añára Allar dake

zai fari. 20 Hé acár baabute hosóm há gíyeh de asé, 21 uitará toh honó hosóm sára éna imam boinníl, montor Isá héndilla boinné de Ubár hosóme zibá ye íba re endilla hoiyé, “Mabude hosóm háiyi, Aar íba ye mon no bodolibo, “Tuñí abadulabad foijjonto imam.” (aiñon g165) 22 Híyan or zoriya toh Isá ekkán beétor razinamar zabin tóoijje. 23 Imam toh boóut zon tákito, kiyólla-hoilé ítara morizaylé imami ham ar gorí no faitto. 24 Montor Isá zettót abadulabad foijjonto zinda asé, íbar imami ham honódin no fúraibo. (aiñon g165) 25 Hétolla, zetará íbar duara Allar hañse aiyé ítara re íba ye furafuri nejat di fare, kiyólla-hoilé ítarar cúwaric olla íba toh hámica zinda asé. 26 Endilla eggwá boro imam táka añára lla ódode óiye, zibá pak, behosúr, dak sára, gunágar ókkol ottu alok, edde zibá re asman ókkol or túaro uñsol ot tulá gíyeh. 27 Íba ttu fottí din kurbani peec gorá no fore, zendilla oinno boro imam ókkol ottu age nizor guná lla baade manúc or guná lla gorá fore, kiyólla-hoilé íba ye toh hé ham ekbar ot hámica lla oñtté adai gorífelaiye zeñtté íba ye Nizoré kurbani diyé. 28 Kiyólla-hoilé Córíyote maincóre éna boro imam tíyagara zetará komzur ola, montor ze hosóm Córíyot baade há gíyeh, híyane toh Fua re éna hé ham ot tíyagaraiye, zibá re abadulabad olla furafuri háti gorífela gíyeh. (aiñon g165)

8 Ziín howá gíyeh híin or mul hotá óilde, añára ttu eggwá endilla boro imam asé, zibá asman ot mazé Alla Tálar toktór den ðak ottu boirá asé, 2 zibá pak zagat hédmot goré, yáni asól tãmbu waán ot, ziyán Mabude beh tãikké, insáne no. 3 Hárr eggwá boro imam ore tulá zah de toh nozorana edde kurbani ókkol peec gorí bolla éna, hétolla añárar gwá ttu yó peec gorí bolla kessú tákar zorur. 4 Íba zodi duniyait tákito, íba bilkúl imam ói no faitto, kiyólla-hoilé Córíyot mozin nozorana peec gorí bolla de age lóti imam asé, 5 zetará asmani siz ókkol or nomunar edde sábar hédmot goré. Hétolla toh Muúsa ye tãmbu tãkibárcot Alla ye íba re endilla uñciyari díyl, “Saáic, faár or uore toré ze nomuna dahá gíyeh, fottí ekkán hé mutafek banaic.” 6 Montor yala toh Isá ye ítarar túaro uttom hédmotdari faiyé, eddúr zeén níki íba beétor razinama waán or usíla yó, ziyán beétor waada ókkol or buniyadir uore gorá gíyeh. 7 Foóilar razinama gán zodi nikút óito, tóoile toh dusára razinamar honó zorurot no óito. 8 Montor Alla ye Nizor bonda ókkol or hosúri daháidi bolla hoiyé de, “Mabude fórmair,

soó, din uúin aiyér, zeñtté Añí ekkán noya razinama goijjúm Isráil or manúc lói edde Yohúdahr manúc lói. **9** Híyan razinama waán or dóilla no óibo, ziyán Añí ítarar bafðada ókkol lói oñtté goijjílám zeñtté Añí ítara re át ot dóri ljíp dec ottu neelai ainnílam. Kiyólla-hoilé ítara Añr hé razinamat zari nó táke, hétolla Añí yó ítarar uzu díyan nó díh, Mabude fórmair. **10** Mabude aró fórmair, din híin baade Añí Isráil or manúc lói ze razinama goríyum híyan óilde yíána: Añí Añr córiyot ókkol ítarar zehén ot dálidiyum, edde híin ítarar díl ot lekídiyum. Añí ítarar Alla óiyum, aar ítara Añr bonda óibo. **11** Yárbaade lóti ítara ttu nizor atehañsór maincóre yáh nizor báí ore endilla taalim diya no foribó de ki, ‘Mabud ore sinó,’ kiyólla-hoilé ítara ðoóñr cóñro beggúne Añré siníbo. **12** Kiyólla-hoilé Añí ítarar hosúri ókkol maf gorídiyum, aar ítarar guná ar monot no raikkúm.” **13** Íba ye zeñtté “ekkán noya razinama” hoiyé, íba ye toh agor gán ore baáldai félaiye. Aar ziyán baáldai zagoi edde furan óizagoi, híyan toh hára gaib óizayboi.

9 Hé ísafe, foóilar razinama gán ot ebaadot or niyom-kaanun accíl, aar héndilla ekkán duniyaibi ebaadot-hánar baabute yó accíl. **2** Kiyólla-hoilé ekkán þambu þaka gyíl, ziyán or foóila kamárat serak-or-boiþóni, mes edde pak ruþi accíl; hé kamára wa re Pak Zaga hoitó. **3** Dusára foroda gán baade accíl de óilde kamára ubá zibá re Ebbe Pak Zaga hoitó, **4** zibát cúnar agórbattir-gáñ edde sairó þák ottu cúna lói lippa razinamar sónduk accíl. Hé sónduk ot máze manniá ola eggwá cúnar fatila, Aron or fúlfiutþa loþi edde razinama leikká fattór or faþ tún accíl. **5** Sónduk kwar uore Allar tozollir karubi fírista gún accíl, ziíne nizor faké koffara-gáñr uore sába dito. Híin or baabute ehón tofsil or sáañte hoibár þaim no. **6** Zeñtté híin beggún héndilla góri toiyar goijjá óizaytoi, imam ókkole hámica foóila kamárat góli ebaadot or ham adai goittó. **7** Montor dusára kamárat siríf boro imam beh gólito, bosóre ekbar. Íba ye lou sára no gólito, ziín íba ye nizor lla edde maincé no zani goijjé de guná lla peec goittó. **8** Híyan lói Pak-Ruh ye dahár de, Ebbe Pak Zagat gólibar foñt otókkal zahér nó óiyo, zetókkal foóila kamára estemal ot accíl. **9** Kamára híyan óilde ehón or zobana re dahá de ekkán meésal, ziyán or maáni óilde, nozorana edde kurbaní peec goráye ebaadotgár or hélom ore furafuri sáf gorífelai no fare; **10** kiyólla-hoilé híin toh siríf hána, fína, edde

ðoilla-boðoilla uzu banar baabute éna; jisími niyom híin ore otókkal olla beh zari goijjíl, zetókkal híin ore bodolífélaibar októ nú aiyé. **11** Montor zeñtté Mosih gom siz uúin or Boro Imam óiaicce ziín age lóti aáigiyoí, héñtte íba aró ðoóñr edde aró háti þambu waán ot beh góille, ziyán át or banaiya no, yáni e duniyaibi no. **12** Íba ye góille de sóol or edde gorur-sóor lou loi no, bólke Nizor lou loi beh íba ye hé Ebbe Pak Zagat ekbar ot hámica lla góille, aar héndilla gorí añára re abadulabad olla hálas gorífelaiye. (aiðnios g166) **13** Kiyólla-hoilé zodi sóol or edde biríc gorur lou, edde harúl gorur sái nafak manúc or uore cíñri dile, ítarar jisím pak-sáf óizagoi de óile, **14** tóoile zibá ye ofúrani Ruhr duara Nizoré Allar hañse honó dak sára kurbaní ísafe peec goijjé, hé Mosihr lou wé añárar hélom ore behar ham ókkol ottu aró hotó bicí pak-sáf goríbo fáñllar, añára zinda Allar hédmot gorí fán? (aiðnios g166) **15** Íba toh etollá éna ekkán noya razinamar usíla, zeéne zetará re þaka giyéh ítara waada goijjá ofúrani miras faa, kiyólla-hoilé ítara foóila razinamar tole táki ze guná-háta ókkol goijjé híin ottu ítara re azad gorí bolla íba ye toh foran di dam diífélaiye. (aiðnios g166) **16** Kiyólla-hoilé wosíyot-nama tákile toh wosíyot-goróyar moot óiye de híyan sábut gorár óu zorur, **17** kiyólla-hoilé manúc or moot baade éna wosíyot-nama ham ot aiyé, wosíyot-goróya basi tákile híyan bílkúl ham ot aiyé de náí. **18** Hétolla toh foóilar razinama yó lou sára ham ot laga nó zah. **19** Zeñtté Muúsa ye tamám manúc ókkol ore Córiyot or hárr ekkán hókum boiyan gorífelaiye, íba ye gorur-sóor edde sóol or lou wóre faní lói miyái yore bérasóol or kirmis roingga fúñta edde hísoþ-gas estemal gorí Córiyot or hé kitab pwár uore edde tamám manúc cún or uore cíþka díyl, **20** endilla hoói, “Íin óilde razinama waán or lou, ziyán amól gorí bolla Alla ye tuáñra re hókum díye.” **21** Héndilla góri íba ye þambu gán or edde ebaadot or tamám sámána gún or uore yó lou wór cíþka díye. **22** Córiyot mozin tokoriban hárr kessú lou loi beh pak-sáf gorífelai zah, aar lou no bácaile gunár maf faa no zah. **23** Hétolla, asmani jiníc or nokoli gún ore híin lói pak-sáf gorár zorur accíl, montor asmani asóli jiníc ore pak-sáf gorí bolla híin or túaro beétor kurbanir zorur. **24** Kiyólla-hoilé Mosih toh insán or át or banaiya pak zagat góille de no, ziyán siríf asóli gán or ekkán nokoli, bólke asman ot beh góille, yala Allar nozor ot añára lla házir ói bolla. **25** Íba ye Nizoré barbár kurbaní dito góille de yó no, zendilla boro

imame ze lou nizor no híin lói bosóre-bosóre Ebbe Pak Zagat góle. **26** Arnóile toh íba ttu duniyair foidayecir héítte lóti barbár duk faa foitto, montor yala ahéri zobatan íba ekbar beh zahér óiye, Nizoré kurbani difélai guná dur gorí bolla. (aiōn g165) **27** Zendilla, insán ottu ekbar mora foribó de aar yárbaade bisar óibo de híyan tík gorá gíyeh, **28** héndilla, Mosih ye yó boóut maincór gunár fuñzá boi bolla ekbar beh kurbani óiye. íba dusárabar zahér óibo, gunár fuñza boi bolla no, bóлке uitará re nejat di bolla zetará azzur sáante íbar entezar ot asé.

10 Córiyot zettót aibó de gom jiníc ókkol or siríf sába, aar híin or asóli súrot no, hétolla Córiyote ze ekí dóilla kurbani bosóre-bosóre bad sára peec gorá zah híin lói, dake aiyé de ítara re bilkúl furafuri sóiyi gorí no fare. **2** Arnóile híin peec gorá bon ói no zaytoi né? Kiyólla-hoilé ebaadotgár toh ekbar ot pak-sáf óizaytoi, aar nizoré nize gunágar bóuli ar no tãarito. **3** Bólke hé kurbani ye fottí bosór guná beh monot goríde. **4** Kiyólla-hoilé biríc gorur edde sóol or lou wé toh guná bilkúl dur gorífelai no fare. **5** Hétolla Mosih duniyait aibárcot Alla re hoiyé de, “Kurbani edde nozorana toh Tuñí fosón nó goró, montor Tuñí Añr lla ekkán jisím toiyar goijjó. **6** Furat dede kurbaniye edde gunár kurbaniye Tuñí kúci nó óita. **7** Hétunot Añí hoiyí de, “Soó, ó Alla, Añí aiccí Tuáñr moncá fura goittó, zendilla Añr baabute pak-kitab or sábbat leikká asé.” **8** Foóila íba ye hoiyé de, “Kurbani edde nozorana, furat dede kurbani edde gunár kurbani Tuñí fosón nó goró, aar híin lói Tuñí kúci yó nó óiyo.” Háleke híin Córiyot mozin éna peec gorá zayto. **9** íba ye tarfore hoiyé de, “Soó, Añí aiccí Tuáñr moncá fura goittó.” Hé ísafe, dusára gán ore kaayem gorí bolla íba ye foóilar gán ore baatel gorífelaiye. **10** Hé moncá mozin beh añára re Isá Mosihr jisím or kurbaniir usílaye ekbar ot hámica lla pak-sáf gorífela gíyeh. **11** Hárr imame toh fottí din tíyai yore hédmot goré edde barbár ekí dóilla kurbani peec goré, zífne guná bilkúl dur gorífelai no fare. **12** Montor Mosih ye toh guná lla ek kurbani hámica lla peec gorí, Allar den dák ottu boói táikke, **13** aar hé októtt lóti íba ye entezar gorér de, íbar ducon ókkol ore íbar foor tole gorídiyar. **14** Kiyólla-hoilé íba ye toh hé ek kurbaniye uitará re hámica lla furafuri sóiyi gorífelaiye, zetará re pak-sáf gorá zar. **15** Híyan or baabute Pak-Ruh ye yó añárar hañse gobá der. Foóila íba ye hoiyé de, **16**

“Mabude hoóir, yíán óilde razinama waán ziyán Añí hé din híin baade ítara llói goríyum: Añí Añr córiyot ókkol ítarar dil ot dálidiyum, aar híin ítarar zehén ot lekídiyum.” **17** íba ye tarfore hoiyé de, “Ítarar guná edde bedini ham ókkol Añí ar honódin yaad no raikkúm.” **18** Híin maf óigiyoi de óile toh, guná lla kurbani ar zorurot náí. **19** Hétolla, ó báiboináin ókkol, añára ttu zettót Isár lou wór usílaye Ebbe Pak Zagat góli bolla hímmot asé, **20** noya edde zinda rasta waán or bóli ziyán íba ye añára lla foroda, yáni íbar jisím báy kúille, **21** aar añára ttu zettót eén eggwá boro imam asé, zibá Allar foribar or zimmadar, **22** hétolla, aiyó, añára ehélasir dile edde iman or fura ekin or sáante Allar hañse zai, kiyólla-hoilé añárar dil ore toh cítká dí bura hélom ottu sáf gorífela gíyeh, aar añárar gaa re sáf faní lói dúifela gíyeh. **23** Aiyó, añára cíkar gorí de hé acá re mozbut gori dóri rakí, kiyólla-hoilé zibá ye waada goijjé íba toh biccácdar, **24** aar añára ezzon ore ezzone muhábbot or edde gom ham or tuaijjo dibar kíyal rakí, **25** aar fúañti zoma ówa re bad di no felai zendilla hodún ottu bad di adot asé, bóлке ezzon ore ezzone tuaijjo dih, etó bicígori diyat táki zetó hára din ubá dake aázargoi de dekór. **26** Kiyólla-hoilé sóiyir zankari fai baade zodi añára buzísinti guná gorát táki, guná lla ar honó kurbani baki náí, **27** bóлке doorfúk bisar or entezar edde Allar muhálef ókkol ore furífélaibo de gozzob beh baki asé. **28** Muúsar Córiyot no manoya re toh dui zon yáh tin zon or gobáye honó rahám sára mariféla zah. **29** Yala báfiso sai, uite hotó hótara sáñzar laayek óibo zee niki Allar Fua re úñran maijje edde razinamar lou zín lói ítare pak-sáf gorá gíyl híin ore nafak bouli báippe, aar rahámot or Ruh re beizzoti goijjé? **30** Añára toh Ubá re siní zibá ye hoiyé de, “Bodola lon Añr ham, Añí beh fúñzaiyum.” Aró hoiyé de, “Mabude goríyum Nizor bondar bisar.” **31** Zinda Allar át ot foron bicí door or hotá. **32** Agor din uúin ore monot goró, tuáñra re foór gorídi baade zín ot duk-mosibote bicí duk faáila. **33** Táitai tuáñra re maincór muúntu beizzoti edde zulúm gorí tooñcá gorá zayto; aar táitai tuáñra héndilla bodsólluk ór de ítarar hépe córik óita. **34** Tuáñra hodi ókkol olla feţfurani daháila, aar tuáñrar malsámana ókkol luţ gorífela re kúcir sáante mani loilá, kiyólla-hoilé tuáñra zano de, tuáñra ttu nizor lla beétor edde hámica tike de dón asé. **35** Hétolla, tuáñrar hé hímmot no háraiyo, kiyólla-hoilé híyan or boccé bicí doónr. **36** Tuáñra ttu sobór tákar zorur,

zeéne tuáñra ttu Allar moncá fura goijjá óile, waada goijjíl de híyan hásil goró. **37** Alla ye toh hoiyé, “Taim bicí hom asé, tói aibár asé de íba aázayboi, deri no goríbo. **38** Montor Añr forhésgar bonda imane beh basi tákibo, montor zodi íte fissázagoi, Añr dil ítare lói kúci no tákibo.” **39** Montor añára toh uitarár bútotu no, zetará fisságiyoi aar dónco óigiyo; bólke uitarár bútotu éna zetará ruh re basai rakí bolla iman raké.

11 Iman anón óilde acá goré de siz or ekin, híyan andeikká siz or ekkán sábut. **2** Imane éna agor zobanar maincé taaríf faáil. **3** Imane añára buz fai de, duniyai foida óiye de óilde Allar kalame; hé ísafe, zín dahá zar híin dahá zah de siz ottu bana giyéh de no. (aíon g165) **4** Imane beh Abele Allar hañse Keéin or túaro beétor kurbani peec goijjíl, ziyán or zoriya yóggwa re forhésgar bóuli gobá díya giyeh, oñtté zeñtté Alla ye yóggwar hé kurbanir gobá díyl. Aar yóggwa morigiyói de óile yo, imane beh yóggwa aijjó foijjonto hotá hoó. **5** Imane beh Idiris nó more, bólke yóggwa re zinda tulífela gíyl. Alla ye yóggwa re tulífelaiye de hétolla, yóggwa re tuwai faa nó zah. Yóggwa re tulífelaiabar age endilla gobá díya asé de ki, yóggwa ye Alla re kúci goijjíl. **6** Iman sára toh Alla re kúci gorí fara no zah, kiyólla-hoilé zee niki íbar hañse aiyé yóggwa ttu endilla ekin gorá fore de ki, íba asé, aar íba óilde uitará re boccíc-dooya zetará íbar talac goré. **7** Imane beh Nuh ye hétun foijjonto nó deké de jiníc or baabute úñciyari fai Allar ðoore ekkán kicři banaáil, nizor foribar ore basai bolla. Yóggwa ye híyane beh duniyai re hosúrbon tóorail, aar imane faa zah de hé forhésgarir mirasdár óiye. **8** Imane beh Ibrahíme Allar hotá mainníl, zeñtté yóggwa re matai oh zagat zaito howá gíyl ziyán yóggwa ye miras ísafe faibo. Yóggwa horé zaar no zani rowana óil. **9** Imane beh yóggwa waada goijjá zagat forbáci ísafe táikkil; yóggwa tãmbu ókkol ot beh táki-táki accíl, zendilla Isahák edde Yakub tará yó táikkil, zetará yó yóggwar ðóilla hé ekí waadar mirasdár accíl. **10** Kiyólla-hoilé yóggwa buniyadi ola cóor waán or entezar ot accíl deh, ziyán or ðizáin-goróya edde banoya óilde Alla. **11** Imane beh Sárar nize yó hámil óibar toóufik faáil, oñtté zeñtté niki boc faráigilgoi, kiyólla-hoilé híba ye waada goijjé de íba re biccácdar báippil. **12** Hétolla toh more fán óigiyo de héndilla eggwá manúc ottu edún manúc foida óiye zetará asman or tarar hédun, zetará re doijjar sor or balur ðóilla goni kul gorí no fare. **13**

Ítara beggún iman or sáañte beh moijjé, Allar waada goijjá siz fai no bólke dur ottu híin ore deki yore edde kúci ói yore, aar ítara duniyait gorba edde forbáci de cíkar gorí yore. **14** Zetará héndilla hotá hoó ítara yán zahér goré de ki, ítara nizor lla ekkán wotón or talac ot asé. **15** Becók zodi ítara dec waán or baabute báfito ziyán ottu ítara neeliaicé, tóoile toh ítara ttu waafes zaibar moouka tákito. **16** Bólke ítara ekkán beétor, yáni asmani dec olla beh azzu gorí accíl. Hétolla toh Alla ye Nizoré ítarar Alla hoité no córma, kiyólla-hoilé íba ye ítara lla beh ekkán cóor toiyar goijjé. **17** Imane beh Ibrahíme entán gorá gíyl de héñtte Isahák ore kurbani ísafe peec goijjíl. Yóggwa zibá ye niki Allar waada faáil, yóggwa ye nizor biyaya fua re kurbani goittó toiyar goijjíl, **18** ze fua baabute yán howá gíyl, “Isahák ottu beh tor nosól dóra zaybo.” **19** Ibrahím or buzá accíl de, Alla ye mora re úddwa zinda gorí fare. Buzító sailé, yóggwa ye Isahák ore moot ottu beh fírai faiyé. **20** Imane beh Isaháke aibó de jiníc or mutalek Yakub edde Isów re dua díyl. **21** Imane beh Yakube moribárcot, Yusúf or fua duní wa re dua díyl, aar nizor lařır uore bór dí Allar ebaadot goijjíl. **22** Imane beh Yusúfe moribárcot, Boni Isráil or hízorot or baabute hoógiye, aar nizor áñđđi gún ore kii gorá foribó de cíkaidiye. **23** Imane beh Muúsa re bafmaa ye tin mac fán lukai raikkíl zeñtté yóggwa zormo óoil, kiyólla-hoilé ítara fua wa cúndor de deikkíl, aar ítara baáñccar hókum ore nó ðoora. **24** Imane beh Muúsa ye balok óiye de októť Féruan or zír fua howá zah re inkar goijjíl. **25** Yóggwa ye gunár hooddinna ayaci-kúci gorár túaro, Allar manúc ókkol or fúañti duk bordac gorá basíloil, **26** aar báippil de, Mosihr lla beizzoti ówa óilde Ijíp dec or dón-cómbottir túaro bicí kimoti; kiyólla-hoilé yóggwa ye boccíc or híkka beh nozor di accíl. **27** Imane beh yóggwa ye baáñccar guccá re no ðoorai Ijíp ottu neeliglgoi; kiyólla-hoilé yóggwa ye Noirahar gwá re deikké fángori sobór goijjíl. **28** Imane beh yóggwa ye azadir-id ore edde lou cítká díyar niyom ore amól goijjíl, zeéne foóila-fua re hálak-goróya ye ítara re no súwe. **29** Imane beh ítara Nil Doriya endilla gori farái giíl, zeén níki fúana meri ttu zaar; montor Ijipi ókkole híyan kucíc goijjé rár, ítara ðuffigilgoi. **30** Imane beh Boni Isráil ókkole Jerikó cóor or ðeбал ore sairókul ttu háñt din fán gúijje rár, híin forigilgoi. **31** Imane beh magi mayafua Rahába nafórman ókkol or fúañti hálak nó, kiyólla-hoilé híba ye gurinda gún ore cántir sáañte estekbal goijjíl. **32**

Aró hodún hoitám? Añr ttu ãaim náí, Giðiyon, Barak, Samson, Jeptah, Dawud, Sémuel edde nobi ókkol or baabute boiyan gorí bolla, **33** zetará imane beh raijjo ókkol zittíl, forhégari ham ókkol goijjíl, Allar waada goijjá jiníc ókkol hásil goijjíl, cinggo ókkol or muk bon goijjíl, **34** ooin or tez homaail, toluwar or dár ottu baiccíl, komzuri ttu bol ola óoil, laráit boluwar óoil, bidec or fóous ókkol ore dáfail. **35** Mayafuain ókkole ítarar mora ókkol ore waafes zinda faail de asé. Ar hodúne hálas ówa re inkar gorí zulúm bordac goijjíl, zeéne ítarar háñcor or hal beétor ó. **36** Aró hodúne tãttãbazi edde bet mara bordac goijjíl, aró hoitó sailé, bañdá há edde ziyól hara úddwa bordac goijjíl. **37** Ítara hodún ore dola mari mariféla gýl, hodún ore horot loi dui bák gorífela gýl, hodún ore toluwar loi kotól gorífela gýl. Ítara muútace, duk-mosibote, edde bodsólluk or hálote bérasóol or edde sóol or sam berái beh ikká uikká zaito, **38** duniyai ítarar laayek nu accíl. Ítara zooñl ot, faár ot, kúñdat, edde zobin or gañrát beh gúraffira goittó. **39** Ítara beggúne imane beh gom nam zuraiyé, toóu ziyán or waada gorá gýl híyan nó faa, **40** kiyólla-hoilé Alla ye añára lla beétor kessú tík gorí raikké, zeéne añára re bad di ítara re háti gorífela no zah.

12 Hétolla, añára ttu zettót ekkán ðoóñr miyúlar ðóilla añárar sairókul ttu gobá ókkol asé, aiyó, añára yó hárr fuñzá re edde aásan or sáañte fán ot féla de guná re dur gorífelai yore, ze zibbat añárar muúmikka tík gorá gýyeh yíbat sobóre duñrat táki, **2** nozor Isár híkka rakí yore, zibá óilde iman or bani edde háti-goróya, zibá ye Nizor muúmikka tík gorá gýl de kúci lla, córmor híkka no saái kúruc or duk bordac goijjíl, aar yala Allar toktór den ðáke boói táikke. **3** Íba zibá ye niki gunágar ókkol ottu héndilla ducconi cóoiye, íbar hálot báfiso, zeéne tuáñrar dil komzur no aar hímmot na háro. **4** Guná lói larái gorí tuáñra ttu toh aijjó nizor lou báca de héddur mukabela gorá nó fore; **5** aar tuáñra oh nosíyot ore foórafelaiyo, ziyán tuáñra re fuain dore goré fán gorá gýyeh, ki hoilé, “Ó Añr fua, Mabud or torbiyot ore éckara no goríc, aar íba ye toré bótboráile mon cóñro no goríc, **6** kiyólla-hoilé Mabude zaré muhábbot goré ítare beh torbiyot goré, Aar zaré íba ye fua ísafe kobul goré ítare beh uzu goré.” **7** Tuáñra ze duk bordac goró híin tuáñrar torbiyot olla; Alla ye tuáñra re fuain ísafe beh sólluk gorér. Endilla honó fua asé né zaré bafe

torbiyot no goré dé? **8** Zodi tuáñra torbiyot no foo, ziyán ot beggún córik asé, tóoile toh tuáñra zoura fuain, sóiyi fuain no. **9** Aró hoitó sailé, añára ttu añára re torbiyot goittó de insáni baf accíl, aar añára ítara re izzot goittám. Tói añára ttu ruúhanir Baf or torbiyot ot nizoré gosáidon aró bicí zoruri no né, zeéne añára zindigi fai? **10** Kiyólla-hoilé ítara nizor buzá mozin añára re kessú ðin olla éna torbiyot goittó, montor Alla ye añára re añárar bálai lla beh torbiyot goré, zeéne añára íbar pakir bági óizaygoi. **11** Honó torbiyot ore goré de héntte kúci lage de náí, bólke duk beh lage; montor zetará híin mani-mani kuwac óizagoi, ítara lla híine fore forhégarir cánti ola fósol dóra. **12** Hétolla tuáñrar luta át ore edde komzur añrú re mozbut goró, **13** aar tuáñrar téng olla uzu rasta bano, zeéne leng téng mazur no ó, bólke gom óizagoi. **14** Manúc beggún lói cántit tákibar, aar pak óibar kucíc goijjó, pak no óile toh honókiye Malik ore no dekfíbo. **15** Saiyó, honókiye zen Allar rahámot ottu maárum no ó; honó zohór-tita gas zen barí urí duk no de aar híyane boóut zon ore nafak gorí no fele; **16** honókiye zen zenákur yáh Isówr dóilla bedini no ó, zee niki ek októ hána lla nizor ttu foóila-fuar hók accíl de híyan besifélail. **17** Tuáñra toh zano, yárbaade zeñtté yóggwa ttu dua faito monehoiyé, yóggwa re inkar gorífela gýyeh, kiyólla-hoilé yóggwa ye hañdi-hañdi hé duar talac goillé yo, yóggwa ye mon fíraifelaibar mouka nó faa. **18** Tuáñra oh faár or hére aiccó de no, zibá re dóri faijíl aar zibá ooin loi zoillíl, zibát guṭguṭṭa andár, tuwán, **19** cíañr abas, edde hotár endilla abas accíl, zeén niki zetará híin fúinníl ítara fóriyat goijjíl de, ítara re ar honó hotá howá no zay bolla, **20** kiyólla-hoilé ítara e hókum yían cóoi nó fare de ki, “Zodi honó januware úddwa faár gwá re súile, yíba re fattór mari mariféla zaybo.” **21** Aar ítara ziyán deikkíl híyan eén ðoor or accíl, zeén níki Muúsa ye hoóil; “Añf ðoore hafir.” **22** Bólke tuáñra Síyon faár or hére beh aiccó, yáni zinda Allar cóor asmani Jerúsalem or hére. Tuáñra aiccó de óilde lak-lak fíristar **23** edde foóila-fuain uitarár dol ot, yáni zomát ot, zetarár seráng asman ot asé, aar zibá beggún or bisarhar hé Allar hére edde háti gorá gýyeh de forhégar ítarar ruh ókkol or hére, **24** aar noya razinamar usíla Isár hére edde cínra gýyeh de lou uúin or hére, ziíne Abel or lou wór túaro beétor hotá hoó. **25** Saiyó, hotá hoór de íba re inkar no goijjó, kiyólla-hoilé uitará zettót duniyait hédaiyot goittó de yóggwa re inkar gorí basi

nó fare, tói añára zodi asman ottu hédaiyot goré de íba ttu muu fíraifelai, añára toh basi faribár náí. **26** Héñtte íbar abase toh duniyai-dari tóttorail, montor yala íba ye endilla waada goijjé, “Aró ekbar Añí siríf duniyai re tóttoraiyum de no bólke asman ore yó.” **27** “Aró ekbar” lofzó yíba ye zahér goré de, ze siz ókkol tóttora, yáni ziín ore foida gorá gíyeh, híin ore dur gorífela zaybo, zeéne ziín ore tóttorai no fare híin ñiki táke. **28** Hétolla, añára zettót tóttorai no fare de raijjo fair, aiyó, añára cúkuriya zanai, ziyáne añára izzote edde ðoore Allar kobuldár ebaadot gorí faijjum. **29** Kiyólla-hoilé añárar Alla toh furiféle de ooin or ðóilla.

13 Báiyali muhábbot gorát táko. **2** Musáfer ókkol ore meémadari goittó no foóraiyo, kiyólla-hoilé héndilla gorí hodúne ót no fai fírista ókkol ore meémadari goijjé de yó asé. **3** Ziyól or hodi ókkol ore nize ziyól ot asó fángori yaad raikkó, aar bodsólluk gorá zar de ítara re nizoré gorá zar fángori yaad raikkó. **4** Biyácádi re beggúne izzot goijjó, aar zamai bou wór bútoe milmilab or imandari raikkó; kiyólla-hoilé Alla ye toh hárr ðóilla zenákur or bisar gorí zaybo. **5** Nizor adot ore ñiañ-foicár lalós ottu duré raikkó, nizor ttu ziín asé híin lói kúci táikko; kiyólla-hoilé Alla ye Nizebaze hoiyé de, “Añí toré bilkúl félai no zaiyum, aar bilkúl fiñ no diyum.” **6** Hétolla añára hímmot or sáañte hoói fari de ki, “Mabud añr modotgár; añí no ðooraiyúm. Insáne añré kii gorí faribó dé?” **7** Tuáñrar sóddar ókkol ore yaad raikkó, zetará tuáñrar hañse Allar kalam boiyan goijjé; aar ítara zindigir solasol or notizar uzu kíyal gorí ítara ðóilla iman ola óizogoi. **8** Isá Mosih gel de hailla, aijja, edde abadulabad ek ðoilla. (aiñ g165) **9** Ðoilla boðoilla edde osin taalime ikká uikká ói no zayogói; kiyólla-hoilé bála óilde, dil hánaye no bólke rahámote beh mozbut tákon; hána lói birana óiya ókkole toh kessú fáida faiyé de náí. **10** Añára ttu ekkán endilla kurbani-gań asé, ziyán ottu ñambur hédmot-goróya ókkole kessú háibar hók náí. **11** Kiyólla-hoilé ze januar ókkol or lou boro imame Ebbe Pak Zagat gunár kurbani di bolla loiza, híin or jisím ore kemfór baáre beh furat diféla zayto. **12** Hétolla toh Isá ye yó cóor or geiñ or baáre duk-zulúm faáil, manúc ókkol ore Nizor lou wé pak-sáf gorí bolla. **13** Hétolla, aiyó, íbar beizzoti re nizor uore loi yore añára kemfór baáre íbar hére zai. **14** Kiyólla-hoilé eñé toh añára ttu ñiki táke de

cóor náí, bólke añára aibár asé de cóor or talac ot beh así. **15** Hétolla, aiyó, añára Isár duara Allar hañse lagatar taarif or kurbani peec gorí, yáni añárar dui uñté íbar nam or kúlasa taarif goré de gulagala dórai. **16** Aar bálai goittó edde dan-sótka diito no foóraiyo, kiyólla-hoilé héndilla kurbani ókkol lói Alla kúci ó. **17** Tuáñrar sóddar ókkol or hotá maniyó, edde nizoré ítara hañse gosáidiyo, kiyólla-hoilé ítara toh tuáñrar zan ore uitarár ðóilla faára dí raké zetará ttu isaf díya foribó. Héndilla etollá goijjó, zeéne ítara ham híyan kúcir sáañte goré, dukké no; kiyólla-hoilé dukké goillé toh tuáñrar honó fáida no óibo. **18** Añára lla dua goijjó, kiyólla-hoilé añára ttu ekin asé de, añárar dil sáf, añára hárr kessút hók foñté solitó sái. **19** Añí tuáñra re háasgori fóriyat gorír, tuáñra dua goríba de, añí zen hára tuáñrar hañse abar aái fari. **20** Yala, cánti dooya Alla zibá ye abadulabadi razinamar lou wór usílaye añárar Malik Isá re mora ttu zinda goijjé, yáni bérasóol Soroya ðoóñr gwá re, (aiñnios g166) **21** Íba ye tuáñra re hárr gom ham ot háñi banouk, tuáñra íbar moncá mozin gorí bolla; aar ziyán lói íba kúci ó híyan añárar bútoe Isá Mosih duara goróuk, zibár taarif abadulabad foijjonto hámica ówat táke. Aamin. (aiñ g165) **22** Ó báiboináin, añí tuáñra re becábici aros gorír, sobór or sáañte e nosíyoti hotá gún fúno, kiyólla-hoilé añí tuáñrar hañse baiñtát lekífelayi. **23** Tuáñra re zanaidir, añárar báí Timóti ziyól ottu hálas óigiyoi; yóggwa hára foñsile, añí yóggwa re fúañti looi tuáñra re saitó aiccúm. **24** Tuáñrar tamám sóddar ókkol ore edde pak manúc ókkol ore sólám díyi hoiyó. Ítalir gúne tuáñra re sólám zanar. **25** Tuáñra beggún or uore rahámot zari tákouk.

Yakub

1 Añí Yakub, Allar edde Malik Isá Mosihr éggwa gulam. Ze baró háandan or manúc duniyair agagura dorbodor óigiyoí, ítara re sólám. **2** Ó añr báiboináin ókkol, zeñtté tuáñra ñoilla-boñoilla entán ot foro, nizoré nize bággitta bóuli táariyo, **3** kiyólla-hoilé tuáñra toh zano, tuáñrar iman or entáne sobór foida goré. **4** Aar sobór ore híyan or ham furafuri goittó díyo, zeéne tuáñra ttu háti edde balok óibar kessú homi no táke. **5** Lekin tuáñra honókiyo ttu zodi giyan or homi táke, yóggwa ye Alla ttu magouk, íba ye yóggwa re diibo, kiyólla-hoilé íba ye bezar no ói yore dilkúla góri beggún ore dee. **6** Montor cók no gorí imane maga foribó, kiyólla-hoilé zee niki cók goré yóggwa toh doijjar goir or ñóilla, ziín ore boiyare ikká-uikká loizagói. **7** Héndilla manúce Malik or torfóttu honó kessú faibar acá no goróuk, **8** kiyólla-hoilé yóggwar mon toh dui mikká; yóggwa ye ziín goré híin ot tiki no táke. **9** Gorib imandár ókkole Alla ye ítara re uoror tokkat tuillé de hétolla kúci óuk; **10** aar tuangor imandár ókkole Alla ye ítara re niróc goijjé de hétolla kúci óuk, kiyólla-hoilé tuangori hoó de híin de bil or fúl or ñóilla nac óizayboi. **11** Beil toh bicí gorom or sáante urí gas ókkol fúiaifele, baade híin or fúl ókkol zórizai ar cúndor no táke. Héndilla, tuangor ókkol óu nizor ham loi birana tákite-tákite fána óizayboi. **12** Mubarek manúc ubá, zibá ye entán or októ sobór raké, kiyólla-hoilé yóggwa ye ziti baade tas ísafe zindigi faibo, zibá Malike uitará re diibar waada diyé zetará íba re muhábbot goré. **13** Zeñtté honókiyo ttu guná goríbar mon aiyé, yóggwa ye “Guná goríbar mon híyan Allar torfóttu aiccé,” bóuli no hoóuk, kiyólla-hoilé honó hórafí ye Alla re gunár uzu țani no fare, aar íba Nize yó honókiyo re gunár uzu no țane. **14** Bólke guná goríbar mon nizor-nizor hóraf moncá ttu beh aiyé, ziíne nizoré țani fán ot féla. **15** Baade hóraf moncá híin hámil ói guná zormo deh, aar guná furafuri ñoóñr ói moot foida goré. **16** Añr adorja báiboináin ókkol, fáki na háiyó. **17** Fottí gom niyamot edde fottí háti niyamot asman ottu beh nise aiyé; híin aiyé de Baf or torfóttu, zibá ye níki asman or nurani jiníc ókkol foida goijjé. íba honódin no bodole aar íba lorizagói de sábar ñóilla no. **18** íba ye Nizor moncá lói sóiyi kalam or duara añára re noya zibon diiyé, zeéne íbar mohóluk ókkol or bútoe añára ebbe kimot ola gún ói fari. **19** Añr adorja báiboináin ókkol, yíán

monot rakíyo de ki: fottíkiyo ttu fúnat salu ówa foribó, hotábattara hoité báfisinti howá foribó, edde bánggori guccá no urá foribó; **20** kiyólla-hoilé Alla ye saá de héndilla forhégari zindigi guccá lói harai no fare. **21** Hétolla tamám bura adot edde hóraf solasol ókkol dur gorífelo, aar tuáñrar dil ot ruwa giyéh de kalam ore norom or sáante gosílo, ziíne tuáñra re nejat di fare. **22** Kalam amól-goróya bono, siríf fúnoya no, arnóile nizoré fáki dór fán óibo. **23** Kiyólla-hoilé zee niki kalam fúnoya montor amól-goróya no, yóggwa ézzon endilla manúc or ñóilla, zee niki nizor siyára aainat mazé saá; **24** yóggwa ye toh nizoré cúndorgori saái zai baade nizoré saité hondilla laiggíl de híyan éhon foóraifele. **25** Lekin azadi dede hé sóiyi niyom or uzu zee niki gomgorí nozor diyat táke, yóggwa ye ziín goré híin ot rahámot faibo, kiyólla-hoilé yóggwa ye fúni foórai no fele, bólke amól goré. **26** Zodi honókiye nizoré nize dindár bóuli táare, montor nizor zaban no sóoñle, yóggwa ye nizoré nize fáki dér, aar yóggwar dindári behar. **27** Alla Baf or nozor ot pak edde sóiyi dindári óilde, etim edde rari ókkol ore ítara dukkór októ saásita gorón, aar duniyair tamám hórafí ttu nizoré pak-sáf rakón.

2 Añr báiboináin ókkol, tuáñra zettót añárar mohíma ola Malik Isá Mosihr uore iman ainnó, tuáñra manúc beggún ore ek nozore saiyó. **2** Dóro, ezzon tuangor manúc tuáñrar mujilíc ot cúnar oóñri dí edde barík hoorsuor fiñdí aiccé, aar hére ézzon gorif manúc óu aiccé, zar gair or hoor niróc. **3** Zodi tuáñra ze tuangor manúc cwa ye barík hoor fiñdí aiccé yóggwar uzu háas díyan dí endilla hoó, “Tuñí e gom zaga gán ot boiyó,” aar gorif manúc cwa re endilla hoó, “Tui uré țiyai ták, arnóile nise añr țéng or ñáke góri boi,” **4** tóoile tuáñra tuáñrar bútoe forók nó goró né aar bura niyote bisar nó goró né? **5** Ó añr adorja báiboináin, fúno, Alla ye e duniyair gorif ókkol ore iman ot tuangor ói bolla edde raijjo waán or mirasdár ói bolla basíloie de no né, ziyán íba ye uitará re diibar waada goijjé zetará íba re muhábbot goré? **6** Lekin tuáñra de gorif manúc cwa re beizzoti goijjó. Tuáñra re tuangor ókkole no né zala deh edde țani-țani bisar ot tulé dé? **7** Ítara no né Ubár izzoitta nam or kuféri goré deh Zibá ye tuáñra re ñaikké? **8** Pak-kalam ot endilla asé, “Nizor atehañsór maincóre nizor ñóilla muhábbot goríba.” Zodi tuáñra Allar raijior hé córiyot amól goró, tóoile tuáñra gom ham gorór. **9** Lekin zodi ektorfia goró, tuáñra guná gorór aar tuáñra córiyot

báñgoya de híyan Córíyote sábut goré. **10** Kiyólla-hoilé zee niki fura Córíyot amól goré, montor ekkán báñge, yóggwa re toh híin beggún báingge bóuli dóra zaybo. **11** Zibá ye endilla hoiyé, “Zená no goríba,” Íba ye toh endilla yó hoiyé, “Kún no goríba.” Hétolla, zodi tuáñra zená no goró, montor kún goró, toóu tuáñra Córíyot báñgoya óigiyogoi. **12** Honó hotá hoité edde honó kessú goitté monot rakíyo de, tuáñrar bisar azadi dede córíyot lói gorá zaybo. **13** Kiyólla-hoilé zee niki oinno zon or uore rahám no goré, bisar or októť yóggwar uore yó Alla ye rahám no goríbo. Rahám dil ola ókkol ore toh rahám or sáañte bisar gorá zah. **14** Ó añr báiboináin ókkol, zodi honókiye endilla hoó, “Añr ttu iman asé,” montor yóggwa ttu amól náí, tooile híyan ot kii fáida asé? Héndilla imane ki yóggwa re basai faribó? **15** Dóro, eggwá báí óttu yáh bóin óttu fińdíto hoorsuor náí, aar háito hána náí. **16** Hé hálót ot zodi tuáñra honókiye yóggwa re endilla hoó, “Cántir sáañte zoogói, um táikko aar háafiya goijjól,” montor yóggwar zoruroť ókkol fura no goró, tooile yóggwar kii fáida asé? **17** Borabor héndilla, ze iman or fúańti amól náí, hé iman mora. **18** Óitofare honókiye endilla hoibó, “Kiyó ttu iman asé, aar kiyó ttu amól asé.” Tík asé, tooile amól sára tuáñr iman añré dahái faribá né? Ańi toh añr amól or duara añr iman tuáñre dahái fajjium. **19** Tuńi endilla biccác goró de ki, Alla asé de ekgwá. Híyan bála! Montor búť ókkole yó de héndilla biccác goré, aar ɔoore hafe. **20** Ó bekuf, ze iman or amól náí hé iman or dam náí de híyan or tuńi sábut soó né? **21** Añárar baf Ibrahim toh e amóle forhésgar tóoijjil, ki hoilé, yóggwa ye nizor fua Isahák ore kurbani di bolla kurbani-gáñr uore peec goijjíl. **22** Tuńi toh dekor; yóggwar iman edde amól ekkú fúańti ham goijjíl, aar yóggwar iman onťtė furafuri sóiyi óiye zeńttė yóggwa ye amól goijjė. **23** Héndilla góri pak-kalam ot asé de e hotá fura óiye, ki hoilé, “Ibrahíme Allar uore iman raikkíl, hétolla Alla ye yóggwa re forhésgar bóuli goinníl.” Hétolla Alla ye yóggwa re “dustó” ɔaikkė. **24** Yala tuáñra de deikkó, manúc siríf iman tákile forhésgar no tóore, tóorite amól óu lage. **25** Rahába nam or magi mayafua war hálót óu héndilla. Híba e amóle forhésgar tóoijjil, ki hoilé, híba ye gurinda gún ore lukai rakí baade arek bouli duńraidl. **26** Hé ísafe, zendilla, ruh sára gaa mora, héndilla, amól sára iman óu mora.

3 Añr báiyain, tuáñra bicí zon ustat no boinno. Tuáñra toh zano, añára zetará ustat así añárar bisar oinno kiyór túaro bicí hora óibo. **2** Kiyólla-hoilé añára beggúne ɔoilla-boɔoilla golti ókkol gorí. Montor furafuri balok manúc óilde úba zibá ye ziín hoó híin ot honó guná no goré edde nizor gaa guńra re sóońli rakí fare. **3** Añára toh gúra re sóońli rakí bolla gúrar gal ot lehan lagai, baade añára híin or guńra gaa re zikká monehoó híkka loizai fari. **4** Zaáńs ókkol or baabute yó báfiso: híin zettór ɔońr óibo óuk aar zeén tez boiyare solibó solouk, montor híin ore séraingga ye ekkán bicí cóńro súwan lói yore zikká monehoó híkka loiza. **5** Añárar zir óu héndilla; híyan gaar ekkán cóńro híssa de óile yo, híyane ɔońr-ɔońr fohórai ókkol goré. Tuáñra yían óu báfo, ekkínissara ooin loi hotó ɔońr-ɔońr zoońl ókkol furat di fare. **6** Zir hoó de híyan ooin or ɔoilla yó; añárar gaat ze híssa ókkol asé híin or búťore zir ore kuham or ekkán duniyai hoilé fare. Híyane añárar gaa agagura nafak gorífelai añárar zindigi guńrat ooin dórai deh, kiyólla-hoilé híyan ot zuzuk or ooin asé. (Geenna g1067) **7** Insáne toh hárr kisím or januwar, faik, buke áñre de zandár, edde fanír zandár ókkol ore sóońille edde yala yó sóońile. **8** Montor honó maincé zir ore sóońli fare de náí; zir óilde ekkán hóraf jiníc ziyán ore sóońli fara no zah; híyan háf or bic or ɔoilla bicí hótara. **9** Hé zir ziyán lói añára añárar Malik edde Baf or taarif gorí, híyan lói añára Allar súrote banaiya insán ore gozzob óu dih. **10** Añárar ze muk óttu taarif aiyé hé muk óttu gozzob óu aiyé. Añr báiboináin ókkol, héndilla no ón sáa. **11** Ze nolkwa ttu mutúra faní uré, hé nolkwa ttu kí nuna faní yó uré né? **12** Añr báiboináin, ɔuńir-gas ot kí zolfai dóre né? Aar anggur-gas ot kí ɔuńir gula dóre né? Borabor héndilla, nuna fanír nolkwa ttu mutúra faní no uré. **13** Tuáñrar búťore giyani edde buzón or manúc hon asé? Tákile, yóggwa ye nizor bála solasol loi sábut goróuk de ki, giyan tákile ze noromdari táke hé noromdarir sáañte yóggwa ye nizor ham ókkol goré. **14** Lekin zodi tuáñrar dil ot bicí ric edde siríf nizor fáida tuwar niyot táke, guman no boinno aar háńsa re misá no banaiyó. **15** Héndilla giyan aiyé de Allar torfóttu no, bóلكe duniyai ttu, hóraf moncá ttu, edde búťferot óttu. **16** Kiyólla-hoilé zeřé ric edde siríf nizor fáida tuwar niyot táke, héře hoijja-fózzat edde hárr ɔoilla bura ham óu táke. **17** Montor ze giyan Allar torfóttu aiyé, híyan ebbe age pak, baade cántiye bóra; híyan ot cídayi edde buz asé; híyan raháme

edde gom notizaye furaiya; híyan ot honó forókai yáh munaféki náí. **18** Cánti aníbar meénnot-goróya ókkole forhégari daibar bis cántir sáañte cíñre.

4 Tuáñrar búture maramari edde hoijja-fózzat hontú aiyé? Híin tuáñrar búture ayaci goríbar ze azzu asé híin óttu no né aiyé deh, ziíne tuáñrar gaar híssa ókkol ot larái goré? **2** Tuáñra toh azzu goró, montor no faile kún goró. Tuáñra ttu lálós lage, montor no faile hoijja-fózzat goró edde maramari doh. Toóu tuáñra azzu goró de híin tuáñra ttu no táke, kiyólla-hoilé tuáñra de Alla ttu no mago. **3** Tuáñra magilé yo no foo, kiyólla-hoilé tuáñra hóraf niyote éna mago, zeéne híin lói ayaci gorí faro. **4** Ó beiman ókkol, tuáñra no zano né, duniyai lloi dustí gorón maáni Alla lloi duccon ón dé? Hétolla, zee niki duniyai lloi dustí goittó saá, yóggwa ye nizoré Allar duccon bana. **5** Aar náki tuáñra pak-kalam ot yíán hánnak asé bóuli t̃aaro, ki hoilé, “Alla ye añárar búture ze ruh diiyé, hé ruh lla íba ttu gairot lage?” **6** Montor Allar rahámot aró bicí. Hétolla toh pak-kalam ot endilla asé, “Alla fohór ola ókkol or ul̃a tíya, montor niróc ókkol ore rahámot goré.” **7** Hétolla, nizoré Allar hañse gosáido. Ibilíc or mukabela goró, tói íte tuáñra ttu dáizayboi. **8** Allar dáke aiyó, tói íba tuáñrar dáke aibó. Ó gunágar ókkol, nizoré pak-sáf goró, tuáñra dui mikká mon ola ókkole nizor dil sáf goró. **9** Afsús hái hañdahari goró edde bilak goró; añcar bodol hañdo, aar kúcir bodol ferecan ó. **10** Nizoré nize Malik or nozor ot niróc ó, tói íba ye tuáñra re uoror tokkat tulíbo. **11** Ó báiboináin ókkol, ezzon or bodnam ezzone no goijjó. Zee niki arek báí or bodnam goré yáh bisar goré, yóggwa ye córiyot or bodnam goijjé fán edde bisar goijjé fán. Zodi tuñí córiyot or bisar goró, tóoile toh tuñí córiyot amól-goróya no, bólke híyan or bisarhar. **12** Córiyot-dooya edde Bisarhar Ekzon beh asé, zibá ye basai yó fare dónco yó gorí fare. Montor tuñí hon abar tuáñr atehańsór maincór bisar goittá? **13** Fúno, tuáñra zetará endilla hoó, “Aijja no óile hailla añára fólana cóor gán ot zaiyum, aar hére ek bosór táki baade códori gorí bicí-bicí t̃iañ hamaiyúm.” **14** Tuáñra toh tuáñrar zindigit hailla kii óibo de híyan úddwa no zano. Tuáñrar zindigi toh báf or dóilla, ziín essát ánik dahá zay baade gaib óizagoi. **15** Híyan or bodol tuáñra ttu endilla hoón saá, “Malike sailé, añára basi tákiyum aar waán-yián goríyum.” **16** Montor tuáñra de gumane borái goró; héndilla borái beggún hóraf.

17 Hétolla zee niki gom mán gorí zane montor no goré, yóggwa ttu guná óibo.

5 Ó tuangor ókkol, yala tuáñra fúno, ki hoilé, tuáñrar uore ze d̃oóñr duk-mosibot aiyér híin olla hañdahari edde bilak goró. **2** Tuáñrar tuangori borbad óigiyoi, aar tuáñrar hoorsuor uui ye háifelaiye. **3** Tuáñrar cúna-cañdit zooñre doijje, aar hé zooñre tuáñrar hélaf gobá díbo edde ooin or dóilla góri tuáñrar gaa furifélaibo. Kiyólla-hoilé tuáñra e ahéri din ot éna dón zoma gorífelaiyo. **4** Soó, tuáñrar fósol-dooiya ókkol ottu tuáñra ze muzuri beimani gorí rakídiyo, híine tuáñrar hélaf guzorer, aar tuáñrar hé dooiya ókkol or hañdani Alla Robbul Alamin or han ot foóñicce. **5** Tuáñra duniyait fúrutí edde ayaci gorí beh din haraiyó. Zooráibar din olla bola fángori tuáñra nizoré bolaiyó. **6** Tuáñra behosúr maincóre hosúr díyo aar kún goijjó, montor ítara tuáñrar mukabela nó goré. **7** Hétolla, ó báiboináin, Malik nú aiyé foijjonto sobór goró. Tuáñra saái faribá, cacá ókkole zobin or kimoti fósol fai bolla hotó sobór goré. Ítara toh zeť mac ottu cúru gorí oón mac foijjonto sobór or sáañte entezar goré. **8** Héndilla, tuáñra yó sobór goró. Nizor dil ore mozbut rakó, kiyólla-hoilé Malik aibár októ dáke. **9** Ó báiboináin, ezzon or cékayot ezzone no goijjó, zeéne Alla ye tuáñrar hosúr no dóre. Fúno, Bisarhar duwar or gurat foóñiccegai. **10** Ó añr báiboináin, ze nobi ókkole Malik or name boiyan ókkol goijjé, ítara ttu duk faar edde sobór gorár meésal lóh. **11** Becók ítara zetará duk bordac goijjé, añára ítara re mubarek bouli hoói. Tuáñra toh Aiyube duk bordac goijjíl de híyan zano; tuáñra yíán óu zano, ki hoilé, forezai Mabude yóggwa re rahámot goijjíl. Mabud óilde feťfuraniye edde meérbaniye furaiya. **12** Añr báiboináin, añr ebbe asól hotá óilde, tuáñra asman or, zobin or yáh oinno honó kessúr name bilkúl hosóm na háiyo. Montor tuáñra baná eddúr hoijyó, óile ói, aar no óile no, arnóile tuáñra hosúrbon t̃oñoriba. **13** Tuáñrar búture honókiye dukkót asé né? Tákile, yóggwa ye dua goróuk. Honókiye cúkkot asé né? Tákile, yóggwa ye taarif or seér goóuk. **14** Tuáñrar búture honó ocúikka asé né? Tákile, yóggwa ye zomát or ñaiđoóñr ókkol ore matouk, aar ítara aái Malik or name yóggwar matát tel di yore yóggwa lla dua goróuk. **15** Zodi hé dua iman or sáañte goijjé de óile ocúikka wa gom óizayboi, yóggwa re gom goríbo de óilde Malike. Hé manúc cwa ye zodi guná gorí táke, híin maf gorídiya zaybo. **16**

Hétolla ezzon or guná ezzon ore cíkar goró, aar ezzon olla ezzone dua goró, zeéne ocúk ottu gom ói faro. Ezzon forhésgar bondar duat bicí bol táke aar hé duar zoriya ɖoóñr-ɖoóñr ham ókkol ói fare. **17** Nobi Eliyas añárar ɖóilla ézzon insán accíl. Yóggwa ye zettót zór no di bolla dilmon di dua goijjíl, ítarar mulluk ot cáro tin bosór fán zór nó deh. **18** Abar yóggwa ye zettót zór olla dua goijjíl, asman ottu zór fori zobin ot fósol ókkol dóra cúru goijjíl. **19** Añr báiboináin ókkol, zodi tuáñrar bútotu honókiye sóiyi ttu duré zaagói, aar ar ezzone ítare fírai ané, **20** yóggwa ye yíán zani louk de ki, zee niki honó gunágar ore gollot rasta ttu fírai ané, yóggwa ye hé gunágar or zan basaiyé, aar tar bicí guná ókkol or maf faa baiyé.

1 Fitor

1 Añí Fitor, Isá Mosihr ézzon sáhabi. Allar basfloiya uitarár hañse lekír zetará dorbodor ói Pontus, Galatíya, Kappadókiya, Eciya, edde Bitúniya elaka ókkol ot forbáci ísafe táker, **2** zetará re Alla Baf or agori niyot mozin edde Pak-Ruhr pak bana loi basflowa gíyeh de, Isá Mosihr fórmadar ói bolla edde Íbar lou wór cítkeye pak-sáf gorífela zay bolla. Tuáñrar uore rahámot edde cánti bicígori nazil óuk. **3** Añárar Malik Isá Mosihr Alla edde Baf or taarif óuk, kiyólla-hoilé Íba ye toh Isá Mosih re mora ttu zinda gorí yore Nizor dõóñr meérbaníye añára re noya zormo diyé. Híyane añára ekkán zinda acá faiyí, **4** endilla miras faibar ziyán fána no, dak no fore, edde ofát no. Hé miras asman ot tuáñra lla raká gíyeh, **5** zetará iman or usílaye Allar kudurute oh nejat olla héfazot asó ziyán céc hale zahér ói bolla toiyar asé. **6** Hétolla toh tuáñra bicí kúci, yala tuáñra ttu kessú ÷aim olla dõilla-boðoilla entáne duk bordac gorá forer de óile yo. **7** Híin aiyé de etollá, zeéne tuáñrar iman, ziyán ooin loi zálai gorí baade yo borbad zagói de cúnar túaro kimoti, híyan or sábut óiya asóliye zen Isá Mosih zahér óibo de októť taarif, mohíma, edde izzot ané. **8** Tuáñra toh Íba re nó deká, toóu Íba re muhábbot goró; aar ehón no deká de óile yo Íbar uore iman raikkó, edde boiyan gorí faribár raá náí de héndilla edde gabi kúciye tuáñra bicí kúci, **9** kiyólla-hoilé tuáñra toh nizor iman or notiza foór, yáni tuáñrar ruhr nejat. **10** Hé nejat or baabute oh nobi ókkole díyane talac edde tahákit goijjíl, zetará tuáñra re tuáñrar uore óibar rahámot or baabute agun zanaáil. **11** Ítara tahákit goijjíl de ki, ítarar bútoze Mosihr ze Ruh accíl Íba ye zeñtté Mosihr duk faar edde yárbaade mohíma faar baabute zanaider, héñtte Íba ye hoñttíyaror edde hon hálót or baabute icára gorér deh. **12** Ítarar hañse yíán zahér gorá gíyeh de ki, ítara nizor hédmot gorér de no bólke tuáñrar; uúin hoóí zíin yala tuáñrar hañse uitará boiyan goijjé zetará asman ottu díferá gíyeh de Pak-Ruhr hédaiyote tuáñrar hañse kúchóbor tobolik goijjíl; fírista ókkole úddwa hé siz híin or baabute zani bolla azzu goré. **13** Hétolla, tuáñrar demak ore nal gorí aar únic ot táki, tuáñrar acá furafuri oh rahámot or uore rakó, ziyán Isá Mosih zahér óibo de októť tuáñrar uore óibo. **14** Fórmadar fuain bono, Alla re nó síníte age tuáñra ttu ze bura azzu ókkol accíl, híin mozin no soliyó, **15** bólke tuáñra re ÷aikké de Íba

zendilla pak, tuáñra yó nizor hárr solasol ot pak bono; **16** kiyólla-hoilé pak-kalam ot toh endilla asé, “Pak ó, kiyólla-hoilé Añí pak.” **17** Tuáñra toh zibá ye honó ektorfía sára nizor-nizor ham mozin bisar goré Íbar hañse dua goitté Baf ÷ako, hétolla tuáñrar e forbácir októť Íbar dõor rakí solasol goró; **18** tuáñra toh zano, tuáñra nizor bafðada ókkol ottu ze behar solasol miras faáila héntu tuáñra re azad gorá gíyeh de, nac óizagoi de siz yáni cúna-rufa lóí no, **19** bólke níkút edde nidak bérasóol-or-sóor, yáni Mosihr kimoti lou loi. **20** Becók, Íba re duniyair foidayecir age lóti basíraaka gíyl, montor e ahéri zobanat tuáñrar wasté zahér gorá gíyeh. **21** Tuáñra Íbar duara éna Allar uore iman ainno, Zibá ye Íba re mora ttu zinda gorí mohíma diiyé, zeéne tuáñrar iman edde acá Allar uore beh ó. **22** Tuáñra sóiyi re mani nizoré pak-sáf gorífelaiyo ísafe tuáñra ttu imandár báiboínáin ókkol olla háti muhábbot foida óiye, ezzon ore ezzone josbar sáañte díl ottu muhábbot goríyo. **23** Kiyólla-hoilé tuáñra toh noya gori zormo óiyo de, nac ó de bis ottu no bólke nac no ó de bis ottu, yáni Allar zinda edde hámica zari táke de kalam ottu. (aíñ g165) **24** Pak-kalam ot asé de, “Hárr moniccó kér or dõilla, aar ítarar tamám rub kérgwa fúl or dõilla. Kér fúaizagoi, aar fúl zórizagoi, **25** montor Mabud or kalam abadulabad zari táke.” Hé kalam óilde oh kúchóbor, ziyán tuáñrar hañse tobolik gorá gíyeh. (aíñ g165)

2 Hétolla, hárr ducconi, hárr dúkabazi, munaféki, ricárici, edde gifot tuáñrar hañsóttu dur gorífelo, **2** aar noya-noya zormo óiya fuain dor dõilla tuáñra ruúhanir háti dud hái bolla azzu goró, zeéne híin or zoriya tuáñra nejat olla barát táko, **3** kiyólla-hoilé tuáñra toh Malik or meérbanir moza faifelaiyo. **4** Íbar hañse, yáni hé zinda fattór zibá re maincé inkar gorífelaiye montor Allar basfloiya edde kimot ola, Íbar hañse aiyóne, **5** tuáñra re yó zinda fattór ókkol ísafe ekkán ruúhanir gór bana zar, zeéne pak imam boni tuáñra ruúhanir endilla kurbani ókkol peec goró, zíin Isá Mosihr duara Alla ye kobul goré. **6** Hétolla toh pak-kalam ot endilla asé, “Soó, Añí Síyon ot eggwá fattór rakír, basíloiya edde kimot ola kunar-fattór. Zee níki Íbar uore iman aníbo, yóggwa bilkúl córminda no óibo.” **7** Hétolla, tuáñra zetará iman ainno tuáñra lla hé fattór kimot ola, montor zetará iman nú ané ítara lla yíán háitçe: “Ze fattór mistíri ókkole inkar gorífelaiye, yíba fattór beggún or túaro bicí zoruri

wa óigiyoi,” 8 yíán óu: “Yibá eggwá uját há de fattór, edde foraba de eggwá cíl.” Ítara uját há de kiyólla-hoilé, ítara kalam amól no goré, aar ítara re híyan olla beh ʔík gorá gíyeh. 9 Montor tuáñra toh eggwá basfíloiya nosól, baáñccar imam, pak koum, edde Allar Nizor háas bonda, zeéne zibá ye tuáñra re andár ottu Nizor taajuippa foór ot ɗahai ainné ɓbar kuduruti ham or boiyan goró. 10 Ek hale toh tuáñra Allar manúc nu accíla, montor yala tuáñra ɓbar manúc; age tuáñra rahám nó foo, montor yala tuáñra rahám faiyó. 11 Ó adorja ókkol, ańi tuáñra re fóriyat gorír, tuáñra nizoré bidecí edde forbáci buzí jisími azzu ókkol ottu basi táko, zífne ruh lói larái goré. 12 Beyohúdi ókkol or dormiyan ot tuáñrar solasol ʔík raikko, zeéne ítara tuáñra re burai-goróya hoi elzam lagailé yo, tuáñrar bála ham ókkol deká híin or zoriya, Alla aibár din ɓbar taarif goré. 13 Malik or wasté nizoré hárr insáni hókumot ot gosáido: ɓba baáñcca óuk zibá uoror tokkat, 14 yáh hákim ókkol, zetará re baáñccar torfóttu difeɗá zah de, burai goróya ókkol ore sáńza dí bolla aar bála ham goróya ókkol ore taarif gorí bolla. 15 Kiyólla-hoilé Allar moncá óilde híyan, tuáñra zen bála ham gorí bekuf ókkol or afáraingga hotá ókkol nízám gorífelai faro. 16 Azad faiyar dóilla góri zindigi haɗo, montor nizor azadi re burair gúroni ísafe estemal no goijjó, bólke Allar gulam ísafe goijjó. 17 Beggún ore izzot goijjó; imandár báiyain dore muhábbot goijjó; Allar ɗoor raikko; baáñcca re izzot goijjó. 18 Gulam ókkol, furafuri izzot or sáańte nizoré nizor girós or hańse gosáido, siríf gom edde cída gún or hańse no, bólke gáańr gún or hańse yó. 19 Kiyólla-hoilé yíán toh rahámot or laayek, zodi honókiye nizor kíyal ot Alla re rakí nainsáfi duk or tokolif bordac goré. 20 Kiyólla-hoilé zodi tuáñra hosúri goróne ɓira hoo de híin sobór or sáańte bordac goró, híyan ot kii súwab asé? Montor zodi sóiyi gán gorí duk foo de híin sobór or sáańte bordac goró, híyan toh Allar hańse rahámot or laayek. 21 Tuáñra re etollá éna ɗaka gíyeh, kiyólla-hoilé Mosih ye toh tuáñra lla duk fai ekkán meésal rakí gíyeh, zeéne tuáñra ɓbar hańiye-hańiye solo. 22 ɓba ye no honó guná goijjé, aar no ɓbar muk ot honó férokbazi faa gíyeh. 23 Zeńtté ɓba ye gail háiye, ɓba ye uzan gail nó deh; aar zeńtté duk faiyé, ɓba ye dómki nó deh, bólke insáf bisar goré de ɓbar hańse Nizoré gosáidiye. 24 Aar Nize ańárar guná re ɓbar gaat gori looi kúruc ot loigiyé, zeéne ańára guná ttu mori forhégari lla basi táki. Tuáñra ɓbar zohóme beh gom óiyo. 25 Kiyólla-

hoilé bérasóol or dóilla tuáñra toh gollot rastat zaat accí; montor yala tuáñra nizor Soroya edde ruhr Saásita-goróyar hańse ɓiri aigiyogói.

3 Bouwáin ókkol, héndilla tuáñra yó nizoré nizor-nizor hócom or hańse gosáido, zeéne zodi ítara baaz kiyé kalam no manilé yo, ítarar bouwáin de zen honó hotá sára nizor solasole ítara re boɗai aní fare, 2 kiyólla-hoilé ítara saibó de óilde, tuáñrar pak edde izzoitta solasol. 3 Tuáñra nizoré baár ttu háńzar zorur náí, sul or binis báńgi, cúna lói yáh barík hoorsuor findí; 4 bólke ziyán zorur híyan óilde nizor dil ore háńzon, ruhr fána no ó de norom edde cída lói, kiyólla-hoilé Allar nozor ot híyan beh bicí kimoti. 5 Agor zobanat Allar uore bóraca rakító de pak mayafuain ókkole yó nizoré héndilla háńzaito de, nizoré nizor-nizor hócom or hańse gosáidi. 6 Zendilla niki Sáraha, híba ye Ibrahim ore malik ɗaki yóggwar hókum or tole tákito; zodi tuáñra sóiyi gán goró aar honó ɗoor ore faɗta no doh, tóoile tuáñra toh híbar zíyain óiyo. 7 Hócom ókkol, héndilla tuáñra yó bouwáin dor fúańti buddír sáańte zindigi haɗo, ítara re komzur sáańti de zani edde tuáñrar dóilla rahámoti zindigir mirasdár de buzí ítara re izzot diyo, zeéne tuáñrar duat bazá foida no. 8 Hoitó sair de, beggún ek mon ola ó, feɗfurani rakó, báí or dóilla muhábbot goró, rahám ola ó, norom ó; 9 burair bodol burai no goijjó, aar gail or bodol gail no diyó; yárbodol ítara lla borhot maiggo, kiyólla-hoilé tuáñra re hé moksóte éna ɗaha gíyeh, zeéne tuáñra borhot miras foo. 10 Pak-kalam ot toh endilla asé, “Zar ttu zindigi re muhábbot lage, edde monehoó bála din ókkol dekáte, yóggwar ttu nizor zir ore hórafi ttu aar nizor uńɗ ore misá hotá howá ttu sóońlar zorur. 11 Yóggwa ttu burai ttu ɓiri aái gom mún gorár zorur; yóggwa ttu cántir kucíc edde fisá dórar zorur. 12 Kiyólla-hoilé Mabud or suk toh forhégar ókkol or uore, aar ɓbar hane ítarar dua fúne; montor Mabud burai-goróya ókkol or hélaf.” 13 Zodi tuáñra ttu gom mún goittó josba táke, tuáñra re hóti-goróya hon? 14 Montor zodi forhégari wasté tuáñra ttu duk faa fore yó, tuáñra mubarek. Ítarar dómki re no ɗooraiyó, aar sinta no goijjó, 15 bólke tuáñrar dil ot Mosih re Malik ísafe pak maniyó. Zee niki tuáñra ttu asé de acár wájá tadarot goré, yóggwa re zuwab di bolla hámica toiyar táikko, montor dite norom or sáańte edde izzote diyo, 16 aar dil óu sáf raikko, zeéne ze maincé tuáñrar bodnam goré edde

tuáñra ttu Mosihr ummot ísafe asé de bála solasol ore gail deh, ítara córminda ó. **17** Kiyólla-hoilé hóríf ham gorí duk faar túaro, zodi Allar moncá óile gom ham gorí duk faa toh beétor. **18** Kiyólla-hoilé Mosih yó de guná lla ekbar duk faíl de asé, yáni forhésgar gwá ye hóríf manúc ókkol olla, zeéne íba ye añára re Allar hañse loizai fare. íba re jisíme mariféla gíyeh, montor ruhr hálót ot zinda gorá gíyeh, **19** aar hé hálote íba zai bondit asé de ruh ókkol or hañse tobolik goijjé, **20** zetará boóut age Nuhr zobatan zeñtté kicți toiyar ór aar Alla ye sobór or sáañte entezar gorí táikkil, héñtte nafórman accíl. Hé kicți gán ot bicí hom, yáni añçto zon manúc beh faní ttu baiccíl. **21** Hé faní óilde bápțismar ekkán nicán, ziyáne yala tuáñra re nejat faba. Bápțisma lon gaar hoñsara dur gorón no, bólke híyan óilde sáf dil olla Allar hañse ekkán aros. Híyane nejat faba de Isá Mosih mora ttu zinda ówar duara, **22** Zibá asman ot zaigói Allar den đák ottu asé, aar firista ókkole, kémota ola ókkole, edde kuduruti jiníc ókkole íbar hókumot mane.

4 Hétolla, zettót Mosih ye jisím ot duk faiyé, tuáñra nizoré yó ekí niyote mozbut goró; kiyólla-hoilé zee niki jisím ot duk faiyé yóggwa ye gunár adot félaidiye, **2** tói yóggwa ye baki zindigi insáni hóríf moncáye ar no hařa, bólke Allar moncáye beh hařa. **3** Giiyói de októtt tuáñra uúin gorát kafi țaim hařaifelaiyo zín Beyohúdi ókkole goitté fosón goré; tuáñra iín ot beh zindigi hařaíila: bodmaci, kukíyal, nicábazi, ađđabazi, nicár mela-cóba, edde gínayi mutti fuñza. **4** Yala tuáñra ítarař fúañti hé bicí ayaci-kúcit cámil náí de dekı ítara taajup ógiyoi, aar ítara tuáñrar baabute bura-ára hoó. **5** Montor ítara ttu Ubár hañse ísaf díya foribó zibá zindar edde morar bisar gorí bolla toiyar. **6** Kiyólla-hoilé mora ókkol or hañse úddwa kúchóbor tobolik etollá éna gorá gíyeh, zeéne jisími hálote ítarař bisar insán or đóilla gorá zah, montor ruhr hálote ítara Allar đóilla zinda táke. **7** Tamám jiníc ókkol or hótom đáke aáigiyo; hétolla, dua gorí bolla úñciyar táko edde úñic ot táko. **8** Ebbe zoruri óilde, ezzon ore ezzone josbar sáañte muhábbot goró, kiyólla-hoilé muhábbote boóut guná ókkol záfai raké. **9** No monmonai ezzon ore ezzone meémandari goró. **10** Zee zendilla niyamot faiyó, Allar đóilla-bođóilla rahámot or bála mazí ísafe híin ezzon ore ezzone hédmot gorí bolla estemal goró. **11** Zee kiyé tobolik goré, yóggwa ye Allar kalam beh tobolik goróuk; zee kiyé hédmot

goré, yóggwa ye Alla ye dee de toófike beh hédmot goróuk, zeéne hárr kessút Isá Mosihr duara Allar taarif ó. Taarif edde raastri abadulabad hámica íbar. Aamin. (aiñ g165) **12** Adorja ókkol, tuáñrar hañse ze ooini duk ókkol asé zín aiyé de óilde tuáñra re entán gorí bolla, híin tuáñrar hañse osin kessú ór fángori taajup no óiyo, **13** bólke zetó tuáñra Mosihr duk ókkol ot bági ór héto kúci ó, zeéne íbar mohíma zahér óibo de októtt óu tuáñra kúci uore kúci ó. **14** Zodi Mosihr nam olla tuáñrar beizzoti ó, tuáñra mubarek, kiyólla-hoilé mohíma ola Ruh, yáni Allar Ruh tuáñrar uore asé. **15** Duk faile yo, saiyo tuáñra honókiye zen kúni, suri, burai-goróya ísafe yáh oinno zon or maamelat nak gólaidi duk no faa, **16** lekin zodi honókiye Isáyi de hétolla duk faa, yóggwa ye no córmouk, bólke hé forisor zoriya Allar taarif goróuk. **17** Kiyólla-hoilé bisar or októtt toh aáigiyo, aar hé bisar Allar foribar ottu lóti beh cúru ór. Añára ttu lóti cúru ór de óile, uitarár hálót keén óibo fánillar zetará Allar kúchóbor ore amól no goré? **18** Aar, “forhésgar ottu úddwa nejat faite mockil de óile, bedinir edde gunágar or hálót keén óibo fánillar?” **19** Hétolla, zetará Allar moncá mozin duk faar de asé, ítara gom ham gorí-gorí nizor zan ore biccácdar Foidagoróyar hañse gosáidouk.

5 Tuáñrar bútoře asé de buzurgó ókkol ore, Añ nize yó zettót buzurgó aar añ Mosihr duk-mosibot or ezzon gobá edde zahér óibo de mohímat óu córik óiyum ísafe, ítara re nosíyot gorír: **2** Allar ze berasóol or zák tuáñrar bútoře asé yíba re soro, yíbar saásita goríba de mojburiye no bólke Allar moncá mozin monehoói yore; nazayes nofár acáye no bólke azzuye; **3** aar zetará re tuáñrar át ot díiya gíyéh ítarař uore hókumot no solaiyó, bólke hé sóol or zák or hañse nomuna boinno. **4** Tói zeñtté Đoñr Soroya wa zahér óibo, tuáñra mohíma tas faiba, zibá honódin nac no óibo. **5** Ó juwan ókkol, héndilla tuáñra yó nizoré tuáñrar buzurgó ókkol or hañse gosáido. Beggúne ezzon ore ezzone hédmot gorí bolla cídayi re fiñđó, kiyólla-hoilé, “Alla fohór ola ókkol or ulđa tíya, montor níróc ókkol ore rahámot goré.” **6** Hétolla nizoré Kudurutwala Allar muúntu níróc goró, zeéne íba ye sóiyi októtt tuáñra re uñsol ot tulé. **7** Tuáñrar hárr sintabáfani íbar uore đálido, kiyólla-hoilé íba ye toh tuáñrar díyan raké. **8** Úñic ot táko, edde úñciyar táko; tuáñrar duccon íbilíc, guzore de cinggor đóilla gúrařra gorát asé, haré háifelai faribó de talace. **9**

Hétolla iman ot mozbut táki ítar mukabela goró, kiyólla-hoilé tuáñra toh zano, duniyait asé de tuáñrar imandár báiyain ókkole yó ekí dóilla duk ókkol faar. **10** Tuáñra kessú taim duk fai baade, hárr rahámot or Alla, zibá ye tuáñra re Mosihr usílaye Nizor ofúrani mohímat ðaikké, íba Nize tuáñra re fakka goríbo, mozbut goríbo, bol diibo, edde tíyagaraibo. **(aiōnios g166)** **11** Íbar raastri abadulabad hámica zari tákouk. Aamin. **(aiōn g165)** **12** Añí e barí ceñrí gán tuáñrar hañse, biccácdar báí bouli goni de Sílwanus or áta leikkí deh. Yíán lói añí tuáñra re josba edde gobá dí r de ki, híyan óilde Allar sóiyi rahámot. Híyan ot mozbut táko. **13** Babilon ot asé de ze zomát ore Alla ye tuáñrar fúañti basíloiyé, yíba ye tuáñra re sólám zanar; aar héndilla añr fua Markuse yó zanar. **14** Ezzon ore ezzone muhábbot or sáañte pak dile appá dí sólám zano. Mosihr bútoe asó de tuáñra beggún or uore cánti nazil óuk.

2 Fitor

1 Añí Sáimon Fitor, Isá Mosihr éggwa gulam edde sáhabi. Uitarár hañse lekír zetará añárar Alla edde Nejatdoya Isá Mosihr forhészgarir usílaye añárar gán or dóilla ekkán kimoti iman faiyé: **2** Alla re edde Isá añárar Malik ore sinóne tuánrar uore rahámot edde cánti bicígori nazil óuk. **3** Ubár illayi kudurute toh añára re zindigi edde dindári lói taalukat goré de híin beggún dan goijjé, zibá ye añára re Nizor mohímaye edde bálaye ðaikké Íbar re sinár zoriya. **4** Híin or duara Íba ye añára re Nizor kimoti edde ðoóñr waada ókkol diyé de asé, zeéne híin or usílaye tuánra illayi fitorot or bági óizogoi, ontú hári ze borbadi niki duniyait hóraf azzu ókkole foida goijjé. **5** Hétolla tuánra furafuri kucíce, nizor iman ot bálai, bálaít giyan, **6** giyan ot forhés, forhés ot sobór, sobór ot dindári, **7** dindárit báiyali meérbani, edde báiyali meérbaniit muhábbot baró. **8** Zodi tuánra ttu híin táke edde barér de óile, híine tuánra re añárar Malik Isá Mosih re sinát behar edde befózul óito no dibo. **9** Montor zar ttu híin náí yóggwa ye duré no deké, hoitó sailé añdá, aar nizoré nizor agor guná ókkol ottu pak-sáf gorífela gíyeh de híyan foóraifelaiye. **10** Hétolla, ó báiboináin, Alla ye tuánra re ðaikké de edde basíloiye de híyan fakkagori bolla aró becábicí kucíc goró. Kiyólla-hoilé zetókkal tuánra híin gorát táko, tuánra bilkul uját no háyba, **11** bólke héndilla óile toh tuánra re añárar Malik edde Nejatdoya Isá Mosihr ofúrani raijjet becábicí izzote góla zaybo. (aiónios g166) **12** Hétolla añí tuánra re híin hámica yaad goráidiyat tákiyum, tuánra híin zainna de edde nize faiyó de sóiyit máze tiki asó de óile yo. **13** Añí yán tík bóuli báfi de ki, zetókkal añí e tãmbur dóilla haiyaye así, tuánra re híin yaad goráidi fofoiitta gorón, **14** kiyólla-hoilé añí zani, hára añr ttu añr e tãmbu eri zaagói foribó, zendilla añré añárar Malik Isá Mosih ye yó sáf-sáf góri zanaidiyé. **15** Añí furafuri kucíc goríyum de ki, tuánra zen añr entehal or baade yó híin hámica yaad rakí faro. **16** Kiyólla-hoilé añára toh tuánra re añárar Malik Isá Mosihr taakot or edde Íba aibár baabute zanaidiyí de híin saláki gori banaíya kaháni no, bólke añára óilam de Íbar cáan or sukdahá gobá. **17** Íba ye Alla Baf ottu oñtté izzot edde mohíma faiyé zeñtté Íbar hañse hé Ðoóñr Mohíma-wala ttu e abas swá aiccé, “Íbá óilde Añr adorja Fua, zibá re lói Añí bicí kúci.” **18** Asman ottu aiccíl de hé abas yíba añára nizebase

fúinni, híyala añára Íbar fúañti pak faár or uore. **19** Aar añárar hañse nobi ókkole hoói gíye de hotá yó asé ziíne aró fakka goré. Andár zagat suk zendilla serak or foór or uzu táke, borabor héndilla zetún fózor nó fáre aar tuánrar dil ot sút-tara nó ulé, tuánra híin or uzu kíyal dilé tuánra bála goríba. **20** Montor age yán zanilo de ki, pak-kalam or honó poigam insán or buzá ttu aiccé de no. **21** Kiyólla-hoilé honó poigam insán or moncá ttu aiccé de náí, bólke insáne Pak-Ruh ye solaiyé de mozin Allar torfóttu hoíyé deh.

2 Montor zendilla Isráil koum or bútoe misá nobi ókkol óu accíl, héndilla tuánrar bútoe yó misá ustat ókkol tákibo. Ítara suppe-suppe endilla na sóiyi taalim ókkol dibo ziíne dónco ané, aar nizoré kinifélaiye de Malik ore úddwa inkar goríbo, héndilla gorí Ítara nizor uore hótat dónco aníbo. **2** Boóut zone Ítarar bereijja solasol or fisá doribo, aar Ítarar zoriya sóiyi torikar bodnam óibo. **3** Ítara lalóse banaouti hotá ókkol hoói tuánra ttu fáida tulíbo; Ítarar uore boóut age lóti hókum óigiyoi de sánza aité deri náí, aar Ítarar borbadi gúm ot no. **4** Alla ye toh guná goijjé de fírista ókkol ore bad nó deh, bólke híin ore zuzuk ot félaidi añdár gañt ot bañdí raikké, bisar or din foijjonto bon táki bolla. (Tartaroḡ g5020) **5** Íba ye furana duniyai re bad nó deh, bólke bedini ókkol or hé duniyait tuwán ainníl, montor forhészgarir tobolik goijjíl de Nuh re edde oinno háñt zon ore héntu basaáil. **6** Íba ye Sódóm edde Gomórah cóor ore furi sái gorífelai borbadir hosúrbon tóoraiye; héndilla gorí Íba ye híin ore bedini ókkol or hálót kii óibo de híyan or meésal banaíyé; **7** montor Íba ye forhészgar Luút ore basaífélaít, zibá bedini ókkol or nafak solasol or zalanit accíl. **8** Kiyólla-hoilé hé forhészgar manúc cwa ye Ítarar bútoe táki Ítarar becorá ham ziín dekéto edde fúnito híine dinbodín nizor forhészgar ruht toziya faito. **9** Hé ísafe Mabude toh dindár ókkol ore entán ottu basailoi zane aar hóraf manúc ókkol ore sánza lla bisar or din foijjonto rakí zane, **10** háasgori uitará re zetará nizor jisími nafak moncá mozin sole edde hókumot ore hékarot goré. Ítara toh goddar edde ekguañjja, Ítara kuduruti zandár ókkol ore bura-ára hoité no ðoora. **11** Montor fírista ókkol Ítarar túaro boluwar edde taakotwala de óile yo, híine Mabud or muúntu Ítarar bisar dite bura-ára no hoó. **12** Lekín manúc Ítara ziín no zane híin ore beh bura-ára hoó. Ítara óilde akkól sára januwar or dóilla, ziín nizor

zate foida óiye de dóra hái mori bolla; ítara jonggoli januwar or dóilla dónco óizayboi, **13** aar oinno zon ore goijjé de burair bodol burai faibo. Ítarar kúci óilde, din ot kúlamela góri ayaci gorón. Ítara tuáñrar fúañti hána háite dúkabazir sáañte ayaci gorí, tuáñrar uore bodnam edde córom ané. **14** Ítarar suk zenár kíyale furaiya; ítara guná gorá honó októt bon no goré; ítara komzur maincóre fán ot féla; ítara ttu lalóse kuwac goijjá dil asé; ítara toh laánoti! **15** Ítara sóiyi rasta eridi gollot rastat giyyói; ítara Biyor or fua Balam or foñt doijje deh, zee niki hárami hamanir acík accíl, **16** montor yóggwa ye nizor hosúri lla bóťbořán háail: eggwá buga gadá ye insán or abase hotá hoói nobi íbar foolait bazá díyl. **17** Manúc ítara óilde fúana kuwa edde tuwáne urai loizagói de miyúlar dóilla; ítara lla ebbe gutguiťta añdár raká gíyeh. **18** Kiyólla-hoilé ítara no de hotár ðoóñr-ðoóñr gof mari, manúc uitará re jisím or azzu mozin bodmaci goittó uskaidi fán ot féla, zetará gollot ot sole de ítara ttu neeliayér de asé. **19** Ítara tará re azadir waada deh, montor ítara nize borbadiir gulam boni asé. Kiyólla-hoilé zaré ziyáne ziti aiyé, íte toh híyan or gulam óizagoi. **20** Ítara zettót añárar Malik edde Nejatdoya Isá Mosih re siní duniyair nafaki ttu basi aái baade abar híin or fán ot foijjé aar ítara re híine ziti aiccé, ítarar fisór hálot agor hálot or túaro hóraf óiye. **21** Forhésgarir rasta siní, oh pak hókum ziyán ítara re diiya giyéh híyan ottu fissá zaar túaro, hé rasta no siná ítara lla aró beétor accíl. **22** Ítarar hálote e boson sóiyi de dahá, “Kuñire ziín oolifélaíye híin or hañse waafes zaa” aar, “Dúifelaiya cúwor waafes fúñřot řeráf foitto zaa.”

3 Ó adorja ókkol, tuáñrar hañse lekír de yíán óilde añár dusára ceñří. Yaad gorídiyar mikká ttu añí duní ceñřít tuáñrar sáf dil ore laridiyí, **2** zeéne tuáñra pak nobi ókkole ze hotá ókkol age lóti hoóigiye aar Malik edde Nejatdoyar ze hókum tuáñrar sáhabir duara aiccé híin yaad rakó. **3** Ebbe age yíán zanilo de ki, ahéri zobatan tăttaibazi-goróya ókkol tăttaibazi gorí-gorí aibó, aar nizor hóraf azzuye solibó. **4** Ítara hoibó de, “Íba aibár waada hořé giyyói? Hárr kessú toh añárar dada-bafđada ókkol moot or gúm ot fori baade yo aijjó undilla solat asé zendilla híin duniyair foidayecir héñtte lóti accíl.” **5** Montor ítara buzísinti foóraifele de ki, boóut age Allar kalame asman foida óiye, aar zobin ore faní ttu banai fanít kaayem goijjé, **6** ze fanír duara hé zobanar duniyai re tuwán aní

dónco gorífela gíyl. **7** Hé ekí kalame beh yalar asman edde zobin ore ooin loi zolai difélaí bolla raká gíyeh. Híin ore héfazot raká zaybo de, bedini ókkol or bisar edde borbadiir din foijjonto. **8** Montor adorja ókkol, tuáñra e hotá foórai no felaiyo de ki, Malik or nozor ot ek din ek ázar bosór or fúwan aar ek ázar bosór ek din or fúwan. **9** Malike íbar waada fura goitté deri goré de no, zendilla kiyé-kíyé deri goré bouli báfe; bólke íba ye tuáñra re sobór gorí táikke deh, kiyólla-hoilé honó ezzon dónco óizagoi de híyan íba ye no saá, bólke saá de, beggúne zen touwá gorifele. **10** Lekin Malik or din sur aiyé fángori beh aibó. Hé din asman eggwá ðoóñr uzore ofát óizayboi, aar san, beil, edde tara ókkol tez ooine milai zayboi; duniyai edde híyan or ham ókkol zolizayboi. **11** Híin beggún zettót héndilla góri nac óizayboi, tuáñra ttu hondilla manúc ón sáa? Tuáñra ttu pak edde dindári góri soli, **12** Allar din aibár entezar ot edde yíba hára anáibar kucíc ot ón sáa. Hé din toh asman furi dónco óizayboi, aar san, beil, edde tara ókkol tez ooine milai zayboi. **13** Lekin íbar waada mozin añára noya asman edde noya zobin or entezar ot así, zeřé forhégari táke. **14** Hétolla, adorja ókkol, zettót tuáñra híin or entezar ot asó, kucíc goró de ki, Alla ye zeéne tuáñra re cántir hálot ot dak sára edde behosúr lootfa. **15** Táariba de, añárar Malik or sobór óilde nejat or mouka; ze hotá añárar adorja báí Páule yó Allar diiya giyan mozin tuáñrar hañse leikké. **16** Yóggwa ye nizor ceñří beggún ot óu iín ókkol leikké, ziín ot endilla hodún hotá asé ziín buzíte mockil. Taalim sára edde komzur ókkole ítara baki pak-kalam bodole de héndilla híin ore yó bodolifélaí, nizor lla borbadi foida goré. **17** Hétolla hoóir, ó adorja ókkol, tuáñra híyan age lóti zano ísafe, úñciyar táko, zeéne hé bedini ókkol or gollote tuáñra re gollot rastat no loizagói, aar nizor mozbut zaga ttu lori no zogói; **18** bólke añárar Malik edde Nejatdoya Isá Mosihr rahámot ot edde íba re sinát zetó éto baró. Yala edde abadulabad foijjonto íbar taarif ówat tákouk. Amin. (aĩon g165)

1 Yohánna

1 Añára tuáñrar hañse Ubár baabute lekír, zibá foóila cúru ttu lóti asé, zibár muk zohan añára fúinni, zibá re nizor suké deikkí, zibá re kíyal góri saái yore nizor áte dóijji, yáni zindigi-dooya Kalam or baabute. **2** Hé zindigi zahér óiye; añára híyan deikkí aar híyan or baabute gobá díh. Añára tuáñrar hañse ofúrani zindigir baabute boiyan gorír deh, ziyán Baf or fúañti accíl aar añárar hañse zahér óiye. (aiōnios g166) **3** Añára zín deikkí edde zín fúinni, tuáñrar hañse híin beh boiyan gorír, zeéne tuáñra ttu yó añára llói taalukat táke. Becók añárar taalukat toh Baf loi edde Íbar Fua Isá Mosih llói éna. **4** Añára tuáñrar hañse iín etollá lekír, zeéne añárar kúci fura ó. **5** E hotá añára Íba ttu fúinni aar tuáñrar hañse boiyan gorír, ki hoilé, Alla óilde Nur, Íbar bútoore honó andár náí. **6** Añára andár ot zindigi harai zodi endilla hoói, añára ttu Íba llói taalukat asé, tooile toh añára misá hotá hoóir, aar sóiyi gán no gorír. **7** Montor zodi añára Nur ot zindigi harai, zendilla Íba Nize yó Nur ot asé, tooile toh añára ezzon ottu ezzon loi taalukat asé aar Íbar Fua Isár lou wé añára re hárr guná ttu pak-sáf goré. **8** Añára zodi hoói, añára ttu honó guná náí; tooile toh añára nizoré fáki dír deh, aar dahá zah de, añárar bútoore sóiyi náí. **9** Montor zodi añára añárar guná Allar hañse cíkar gorí, tooile Íba ye añárar guná maf gorídibo, aar añára re hárr kuham ottu pak-sáf goríbo, kiyólla-hoilé Íba biccácdar; Íba ye honódin nainsáfi no goré. **10** Añára zodi hoói, añára honó guná nó gorí; tooile toh añára Íba re misákur banair, aar añárar dil ot Íbar kalam náí.

2 Ó adórja fuain, ańí tuáñrar hañse iín etollá lekír, zeéne tuáñra guná no goró. Montor zodi honókiye guná gorífele, añára ttu de Baf or hañse ezzon Cúwaricgar asé, Íba óilde forhésgar Isá Mosih. **2** Íba Nize óilde añárar gunár koffara; siríf añárar no, bólke fura duniyair maincór gunár óu. **3** Añára zodi Íbar hókum ókkol amól gorí, tooile zani faijjum de ki, añára Íba re siní faijji. **4** Zee niki endilla hoó, “Ańí Íba re siní faijji,” lekin Íbar hókum ókkol amól no goré, íte misákur, ítar bútoore sóiyi náí. **5** Montor zee niki Íbar kalam amól goré, becók ítar bútoore Allar muhábbot furafuri asé. Híyane añára zani fari de, añára Íbar bútoore así. **6** Zee niki Íbar bútoore así hoói dabi goré, ítar ttu Íbar dóilla góri solar fóros. **7** Ó adórja ókkol,

ańí tuáñrar hañse honó noya hókum lekír de no, bólke ekkán furana hókum, ziyán tuáñrar hañse foóila cúrut lóti asé. Furana hókum híyan óilde tuáñra fúinno de hé kalam. **8** Arek ruwate, ańí tuáñrar hañse ekkán noya hókum lekír hoilé fare, ziyán or sóiyi Íbar bútoore edde tuáñrar bútoore dahá zah, kiyólla-hoilé andár fúraizargoi aar asól nur zola cúru óigiyoi. **9** Zee niki nur ot así hoó montor nizor báí ore nafórot goré, íte aijjó andár ot asé. **10** Aar zee niki nizor báí ore muhábbot goré íte nur ot táke, aar ítar ttu ujăt háibar kessú náí. **11** Montor zee niki nizor báí ore nafórot goré, íte andár ot asé aar andár ot solaffira goré; íte hoře zaar de híyan íte no zane, kiyólla-hoilé andáre ítar suk ańdá gorífelaiye. **12** Ó gura fuain ókkol, ańí tuáñrar hañse etollá lekír, kiyólla-hoilé Mosihr name toh tuáñrar guná ókkol maf gorídiya gíyeh. **13** Ó baf ókkol, ańí tuáñrar hañse etollá lekír, kiyólla-hoilé tuáñra toh Ubá re sinó zibá foóila cúrut lóti asé. Ó juwan ókkol, ańí tuáñrar hañse etollá lekír, kiyólla-hoilé tuáñra toh Íbilíc ore ziti aiccó. Ó fuain ókkol, ańí tuáñrar hañse etollá leikkí, kiyólla-hoilé tuáñra toh Baf ore sinó. **14** Ó baf ókkol, ańí tuáñrar hañse etollá leikkí, kiyólla-hoilé tuáñra toh Ubá re sinó zibá foóila cúrut lóti asé. Ó juwan ókkol, ańí tuáñrar hañse etollá leikkí, kiyólla-hoilé tuáñra mozbut; tuáñrar bútoore Allar kalam táke, aar tuáñra Íbilíc ore ziti aiccó. **15** Duniyai re yáh duniyait asé de honó kessú re muhábbot no goijjó. Zee niki duniyai re muhábbot goré, ítar bútoore Baf or muhábbot náí. **16** Kiyólla-hoilé duniyait asé de híin toh, jisím or azzu, suk or lalós edde zindigir borái; híin Baf or torfóttu no, bólke duniyair torfóttu. **17** Duniyai edde duniyair azzu ókkol fúraizargoi, montor zee niki Allar moncá mozin goré, íte abadulabad tákibo. (aiōn g165) **18** Ó fuain ókkol, yala óilde ahéri októ; tuáñra de fúinno, Doijjal aiyér, ehón úddwa boóut doijjal aáigiyoi. Híyane añára zani de, yala óilde ahéri októ. **19** Becók ítara añárar héntu neeligiyói, háleke ítara añárar manúc nu accíl; kiyólla-hoilé ítara zodi añárar manúc óito, tooile ítara añárar fúańti táizaitoi; montor ítara neeligiyói de híyane sáf zahér de, ítara ezzon óu añárar manúc nu accíl. **20** Montor tuáñrar uore toh Pakzone zimmadari diiyé, aar tuáñra beggúne sóiyi re zano. **21** Tuáñra sóiyi re no zano bóuli táari ańí tuáñrar hañse lekír de no, bólke etollá kiyólla-hoilé tuáñra sóiyi re zano, aró zano de ki, sóiyi ttu honó misá nu aiyé. **22** Zee niki Isá re Mosih de inkar goré, íte misákur no ói ar kii? Zee

niki Baf edde Fua re inkar goré, íte toh doiijal. **23** Zee niki Fua re inkar goré, ítar bútoore Baf náí; aar zee niki Fua re cíkar goré, ítar bútoore Baf óu asé. **24** Hétolla saiyó, tuáñra foóila cúru ttu lóti zín fúni-fúni aiyór híin tuáñrar dil ot táke fán. Tuáñra foóila cúru ttu lóti zín fúni-fúni aiyór híin zodi tuáñrar dil ot táke, tooile tuáñra yó Fua edde Baf or bútoore tákiba. **25** Mosih ye añára re ziyán diibar waada goijjé híyan óilde ofúrani zindigi. (aiōnios g166) **26** Añí tuáñrar hañse iín uitarár baabute leikkí zetará tuáñra re gollot rastat loizaitó kucíc gorér. **27** Lekin tuáñrar uore íba ye ze zimmadari diiyé híyan toh tuáñrar dil ot táke. Hétolla tuáñra ttu ar honókiyor taalim or zorurot náí, kiyólla-hoilé íbar Ruh ye toh tuáñra re hárr kessúr taalim deh, aar híin misá no bólke sóiyi. Hétolla Ruh ye tuáñra re zendilla taalim diyé, héndilla tuáñra íbar bútoore zari táko. **28** Ói, ó adorja fuain ókkol, íbar bútoore zari táko, zeéne íba zeñtté zahér óibo, héñtte añára ttu hímmot táke, aar íba aibó de din ot íbar muúntu córminda ówa no fore. **29** Tuáñra zehón íba forhésgar de zano, tuáñra yían óu zanibá de ki, zetará forhésgari zindigi hara, ítarar zormo Alla ttu óiye.

3 Soó, Bafe añára re hotó ðoóñr muhábbot goijjé, zeén niki añára re Allar fuain howá zah; eéne toh híyan sóiyi. Duniyair maincé añára re etollá no siné, kiyólla-hoilé ítara íba re no siné. **2** Ó adorja ókkol, yala toh añára Allar fuain, montor muúntu zay añára kii óiyum de híyan aijjó zahér nó óiyo. Añára eddúr zani de ki, Mosih zeñtté zahér óibo héñtte añára íbar ðóilla óiyum, kiyólla-hoilé íba asóle zendilla añára íba re héndilla dekiyú. **3** Zetó zone Mosihr uore hé acá raikké, ítara nizoré pak-sáf raké, zendilla íba pak-sáf. **4** Zee niki guná goré íte córiyot bāñge, kiyólla-hoilé guná gorón óilde córiyot bāñgon. **5** Tuáñra toh zano, añárar guná ókkol dur gorí bolla Mosih zahér óoil; íba ttu honó guná náí. **6** Hétolla zee niki íbar bútoore táke íte gunát fori no táke; aar zee niki gunát fori táke íte íba re no deikké aar no siné. **7** Ó adorja fuain ókkol, saiyó, tuáñra re honókiye gollot ot no loiza fán. Zee niki forhésgari zindigi hara íte óilde forhésgar, zendilla íba forhésgar. **8** Aar zee niki gunát fori táke íte óilde íbilíc or, kiyólla-hoilé íbilíce toh foóila cúru ttu lóti guná gorát asé. Allar Fua etollá zahér óoil, zeéne íba ye íbilíc or ham ókkol ore dónco gorífela. **9** Zee niki Alla ttu zormo óigiyoi íte gunát fori no táke, kiyólla-hoilé ítar bútoore Allar bis asé;

aar íte Alla ttu zormo óigiyoi de hétolla íte gunát fori táki no fare. **10** Allar fuain hontará aar íbilíc or fuain hontará híyan endilla gori siná zah: zee niki forhésgari zindigi no hara íte Allar no, héndilla uite yó Allar no zee niki nizor báí ore muhábbot no goré. **11** Kiyólla-hoilé tuáñra foóila cúru ttu lóti ziyán fúni-fúni aiyór híyan óilde, añára ttu ezzon ore ezzone muhábbot gorár zorur. **12** Keéin or ðóilla no óiyo, zee niki íbilíc or accíl aar nizor báí ore kún goijjíl. Íte nizor báí ore kiyá kún gorífelail? Kiyólla-hoilé ítar ham ókkol bura accíl, montor báí or ham ókkol gom accíl. **13** Ó báiboináin ókkol, duniyair maincé tuáñra re nafórot goillé taajup no óiyo. **14** Añára toh zani, añára moot ottu zindigit faráyigai; kiyólla-hoilé añára de báiyain dore muhábbot gorí. Zee niki muhábbot no goré íte aijjó moot or hókumot or tole asé. **15** Zee niki nizor báí ore nafórot goré íte kúni, aar tuáñra toh zano, honó kúnir bútoore ofúrani zindigi náí. (aiōnios g166) **16** Añára toh Mosih ye añára íla Nizor zan dyíl de híyan ottu muhábbot kiyó re hoó de zani faijji. Hétolla, añára ttu yó nizor báiboináin ókkol olla nizor zan diyar fóros. **17** Duniyaibi cómbotti asé de manúce zodi nizor báí zorurot ot foijjé de deki baade yo nizor suk bon gorí raké, ítar bútoore Allar muhábbot keéngori zari tákibo? **18** Ó adorja fuain ókkol, aiyó, añára siríf hotáye edde zobane no, bólke hame edde sóiyiye muhábbot gorí. **19** Tói añára zani faijjum de ki, añára sóiyir, aar Allar muúntu añárar dile tosólí faibo. **20** Kiyólla-hoilé añárar dile zodi añára re hosúrbon tóora, añára toh zani, Alla añárar dil or túaro ðoóñr, íba ye hárr kessú zane. **21** Hétolla, ó adorja ókkol, añárar dile zodi añára re hosúrbon no tóora, tooile toh añára ttu Allar muúntu hímmot tákibo, **22** aar añára íba ttu zín magi híin faiyum, kiyólla-hoilé añára de íbar hókum ókkol amól gorí, aar íbar nozor ot zín fosóndar híin gorí. **23** Íbar hókum óilde, añára íbar Fua Isá Mosihr uore iman anón aar ezzon ore ezzone muhábbot gorón, zendilla Mosih ye añára re hókum díye. **24** Zee niki Allar hókum ókkol amól goré íte Allar bútoore zari asé, aar Alla ítar bútoore zari asé. íba ye añára re Pak-Ruh diiyé de híyane añára zani de ki, íba añárar bútoore zari asé.

4 Ó adorja ókkol, hárr ruh re biccác no goijjó, bólke híin Allar torfóttu ói ne no tahákit gorí saiyó; kiyólla-hoilé duniyait boóut misá nobi ókkol neeillé. **2** Allar Ruh re tuáñra endilla gori siní faribá: ze ruh ye Isá Mosih insán boni aiccíl de híyan cíkar goré,

hé ruh óilde Allar torfóttu; 3 montor ze ruh ye Isár baabute héndilla cíkar no goré, hé ruh Allar torfóttu no; hé ruh óilde Doijjal or, ze ruh aibár hotá tuáñra fúinno, aar yala úddwa duniyait asé. 4 Ó adorja fuain ókkol, tuáñra toh Allar torfóttu aar tuáñra ítara re ziti aáigiyogoi, kiyólla-hoilé tuáñrar bútoze zibá asé íba toh duniyait zee asé ítar túaro ðoóñr. 5 Ítara duniyair torfóttu, hétolla ítara duniyaibi hotá hoó deh, aar duniyair maincé ítarar hotá fúne. 6 Montor añára de Allar torfóttu. Zetará Alla re siné, ítara añárar hotá fúne; montor zetará Allar torfóttu no, ítara añárar hotá no fúne. Héndilla góri añára sóiyir ruh re edde dúkabazir ruh re siní fari. 7 Ó adorja ókkol, aiyó, añára ezzon ore ezzone muhábbot gorí, kiyólla-hoilé muhábbot toh Allar torfóttu. Zee niki muhábbot goré íte Alla ttu zormo óigiyoi aar íte Alla re siné. 8 Aar zee niki muhábbot no goré íte Alla re no siné, kiyólla-hoilé Alla óilde toh muhábbot. 9 Añárar hañse Allar muhábbot yíane zahér óiye, ki hoilé, íba ye Nizor lehár ek Fua re duniyait diferáiyé, zeéne añára íbar duara basi táki fari. 10 Añára Alla re muhábbot goijjé de hétolla no, bólke íba ye añára re muhábbot gorí añárar gunár koffara ói bolla Nizor Fua re diferáiyé deh. Híyan ore hoó de muhábbot. 11 Ó adorja ókkol, Alla ye zettót añára re etó muhábbot goijjé, añára ttu yó ezzon ore ezzone muhábbot gorár fóros. 12 Alla re toh honókiye honódin deikké de náí. Añára zodi ezzon ore ezzone muhábbot gorí, tooile toh Alla añárar bútoze zari asé aar íbar muhábbot añárar bútoze furafuri asé. 13 Íba ye añára re Nizor Ruh ttu diiyé de hétolla añára zani fari de, añára íbar bútoze zari así aar íba añárar bútoze zari asé. 14 Añára deikké edde gobá dí de ki, Bafe Fua re duniyair Nejatdoya ói bolla diferáil. 15 Zee niki Isá re Allar Fua de cíkar goré, Alla ítar bútoze zari táke, aar íte Allar bútoze zari táke. 16 Alla ttu añára lla ze muhábbot asé híyan añára zani edde biccác gorí. Alla óilde muhábbot; zee niki muhábbot or bútoze zari táke íte Allar bútoze zari táke, aar Alla ítar bútoze zari táke. 17 Héndilla góri muhábbot añárar bútoze furafuri asé, zeéne añára ttu kiyamot or din hímmot táke, kiyólla-hoilé e duniyait añára yó de Isár dóilla. 18 Muhábbot ot honó ðoor náí; furafuri muhábbote ðoor ore dur gorífele, kiyólla-hoilé ðoor or fisé sáñzar sinta táke. Zee niki ðoor ítar bútoze muhábbot furafuri náí. 19 Añára etollá muhábbot gorí, kiyólla-hoilé age íba ye añára re muhábbot goijjé. 20 Zodi honókiye endilla hoó, “Añí

Alla re muhábbot gorí,” montor nizor báí ore nafórot goré, íte misákur; kiyólla-hoilé zee niki deikká báí ore muhábbot no goré, íte andeikká Alla re keéngori muhábbot gorí faribó? 21 Añára íbar torfóttu e hókum faiyí de ki, zee niki Alla re muhábbot goré ítar ttu nizor báí ore yó muhábbot gorá foribó.

5 Zee niki Isá re Mosih de biccác goré, íte Alla ttu zormo óigiyoi; aar zee niki Baf ore muhábbot goré, íte íbar fua re yó muhábbot goré. 2 Añára Alla re muhábbot gorí de edde íbar hókum ókkol amól gorí de híyane zani de ki, añára Allar fuain ókkol ore muhábbot gorí. 3 Allar hókum ókkol amól gorá óilde Alla re muhábbot gorá. Íbar hókum ókkol zulap no. 4 Kiyólla-hoilé zee niki Alla ttu zormo óigiyoi íte toh duniyai re ziti aiyé. Duniyai re ziyáne ziti aiccé híyan óilde añárar iman. 5 Zee niki Isá re Allar Fua de biccác goré, siríf íte no ói duniyai re ziti aiyé de ar hone? 6 Isá Mosih óilde Ubá zibá faní edde lou wór duara aiccé; siríf fanír duara no, bólke faní edde lou wór duara. Héndilla bóuli Pak-Ruh ye gobá déh, kiyólla-hoilé hé Ruh toh Nize sóiyi. 7 Gobádoya asé de tin, híin óilde: 8 Pak-Ruh, faní, edde lou; hé tiní gobá ye ekí dóilla gobá déh. 9 Becók añára insán or gobá re biccác gorí, montor Allar gobá toh aró ðoóñr. Allar gobá óilde waán ziyán íba ye Nizor Fuar baabute diyé. 10 Zee niki Allar Fuar uore iman ané ítar dile hé gobá kobul goré; aar zee niki Alla re biccác no goré íte íba re misá banaiyé, kiyólla-hoilé Alla ye Nizor Fuar baabute ze gobá díye híyan de íte biccác nó goré. 11 Hé gobá óilde, Alla ye añára re ofúrani zindigi diiyé, aar hé zindigi íbar Fuar hañse asé. (aiónios g166) 12 Zee niki hé Fua re faiyé íte hé zindigi faiyé, montor zee niki Allar hé Fua re nó faa íte hé zindigi nó faa. 13 Tuáñra zetará Allar Fuar uore iman ainnó, iín añí tuáñrar hañse kiyólla lekír hoilé, zeéne tuáñra nizor ttu ofúrani zindigi asé de zano. (aiónios g166) 14 Allar muuntu añárar ze hímmot asé híyan óilde, zodi añára íbar moncá mozin honó kessú magí, híyan íba ye fúne. 15 Añára zehón yían zani, añára ziyán magí híyan íba ye fúne; añára yían óu zani de ki, añára íba ttu zín maiggí híin faiyí. 16 Zodi honókiye nizor báí ye endilla guná gorér de déké ze guná ye moot nu ané, tooile íte dua goillé Alla ye hé báí ore zindigi diibo. Añí guná waán or hotá hoóir de ze guná ye moot nu ané. Moot ané de guná yó asé, añí héndilla guná lla dua goittó hoóir de no. 17 Hárr dóilla kuham guná, montor moot

nu ané de guná yó asé. **18** Añára zani, zee niki Alla ttu zormo óigiyoi íte gunát fori no táke, kiyólla-hoilé Allar Fua ye ítare héfazot raké, aar lbilíce ítare súi no fare. **19** Añára yíán óu zani de ki, añára Allar, aar fura duniyai lbilíc or kobzat asé. **20** Añára aró zani de ki, Allar Fua aái añára re buzíbar toóufik diiyé, zeéne añára Zibá sóiyi íba re zani fari. Becók añára Zibá sóiyi íbar búture así, yáni íbar Fua Isá Mosihr búture. íba óilde sóiyi Alla aar ofúrani zindigi. (aiōnios g166) **21** Ó adorja fuain ókkol, nizoré mutti fuñza ttu basai rakó.

2 Yohánna

1 Añí buzurgó ye, Allar basíloiya mayafuar hañse edde híbar fuain dor hañse lekír, zetará re añí sóiyi muhábbot gorí. Siríf añí no bólke zetará sóiyi re zane ítara beggúne yó muhábbot goré, **2** kiyólla-hoilé sóiyi toh añárar bútoze zari táke aar abadulabad añárar fúañti tákibo. (aĩñ g165) **3** Alla Baf or torfóttu, edde hé Baf or Fua Isá Mosihr torfóttu rahámot, meérbani, edde cánti añárar fúañti sóiyi edde muhábbote zari tákibo. **4** Tuáñr kessú fuain sóiyit soler de deká añí bicí kúci óiyi, zendilla soli bolla añára Baf or torfóttu hókum faiyí. **5** Ó izzotdár bóin, añí tuáñre aros gorír, aiyó, añára ezzon ore ezzone muhábbot gorí. Híyan añí tuáñr hañse honó noya hókum leikkí de no, bólke waán ziyán añára re foóila cúru ttu diiya giyéh. **6** Añára Allar hókum mozin solon óilde muhábbot. Íbar hókum óilde yán ziyán tuáñra cúrut lóti fúni-fúni aiyór, ki hoilé, tuáñra muhábbot or foñt báy solo. **7** Kiyólla-hoilé duniyait toh boóut dúkabaz ókkol neeillé, zetará Isá Mosih insán boni aiccé de cíkar no goré. Héndilla manúc óilde dúkabaz edde doijsal. **8** Úñciyar táikko, zeéne añára ziín olla meénnot goijjí híin hárai no félo, bólke híin or boccíc furafuri faizo. **9** Zee niki Mosihr taalim or címar baáre zaagói aar híin or bútoze zari no táke, ítar bútoze Alla náí. Montor zee niki hé taalim or bútoze zari táke, ítar bútoze Baf óu asé, Fua yó asé. **10** Honókiye zodi tuáñrar hañse aái héndilla taalim no deh, ítare gór ot zaga no diiyó aar sólám óu no zanaiyó. **11** Kiyólla-hoilé zee niki héndilla manúc ore sólám zana, íte hé manúc or bura ham ot córik óiye. **12** Añr ttu tuáñrar hañse lekíbar boóut kessú asé, montor añí híin habos edde cíyai lói lekíto no saáir. Añr acá asé de, añí tuáñra llói milto aiccúm, aar tuáñra llói muámuikka ói hotá hoiyúm, zeéne añárar kúci fura ó. **13** Tuáñr bóin zibá re Alla ye basíloiye, híbar fuain de tuáñre sólám zanar.

3 Yohánna

1 Añí buzurgó ye, adorja Gayus or hañse lekír, zibá re añí sóiyi muhábbot gorí. **2** Ó adorja, añí dua gorí de, zendilla tuáñr ruúhani torki ór héndilla tuñí zen hárr kessút torki óizogoi aar tuáñr sehét bála táke. **3** Añí bicí kúci óiyi, zeñtté hodún imandár báiyain aái yore añré tuáñr hákikot or gobá díye, ki hoilé, tuñí bóle sóiyi foñt báy solat asó. **4** Añr fuain ókkol sóiyi foñt báy soler de híyan fúnar túaro ñoóñr kúci añr ttu ar náí. **5** Ó adorja dustó, tuñí toh imandár báiboináin ókkol olla zín gorór híin imandarir sáañte gorór, háleke ítara tuáñr sinforiso manúc no. **6** Ítara zomát or muúntu tuáñr muhábbot or baabute gobá díye. Tuñí ítara re ítarar sofór ot rowana gorídite Alla kúci ó de héndilla góri dilé bicí gom óibo. **7** Kiyólla-hoilé ítara sofór ot neeillé de Mosihr nam or wasté; ítara gairimandár ókkol ottu honó modot nó loo. **8** Hétolla, héndilla maincóre modot gorón añára ttu fóros, zeéne añára yó sóiyir ham-goróya ói fari. **9** Añí zomát or hañse kessú leikkílam; montor Diyutrifes, zee ítarar bútoe sóddari goittó saá, íte añárar hotá kobul no goré. **10** Hétolla, añí hére ailé, íte goré de ham ókkol tulíloriyum. Íte añára re ínca gorí añárar bodnam ókkol gorér. Ítar ttu híyan lói kafi nó óiyo, íte imandár báiyain dore yó kobul no goré, aar zetará kobul goittó saá ítara re maná goré aar zomát ottu neelaide. **11** Ó adorja dustó, burair fisáli no bólke gom or fisáli dóri solo. Zee niki gom ham goré íte óilde Allar, montor zee niki bura ham goré, íte Alla re nó deké. **12** Demetriyuse beggún or hañsóttu gom nam faiyé, sóiyir hañsóttu úddwa. Añára yó yóggwar nam gorí. Tuñí toh zano, añára di de gobá sóiyi deh. **13** Añr ttu tuáñr hañse lekíbar boóut kessú asé, montor añí híin holom edde cíyai lói lekító no saáir. **14** Añr ttu acá asé de, añí tuáñre bicí hára dekiyú, aar añára muámuiikka ói hotá hoiyúm. Tuáñr uore cánti óuk. Eñiyar dustó ókkole tuáñre sólám zanar. Tuñí hériyar dustó ókkol ore zon-zon gori añr sólám diyo.

Yohúdah

1 Añí Yohúdah, Isá Mosihr éggwa gulam aar Yakub or báí. Uitarár hañse lekir, zetará re Alla ye ðaikké, zetará óilde Alla Baf or adorbon aar Isá Mosihr duara héfazot or tole asé. **2** Tuáñrar uore meérbani, cánti edde muhábbot bicígori nazil óuk. **3** Ó adorja ókkol, zeñtté añí tuáñrar hañse nejat waán or baabute leki bolla furafuri kucíc gorír ziyán ot añára beggún córik así, añí e aros sán lekón zorur bouli báippi, ki hoilé, tuáñra zan-foan di oh iman or wasté larái goró ziyán Allar pak bonda ókkol ore ekbar ot hámica lla diíféla gíyeh. **4** Kiyólla-hoilé ót no faifán góri hoozzon manúc suppe-suppe añárar bútoze góillegai de asé, zetarár sáñzar zikír yaar boóut age lóti asé. Ítara bedini ókkol, zetará Allar rahámot ore bura ham or ezazot-nama banaiféle, aar añárar lehár Girós edde Malik Isá Mosihr re inkar goré. **5** Tuáñra iín beggún zano de óile yo, toóu añr ttu tuáñra re yaad goráidito monehoór de ki, Malike Boni Isráil ókkol ore Ijíp mulluk ottu basai aní baade, ítarar bútotu uitará re dónco gorífelail zetará iman nú ané. **6** Aar ze fírista ókkole nizor hókumot or tokka zari nó raké bólke nize tákito de sóiyi zaga eridifélaie, Alla ye híin ore ðoóñr kiyamot or din olla abadulabadi síyol lói andár ot bañdí raikké; (aiðios g126) **7** zendilla Sódóm edde Gomórah re edde cóor híin or atehañosór cóor ókkol ore raikké, kiyólla-hoilé híin óu fírista híin or dóilla zenákarit forigílgoi edde niyom or ulða zenár fisá doijjil. Ítarar hálót óilde uitarár ekkán meésal zetará ofúrani ooin ot sáñza faibo. (aiðnios g166) **8** Borabor héndilla, hé bedini ókkole yó ítarar cóppon or bazá dídi jisím ore nafak goré, honó hókumot ore no mane, aar kudurutdár ókkol or bodnam goré. **9** Montor uñsol tokkar fírista Maikele úddwa zeñtté íbilíc lói Muúsar lac or baabute torkatorki diyé, yóggwa ye beizzotir sáañte itare hosúr dí bolla hímmot nó goré, bólke hoóil de, “Malike toré sáñza douk!” **10** Montor hé manúc ítara ziín no buzé híin or baabute bodnam goré, aar akkól sára januwar or dóilla ítara ziín buzé híine ítara re dónco gorífele. **11** Ítarar uore afsús! Kiyólla-hoilé ítara Keéin or foñt doijje, aar nofá hásil gorí bolla bouli ítara Balame goijjíl de goltit nizoré gosáidiye; ítara Kórar dóilla ámana gorí dónco óigiyoi. **12** Zeñtté ítara honó ðoor-córom sára tuáñrar muhábbot or mela-cóbat córik ó, héñtte ítara óilde ót no faiya gúiṭṭar dóilla, aar siríf nizoré beh fale deh. Ítara boiyare urai loizagói de zór

sára miyúlar dóilla, aar endilla gas ókkol or dóilla ziín ore gulagalar moósum ot úddwa gulagala no dóre de hétolla murí ttu háñrifela zah, híin dui mikká ttu mora. **13** Ítara doijjar tuwáni goir or dóilla, kiyólla-hoilé féñar dóilla ítarar córomi ham ókkol báci uré. Ítara gúrafira goré de tara ókkol or dóilla, zetará lla ebbe guṭṭguitṭa andár hámica lla raká gíyeh. (aiðn g165) **14** Ítarar baabute Adom zai háñt nombór or nosól or manúc Idirise endilla agun hotá hoiyé, ki hoilé, “Soó, Malik Nizor ázar-ázar pak fírista ókkol lói aiyér, **15** beggún or bisar goittó. Íba ye tamám bedini ókkol ore ítara bedinir sáañte zedún bedini ham ókkol goijjé híin or edde hé bedini gunágar ókkole íbar ulða zedún doró-doró hotá ókkol hoiyé híin beggún or hosúrbon elan goríbo.” **16** Manúc ítara hámica monmona edde ték feñra, aar nizor bura azzu mozin sole. Ítara nizor baabute borái goré, aar nofá hásil gorí bolla maincóre tulá déh. **17** Lekín, ó adorja ókkol, Malik Isá Mosihr sáhabi gúne ziín hoói gíyeh híin yaad raikkó, **18** ítara tuáñra re hoóil de, “Ahéri zobanat tooñcábazi-goróya ókkol aibó, zetará nizor bedini azzu mozin solibó.” **19** Ítara óilde uitará zetará faáṭa-faáṭi foida goré; ítara duniyaibi kíyale beh sole, aar ítara ttu Pak-Ruh náí. **20** Montor, ó adorja ókkol, tuáñra ttu asé de hé ebbe pak iman or uore nizoré banaituló, Pak-Ruhr héðaiyote dua goró, **21** nizoré Allar muhábbot ot zari rakó, ofúrani zindigi fai bolla añárar Malik Isá Mosihr meérbaniir entezar ot táko. (aiðnios g166) **22** Zetará ttu cók-cubá asé ítarar uore rahám goijjó; **23** oinno zon ore ooin ottu ṭani basaifélaiyo; aar zetarár zindigi hoñsara óigiyoi, ítarar nafak hoor ore úddwa nafórot gorí uñciyarir sáañte ítarar uore rahám goijjó. **24** Zibá ye tuáñra re uját há ttu basai fare aar Nizor mohímar cáikkat honó dak sára ðoóñr kúcir sáañte tíyagarai fare, **25** hé lehár Alla añárar Basailoyar mohíma, ðoóñrgiri, raastri edde kémota Isá Mosihr añárar Malik or duara hárr zobanar age yó accíl, ehón óu asé, aar abadulabad óu zari tákouk. Aamin. (aiðn g165)

Zahéri

1 Iín óilde Isá Mosih ye goijjé de zahéri ókkol, zíin Alla ye íba re etollá zanaiyé, zeéne zíin bicí hára hámaha fura óibar asé híin íba ye Nizor gulam ókkol ore dahá. Hétolla Isá ye Nizor fírista difeṛái Nizor gulam Yohánnar hañse iín zahér goijjé. **2** Yohánna ye Allar kalam or edde Isá Mosihr gobár baabute zíin-zíin deikkíl híin beggún or baabute gobá díye. **3** Mubarek ubá zee niki e poigam iín telawot goré, aar uitará yó mubarek zetará iín fúne edde eṛé zíin leikká asé híin amól goré, kiyólla-hoilé iín fura óibar októ toh ḍáke. **4** E ceñrí gán ańí Yohánnar torfóttu, Eciya elakat ze háńt twa zomát asé híin or hañse lekír: Tuáńrar uore rahámot edde cánti nazil óuk, Ubár torfóttu zibá asé, zibá accíl, edde zibá aibár asé; háńt ruh uúin or torfóttu yó, zíin íbar toktór muúntu asé; **5** héndilla, Isá Mosihr torfóttu yó, zibá óilde biccácdar gobá, zibá mora ókkol ottu zinda óiye de foóila zon, zibá duniyair baáńcca ókkol or hókumot-goróya. Íba zibá ye niki ańára re muhábbot goré, zibá ye Nizor lou wé ańára re ańárar guná ttu azad goijjé, **6** zibá ye ańára re lói ekkán raijjo banaiyé aar ańára re íbar Alla edde Baf or ham olla imam banaiyé, íbar mohíma edde raastri abadulabad hámica zari tákouk. Aamin. (aiōn g165) **7** Soó, íba miyúlar bútoṛe góri aiyér; hárr suké íba re dekiḥbo, uitará úddwa zetará íba re gańittíl. Duniyair tamám koum ókkole íba re deki ferecani zahér goríbo. Héndilla óuk. Aamin. **8** Mabud Alla ye endilla fórmár, “Ańí óilam de Alfa edde Omíga, Ubá zibá asé, zibá accíl, edde zibá aibár asé, yáni hárr Kudurutwala wa.” **9** Ańí óilam de Yohánna, zibá tuáńrar báí, aar Isár ummot ísafe mosibot ot, raijjet, edde sobór ot tuáńrar sáańti, zibá re Allar kalam tobolik gorár zoriya edde Isár baabute gobá diyar zoriya Pátmos hoó de ḍiyat raká gýl. **10** Malik or din ek rooibare ańí Pak-Ruhr kobzat accílám, aar ańr fisór ttu cíańr abas or ḍóilla éggwa ḍoóńr abas fúinni, **11** eén hoór de, “Tui zíin dekor híin eggwá kitab ot lek, baade yíba re háńto wa zomát ot difeṛá, yáni ífisas ot, Semúrnat, Pírgamun ot, Tuatírat, Sárdís ot, Filadílfyat, edde Laudíkíyat.” **12** Hétunot, zibá ye ańr lói hotá hoór íba re sai bolla ańí muu fíraiya. Aar fíjji rár cúnar háńt tan serak-or-boiṛóni deikkí; **13** hé boiṛóni gún or mazéhale moniccór ḍóilla honnwággwa asé, zibár tęg or gurat foijjonto lamba zubba findá aar sínat máze cúnar ekkán faṭṭi baindá. **14** Íbar matár sul lun bérasóol or

keńc or ḍóilla dóla, yáni boróf or ḍóilla fúut dóla; aar íbar suk kún ooin or zilhar ḍóilla. **15** Íbar tęg or fata gún guṭguittá ooin or fooin ot furat di sáf goijjá sosoikka fitol or ḍóilla, aar íbar abas bicí fanír holholanir abas or ḍóilla. **16** Íba ye Nizor den áte háńt twa tara dóri táikke, aar íbar gal ottu ekkán dui-dárja dár toluwar neeliaiccé. Íbar siyára fura teze zoler de beil or ḍóilla. **17** Íba re deki ańí mora manúc or ḍóilla íbar foot forigiýgoi. Hétunot íba ye íbar den át ańr uore di hoór de, “No ḍoorac; Ańí Awal edde Akér. **18** Ańí óilam de Zindawa; Ańí morigílamboi, yala saá, Ańí abadulabad foijjonto zinda así. Moot or edde fatalfur or zagar sabí Ańr át ot asé. (aiōn g165, Hadēs g86) **19** Hétolla zíin deikkós, zíin yala ór, edde zíin iín baade óibo de asé, híin beggún lekífela. **20** Tui ze háńt twa tara Ańr den át ot deikkós híin or edde cúnar háńt tan serak-or-boiṛóni gún or gufoni óilde endilla: háńt twa tara óilde háńt twa zomát or fírista gún, aar háńt tan serak-or-boiṛóni óilde háńt twa zomát tun.

2 “Ífisas cóor or zomát or fíristar hañse endilla lek: Zibá ye Nizor den áte háńt twa tara dóri táke, zibá ye cúnar háńt tan serak-or-boiṛóni gún or mazéhale solafira goré, íba ye iín hoór: **2** Ańí tor ham, tor meénnot edde tor sobór or baabute zani. Ańí yían óu zani de ki, tui hóraf manúc ókkol ore bordac gorí no faros aar zetará nizoré nize sáhabi bouli dabi goré, háleke ítara sáhabi no, tui ítara re tahákít goijjós aar ítara misá de loot faiyós; **3** tor ttu sobór asé, aar tui Ańr nam or wasté duk bordac gorát óran nó ós. **4** Montor Ańr ttu tor ulḍa yían hoibár asé de ki, tui tor foóila muhábbot ore bad difélaiyos. **5** Hétolla, báfi sáa tui hoddúr ottu forigiýsgoi. Touwá gor, aar ham uúin gor zíin age goijjíl; arnóile zodi tui touwá no gorós, Ańí aái yore tor serak-or-boiṛóni gán híyan or zaga ttu larifelaiyum. **6** Montor tor ttu yían asé: tui Nikolatiól or ham ókkol ore nafórot gorós, zíin Ańí yó nafórot gorí. **7** Zar ttu fúnibar han asé íte fúno, Pak-Ruh ye zomát ókkol ore kii hoór deh. Zee niki ziti aiyé, Ańí ítare zindigi gas or gula háito dífum, zibá Allar jonnotul-férodus ot asé. **8** “Semúrna cóor or zomát or fíristar hañse endilla lek: Zibá Awal edde Akér, zibá morigílgoi aar zinda óiye, íba ye iín hoór: **9** Ańí tor mosibot ókkol ore edde tor gorífi hálót ore zani, montor becók tui ruúhanir tuangor. Ańí uitarár kuféri re yó zani zetará nizoré nize Yohúdi hoói dabi goré, háleke ítara Yohúdi no, bóлке Cóitan or éggwa

dol. **10** Tui ze duk ókkol faibar asé híin ore no ðoorai. Fún, íbilíce toré entán gorí bolla tor kessú maincóre ziyól ot díbo de asé, aar tui doc din fán duk faibi. Moot foiijonto imandari tákic, tói Añí toré tas ísáfe zindigi diiyum. **11** Zar ttu fúnibar han asé íte fúno, Pak-Ruh ye zomát ókkol ore kii hoór deh. Zee niki ziti aibó, ítare dusárabar or moote hótí no goríbo. **12** “Pirgamun cóor or zomát or fíristar hañse endilla lek: Zibá ttu dui-dárja dár toluwar asé, íba ye íin hoór: **13** Añí zani tui hoře tákos, tui uré tákos zeře Cóitan or toktó asé; montor toóu tui Añr nam ore dorógori dóri táikkos, aar ze din ókkol ot Añr biccácdar gobá Entipas ore Cóitan táke de zagat tuáñrar muúntu kotól gorá gýeh, hé din ókkol ot úddwa tui Añr uore iman raká eri nó dos. **14** Lekin Añr ttu tor ulða hookkán asé: Tor hére endilla kessú manúc asé zetará Balam or taalime sole, zibá ye Balak ore cíkai díyl de, Boni Isráil ókkol ore gunát forabai bolla, yáni muttir hañse kurbani diya hána ókkol hábai bolla edde zená gorá bay bolla. **15** Borabor héndilla, tor hére endilla yó kessú manúc asé zetará Nikolatiól or taalime sole. **16** Hétolla touwá gor; arnóile Añí toratori tor hére aiccúm, aar Añr gal or toluwar loi ílara llói larái goijjúm. **17** Zar ttu fúnibar han asé íte fúno, Pak-Ruh ye zomát ókkol ore kii hoór deh. Zee niki ziti aiyé, Añí ítare lukai raikká kessú manná diiyum. Añí ítare eggwá dóla fattór óu diiyum, ze fattór gwar uore noya ekkán nam leikká asé, ziyán zee niki yíba faiyé íte bade ar honókiye no zane. **18** “Tuatíra cóor or zomát or fíristar hañse endilla lek: Allar Fua, zibá ttu ooin or zilhar dóilla suk asé, zibár téng or fata sosoikka fitol or dóilla, íba ye íin hoór: **19** Añí tor ham, tor muhábbot, iman, hédmot edde tor sobór or baabute zani. Añí aró zani de ki, tor yalar ham age goittí de híin or túaro bicí. **20** Montor Añr ttu tor ulða yían asé: Tui mayafua Jezabel ore ham goittó dos, zibá ye nizoré nize eggwá ambiya hoó, hétolla híba ye nizor taalim loi Añr gulam ókkol ore sóiyi ttu duré gorífeler, zeéne ílara zená góre edde muttir hañse kurbani diya hána ókkol háa. **21** Añí híba re híbar zenákari ttu touwá goríbar mouka díllam, montor híba ye touwá goittó nó saá. **22** Saá, Añí híba re biyaram or bisánat félaiyum, aar zetará híba llói zená goré ílara re ðoñr mosibot ot félaiyum, zodi ílara híbar hé ham ottu touwá no goré. **23** Añí híbar fuain dore zane marifélaiyum, baade tamám zomát ókkole zanibó de, Añí óilam de Ubá zibá ye díl edde mon ókkol ore zasai gorí saá. Añí tuáñra

fottíkiyo re nizor-nizor ham mozin bodola diiyum. **24** Montor Tuatíra cóor or baki manúc tuáñra zetará híbar taalime no solo, zetará ttu Cóitan or mur taalim or zana náí, Añí tuáñra re hoóir, Añí tuáñrar uore oinno honó fuñzá no diiyum. **25** Montor tuáñra ttu zín asé, híin Añí nú aiyí foiijonto mozbut gori dóri rakó. **26** Zee niki ziti aiyé aar Añr ham ókkol ahéri foiijonto goré, Añí ítare koum ókkol or uore adíkar diiyum; **27** aar íte luwár lorí lói ítarar uore hókumot goríbo, aar kuáñijjar meitþa fatila ókkol or dóilla ílara re ańsár mári gurigara gorífelaibo, zendilla goríbar adíkar Añí yó Añr Baf or torfóttu faiyí; **28** Añí ítare bínnar sút-tara yó diiyum. **29** Zar ttu fúnibar han asé íte fúno, Pak-Ruh ye zomát ókkol ore kii hoór deh.

3 “Sárdis cóor or zomát or fíristar hañse endilla lek: Zibá ttu Allar háñt twa ruh edde háñt twa tara uúin asé, íba ye íin hoór: Añí tor ham ókkol zani, tui zinda asós bóuli nam asé montor tui toh mora. **2** Úñciyar ták, aar badbaki zín asé aar moron-moron óiye híin ore mozbut gor, kiyólla-hoilé Añí tor ham ókkol ore Añr Allar muúntu ofura loot faiyí. **3** Hétolla tui ze taalim faiyós edde fúinnos híin ore monot gor; híin ore mozbut gori dór aar touwá gorífela. Montor zodi tui úñciyar no ós, Añí sur aiyé fángori aiccúm, aar hon októ Añí tor hére aiccúm híyan tui no zanibí. **4** Montor Sárdis cóor ot máze tor hoozzon endilla manúc asé zetará nizor hoor ore hońsara nó goré. Ílara dóla fucák fińdí Añr fúañti solafíra goríbo, kiyólla-hoilé ílara híyan or laayek. **5** Zee niki ziti aiyé ítare yó héndilla góri dóla fucák findá zaybo; aar Añí ítar nam ore zindigir-kitab ottu no búzaiyum, bólke Añr Baf or muúntu edde íbar fírista ókkol or muúntu ítar hé nam cíkar goijjúm. **6** Zar ttu fúnibar han asé íte fúno, Pak-Ruh ye zomát ókkol ore kii hoór deh. **7** “Filadílfiya cóor or zomát or fíristar hañse endilla lek: Zibá pak edde sóiyi, zibá ttu Dawud or sabí asé, zibá ye kúliile honókiye bon gorí no fare, aar bon goillé honókiye kúli no fare, íba ye íin hoór: **8** Añí tor ham ókkol zani. Saá, Añí tor muúntu ekkán kúla doroza raikkí ziyán ore honókiye bon gorí no fare. Añí zani tor ttu bicí hom taakot asé, toóu tui Añr hotá amól goijjós edde Añr nam ore inkar nó gorós. **9** Saá, Cóitan or dol or manúc zetará nizoré nize Yohúdi hoóí dabi goré, háleke ílara Yohúdi no bólke misákur ókkol, Añí ílara re tor hére aábai tor foot sóida fora baiyum, aar ílara re zanaidiyum de, Añí toré muhábbot gorí. **10** Kiyólla-hoilé tui zettót

Añr sobór or hókum amól goijjós, Añí yó toré mosibot or októót héfazot raikkúm, ze októ duniyair báciainda ókkol ore entán gorí bolla fura duniyait aibár asé. **11** Añí hára aiyír; tor ttu ziín asé híin ore mozbut gori dóri rak, zeéne tor tas honókiye looi no fele. **12** Zee niki ziti aiyé, Añí ítare Añr Allar gór or éggwa tñni banaiyúm, aar íte héntu ar honódin baäre no zaibo. Añí ítar uore lekíyum Añr Allar nam, Añr Allar cóor or nam, yáni noya Jerúsalem waán or nam ziyán Añr Allar héntu asman ottu nise aibár asé; ítar uore Añr noya nam óu lekíyum. **13** Zar ttu fúnibar han asé íte fúno, Pak-Ruh ye zomát ókkol ore kii hoór deh. **14** “Laudíkiya cóor or zomát or fíristar hañse endilla lek: Zibá Aamin, zibá biccácdar edde sóiyi-sóiyi Gobádoya, zibá Allar foidayecir Guijja, íba ye iín hoór, **15** Añí tor ham ókkol zani, ki hoilé, tui no tñnda aar no gorom. Tui noóile tñnda óiti arnoóile gorom óiti gom óito. **16** Tui zettót mazéhale, yáni no gorom aar no tñnda, Añí toré Añr gal ottu ooli diyum. **17** Tui hoós de, “Añí tuangor, aar dóni óigiyigoi, añí honó kessúr muútac no.” Montor tui no zanos de ki, tui bodnosíf ola, dukkíta, gorif, añdá edde biyossor. **18** Hétolla, Añí toré mocuwara dir, tui Añr ttu ooin ot zálai goijjá háti cúna kin, zeéne tui tuangor ói faros; fiñdí bolla dóla fucák kin, zeéne tor biyossor córom ore gúri rakí faros; suk ot lagai bolla cúрма kin, zeéne tui deki faros. **19** Añí zetará re muhábbot gorí, ítarar golti dahái dí torbiyot gorí. Hétolla jusola ó edde touwá gor. **20** Saá, Añí dorozat tíyai dorozá baijjair, zodi honókiye Añr abas fúni dorozá kúlíde, Añí bútoire ítar hére aiccúm edde ítar fúañti hána háiyum, aar íte Añr fúañti hána háibo. **21** Zee niki ziti aiyé, ítare Añí Añr fúañti Añr toktót boibár hók diiyum, zendilla Añí yó ziti aái Añr Baf or fúañti íbar toktót boicci. **22** “Zar ttu fúnibar han asé íte fúno, Pak-Ruh ye zomát ókkol ore kii hoór deh.”

4 Híin baade añí saái deikkí de, asman ot ekkán dorozá kúla; aar age añí cíañr abas or dóilla góri añré hoór de zibár abas fúinnílam íba ye hoór de, “Eré uore ai, Añí toré daháiyum iín baade kii óibar zorur.” **2** Éhon or bútoire añí Pak-Ruhr kobzat óigiyigoi, aar deikkí de, asman ot ekkán toktó asé, aar hé toktór uore honnwgággwa boirá. **3** Zibá hére boirá asé íbar súrot jaspar johár edde sardiya johár or dóilla sosoikka; hére toktó gán or sairókul ttu ekkán dónu asé, ziyán emerald johár or dóilla sosoikka. **4** Hé toktór sairókul

ttu ekkuri sair gán toktó asé. Añí deikkí de, hé toktó gún or uore dóla fucák findá ekkuri sair zon murubbi-neta boirá asé, aar ítarar matát cúnar tas asé. **5** Toktó gán ottu bijilir córok, door lage de abas, edde tñal foribár mat ókkol aiccé. Aar hé toktór muúntu ooin or háñt tan serak zolat asé, ziín óilde Allar háñt ruh. **6** Aró, toktó gán or muúntu aainar doijjar dóilla kessú asé, ziyán fōrik or dóilla sáf. Toktó gán or mazéhale edde sairókul ttu sair gwá zandár asé, híin or muúm edde fis suké bóraiya. **7** Foóila zandár gwá cinggor dóilla, dusára zandár gwá gorur-sóor dóilla, tisára zandár gwá ttu insán or dóilla siyára asé, aar sair nombór or zandár gwá ure de sil or dóilla. **8** Hé sairó wa zandár fottí ekgwá ttu sów wan or dóre fak asé, aar híin or sairókul ttu edde bútoire suké bóraiya; ítara dine raite no zirai howát táke de, **9** Zeñtté-zeñtté hé zandár gúne zibá toktór uore boirá asé, zibá abadulabad hámica zinda asé, íbar mohíma, izzot edde cúkur goré, (aíñ g165) **10** héñtte ekkuri sair zon murubbi-neta gúne zibá toktór uore boirá asé íbar muúntu sóida fore, aar héndilla góri ítara zibá abadulabad hámica zinda asé íbar ebaadot goré; ítara nizor tas ókkol toktó gán or muúntu rakí hoó de, (aíñ g165) **11** “Ó añárar Malik añárar Alla, Tuñí mohíma, izzot edde kudurut or laayek, kiyólla-hoilé hárr kessú toh Tuñí foida goijjó deh, aar híin Tuáñr moncáye beh tiki asé edde foida óoil.”

5 Zibá toktó gán or uore boirá asé íbar den át ot añí éggwa kitab deikkí, zibár bútoire-baäre kessú leikká asé, zibá háñt twa moór lói moór lagaiya. **2** Baade añí éggwa taakotwala fírista deikkí zibá ye doóñr abase elan gorér de, “Hé moór gún kúlifelai kitab pwá kúlibar laayek honókiye asó né?” **3** Montor asman ot yáh zobin ot yáh fatalfur ot endilla honókiyo re faa nó zah, zee niki kitab pwá kúlibar yáh yíbar bútoire saibár kaabel. **4** Hétunot añí bicí hañdat doijji, kiyólla-hoilé hé kitab pwá kúlibar yáh yíbar bútoire saibár laayek honókiyo re faa nó zah. **5** Montor murubbi-neta gún ottu ekzone añré hoór de, “No hañdiyó; soó, Yohúdahr háandan or ze Cinggo asé, zibá Dawud or Cínyor, íba zitigiyói; íba kitab pwá kúlibar edde yíbar háñt twa moór gún báñgifelaibár kaabel.” **6** Baade añí deikkí de, toktó gán or sairó wa zandár or edde murubbi-neta gún or mazéhale eggwá Bérásóol-or-Sóo tíyaiya, zibá re saité zooráifela gíyeh fán. íba ttu háñt tan cing edde háñt twa suk asé; suk híin

óilde Allar háñt twa ruh uúin zín ore fura duniyait difeřá gíyeh. **7** Íba aái yore, zibá toktór uore boiřá asé Íbar den át ottu kitab pwá loiyé. **8** Íba ye kitab pwá looi baade, sairó wa zandáre edde ekkuri sair zon murubbi-neta gúne hé Bérásóol-or-Sóor war muúntu sóida foijjé; ítara fottíkiyor át ot ekgwá-ekgwá bina edde agórbatti lói bóraiya cúnar fiyala asé, zín óilde Allar pak bonda ókkol or dua. **9** Ítara eggwá noya seér gaiyé, hondilla hoilé, “Tuñí kitab pwá loibar edde yíbar moór gún kúlifelaibar laayek; kiyólla-hoilé Tuáñre toh zooráifela gíyl, aar Tuñí Nizor lou loi hárr háandan ottu, hárr zuban ottu, hárr koum ottu edde hárr dec ottu Alla lla manúc ókkol kinnó. **10** Tuñí ítara re lói ekkán raijjo banaiyó, aar añárar Allar ham olla ítara re imam banaiyó; ítara duniyait hókumot goríbo.” **11** Tarfore añi abar saiýi rár, hé toktó gán ore, zandár gún ore edde murubbi-neta gún ore gíridoiija boóut fírista ókkol or abas fúinni, zín or gona lak-lak, edde kuři-kuři; **12** híine eggwá ðoóñr abase howát asé de, “Ze Bérásóol-or-Sóo wa re zooráifela gíyl, Íba kémota, dón-doulot, giyan, taakot, izzot, mohíma, edde taarif or laayek.” **13** Tarfore añi fúinni de, asman ot, zobin ot, fatalfur ot, edde doriyat zedún mohóluk ókkol asé, yáni híin or bútoře zín asé híin beggúne eén hoór, “Zibá hé toktór uore boiřá asé Íbar edde Bérásóol-or-Sóo war taarif, izzot, mohíma edde raastri abadulabad hámica zari tákouk.” (aíñ g165) **14** Tói sairó wa zandáre “aamin” hoiyé, aar murubbi-neta gúne uúĩntoi fori sóida goijjé.

6 Baade añi deikkí de, Bérásóol-or-Sóo wa ye háñt twa moór ottu ekgwá moór kúille, hétunot sairó zandár ottu ekgwá ye řáral or mat or dóilla góri eén hoór de fúinni, “Ai.” **2** Añi saái deikkí de, eggwá dóla gúra, yíbar uore zibá boiřá asé Íba ttu éggwa tir-hánda asé; Íba re éggwa tas diiya giyéh, aar Íba fóta gorí-gorí aró fóta goittó rowana loiyé. **3** Bérásóol-or-Sóo wa ye zeñtté dusára moór gwá kúille, hétunot dusára zandár gwá ye eén hoór de fúinni, “Ai.” **4** Ebarot ar eggwá gúra neeillé, zibá ooin or dóilla lal. Yíbar uore zee boiřá asé ítare duniyai ttu cánti loifélaibar kémota diiya giyéh, zeéne manúc ókkole ezzon ore ezzone mariféla. Ítare ekkán ðoóñr toluwar óu diiya giyéh. **5** Bérásóol-or-Sóo wa ye zeñtté tisára moór gwá kúille, hétunot tisára zandár gwá ye eén hoór de fúinni, “Ai.” Tói añi saái deikkí de, eggwá hala gúra, yíbar uore zibá boiřá asé Íbar át ot ekkán falda asé. **6** Baade

añi sairó zandár or mazór ttu endilla mikká éggwa abas fúinni, “Ek cér giyuñr dam ek dinár, aar tin cér barlír dam ek dinár; montor tel lun edde anggur or roc cún lussán no goijjó.” **7** Bérásóol-or-Sóo wa ye zeñtté sair nombór or moór gwá kúille, hétunot sair nombór or zandár gwá ye eén hoór de fúinni, “Ai.” **8**

Tói añi saái deikkí de, eggwá dúucca roingga gúra, yíbar uore zibá boiřá asé Íbar nam óilde Moot; fatalfur Íbar kure-kure zaat accíl. Ítara re duniyair sair bák or ek bák or uore adíkar diiya giyéh, manúc ókkol ore toluwar, řař, afot edde duniyair jonggoli januwar ókkol lói zane mariféla bolla. (Hadēs g86) **9** Bérásóol-or-Sóo wa ye zeñtté fañs nombór or moór gwá kúille, hétunot añi kurbaní-gáñr nise uitarár ruh deikkí zetará re Allar kalam or zoriya edde ze gobá ítara zari raikkíl híyan or zoriya mariféla gíyl; **10** ítara ðoóñr abase guzori hoór de, “Ó pak edde sóiyi Mabud, Tuñí hotódin foijjonto duniyair bácinda ókkol ottu bisar gorí añárar lou wór bodola no loiba?” **11** Hétunot ítara fottíkiyo re ekgwá-ekgwá dóla zubba diiya giyéh; aar ítara re howá giyéh de, aró hotókkal dommari bolla, zetún foijjonto ítarar sáañti gulam edde imandár báiboínáin zedún ore ítarar dóilla marifélaibar asé, ítara re mariféla nó zah. **12** Añi deikkí de, Bérásóol-or-Sóo wa ye zeñtté sów nombór or moór gwá kúille, hétunot eggwá ðoóñr búsal óiye, aar beil lan keñc loi banaiya sálarcoř or dóilla hala óigiyoi, aar guñřa san lou wór dóilla óigiyoi; **13** asman or tara ókkol zobin ot forigiyói, zendilla tez boiyar bailé ðuñir-gas ottu keeńsa ðuñir gula ókkol zórizagoi. **14** Asman bák ói boiřa habos or dóilla góri bořigiyói; aar hárr faár edde řiya nizor-nizor zaga ttu lorigiyói. **15** Aar duniyair baáńcca, ðoóñr manúc, zonnal, dóni, boluwar, hárr gulam edde begulam ókkol faár or gańte-gańte edde cíl ókkol or argwale-argwale luki táikke; **16** aar ítara faár gún ore edde cíl lun ore hoór de, “Añárar uore foro, zibá toktór uore boiřá asé Íbar nozor ottu edde Bérásóol-or-Sóo war gozzob ottu añára re lukaifélo, **17** kiyólla-hoilé Ítarar gozzob nazil goríbar ðoóñr ðin aáigiyoi, yala ar řiki táki faribár hon asé?”

7 Yárbaade añi deikkí de, duniyair sair kunat sair gwá fírista tıyaiya, zıíne sairó kunar boiyar ore támai raikké, zeéne zobin ot, doiijat yáh honó gas ot boiyar no baá. **2** Hétunot añi ar eggwá fírista deikkí, zibá fuk mikká ttu uormikká urı aiyér, zibár hańse zinda Allar moór maroni asé. Ze sair gwá fírista re

zobin edde doijja re hótí goríbar kémota diiya giyéh, híin ore íba ye ðoóñr abase guzori-guzori **3** hoór de, “Zobin, doijja yáh gasgusála ókkol ore otókkal hótí no goijjó, zetókkal añára añárar Allar gulam ókkol ore ítarar kuwal ot moór nó mari.” **4** Baade añí fúinni de, zetará re moór mara giyéh ítara muṭmaṭ ek lak salic sair ázar zon, zetará óilde Boni Isráil or fottí háandan ottu: **5** Yohúdahr háandan ottu moór mara giyéh de baró ázar ore, héndilla Ruben or háandan ottu baró ázar ore, Gad or háandan ottu baró ázar ore. **6** Acer or háandan ottu baró ázar ore, Naṭṭalir háandan ottu baró ázar ore, Manasér háandan ottu baró ázar ore. **7** Símiyon or háandan ottu baró ázar ore, Leévir háandan ottu baró ázar ore, Yissákar or háandan ottu baró ázar ore. **8** Zebulun or háandan ottu baró ázar ore, Yúsuf or háandan ottu baró ázar ore, Binyamin or háandan ottu baró ázar ore, moór mara giyéh. **9** Híin baade añí saái deikkí de, ðoóñr ek dol manúc, zibá re honókiye goni kul gorí no fare; yíbat hárr dec or, hárr háandan or, hárr koum or edde hárr zuban or manúc asé, zetará dóla zubba findí edde át ot házu ḍaggwa ókkol looi toktó gán or muúntu edde Bérásóol-or-Sóo war muúntu tíyai táikke; **10** aar ítara ðoóñr abase guzori-guzori hoór de, “Nejat asé de óilde toktór uore boirá asé de añárar hé Allar hañse edde Bérásóol-or-Sóo war hañse.” **11** Tamám fírista ókkol toktó gán ore, murubbi-neta gún ore, edde sairó zandár ore gíri tíyai asé; aar híine toktó gán or muúntu uúñtoí fori Alla re sóida goijjé, **12** endilla hoói, “Aamin. Taarif, mohíma, giyan, cúkurana, izzot, kémota edde taakot abadulabad hámica añárar Allar ówat tákouk. Aamin.” (aíon g165) **13** Baade murubbi-neta gún ottu ekzone añré hoór de, “Dóla zubba findá manúc ífn hontará? Ítará hontú aiccé dé?” **14** Añí yóggwa re hoiyí de, “Jonab, híyan toh tuñí éna zano.” Hétunot yóggwa ye añré hoiyé de, “Ítará óilde uitará zetará ðoóñr mosibot ottu neeliaiccé; ítará nizor zubba re Bérásóol-or-Sóo war lou loi dúifelai dóla goijjé. **15** Hétolla toh ítará Allar toktór muúntu asé; ítará dine raite íbar ebaadot-hánat íbar hédmot goré. Zibá toktó gán or uore boirá asé, íba ye ítará re Nizor háziri lói sáhara díbo. **16** Tói ítará ttu ar búk no lagibó, ar tírac no lagibó; ítarár gaat no beil or tez foribó, aar no ítará re honó gorome faibo, **17** kiyólla-hoilé toktó gán or mazéhale asé de Bérásóol-or-Sóo wa ítarár soroya óibo, aar ítará re zindigi dee de fanír zónnar híkka loizaybó. Aar Alla ye ítarár suk ottu hárr suk or faní fuñsídibo.”

8 Bérásóol-or-Sóo wa ye zeñtté háñt nombór or moór gwá kúille, hétunot asman ot tokoriban adá gónḍa ánik nizám accíl. **2** Aar añí ze háñt twa fírista Allar muúntu tíyai táke híin deikkí; híin ore háñt twa cíañ diiya giyéh. **3** Yárbaade ar eggwá fírista aái kurbani-gáñr hañse tíyaiye, zibá ttu cúnar agórbattir-dani asé; íba re bicí agórbatti ókkol diiya giyéh, zeéne íba ye Allar tamám pak bonda ókkol or duar fúañti híin ore toktó gán or muúntu asé de cúnar kurbani-gáñr uore peec gorí fare. **4** Aar hé agórbattir dúañ gún fírista war át ottu Allar pak bonda ókkol or duar fúañti Allar muúntu foónicce. **5** Tarfore fírista wa ye agórbattir-dani gán looi yore kurbani-gáñr ooin loi furaiyé, baade zobin ot félaidiye; tói hére ṭaral or mat edde ḍoor lage de abas ókkol fúna giyeh, aar bijilir córok ókkol edde búsal óiye. **6** Ze háñt twa fírista ttu háñt twa cíañ asé, ítara híin matai bolla toiyar óigiyoi. **7** Foóila fírista wa ye cíañ mataiyé rár, lou miyáilla cíl-boróf edde ooin ókkol foida óiye, aar híin ore duniyait félaidiya giyeh; tói duniyai yó tin bák or ek bák zoligiyói, gasgusála ókkol óu tin bák or ek bák zoligiyói, aar áil kérkuṇṇa ókkol óu beggún zoligiyói. **8** Dusára fírista wa ye cíañ mataiyé rár, ooin zoler de eggwá ðoóñr faár or dóilla kessú re doijjat félaidiya giyeh; tói doijja tin bák or ek bák lou bonigiyói, **9** doijjar tin bák or ek bák zandár morigiyói, aar tin bák or ek bák zaáñs nac óigiyoi. **10** Tisára fírista wa ye cíañ mataiyé rár, uzal or dóilla zolat accíl de eggwá ðoóñr tara asman ottu zóri tin bák or ek bák hál ókkol ot edde fanír zónna ókkol ot forigiyói. **11** Hé tara war nam óilde, “Zohór Tita.” Yíba fori tin bák or ek bák faní zohór tita óigiyoi, aar hé fanír titaye boóut manúc morigiyói. **12** Sair nombór or fírista wa ye cíañ mataiyé rár, beil or tin bák or ek báke, san or tin bák or ek báke, tara ókkol or tin bák or ek báke eén zohóm faiyé, zeén níki híin or tin bák or ek bák andár óigiyoi. Din or tin bák or ek bák foór sára accíl, héndilla rait or tin bák or ek bák óu. **13** Saité-saité, añí éggwa sile uore asman ot uri-uri ðoóñr-ðoóñr guzori eén hoór de fúinni, “Ze tin nwá fíristar cíañ matibár baki táigiyoi híin olla duniyair bácinde ókkol or uore afsús, afsús, afsús.”

9 Fañs nombór or fírista wa ye cíañ mataiyé rár, añí asman ottu duniyait forigiyói de eggwá tara deikkí; oṭái gañt or sabí wa hé tara wa re diiya giyéh. (Abyssos g12) **2** Íba ye zeñtté oṭái gañt twa kúille, tói hé gañt ottu uore dúañ ókkol eén aiccé, zeén bor

fooin ottu dúañ ókkol aiyé; aar hé gañt or dúañye beil edde asman andár ógiyoi. (Abyssos g12) 3 Hé dúañ ttu firing ókkol neeli duniyait aiccé, aar híin ore eén taakot diiya giyéh ze taakot duniyair bissú ókkol ottu asé. 4 Híin ore howá giyeh de, zobin or kérkuñra, honó sara yáh honó gas ore lussán no gorí bolla, bólke siríf manúc uitará re gorí bolla zetarár kuwal ot Allar moór náí. 5 Honókiyo re marifélai bolla híin ore ezin diya nó zah, siríf fañs mac fán toziya di bolla beh diya giyéh; híin or toziya endilla zendilla bissú ye cúm gólai dilé maincé duk faa. 6 Hé din ókkol ot maincé moot or talac goríbo montor no faibo; ítara ttu moitto bicí monehoibó montor moot ítara ttu dáizayboi. 7 Firing híin or súrot endilla gúrar dóilla zín ore larái lla toiyar goijjá; híin or matát cúnar tas or dóilla kessú findá asé, aar híin or siyára insán or siyárar dóilla. 8 Híin ottu mayafuain dor dóilla sul asé, aar híin or dat tun cinggor dat or dóilla. 9 Híin ottu luwár zamar dóilla zama ókkol asé, aar híin or fak or abas ókkol laráit duñri zaa de bicí gúra ókkol or gúra-garír abas or dóilla. 10 Híin ottu bissúr dóilla les edde cúm asé, aar manúc ókkol ore fañs mac fán duk dibar taakot híin or les ot asé. 11 Híin or baáñcca óilde otái gañt or fírista wa, zibár nam Hibrí zuban ot Abaddon, aar Girík zuban ot Apolion. (Abyssos g12) 12 Foóila afsús or hálót toh ógiyoi; montor soó, híin baade aró duiyán afsús or hálót aibár asé. 13 Tarfore sów nombór or fírista wa ye cíañ mataiyé rár, ańí Allar muúntu asé de cúnar kurbani-gańr sairó cing ottu ekgwá abas fúinni. 14 Abas swá ye cíañ ola sów nombór or fírista wa re hoór de, “Sairó fírista uúin ore hálás goríde, zín bor hál Efurat ot bon asé.” 15 Tói hé sairó fírista zín ore e októ, e din, e mac edde e bosór olla toiyar gorí raká gýl, híin ore hálás gorídiya giyeh, zeéne híine tin bák or ek bák insán mariféle. 16 Gúra-soloinna fóous ókkol or gona óilde kuri kuñ; ańí híin or gona hodún de fúinni. 17 Ańr dorcón ot máze ańí gúra gún ore edde híin or uore soróinna ókkol ore endilla deikkí: soróinna gún or zama ooin or dóilla lal, nía edde barus bana de gónḁok or dóilla óloidda. Gúra gún or matá gún cinggor matár dóilla, aar híin or gal ottu ooin, dúañ edde gónḁok neeliaiccé. 18 Híin or gal ottu ze ooin, dúañ, edde gónḁok neeliaiccé, hé tiní afote tin bák or ek bák insán morigiyói. 19 Kiyólla-hoilé gúra gún or taakot óilde híin or gal ot edde les ot; kiyólla-hoilé híin or les sún matá ola háf or dóilla, zín lói híine hótí ókkol goré. 20 Badbaki manúc zetará re

hé afote mariféla nó zah, ítara nizor át or banaiya jiníc ottu touwá gorí nó fele; ítara bít ókkol ore, edde cúnar, rufar, fitol or, fattór or, edde gas or banaiya mutti ókkol ore fuñza bon nó goré—mutti ziíne no deki fare, no fúni fare, aar no áńri fare. 21 Héndilla, ítara kotólakotóli ttu, jadugari ttu, zenákari ttu, edde suri gorá ttu yó touwá gorí nó fele.

10 Tarfore ańí deikkí de, ar eggwá taakotwala fírista asman ottu lami aiyér, íba miyúla findá. Íbar matár uore dónu asé; íbar siyára beil or dóilla, aar íbar téng gún ooini túnir dóil. 2 Íbar át ot eggwá gura kitab asé zibá kúilla. Íba ye íbar den téng gán doriyat raikké, aar ban téng gán zobin ot raikké; 3 baade íba ye endilla eggwá doóñr guzoran maijjé zendilla cinggo ye mare. Íba ye guzoran maijjé rár, háńt twa țáral or mat fúna giyeh. 4 Zeńtté háńt twa țáral or mat fúna giyeh, ańí lekí bolla toiyar óiyi, montor asman ottu eggwá abas fúinni, eén hoór de, “Háńto wa țárale zín hoiyé híin ore gufon rak, híin ore no lekíc.” 5 Ze fírista re ańí doijjat edde zobin or uore tíyaiya deikkí, íba ye nizor den át tan asman or uzu tuillé, 6 aar zibá abadulabad hámica zinda asé, zibá ye asman edde hére bútoze zín asé híin ore, zobin edde hére bútoze zín asé híin ore, doijja edde hére bútoze zín asé híin ore foida goijjé, íbar hosóm hái hoór de, “Yala ar deri no óibo, (aiñ g165) 7 montor háńt nombór or fírista wa ye cíañ mataibó de din ókkol ot máze, Allar gufon niyot furafuri fura óizayboi, zendilla íba ye Nizor gulam nobi ókkol ore zanaáil.” 8 Tarfore, asman ottu ańí zibár abas fúinnilam, íba ye abar ańré hoór de, “Zoo, zai oh kitab pwá loogói, zibá doijjat edde zobin or uore tíyaiya fírista war át ot kúilla asé.” 9 Hétunot ańí fírista war hańse zai gura kitab pwá ańré dii bolla hoiyí. Íba ye ańré hoór de, “Yibá looi háifelo; yibá ye tuáńr feť ore tita gorífelaibo, montor tuáńr gal ot yibá re modúr dóilla mirá lagibó.” 10 Tói ańí gura kitab pwá fíristar át ottu looi háifelaiyi; aar yíba re ańr gal ot modúr dóilla mirá laiggé, montor gillí rár, ańr feť tita ógiyoi. 11 Tarfore ańré howá giyeh de, “Tuáńr ttu abar boóut koum, decóitta, zuban ola edde baáñcca ókkol or baabute kalam boiyan gorá foribó.”

11 Baade ańré súańr dóilla eggwá mafonir loří diiya giyéh, aar howá giyeh de, “Zoo, Allar baitul-mukaddos ore edde kurbani-gań gán ore mafogói, aar hére ebaadot goré de ítara re gonogói. 2 Baitul-mukaddos or baáre ze urán asé híyan ore bad diyo;

híyan ore no mafiyo, kiyólla-hoilé híyan oinno koun
ókkol ore diífela gíyeh. Aar ítara pak cóor gán ore
salic-dui mac fán úñribo. **3** Añí añr dui zon gobá re eén
kémota diiyum, ítara sálarcoť fiñdí yore baró cóo háit
din fán nobi ísafe Allar kalam boiyan goríbo.” **4** Ítara
óilde oh duwá zaitun-gas edde oh duiyán serak-or-
boiróni, ziín duniyair Malik or muúntu tíyaiya asé. **5**
Honókiye ítara re hótí goríbar kucíc goillé, ítarar muk
ottu ooin neeli aái ítarar hé ducon ókkol ore hálak
gorífele. Zee niki ítara re hótí goríbar kucíc goré, ítar
ttu héndilla góri mora fore. **6** Ítara ttu asman bon
gorífelaibar kémota asé, zeéne ítara nobi ísafe Allar
kalam boiyan goríbar din ókkol ot zór no déh; ítara
ttu faní re lou banai felaibar, edde zobin ore zetóbar
monehoó hétobar hárr dóilla afot di hótí goríbar
óu kémota asé. **7** Zeñtté ítara ttu gobá díya fúraibo,
héñtte oťái gañt ottu neeliaibó de háyowane ítara llói
larái goríbo, aar ítara re hárai marifélaibo. **(Abyssos**
g12) **8** Ítarar lac dōóñr cóor gán or rastat fori tákibo,
ziyán or kítabi nam óilde Sódóm edde Ijíp, zeré ítarar
Malik ore yó kúruc ot dí mariféla gíyl. **9** Hárr koun or,
háandan or, zuban or edde dec or manúc ókkole cáro
tin din fán ítarar lac saái tákibo, aar ítarar lac hobor
ot dito no dibo. **10** Duniyair bácinda ókkole ítarar
moot or uore kúci goríbo, mela-cóba goríbo, ezzon or
hañse ezzone hádiya ókkol foónsaibo, kiyólla-hoilé
hé duní nobi ye duniyair bácinda ítara re zalaail. **11**
Montor cáro tin din baade, ítarar bútoe Allar torfóttu
zan or niyác góille, aar ítara nizor ténge tíyaiye. Zará
ítara re saái táikke tará bicí dōoraigiyói. **12** Baade
ítara duní zone asman ottu eggwá dōóñr abas fúinne,
ítara re eén hoór de, “Eré uore aiyó.” Hétunot ítara
miyúlar bútoe góri uore asman ot urfigiyoi, héñtte
ítarar ducon ókkole ítara re saái accíl. **13** Hé októť
hére eggwá dōóñr búsal óiye, aar hé cóor gán doc
bák or ek bák forigiyói. Hé búsale háñt ázar manúc
morigiyói, aar badbaki gúne dōorai asman or Allar
mohíma gorát doiije. **14** Dusára afsús or hálót toh
óigiyoi; montor soó, yala tisára afsús or hálót hára
aiyér. **15** Baade zeñtté háñt nombór or fírsta wa ye
ciañ mataiyé, asman ot dōóñr-dōóñr abas ókkol accé,
eén hoór de, “Yala toh duniyair raijjo añárar Mabud
or edde Íbar Mosihr raijjo óigiyoi; Íba ye abadulabad
hámica hókumot goríbo.” **(aiōn g165)** **16** Hétunot ekkuri
sair zon murubbi-neta zetará Allar muúntu nizor-
nizor toktór uore boirá asé, ítara uúñtoit fori Alla re
sóida goijjé, **17** eén hoói, “Ó Malik, hárr Kudurutwala

Kúda, zibá asó edde zibá accíla, añára Tuáñre cúkuriya
gorír, kiyólla-hoilé Tuñí Tuáñr dōóñr taakot át ot looi
hókumot gorá cúru goijjó. **18** Koum ókkol guccá óiye,
aar Tuáñr gozzob nazil óiye. Októ accé mora ókkol or
bisar goríbar, aar Tuáñr gulam nobi ókkol ore edde
Tuáñr pak bonda dōóñr-cōñro zetará Tuáñr nam ore
dōora, ítara re boccíc diibar, aar zetará duniyai re
dónco goré ítara re dónco goríbar.” **19** Baade Allar
ebaadot-hána ziyán asman ot asé híyan kúlagiye,
aar Íbar razinamar sónduk Íbar ebaadot-hánat dahá
gíyeh. Hétunot bijilir córok, dōor lage de abas, edde
ťaral or mat foida óiye, aar búsal óiye edde dōóñr-
dōóñr cíl-boróf forar tuwán óiye.

12 Baade asman ot ekkán dōóñr nicán dahá gíyeh:
eggwá mayafua beil findá, híbar tēng or tole san
asé, aar matár uore baró wa tara ola eggwá tas asé. **2**
Híba hámil, aar fua zormo dibar októť dukké guzorat
accíl. **3** Tarfore asman ot arekkán nicán dahá gíyeh:
eggwá dōóñr lal nagá, yíba ttu háñt twa matá edde
doc cán cing asé, aar yíbar matá gún ot háñt twa tas
asé. **4** Yíbar lese asman or tin bák or ek bák tara țani
aní yore duniyait félaidiye. Hé nagá wa ze mayafua
wa fua zormo doom-doom óiye híbar muúntu tíyai
táikke, zeéne híba ye zormo dilé mottor híbar Fua wa
re háifelai fare. **5** Mayafua wa ye eggwá morot Fua
zormo diyé, zibá ye luwár lorí lói tamám koun ókkol
or uore hókumot goríbo. Híbar hé Fua wa re súlan
mari Allar edde Íbar toktór hañse aná gíyeh. **6** Tarfore
mayafua wa moidan zagat dáigiyegoi, zeré Alla ye
híba lla ekkán zaga toiyar gorí raikké, zeéne hére híba
re baró cóo háit din fán fala zah. **7** Baade asman ot
larái óiye: Maikele edde yóggwar fírsta ókkole nagá
llói larái goijjé; aar nagá edde yíbar fírsta ókkole
yó híin lói larái goijjé, **8** montor híine nó zite, aar
híin ore asman ot ar zaga diiya nó zah. **9** Hé dōóñr
nagá re félaidiya gíyeh, yáni furana háf zibá re Íbilíc
edde Cóitan howá zah, zibá ye fura duniyair maincóre
gollot ot loiza yíba re. Yíba re duniyait félaidiya gíyeh,
aar yíbar fúañti yíbar fírsta gún ore yó félaidiya
gíyeh. **10** Tarfore añí asman ot eggwá dōóñr abas
fúinni, eén hoór de, “Yala añárar Allar nejat, taakot,
raiijjo edde Íbar Mosihr adíkar házir óiye, kiyólla-hoilé
añárar imandár báiboináin dor uore elzam-lagoya
zee niki añárar Allar muúntu dine raite ítarar uore
elzam lagaitó, ítare toh nise félaidiya gíyeh. **11** Ítara
Bérasóol-or-Sóor lou wór edde nize dyíl de gobár

hotár zoriya ítare ziti aiccé; ítara moot or muk ot úddwa nizor zan ore ador nó goré. **12** Hétolla, ó asman ókkol edde zetará héře táko, kúci goró. Montor, ó zobin edde doijja, tuáñrar uore afsús, kiyólla-hoilé lbiłíc toh tuáñrar héře lami aiccé. Íte rake furaiya óiye, kiyólla-hoilé íte ítar țaim barı de zane.” **13** Zeñtté nagá wa ye nizoré duniyait félaidiya giyéh de deikké, hétunot yıba ze mayafua wa ye morot Fua zormo diyé híbar fisá doijje. **14** Montor hé mayafua wa re ɖoóñr sil or duiyán fak diiya giyéh, zeéne híba ye moidan zagat nizor zaga waán ot uri zai fare, ziyán ot híba re cáro tin bosór foijjonto hé háf or muúntu no fore fángori fala zaybo. **15** Baade hé háf fwa ye nizor gal ottu fanı neelai mayafua war fisé hál or ɖóilla gorıdiye, zeéne hé fanıbane híba re bácai loizagói. **16** Montor zobine mayafua wa re modot goijjé; zobine nizor gal kúli hál lan or fanı gún háifelaiye, ziın nagá ye nizor gal ottu neeláil. **17** Hétolla hé nagá wa mayafua wa lloi bicı rak óiye, aar híbar badbaki nosól uitará lloi larái goittó giyyói zetará Allar hókum ókkol amól goré edde Isár diya gobá re dóri táikke.

13 Hé nagá wa doijjar balur sor ot tíyai táikke.

Tarfore añı deikkı de, doijja ttu eggwá háyowan neelaiyér; yıba ttu doc cán cıng edde háñt twa matá asé; yıbar cıng gún or uore doc cwa tas asé, aar yıbar matá gún or uore kuférir nam leikká asé. **2** Añı ze háyowan nwá deikkı yıba lamba-bag or ɖóilla, montor yıbar țéng gún bálluk or țéng or ɖóilla, aar gal lan cınggor gal or ɖóilla. Nagá wa ye hé háyowan ore nizor taakot, nizor toktó edde ɖoóñr kémota diifélaiye. **3** Háyowan or matá gún ottu eggwá re saité mooti zohóm asé fán, montor hé mooti zohóm gom ógiyoi. Hétolla duniyair tamám manúc ókkol taajup ói hé háyowan or fisá doijje; **4** nagá wa ye hé háyowan ore nizor kémota diifélaiye de hétolla ítara nagá wa re sóida goijjé. Ítara háyowan ore yó sóida goijjé, endilla hoói, “Háyowan or ɖóilla hon asé? Yıba llói hone larái dí faribó?” **5** Hé háyowan ore ɖoóñr-ɖoóñr gal mari bolla edde kuféri gorıbar muk diiya giyéh; yıba ye salic dui mac fán ham solaıbár kémota faiyé. **6** Tói yıba ye Allar kuféri gorı bolla nizor muk kúille, yáni íbar nam or, íbar éstan or, edde asman or bácianda ókkol or ulɖa kuféri gorı bolla. **7** Yıba re aró kémota diiya giyéh de, Allar pak bonda ókkol lói larái gorıbar edde ítara re háraıbar. Yıba re hárr háandan, hárr koum, hárr zuban ola, edde hárr decóıttar uore yó

kémota diiya giyéh. **8** Duniyair tamám bácianda ókkole yıba re sóida gorıbo, yáni uitará beggúne zetarár nam duniyair foidayecir héñtte lóti zooráifela giyl de Bérasóol-or-Sóo war zindigir-kitab ot leká nó zah. **9** Zar ttu fúniıbar han asé, íte fúno. **10** Zee niki bondit zaıbar hotá, íte bondit zaıbo. Zaré toluware kotól gorıbar hotá, ítare toluware kotól gorá zaybo. Hıyane dahá de, Allar pak bonda ókkol ottu sobór edde iman rakár zorur. **11** Baade añı deikkı de, ar eggwá háyowan zobin ottu neelaiyér; yıba ttu duiyán cıng asé ziın bérasóol-or-sóor cıng or ɖóilla, montor yıba ye matitó de nagár ɖóilla. **12** Yıba ye foóila háyowan or fura kémota yıbar cáıkkat estemal goittó, aar duniyai re edde híyan or bácianda ókkol ore hé foóila háyowan or sóida gorá baitó, zıbár mooti zohóm gom ógiyoi. **13** Yıba ye ɖoóñr-ɖoóñr keramot ókkol daháito, ebbe hoıtó sailé, maincór cáıkkat asman ottu zobin ot ooin nazil goittó. **14** Yıba ye duniyair bácianda ókkol ore gollot ot loizaitó, keramot uúın or duara ziın foóila háyowan or cáıkkat gorı bolla yıba re kémota diiya giyéh. Yıba ye duniyair bácianda ókkol ore hókum goittó de, ze háyowan nwá toluwar or zohóm fai baade yo ziañta óiye, yıbar mutti banaitó. **15** Yıba re hé háyowan or mutti wa re foran dibar kémota yó diiya giyéh, zeéne hé háyowan or mutti wa ye mati fare aar zetará hé mutti re sóida no goré ítara beggún ore kotól gorıfelai fare. **16** Yıba ye ɖoóñr cónro, tuangor gorıf, begulam gulam, beggún ore den át ot yáh kuwal ot ekkán or dóre nicán kobul goittó bolazuri goijjé, **17** zeéne zar uore nicán asé, yáni háyowan or nam yáh yıbar nam or nombór lagaiya asé, yóggwa ye bade ar honókiye besa kina gorı no fare. **18** Yıán buzıte giyan or zorurot. Zar ttu buddı asé yóggwa ye háyowan or nombór gwá re ísaf goró, kiyólla-hoilé yıba óilde eggwá manúc or nombór; aar íbar hé nombór óilde 666.

14 Baade añı saái deikkı de, Bérasóol-or-Sóo wa

Sıyon Faár or uore tíyai asé, íbar fúañti ek lak salic sair ázar manúc óu asé, zetarár kuwal ot íbar edde íbar Baf or nam leikká asé. **2** Tarfore añı asman ottu endilla eggwá abas fúınni zıbá bicı fanır holholanıre edde ɖoóñr góri mate de țaral or abas or ɖóilla. Añı ze abas swá fúınni yıba fúınte bina-bazoya ókkole bina baár de abas or ɖóilla laıggé. **3** Hé manúc cúne toktó gán or, sairó zandár gún or edde murubbi-neta gún or muúntu eggwá noya seér gaiyé. Hé seér

gwá re honókiye cíki nó fare, siríf hé ek lak salic sair ázar manúc zetará re duniyai ttu kiniféla gíyeh ítara beh faijjé. **4** Ítara óilde uitará zetará mayafuain loi milmilab goijjé de náí, ítara nizoré nafak nó goré bólke pak raikké. Ítara óilde uitará zetará Bérásóol-or-Sóo wa zeré-zeré zaa hére-hére íbar fisé-fisé zaa. Ítara re insán-zatir búttottu foóila fósol or dóilla Alla lla edde Bérásóol-or-Sóo wa lla kiniféla gíyeh. **5** Ítara honódin misá hotá hoiyé de náí; ítara behosúr. **6** Tarfore añí ar eggwá fírista deikkí, zibá uore asman ot urer, zibá ttu duniyair bácinde ókkol or hañse tobolik goríbar ofúrani kúchóbor asé, yáni hárr decóitta, háandan, zuban ola edde koum or hañse. (aiñios g166) **7** Íba ye eggwá dōóñr abase hoór de, “Alla re dōoro, aar íbar mohíma goró, kiyólla-hoilé íba ye bisar goríbar októ aáigiyoi. Íbar ebaadot goró zibá ye asman, zobin, doijja, edde fanír zónna ókkol foida goijjé.” **8** Tarfore fírista foóila wa baade ar eggwá fírista aái hoór de, “Forigiyói, dōóñr cóor Babilon forigiyói, ziyáne nizor zenákarir azzur córab tamám koum ókkol ore háa baiyé.” **9** Hé duní wa baade tisára eggwá fírista aái dōóñr abase hoór de, “Honókiye zodi hé háyowan ore edde yíbar mutti re fuñza goré, aar nizor kuwal ot yáh át ot yíbar nicán kobul goré, **10** íte yó Allar guccár córab háibo, zín ore Íbar gozzob or fiyalat mazé honó miyál sára dálidiya gíyeh. Ítare pak fírista ókkol or muúntu edde Bérásóol-or-Sóo war muúntu ooin edde gónðok lói azab diya zaybo. **11** Aar ítarar hé azab or dúañ uormikká abadulabad hámica urát tákibo. Zetará háyowan nwá re edde yíbar mutti wa re fuñza goré, edde zetará yíbar nam or nicán kobul goré, ítara dine raite honó aram no faibo.” (aiñ g165) **12** Híyane dahá de, Allar pak bonda zetará Allar hókum ókkol amól goré edde Isár uore iman raké, ítara ttu sobór tákar zorur. **13** Yárbaade añí asman ottu endilla hoór de eggwá abas fúinni, “Yián lek: yala lóti zetará Malik or ummot ísafe more ítara mubarek!” Pak-Ruh ye hoór de, “Ói, ítara nizor meénnot ottu aram faibo, kiyólla-hoilé ítarar amól ókkol ítarar fisé-fisé zaibo.” **14** Baade añí saái deikkí de, ekkán dóla miyúla, hé miyúlar uore moniccór dóilla honnwággwa boirá asé. Íbar matát cúnar eggwá tas asé, aar íbar át ot ékkan dár hañsi asé. **15** Tarfore ar eggwá fírista ebaadot-hána ttu neeliaiccé, zibá miyúlar uore boirá asé íba re dōóñr abase dák mari-mari endilla hoói-hoói, “Tuáñr hañsi át ot looi daifélo, kiyólla-hoilé daibar ainda aáigiyoi; duniyai toh fagigiyói.” **16** Tói zibá miyúlar

uore boirá asé íba ye duniyait íbar hañsi solaiyé, aar duniyai daiya óigiyoi. **17** Yárbaade asman ot asé de ebaadot-hána ttu ar eggwá fírista neeliaiccé, aar íba ttu yó ekkán dár hañsi asé. **18** Baade aró éggwa fírista kurbaní-gań ttu neeliaiccé, zibá ttu ooin or uore kémota asé. Íba ye ze fírista wa ttu dár hañsi asé íba re dōóñr abase dák mari hoór de, “Tuáñr dár hañsi estemal gorí duniyair anggur-gas swá ttu sóra gún harí zoma gorífelo, kiyólla-hoilé yíbar anggur fagigiyói.” **19** Tói hé fírista wa ye nizor hañsi gán duniyait solaiyé, aar duniyair anggur-gas swá ttu sóra gún harí zoma gorífelaiye. Baade híin ore anggur or roc neela de dōóñr gañrá félaidiye, zibá óilde Allar gozzob or gañrá. **20** Híin ore cóor or baáre hé gañrá wat únra gíyl, aar hé gañrá ttu edún lou neeillí, zeén níki híin uormikká gúra ókkol or lehan or héddur uitté, aar duré dui cót mail foijjonto giyyé.

15 Tarfore añí asman ot arekkán nicán deikkí ziyán dōóñr edde ammuikka: háñt twa fírista, ítarar át ot háñt tan afot asé zín óilde ahéri gún, kiyólla-hoilé afot híine beh Allar guccá fúra. **2** Yárbaade añí ooin miyáilla aainar doijjar dóilla kessú deikkí; hé aainar doijjar farot Allar diiya bina dóri uitará tíyaiya asé zetará háyowan ore, yíbar mutti re, edde yíbar nam or nombór ore ziti aiccé. **3** Ítara Allar gulam Muúsar seér edde Bérásóol-or-Sóor war seér gaiyé, endilla, “Ó Mabud, hárr Kudurutwala Kúda, Tuáñr ham hotó dōóñr aar taajuippa! Ó koum ókkol or Baáñcca, hotó insáfi aar sóiyi Tuáñr rasta! **4** Ó Mabud, hon asé Tuáñre no dōoraibó dé? Hon asé Tuáñr nam or mohíma no goríbo dé? Kiyólla-hoilé siríf Tuñí beh pak. Tamám koum ókkole aái Tuáñr muúntu sóida foribó, kiyólla-hoilé Tuáñr insáfi ham ókkol toh zahér óiye.” **5** Híin baade añí saái deikké de, asman ot ebaadot-hána gán, yáni Allar Házirir Tambu gán kúlagiye, **6** aar hé ebaadot-hána ttu háñt twa fírista uúin neeliaiccé zín ottu háñt tan afot asé; ítara sáf edde sosoikka hoor findá aar ítarar sínat cúnar fañti beráiya. **7** Sairó zandár gún ottu eggwá ye háñt twa fírista híin ore cúnar háñt twa fiyala diiyé; híin Allar guccá lói furaiya, zibá abadulabad hámica zinda asé. (aiñ g165) **8** Ebaadot-hána gán Allar mohíma ttu edde kudurut ottu aiyér de dúañ lói bórigiyegoi; aar hé ebaadot-hanat otúkkun foijjonto honókiye góli nó fare zetukkún háñto wa fíristar háñt tan afot tun nó fúra.

16 Baade hé ebaadot-hána ttu añí éggwa ñoóñr abas fiúnni, háñto wa fírista re eén hoór de, “Zoo, Allar gozzob or fiyala háñto wa duniyait dálidogoi.” 2 Tói foóila fírista wa zai íbar fiyala wa duniyait dálidiye; baade manúc uitarár gaat bicí hótara edde bic ola ek zat or gáa foida óiye zetarár uore háyowan or nicán asé edde zetará yíbar mutti re sóida goijjé. 3 Dusára fírista wa ye íbar fiyala wa doijjat dálidiye; baade híyan mora manúc or lou zendilla héndilla lou bonigiyói, aar doijjar fottí zandár morigiyói. 4 Tisára fírista wa ye íbar fiyala wa hál ókkol ot edde fanír zónna ókkol ot dálidiye; baade híin lou bonigiyói. 5 Tarfore añí fiúnni de, fanír zimmadar fírista re eén hoór, “Ó Pakzon, zibá asó edde zibá accíla, Tuñí insáfswala, kiyólla-hoilé Tuñí toh íin or insáf goijjó; 6 kiyólla-hoilé manúc ítara toh Allar pak bonda ókkol or edde nobi ókkol or lou bácaiye, hétolla Tuñí ítara re lou háa baiyó; kiyólla-hoilé ítara híyan or laayek.” 7 Baade añí fiúnni de, kurbaní-gáñ ye endilla hoór, “Ói, ó Mabud, hárr Kudurutwala Kúda, Tuáñr bisar sóiyi aar insáfí.” 8 Sair nombór or fírista wa ye íbar fiyala wa beil ot dálidiye, aar híyan ore manúc ókkol ore ooin loi furadi bolla kémota diiya giyéh. 9 Manúc ókkol gorom or teze zoligiyói; aar ítara Allar nam or kuféri gorát doijje, zibá ttu hé afot tun or uore kémota asé. Ítara touwá yó nó goré, aar Allar mohíma yó nó goré. 10 Tarfore fañs nombór or fírista wa ye íbar fiyala wa háyowan or toktó gán or uore dálidiye, baade yíbar raijjo andár óigiyoi; aar manúc ókkole tokolife zir hooñri doijje. 11 Ítara nizer tokolife edde gáa ókkol or zoriya asman or Allar kuféri gorát doijje, aar ítara ítarar ham ottu touwá gorí nó fele. 12 Sów nombór or fírista wa ye íbar fiyala wa bor hál Efurat ot dálidiye; baade híyan or faní gún fúaiyoi, zeéne fuk kul or baáñcca ókkol olla rasta toiyar ó. 13 Tarfore añí deikkí de, beng or ñóilla tin nwá nafak ruh neeliaiyér, ekgwá nagár gal ottu, ar ekgwá háyowan or gal ottu, ar ekgwá misá nobir gal ottu. 14 Híin óilde bútt ókkol or ruh zííne keramot ókkol dahá. Híin neeli fura duniyair baáñcca ókkol or hére giyíe, ítara re hárr Kudurutwala Kúdar ñoóñr ñin or laráí lla zoma gorí bolla. 15 “Soó, Añí sur aiyé fángori aiyír. Mubarek ubá zibá seton táke edde nizer hoor findí táke, zeéne íba ttu biyossor hálote bera no fore aar maincé íbar córom no deké.” 16 Baade híine baáñcca ókkol ore zaga waán ot zoma goijjé ziyán ore Hibré zuban ottu Harmagidon bouli hoó. 17 Tarfore háñt nombór or fírista wa ye íbar

fiyala wa boiyar ot dálidiye, aar ebaadot-hána gán or toktó ttu ekgwá ñoóñr abas neeliaiccé, eén hoór de, “Óigiyoi.” 18 Hétunot bijilir córok óiye, ñoor lage de abas óiye, edde țaral forat doijje; hére endilla ekgwá ñoóñr búsal óiye, zendilla duniyait insán-zati foida óiye lóti honó októtt nó óiyo, yíba héttor ñoóñr búsal edde bicí taakotwala. 19 ñoóñr cóor gán tin bák óigiyoi, aar koum ókkol or cóor ókkol forigiyói. Alla ye ñoóñr cóor Babilon ore yaad gorí híyan ore íbar guccár gozzob or córab lói furaiya fiyala háa baiyé. 20 Hárr ñiya gaib óigiyoi, aar faár ókkol hořé giyíoi. 21 Asman ottu mon-mon uzón ola ñoóñr-ñoóñr cíl-boróf ókkol manúc ókkol or uore forat doijje, aar manúc ítara hé cíl-boróf or afot olla bóuli Allar kuféri gorát doijje, kiyólla-hoilé hé afot tán bicí hótarnak.

17 Ze háñt twa fírista ttu háñt twa fiyala asé, híin ottu ekgwá ye aái añré hoór de, “Aiyó, añí tuáñre bicí fanír uore boirá asé de hé ñoóñr maginir sánza kii de daháiyum, 2 zibá llói duniyair baáñcca ókkole zená goijjíl, zibár zenákarir córabe duniyair bácinnda ókkol tuúl óigilgoi.” 3 Tarfore hé fírista wa ye añré Ruhr bútoře góri ekkán moidan zagat loigiyé. Hére añí éggwa mayafua deikkí, zibá kirmis roingga endilla ekgwá háyowan or uore boirá, zibár agagura kuférir nam loi furaiya, zibá ttu háñt twa matá edde doc cán cing asé. 4 Hé mayafua wa bayoinna rong or edde kirmis rong or hoor findá, aar cúna, kimoti johár edde mukta loi háñzaiya. Híbar át ot cúnar ekgwá fiyala asé, zibá gínayi jiníc ókkol lói edde híbar zenákarir nafaki loi furaiya. 5 Híbar kuwal ot mazé gufon maáni ola nam yían leikká asé, “Ñoóñr Babilon, magi ókkol or edde duniyair gínayi jiníc ókkol or maa.” 6 Añí deikkí de, hé mayafua wa Allar pak bonda ókkol or lou edde Isár gobá ókkol or lou hái tuúl ói asé. Híba re deki añí ebbe taajup óigiyigoi. 7 Fírista wa ye añré hoór de, “Tuñí taajup kiyá óiyo? Añí tuáñre hé mayafuar edde híba re boói loiza de háyowan or gufon maáni buzáidiyum, ze háyowan ottu háñt twa matá edde doc cán cing asé. 8 Tuñí ze háyowan deikkó yíba age accíl déh, yala náí; yíba oțái gañt ottu neeli ñóncot zaibar asé. Duniyair bácinnda ókkol zetarár nam duniyair foidayecir héñtte lóti zindigir-kitab ot leikká náí, ítara hé háyowan nwá re deki taajup óibo, kiyólla-hoilé yíba age accíl, yala náí, montor aibó. (Abyssos g12) 9 “Íin buzíte giyan ola demak or zorurot: háñt twa matá gún óilde háñt twa faár

ziín or uore mayafua wa boiyé. **10** Háñt twa matá híin háñt zon baáñcca yó. Héntu fañs zon forigiyói, ezzon asé, ar ezzon aijjó nú aiyé; montor íba zeñtté aibó héñtte íba ttu hotókkal ánik táka foribó. **11** Ze háyowan nwá age accíl, yala náí, yíba óilde añçto nombór or baáñcca. Yíba óilde háñto wa baáñccar bútottu ekzon, aar yíba dóncor uzu zaar. **12** “Tuñí ze doc cán cing deikkó, híin óilde doc zon baáñcca zetará aijjó raijjo nó faa, montor ítara kessú ãaim baáñcca ói bolla háyowan nwar fúañti adíkar faibo. **13** Ítarar moksót ek ðoilla, aar ítara nizor kémota edde adíkar háyowan nwá re diifélaibo. **14** Ítara Bérásóol-or-Sóo wa llói larái díbo, montor Bérásóol-or-Sóo wa ye ítara re háraibo, kiyólla-hoilé íba óilde kúda ókkol or Kúda aar baáñcca ókkol or Baáñcca. Zetará íbar fúañti asé ítara óilde uitará zetará re ðaha gíyéh, basílowa gíyeh, edde biccácdar.” **15** Tarfore fírista wa ye añré hoór de, “Tuñí ze faní deikkó, ziín or uore magini boirá asé, híin óilde koum ókkol, manúc or dol ókkol, decóitta ókkol edde zuban ola ókkol. **16** Tuñí ze doc cán cing háyowan ottu deikkó, ítara hé magini re nafórot goríbo, edde hárr kessú loifélai biyossor gorífelaibo, aar híbar gusso háifelai híba re ooin loi furat dífélaibo. **17** Kiyólla-hoilé Alla ye ítarar díl ot gólaidiye de ki hoilé, íbar moksót fura gorí bolla, ek niyote edde ítarar raijjo háyowan ore otókkal olla gosáidi yore zetókkal foijjonto Allar kalam fura nó. **18** Tuñí ze mayafua deikkó híba óilde ðoóñr cóor waán ziyáne duniyair baáñcca ókkol or uore hókumot goré.”

18 Híin baade añí ar eggwá fírista deikkí zibá asman ottu lami aiyér; íba ttu ðoóñr kémota asé, aar duniyai íbar tozolliye foór óigiyoi. **2** Íba ye zure guzori hoór de, “Forigiyói, ðoóñr Babilon forigiyói! Híba bútt ókkol tákibar zaga, fottí hóraf jin or ađða-hána, edde hárr ðoilla nafak edde gínayi faik or ađða-hána bonigiyói. **3** Kiyólla-hoilé tamám koum ókkol toh híbar zenákarir azzur córab hái ðuúl óigiyoi; duniyair baáñcca ókkole híba llói zená goijjé, aar duniyair códor ókkol híbar ayacir átalikka dón-doulote tuangor óigiyoi.” **4** Tarfore añí asman ottu ar ekgwá abas fúinni, eén hoór de, “Ó añr bonda ókkol, tuáñra híba ttu neeli aázogoi, zeéne tuáñra híbar gunát córik no, aar híbar honó afot tuáñrar uore nu aiyé; **5** kiyólla-hoilé híbar guná toh asman or héddur foijjonto uñsol ot foónicce, aar Alla ye híbar nafórmani ókkol monot

goijjé. **6** Híba ye zendilla goijjé héndilla tuáñra yó híba re goró; híba re híbar ham mozin dui gun bicí bodola doh. Ze fíyalat híba ye oinno zon olla nicá miyáldiye, hé fíyalat mazé híba lla aró dui gun bicí nicá miyál dóh. **7** Híba re eddúr azab edde duk doh, zeddúr híba ye nizoré nize ðoóñr kúwalaiye edde ayaciye zindigi haraiyé, kiyólla-hoilé híba ye nizor díle-díle hoó de, ‘Añí rani ísafe boirá así; añí hóno rari no, añr ttu honódin ferecan óibar náí.’ **8** Hétolla toh ek din or bútoze híbar afot híbar uore aázayboi, yáni moot, ferecani, edde rať. Aar híba re ooin di furíféla zaybo, kiyólla-hoilé híba re bisar-goróya Malik Alla toh taakotwala.” **9** Duniyair baáñcca ókkol zetará híba llói zená goijjé aar ayaci goijjé, ítara híba zoler de dúañ deká híba lla hañdahari goríbo edde bicí ferecani zahér goríbo. **10** Ítara híbar azab deká ðoore dur óttu tíyai hoibó de, “Ó ðoóñr cóor Babilon, ó mozbut cóor, afsús, tor uore afsús! Hom ãaim or bútoze toh tor sáñza aáigiyoi.” **11** Duniyair códor ókkole híba lla hañdahari goríbo edde ferecani zahér goríbo, kiyólla-hoilé ítarar malsámama ókkol ar honókiye no kiner. **12** Hé malsámama óilde: cúna, rufa, kimoti fattór edde mukta; barík fařor-hoor, bayoinna rong or hoor, recóm hoor edde kirmis rong or hoor; hárr kisím or kúçbo gas, áñtir dat ottu banaiya ðoilla-boðoilla jiníc ókkol, edde dami gas ottu, fitol ottu, luwá ttu edde marból ottu banaiya ðoilla-boðoilla jiníc ókkol; **13** gas or sál, mosólla, agórbatti, añtor, luban, anggur or córab, tel, moida, giyuñ, goru, bérásóol, gúra, gúra-garí, edde gulam ókkol. **14** Hé códor ókkole hoibó de, “Tui ze fófola feito azzu goijjílí híin tor hañsóttu dur óigiyoi, aar tor tuangorir edde cúndor or jiníc beggún tor héntu gaib óigiyoi, maincé híin ore ar loot no faibo.” **15** Hé jiníc or códor ókkol zetará híbar zoriya tuangor óigiyoi, ítara híbar azab deká ðoore duré tíyai tákibo. Ítara hañdahari edde bilak goríbo, **16** eén hoóí-hoóí, “Ó ðoóñr cóor, afsús, tor uore afsús, zibá barík fařor-hoor, bayoinna rong or hoor edde kirmis rong or hoor findá, aar cúna, kimoti fattór, edde mukta loi háñzaiya; **17** kiyólla-hoilé hom ãaim or bútoze edún dón-doulot toh dónco óigiyoi!” Zaáñs or hárr mazí, hárr facíndar edde séraingga, aar zedúne doiijjat ham gorí sole, ítara beggún duré tíyai tákibo. **18** Híba zoler de dúañ deká ítara guzori hoibó de, “E ðoóñr cóor yíán or ðoilla ar honó cóor accíl níki?” **19** Ítara nizor matát dúil maribó, aar hañdi-hañdi edde bilak gorí-gorí guzori hoibó de, “Afsús, hé ðoóñr cóor or

uore afsús, zibár dón-doulote doijjar tamám zaáns ola ókkol tuangor óiye, kiyólla-hoilé híba re toh hom ʔaim or bútoore dónco gorífela gíyeh!” **20** Ó asman, Allar pak bonda ókkol, rosúl ókkol, edde nobi ókkol, híbar uore ziyán óiye híyan olla kúci goró; kiyólla-hoilé Alla ye insáf gorí híba ttu tuáñrar bodola loifélaie. **21** Tarfore eggwá taakotwala fírista ye ɖoóñr sakkir ɖóilla éggwa fattór tulí looi doijjat melámari hoór de, “Endilla zure ɖoóñr cóor Babilon ore félaidiya zaybo. Híba re ar honódin faa no zaybo. **22** Bina-bazoyar, tal-bazoyar, bací-bazoyar edde cíañ-matoyar abas ar honódin tor bútoore fúna no zaybo; tor bútoore ar honódin honó ɖóilla mistírir códori faa no zaybo; tor bútoore honó sakkir abas ar honódin fúna no zaybo. **23** Tor bútoore serak or foóre ar honódin foór no dibo; dulá edde dulír abas tor bútoore ar honódin fúna no zaybo; kiyólla-hoilé tor códor ókkol toh duniyair ɖoóñr manúc accíl, aar tor jadugari loi tamám koum ókkol gollot ot giyiói. **24** Híbar bútoore nobi ókkol or, Allar pak bonda ókkol or, edde uitará beggún or lou faa gíyéh zetará re duniyait kún gorá gíyéh.”

19 Híin baade añi asman ot manúc or ɖoóñr dol or uzor or ɖóilla eggwá ɖoóñr abas fúinni, eén hoór de, “Háleluyah! Nejat, mohíma aar kémota toh añárar Allar, **2** kiyólla-hoilé íbar bisar sóiyi edde insáfí. Íba ye toh ɖoóñr maginir bisar goijjé, zibá ye nizor zenákari lói duniyai borbad difélaie, aar íba ye híba ttu Nizor gulam ókkol or lou wór bodola loiyé.” **3** Ítara aró ekbar hoór de, “Háleluyah! Híba zoler de dúañ abadulabad hámica urát tákouk.” (aiñ g165) **4** Ekkuri-sair zon murubbi-neta gúne edde sairó zandár gúne fori Alla re sóida goijjé, zibá toktór uore boirá asé, eén hoói, “Aamin. Háleluyah!” **5** Hétunot toktó gán ottu eggwá abas aiccé de, “Añárar Allar taarif goró, ó íbar tamám gulam ókkol, tuáñra zetará íba re ɖooro, tuáñra ɖoóñr cóñro beggúne.” **6** Tarfore añi manúc or ɖoóñr dol or uzor or ɖóilla, bicí fanír holholanir ɖóilla, edde ʔaral or ɖoóñr mat or ɖóilla éggwa abas fúinni, eén hoór de, “Háleluyah! Añárar Malik hárr Kudurutwala Kúda ye toh hókumot gorér. **7** Aiyó, añára kúci ói aar kúci-áci gorí íbar mohíma gorí, kiyólla-hoilé Bérásóol-or-Sóo war biyár októ toh aáigiyoí, aar íbar dulí ye nizoré toiyar gorífelaiye.” **8** Híba re sosoikka edde sáf barík ʔaror-hoor findí bolla diiya gíyéh, **9** Tarfore fírista wa ye añré hoór de, “Yián lekó: mubarek uitará zetará re Bérásóol-or-Sóo war

boirat or melat dawot diya gíyéh.” Baade íba ye añré hoiyé de, “Íñ Allar sóiyi hotá ókkol.” **10** Hétunot íba re sóida gorí bolla añi íbar foot forigiyoí. Montor íba ye añré hoór de, “No goijjó; añi yó toh tuáñr ɖóilla edde tuáñr imandár báiboináin uitarár ɖóilla éggwa gulam, zetará Isár diya gobá re dóri táke. Alla re beh sóida goró. Isár diya gobá ókkol óilde toh nobi ókkol or mul hotá.” **11** Baade añi asman kúla deikkí, hére deikkí de, eggwá dóla gúra. Yíbar uore zibá boirá asé íba re Biccácdar edde Sóiyi bóuli howá zah. Íba ye insáf or sáañte bisar edde larái goré. **12** Íbar suk ooin or zilhar ɖóilla, aar íbar matát bicí tas asé. Íbar gaat endilla ekkán nam leikká asé ziyán íba Nize bade ar honókiye no zane. **13** Íba lou wót buraiya fucák findá, aar íbar nam óilde Allar Kalam. **14** Asman or fóous ókkol dóla edde sáf barík ʔaror-hoor findí, dóla gúra ókkol ot góri íbar fisé-fisé zaat accíl. **15** Íbar gal ottu ekkán dár toluwar neeliaiccé, zeéne híyan lói íba ye koum ókkol ore hárai fare. Íba ye ítarar uore luwár lojí lói hókumot goríbo. Anggur or roc neela de gañrá re íba Nizebaze úñribo, ze gañrát hárr Kudurutwala Allar guccár gozzob asé. **16** Íbar fucák ot edde ran ot nam yán leikká asé, “baañcca ókkol or Baañcca, kúda ókkol or Kúda.” **17** Tarfore añi deikkí de, eggwá fírista beil or bútoore ʔíyayi, íba ye uore asman ot ure de tamám faik ókkol ore ɖoóñr abase guzori-guzori hoór de, “Aiyó, Allar ɖoóñr mela háito zoma óizogoi, **18** zeéne tuáñra baañcca ókkol or gusso, zonnal ókkol or gusso, boluwar manúc ókkol or gusso, gúra ókkol or edde híin or uore soré de ítarar gusso, edde tamám manúc ókkol or gusso hái ʔaro, ítara begulam óuk yáh gulam, cóñro óuk yáh ɖoóñr.” **19** Tarfore añi deikkí de, háyowan nwá edde duniyair baañcca ókkol ítarar fóous ókkol lói ekkán ot zoma óiye, zibá gúrar uore boirá asé íba llói edde íbar fóous ókkol lói larái gorí bolla. **20** Montor háyowan nwá re gereftar gorífela gíyéh, aar yíbar fúañti misá nobi ubá re yó gorífela gíyéh zibá ye hé háyowan or muuntu endilla keramot ókkol goittó, ziín or zoriya íba ye uitará re gollot ot loigiyoí zetará hé háyowan or nicán kobul goijjé edde zetará yíbar mutti re sóida goijjé. Hé duní wa re ooin or ɖíit zinda félaidiya gíyéh, ziyán gónɖoke zole. (Limñe Pyr g3041 g4442) **21** Aar badbaki gún ore toluwar waáne mariféla gíyéh ziyán zibá gúrar uore boirá asé íbar gal ottu neeillé; aar tamám faik ókkole ítarar gusso hái feʔ bóraifelaiye.

20 Tarfore añí éggwa fírista deikkí zibá asman ottu lami aiyér; íbar át ot oṭái gañt or sabí wa edde ekkán ɔoñr síyol asé. (Abyssos g12) **2** Íba ye nagá wa re dórifelaiye, yáni furana háf zibá re íbilíc yáh Cóitan howá zah ítare; baade ek ázar bosór olla bañdífelaiye. **3** Tarfore íba ye ítare oṭái gañt ot félaidi yíba bon gorífelaiye, aar yíbat moór lagaidiyé, zeéne ek ázar bosór fura nó óiyo foijjonto íte kounm ókkol ore gollot ot ar loizai no fare; becók yárbaade ítare essát olla eridiya zaybar asé. (Abyssos g12) **4** Baade añí toktó ókkol deikkí, híin or uore zetará boirá asé ítara re bisar goríbar kémota diiya giyéh. Añí uitarár ruh ókkol ore yó deikkí zetarár holla ókkol Isár baabute gobá dóne edde Allar kalam or zoriya haríféla giyéh, zetará háyowan nwá re yáh yíbar mutti re sóida nó goré edde nizer kuwal ot yáh át ot yíbar nicán kobul nó goré. Ítara zinda ói Mosihr fúañti ek ázar bosór fán hókumot gorát doijje. **5** Oinno muruda ókkol ek ázar bosór fura nó óiyo foijjonto zinda nó. Híyan óilde mora ttu zinda ówar foóilabar. **6** Mubarek edde pak manúc óilde ubá zee niki hé foóilabar mora ttu zinda ówat cámil táke; ítarar uore dusára moot or honó taakot náí, bólike ítara Allar edde Mosihr imam óibo, aar íbar fúañti ek ázar bosór fán hókumot goríbo. **7** Ek ázar bosór guzori zaigói baade, Cóitan ore ítar ziyól ottu hálas gorídiya zaybo, **8** baade íte duniyair sairó kunat asé de kounm ókkol ore gollot ot loizai bolla neelibó, yáni Yajúj edde Majúj ore, aar ítara re larái lla zoma goríbo. Ítarar gona doijjar sor or balur hédun óibo. **9** Ítara zobin or agapura fólizai, Allar pak bonda ókkol táke de zaga gán ore gérgwal gorífelaiye, yáni íbar adorja cóor gán ore; montor asman ottu ooin nazil ói ítara re hálak gorífelaiye. **10** Aar ítara re gollot ot loigiyé de hé íbilíc ore gónɔoke zole de ooin or ɔíft félaidiya giyéh, zeṛé háyowan nwá edde misá nobi wa yó asé. Héṛe ítara dine raite abadulabad hámica azab faibo. (aiñ g165, Limnē Pyr g3041 g4442) **11** Baade añí ekkán ɔoñr dóla toktó edde híyan or uore boirá asé de íba re deikkí, zibár muúntu zobin edde asman dáigiyegoi, aar híine honó zaga nó faa. **12** Tarfore añí ɔoñr-cónṛo tamám mora ókkol ore toktó gán or muúntu tíyaiya deikkí, aar kitab ókkol kúlagiye. Aró ekgwá kitab kúlagiye, zibá óilde zindigir-kitab; baade hé mora ókkol ore nizer-nizer ham mozin bisar gorá giyéh, ze ham ókkol hé kitab pún ot leká gýl. **13** Ze mora ókkol doijjat accíl, ítara re doijja ye tulúdiye, aar moote edde fatalfure yó híin ot ze mora ókkol accíl


ítara re tulúdiye; aar ítara fottíkiyo re nizer-nizer ham mozin bisar gorá giyéh. (Hadēs g86) **14** Baade moot ore edde fatalfur ore ooin or ɔíft félaidiya giyéh. Ooin or ɔíft óilde dusára moot. (Hadēs g86, Limnē Pyr g3041 g4442) **15** Zar-zar nam hé zindigir-kitab ot leká giyéh de faa nó zah, ítare-ítare yó hé ooin or ɔíft félaidiya giyéh. (Limnē Pyr g3041 g4442)

21 Baade añí ekkán noya asman edde ekkán noya zobin deikkí; kiyólla-hoilé foóilar asman edde foóilar zobin toh céc óigiyoi, honó doijja yó ar náí. **2** Tarfore añí deikkí de, pak cóor gán, yáni noya Jerúsalem mán asman ottu Allar hañsóttu lami aiyér; híyan ore dulí re dulá lla háñza fángori háñza giyéh. **3** Baade añí toktó gán ottu eggwá ɔoñr abas fúinni, eén hoór de, “Soó, Alla tákibar zaga yala insán or bútoṛe. Íba ítarar fúañti tákibo, aar ítara íbar bonda óibo. Alla Nize ítarar fúañti óibo edde ítarar Alla óibo. **4** Íba ye ítarar suk ottu hárr suk or faní fuñsídibo; honó moot ar no tákibo; honó ferecani, hañdani, yáh duk óu ar no tákibo; kiyólla-hoilé agor gún toh fúraigiyoi.” **5** Toktó gán ot boirá asé de íba ye hoór de, “Saá, Añí hárr kessú noya gorífelair.” Íba ye aró hoór de, “Íin lek, kiyólla-hoilé hotá íin biccácdar edde sóiyi.” **6** Baade íba ye añré hoór de, “Yala fúraiye. Añí óilam de Alfa edde Omíga, yáni Awal edde Akér. Zetará tiráci asé ítara re Añí zindigi dee de fanír zónna ttu faní diiyum, ebbe maana. **7** Zee niki ziti aiyé íte híin beggún miras faibo; Añí ítar Alla óiyum aar íte Añr fua óibo. **8** Montor sélfadúrar, gairimandár, gínayi ham-goróyar, kúnir, zenákur or, jadugor or, mutti-fuñzoyar, edde tamám misákur ókkol or bák óibo de ooin edde gónɔoke zole de hábiya zuzuk; híyan óilde dusára moot.” (Limnē Pyr g3041 g4442) **9** Tarfore ze háñt twa fírista ttu ahérir háñt tan afot furaiya háñt twa fiyala accíl, híin ottu ekgwá ye aái añré hoór de, “Eṛé aiyó, añí tuáñre dulí, yáni Bérasóol-or-Sóo war bou daháiyum.” **10** Íba ye añré Pak-Ruhr bútoṛe góri eggwá ɔoñr edde uñsol faár ot loigiyé, aar añré pak cóor Jerúsalem mán daháiyé, ziyán asman ottu Allar hañsóttu lami aiyér, **11** ziyán ot Allar tozollí asé. Híyan or sossohani bicí kimoti johár or ɔóilla, yáni fórik or ɔóilla sáf jasper johár or ɔóil. **12** Híyan ot baró wan geiṭ ola ekkán ɔoñr edde uñsol ɔebal asé, aar hé geiṭ tun ot baró wa fírista asé. Geiṭ híin ot nam ókkol leikká asé, ziín óilde Boni Isráil or baró háandan or nam. **13** Tin nán geiṭ fuk mikká ttu, tin

nán geiṭ uttor mikká ttu, tin nán geiṭ doóin mikká ttu, aar tin nán geiṭ fosím mikká ttu. **14** Cóor or ḑeḑal lan baró wa buniyadir fattór or uore bana giyéḥ, aar híin ot Bérasóol-or-Sóo war baró zon sáhabi gún or nam asé. **15** Zibá ye añr lói hotá hoiyé, fba ttu eggwá mafonir lorí asé zibá cúnar; cóor gán ore, híyan or geiṭ ókkol ore, edde híyan or ḑeḑal ore mafi bolla. **16** Cóor gán sair kuinna; híyan or lamba zeddúr fatári yó héddur. fba ye cóor gán lorí wa lói maippé rár baró ázar kuni de zani faijje; híyan or lamba, fatári edde uormikká borabor. **17** Baade fba ye híyan or ḑeḑal lan ore insáni mafe maippé rár, ek cóo salic-sair át óiye, zendilla gori fírista ye yó mafe. **18** ḑeḑal lan jaspar johár lói banaiya; aar cóor gán sáf aainar ḑóilla háti cúnar. **19** Hé cóor or ḑeḑal or buniyadir fattór gún hárr kisím or kimoti johár lói hánzaiya. Foóila buniyadir fattór gwá jaspar or ḑóilla sosoikka, dusára wa safayar ḑóilla cúрма roingga, tisára wa kalséḑanir ḑóilla asmani roingga, sair nombór or gwá emerald or ḑóilla áil, **20** fañs nombór or gwá sarḑonix or ḑóilla dóla edde miṛá roingga, sów nombór or gwá sardiya or ḑóilla córboti roingga, háñt nombór or gwá krisolaiṭ or ḑóilla óloidda, añṭo nombór or gwá beral or ḑóilla faní roingga, now nombór or gwá krisopreis or ḑóilla hora áil, egaro nombór or gwá jasend or ḑóilla lal roingga, baró nombór or gwá ametist or ḑóilla bayoinna roingga. **21** Baró wan geiṭ tun baró wa mukta; ekkán geiṭ ekgwár dóre mukta. Cóor or rasta gán sáf aainar ḑóilla háti cúnar. **22** Cóor gán or bútoṛe añí honó ebaadot-hána nó deki, kiyólla-hoilé Mabud hárr Kudurutwala Alla edde Bérasóol-or-Sóo wa óilde híyan or ebaadot-hána. **23** Cóor gán ot foór ói bolla beil edde san or honó zorurot náí, kiyólla-hoilé Allar mohímaye híyan ore foór goré, aar Bérasóol-or-Sóo wa óilde híyan or serak. **24** Koum ókkol híyan or foóre solafíra goríbo, aar duniyair baáñcca ókkole ítarar dón-doulot ókkol híyan or bútoṛe aníbo. **25** Din ot híyan or geiṭ ókkol honódin bon no tákibo, kiyólla-hoilé hére toh rait no óibo. **26** Aar koum ókkol or dón-doulot edde izzot híyan or bútoṛe aná zaybo. **27** Montor honó nafak jiníc, gínayi ham goré de yáh misá hotá hoó de honó manúc híyan ot bilkúl góli no faribó, montor siríf uitará faribó zetarár nam Bérasóol-or-Sóo war zindigir-kitab ot lekká asé.

22 Yárbaade fírista wa ye añré zindigir fanír ekkán hál daháíye; híyan fórik or ḑóilla foón, aar híyan Allar edde Bérasóol-or-Sóo war toktó ttu neeli **2** cóor gán or ḑoónr goldir mazór ttu zaat accíl. Híyan or ek hañsat zindigi gas asé, zibát baró kisím or gulagala dóre, fottí macé-macé. Hé gas or fataye koum ókkol or biyaram gom ó. **3** Hére honó laánot ar no tákibo; Allar edde Bérasóol-or-Sóo war toktó hé cóor ot tákibo, aar fbar gulam ókkole fbar ebaadot goríbo; **4** ítara fbar siyára dekiḑo, aar fbar nam ítarar kuwal ot lekká tákibo. **5** Hére honó rait no óibo; ítara ttu serak or foór yáh beil or foór no lagibó, kiyólla-hoilé Malik Alla ye ítara re foór díbo, aar ítara abadulabad hámica hókumot goríbo. (aĩñ g165) **6** Fírista wa ye añré hoór de, “Hotá iín beggún biccácdar edde sóiyi. Malik Alla, zibá ye nobi ókkol or hañse nazil goré, fba ye Nizor fírista diferáíye, fbar gulam ókkol ore uúin dahái bolla ziín bicí hára háamaha óibar asé.” **7** Isá ye hoór de, “Soó, Añí hára aiyír. Mubarek ubá zee niki e kitab or poigam ókkol amól goré.” **8** Añí Yohánna ye edún iín fúinni edde deikkí. Zeñtté añí iín fúinni edde deikkí, añí sóida gorí bolla fírista war foot forigiýgoi, zibá ye añré iín daháíye. **9** Hétunot fba ye añré hoiyé de, “No goijjó; añí yó toh tuáñr ḑóilla, tuáñr báiyain nobi ókkol or ḑóilla, edde zetará e kitab or hotá ókkol amól goré ítarar ḑóilla éggwa gulam. Alla re beh sóida goró!” **10** Baade fba ye añré hoór de, “E kitab or poigam ókkol ore moór lagai no raikkó, kiyólla-hoilé októ toh ḑáke. **11** Zee niki burai goré, íte burai gorát tákouk; zee niki nafaikka, íte nafaikka tákouk; zee niki forhésar, íte forhés góri solat tákouk; aar zee niki pak, íte pak tákouk.” **12** Isá ye hoór de, “Soó, Añí hára aiyír, fottíkiyo re nizor-nizor ham mozin dii bolla boccíc Añr fúañti asé. **13** Añí óilam de Alfa edde Omíga, Awal edde Akér, Cúru edde Céc.” **14** Mubarek uitará zetará nizor zubba dúifele, kiyólla-hoilé ítara zindigi gas or hók faibo, aar geiṭ tún báy cóor gán ot góli faribó. **15** Híyan or baáre óibo de óilde, kuttar ḑóilla manúc ókkol, jadugor ókkol, zenákur ókkol, kúni ókkol, mutti-fuñzoya ókkol, edde uitará beggún zetará níki misá re fosón goré edde misáye sole. **16** “Añí Isá ye Añr fírista diferáíyi, zomát ókkol olla tuáñrar hañse iín gobá díto. Añí óilam de Dawud or Cíñyor edde Nosól, Fózor or sosoikka Sút-tara.” **17** Pak-Ruh ye edde dulí ye hoór de, “Aiyó.” Zee niki fúner íte yó hoó, “Aiyó.” Zar ttu tirác laiggé íte aiyó; monehoór de íte zindigir faní maana loogái. **18** Zee

niki e kitab or poigam ókkol fúne, yóggwar hañse añí
e gobá gán dir de, zodi honókiye iín ot kessú bará,
Alla ye yóggwar zindigit mazé e kitab ot leikká asé
de afot ókkol diibo; **19** aar zodi honókiye e kitab or
poigam ókkol ottu honó hotá neelaiféle, Alla ye ítar
ttu e kitab ot leikká asé de hé zindigi gas or edde pak
cóor or hók loifélaibo. **20** Zibá ye edún iín hoói der Íba
ye hoór de, “Becók, Añí hára aiyír.” Amin. Ó Malik
Isá, aiyó. **21** Malik Isár rahámot pak bonda ókkol or
uore zari tákouk. Amin.



Tarfore ańi deikkí de, pak cóor gán, yáni noya Jerúsalem mán asman ottu Allar hańsóttu lami aiyér; híyan ore dulí re dulá lla háńza fángori háńza gýeh. Baade ańi toktó gán ottu eggwá ɔoóńr abas fúinni, eén hoór de, “Soó, Alla tákibar zaga yala insán or bútoe. Íba ítarar fúańti tákibo, aar ítara íbar bonda óibo. Alla Nize ítarar fúańti óibo edde ítarar Alla óibo.

Revelation 21:2-3

Reader's Guide

Ruáingga at AionianBible.org/Readers-Guide

The Aionian Bible republishes public domain and Creative Common Bible texts that are 100% free to copy and print. The original translation is unaltered and notes are added to help your study. The notes show the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of afterlife destinies.

Who has the authority to interpret the Bible and examine the underlying Hebrew and Greek words? That is a good question! We read in 1 John 2:27, *"As for you, the anointing which you received from him remains in you, and you do not need for anyone to teach you. But as his anointing teaches you concerning all things, and is true, and is no lie, and even as it taught you, you remain in him."* Every Christian is qualified to interpret the Bible! Now that does not mean we will all agree. Each of us is still growing in our understanding of the truth. However, it does mean that there is no infallible human or tradition to answer all our questions. Instead the Holy Spirit helps each of us to know the truth and grow closer to God and each other.

The Bible is a library with 66 books in the Protestant Canon. The best way to learn God's word is to read entire books. Read the book of Genesis. Read the book of John. Read the entire Bible library. Topical studies and cross-referencing can be good. However, the safest way to understand context and meaning is to read whole Bible books. Chapter and verse numbers were added for convenience in the 16th century, but unfortunately they can cause the Bible to seem like an encyclopedia. The Aionian Bible is formatted with simple verse numbering, minimal notes, and no cross-referencing in order to encourage the reading of Bible books.

Bible reading must also begin with prayer. Any Christian is qualified to interpret the Bible with God's help. However, this freedom is also a responsibility because without the Holy Spirit we cannot interpret accurately. We read in 1 Corinthians 2:13-14, *"And we speak of these things, not with words taught by human wisdom, but with those taught by the Spirit, comparing spiritual things with spiritual things. Now the natural person does not receive the things of the Spirit of God, for they are foolishness to him, and he cannot understand them, because they are spiritually discerned."* So we cannot understand in our natural self, but we can with God's help through prayer.

The Holy Spirit is the best writer and he uses literary devices such as introductions, conclusions, paragraphs, and metaphors. He also writes various genres including historical narrative, prose, and poetry. So Bible study must spiritually discern and understand literature. Pray, read, observe, interpret, and apply. Finally, *"Do your best to present yourself approved by God, a worker who does not need to be ashamed, properly handling the word of truth."* 2 Timothy 2:15. *"God has granted to us his precious and exceedingly great promises; that through these you may become partakers of the divine nature, having escaped from the corruption that is in the world by lust. Yes, and for this very cause adding on your part all diligence, in your faith supply moral excellence; and in moral excellence, knowledge; and in knowledge, self-control; and in self-control patience; and in patience godliness; and in godliness brotherly affection; and in brotherly affection, love. For if these things are yours and abound, they make you to be not idle nor unfruitful to the knowledge of our Lord Jesus Christ,"* 2 Peter 1:4-8.

Glossary

Ruáingga at AionianBible.org/Glossary

The Aionian Bible un-translates and instead transliterates eleven special words to help us better understand the extent of God's love for individuals and all mankind, and the nature of afterlife destinies. The original translation is unaltered and a note is added to 64 Old Testament and 200 New Testament verses. Compare the meanings below to the Strong's Concordance and Glossary definitions.

Abyssos g12

Greek: proper noun, place

Usage: 9 times in 3 books, 6 chapters, and 9 verses

Meaning:

Temporary prison for special fallen angels such as Apollyon, the Beast, and Satan.

aidios g126

Greek: adjective

Usage: 2 times in Romans 1:20 and Jude 6

Meaning:

Lasting, enduring forever, eternal.

aiōn g165

Greek: noun

Usage: 127 times in 22 books, 75 chapters, and 102 verses

Meaning:

A lifetime or time period with a beginning and end, an era, an age, the completion of which is beyond human perception, but known only to God the creator of the aiōns, Hebrews 1:2. Never meaning simple endless or infinite chronological time in Greek usage. Read Dr. Heleen Keizer and Ramelli and Konstan for proofs.

aiōnios g166

Greek: adjective

Usage: 71 times in 19 books, 44 chapters, and 69 verses

Meaning:

From start to finish, pertaining to the age, lifetime, entirety, complete, or even consummate. Never meaning simple endless or infinite chronological time in Koine Greek usage. Read Dr. Heleen Keizer and Ramelli and Konstan for proofs.

eleēsē g1653

Greek: verb, aorist tense, active voice, subjunctive mood, 3rd person singular

Usage: 1 time in this conjugation, Romans 11:32

Meaning:

To have pity on, to show mercy. Typically, the subjunctive mood indicates possibility, not certainty. However, a subjunctive in a purpose clause is a resulting action as certain as the causal action. The subjunctive in a purpose clause functions as an indicative, not an optative. Thus, the grand conclusion of grace theology in Romans 11:32 must be clarified. God's mercy on all is not a possibility, but a certainty. See ntgreek.org.

Geenna g1067

Greek: proper noun, place

Usage: 12 times in 4 books, 7 chapters, and 12 verses

Meaning:

Valley of Hinnom, Jerusalem's trash dump, a place of ruin, destruction, and judgment in this life, or the next, though not eternal to Jesus' audience.

Hadēs g86

Greek: proper noun, place

Usage: 11 times in 5 books, 9 chapters, and 11 verses

Meaning:

Synonymous with Sheol, though in New Testament usage Hades is the temporal place of punishment for deceased unbelieving mankind, distinct from Paradise for deceased believers.

Limnē Pyr g3041 g4442

Greek: proper noun, place

Usage: Phrase 5 times in the New Testament

Meaning:

Lake of Fire, final punishment for those not named in the Book of Life, prepared for the Devil and his angels, Matthew 25:41.

Sheol h7585

Hebrew: proper noun, place

Usage: 66 times in 17 books, 50 chapters, and 64 verses

Meaning:

The grave or temporal afterlife world of both the righteous and unrighteous, believing and unbelieving, until the general resurrection.

Tartaroō g5020

Greek: proper noun, place

Usage: 1 time in 2 Peter 2:4

Meaning:

Temporary prison for particular fallen angels awaiting final judgment.

Glossary +

AionianBible.org/Bibles/Rohingya---Kitabul-Mukaddos-Bible/Noted

Aionian Glossary references are below. Strong's Hebrew and Greek number notes are added to 64 Old Testament and 200 New Testament verses. Questioned verse translations do not contain Aionian Glossary words but may wrongly imply *eternal* or *Hell*. Note placement is skipped or adjusted for verses with non-standard numbering.

Abyssos

Lukás 8:31
Romiól 10:7
Zahéri 9:1
Zahéri 9:2
Zahéri 9:11
Zahéri 11:7
Zahéri 17:8
Zahéri 20:1
Zahéri 20:3

aidios

Romiól 1:20
Yohúdah 1:6

aiōn

Moti 12:32
Moti 13:22
Moti 13:39
Moti 13:40
Moti 13:49
Moti 21:19
Moti 24:3
Moti 28:20
Markus 3:29
Markus 4:19
Markus 10:30
Markus 11:14
Lukás 1:33
Lukás 1:55
Lukás 1:70
Lukás 16:8
Lukás 18:30
Lukás 20:34
Lukás 20:35
Yohánna 4:14
Yohánna 6:51
Yohánna 6:58
Yohánna 8:35
Yohánna 8:51
Yohánna 8:52
Yohánna 9:32
Yohánna 10:28
Yohánna 11:26
Yohánna 12:34
Yohánna 13:8
Yohánna 14:16

Hamól 3:21
Hamól 15:18
Romiól 1:25
Romiól 9:5
Romiól 11:36
Romiól 12:2
Romiól 16:27
1 Kórintiól 1:20
1 Kórintiól 2:6
1 Kórintiól 2:7
1 Kórintiól 2:8
1 Kórintiól 3:18
1 Kórintiól 8:13
1 Kórintiól 10:11
2 Kórintiól 4:4
2 Kórintiól 9:9
2 Kórintiól 11:31
Galatiól 1:4
Galatiól 1:5
Íficiól 1:21
Íficiól 2:2
Íficiól 2:7
Íficiól 3:9
Íficiól 3:11
Íficiól 3:21
Íficiól 6:12
Filíppaiól 4:20
Kolóciól 1:26
1 Timóti 1:17
1 Timóti 6:17
2 Timóti 4:10
2 Timóti 4:18
Titus 2:12
Hibraniól 1:2
Hibraniól 1:8
Hibraniól 5:6
Hibraniól 6:5
Hibraniól 6:20
Hibraniól 7:17
Hibraniól 7:21
Hibraniól 7:24
Hibraniól 7:28
Hibraniól 9:26
Hibraniól 11:3
Hibraniól 13:8
Hibraniól 13:21
1 Fitor 1:23

1 Fitor 1:25
1 Fitor 4:11
1 Fitor 5:11
2 Fitor 3:18
1 Yohánna 2:17
2 Yohánna 1:2
Yohúdah 1:13
Yohúdah 1:25
Zahéri 1:6
Zahéri 1:18
Zahéri 4:9
Zahéri 4:10
Zahéri 5:13
Zahéri 7:12
Zahéri 10:6
Zahéri 11:15
Zahéri 14:11
Zahéri 15:7
Zahéri 19:3
Zahéri 20:10
Zahéri 22:5

aiōnios

Moti 18:8
Moti 19:16
Moti 19:29
Moti 25:41
Moti 25:46
Markus 3:29
Markus 10:17
Markus 10:30
Lukás 10:25
Lukás 16:9
Lukás 18:18
Lukás 18:30
Yohánna 3:15
Yohánna 3:16
Yohánna 3:36
Yohánna 4:14
Yohánna 4:36
Yohánna 5:24
Yohánna 5:39
Yohánna 6:27
Yohánna 6:40
Yohánna 6:47
Yohánna 6:54
Yohánna 6:68

Yohánna 10:28
Yohánna 12:25
Yohánna 12:50
Yohánna 17:2
Yohánna 17:3
Hamól 13:46
Hamól 13:48
Romiól 2:7
Romiól 5:21
Romiól 6:22
Romiól 6:23
Romiól 16:25
Romiól 16:26
2 Kórintiól 4:17
2 Kórintiól 4:18
2 Kórintiól 5:1
Galatiól 6:8
2 Tisólóniól 1:9
2 Tisólóniól 2:16
1 Timóti 1:16
1 Timóti 6:12
1 Timóti 6:16
2 Timóti 1:9
2 Timóti 2:10
Titus 1:2
Titus 3:7
Filimon 1:15
Hibraniól 5:9
Hibraniól 6:2
Hibraniól 9:12
Hibraniól 9:14
Hibraniól 9:15
Hibraniól 13:20
1 Fitor 5:10
2 Fitor 1:11
1 Yohánna 1:2
1 Yohánna 2:25
1 Yohánna 3:15
1 Yohánna 5:11
1 Yohánna 5:13
1 Yohánna 5:20
Yohúdah 1:7
Yohúdah 1:21
Zahéri 14:6

eleēsē

Romiól 11:32

Geenna

Moti 5:22
Moti 5:29
Moti 5:30
Moti 10:28
Moti 18:9
Moti 23:15
Moti 23:33
Markus 9:43

Markus 9:45
Markus 9:47
Lukás 12:5
Yakub 3:6

Hadēs

Moti 11:23
Moti 16:18
Lukás 10:15
Lukás 16:23
Hamól 2:27
Hamól 2:31
1 Kórintiól 15:55
Zahéri 1:18
Zahéri 6:8
Zahéri 20:13
Zahéri 20:14

Limnē Pyr

Zahéri 19:20
Zahéri 20:10
Zahéri 20:14
Zahéri 20:15
Zahéri 21:8

Sheol

Genesis 37:35
Genesis 42:38
Genesis 44:29
Genesis 44:31
Numbers 16:30
Numbers 16:33
Deuteronomy 32:22
1 Samuel 2:6
2 Samuel 22:6
1 Kings 2:6
1 Kings 2:9
Job 7:9
Job 11:8
Job 14:13
Job 17:13
Job 17:16
Job 21:13
Job 24:19
Job 26:6

Psalms 6:5
Psalms 9:17
Psalms 16:10
Psalms 18:5
Psalms 30:3
Psalms 31:17
Psalms 49:14
Psalms 49:15
Psalms 55:15
Psalms 86:13
Psalms 88:3
Psalms 89:48


Psalms 116:3
Psalms 139:8
Psalms 141:7
Proverbs 1:12
Proverbs 5:5
Proverbs 7:27
Proverbs 9:18
Proverbs 15:11
Proverbs 15:24
Proverbs 23:14
Proverbs 27:20
Proverbs 30:16
Ecclesiastes 9:10
Song of Solomon 8:6
Isaiah 5:14
Isaiah 7:11
Isaiah 14:9
Isaiah 14:11
Isaiah 14:15
Isaiah 28:15
Isaiah 28:18
Isaiah 38:10
Isaiah 38:18
Isaiah 57:9
Ezekiel 31:15
Ezekiel 31:16
Ezekiel 31:17
Ezekiel 32:21
Ezekiel 32:27
Hosea 13:14
Amos 9:2
Jonah 2:2
Habakkuk 2:5

Tartaroō

2 Fitor 2:4

Questioned


None yet noted



Imane beh Ibrahíme Allar hotá mainníl, zeñtté yóggwa re matai oh zagat zaito howá gýl ziyán yóggwa ye miras ísafe faibo. Yóggwa horé zaar no zani rowana óil.
- Hebrews 11:8



"When Pharaoh had let the people go, God didn't lead them by the way of the land of the Philistines, although that was near; for God said, 'Lest perhaps the people change their minds when they see war, and they return to Egypt'" Exodus 13:17



Kiyólla-hoilé Manúic or Fua yó toh hédmot faito aiccé de no, bókke aiccé de hédmot goittó, edde boút zon or bodol Nizor zan dito. - Mark 10:45



Añí Pául, Mosih Isár éggwa gulam, zibá re sáhabi ói bolla ðaka gíyéh edde Allar kúchóbor or tobolik olla basílowa gíyeh. - Romans 1:1

Creation 4004 B.C.

Adam and Eve created	4004
Tubal-cain forges metal	3300
Enoch walks with God	3017
Methuselah dies at age 969	2349
God floods the Earth	2349
Tower of Babel thwarted	2247
Abraham sojourns to Canaan	1922
Jacob moves to Egypt	1706
Moses leads Exodus from Egypt	1491
Gideon judges Israel	1245
Ruth embraces the God of Israel	1168
David installed as King	1055
King Solomon builds the Temple	1018
Elijah defeats Baal's prophets	896
Jonah preaches to Nineveh	800
Assyrians conquer Israelites	721
King Josiah reforms Judah	630
Babylonians capture Judah	605
Persians conquer Babylonians	539
Cyrus frees Jews, rebuilds Temple	537
Nehemiah rebuilds the wall	454
Malachi prophecies the Messiah	416
Greeks conquer Persians	331
Seleucids conquer Greeks	312
Hebrew Bible translated to Greek	250
Maccabees defeat Seleucids	165
Romans subject Judea	63
Herod the Great rules Judea	37

(The Annals of the World, James Uusher)

Jesus Christ born 4 B.C.

New Heavens and Earth

1956	Christ returns for his people
1830	Jim Elliot martyrd in Ecuador
1731	John Williams reaches Polynesia
1614	Zinzendorf leads Moravian mission
1572	Japanese kill 40,000 Christians
1517	Jesuits reach Mexico
1455	Martin Luther leads Reformation
1323	Gutenberg prints first Bible
1276	Franciscans reach Sumatra
1100	Ramon Llull trains missionaries
1054	Crusades tarnish the church
997	The Great Schism
864	Adalbert martyrd in Prussia
716	Bulgarian Prince Boris converts
635	Boniface reaches Germany
569	Alopen reaches China
432	Longinus reaches Alodia / Sudan
397	Saint Patrick reaches Ireland
341	Carthage ratifies Bible Canon
325	Ulfilas reaches Goth / Romania
250	Niceae proclaims God is Trinity
197	Denis reaches Paris, France
70	Tertullian writes Christian literature
61	Titus destroys the Jewish Temple
52	Paul imprisoned in Rome, Italy
39	Thomas reaches Malabar, India
33	Peter reaches Gentile Cornelius
	Holy Spirit empowers the Church

(Wikipedia, Timeline of Christian missions)

Resurrected 33 A.D.

Where?			When?							
			Innocence		Fallen			Glory		
			Eternity Past	4000 BC Creation	Fall to Sin No Law	1500 BC Moses' Law	Advent of Christ 0-33 AD	Church Age Kingdom Age	Great White Throne	New Heaven and Earth
Who?	God	Father	God's Perfect Fellowship	God's Perfect Fellowship with Adam in the Garden of Eden	Living in Unapproachable Light, 1 Timothy 6:16			God's Perfectly Restored Fellowship with All Mankind in the Holy City	All Restored Acts 3:21	
		Son			Pre-Incarnate, John 8:58		Incarnate, John 1:14			Paradise, Luke 23:43
		Holy Spirit			John 10:30		Everywhere, Psalm 139:7			Indwelling Believers, John 14:17
	Mankind	Living Mankind	Serving the Savior or Satan on Earth, Ephesians 2:1-5							
		Deceased Believing Mankind	Blessed in Paradise, Luke 16:22							
		Deceased Unbelieving Mankind	Punished in Hades until the final judgment, Luke 16:23 and Rev 20:13							
	Angels	Holy Angels	No Creation	No Fall No Death Gen 1:31	Serving Mankind at God's Command, Hebrews 1:14			No Hades No Dead Rev 20:3		
		Imprisoned Angels	No people							
		Fugitive Angels	Gen 1:1	No Fall	Imprisoned in Tartarus, 2 Peter 2:4 and Jude 6			Lake of Fire Prepared for the Devil and his Angels Mat 25:41 Rev 20:10	Fallen Angels Forgiven? Col 1:20 Yes? Heb 2:16 No?	
		First Beast Demon			No Unholy Angels Gen 1:31	Rebelling Against Christ				Thalaasa, Rev 20:13
		False Prophet Demon				Accusing Mankind				Lake of Fire Revelation 19:20
		Satan		1 Peter 5:8 and Revelation 12:10		Abyss Revelation 20:2				

Destiny

Ruáingga at AionianBible.org/Destiny

The Aionian Bible shows the location of eleven special Greek and Hebrew Aionian Glossary words to help us better understand God's love for individuals and for all mankind, and the nature of after-life destinies. The underlying Hebrew and Greek words typically translated as *Hell* show us that there are not just two after-life destinies, Heaven or Hell. Instead, there are a number of different locations, each with different purposes, different durations, and different inhabitants. Locations include 1) Old Testament *Sheol* and New Testament *Hadēs*, 2) *Geenna*, 3) *Tartaroō*, 4) *Abyssos*, 5) *Limnē Pyr*, 6) *Paradise*, 7) *The New Heaven*, and 8) *The New Earth*. So there is reason to review our conclusions about the destinies of redeemed mankind and fallen angels.

The key observation is that fallen angels will be present at the final judgment, 2 Peter 2:4 and Jude 6. Traditionally, we understand the separation of the Sheep and the Goats at the final judgment to divide believing from unbelieving mankind, Matthew 25:31-46 and Revelation 20:11-15. However, the presence of fallen angels alternatively suggests that Jesus is separating redeemed mankind from the fallen angels. We do know that Jesus is the helper of mankind and not the helper of the Devil, Hebrews 2. We also know that Jesus has atoned for the sins of all mankind, both believer and unbeliever alike, 1 John 2:1-2. Deceased believers are rewarded in Paradise, Luke 23:43, while unbelievers are punished in Hades as the story of Lazarus makes plain, Luke 16:19-31. Yet less commonly known, the punishment of this selfish man and all unbelievers is before the final judgment, is temporal, and is punctuated when Hades is evacuated, Revelation 20:13. So is there hope beyond Hades for unbelieving mankind? Jesus promised, "*the gates of Hades will not prevail*," Matthew 16:18. Paul asks, "*Hades where is your victory?*" 1 Corinthians 15:55. John wrote, "*Hades gives up*," Revelation 20:13.

Jesus comforts us saying, "*Do not be afraid*," because he holds the keys to *unlock* death and Hades, Revelation 1:18. Yet too often our *Good News* sounds like a warning to "*be afraid*" because Jesus holds the keys to *lock* Hades! Wow, we have it backwards! Hades will be evacuated! And to guarantee hope, once emptied, Hades is thrown into the Lake of Fire, never needed again, Revelation 20:14.

Finally, we read that anyone whose name is not written in the Book of Life is thrown into the Lake of Fire, the second death, with no exit ever mentioned or promised, Revelation 21:1-8. So are those evacuated from Hades then, "*out of the frying pan, into the fire?*" Certainly, the Lake of Fire is the destiny of the Goats. But, do not be afraid. Instead, read the Bible's explicit mention of the purpose of the Lake of Fire and the identity of the Goats, "*Then he will say also to those on the left hand, 'Depart from me, you cursed, into the consummate fire which is prepared for... the devil and his angels,'"* Matthew 25:41. Bad news for the Devil. Good news for all mankind!

Faith is not a pen to write your own name in the Book of Life. Instead, faith is the glasses to see that the love of Christ for all mankind has already written our names in Heaven. "*If the first fruit is holy, so is the whole*," Romans 11:16. Though unbelievers will suffer regrettable punishment in Hades, redeemed mankind will never enter the Lake of Fire, prepared for the devil and his angels. And as God promised, all mankind will worship Christ together forever, Philippians 2:9-11.



Hétolla zoo, tamám koun ókkol ore Añr ummot banogoi; ítara re Baf or, Fuar edde Pak-Ruhr name báptisma díyo. - Matthew 28:19